


Dill' wen dill'
Kob Ćhe
Jesucrístona'



New Testament in Zapotec, Cajonos (MX:zad:Zapotec, Cajonos)

Dill' wen dill' Kob Che Jesucrístona'

New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

f98bf0c8-4467-559d-82ab-96644a44d38f

Contents

San Mateo	1
San Marcos	56
San Lucas	90
San Juan	147
Los Hechos	189
Romanos	241
1 Corintios	262
2 Corintios	283
Gálatas	295
Efesios	302
Filipenses	309
Colosenses	314
1 Tesalonicenses	319
2 Tesalonicenses	323
1 Timoteo	326
2 Timoteo	332
Tito	336
Filemón	339
Hebreos	340
Santiago	356
1 Pedro	361
2 Pedro	367
1 Juan	370
2 Juan	375
3 Juan	376
Judas	377
Apocalipsis	379

Dill' wen dill' kob daa bzej Matewa'

Dii xoxxto' Jesucrístona'

(Lc. 3:23-38)

¹ Dga cho'en dill' nan Jesucrístona' nake' xiin dia che dii Davina' na' dii Abrahamama'.

² Abrahamama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len ben' bisheeka'. ³ Na' Judána' goke' xa Fáreza' len Zárana', na' xneeka' wlie' Tamar. Na' Fáreza' goke' xa Esróma', na' Esróma' goke' xa Arama'. ⁴ Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. ⁵ Na' Salmónna' len Rahaba' gokgake' xaxna' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaína'. ⁶ Na' Isaína' goke' xa Davina', na' Davina' goke' xa Salomónna'. Na' xna' Salomónna', beena' bikaa Davina', goke' xool dii Uríaza'.

⁷ Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. ⁸ Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. ⁹ Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. ¹⁰ Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. ¹¹ Na' Josíaza' goke' xa Jeconíaza' len ben' bisheeka', legaken' zoa kana' bche'byen ben' Babilóniaka' ben' Israelka' lalle'ka'.

¹² Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' xa Zorobabela'. ¹³ Na' Zorobabela' goke' xa Abiuda', na' Abiuda' goke' xa Eliaquima', na' Eliaquima' goke' xa Azora'. ¹⁴ Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. ¹⁵ Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'. ¹⁶ Na' Jacoba' goke' xa Joséna' ben' che Maríana', xna' Jesúza', beena' lekzka' nsi'gake' Cristo.

¹⁷ Na' ka' gok wzoa shda' diaka' wzololenzan dii Abrahamama' na' biyollenan dii Davina'. Na' wde zi shda' diaka' bizzololenan dii Davina' axt ka bche'byengake' ben' Israelka' Babilóniana'. Na' wizak zi shda' diaka' bizzolon ka bche'byengake' legake' Babilóniana' axt ka wzoa Crístona', beena' bsel' Chioza' inabi'e.

Ka golj Jesúza'

(Lc. 2:1-7)

¹⁸ Ki gok ka golj Jesucrístona': Xnee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. ¹⁹ Na' Joséna' beena' ba nakan ikeene', nake' to ben' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i. ²⁰ Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e. ²¹ Na' sane' to bi' byodo' na' wsi'ob' Jesús, la' leban' yislab' ben' yell cheb'ka' lao saaxya che'ka' kwenche bi kwiayi'gake'.

²² Gok yog' diiki kwenche gok ka wna dii beena' wdixjee daa goll Chioza'ne', chi'e:

²³ To nool wew' wee, na' sane' to bi' byodo', na' wsi'gake'b' Emanuel.

Na' Emanuel zejín: Chioza' zoalene' cho'.

²⁴ Na' ka biban Joséna', bene' kon ka goll anjl che Xancho Chioza'ne' na' wkee Maríana'. ²⁵ Na' bi wdelle'ne' axt ki wxanche' bi'do'na', na' bsi'eb' Jesús.

2

Wyaj ben' sin'ka' jawiagake' Jesúza'

¹ Jesúza' golje' yell Belénna', daa llia gana' mbani Judeana', kana' chnabia' Heródeza'. Na'ch bał ben' sin', ben' nsed che beljka', za'gake' ka de gana' chla'lə wbillá', bllintegake' Jerusalénna'. ² Na' che'gake':

—¿Gani rey che ben' Israelka', bi'na' ba golj? Nezingto' ba goljb' la' ka de gana' chla'lə wbillá' ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

³ Na' ka beni Heródeza' daa wnagake', gokshejlallee, na' lekzka' yog'lol ben' Jerusalénka'. ⁴ Na'ch Heródeza' goxe' yog'lol bxozka' chnabia', na' ben'ka' chli' chsedi ley che dii Moiséza', na' wnable' legake' gan chiyał' galj Crístona', beena' wsel' Chioza' inabi'e. ⁵ Na'ch gollgake'ne':

—Yell Belénna' daa mbani Judeanan' galje', la' kan' bzej to ben' wdixjee daa goll Chioza' le', chi'e:

⁶ Na' li', yell Belén llio' gani mbani Judeani, aga inacho nako' dii liizelozi bibi zakii ladj yellka' zakii llia Judeani; la' lawo'ni ichej to ben' inabi'e, na' gap wwie' ben' Israelka', ben'ka' nak yell cha'.

⁷ Na'ch Heródeza', ka kono gokbe'zi goxe' ben' sin'ka' na' wnable' legake' batyen'an ble'gakile' belja'. ⁸ Na'ch bselee legake' Belénna' na' golle' legake': —Li shaj, na' li lljadiljyoll bi'do'na', na' kat' yillelileb' na' yidnale nad' kwenche len' sha' llje'lawaab'.

⁹ Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zejan xan yabana' llialon lawe'ka', na' ka bllinan gana' zoa bi'do'na', na' na'zə wzoan. ¹⁰ Na' ka bizle'i ben' sin'ka' belja', le bibagakile'. ¹¹ Na'ch ka wyoogake' loo yooná' ble'gakile' bi'do'na' len xna'b' Maríana'. Na'ch bchek' xibe'ka' na' be'la'ogake'b'. Na' wlejgake' or, na' yal zix, na' lekzka' len nill' che to yag dii chla' zix daa le mirra, na' be'gake'n cheb'. ¹² Ka biyoll be'la'ogake'b', Chioza' bsi'nile' legake' lo yel bishgal che'ka' kwenche bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

Bxonjgake' wza'gake' Egíptona'

¹³ Ka wde biza' ben' sin'ka', to anjl che Xancho Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li shaj gana' mbani Egíptona'. Na' na'z soale axt kat'ch inia' li' yiza'le. La' Heródeza' yiyilje' bdo'na' kwenche wite'b'.

¹⁴ Na'ch lli wyaste Joséna' na' bchi'e bdo'na' len xna'baa, na' wal-lə wza'gake' zejlengake'b' gana' mbani Egíptona'. ¹⁵ Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to

ben' wdixjee daa golle'ne', kana' wne': "Nad' biñia' bi' cha'na' kwenche biza'b' gana' mbani Egíptona'."

Ben Heródeza' mandad witgake' bi'do'ka'

¹⁶ Na' ka gokbe'i Heródeza' bi ben ben' sin'ka' ka golle' legake', le blee. Na' bene' mandad witgake' yog'lol bi' byodo'ka' lle' yell Belénna' len yellka' ndil nllagan, bdo' cheenka' axt bi' chop yizi, bsakee ka to yizka' ba gok ble'i ben' sin'ka' belja'. ¹⁷ Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

¹⁸ Kwe' wbell na' gakyeshii ben'ka' lle' yella' le Ramá.

Noolka' nak xiin dia che dii Raquela' ni to kono cheengakile' gonxenlall' legake', daa wit bi'do' che'ka'.

¹⁹ Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

²⁰ —Wyas, biche' bi'do'na' len xna'baa na' li yiyaj gana' mbani Israela', la' ba wit ben'ka' cheengakile' witgake'b'.

²¹ Na'ch wyas Joséna' na' bichi'e bi'do'na' len xna'baa na' biyajgake' gana' mbani Israela'. ²² Na' ka wnezi Joséna' Arquelawa' ba chñabi'e lo laz dii xe' Heródeza', na' bleebe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'. ²³ Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii ben'ka' wdixjee daa goll Chioza' legake' kani'yi che Jesúza', wnagake' wsi'gake'ne' ben' Nazaret.

3

Juanna', beena' bchoa ben' nisa'

(Mr. 1:1-8; Lc. 3:1-9, 15-17; Jn. 1:19-28)

¹ Na' do kana', Juan, beena' bchoa ben' nisa', wyaje' to latj gana' bibi chashj chleb gana' mbani Judeana', na' wdixje'ile' ben'ka' chdi'a chllag na', ² chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

³ Na' dii Isaíaza', beena' wdixjee daa goll Chioza'ne', wne' che Juanna': To ben' gosyee to lo latj ga bibi chashj chleb, na' ine':

"Li se kwas wzenagle che Xanchona' na' wsalj yichjlall'do'leka' kat' zee."

⁴ Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa. ⁵ Na' ben'ka' lle' yell Jerusalénna', na' doxen gana' mbani Judeana' na' yellka' lla gaoz yao Jordánna' jazenaggake' dillaa cho'e. ⁶ Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷ Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—iLe' naklikzle ka bel zñia! ¿Achakile wak wxonjile' ye! zak'zi' daa wsel' Chioza'? ⁸ Li gon ka gakbe'i ben' nan dii li ba biyaj bilenile. ⁹ Na' bi gakzile bibi ye! zak'zi' ile'ile daa inazle: "Neto' naknto' xiin dia che dii Abrahamá'." Dii li nia' le', axt yajki wak gon Chioza' xiin dia che dii Abrahamá'. ¹⁰ Yog'lol-le shi bi chonle ka chiyoollalii Chioza' na' gak chele ka chak che to yag dii chbia dii zix dii bi chak wen, na' lii chchogtegabe' axt xanin na' chzal'gake'n lo yi'na'. ¹¹ Dii li nad' chchoa' le' nisa' daa chiyaj

chilenile, per beena' zi' za' kollaana' napche' ye! wak xench ka nad', na' ni bi zakaa gak' xrose' kwenche galj' xele'na'. Len' gone' ka yidsoa Espiritu Sántona' loo yichjlall'do'lena', ka le' chiyaj chilenile, na' ben'ka' bi chiyaj chileni wzalee legake' lo yi' gabila'. ¹²Na' gone' che ben' yell-lioni ka chon beena' nox' yag xozaa daa chpa'ile' trígona' na' kooshawee trígona' na' wzeye' beb cheyinna' lo yi'na' daa biga yiyolkzæ.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

¹³Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'. ¹⁴Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'læ za'zo' kwenche wchoa' li' nisa'.

¹⁵Per Jesúza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

¹⁶Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espiritu che Chioza' chetje' ka to palom na' jsoalene' le'. ¹⁷Na'ch bengakile' shii Chioza' zoa yabana' chi'e':

—Beenin nake' Xiin', beena' chakid', na' le' chibaid' le'.

4

Goki dii xiwaa gonan ka wzenag Jesúza' cheyin

(Mr. 1:12-13; Lc. 4:1-13)

¹Na'ch Espiritu che Chioza' bchi'e' Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

²Na' ka wde choa lla choa yel bibi wdawe', na' wdone'. ³Na'ch bllin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

⁴Na'ch goll Jesúza':

—Cho'a xtill' Chioza' nan: “Aga toz ye! wawa' choe'n ye! mban che benecha', san lekzka' Cho'a Xtill' Chioza' choe'n ye! mban.”

⁵Na'ch dii xiwaa bche'n le' Jerusalénna' daa nak yell che Chioza' na' blepán le' yichj yoodo'na' gana' nak sib wal. ⁶Na'ch gollan le':

—Shi leilo' nako' Xiin' Chios, lla bixit'shki ni. La' Cho'a Xtill' Chioza' nan: Wselee anjl che'ka' gap wwiagake' li', na' gox'gake' li' kwenche ki koo wchewo' yajka'.

⁷Na' goll Jesúza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezæ xenlalloo shi gone' ka ba wne'.”

⁸Na'ch stokzæ bizche' dii xiwaane' to lo yaa sib wal na' bliin le' yog' yellka' le' yell-lioni na' ye! zakii cheyinka'. ⁹Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

¹⁰Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

¹¹Na'ch biza' dii xiwaa kwit Jesúza' na' bllin bal' anjlka' be'gake'ne' kon bi byalljile'.

Wzolo Jesúza' choe' cho'a xtill' Chioza' gana' mbani Galileana'

(Mr. 1:14-15; Lc. 4:14-15; 5:1-11; 6:17-19)

¹² Ka beni Jesúza' wloogake' Juanna' lillyana', bizée biyaje' gana' mbani Galileana'. ¹³ Na' bizée yell Nazareta' na' jazoe' yell Capernaúma', to yell xen dii lia cho'a nido'na' gana' mbani yell-lío che dia che dii Zabolónna' na' dii Neftalína'. ¹⁴ Na' daa jazoe' na', gok ka wna dii Isaiáza', beena' wdixjee daa goll Chioza'ne', daa wne':

¹⁵ Ka nak yell-lío daa naki che dia che dii Zabolónna' na' dii Neftalína', daa lia shlaa yao Jordánna',

gana' xoa nez daa zej cho'a nido'na'

daa lia gana' mbani Galileana',

gana' lle' zan beñ'ka' bi nak beñ' Israel,

¹⁶ beñ'ka' lle' na' gok yichjlall'do'eka' shgasj shchoł,

na' Chioza' ba bselee to beeni' xen lawe'ka'.

Lao beñ'ka' lle' gana' chñabia' yel' wita'

ba chzeeni' beeni' che Chioza'.

¹⁷ Na' wzolo Jesúza' chyixje'ile' beñ' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

Wlej Jesúza' tap beñ' wxen bel kwenche gongake'ne' txen

(Mr. 1:16-20; Lc. 5:1-11)

¹⁸ Na' ka zej Jesúza' cho'a nido' che Galileana' ble'ile' chop bish' beñ' wxen bel chzaj'gake' yixja' loo nisa' chzengake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés. ¹⁹ Na'ch Jesúza' chi'e legake':

—Li da, dino nad', na' kon ka chonle naa chbejle belki loo nisi, ka'kzan gonle yibejle beñ' lao dii mala'.

²⁰ Na' ka golle' legake' ka', lii bkwaan'tegake' yixj che'ka' na' zejlen-gake'ne'.

²¹ Na' zi lat'chga wza'gake' bizle'i Jesúza' zi chop bish' beñ', beena' to lie' Jacobo na' beena' sto lie' Juan, beñ'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' belka'. Na' lekzka' goll Jesúza' Jacóbona' len Juanna' shajlengake'ne'. ²² Na' lii bkwaan'tegake' barkwa' len xe'ka' na' janogake' Jesúza'.

Jesúza' chli' chsedile' beñ' zan

(Lc. 6:17-19)

²³ Na' wda Jesúza' yog' yellka' lia doxen gana' mbani Galileana', chli' chsedile' beñ' Israelka' gana' chdop chllaggake' choe'lwilgake' Chioza', cho'e dill' wen dill' kob che yel' wñabia' che Chioza', na' biyone' yog' beñ' che'i wde wdeli yillwe'. ²⁴ Na' doxen gana' mbani Síriana' wze dill' daa chon Jesúza', na' jwa'gake' yog'lol beñ'ka' che'i wde wdeli yillwe', beñ' chey chla, beñ' yoo dii xiw', beñ' chaz shon, na' beñ' net ni'a nee. Na' Jesúza' biyone' legake'. ²⁵ Na' beñ' zan inleeb jano le', beñ'ka' lle' yellka' mbani Galileana' na' yellka' mbani Decápoliza', na' beñ'ka' lle' yell Jerusalénna' na' yellka' sto mbani Judeana', na' beñ'ka' lle' yellka' lia shlaa yao Jordánna'.

¹ Ka ble'i Jesúza' beñ' zan ba nogake'ne', na'ch wyep'e' to lo yaa, na' wchi'e. Na'ch beñ'ka' nalgake'ne' txen jabig'gake' kwite'na'. ² Na' wzolo Jesúza' chli' chsedile' legake', chi'e:

Beñ'ka' zoa mbalaz
(Lc 6:20-23)

³ —Chakomba beñ'ka' chakbe'gakile' chyallgakile' galden Chioza' legake', la' legaken' yillingake' yabana' gana' chñabia' Chioza'.

⁴ 'Chakomba beñ'ka' chbellyesh', la' Chioza' yizoe' legake' mbalaz.

⁵ 'Chakomba beñ'ka' nak beñ' gaxjlall', la' wllin lla Chioza' wi'e legake' yell-lioni.

⁶ 'Chakomba beñ'ka' chzelall' galkake' beñ' li beñ' shao', la' Chioza' ine' nalgake' beñ' wen lawe'na'.

⁷ 'Chakomba beñ'ka' chiyeshii beñ', la' ka'kzə yiyeshii Chioza' legake'.

⁸ 'Chakomba beñ'ka' nxi nyech yichjlall'do'eka', la' legaken' ile'gakile' Chioza'.

⁹ 'Chakomba beñ'ka' chon to dii byen soalen ljwellgake' mbalaz, la' ina beñ' dii likzan nalgake' xiin Chios.

¹⁰ 'Chakomba beñ'ka' chiya dii chen chle'i daa chongake' ka cheeni Chioza', la' legaken' yillingake' gana' chñabi'e.

¹¹ 'Chakomba le' kat' chiya dii na beñ' chele na' chiya dii chongakile' le', na' kat'ka' chiyiljal'gake' bittezə dill' wxiye' chele daa chonlilall'le nad'.

¹² Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii beñ'ka' wdixjee daa goll Chioza' legake'.

Nakle ka zed' na' ka beeni'
(Mr. 9:50; Lc. 14:34-35)

¹³ 'Len' nakle ka zedaa ladj beñ' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj beñ' len.

¹⁴ 'Len' nakle ka to beeni' ladj beñ' yell-lioki. To yell dii llia to lo yaa, zit'lə nla'n, na' bi ngashaan. ¹⁵ Ni biga zoa to beñ' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoona'. ¹⁶ Ka'kzan le', li gon to dii byen gonle daa nak wen kwenche ile'i beñ' na' we'la'ogake' Xacho Chioza' zoa yabana'.

Jesúza' cho'e dill' che ley che dii Moiséza'

¹⁷ Bi galkzile bid' kwenche yikwas' ley daa bzej dii Moisézan' wa daa bli' bsedi dii beñ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'lol ka na leya' na' daa bli' bsedi beñ'ka' wdixjee daa goll Chioza' legake'. ¹⁸ Dii li nia' le', shlak bin' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'lol daa blie' bia' gak. ¹⁹ Daan, nottezə beñ' chyishje' to daa nllia Chioza' bia' goncho, la'kzi dii bi lliatotek, na' shi wliile' beñ' yoblə gone' ka chone', bitek bi zakee yabana' gana' chñabia' Chioza'. San beena' gon daa nllia Chioza' bia' goncho na' wliile' beñ' yoblə gone'n, beenan' gake' to beñ' zakii yabana' gana' chñabia' Chioza'. ²⁰ Na' nia' le', aga wak yillinle gana' zoa Chioza' chñabi'e shi toz ka chonlenle fariseoka' na' beñ'ka' chli' chsedile' leya', chiyal' wzenagchle che Chioza' aga ka legake'.

Bi chiyal' witocho beñ'
(Lc. 12:57-59)

21 Na' lēkzka' che' Jesúza' lēgake':

—Nezkzile goll dii Moiséza' dii xozxto'choka': “Bi chiyał' wito' beñ'. Ła' beena' wit to beñ' chiyał' guete' daa bene' ka'.” 22 Per nad' nia' le', nottez beena' chlee bish' ljwelle'na' chidołee tie' lo yeł' zak'zi'na'. Na' lēkzka' beena' chzoazi'yee bish' ljwelle'na', ben'ka' chnabia' chiyał' wwiagake' nak gongake' che'; na' beena' chñie' bish' ljwelle'na' dill' zibia', chidołee wzał' Chioza' le' lo yi' gabiła'.

23 'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li', 24 na'z bkwaan daa noxoo, zigaate chiyał' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

25 'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. Ła' shi ba blino' lao beena' wchogbia' cho', na' gone' li' lo na' beena' wseje' li' lillyana'. 26 Dii li' nia' li', aga wibeje' li' lillyana' axť ki chixjo' doxen daa chiyał' chixjo'.

Bi chiyał' inelen ljwell ben'

27 'Nezkzile wna dii Moiséza': “Bi chiyał' ineleno' nool bi nak nool cho'.” 28 San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chnelene' nool yoblə.

29 'Shi jalawo' de shłina' chonan ka gono' dii mala', naklan wen wtoljo'n na' choon'o'n. Ła' wenchan soa tłaaz jalawo'na' aga ka daa yiyaj doxentio' lo yi' gabiła'. 30 Na' shi noo de shłina' chonan ka gono' dii mala', naklan wen wchogo'n na' choon'o'n, la' wenchan soa tłaaz noona' aga ka daa yiyaj doxentio' lo yi' gabiła'.

Bi nakan wen yilaa ben'ka' nshagna'

(Mt. 19:9; Mr. 10:11-12; Lc. 16:18)

31 'Nezkzile wna dii Moiséza': “Nottez beena' yilaa nool che'na' chiyał' chas to yish we'n dill' nan bilaagake'.” 32 San nad' nia' le' shi to beñ' byo yilee xoole'na' la'kzi xoole'na' bi chnelene' beñ' yoblə, daa yileene' chone' ka yikaa noola' beñ' yoblə na' gake' ka to noolə zoalentie' beñ' che'na' na' chnelene' beñ' yoblə. Na' beena' yikee noola' nłaa beñ' che'na', lēkzka' chone' ka chon beena' chñelen xool beñ' yoblə.

Bibi wzoacho de taschiw kat' bin wchebcho

33 'Lēkzka' nezkzile golle' dii xozxto'leka': “Bi wkwaanzo' ka'zə daa ba bchebo' lao Xancho Chioza' shi bzoatio' bi bzo' de taschiw.” 34 San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'. 35 Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lēnna' yell che beena' chnabia' doxen. 36 Na' ni bi wzoazle yichjlēna' de taschiw, la' aga wak gonle ka yiyak ni to yish' yichjlēna' yish' bez' shi nakan dii gasj wa gonle ka yiyakan dii gasj shi nakan yish' bez'. 37 San kon inale “wakan” wa inale “bi gakan”, la' shi chzoale de taschiw bichłə wa nochłə, dii malan' chonan chonle ka'.

Chiyał' gakicho beñ'

(Lc. 6:29-30)

38 'Lēkzka' nezkzile' wna dii Moiséza': “Shi to beñ' wshoshje' tłaaz jalawo'na' lēkzka' yiyono' che'. Na' shi to beñ' wxope' leyo'na', lēkzka' yixopo' leye'na'.” 39 San nad' nia' le': Bi yizi'o wzon che beñ' mala'. Shi

no kap' xagoona' tlaa, bi'e daa zi shlaa. ⁴⁰ Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'. ⁴¹ Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro. ⁴² Na' notteza ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

Chiyal' gakicho ben'ka' chakzbangakile' cho'

(Lc. 6:27-28, 32-36)

⁴³ 'Na' lekzka' nezile wngake': "Goki bish' ljwello'na' na' bwiyi ben'ka' chakzi' chakzbangakile' li'." ⁴⁴ San nad' nia' le': Li' gaki ben'ka' chakzbangakile' le', li' inabi Chioza' gak wen che ben'ka' chsak'zi'gake' le'. ⁴⁵ Shi gonle ka', na'ch inezi ben' nakle xiin Xacho Chioza', beena' zoa yabana'. La' le' chone' ka chla' wbillla' lao ben' mal na' lao ben' wen, na' chone' ka chak yeja' lao ben' chon wen na' lao ben' chon mal. ⁴⁶ Na' shi to ben'ka' nllagzile chakile, aga bi zjanayin, la' ka'klen chon ben' wichixjka' ben'ka' chakile le ben' mal nakgake'. ⁴⁷ Na' shi to ben'ka' nllagzile chwaple chiox, ¿garan de dii wenna' chonle? La' ka'klen chon ben'ka' bi nombia'gake' Chioza'. ⁴⁸ Li' gak dowalj ben' li' ben' shao' ka nak Xacho Chioza' zoa yabana', nake' dowalj ben' li' ben' shao'.

6

Chiyal' gakencho ben'

¹ 'Bi wli' wzez chele ladj ben' nan nakle ben' wen. La' shi kwencheza ile'i beñaan chonle daa nak wen, bibi laxjle gon Xacho Chioza', beena' zoa yabana'. ² Na' kat' chaklenle ben'ka' chyallj chchini, bi wzelen dill', ka chon ben' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwenche we'la'o ben' legake'. Dii li' nia' le', daa chole'la'o ben' legake', lennan' laxje'ka'. ³ San le', kat' chole'le ben' bi dii chole'lene', bi gonlen ka ile'i ben'. Na' ni to ben' bi ye'lene' bin chonle. ⁴ San li' gaken ben' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwillcho Chioza'

(Lc. 11:2-4)

⁵ 'Na' kat' choe'lwill-le Chioza', bi gonle ka ben' wxiye'ka'. Legake' choollall'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' ben' kwenche ile'gakile' ka chongake'. Dii li' nia' le', daa chle'i ben' ka chongake', lezannan' laxje'ka'. ⁶ San le', kat' we'lwill-le Chioza', li' yiyoo loo lill-lena' na' li' wsej puerta', na' li' we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

⁷ 'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'. ⁸ Bi gonle ka chongake', la' Xacho Chioza' ba nezkzile' bi daa chyalljile ka zi' inablalen. ⁹ Kat' we'lwill-le Chioza', kin inale:

Xanto' Chios, ben' zoa yaba,

we'la'oshga yog'lol ben' li'.

¹⁰ Na' inabia'gacho' loo yichjlall'do' yog'lol ben',

kwenche gak lo yell-lioni ka chaklalloo, ka chak yabana'.

¹¹ Ka nak daa chono' cheej chaonto' yog' lla, bengachan naanlla.

¹² Wxi'xen chento', ka chon neto' chzi'xennto' bittezä dii choni ben' neto'.

13 Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

La' lin' napo' yel' wñabia', na' yel' wak, na' lin' chido_{oo} shoo balaan xen zejli kani. Kan' nakan.

14 'La' shi le' chzi'xenle che ben' shi bi chongakile' le', ka'kzə Xacho Chioza' zoa yabana' si'xene' chele. 15 San shi le' bi chzi'xen che ljuwell-le, ka'kzə Chioza', beena' nak Xale, bi si'xene' dii malka' chonle.

Daa chiyal' goncho kat' zoacho wbas'

16 'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon cho'alawe'ka' nyesh' kwenche gakbe'i ben' bi neej naogake'. Dii li nia' le', daa gakbe'i ben' daa chongake', lezannan' laxje'ka'. 17 San le', kat' soale wbas', li wpaayichjlena' na' li chib li wxis cho'alaolena' 18 kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

Yel' shawaa daa de yabana'

(Lc. 12:33-34)

19 'Bi wtop wshagle yel' wni'ana' yell-lioni, la' bal diika' chaljan baka' chlliyai'gakban, na' balan chibia leyin na' chbiayi'gakan, wa choo wbanka' na' chkaagake'n. 20 San li gon ka gat' yel' shao' chele yabana', la' daa de yabana' bi galjan bado' wlliyai'ban, ni bi yibia leyin, ni bi gak sho' wbanna' ikeen. 21 La' gana' de yel' shao' chelena', na'kzan se yichjlall'do'lena' wneyi.

Jalaochoki nakgakan beeni' che kwerp chechoni

(Lc. 11:34-36)

22 'Jalaochoki nakgakan beeni' che kwerp chechoni. Shi jalaochoki chle'gakin kwasol, doxen kwerp chechoni zoan lo beeni'na'. 23 Per shi bi chle'i jalaochoki, kwerp chechoni zoan lo yel chol'a'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen na' lekzka' gontecho Chioza' txen

(Lc. 16:13)

24 'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' yel' wni'ana' cho'.

Bi kwekyichjcho diika' chyaljicho

(Lc. 12:22-31)

25 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techle yel' mban chechona' aga ka daa cheej chaocho, na' zak'tech kwerp chechona' aga ka xalaanchona'. 26 Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə? 27 Na' ni tole bi gak yischooch yel' mban chelena' zi shloll la'kzi nall inleeb zele wneyi cheyin.

28 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do. 29 Per nia' le', ni dii Salomónna', beena' wdapchga yel' shao'ka', bi bllin gak xe'na'

xochi ka yejdo'ka'. ³⁰ Na' shi Chioza' none' yejdo'ka' ze lyixaa xochi, la'kzi nakan de toldeza na'tech chtop ben' len na' chzeyen, zalechla le', gontechle' wen chele gone' xalaanle la'kzi bitek chajle'le gaklene le'? ³¹ Na' bi kwek yichjzle inazle: "zBin yeej gaocho?" wa "zNak goncho gat' xalaancho?" ³² La' ben'ka' bi nonlilall'gake' Chioza' to daaza chi' yichjgake'. Per Xachona', beena' zoa yabana', nezczile' chyalljile yog' diiki. ³³ Na' daa llialote chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile. ³⁴ Bitek kwek yichjle shi wyaj wdele llaka' zi za' la' to to lla nsa' dii zed cheyin.

7

Bi chiyal' yiya yiyiljcho ben'

(Lc. 6:37-38, 41-42)

¹ 'Bi yiya yiyiljle ben', kwenche bi yiya yiyilj Chioza' le'. ² La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'. ³ zBiche chwiazoo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴ Shi bi chle'ilo' kwagaa yoo loo jalawo'na', znakra gono' yoo bish' ljwello'na': "Benshki yibej' bicha' yoo loo jalawo'na'?" ⁵ zBen' wxiye! Zigaate bwia cho'na' na'tech wwoo' che bish' ljwello'na'.

⁶ 'Na' bi gonzle byen we'lenle xtill' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choolall'gakb gaogakb.

Chiyal' inabicho Chioza' gaklene' cho'

(Lc. 11:9-13; 6:31)

⁷ Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n. ⁸ La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljkgake' sho'e.

⁹ 'Le' zoa xiinle, shi inabib' le' to yetxtil aga we'leb' to yaj. ¹⁰ Wa shi inabib' le' to bel yaa, aga we'leb' to bel znia. ¹¹ Shi le' naktele ben' mal chak we'le xiinleka' daa nak dii wen, zalechli Xacho Chioza' zoa yabana' ki gone' le' dii wen dii shawaa shi inabilene'n?

¹² 'Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid

(Lc. 13:24)

¹³ 'Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. ¹⁴ Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa

(Lc. 6:43-44)

¹⁵ 'Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chlliayi'gake' ben', ka chon to ba znia. ¹⁶ Ka ile'ile ka nsa' chegake' na' gakbe'ile non nakgake'. La' nezczile' aga wishibcho uvana'

to lo yag yesh' na' lekzka' aga wishibcho yixwewa' to lo yag yesh' yaa. ¹⁷ Ka'kzan yag wenna' chbian dii wen, na' yaga' daa bi nak wen chbian dii bi nak wen. ¹⁸ La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. ¹⁹ Yog' yag dii chbia dii bi nak wen, chchoggake'n na' chzeygake'n. ²⁰ Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chnabi'e
(Lc. 13:25-27)

²¹ 'Aga yog' ben'ka' na nad': "Xan, Xan", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'. ²² Kat'ka' illin llana' yizia' kwent che ben', zangake' inagake' nad': "Xan, Xan, neto' wdixjeento' daa wno', na' kon yel' wak cho'na' bibejnto' dii xiw'ka' yoo ben' na' bennto' dii zan yel' wak." ²³ Na'ch yepgakee: "Biga bembia' le'. Li kwas ka'la, le' ben' wen dii mal."

Chop ben' bengake' twejyoo
(Lc. 6:47-49; Mr. 1:22)

²⁴ 'Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj. ²⁵ Na' ka gok yejsiwaa, bgol yaoka', na' wzechga be'na' nan wllig'gakan yoono', per bi billeen daa chi'cha leninna' lo yaja'. ²⁶ Per beena' cheni cho'a xtilaani na' bi chone' ka nia', nake' ka beena' bi chajni, beena' bxe lille'na' lo yoxa'. ²⁷ Na' ka gok yejsiwaa, bgol yaoka', na' wzechga be'na' na' bllig'gakan yoono' na' wlliyi'tekzan.

²⁸ Na' ka biyoll be' Jesúza' dillii, bibani ben'ka' ka chli' chsedile', ²⁹ daa bli' bsdile' legake' lega ben' za'len yel' wñabia', aga ka chli' chsedi ben'ka' chzajni legake' leya'.

8

Jesúza' biyone' to ben' che'i léprana'
(Mr. 1:40-45; Lc. 5:12-16)

¹ Na' ka biyetj Jesúza' lo yaana', ben' zan zinogake'ne'. ² Na' kwite'na' bllin to ben' che'ile' lepra', na'ch bchek' xibe' lawe'na', chi'ene':

—Xan, nezid' wak yikwaso' yillwe'ni chak' shel' guenilo'.

³ Na'ch Jesúza' bxo'a neena' yichje'na', chi'ene':

—Cheenid'x. Na' naate yikwasa'n.

Na' kon ka golle' ka', lii biyakteyi beena'. ⁴ Na'ch che' Jesúza'ne':

—Ni to kono yoo ka nak daa ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezi ben' ba biyakilo'.

Biyon Jesúza' xmos xan soldadka'
(Lc. 7:1-10)

⁵ Ka billin Jesúza' yell Capernaúma' lii bllinte to xan soldad lawe'na', na' got'yoile'ne', ⁶ chi'ene':

—Xan, xmosaa die' lillaa, na' net tlaa kwerp che'na' na' le chey chle'.

⁷ Na'ch che' Jesúza'ne':

—Na' sa' yiyonee.

⁸ Na' che' xan soldadka'ne':

—Xan, aga zakii nad' kwenche shoo loo yoo lillaa. Kon ben mandad wiyakile' na' wiyakkzile'. ⁹ Nia' ka' la' zoa ben' chnabia' nad', na' nad'

lekzka' chnabia' soldad cha'ka'. Kat' chep' toe': "Wyaj ni'", na' chaje'; na' kat' chep' stoe': "Da ni", na' chide'; na' kat' chizep' xmosaa: "Ben dga", na' chone'n.

¹⁰ Ka beni Jesúza' cho'a xtilleena', bibanile' na' chi'e beñ'ka' nogake' le': —Dii li nia' le', bigañ' lltia' to beñ' Israel beñ' gonlilallee nad' ka chonlilall' beeni nad'. ¹¹ Na' nad' nia' le', beñ' zan beñ' zaak doxen yell-lioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chnabia' Chioza'. ¹² Na' ka nak beñ'ka' wlej Chioza' nan lljazoagake' gana' chnabi'e, zane' wzalee gana' shgasj shchol, gana' kwellyesh'gake' na' gaoyaaaxaj leye'ka' daa le gakshejlall'gake', daa bi goongakile' inabi'e legake'.

¹³ Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

Biyon Jesúza' tobiin che Pédrona'

(Mr. 1:29-31; Lc. 4:38-39)

¹⁴ Na'ch wyaj Jesúza' lill Pédrona', na' ble'ile' de tobiin che'na' yo'e dii lana'. ¹⁵ Na' bex' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan beñ'ka' bi shao'

(Mr. 1:32-34; Lc. 4:40-41)

¹⁶ Na'ch ka ba chxoa wbillla', jwa'gake' beñ' zan gana' zoa Jesúza', beñ' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' beñ' bi shao'. ¹⁷ Gok ka' kwenche gok ka' wna dii Isaíaza', beena' wdixjee daa goll Chioza'ne', daa wne': "Le' bikee yillwe'ka' che'icho na' bene' ka bigaa yel' chey chla chechona'."

Beñ'ka' cheengakile' lljanogake' Jesúza'

(Lc. 9:57-62)

¹⁸ Na' ka ble'i Jesúza' beñ' zan inleeb ba nechjgake'ne', bene' mandad telene' beñ'ka' nakgake'ne' txen shlaa niso'na'la. ¹⁹ Na' wbig' to beñ' chli' chsedi leya', chi'ene':

—Maestro, cheenid' sa'len' li' gattezə shajo'.

²⁰ Na'ch che' Jesúza'ne':

—Bez'ka' nongakb yech ga chiyoogakb, na' byindo'ka' non lilldo'gakb, san nad', Beñ' Bsel' Chioza' Yell-lioni, bibi lill' de.

²¹ Na' bchej sto beñ' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

²² Na'ch goll Jesúza'ne':

—Da, dino nad'. Wikwash'kzə ljwell beñ' wetka'.

Jesúza' bkweze' be'na' lo niso'na'

(Mr. 4:35-41; Lc. 8:22-25)

²³ Na'ch wyoo Jesúza' loo barkwa' len beñ'ka' ba nakgake'ne' txen. ²⁴ Na' shlak zej barkwa' wtese'. Na' wzolo wzechga be'na' lo niso'na', na' wzolo chas chataan na' biyoll nisa' loo barkwa'. ²⁵ Na'ch beñ'ka' nak Jesúza' txen jasangake'ne', na' che'gake':

—jXan', bisla cho'! jBa chbe'cho yel!

²⁶ Na'ch che' Jesúza':

—¿Berache chlleblikzle? ¿Biche bi nxenilall'le nad' kwasloj?

Na'ch wyase' bsheshlene' be'na' len nido'na', na' wlezgakan. ²⁷ Na' ben'ka' lle'len Jesúza' loo barkwa' bibangakile' ka bene', na'ch che' ljjwellgake':

—¿Noran nak beeni, lla? Axt be'na' na' nido'na' chzenaggakan che'.

Chop ben' Gadara yoogake' dii xiwaa

(Mr. 5:1-20; Lc. 8:26-39)

²⁸ Na' ka bllin Jesúza' yell-liona' mbani Gadárana' daa lla shlaa nido'na', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoogake'. ²⁹ Na' besyaagakan che'gakan Jesúza':

—¿Biche za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

³⁰ Na' gaos lle' ba zan kush chaogakb. ³¹ Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjlall'do' ben'ki, we'gacho' latj yiyoonto' kushka'.

³² Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lli bxonjtegakb na' jabixgakb to cho'a yaa na' bxoptegakb loo nido'na' na' wche'gakb yel.

³³ Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'.

³⁴ Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

9

Jesúza' biyone' to ben' net tlaa kwerp che'na'

(Mr. 2:1-12; Lc. 5:17-26)

¹ Na' biyoo Jesúza' to loo barkw, na'ch bilag'gake' shlaa nido'na' na' billine' yell che'na' gana' wzee. ² Na' bllinlengake' to ben' net ni'a neena' lawe'na', nxoogake'ne' to lo daa. Na' gokbe'i Jesúza' le nonlilall'gake'ne', na'ch golle' ben' we'na':

—Btiplalloo, xiin', ba biyakxen xto'loona'.

³ Na'ch bal ben'ka' chli' chsedi leya' che' ljjwellgake': “Ba chonz kwin beeni ka Chioza' daa ne' ka'.” ⁴ Na' gokbe'i Jesúza' daa wza'lall'gake', na' chi'e legake':

—¿Biche chza'lall'zle ka'? ⁵ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez'”? ⁶ Na' wliid' le', nad', Ben' Bsel' Chioza', nap' yel' wnabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Biyas, bitob daa cho'na', na' biyaj lillo'na'.

⁷ Na'ch biyas beena' net ni'a neena' na' ziyaje' lille'na'. ⁸ Na' ka ble'i ben'ka' ka gok, bibangakile', na' be'la'ogake' Chioza' daa bi'e yel' wak xenna' to ben' yell-lío.

Wlej Jesúza' Matewa' kwenche gone'ne' txen

(Mr. 2:13-17; Lc. 5:27-32)

⁹ Ka biza' Jesúza' na', ble'ile' to ben' wichixj, lie' Mateo, chi'e gana' chchixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

¹⁰ Na' shlak chi' Jesúza' lill Matewa', bllin ben' zan wíchixjka' na' zan ben' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len ben'ka' nakgake'ne' txen. ¹¹ Na'ch ka ble'i fariseoka' chaolen Jesúza' ben'ka', na'ch wñabgakile' ben'ka' nakgake'ne' txen, che'gake':

—¿Biche chaolenz maestro cheleni ben' wíchixjki len ben'ki bi nsa' cheyin wen?

¹² Na' beni Jesúza' daa goll fariseoka', na'ch chi'e legake':

—Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'. ¹³ Li yiyaj na' li lljased bin zeji Cho'a Xtill' Chioza' gana' nan: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” Aga bid' ni che ben'ka' nak ben' li ben' shao', san bid' ni che ben' saaxyaka'.

Wñabgakile' Jesúza' biche bi chzoa ben'ka' nakgake'ne' txen wbas'

(Mr. 2:18-22; Lc. 5:33-39)

¹⁴ Na'ch ben'ka' nak Juanna' txen jabig'gake' kwit Jesúza' na' wñabgakile'ne' che'gake':

—Neto' na' fariseoka' zeyi chento' choanto' wbas'. Na' ¿biche ben'ka' nakgake' li' txen bi chzoagake' wbas'?

¹⁵ Na'ch che' Jesúza' legake':

—Kat' chak to wishagna' ben'ka' chdi'a chllag lill ben' byona' aga chdagake' nyesh', san cheej chaogake'. Na' ka'kzan ben'ki nakgake' nad' txen, cheej chaogake' naa zoalen' legake', per wllin lla wkwas ben' nad' kwite'ka', kana'chan soagake' wbasaa.

¹⁶ Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nlllo' gakchan dii xench. ¹⁷ Na' aga no chгаа vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiya'l' sholl vino daa zi' bchejte loo yid koba' kwenche ni ton bi kwiayi'.

Jesúza' biyone' xiin Jairona' len noola' jexee xe'na'

(Mr. 5:21-43; Lc. 8:40-56)

¹⁸ Na' ni choe'te Jesúza' dill', ka bllin to ben' wñabia' na' bchek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' wxoa noona'b' na' yibam'.

¹⁹ Na'ch lii wzolla'te Jesúza' zejlene' ben'ka' nakgake'ne' txen lill ben' wñabia'na'. ²⁰ Na' ka zejgake' lill ben' wñabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' bexxee xe'na', ²¹ la' chakile': “Kon shel' ba bexaa xe'na' wiyakkzid'.” ²² Na' biyechj Jesúza' na' ka ble'ile' noola' chi'ene':

—Btiplalloo, xiin', ba biyakilo' daa chon'ilalloo nad'.

Na' lii biyakteyi noola'.

²³ Na' ka bllin Jesúza' lill ben' wñabia'na' ba lle' ben'ka' chkwel' blleja' na' ben' zan ba chosyaagake' chbellgake'. ²⁴ Na'ch che' Jesúza' ben'ka':

—Li yillesh ni. Aga witba'n san cheszbaan.

Per bxill-ligake'ne'. ²⁵ Na' ben Jesúza' byen billeshgake', na' wyo'e na' bexxee na' bi' nool weta' na' lii biyasteb'. ²⁶ Na' yog' yellka' llia gaoz wze dill' daa bene'.

Biyon Jesúza' chop ben' lchol

²⁷ Na' ka biza' Jesúza', chop ben' lchol janogake'ne'. Na' chosyaagake' zilljə che'gake':

—¡Biyesh'lall'gachi neto', xiin dia che dii Daví!

²⁸ Ka biyoo Jesúza' loo yooná, ben' lcholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll ben' lcholka'ne':

—Awe, Xannto', wak gono' ka ile'into'.

²⁹ Na'ch bex' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

³⁰ Na'ch bile'gakile'. Na' Jesúza' golle' legake':

—Li gon byen kono ye'le ka'.

³¹ Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

Biyon Jesúza' to ben' bi chak ine

³² Shlak chiza' ben'ka' gok ben' lchol, bllin ben' yoblə lao Jesúza' nche'gake' to ben' bi chak ine daa yo'e dii xiwaa. ³³ Na' kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin bin' ile'icho yell Israeli to yel' wak ka dga ba ben beeni.

³⁴ Per fariseoka' che'gake':

—Beeni chibeje' dii xiw'ka' kon yel' wak che daa chnabia' legakan.

Chyallj ben' zan gongake' xshin Chioza'

³⁵ Na' wda Jesúza' yog' yellka', ka yell xen ka yeldo', chli' chsedile' to to gana' chdop chllag ben' Israelka' choe'lwillgake' Chioza'. Wdixje'ile' legake' dill' wen dill' kob che yel' wñabia' che Chioza' na' biyone' ben' che'i bittezə yillwe'. ³⁶ Na' ble'i Jesúza' ben' zan zejlengake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa. ³⁷ Na'ch golle' ben'ka' nakgake'ne' txen:

—Dii li nia' le', ben'ka' zi' gonlilall'gake' Chioza' zaklebgakile' to dii wlliachga to lo yell-lío, na' chyallj no yizi' yilapan, per to chopchga wen llinka' zoa. ³⁸ Na' li inabi Xancho Chioza' wzanche' ben'ka' wtopgake' ben'ka' gonlilall'gake'ne'.

10

Jesúza' wleje' shllin ben'ka' gagake' postl che'

(Mr. 3:13-19; Lc. 6:12-16)

¹ Na'ch biti'a Jesúza' ben'ka' shllin wleje' na' bi'e legake' yel' wñabia' kwenche'gak yibejgake' dii xiw'ka' yoo ben', na' yiyongake' ben' che'i bittezə yillwe'.

² Na' kin le postlka' shllin: zigaate wleje' Simónna', beena' lezkka' che'gake' Pedro, len ben' bishee Andréza', na'tech Jacobona' len ben' bishee Juanna', ben'ka' nak xiin Zebedewa', ³ na'ch Felípena', Bartoloména', Tomásza', Mateo, ben' wíchixja', Jacobo xiin Alfewa', Tadewa', ⁴ Simón, beena' bsi'gake' Zelote, na' Jud Scariota', beena' bene' Jesúza' lo na' ben' malka'.

Bsel' Jesúza' postlka' shllin je'gake' cho'a xtill' Chioza'

(Mr. 6:7-13; Lc. 9:1-6)

⁵ Na'ch bsel' Jesúza' ben'ka' shllin je'gake' cho'a xtil' Chioza', na' chi'e legake':

—Bi shajle yellka' gana' zoa ben'ka' bi nak ben' Israel, ni bi shajle yellka' llia gana' mbani Samáriana'. ⁶ San li shaj gana' lle' ben' Israelka', ben'ka' nak ka xil' ba wnit. ⁷ Li shaj li lljtixjee ba zoa gaoshosh inabia' Chioza' beena' zoa yabana' loo yichjlall'do' ben'. ⁸ Li yiyon ben'ka' bi shao' na' ben'ka' che'i lepra, li yisban ben' ba wit, na' li yibej dii xiw'ka' yoo ben'. Na' ka ben' Chioza', bene' le' yel' waka' ka'z, ka'kzan le' bibi wchixjle yiyonle ben'.

⁹ Na' bi wa'le mech de or, de plat ni de cobre. ¹⁰ Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

¹¹ Na' kat' illinle to to yell xen wa yelldo'zə, chiljle to ben' nsa' che' wen, na' yigaanle lille'na' na' na'tezə soale axt ka illinch lla yiza'le. ¹² Na' ka sho'le lille'na' ye'lene': "Chioza' wzoe' le' mbalaz." ¹³ Na' shi dii li ben'ka' lle' na' nakgake' ben' wen, wakkzə daa ye'le legake'; san shi bi nakgake' ben' wen, na' aga wakan. ¹⁴ Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' llia ni'aleka'. ¹⁵ Dii li nia' le', kat' illin lla wchoglo Chioza' che ben', yel' zak'zi' xench ile'chi ben' yellka' gana' gongakile' le' ka' aga ka ben' yell Sodómana' na' yell Gomórrana'.

Yel' zak'zi'ka'yen ile'i ben'ka' nak Jesucristona' txen

¹⁶ Nad' chselaa le' ka xildo' ladj ba zniaka'. Na' chiya' gake' ben' sin' na' ben' wen. ¹⁷ Wsak'gale, la' wchey ben' lljwee le' lao ben'ka' chnabia' na' wit chingake' le' gana' chdop chllagcho choe'lwillocho Chioza'. ¹⁸ Na' lljwa'gake' le' lao ben' wñabia' xenka' daa chonlilall'le nad', na' ka' gak we'lenle legake' cho'a stillaana' na' ka'kzə ben'ka' bi nakgake' ben' Israel. ¹⁹ Na' kat' gongake' le' lo na' ben'ka', bi sele wñeyi naklə inale wa bi inale, la' ka gal' inele, Chioza' wxoe' dillaa cho'a loll'leka'. ²⁰ La' aga len' inele, san Espíritu che Xacho Chiozan' gone' ka inele.

²¹ Beena' zoa ben' bishee leteze' gone'ne' lo na' ben'ka' witgake'ne', na' beena' zoa xiine' gone'b' lo na' ben' wite'b'. Na' soa ben' yizoshi'e xaxneena' na' gone' legake' lo na' ben'ka' witgake' legake'. ²² Yog'lol ben' gakzbangakile' le' daa nonlilall'le nad', per beena' so sakile' bittezə daa yen ile'ile' axt kat' guete', beenan' gat' yel' mban che' zejli kañi. ²³ Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lol yellki mbani Israeli kat' illin lla yiyed' nad', Ben' Bsel' Chioza'.

²⁴ To ben' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'. ²⁵ Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

¿Non chiya' illebcho?

(Lc. 12:2-9)

²⁶ Bi illeble ben'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin. ²⁷ Diika' chli' chsedid' le' do ngash'zə, li we'n dill' ladj lkwe' ben'. Na' diika' nia' le' to le'zə, li wzenin yog'lol ben'. ²⁸ Bi illeble ben'ka' cheengakile' witgake' le', la' kwerp chele na'zan witgake', aga bi gak gongakile'

yichjlall'do'lena'. San Chiozan' chiyał' illeble, la' len' wakə wlliaayee kwerp chelena' len yichjlall'do'lena' lo yi' gabiła'.

²⁹ 'La'kzi wak si'cho chop byiᅇdo' kon to sintabdo', ni tob bi guet shi Xacho Chioza' bi wi'e latj. ³⁰ Na' ka nakle le', axt yish' yichjlana' nłabe'.

³¹ Daan bi chiyał' illeble, la' zak'ch le' aga ka ba zan byiᅇdo'ka'.

Ben'ka' chchebgake' lao ben' nan nombia'gake' Jesúza'

(Lc. 12:8-9)

³² 'Beena' we' dill' lao ben' ine' nake' nad' txen, ka'kzə nad' yep' Xa'na' zoa yabana' nake' nad' txen. ³³ Na' beena' bi chcheb lao ben' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesúza' gak ben' chopla

(Lc. 12:51-53; 14:26-27)

³⁴ 'Bi gakzile bid' lo yell-lioni kwenche gon' ka soalen ljwell ben' mbalaz. Aga daan bid', san bid' kwenche wxia' wdil. ³⁵ Daa bid' na' yidil-len ben' byona' xe'na' na' noola' yidil-lene' xneena', na' beena' zoa xoolille' yidil-lene' le'. ³⁶ Na' ben'ka' zoa toz yoo gakzbani ljwelle'.

³⁷ 'Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xiine'na' ka nad', lekzka' bi chidolee gake' nad' txen. ³⁸ Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen. ³⁹ Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

⁴⁰ 'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. ⁴¹ Beena' wlebe' to ben' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to ben' chone' daa nak shli daa chibaile' nake' ben' li ben' shao', lekzka' lene'n ikee ka laxj beena' chon daa nak shli. ⁴² Na' beena' we' la'ch' lat' nis yeej ben'ki nakgake' nad' txen, dii li nia' le', de laxje'.

11

¹ Na' ka biyoll goll Jesúza' ben'ka' shllin bin chiyał' gongake', na'ch bizee na', na' jali' jasedile' ben' na' jtixje'ile' legake' cho'a xtill' Chioza' yellka' llia gana' mbani Galileana'.

Ben'ka' bsel' Juan wichoa nisa'

(Lc. 7:18-35)

² Na' Juanna' beena' chchoa ben' nisa', ba die' lillyana'. Ka wnezile' daa chon Crístona', na'ch bselee chop ben'ka' nakgake'ne' txen gana' zoe'. ³ Na' janabgakile'ne' che'gake':

—¿Alin' beena' ba llia bia' yid?, ¿anti chiyał' kweznto' sto ben' yoblə?

⁴ Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'.

⁵ Li lljayelle' chon' ka chle'i ben' lcholka', na' chiza' ben'ka' bi chak sa', na' chiyaki ben'ka' che'i lepra, na' chiyei ben' kwelka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'.

⁶ Chakomba beena' chajle' cha' na' bi chakchoplallee.

7 Na' ka biza' ben'ka' bse! Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? 8 Shi bi nakan ka', ¿nakran nak beena' jawiale? ¿Ato ben' nakw xalaane' dii le nakə? Bi nakan ka'. La' nezkzile ben'ka' nakw xalaangake' dii le nak zoagake' loo yoo lill ben' wñabia'ka'. 9 ¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na' chontechle' ka ben'ka' chyixjee daa che' Chioza' legake'. 10 La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',
na' chixji'e xtilloona' kwenche soa ben' wzenaggake' cho' kat' illino'.

11 Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per notteza beena' choe' latj inabia' Chioza' yichjlall'do'ena', zak'teche' aga ka Juanna'.

12 'Kon ka wzolo Juanna' bchoe' ben' nisa' axt ñaanlla, zoa ben' chsej chllongake' kono wleb yel' wñabia' che Chioza'.* 13 Librka' daa bzej dii ben'ka' wdixjee daa goll Chioza' legake' na' leya' bzej dii Moiséza' wdixjeggakan che yel' wñabia' che Chioza', na' lekzannan' cho'e Juanna' dill' naa blee. 14 Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'. 15 Ka le' chenile dga nia', li sen wñeyi.

16 '¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljwellb': 17 "Bkwellnto' blleja' na' bi byaale, na' be!nto' daa chon nyesh' na' ni bi wchellkzle." 18 La' Juanna' bi weej wdawe' dii wen dii shao', na' wnagake' che': "Dii xiwaan yo'e." 19 Na'ch wdena' bid' nad' nak' Ben' Bse! Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wíchixjka'. Per yel' sin' che Chioza' chli'lawin ka chsa' che ben'ka' chzenaggake' che'.

Yellka' gana' bi bzenaggake' che Jesúza'

(Lc. 10:13-15)

20 Na'ch wzolo Jesúza' bsheshlene' ben' yellka' gana' bli'che' yel' waka', daa bi biyaj bilengakile' xtoleeka'. Na' wne':

21 —¿Nyesh'laz gak chele, le' ben' yell Corazin! ¿Nyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilentel'jagakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'. 22 Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. 23 Na' le' ben' Capernaúm, ¿achakile willinle yabana'? Aga willinle na', san latj gana' sak'zi'len yillinle. La' shel' ben' Sodómaka' ble'gakile' yel' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'. 24 Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

Mbalaz soa ben'ka' gonlilall'gake' Jesúza'

(Lc. 10:21-22)

* 11:12 Zoa ben' chsej chllongake' kono wleb yel' wñabia' che Chioza': dga nakan to dii lallj. Lekzka' bal' ben'ka' nsed nagake' versículoni zejín: zoa ben' chongake' axt ga zeelo chakgake' kwenche inabia' Chioza' legake'.

25 Na' lo gora' wne Jesúza', chi'e:

—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajni. 26 Beno' ka', Xa, la' kan' wyazlaloo.

27 Na'ch goll Jesúza' ben'ka':

—Xa'na' bene' lall' na' yog'lol' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'. 28 Li gon'li' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le. 29 Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' yel' wixi'lall' chele. 30 Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

12

Ben'ka' nak Jesúza' txen wdishgake' trígona' llana' chombaangake'
(Mr. 2:23-28; Lc. 6:1-5)

1 To lla sabd, llana' chombaang ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishgake' trígona' na' wdaogake'n. 2 Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiyal' goncho llani chombaangcho.

3 Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdongake'? 4 Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxo'zka' de lsens gaogake'. 5 ¿Abin' wlable leya' gana' nan aga bi xya nakan che bxo'zka' la'kzi chongake' llinna' loo yoodo'na' llaka' chombaangcho? 6 Na' nia' le', ladjleni zoa to ben' zak'che' aga ka yoodo'na'. 7 Bilja wyajniile bi zeji Cho'a Xtill' Chioza' daa na: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” La' shel' le' wyajniilen, aga waole xya che ben' bi nap dol', shel'ka'. 8 Nad', Ben' Bsel' Chioza' Yell-lioni, chnabi'a lao llani chombaangcho.

Jesúza' biyone' to ben' llana' chombaang ben' Israelka'
(Mr. 3:1-6; Lc. 6:6-11)

9 Na'ch biza' Jesúza' latja', na' biyaje' gana' chdop chllag ben' Israelka' choe'lwllagake' Chioza'. 10 Na' ladj ben'ka' len to ben' net tlaa neena'. Na' fariseoka' chwiagake' nakla ka si' sengake' kwenche gaogake' xya che Jesúza', na'ch wñabgakile'ne', che'gake':

—¿Beran na leya'? ¿Ade lsens yiyoncho to ben' bi shao' llani chombaangcho?

11 Na'ch che' Jesúza' legake':

—Shi nole zoa to xil' chele na' ixopb to loo yech llaki chombaangcho, ¿abi yibejleb? 12 Na' jzak'techla benecha' aga ka xilaa! Daan de lsens goncho daa nak wen llaki chombaangcho.

13 Na'ch golle' beena' net tlaa neena':

—Bli noona'.

Na' ka b̄li neena' lii biyakten ka nak daa zi sh̄laa. ¹⁴ Na' ka biza' fariseoka' gana' chdop chllaggake', be'gake' dill' nak sho' x̄nezi witgake' Jesúza'.

Daa wna dii Isaíaza' che Jesúza'

¹⁵ Ka gokbe'i Jesúza' daa cheengakile' gongake', na' bizee ziyaje' gan yoblə. Na' beñ' zan inleeb janoe'ne' na' biyone' yog' beñ'ka' bi shao'. ¹⁶ Na' golle' beñ'ka' biyone' bi we'gake' dill' daa chone'. ¹⁷ Daa bene'ka', billinin ka wna dii Isaíaza', beena' wdix̄jee daa goll Chioza'ne', kana' wne':

¹⁸ Beenin nake' wen llin cha', beena' ba wlej', na' le chakidee na' chazlallaa ka chone'.

Na' wzoa' Espiritu cha'na' loo yichjlall'do'ena', na' chix̄je'ile' beñ'ka' lle' yell-lioni ka cheenid' gongake'.

¹⁹ Bi gakkil-lene' beñ', na' ni bi gosyee wi'e dill' yawi nez.

²⁰ Aga wisyoll wistoe' chishje' yax̄tila' daa ba chashja.

na' aga wisole' mesha' daa ba chiyol, ax̄t ki gone' gan wli'lao yel' li yel' shao' che'na'.

²¹ Na' beñ' lle' doxen yell-lioni gongake' lez len' gaklene' legake'.

Nagake' che Jesúza' chibeje' dii xiw'ka' kon yel' wak cheyinna'

(Mr. 3:19-30; Lc. 11:14-23; 12:10)

²² Jwa'gake' lao Jesúza' to beñ' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa yo'e, na' bile'ile' na' gokte binie'. ²³ Yog'lol beñ'ka' bibangakile' ka nak daa bene', na' chisne':

—¿Aga beenin xiñ dia che dii Davina', beena' chbezcho, lla?

²⁴ Ka beni fariseoka' dillaa choe' beñ'ka', na' che'gake':

—Aga bi yel' wak nap beeni. San yel' wak che Bezlona',* daa chñabia' dii xiw'ka'zan, chibejile' diika'.

²⁵ Na' gokbe'i Jesúza' daa chza'lall' fariseoka', na'ch chi'e legake':

—Shi gana' chñabia' to beñ' na' tilgake' to lezgake' na' gakkake' choplə, na' kwiayi' gana' chñabi'e, na' ka'kzə shi to yell wa beñ' lle' toz yoo gakkake' choplə aga wdiagake'. ²⁶ Ka'kzə Satanáza', shi yibej ljwell dii xiwiinka' yoo beñ', aga wdia yel' wñabia' cheyinna', shel'ka', la' to lezgakannan' chidil-len kwingakin. ²⁷ Le' nale chibej' dii xiwaa yoo beñ' kon yel' wak che Bezlona'† daa chñabia' legakan. ¿Shera beñ'ka' nakle txen? ¿Alezkka' lennan' chibejlengake' dii xiw'ka' yoo beñ'? Daa bi nakan ka', na' chli'n nakllejile. ²⁸ Na' shi nad' chibej' dii xiw'ka' kon yel' wak che Espiritu che Chioza' zejín ladjleni ba bla' yel' wñabia' che Chioza'.

²⁹ Aga no gak sho' lill to beñ' wal na' kwane' dii de che' shi bi wcheje'ne' zigaate. Na' chan gak kwane' lille'na'.

³⁰ Beena' bi chone' nad' txen, len' chakzbanile' nad'; na' beena' bi chaklene' nad' kwenche wzenag beñ' che Chioza', len' chsej chllone' wzenaggake'.

³¹ Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espiritu Sántona' na' cheyi diika' chone', aga wizi'xen Chioza' chele. ³² Na' shi no ine cha', nad', Ben' Bsel' Chioza' Yell-lioni, lekzka' wizi'xen Chioza' che', san beena' ine che Espiritu

* **12:24** Bezlo: lekzannan' Beelzebú de xtil na' nakan sto le Satanáza'. † **12:27** Bezlo: Jekzannan' Beelzebú de xtil na' nakan sto le Satanáza'.

Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

Kon ka nak yaga', ka'te nak daa chbian

(Lc. 6:43-45)

³³ 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. ³⁴ 'Le' ben' wen dii mal! ¿Nakra gonle inele daa nak dii wen daa nakle ben' mal? 'La' yog' dill' daa chchej cho'a loll'chona' za'n loo yichjlall'do'chona'. ³⁵ Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'. ³⁶ Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele. ³⁷ 'La' shi le' choe'le dill' wen, na'ch ina Chioza' bibi dol' nable; per shi le' bi choe'le dill' wen, na' wchogloe' chele sak'zi'le.

Wnabi ben' malka' Jesúza' wli'e to yel' wak

(Mr. 8:12; Lc. 11:29-32)

³⁸ Na'ch bal fariseoka' na' ben'ka' chli' chsedi leya' che'gake' Jesúza':
—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

³⁹ Na' che' Jesúza' legake':

—Le' nakle ben' mal na' ben' bi chzenag che Chioza' chnable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile' to dii nak ka yel' wak daa ben Chioza' che dii Jonáza'. ⁴⁰ 'La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'. ⁴¹ Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'. ⁴² Na' lekzka' llana' kat' wchoglo Chioza' che ben' yell-lioni, noola' wnabia' yellka' lle' do lli'lə gawe' xya chele, le' zoale naa, la' len' wzee zit' nleb bidzenague' dill' sin' daa wne dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyo ben'

(Lc. 11:24-26)

⁴³ 'Kat' chichej dii xiwaa yoo ben', na' chdan gana' bibi chashj chleb chyljan gana' yizi'lalliin. Na' kat' bi chllelin gana' yizi'lalliin, ⁴⁴ na'ch chakin: “Yiyaach' dii yoblə gana' bichejzk'.” Na' kat' yillinan gana' bichejan, nakan ka to yoo desh dii nxi nloa. ⁴⁵ Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' naa.

Bllin xna' Jesúza' len ben' bisheeka' gana' zoe'

(Mr. 3:31-35; Lc. 8:19-21)

⁴⁶ Ni choe'lente Jesúza' ben'ka' dillaa ka bllin xneena' len ben' bisheeka' goklall'gake' wshaljlengake'ne' na' wzegake' lesh' chyoonaa'. ⁴⁷ Na' goll to ben' Jesúza':

—Xnoona' len ben' bishooka' zegake' lesh' chyoonaa' cheengakile' wshaljlengake' li'.

⁴⁸ Na' che' Jesúza' beena' golle'ne' ka':

—¿Noran xna'na' na' noran ben' bishaaka'?

⁴⁹ Na'ch bli'e ben'ka' nakgake'ne' txen na' chi'e:

—Ben'kin xna'na' na' ben' bishaaka'. ⁵⁰ La' nottezə beena' chon ka cheeni Xa'na' zoa yabana', beenan' nake' ben' bishaa, ben' zan' na' xna'.

13

Jempl che to ben' goz goon

(Mr. 4:1-9; Lc. 8:4-8)

¹ Na' lollana'tezə wza' Jesúza' yoona' gana' zoe' na' jchi'e cho'a nido'na'.

² Na' daa bdop ben' zan' gana' chi'e, na' wyepe' jshie' to loo barkw. Na' yog' ben'ka' bdop bllag wzegake' cho'a nido'na'zə. ³ Na'ch bseese zanjemplka' kwenche bli' bsdile' legake', chi'e:

—To ben' goz goon wzee zeje' goza'. ⁴ Na' ka zej chzalee binna', bxop balan cho'a neza' na' bllin byinka' wdaogakban. ⁵ Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj. ⁶ Na' ka wna'n wbillla', bkwedan na' wbillten daa bitek bde loinna'. ⁷ Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan. ⁸ Na' zi balan bxop lo yo wenna', na' wlliachgan. Balan wllia to guiyoa, na' zi balan wllia guiyon na' zi balan wllia shichoa. ⁹ Ka le' chenile dga nia', li sen wneyi.

Jesúza' bzajniile' biche chzoe' jemplka'

(Mr. 4:10-12; Lc. 8:9-10)

¹⁰ Na' ben'ka' nak Jesúza' txen jabig'gake' kwite'na', wñabgakile'ne':

—¿Biche chseeso jemplka' kat' chli' chsedilo' ben'?

¹¹ Na' che' Jesúza' legake':

—Chioza' cho'e latj inezile ka nak yel' wñabia' che'na' daa kono nezi. Na' ben'ka' bi nak nad' txen, bi cho'e latj inezgakile'n. ¹² La' beena' ze wneyi shajniile' Cho'a Xtill' Chioza', zizikli shajni'chile'n. Na' beena' bi se wneyi shajniile'n, na' gal-lallee daa ba wyajniile' lat'. ¹³ Daan chseesaa jemplka' kat' chzajniid' legake'. La' ben'ka' chwiategake' na' bi chakbe'gakile' bin zeji daa chon', na' chengakile' daa chnia' na' bi chajni'gakile' bin zejin, daa bi chajle'gake' cha'. ¹⁴ Na' daa chongake' ka', chillinin ka wna dii Isaíaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

¹⁵ La' yichjlall'do'eka' nchol nmitin,

na' chongake' ka ben' ndap naguin

na' ka ben' nshod' jalawin.

Shel' bi chongake' ka', na' shajni'gakile' daa chzajniid' legake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto ben' wen.

¹⁶ Per chakomba le' chakbe'ile bi zeji diika' chle'ile chon' na' chajniile diika' chli' chsedid'. ¹⁷ Dii li nia' le', zan dii ben'ka' wdixjee daa goll Chioza' legake' na' zan dii ben'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajnií Jesúza' legake' bi zeji jempl che ben' goz goona'

(Mr. 4:13-20; Lc. 8:11-15)

¹⁸ Li wzenag bin zeji jempl che ben' goz goona'. ¹⁹ Beena' cheni cho'a xtill' Chioza' daa chzajniin le' che yel' wñabia' che'na', na' bi chajniile'n,

nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjall'do'ena'. ²⁰ Na' beena' cheni cho'a xtill' Chioza' na' le chibaile' chlebe'n, nake' ka ladj yajka' gana' bxop binna' ²¹ daa bitek bi loin bde na' bi bdian. La' kat' bi chak che' wa chchi' chsak' ben' le' ni che cho'a xtill' Chioza', na' lii chbejte yichje'n. ²² Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan. ²³ Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

Jempl che yixaa daa bla' ladj trígona'

²⁴ Na' bsees' Jesúza' sto jempl, chi'e legake':

—Yel' wñabia' che Chioza' nakan ka to ben' goze' bin' wenna' lo yellio che'na'. ²⁵ Per wal' chela' shlak chese', wyaj to ben' chakzbanile'ne' jeze' ladj trígona' daa nak xenin, na' ka biyoll bene' ka' bizee. ²⁶ Na' ka bgol trígona' na' wllian, na' lekzka' bgolte xeninna' ladjinna'. ²⁷ Na' wyaj wen llinka' jellgake' xaninna': “Ben'do', zaaga bin' wenna' jezo' lo cho'na'? ¿Gara wza' xaninna' lenzan ladjinna', lla?” ²⁸ Na' che' xaninna' legake': “Nochod' ben' chakzbanile' nad' jene' ka'.” Na' goll wen llinka' le': “¿Acheenilo' shajnto' lljalall'nto'n?” ²⁹ Na' chi'e legake': “Bi lljalall'len, la' nxoll lente trígona' wllal'le. ³⁰ San igol-lenchan trígona', na' kat' illin lla yichoggake'n, na' yep' ben'ka' zigaate yilall'gake' xeninna' na' gongake'n shlen wej kwence sheyan, na'tech yitopgake' trígona' na' yigooshao'gake'n loo lillinna'.”

Jempl che sa mostásana'

(Mr. 4:30-32; Lc. 13:18-19)

³¹ Na' lekzka' bzoa Jesúza' sto jempl, chi'e:

—Yel' wñabia' che Chioza' nakan ka sa mostásana' daa goz to ben' lo yellio che'na'. ³² La'kzi sa mostásana' nakan liizelozí diido' yid lao bichlæ sa yix' kwan, kat' chl'a'n na' chgolan na' chakan dii xench aga ka yix' kwanka' sto, na' ax't byindo'ka' chon lillbka' lo xozinna'.

Jempl che levadúrana'

(Lc. 13:20-21)

³³ Na' lekzka' bzoe' sto jempl, chi'e:

—Yel' wñabia' che Chioza' nakan ka levadúrana' daa chchix to noolæ shoña rob yezja' kwence yisgolan kwa che yetxtila'.

Jesúza' bchine' jemplka'

(Mr. 4:33-34)

³⁴ Jesúza' toshiizi bchine' jemplka' ka bi'e dill' ladj lao lkwe' ben'. ³⁵ Na' daa ben Jesúza' ka', billinin daa wdixjee to ben' daa goll Chioza'ne', ka wne':
Wchin' jemplka' ka we'len' ben' dill'.
We'len' ben' dill' cheyi daa konon' inezi dezd kana' bxe bsilte Chioza' yellioni.

Bizajnii Jesúza' bi zeji jempl che yixaa daa bla' ladj trígona'

³⁶ Na' bisa' Jesúza' ben'ka' lle' na', na' biyo'e loo yoona'. Na' ben'ka' nakgake'ne' txen jabig'gake' kwite'na' che'gake'ne':

—Bizajnii neto' bi zeji jempl che xen trígona'

³⁷ Na' goll Jesúza' legake':

—Kin zejín: Nad', Ben' Bsel' Chioza' Yell-lioni, zaklebid' beena' goz trígona'. ³⁸ Na' doxen yell-lioni zaklebin gana' goz beena' trígona'. Na' ben'ka' choe'gake' latj chñabia' Chioza' yichjlall'do'eka' zaklebgakile' trígona'. Na' ben'ka' choe'gake' latj chñabia' dii xiwaa yichjlall'do'eka' zaklebgakile' xen trígona'. ³⁹ Na' dii xiwaa zaklebin ben' mala', beena' jez ladj trígona' daa nak xenin. Na' llana' chilapgake', zaklebin llana' kwiayi' yell-lioni. Na' anjlka' zaklebgakile' ben'ka' chizi' chilap trígona'. ⁴⁰ Na' ka chitopgake' daa nak xen trígona' kwenche wzeygake'n, ka'kzan gak che ben'ka' chñabia' dii xiwaa yichjlall'do'eka' ka illin lla kwiayi' yell-lioni. ⁴¹ Nad', Ben' Bsel' Chioza' Yell-lioni, wselaa anjl cha'ka' kwenche yitopgake' ben' wen dii malka' na' ben'ka' chzechgake' ben' yoblə gongake' dii mala'. ⁴² Na' wzał'gake' legake' lo yi' gabiła' gana' kwellyesh'gake' na' gaoxaxj leye'ka' daa le gakshejlall'gake'. ⁴³ Na' ben' li ben' shao'ka' sho'gake' balaan choo balaan xen yabana' gana' chñabia' Xacho Chioza'. Ka le' chenile dga nia', li sen wñeyi.

Jempl che mecha' ngash'

⁴⁴ Yel' wñabia' che Chioza' nakan ka to mech xen dii ngash' to lo yell-lío che ben' gana' to ben' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

Jempl che to perla dii zak'chga

⁴⁵ Yel' wñabia' che Chioza' zaklebin to ben' chone' delgens che perla dii zak'chga. ⁴⁶ Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

Jempl che yixj che bela'

⁴⁷ Yel' wñabia' che Chioza' zaklebin to yixj che bel. Ben'ka' chzen belə' chzał'gake' yixja' loo niso'da' na' chzenan zan kwen bel. ⁴⁸ Na' kat' chilla' yixja' na' chibejgake'n cho'a niso'da' na' chbe'gake' chibegake' belka' nak wen na' chgooshao'gake'b to loo llom, na' baka' bi nak wen, chchoongake'b. ⁴⁹ Kan' gak che benecha' ka illin lla kwiayi' yell-lioni. Anjlka' yibegake' ben' wenka' ladj ben' malka', ⁵⁰ na' wzał'gake' ben' malka' lo yi' gabiła' na' kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

⁵¹ Na'ch che' Jesúza' ben'ka' nakgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

⁵² Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile' to xan yoo ben' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

Jesúza' biyaje' Nazareta'

(Mr. 6:1-6; Lc. 4:16-30)

⁵³ Ka biyoll bsees' Jesúza' jemplka', na' bizee. ⁵⁴ Na' ka billine' yell Nazareta' gana' bgole', na' bli' bsedile' ben' Israelka' chdop chllag gana' choe'łwillgake' Chioza'. Na' bibani ben'ka', che'gake':

—¿Gara x̄xi' beeni yel' sin' che'na', na' nak chak chone' yel' wakka'?
 55 ¿Aaga xiin karpintera'zan na' x̄neena' lie' María? Na' ¿aaga beñ' bishee
 Jacóbona', Joséna', Simónna' na' Júdaza'? 56 Na' beñ' zane'ka' zoagake'
 lallchoni. ¿Gara jasede' yog'lol' diiki chli' chsedile', lla?

57 Na' daa bi wyajle'gake' che' Jesúza', na' golle' legake':

—To beñ' chyixjee daa che' Chioza'ne', gattez chgoogake'ne' balaan san
 lall lille'na' aga no chgoo le' balaan.

58 Na' aga bitek yel' wak beñ' Jesúza' yell Nazareta' daa bi wyajle'gake'
 che'.

14

Betgake' Juanna', beena' bchoa beñ' nisa'

(Mr. 6:14-29; Lc. 9:7-9)

1 Na' do kana', Heródeza', beena' ch̄n̄abia' gana' mbani Galileana', benile'
 ka nak daa chon Jesúza'. 2 Na' golle' beñ'ka' chon xshine'na':

—Beenan' dii Juanna', beena' bchoa beñ' nisa'. Ba bibane' ladj beñ'
 wetka', daan chak chone' yel' wakka'.

3 La' kana' ni mban dii Juanna', Heródeza' bselee beñ' beñ'gake'ne' na'
 wloogake'ne' lillyana' ni che Herodíaza' xool beñ' bisheena', beena' le
 Felipe. 4 La' dii Juanna' golle' Heródeza':

—Bi nakan wen nkoo xool beñ' bishoona'.

5 Na' daa golle'ne' ka' goklall' Heródeza' wite'ne', per bi biyaxjile'
 daa b̄lebe' beñ'ka' chajle' daa nak Juanna' to beñ' chyixjee daa che'
 Chioza'ne'. 6 Per ka wya'i Heródeza' yiz, bi' nool wew' che Herodíaza'
 byaab' lao beñ'ka' lle' lnina'. Na' daa le biyoolallii Heródeza' ka byaab' 7 axt
 bzajnīi x̄na'baab' bem', na' che'b' Heródeza':

—Yichj Juanna', beena' chchoa beñ' nisa', cheenid' goño'n nad' to lo plat
 lilij.

9 Na' gokyeshii Heródeza', per daa ba b̄cheble' lao yog' beñ'ka' goxe'
 lnina' wi'eb' kon daa inabib' le', b̄enshaze' byen we'gake'b' daa w̄nabb'.

10 Na' bselee beñ' jachoggake' yichj Juanna' loo lillyana'. 11 Na' b̄lliagake'n
 to lo plat lilij na' be'gake'n bi' nool wewaa na' be'baan x̄na'baa.

12 Na'ch beñ'ka' wdalen Juanna' txen wyajgake' jaxi'gake' kwerp
 che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil beñ'

(Mr. 6:30-44; Lc. 9:10-17; Jn. 6:1-14)

13 Na' ka w̄nezi Jesúza' daa gok che Juanna', bizee gana' zoe' na' biyo'e to
 loo barkw ziyaje' gana' kono beñ' lle'. Na' ka w̄nezi beñ'ka' lle' yellka' llia
 gaozə cho'a nisdona' galan zej Jesúza', na'ch wloogake' nez janogake'ne'.

14 Na' ka bichej Jesúza' loo barkwa', ble'ile' beñ' zan inleeb ba lle' na', na'
 biyeshile' legake' na' biyone' beñ'ka' bi shao'. 15 Na' ka ba wille', na'ch
 beñ'ka' nak Jesúza' txen jabig'gake' kwite'na', che'gake'ne':

—Ba wille' n̄aa, na' gani lle'cho kono zoa wit' dii gaocho. Goll beñ'ki
 yiyajgake' yellka' llia gaozə kwenche ll̄xi'gake' dii gaogake'.

16 Na' che' Jesúza' legake':

—Bi chonan byen yiyajgake'. Len', li we' dii gaogake'.

17 Na' che'gake'ne':

—Gay'chga yetxtil na' zi chopchga beñ' noa'nto' ni.

18 Na' che' Jesúza' legake':

—Li gonshkin ni.

¹⁹ Na'ch golle ben'ka' kwe'gake' lo yixa'. Na' bexee yetxtilka' gay' na' belka' chop na' blis lawe'na' yabana' na' bi'e Chioza' yel' choxken. Na'ch bxoxje' yetxtilka' na' bi'en ben'ka' nakgake'ne' txen kwenche be'gake' che che ben'ka'. ²⁰ Na' wdao yog'lol ben'ka' axt ka beljgakile'. Na' ka bidaogake', na'ch bitopgake' diika' bgaan, na' biyakan shllin xet'. ²¹ Na' ben' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nido'na'

(Mr. 6:45-52; Jn. 6:16-21)

²² Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nido'na' to lezgake', na' le' bigaane' kwenche bisee ben'ka' bdop bllag. ²³ Na' wde bisee ben'ka', na'ch wyep'e' to lo yaa kwenche jelwille' Chioza' toze'. Na' ni zetie' lo yaana' ka gol. ²⁴ Na' barkwa' gana' ziyoo ben'ka' nakgake'ne' txen ba zejan gchol nido'na'. Chakan to ki to ka'lə daa chas chat' nisa', na' be'na' bi cho'en latj yiyajan shlich'a. ²⁵ Na' zbalz biyetj Jesúza' lo yaana' na' bizee tlo nido'na' zeje' gana' zejlagake'. ²⁶ Na' ka ble'i ben'ka' non Jesúza' txen zeje' tlo nisa', le bllabgake' na' axt besyaagake', nagake':

—iBa za' to yel bxen!

²⁷ Na' lii wnete Jesúza' legake', chi'e:

—Bi illeble. Nad'kzan'.

²⁸ Na'ch wne Pédrona' chi'e:

—Xan', shi'lin', ben ka gak saa lo nisi kwenche yid' kwito'na'.

²⁹ Na' che' Jesúza'ne':

—Dashka'.

Na'ch bchej Pédrona' loo barkwa' na' wzoloe' chzee tlo nisa' nan shaje' kwit Jesúza'. ³⁰ Per ka gokbe'ile' zechga be'na', na' bllabe' na' lii wzolote chbi'e yel, na'ch besyee chi'e:

—iXan', bisla nad'!

³¹ Na' lii biyox'te Jesúza' neena', chi'ene':

—¿Berache gokchopzilo'? ¿Bi'che bi nxenilalloo nad' kwaslol?

³² Na' kon ka biyoogake' loo barkwa' na' bgan be'na'. ³³ Na' ben'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

Jesúza' biyone' ben'ka' bi shao' gana' mbani Genesareta'

(Mr. 6:53-56)

³⁴ Na' ka blag'gake' shlaa nido'na' na' bllingake' gana' mbani Genesareta'. ³⁵ Na' ben' Genesaretka' biyombia'gake' Jesúza' na'ch bzengakile' ben' yellka' lle' gao nan ba bllin Jesúza'. Na' jwa'gake' yog' ben'ka' bi shao' lawe'na', ³⁶ na' got'yogakile'ne' wi'e latj la'ch' gox' ben' we'ka' xe'na', na' yog' ben'ka' be'x'gake'n biyakgakile'.

15

Daa chxinj yichjall'do' benecha'

(Mr. 7:1-23)

¹ Bal fariseoka' na' ben'ka' chli' chsedi leya', wza'gake' Jerusalénna' na' wyajgake' lao Jesúza', wñabgakile'ne':

² —¿Bi'che ben'ki nakgake' li' txen bi chongake' ka wyoolo dii xoxto'choka'? La' bi chixis chiyib neeka' ka zi' gaogake'.

³ Na' wṇabi Jesúza' legake' chi'e:

—¿Biche chyishjle daa nllia Chioza' bia' gonle na' zechle wṇeyi chonle ka ben dii xoxto'choka'? ⁴ La' kin wna Chioza': "Li gap xaxna'le balaan", na' "Beena' ine zban che xe'na' wa xneena', chiyal' guete'." ⁵ Per le', nale wak ye' ben' xaxneena': "Bi gak gaklen' le', la' yog' daa nap' ba ncheb' wi'an Chioza'." ⁶ Na' beena' yee xaxneena' ka', cho'allalene' daa nale bi chonan byen gaklene' legake'. Na' daa chonle ka', chonile daa nllia Chioza' bia' goncho ka to dii bibi zakii kwenche nole diika' wyoolo dii xoxto'choka'. ⁷ ¡Le' ben' wxiye', le' wen gan! Kwasl̥l̥ inleeb be' dii Isafaza' xtill'le, ka wne':

⁸ Ben'ki choe'la'ogake' nad' de cho'a loll'zgake',

la' aga do yichj do lall'gaken' choe'la'ogake' nad'.

⁹ Bibi zjanayin chonzgake' ka ben' choe'la'o nad';

na' diika' chli' chsedgakile' nakgakan che ben' yell-lioz.

¹⁰ Na' wṇe Jesúza' ben'ka' le' na', golle' legake':

—Li wzenag dga inia' le' na' li shajniin. ¹¹ Aga daa cheej chao beṇaan chxinj chlenan yichjlall'do'ena', san dill'ka' chchej cho'enan', lennan' chxinj chlenan yichjlall'do'ena'.

¹² Na'ch ben'ka' nak Jesúza' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

¹³ Na'ch goll Jesúza' legake':

—Nottezə ben' bi chzenague' che Xa'na' zoa yabana', yiyol yinite', na' gak che' ka chak che to yag dii chlall' ben' do loyin. ¹⁴ Jwayishazi fariseoka', la' nnit ncholgakilen'. Na' nezicho shi to ben' lchol' wchi'e sto ljwell lcholé', choptie' lljabix.

¹⁵ Na'ch Pédróna' golle' Jesúza':

—Bizajnií neto' bi zejín jempla' daa ba bseesoo.

¹⁶ Na'ch goll Jesúza' legake':

—¿Alezkka' lenle bin' shajniile bi zejín daa ba wnia'? ¹⁷ ¿Abi nezile nan daa cheej chaocho chjche'n loo leechona' na'tech chiden? ¹⁸ Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chxinj chlenan cho'. ¹⁹ La' loo yichjlall'do' benechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiylall' che ben', na' yel' chbell chne che ben'. ²⁰ Diikin chxinjan yichjlall'do' ben', aga daa bi chixis chiyib neena' ka zi' gawen'.

To noolə bi nak ben' Israel ben'liilallee Jesúza'

(Mr. 7:24-30)

²¹ Na' biza' Jesúza' wyaje' gana' mbani yell Tírona' len yell Sidónna'.

²² Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n leb'.

²³ Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

²⁴ Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

²⁵ Na'ch noola' jabigüee kwit Jesúza' na' bchek' xibe'na' lawe'na' chi'ene':

—jXan', goklengach nad'!

²⁶ Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

²⁷ Na'ch noola' chi'ene':

—Lekzilo', Xan', per chak chao xikw'choka' diika' chxop lo yona'.

²⁸ Na'ch goll Jesúza'ne':

—jNoola, nonjilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

Jesúza' biyone' ben' zan

²⁹ Na' biza' Jesúza' na', na' billine' cho'a nisdó' che Galileana' na' wyepé' to lo yaa jchi'e. ³⁰ Na' ben' zan bllin lawe'na' nche'gake' no ben' bi chak sa', no ben' lchol, no ben' bi chak ine, no ben' nxinj, no ben' chak bichlā yillwe'. Na' bzoagake' legake' lao Jesúza' na' biyone' legake'. ³¹ Na' bibani ben'ka' ka gok, la' ben'ka' bi chak ine wnegake', na' ben'ka' nxinj biyakgatile', na' ben'ka' bi chak sa' wza'gake', na' ben' lcholka' ble'gatile'. Na'ch yog'lol ben'ka' be'la'ogake' Chios, beena' choe'la'o ben' Israelka'.

Jesúza' bwawe' tapa mil ben'

(Mr. 8:1-10)

³² Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgatile' tneza'.

³³ Na' che' ben'ka' nakgake'ne' txen:

—Per ¿ga lljxi'cho dii gao yog'lol ben'ki?, la' gani lle'cho kono zoa wit' dii gaocho.

³⁴ Na'ch wñabi Jesúza' legake', chi'e:

—¿Zi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

³⁵ Na'ch goll Jesúza' ben'ka' kwe'gake' lo yona'. ³⁶ Na' bexee yetxtilka' gall na' belka' na' bi'e Chioza' yel' choxken, na' bxoxje'n bi'en ben'ka' nakgake'ne' txen kwenche be'gake' che che ben'ka'. ³⁷ Na' yoguee wdao axt ka belgatile'. Na' wdena' bitopgake' dii lao'ka' bichoonan, gokten zi gall xet'. ³⁸ Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao. ³⁹ Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

16

Fariseoka' na' saduceoka' wñabgatile' Jesúza' gone' to yel' wak

(Mr. 8:11-13; Lc. 12:54-56)

¹ Fariseoka' len saduceoka' jawiagake' Jesúza' na' wñabgatile'ne' gone' to yel' wak dii ile'gatile' kwenche wli'n shi Chiozan' bseleene'. ² Na' goll Jesúza' legake':

—Shlle'na' chwiale xan yabana' na' nale: “Le yillaa wxē, la' le nlatjcha.”

³ Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. ⁴ Le' nakle ben' mal na' ben' bi chzenag che Chioza', chñable ile'ile' to yel' wak

kwenche wli'n shi Chioza' bselee nad', per bi wliid' le' daa chñable. Lete ile'ile sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

Dill' wxiye' che fariseoka' zaklebin levadúrana'

(Mr. 8:14-21)

⁵ Na' ka bllingake' shlaa niso'da', ben'ka' nakgake'ne' txen goł-lall'gake' wa'gake' yetxtila'. ⁶ Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷ Na' che' ljwellgake':

—Daa goł-lall'cho wa'cho yetxtilan' ne' cho' ka'.

⁸ Na' gokbe'i Jesúza' daa che' ljwellgake' na' golle' legake':

—¿Biche nazle bibi yetxtila' bia'le? ¿Biche bi nxenilall'le nad' kwasłol?

⁹ ¿Abikzan' shajniile ka nak diika' chon'? ¿Abi chjadinile kana' wdao gayaa mil ben' kon gay'zə yetxtilka' na' bał xet' dii bixjka' bitople? ¹⁰ Na' ¿shera kana' wdao tapa mil ben' kon gallə yetxtilka'? ¿Abi chjadinile bał xet' dii bixjka' bitople? ¹¹ ¿Biche che yetxtila'lə wyajnzile ka wnia' wsak'gale che levadura che fariseoka' len saduceoka'?

¹² Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'

(Mr. 8:27-30; Lc. 9:18-21)

¹³ Na' ka bllin Jesúza' len ben'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na ben' yell-liona' nak', nad', Ben' Bsel' Chioza' Yell-lioni?

¹⁴ Na' che'gake'ne':

—Bałe' nagake' nako' dii Juanna', beena' bchoa ben' nisa', na' zi bałe' nagake' nako' Eliáza', na' zi bałe' nagake' nako' dii Jeremíaza', na' bałe' nagake' nako' sto ben' chyixjee daa che' Chioza'ne'.

¹⁵ Na'ch chi'e legake':

—¿Shera le'? ¿Nora nale nak'?

¹⁶ Na' Simón Pédróna' chi'ene':

—Lin' Crístona', Xiin Chios yaa Chios banna'.

¹⁷ Na' Jesúza' chi'ene':

—Chakomba li' Simón, xiin Jonás, la' aga nochlan bzajnii li' daa ba wno'. Xa'na' zoa yabanan' ba bzajniile'n li'. ¹⁸ Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch ben'ka' gonłilall'gake' nad', na' ni yel' wita' bi yizoin wlliaiy'n ben'ka' ba wlej' kwenche nakgake' lall' na'. ¹⁹ Na' gon' li' yel' wñabia' daa zaklebi to xiinya dii chsaljan yabana' gana' chñabia' Chioza'. Na' diika' ino' bi chiyał' gon ben' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.

²⁰ Na' goll Jesúza' ben'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

Jesúza' bi'e dill' witgake'ne'

(Mr. 8:31–9:1; Lc. 9:22-27)

²¹ Na' lo llana' wzolo Jesúza' bzajniile' ben'ka' nakgake'ne' txen daa llia bia' gak che'. Golle' legake' chonan byen yiyaje' Jerusalénna' kwenche gake' lo na' ben' golka' chñabia' na' lo na' bxožka' chñabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na'

ka gak shoṅ lla yibane' ladj beṅ' wetka'. ²² Na'ch Pédróna' wleje' Jesúza' ladj beṅ'ka' chi'ene':

—Xan', jbat gak cho' ka ba wno'!

²³ Na' biyeçhj Jesúza' chi'e Pédróna':

—Kwas ka'lə, Satanás. Cheenzilo' bi gon' daa llia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

²⁴ Na' che' Jesúza' beṅ'ka' nakgake'ne' txen:

—Shi no cheeni gon nad' txen, chiya! wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa. ²⁵ La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kaní. ²⁶ ¿Bera zjanayin gap beṅ' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee. ²⁷ La' nad', Beṅ' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to beṅ' kon ka dii bene'. ²⁸ Dii li nia' le', ba-le lle'le ni, ni mbanle ile'ile yel' wñabia' cha'na', nad', Beṅ' Bsel' Chioza' Yell-lioni.

17

Biyak Jesúza' nlla'lə

(Mr. 9:2-13; Lc. 9:28-36)

¹ Ka wde xop lla, bche' Jesúza' Pédróna', na' Jacóbona' len beṅ' bishee Juanna', na' to lezgake' wyajlene' to lo yaa xen. ² Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillá, na' xe'na' nakwe' gokan xtil llyish axt chey cheeni'n. ³ Na' beṅ'ka' lle'lengake'ne' ble'gakile' dii Moiséza' na' Elíaza' chshaljlengake' Jesúza'. ⁴ Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shoṅ ransh, ton cho', ston che Moiséza' na' ston che Elíaza'.

⁵ Na' ka golle'ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶ Na' beṅ'ka' nak Jesúza' txen, ka bengakile' wne Chioza', le bllebchga-gake' na' to bdoszgake' lo yona'. ⁷ Na' wbig' Jesúza' kwite'ka' bexee legake', chi'e:

—Li yiyas. Bi illeble.

⁸ Na' ka bilis yichje'ka', koch no beṅ'ka' ble'gakile', stochga Jesúza'.

⁹ Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Beṅ' Bsel' Chioza' Yell-lioni, ba biban' ladj beṅ' wetka'.

¹⁰ Na'ch beṅ'ka' nak Jesúza' txen che'gake'ne':

—¿Berache naz beṅ'ka' chli' chsedi leya' zigaate Elíazan' yiyed'?

¹¹ Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lolte.

¹² Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Beṅ' Bsel' Chioza' Yell-lioni.

¹³ Na' gokbe'gakile' nan che Juanna', beena' bchoa beṅ' nisan' cho'e dill'.

*Jesúza' biyone' to bi' chaz shon**(Mr. 9:14-29; Lc. 9:37-43)*

14 Na' ka billingake' gana' lle' lla' ben', na'ch bchej to ben' jabigüee kwit Jesúza' na' b'chek' xibe'na' lawe'na', chí'ene':

15 —Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bzala'n leb' lo yi'na' na' lekzka' loo nisa'. 16 Na' ba jwa'b' lao ben'ka' nakgake' li' txen na' bi gok yiyongake'b'.

17 Na' goll Jesúza':

—¿Zi'tegalá chelena', le' ben' mal na' ben' bi chajle'! ¿Zi ka'k'tek chiya' soalen' le'? Na' ¿zi ka'k'tek chiya' soid' le'? Li da diwa' bi' xkwidaa ni.

18 Na'ch bsheshlen Jesúza' dii xiwaa yoo' na' bichejan. Na' katena' biyakib'.

19 Na' ka biyoll gok ka', ben'ka' nak Jesúza' txen bshaljengake'ne' to lezgake', gollgake':

—¿Bi'che bi gok yibejnto' dii xiwaa yoo bi' xkwidaa?

20 Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwás ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. 21 Kwenche gak yibeje dii xiwaa ka daa bibej' bi' xkwidaa, chiya' soale wbas' na' soachechle we'lwil-le Chioza'.

*Sto shii wdixjee Jesúza' witgake'ne'**(Mr. 9:30-32; Lc. 9:43-45)*

22 Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'. 23 Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdixje' daa chiya' gaxj che yoodo'na'

24 Na' ka billin Jesúza' len ben'ka' nakgake'ne' txen Capernaúma', ben' Israelka' ben'ka' chchixj che yoodo'na' jawiagake' Pédrona', na' wñabgakile'ne':

—¿Achyixj maestro chelena' daa chidol'cho we'cho che yoodo'na'?

25 Na' goll Pédrona' legake':

—Awe, chyixje'n.

Na' ka biyoo Pédrona' loo yooná' gana' zoagake', Jesúza' bkwiáloe' dillaa chí'e:

—¿Nak ka chakilo', Simón? Ben'ka' chñabia' yell-lioni, ¿aben' wllall che'kan' chchixjgake'?, ¿awa ben' zit'kan'?

26 Na' billii Pédrona' xtilleena':

—Ben' zit'kan' chchixjgake'.

Na' goll Jesúza'ne':

—Zejin ben' wllall che'ka' bi chonan byen chixjgake'. 27 Per kwenche bi wshaachogake', wyaj cho'a nido'na' na' wza'loo daa chzenilo' belá'. Na' bel' necha' seno' wxoo cho'aba' na' loo cho'aba' yillelilo' to mech. Waktekin llitjxjo' che choptecho.

18

Ben'ka' nak Jesúza' txen gokdilgake' nogaken' nak ben' zak'chi
(Mr. 9:33-37; Lc. 9:46-48)

¹ Na' do kana'kzə, ben'ka' nak Jesúza' txen jabig'gake' kwite'na' che'gake'ne':

—¿Noran nak ben' zak'chi ladj ben'ka' chñabia' Chioza'?

² Na' wñe Jesúza' to bi'do' na' bzie'b' ladje'ka'. ³ Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chñabia' Chioza'. ⁴ Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chñabia' Chioza'. ⁵ Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Xoll ibixcho lao dii mala'
(Mr. 9:42-48; Lc. 17:1-2)

⁶ 'Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlek'gake'ne' yel loo nisdona' aga ka daa wchixe' ben' lao dii mala'. ⁷ ¡Nyesh'laz che ben' yell-lioki!, la' biga iyallji daa gonan ka wxinj wle'ngake'. Per ¡nyesh'lazch gak che beena' gon ka wxinj wlen ben' yoblə!

⁸ 'Na' shi noona' wa ni'ona' gonan ka ibixo' lao dii mala', naklan wen wchogo'n na' choonon', la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol. ⁹ Na' shi daa ile'ilo' kon jalawo'na' gonan ka ibixo' lao dii mala', naklan wen wlechjo'n na' choonon', la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

Jempl che xilaa wnit
(Lc. 15:3-7)

¹⁰ 'Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. ¹¹ La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa wlliai'n legake'.

¹² '¿Nak chakile? Shi to ben' lle' to guioa xil' che' na' nit tob, ¿abi wkwaane' baka' taplalj twalj na' shaje' lljadilje' bana' wnit? ¹³ Na' shi yillelile'b, lech yibaile' cheb aga ka che baka' taplalj twalj baka' lle' tozga. ¹⁴ Ka'kzan Xacho Chioza' zoa yabana' cheenile' ni to ben'ki zi' wzolo chonlilall' nad' bi kwiai'y' shel'ka'.

Chiyal' si'xencho che ben'ka' nakcho txen chonlilall'cho Chioza'
(Lc. 17:3)

¹⁵ 'Shi to ben' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen. ¹⁶ Per shi bi wzenague' bin yoone', na'ch wchi'o sto chop ben' kwenche gakgake' taschiw che daa yoone'. ¹⁷ Na' shi ni ka' bi wzenague' chele, wak ye'le yog' ben'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che ben'ka' bi wzenague', na'chan gonilene' ka to ben' bi nonlilall' Chioza' wa ka to ben' wixixj.

¹⁸ 'Na' dii li nia' le', diika' inale bi gon ben' yell-lioni, lekzka' ina Chioza' zoa yabana', na' diika' inale wak gon ben' yell-lioni, lekzka' ina Chioza' zoa yabana'.

¹⁹ 'Na' lekzka' nia' le', shi chople idili xtill'lena' yell-lioni kat' bi inable lao Xa' Chioza', beena' zoa yabana', na' gone' daa inabilene'. ²⁰ La' gana' chdop chope' wa shone' choe'la'ogake' nad', na'kz zoa' ladje'ka'.

²¹ Na' wbig' Pédrone' kwit Jesúza', chi'ene':

—Xan', bał shii chiyal' yizi'xen' che bish' ljwellaa shi bi dii mal chone' cha'? ¿Azeelo gall shii?

²² Na' che' Jesúza'ne':

—Aga nia' li' zeelo gall shii yizi'xeno' che bish' ljwello'na', san nia' li' chiyal' yizi'xeno' guiyon shin'chopə shii.*

Jempl che beena' bi bizi'xen che bish' ljwelle'na'

²³ 'Yel' wñabia' che Chioza' zaklebin to ben' wñabia' beena' bizi' kwent che mecha' daa chal' wen llin che'ka'. ²⁴ Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb. ²⁵ Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoolo' na' yog'lol dii de che' kwenche yiyaxj xyana' daa llie'. ²⁶ Na' beena' chbag' mecha' bchek' xibe'na' lao xane'na', chonyeshee, chi'e: "Xan', wdapgach yel' chxenlall' cha', wiyixjkz' doxen daa chbagaa cho'." ²⁷ Na' xane'na' biyeshile'ne', na' bene' ka'z doxen daa chalee che', na' bisane'ne'. ²⁸ Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene': "¿Biyon xmechaa daa chaloo!" ²⁹ Na' bchek' xib beena' lawe'na' na' chonyeshee, chi'ene': "Wdapgach yel' chxenlall' cha', wiyixjkz' doxen daa chbagaa cho'." ³⁰ Na' bi goonile', san lii wyajtie' ji'ene' part kwenche wloogake'ne' lillyana' axt ki yiyixjche' doxen daa chalee che'. ³¹ Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. ³² Na' wizax xane'na' le', chi'ene': "Ben' mal inleeb nako'. Nad' ben' ka'z doxen daa chaloo cha' daa benyeshoo lawa'. ³³ Ka'kzan nan chiyal' yiyeshilo' bish' ljwello'na' chal' cho', ka biyeshid' li'." ³⁴ Na' daa le' bllaachga xane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

³⁵ Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che ljwell-le do yichj do lall'le.

19

Bi chiyal' yilaa ljwell ben'ka' nkaa cheyin

(Mr. 10:1-12; Lc. 16:18)

¹ Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa llia shlaa yao Jordánna'. ² Na' ben' zan zjanogake'ne', na' na' biyone' ben'ka' bi shao'.

³ Na' wbig' bał fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoolallee?

⁴ Na'ch che' Jesúza' legake':

—¿Abin' wlable gana' nan ka wxw wzil yell-lioni Chioza' bene' benecha', ben' byo na' noolə? ⁵ Na' wne': "Daan, wlaa ben' byona' xaxneena' kat' ikaa

* **18:22** Guiyon shin'chopə shii: bał yishka' nyoj de dill' griegona' nan gall shii de guiyonshin'. Per chopten zejın toshiizi chiyal' yizi'xecho che ben'.

che', na' soalene' xoolena' gakgake' toz." 6 Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btilē' legake'.

7 Na' gollgake'ne':

—Na' ζbi che ben dii Moiséza' mandad kat' to ben' yilaa xoolena' chiyal' wlıse' to yish dii we'n dill' bich nake' xoolena' wak yichoonē'ne'?

8 Na' goll Jesúza' legake':

—Yel' widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'. 9 Nad' nia' le', shi nool chelena' bi chdalene' ben' yoblə, bi chiyal' yilaalene' na' yikaale nool yoblə, la' shi ka' gonle, na' chonle ka beena' zoalente xoolena' na' chdalene' noolə yoblə.

10 Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

11 Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n. 12 La' de dii chllonan wshagna' ben'. Bał ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj beñecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'

(Mr. 10:13-16; Lc. 18:15-17)

13 Na' wyaj ben' jwa' bi'do' che'ka' lao Jesúza' kwenche wxoā neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'. 14 Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chñabi'e loo yichjlall'do' ben'ka' nak ka legakb'.

15 Na' ka biyoll bxoa na' Jesúza' yichj bi'do'ka', na'ch bizēē ziyaje' gan yoblə.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

16 Na' bllin to bi' wew' lao Jesúza' che'b' le':

—Maestro, ζbi dii wennan' chiyal' gon' kwenche gat' to yel' mban cha' zejli kañi?

17 Na'ch goll Jesúza' le'b':

—ζBi che chñabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli kañi, chiyal' gono' diika' bllia Chioza' bia' goncho.

18 Na' goll bi' wewaane':

—ζBera diika' chiyal' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljlalloo bizə gon ino' che ben'. 19 Wdap balaan xaxnoona' na' goki bish' ljwello'na' ka chaki kwino'.

20 Na' che' bi' wewaane':

—Yog' diika' chon' kana' naktia' bi'do'. ζBerachan ni chyallj gon'?

21 Na' goll Jesúza' le'b':

—Shi lekzilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna' wyoon ben' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

22 Na' ka beni bi' wewaa dga, nyesh' inleeb gokib' na' biza'b', la' bi' wni'a nleban nakb'.

23 Na' goll Jesúza' ben'ka' nakgake'ne' txen:

—Dii li nia' le', lallj inleeb chonan che ben' wni'ana' yilline' yabana' gana' chnabia' Chioza'. 24 Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

25 Na' bibangakile' ka wne', na' che' ljwellgake':

—¿Notg gak yillin lao Chioza', shka'?

26 Na' bwia Jesúza' legake', na' golle':

—Ni to ben' yell-liona' bi gak gone' dga, san Chioza' yog'lołte chak gone'.

27 Na' che' Pédrone'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

28 Na' che' Jesúza' legake':

—Dii li nia' le', kat' illin lla yikob yog'loł dii de, nad', Ben' Bseł' Chioza' Yell-lioni, kwi'a inabi'a gana' sho'a balaan xen wal, na' le', shllintele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che ben' Israelka'. 29 Na' nottez beena' ba wlej yichje' lille'na', ben' bisheeka', ben' zane'ka', xaxneeka', wa xiin xooole', wa yell-lio che' ni cha', Chioza'kzə wi'ene' dii zak' dii xen inleebch aga ka daa wlej yichje', na' lekzka' wi'ene' to yel' mban zejli kanı. 30 Per ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

20

Jempl che wen linka'

1 Na' wna Jesúza':

—Yel' wñabia' che Chioza' chzaklebin daa gok che to xan yell-lio beena' naz yag uvana'. Na' shzildo' wzee zeje' zjtilje' wen linka' kwenche ljengake' llinna' gana' naze' yag uvaka'. 2 Na' bgaangake' dill' chixje' legake' che lla, na'ch bselee legake' gana' ljengake' llinna'. 3 Na' ba gok shon gor chon ben' nechka' llinna' ka wyaje' dii yoblə gana' chak yaana', na' ble'ile' lle' ben' bibi llin de gongake'. 4 Na'ch chi'e legake': "Li shaj li ljen llinna' gana' naz' yag uvana' na' chixj' le' daa chidol'le." Na' wza'gake' zejgake' llinna'. 5 Na' do ka gobill wizaje' dii yoblə, na' lekzka' chida shonə, bizlleleile' ben' yoblə ljengake' llin che'na'. 6 Na' do ka chida gay', wizaje' dii yoblə na' bizle'ile' ben' lle'zgake'. Na'ch chi'e legake': "¿Biche bi benle llinna' naanlla?" 7 Na' goll ben'ka'ne': "La' ni to kono bche' neto' llinna'." Na' golle' legake': "Li shaj, lla, li ljen llinna' gana' naz' yag uvana'." 8 Na' ka wzeles yela' na' che' xan yag uvana' beena' ngoo lo nee llinna': "Biyax wen linka' na' wdixjgake'. Zigaate ben'ka' zi' wyoo llinna' chixjo', na' yiyoll-lin ben'ka' wzolo nech." 9 Na' bene' kon ka goll xane'na', na' wdixje' zigaate ben'ka' wyoo llinna' do ka chida gay'. Na' wdixje' to toe' che llakzə. 10 Na' ka gol' chixje' ben'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'. 11 Na' ka ba nox'gake' laxje'ka', wzologake' biz chon chnagake' che xan llinna', 12 na' gollgake'ne': "Do lla wzento' lo bana' bennto' xshino'na' na' toz ka wdixjo' neto' len ben'ka' zi' wyoo, na' zi' tgorchga bengake' llinna'." 13 Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaancho dill' che llan chixj' li'? 14 Wkaa

laxjo'na', na' biyaj. Nad' cheenid' chixj' beṇ'ka' wyoo llinna' ba wlle'ch ka to daa ba wkoo. ¹⁵Jwayishaz nad' bi gonid' xmechaa. ¿Anti chakziilo' daa chonid' beṇ' wen?"

¹⁶Na' ka wde bzoa Jesúza' jempli, na' chi'e beṇ'ka':

—Ka'kzan beṇ' zan nakgake' beṇ' zakii, wllin lla bich bi sak'gake', na' beṇ' zan bi nakgake' beṇ' zakii, wllin lla gakgake' beṇ' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

¹⁷Ka ziyaj Jesúza' Jerusalénna' wṇie' to beṇ'ka' shllinzə, chi'e:

¹⁸—Naa ba ziyajcho Jerusalénna', gana' gongake' nad', Beṇ' Bsel' Chioza' yell-lioni, lo na' b̄xozka' chṇabia' na' lo na' beṇ'ka' chli' chsedi leya', na' w̄choglogake' witgake' nad'. ¹⁹Na' gongake' nad' lo na' beṇ'ka' bi nak beṇ' Israel kwenche wtitgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj beṇ' wetka'.

Daa wṇab x̄na' Jacóbona' len Juanna' lao Jesúza'

(Mr. 10:35-45)

²⁰Na' Jacóbona' len Juanna', beṇ'ka' nak xiin Zebedewa', wbig'lengake' x̄neeka' kwit Jesúza', na' x̄neeka' b̄chek' xibe'na' lawe'na' wṇabile'ne' to goklen. ²¹Na' goll Jesúza'ne':

—¿Bera goklenan cheenilo' gon' cho'?

Na' golle'ne':

—Cheenid' gongacho' goklen kweko' bi' cha'ki sh̄laa wej kwito'na' kat'ka' illin lla inabi'o.

²²Na' goll Jesúza'ne':

—Ni bi ñezile bin chṇable. ¿Awizoile wtil-le yel' zak'zi'na' ka daa wtil' na' gak chele ka daa gak cha'?

Na' gollgake'ne':

—Wizokzinto'n.

²³Na' goll Jesúza' legake':

—Lekzile wtil-le ka daa wtil', na' gak chele ka daa gak cha', per daa nale kwe'le sh̄laa wej kwitaa bi nak lo na' gon' ka nale, san X̄a'nan' ba mbeje' beṇ'ka' wi'en.

²⁴Na' beṇ'ka' zi shi, bllaagake' Juanna' len Jacóbona' daa wṇabgake' kwe'gake' kwit Jesúza'. ²⁵Na' bitop Jesúza' legake', na' chi'e:

—Ñezkzile zoa beṇ' wṇabia' na' beṇ' zakii che to to yell na' chongakile' kon daa nazan chegake' beṇ' yell che'ka'. ²⁶Per aga kan' chiya' gonle. Shi nole cheenile gakle beṇ' mbejlawin chiya' gakle ka to beṇ' chon xshin beṇ'. ²⁷Na' shi nole cheenile gakle beṇ' zakii, chiya' gakle ka beṇ' ndoo lla yel chone' xshin beṇ'. ²⁸Ka nak nad', Beṇ' Bsel' Chioza' Yell-lioni, aga bid' kwenche gaklen beṇ' nad', san bid' kwenche gaklen beṇ' na' wi'a yel' mban cha'ni kwenche yisla' beṇ' zan lao saaxya che'ka'.

Jesúza' biyone' chop beṇ' lchol

(Mr. 10:46-52; Lc. 18:35-43)

²⁹Na' ka biza' Jesúza' yell Jericóna' len beṇ'ka' nakgake'ne' txen, beṇ' zan inlleb janogake'ne'. ³⁰Na' cho'a neza' chi' chop beṇ' lchol, na' ka bengakile' bide Jesúza' kwite'ka' na'ch besyaagake', che'gake':

—j̄xan', xiin dia che dii Daví, biyesh'lall'gachi neto'!

³¹Na' beṇ'ka' zejlen Jesúza' bsheshlengake' legake' kwenche nan kwe'gake' lliz, per ziziklə besyaachgake', che'gake':

- ¡Xan', xiin dia che dii Daví, biyesh'lall'gachi neto!
 32 Na'ch wlez Jesúza' na' wnie' ben' lcholka', na' chi'e legake':
 —¿Beran cheenile gon' chele?
 33 Na'ch che' ben' lcholka'ne':
 —Xan', bengach ka ile'into'.
 34 Na' biyesh'lalli Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

21

Bllin Jesúza' Jerusalénna'

(Mr. 11:1-11; Lc. 19:28-40; Jn. 12:12-19)

¹ Na' ka ba zoa yillingake' Jerusalénna', bllingake' cho'a yell Betfagéna' daa lia kwit Yaa Olívoza'. Na' wlej Jesúza' chop ben'ka' nakgake'ne' txen na' bselee legake' yella'. ² Na' chi'e legake':

—Li shaj yella' daa lia shlaana'. Na' ile'ile to burr ba noolə da'b yag na' nche' to xiindo'b. Na' wsell-leb wche'legakb nilə. ³ Na' shi no bi ina le', na' ye'lene': “Xannto'nan' chyaljile' legakb, na' lii yidsantento'gakb.”

⁴ Na' daa gok ka', billinin ka bzej dii beena' wdixjee daa goll Chioza'ne' daa wne':

⁵ Li ye' ben'ka' lle' yell Siónna':
 “Li wwia, ba za' ben' wñabia' chelena',
 nake' ben' gaxjlall' na' llie' to burrdo';
 xiin to ba choa' yoa.”

⁶ Na' wza' ben'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'. ⁷ Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'. ⁸ Na' ben' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'. ⁹ Na' ben'ka' llialo lao Jesúza', na' ka'kzə ben'ka' nogake'ne', wzologake' chosyaagake', nagake':

—¡We'la'ocho beeni nak xiin dia che dii Davina! ¡Gonleeyshga Xancho Chioza' beeni ba bselee! ¡Li da we'la'ocho Chioza' zoa yabana!

¹⁰ Na' ka wyoo Jesúza' yell Jerusalénna', na' yog' ben'ka' lle' na' bllesh bcheengake', nagake':

—¿Noraz beeni bla' ni, lla?

¹¹ Na' ben'ka' che'gake':

—Beenin Jesúza' ben' Nazareta' yell daa mbani Galileana', beena' chyixjee daa che' Chioza'ne'.

Bishesh Jesúza' ben'ka' chit' chde lesh' chyoodo'na'

(Mr. 11:15-19; Lc. 19:45-48; Jn. 2:13-22)

¹² Na' wyoo Jesúza' lesh' chyoodo'na' na' bisheshe' yog' ben'ka' chit' chde na'. Na'ch bishi'e mes che ben'ka' chsha' mecha' na' bzoles bzolline' gana' chi' ben'ka' chit'gake' palomka'. ¹³ Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill ben' nad”, na' le', ba nonzlen ka to ga chdop chllag wban.

¹⁴ Na' shlak zoa Jesúza' yoodo'na', bal ben' lchol' na' ben' bi chak sa'gake' wen bllingake' lawe'na', na' biyone' legake'. ¹⁵ Na' bxoza' chñabia' na' ben'ka' chli' chsedi leya' le bllaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “¡We'la'ocho beeni nak xiin dia che dii Davina!” ¹⁶ Na' gollgake' Jesúza':

—¿Achenilo' ka na bi'do'ka'?

Na' chí'e legake':

—Awe, chenzid'. ¿Abin' wlable Cho'a Xtill' Chioza' gana' na: Chchino' cho'a loll' bi' xkwid'do'ka' na' bdo'ka' ni chall' chxop kwenche chol' chnegakb' li' ka chiyał' we'la'o ben' li'?

¹⁷ Na'ch bicheje' ladj ben'ka', na' bizee yell Jerusalénna' ziyaje' yell Betániana' gana' wdie' yel.

Jesúza' bene' ka wbill to yag yixwew

(Mr. 11:12-14, 20-26)

¹⁸ Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'. ¹⁹ Na' ble'ile' to yag yixwew dii zoa cho'a neza', na' jawie' shi llian. Per zeelo xlaguiinna'z llia. Na' golle'n:

—¡Batch kwio' yixwewa'!

Na' katena' lii wbillte yaga'. ²⁰ Na' ka ble'i ben'ka' nakgake'ne' txen ka gok, le bibangakile', na' che'gake'ne':

—¿Berache' lii wbilltelikaza' yag yixwewa'?

²¹ Na'ch che' Jesúza' legake':

—Dii li nia' le', shi nonlilall'le Chioza' na' bi gakchoplall'le, aga daazan gak gonle, san wakte ye'le yaani: “Bkwaz, na' jsoa loo nisdona'”, na' gak ka ye'len. ²² Na' yog' daa inabile Chioza' ka we'łwill-lene' gonkze'n kon shi nonlilall'lene'.

Yel' wnabia' che Jesúza'

(Mr. 11:27-33; Lc. 20:1-8)

²³ Na' wyaj Jesúza' dii yoblə yoodona' kwenche jali' jasedile' ben'ka'. Na' shlak chli' chsedile' legake', bxozka' chnabia' na' ben' golka' chnabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben' li' yel' wnabia'na'?

²⁴ Na' goll Jesúza' legake':

—Lekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens cheyi chon' yog' diiki. ²⁵ Li inashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lezgake', nagake':

—Shi ye'chone' Chioza' bseleene' na'ch ine' cho': “¿Bi'che bi wyajle'le che', lla?” ²⁶ Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lole' chajle'gake' Chioza' bselee Juanna' kwenche bidtixji'e daa golle'ne'.

²⁷ Na'ch che'gake' Jesúza':

—Bi nezinto' non bsel' dii Juanna'.

Na' goll Jesúza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

²⁸ Na' goll Jesúza' legake':

—¿Bi ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.”

²⁹ Na' che' xiine'na'ne': “¡Bi sha'!” Per na'tech biyajib' na' wyajkzb' jem' llinna'. ³⁰ Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'. ³¹ Li inashki, ¿nora bi'ka' chop ben ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' wíchixjka' na' noolə wdaka', lelgaken' zigaate we'gake' latj inabia' Chioza' legake' aga ka le'. ³² La' ka bid Juanna' bchoe' ben' nisa', bidzajniile' le' ka chiyal' soa kwezle, per le' aga wyajle'le che', lete ben' wíchixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

Jempl che wen linka' nak ben' mal

(Mr. 12:1-12; Lc. 20:9-19)

³³ Li wzenag jempli sto. Wzoa to ben' biyaze' yag uva lo yell-lio che'na' na'ch wlo'en leej, na'tech benschawee to ga wsigake' uvaka'. Na' lezkka' bene' to yoo sibə gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. ³⁴ Na' ka gol' yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche ljaxi'gake' uvaka' daa chidolee. ³⁵ Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'. ³⁶ Na'ch bsel' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uvaka' bengakile' legake' ka bengakile' ben' nechka' bllin.

³⁷ Na'ch xan yag uvaka' bselee kwinkz xiine'na', chakile': "Wapgake' balaan bi' cha'ni na' we'gake'b' daa chidolaa." ³⁸ Per ben'ka' chap yag uvaka' ka ble'gakile' xiine'na', na'ch che' ljwelle': "Bi'nin xiin xan yag uvaki na' leban' yigaanlem' yog' dii nape'. Li da witchob' kwenche yigaanlencho daa gaki cheb'." ³⁹ Na'ch bex'gake'b' bibejgake'b' gana' lle' yag uvaka' na' betgake'b'.

⁴⁰ Na' Jesúza' chi'e ben'ka' lle' na':

—¿Nakra ka chakile gon xan yag uvaka' che ben'ka' chapgake'n ka illine' kwine'?

⁴¹ Na' che' ben'ka':

—Ba nakten wite' legake' na' bi yiyeshile' legake' daa nakgake' ben' mal. Na' yiyone' yell-lio che'na' lo na' ben' yoblə, ben' yiyoe'gake'ne' daa chidolee kat' yishibgake'n.

⁴² Na' goll Jesúza' legake':

—¿Abigan' wlable Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yoona'.

Dgan ben Xancho Chioza'

na' nakan to dii yibanicho?

⁴³ Daan nia' le', kon ka gon xan yag uvaka' yiyone' yell-lio che'na' lall' na' ben' yoblə, ben' gongake' ka cheenile', ka'kzan gon Chioza' chele. Kwej yichje' le', na' ben'ka' wzenaggake' che', si'gake' banez yel' wnabia' che'na'. ⁴⁴ Na' ka nak yaja', nottezə ben' lljchaze' lawinna' kwiayee, na' shi idakwan ben', axt wshoshjan le'.

⁴⁵ Na' ka biyoll bzenag bxožka' chnabia' na' fariseoka' jemplki bzoa Jesúza', na'ch gokbe'gakile' chegake'n chnie'. ⁴⁶ Na'ch goklall'gake' gox'gake'ne', per bi biyaxjgakile', la' bllibgake' ben'ka' lle' na' daa chajle'gake' Jesúza' nake' to ben' chyixjee daa che' Chioza'ne'.

22

Jempl che to wishagna'

¹ Na' Jesúza' bseesile' legake' sto jempl, chi'e:

² —Yel' wñabia' che Chioza' chzaklebin to ben' wñabia', ben' bene' to lni che xiine'na' ka bshagna'b'. ³ Na' bselee wen llin che'ka' lljanegake' ben'ka' ba bye', per ben'ka' bye' bi goongakile' shajgake'. ⁴ Na'ch bizselee zi shkwen wen llin che'ka' chi'e legake': "Li lljell ben'ka' ba bya' yid lni che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho." ⁵ Per ben'ka' ba bye' bi bengake' kwent daa goll wen llinka'. Toe' wyaj jawia' yell-lío che'na' na' stoe' wzee zeje' delgens che'na'. ⁶ Na' ben'ka' sto beɣgake' wen llinka' na' biya dii bengakile' legake' axt ka witgake'. ⁷ Na' le bllaachga ben' wñabia'na', na'ch bselee soldad che'ka' kwenche jetgake' legake' na' bzeygake' yell che'ka'. ⁸ Na'ch chi'e wen llin che'ka' sto: "Ba gok daa yeej gaocho, na' wentelan bi wlen ben'ka' bya'. ⁹ Na' li shaj lyell na' li wche' kon no ben' yillagle tneza' kwenche yidgake' yeej gaogake'." ¹⁰ Na'ch wza' wen llinka' zejgake', na' jxi'gake' kon no ben' billaggake', ka ben' wen ka ben' mal. Na' blla'cha lill ben' wñabia'na'.

¹¹ 'Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiyal' gakwe' gana' chak wishagna'na'. ¹² Na' goll ben' wñabia'na'ne': "Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?" Na' beena' bikzə bi billet-lallee yeene'. ¹³ Na'ch che' ben' wñabia'na' ben'ka' chde yel' wawa': "Li wchej ni'a na' beeni na' li yibeje' na' li wzalee gana' shgaj shchol, gana' kwellyeshee na' gaoxaxj leye'na' daa le gakshejlallee." ¹⁴ La' ben' zan nak ben'ka' chax chñab Chioza', per balchagake' kweje' gakgake' lall' nee.

Wñabgakile' Jesúza' shi chiyal' chixjgake' daa chñab ben' wñabia'na'
(Mr. 12:13-17; Lc. 20:19-26)

¹⁵ Na' biza' fariseoka', na' wloogake' xnezi naklə gongake' kwenche we' Jesúza' dill' dii wchixa'n le'. ¹⁶ Na'ch bsel'gake' bal ben'ka' nakgake'ne' txen na' zi bal ben'ka' nak Heródeza' txen kwenche wyajgake' lao Jesúza' na' jellgake'ne':

—Maestro, nezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' no nakgake'. ¹⁷ Daan cheeninto' inagacho' neto' nak ka chakilo': ¿Achiyal' chixjcho daa chñab ben' wñabia' Césara', anti bi chiyal' chixjchon?

¹⁸ Na' gokbe'i Jesúza' aga do lall'gaken' gollgake'ne' ka', na'ch chi'e legake':

—Le' ben' wxiye', aga dii leilen nale ka'. ¹⁹ Li wli'shki nad' to mech daa chyixjile ben' wñabia'na'.

Na' be'gake'ne' to mech. ²⁰ Na' goll Jesúza' legake':

—¿Nora cho'alawin na' no leyin da' lee mechí?

²¹ Na'ch che'gake'ne':

—Che ben' wñabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

22 Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' wñabgake' nak gak kat' yiban beñ' wetka'

(Mr. 12:18-27; Lc. 20:27-40)

23 Na' lo llana'kzə saduceoka', beñ'ka' bi chajle'gake' yiban beñ' wetka', wyajgake' lao Jesúza', na' wñabgakile'ne':

24 —Maestro, dii Moiséza' wne' shi to beñ' byo guete' na' kono xiine' wzoa, beñ' bisheena' chiyal' yikee xool dii beñ' bisheena' kwenche soa xiin dia che dii beñ' weta'. 25 Na' ki gok che gall bish' beñ' nakgake' neto' txe. Beñ' necha' bshagnee, na' wite' na' kono xiine' wzoa, na' beñ' bishee, beñ' wchopina', bikee xoolena'. 26 Na' lekzka' wit beñ' wchopina' na' kono xiine' wzoa. Na' ka'kzə wit beñ' wyonina' na' axt biyate beñ'ka' gall wit. Na' ni togake' bi wzoa xiingake'. 27 Na' ka wde wit yog'lole' na'ch lekzka' wit noola'. 28 Na' kat' yiban beñ' wetka', naa, ¿nora beñ'ka' gall bish' gaki xoolena' noola'? la' yog'lole' wkaagake'ne'.

29 Na'ch che' Jesúza' legake':

—Naklejjilen daa bi nezile ka na Cho'a Xtil' Chioza', na' ka nak yel' wak che'na'. 30 La' kat' yiban beñ' wetka', koch no yikaa ljwellin, ni koch no wit' wde xiinin, san yiyakgake' ka anjlka' lle' yabana'. 31 Na' ka nak daa yiban beñ' wetka', naa, ¿abin' wlable daa wna kwín Chioza', gana' nan: 32 “Nad nak' Chios che Abrahama', Isaaca' na' Jacoba'”? Na' bi nake' Chios che beñ' wet, san nake' Chios che beñ' ban, la' lao Chioza' mban beñ'ki.

33 Na' ka beni beñ'ka' lle' na' daa wna Jesúza', le bibangakile' ka chli' chsedile'.

Daa lliarote daa bllia Chioza' bia' goncho

(Mr. 12:28-34)

34 Ka wñezi fariseoka' ba wleklli Jesúza' saduceoka', na'ch wyajgake' kwite'na'. 35 Na' to beena' chli' chsedi leya' wñabile' Jesúza' kwencheza wchixeene', chi'e:

36 —Maestro, ¿beran lliarote nllia leya' bia' goncho?

37 Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajniilo'.” 38 Dgan liizelozí chonte na' llialon lawi yog' diika' nllia leya' bia'. 39 Na' de wchopina' nakan katekzə dii necha', na' nan: “Chiyal' gakilo' bish' ljwello'ka' ka chaki kwino'.” 40 Na' diiki chop chejin doxen ka na leya' len diika' bzej dii beñ'ka' wdixjee daa goll Chioza' legake'.

Crístona' nake' xiin dia che dii Davina'

(Mr. 12:35-37; Lc. 20:41-44)

41 Na' shlak ndop nllag fariseoka' kwit Jesúza' 42 wñabile' legake':

—¿Nak ka chakile che Crístona', beena' inabia'? ¿No xiin dia cheyin nake'?

Na' che'gake'ne':

—Xiin dia che dii Davinan'.

43 Na' che' Jesúza' legake':

—Na' ¿berache ben Espíritu Sántona' ka goll dii Davina'ne': “Xan”? La' kin na daa bzeje':

44 Xancho Chioza' golle' Xan'na':

“Wche' kwit' de shlini,

shlak wzoa' xni'ona' beñ'ka' chakzbani li'.”

45 Na' shi kwin dii Davina' golle' Crístona': "Xan", ¿berache nazle nake' xiin dia che', shka'?

46 Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

23

Jesúza' chawe' xya che fariseoka' na' ben'ka' chli' chsedile leya'

(Mr. 12:38-40; Lc. 11:37-54; 20:45-47)

1 Na'ch Jesúza' golle' ben'ka' nakgake'ne' txen len ben'ka' lle' na', chi'e:

2 —Ben'ka' chli' chsedile leya' na' fariseoka' nak lo na'gake' wzajni'gakile' ben' daa bzej dii Moiséza'. 3 Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle. 4 Dii zan dii che'gake' ben' chiyal' gongake', na' nakan ka to yoa' xen dii chwa'gake' ben' dii kono so saki, na' legake' bikz bi chda na'gake' kwenche gaklengake'. 5 Na' yog' diika' chongake' chongake'n kwencheza ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chche' neeka' chongake'n dii xench aga ka che ben' yoblə, na' chtonch'gake' lox xe'ka' aga ka che ben' yoblə. 6 Na' kat' chajgake' Inika', le chibagakile' kwe'gake' gana' chbe' ben'ka' zakii, na' lekzka'yen' chjengake' gana' chdop chllaggake' choe'lwillgake' Chioza'. 7 Na' le chibagakile' gap ben' legake' balaan kat' chillaggake' legake' ga lle' lla' ben' na' ye'gake' legake': "maestro".

8 'San le', bi we'le latj ina ben' le' "maestro", la' toz nadaan nak' Maestro chele na' yog'le nakle ka bish' l'jwellin. 9 Na' kono ye'le "xa" lo yell-lioni, la' toz Chioza', beena' zoa yabana', nake' Xale. 10 Ni bi we'le latj inagake' le' "maestro", la' toz nad', Cristo, nak' Maestro chele. 11 La' beena' nak ben' gaxilall' na' chaklene', beenan' nake' ben' zak'chi ladjlana'. 12 Na' beena' chon kwine' ben' zakii, Chioza' gone'ne' ben' bibi zakii. Na' beena' chon kwine' ka ben' bibi zakii, Chioza' gone'ne' ben' zakii.

13 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chsej chllonle gombia' ben' yel' wnabia' che Chioza', na' ni bi choe'le latj inabi'e le', ni bi choe'le latj che ben'ka' cheengakile' inabi'e legake'.

14 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chkaale lill nool wizebka' na' choe'lwill-le Chioza' ssha nllleb kwenche gaki ben' nakle ben' wen. Na' daa chonle ka', Chioza' wsak'zi'che' le' aga ka ben' yoblə.

15 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! Chdale to ni to na' chyilje ben' wsede' daa chli' chsedile. Na' kat' chlleilene' chónlene' ben' malch aga ka le' na' chlliaiyi'chlene' axt choplə ka to ba mbiayi'le.

16 'iNyesh'laz gak chele, le' nakle ka ben' lchol, ben' chakile' wak wchi'e sto ben' lchol! La' nale: "Shi to ben' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n." Na' chiznale: "Shi wzoe' de taschiw ora' daa de loo yoodo'na', na'chan chiyal' gone' daa bchebe'." 17 iLe' nakle ka ben' lchol daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios. 18 Na' lekzka' chiznale: "Shi to ben' wchebe' to dii gone' na' wzoe' de taschiw gana' chzeygake'

bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiyal' gone' daa bchebe'." 19 jLe' nakle ka ben' lchol' daa bi chajniile! jAbi chakbe'ile' gana' chzeygake' bayixaa chzanen we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios. 20 La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'. 21 Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nana' chzoe' de taschiw, san lekzka' len Chiozan' daa nakan lill xlatje'. 22 Na' lekzka' beena' chcheb wi'e to dii wi'e na' chzoe' de taschiw yabana', aga toz yabanana' chzoe' de taschiw, san len Chiozan' daa nakan gana' chnabi'e.

23 jNyesh'laz gak chele, le' chli' chsedile leya' na' le' fariseo, daa nakle ben' wxiye! Choe'le Chioza' diezmona' axt len yixweja', aniza', na' cominna', per bi chonle daa lliatotech daa nllia Chioza' bia' goncho. Dii lliatotech goncho daa nak shli, yiyesh'lalicho ben', na' gonlilall'cho Chioza' do yichj do lall'cho. Diikin chiyal' gonle, per lekzka' bi chiyal' wsanle gonle diika' sto. 24 jLe' nakle ka to ben' lchol' ben' chakile' wak wchi'e sto ben' lchol! Na' chonle ka to ben' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

25 jNyesh'laz gak chele, le' chli' chsedile leya' na' le' fariseo, daa nakle ben' wxiye! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki ben' nakle ben' wen per le chzelall'le bi dii de che ben' na' chbanlen. 26 Na' le' fariseo, jnakle ka ben' lchol' daa bi chajniile! Li yiyaj yileni daa chonle kwenche gakle ben' wen ka chaki ben' nakle, na'ch gakle ka xig' yeen dii nxi nyech ka loola' ka koll'lin.

27 jNyesh'laz gak chele, le' chli' chsedile leya' na' le' fariseo, daa nakle ben' wxiye! La' nakle ka to lill ben' wet dii nyebgake' yiw' na' nla' lawinna' xochi, per lo'inna' lle' lla'n llit wetka' na' bichla' dii zban. 28 Kan' nakle le' daa chonle ka chaki ben' nakle ben' li ben' shao' per loo yichjlall'do'lena' lle' lla'n de wxiye' na' dii mal.

29 jNyesh'laz gak chele, le' chli' chsedile leya' na' le' fariseo, daa nakle ben' wxiye! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochla' ben'ka' gok ben' li ben' shao'. 30 Na' nale: "Shel'ka' neto' ba zoanto' kana' wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'." 31 Per kwinkzkzen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'. 32 jNa' li yisyoll li yisto li gon dii mala' daa bi biyoll gon dii xozxto'leka'!

33 jLe' nakle ka bel' znia! Bi gakile shi wilale lo yi' gabila'. 34 Daan wselaa ben' chixje'gakile' le' daa yepgakee. Wselaa ben' sin' ben' chajniil kwenche wli' wsedgakile' le' cho'a xtilaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yellka' gana' illingake'. 35 Na' daa gonle ka', yidobile yel' wit che yog'lol' ben' li ben' shao'ka' bet dii xozxto'leka', wzolozin dii Abela' beena' gok ben' li ben' shao', axt dii Zacariaza', xiin Berequiaza', beena' betgake' latja' daa de cho'a yoodo'na', kwit gana' chzeygake' bayix'ka'. 36 Dii li nia' le', ka le' zoale naa chidol'le sak'zi'le che yog' daa ben dii xozxto'leka'.

Jesúza' gokyeshile' che ben' Jerusalénka'

(Lc. 13:34-35)

³⁷ ¡Le' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena! ¡Zan shii goklallaa gon' chele ka chon jeda' chiyellb xiindo'bka' xan xilba', na' bi goklall'le! ³⁸ Na' naa ba wlej yichj Chioza' le', na' gani lle'le idesh iloan. ³⁹ Na' nia' le', bich ile'ile nad' axt kat'ch illin lla inale: “¡Gaklenshga Xancho Chioza' beeni ba bselee!”

24

Jesúza' bi'e dill' yiyinj yoodo'na'

(Mr. 13:1-2; Lc. 21:5-6)

¹ Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'. ² Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljwellin.

Diika' gak kat' ba zoa te che yell-lioni

(Mr. 13:3-23; Lc. 21:7-24; 17:22-24)

³ Na'ch biyajgake' lo Yaa Olivoza', na' ka chi' Jesúza' lo yaana' na'ch wbig' ben'ka' nakgake'ne' txen na' xochitezə wñabgakile'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?

⁴ Na'ch che' Jesúza' legake':

—Wsak'yen'gale kwenche kono siye'z le'. ⁵ La' ben' zan ichej inazgake': “Nadaan Crístona'.” Na' ben' zan shajle'. ⁶ Na' yenile chak wdil' to ni to na', per bi gakshejlall'le. La' dii chiyal'kz gakan, per aga ba bllin lla te che yell-lionin kat' ba chak ka'. ⁷ La' yidil'-len ljwell yellka' na' ben' wñabia'ka' yidil'-len ljwellgake', na' kwe' yillwe', kwe' wbin, na' zan yell gak bedxo' wal. ⁸ Kat' ba chak diiki, shinz chzolo ka nak daa yen ile'i ben' yell-lioki.

⁹ Na'ch gongake' le' lo na' ben'ka' wchi' wsak' le', na' witgake' le', na' yog' ben' yell-lioki gakzbangakile' le' daa nonlilall'le nad'. ¹⁰ Na' kat' ba chak diiki ben' zan bich gonlilall'gake' nad', na' gakzbani ljwelle' na' gon ljwellgake' lo na' ben' mal'ka'. ¹¹ Na' ichej zan ben' gonzgake' ka ben' chyixjee daa che' Chioza' legake', na' ben' zan shajle'. ¹² Na' daa kwe'chachga dii mala', ben' zan bich gaggakile' Chioza' ni bish' ljwelle'ka'. ¹³ Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kani. ¹⁴ Na' ka nak dill' wen dill' kob che yel' wñabia' che Chioza', chonan byen lljtixjeegake'n doxen yell-lioni kwenche yog'lol' ben' yengakile'n, na' kana'chan te che yell-lioni.

¹⁵ 'Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wñitan balaan cheyinna', na' chiyal' sele wneyi bin zejín. Na' kat' ile'ile'n loo yoodo'na' ¹⁶ kanan' ben'ka' zoa Judeana' chiyal' wxonjgake' shajgake' yaa yaoka'. ¹⁷ Na' beena' llia koll' lille'na' ni bich gal' yiyetje' lljaleje' dii de loo yoo lille'na'. ¹⁸ Na' beena' chda lyixaa ni bich gal' yiyaje' lille'na' lljaxi'e xe'na'. ¹⁹ ¡Nyesh'laz gak che noolka' noa' na' noolka' chwall' chxop llana' gak ka'! ²⁰ Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaanchó. ²¹ La' yel' zak'zi' wal inleban nak daa yen ile'ile, daa konoñ' yen ile'kzi dezd ka wxe wzil yell-lioni axt naa, na' kat' ba wde gokan kochno yen

ile'i ka len. ²² Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

²³ 'Na' llaka' chak ka' shi no ina le': "Li wwia, ni ze Crístona", wa in'e le': "Na' zie", bi shajle'le. ²⁴ La' wchej ben' siye'gake', inazgake': "Nadaan Crístona", wa "Nadaan chyixji'a daa na Chioza". Na' lekzka' gongake' dii gonan ka yibani ben', na' gongake' yel' wak xen kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee. ²⁵ Na' naa ba bzenid' le' ka nak daa zi' gak. ²⁶ Daan shi no inaz le': "Crístona' zoe' latja' gana' bibi chashj chleb", bi shajle; wa shi no inaz le': "Loo yoona' zoe'", bi shajle'le. ²⁷ La' kat' nad', Ben' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. ²⁸ La' gana' de ba weta' nan' chllag llodka'.

Kat'yiyed Jesucristona'

(Mr. 13:24-37; Lc. 21:25-33; 17:26-30, 34-36)

²⁹ 'Na' kate yiyoll yel' zak'zi'ka', lii gakte shgasj shchol lao wbill'a na' bewaa bich wzeeni'n na' beljka' ixopgakan, na' yog' diika' llia xan yabana' inibgakan. ³⁰ Na'ch yog' ben' lle' yell-lioni ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' ben'ka' lle' doxen yell-lioni kwellyesh'gake'. ³¹ Na' ka kwell trompeta' zillj wselaa anj cha'ka' zbii zkaan yell-lioni kwenche yitopgake' ben'ka' wlej Chioza' nak lall' nee.

³² 'Na' li wwia ka chak che yag yixwewa': kat' ba chzolo chibia xlaguiinna', na' chakbe'ile ba zoa yiyoo la'o linna'. ³³ Ka'kzan, kat' ile'ile ba chak yog' diika' ba wnia' le' gaka, na' gakbe'ile ba zoa gaoshosh te che yell-lioni. ³⁴ Dii li nia' le', aga ba wit ben'ki zoa naa kat' gak yog' diiki llia bia' gaka. ³⁵ Yabana' na' yell-lioni te chegakin, san cho'a xillaana' biga te cheyin na' gak ka nan.

³⁶ 'Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

³⁷ 'Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə. ³⁸ La' ben'ka' wzoa kana' zi' gak yej ziw' wala', chej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoolena' loo barkwa'. ³⁹ Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa. ⁴⁰ Kana'n, gana' lle' chop ben' lyixaa, toe' yichi'a na' beena' sto yigaane'. ⁴¹ Na' gana' lle' chop noolə chotgake', toe' yichi'a na' stoe' yigaane'.

⁴² 'Daan li se kwas kwezle nad' nak' Xanle, la' bi nezile bi lla bi gor zizaa. ⁴³ Li shajni'kachi dga, shel' xan yoona' nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'. ⁴⁴ Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

Jempl che wen llinka', beena' chon wen na' beena' bi chon wen

(Lc. 12:41-48)

⁴⁵ 'Na' li gak ka to wen llin ben' chajni na' chone' daa chiyal' gone' na' kat' chza' xane'na' chone' lall' nee lille'na' kwenche wi'e dii yeej gao wen llinka' sto gor cheyin. ⁴⁶ Chakomba wen linna' daa chilalile' chone' daa chidolee gone' kat' yillin xane'na'. ⁴⁷ La' dii li nia' le', xane'na'

gone' lall' nee yog' dii de che'. ⁴⁸ Per shi wen llinna' nake' ben' mal na' gakile': "Wllaljachkzi xan'na' yilee." ⁴⁹ Na' soloe' wit chine' wen llinka' nak lall' nee na' yeej gaolene' weezoka'. ⁵⁰ Na' llana' bi nonyen'le' lez, tokonganz yillin xane'na'. ⁵¹ Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gakshejlall'gake'.

25

Jempl che shi bi' nool wew'ka'

¹ Yel' wnabia' che Chioza' chzaklebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakb' bi' byona' lill noola'. ² Na' gay'gakb' nteyi na' zi gay'gakb' bi' nteyi. ³ Bi'ka' bi' nteyi kontele wza'len kandil cheb'ka', per bich bex'gakb' seta' yigaagakba'n. ⁴ Na' bi'ka' nteyi, bex'gakb' kandil cheb'ka' na' bex'tegakb' seta' yigaagakba'n. ⁵ Na' bi' wishagna'na' wle'ib' na' bi' nool wew'ka' chbez gokxwesgakb' na' wtesgakb'. ⁶ Na' do ka chel besyaa to ben', chi'e: "jBa za' bi' wishagna'na', li sho' lljatilchob'!" ⁷ Na' wyas bi' nool wew'ka' wzologakb' chiyonshao' kandil cheb'ka'. ⁸ Na' bi' nool wew'ka' bi' nteyi gollgakb' bi'ka' zi gay': "Li gongach neto' lat' set chelena' la' ba chibill chento'ni." ⁹ Per bi'ka' nox' seta' che'gakb': "Bi' gonnto'n, kwenche ki iyalljichon ganga. Wenla li shaj li lljxi' chelena' gana' chiteen." ¹⁰ Na' shlak zejgakb' zjxi'gakb' seta', bllin bi' wishagna'na' na' bi'ka' nox' seta' wyoolengakb' ben'ka' loo yoona' gana' chak wishagna'na', na'ch wyej puerta'. ¹¹ Na' ka billin bi' nool wew'ka' jxi' seta', wnegakb' xan yoona' che'gakb': "jBen'do', bsaljgach shoonto'!" ¹² Per xan yoona' chi'e legakb': "Bi' wsalj', la' bi' nombi'a le'."

¹³ Na'ch che' Jesuza' ben'ka':

—Ka'kza' le', chiya' se kwasle, la' aga nezile bi' lla bi' gor zizaa.

Jempl che ben'ka' bgaanlen xmech xane'ka'

¹⁴ Yel' wnabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

¹⁵ Na' toe' bi'e gayaa mil mech de or, na' stoe' chopo milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'. ¹⁶ Na' beena' bi'e gayaa milan, benlene'n llin na' bene' gan zi gayaa milan. ¹⁷ Na' lekzka' beena' bi'e chopo milan, benlene'n llin na' bene' gan zi chopo milan. ¹⁸ San beena' bi'e to milan, jtene' to yech na' bkwasheen.

¹⁹ Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'. ²⁰ Na'ch zigaate beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de de zi gayaa mil daa benlena'n gan." ²¹ Na' che' xane'na'ne': "Le wen beno', to wen llin wen inlleb nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." ²² Na'ch wdena' bllin wen llinna' bkwaanlene' chopo mil, chi'ene': "Xan', ni de de chopo mila' beno' nad', na' ni de de zi chopo mil daa benlena'n gan." ²³ Na'ch che' xane'na'ne': "Le wen beno', to wen llin inlleb wen nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." ²⁴ Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' znia, na' to

chizi'zo' banez daa chon ben' yoblə. ²⁵ Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' çekzo'n." ²⁶ Na'ch che' xane'na'ne': "Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə. ²⁷ Na' daa nezilo' kan' chon', çberaçe ki joo xmechaa gana' chon yichjin shlak bi wzoa'? Shel' beno' ka', na' naa ba biyed' yiyono'n lente yichjinna', shel'ka'." ²⁸ Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan. ²⁹ La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidooyo. ³⁰ Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

Ka gak kat' wchoglo Jesúza' che ben'

³¹ Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'. ³² Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'. ³³ Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni. ³⁴ Na' nad', ben' wñabia', yep' ben'ka' lle' shlaa de shli cha'ni: "Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yell-liona'. ³⁵ La' ka wdon', bwaole nad'; na' ka wbilid', benle dii weej'; na' ka wda' ka ben' zit', bleble nad' lill-lena'. ³⁶ Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'." ³⁷ Na' yog' ben' li ben' shao'ka' inagake' nad': "Xan', çbatran ble'into' li' chdono' na' bwaonto' li'? çBatran ble'into' li' chbililo' na' bennto' daa weejo'? ³⁸ çBatran ble'into' li' chdo' ka ben' zit' na' blebnto' li' loo yoo lillnto'na'? çBatran ble'into' li' chdo' bibi xalaano' de na' bennto'n? ³⁹ Na' çbatran gokbe'into' bi shawoo wa gotoo lillyana' na' bidwianto' li'?" ⁴⁰ Na' nad', ben' wñabia', yepgakee: "Dii li nia' le', yog' daa benle che ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan benile ka'."

⁴¹ Na'ch yep' ben'ka' lle' shlaa de robesi: "Li kwas ka'lə, le' wen dii mal. Lo yi' gabil'a' daa chal' zejli kañi chido'le yiyajle gana' ba non Chioza' sak'zi' dii xiwaa len anjl cheyinka'. ⁴² La' ka wdon' bi benle dii gaw'; na' ka wbilid' bi benle dii yeej'. ⁴³ Na' ka wda' ka ben' zit', aga bleble nad' loo yoo lill-le. Na' ka byallj xalaana', aga bi benle; na' ka bi shawaa wa gotaa lillyana', aga bidwiale nad'." ⁴⁴ Na' inagake' nad': "Xan', çbatran wdono', wa wbililo', wa wdoo ka ben' zit', wa bibi xalaano' got', wa bi shawoo, wa gotoo lillyana' na' bi goklennto' li'?" ⁴⁵ Na' yepgakee: "Dii li nia' le', daa bi goklenle ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan bi goklenle." ⁴⁶ Na' ben' malkan' yiyajgake' gana' tegake' yel' sak'zi'na' zejli kañi, na' ben'ka' nak ben' li ben' shao' soalengake' nad' zejli kañi.

26

Wloogake' xnezin gox'gake' Jesúza'

(Mr. 14:1-2; Lc. 22:1-2; Jn. 11:45-53)

¹ Na' ka biyoll be' Jesúza' yog' dill'ka', na'ch golle' ben'ka' nakgake'ne' txen:

²—Ba ñezkzile zi chop llazan chyallj gal' lñi Paskwa', na' nad', Beñ' Bsel' Chioza' Yell-lioni, gak' lo na' beñ'ka' witgake' nad' lee yag cruza'.

³ Na'ch b̄oxzka' chñabia' na' beñ'ka' chli' chsedi leya' na' beñ' golka' chñabia' beñ' Israelka' bdopgake' lill b̄oxz choo b̄oxz xenna', beena' le Caifás. ⁴ Na' wloogake' x̄nezin gox'gake' Jesúza' xochizi, ka ki gakbe'i beñ', na' witgake'ne'. ⁵ Na' che' ljwelle':

—Bi gox'chone' shlak chal' lñina' kwenche bi wta wñecho beñ'.

To noolə bwazje' set zix̄a' yichj Jesúza'

(Mr. 14:3-9; Jn. 12:1-8)

⁶ Na' ka zoa Jesúza' Betániana' len beñ'ka' nakgake'ne' txen, wyajgake' lill to beñ' le' Simón, beena' gok yillwe' daa le lepra. ⁷ Na' shlak chi' Jesúza' cho'a mesa', bllin to noolə nox̄ee to lmet de yaj xochi na' yollan set dii chl̄a' zix̄ dii zak' mech xen, na'ch bwazje'n yichj Jesúza'. ⁸ Na' ka ble'i beñ'ka' nak Jesúza' txen daa ben noola', le bllaagake' na' che' ljwelle':

—¿Biçe benditjz beeni seta'? ⁹ Shel' bet'chokle'n, la' dii xen zakaan, na' bi'e xmechinna' beñ' yesh'ka', shel'ka'.

¹⁰ Na' beni Jesúza' ka choe'gake' dill', na' golle' legake':

—¿Biçe chnezle che nooli? La' daa ba bene' cha' nakan dii wen. ¹¹ Ka nak beñ' yesh'ka', toshiizi soagake' ladjlena', san nad', aga toshiizi soalen' le'. ¹² Daa ba bwazj nooli nad' set zix̄a', bene' ka' kwenche gakshao'zega kwerp cha'ni kat' wkwash'gake' nad'. ¹³ Na' dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' bdie' Jesúza' lo na' b̄oxzka' chñabia'

(Mr. 14:10-11; Lc 22:3-6)

¹⁴ Na'ch beena' le Jud Scariot, beena' nak txen beñ'ka' shllin, wyaje' lao b̄oxzka' chñabia'. ¹⁵ Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. ¹⁶ Na'ch lo llana'tez wzolo Juda' chinoe' nakan gone' kwenche gone' Jesúza' lo na' beñ'ka'.

Xancho Jesúza' wdaolene' beñ'ka' nakgake'ne' txen xshe'na'

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Lla nech che lñi Paskwa', llana' chaogake' yetxtila' daa bi nchix levadúrana', beñ'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che lñi Paskwi?

¹⁸ Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa llia bia' gak che', na' lillo'na' cheenile' wsini'anto' daa gaolennto'ne' xshe' che lñi Paskwi.”

¹⁹ Na'ch beñ'ka' nakgake'ne' txen bengake' kon ka golle' legake', na' jasini'agake' xshe' che lñi Paskwa'.

²⁰ Na' ka gol, wche'len Jesúza' beñ'ka' shllin cho'a mesa'. ²¹ Na' shlak chaogake' che' Jesúza' legake':

—Dii li nia' le', tole gonle nad' lo na' beñ'ka' chakzi' chakzbani nad'.

²² Na' ka golle' legake' ka' le gokyesh'gakile' na' to toe' che'gake'ne':

—Xan', ¿anadaan gon' ka', lla?

²³ Na'ch che' Jesúza' legake':

—Beena' ba bleejlene' nad' yetxtil che'na' loo yeeña', beena'kzan' gone' nad' lo na' beñ'ka' chakzi' chakzbani nad'. ²⁴ Ka nak nad', Beñ' Bsel'

Chioza' Yell-lioni, wit beṅ' nad' kon ka na Cho'a Xtill' Chioza', per iṅyesh'laz gak che beena' gone' nad' lo na' beṅ'ka'! ;Naklan wen shel'ka' bi golje'!

²⁵ Na'ch Juda', beena' wdie' Jesúza' lo na' beṅ'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

²⁶ Na' shlak chaogake', beṅ' Jesúza' yetxtila' na' bi'e Chioza' yel' choṅken, na' bxoxje'n na'ch bi'en beṅ'ka' nakgake'ne' txen, chi'e:

—Li gao dga. Lennan' kwerp cha'ni.

²⁷ Na'tech beṅee to kop dii yoll vino, na' bi'e Chioza' yel' choṅken na' bi'en legake', na' golle':

—Yog'le li yeej dga yoll loo kopi, ²⁸ la' lennan' xchen'na' daa gon ka gak li dii koba' bcheb Chioza' gone'. Na' la'jan kwenche yiyakxen saaxya che beṅ' zan. ²⁹ Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chṅabia' Xa' Chioza', kana'chan yeejlana'n le' dii yoblə.

Jesúza' chi'e bi wcheb Pédrona' shi nombi'ene'

(Mr. 14:26-31; Lc. 22:31-34; Jn. 13:36-38)

³⁰ Na' ka bidaogake', belgake' be'la'ogake' Chioza' na'ch biyajgake' lo yaa Olívoza'. ³¹ Na' ka ziyajgake', che' Jesúza' legake':

—Yog'le kwej yichjle nad' naanlle'. La' kin na Cho'a Xtill' Chioza': “Wit' beena' chap xil'ka' na' illeshlesgakb.” ³² Per ka yiban' ladj beṅ' wetka', yiyaa Galileana' lljalez' le'.

³³ Na'ch che' Pédrona'ne':

—La'kzi yog' beṅ'ki kwej yichjgake' li', nad' bi kwej yichj' li'.

³⁴ Na'ch che' Jesúza'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

³⁵ Na' Pédrona' chi'ene':

—La'kzi guetlenticia' li', biga inia' bi nombi'a li'.

Na' ka'kzə goll yog'lol beṅ'ka' nakgake'ne' txen.

Jesúza' be'lwille' Chioza' latja' le Getsemaní

(Mr. 14:32-42; Lc. 22:39-46)

³⁶ Na' ka bllinlen Jesúza' beṅ'ka' nakgake'ne' txen latja' le Getsemaní, na'ch golle' legake':

—Nizə li kwe' shlak shaa daa ka'lə llje'lwil' Chioza'.

³⁷ Na' bchi'e Pédrona' na' chop bish'te xiin Zebedewa', na' wzolo chakyeshile' dii wal inlleb. ³⁸ Na' golle' legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁹ Na' blee legake' zi lat' na' bchek' yichje'na' lo yona' na' be'lwille' Chioza', chi'e:

—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

⁴⁰ Na'ch biyajje' gana' lle' beṅ'ka' shon, na' ble'ile' ba chesgake'. Na' golle' Pédrona':

—¿Abikzə bchejlat'gaile la'ch' tgor kwezle nad' bi guesle? ⁴¹ Bi guesle. Li we'lwil' Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

42 Na'ch wyaje' de wchop shii jelwille' Chioza', chi'e:

—Xadawaa, shi ba nakten idil illag' dga, gakkzə ka cheenilo'.

43 Na' ka billine' dii yoblə lekzka' chesləgake' daa bi wzogakile' bishgala'.

44 Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'. 45 Na'ch biyaje' gana' bgaan beŋ'ka', na' golle' legake':

—¿Ani chestkile? Ba bllin gor nad', Beŋ' Bsel' Chioza' Yell-lioni, gak' lo na' beŋ' saaxyaka'. 46 Li chas na' li sho'. Ba za' beena' wdie' nad' lo neeka'.

Bex'gake' Jesúza'

(Mr. 14:43-50; Lc. 22:47-53; Jn. 18:2-11)

47 Bilan' yiyoll yee Jesúza' ka' ka bllin Juda' beena' nak txen beŋ'ka' shllin, nchi'e beŋ' zan beŋ'ka' bsel' bxoꝝka' chŋabia' len beŋ' golka' chŋabia' beŋ' Israelka'. Na' nox'gake' no spad na' no yag. 48 Na' Juda' ba bzajniile' beŋ'ka' nchi'e nakan gone' wli'e beena' gox'gake', golle': “Kon beena' wnop', len gox'le.”

49 Na' ka bllinlene' beŋ'ka' kwit Jesúza', lii wbig'tie' lawe'na' chi'ene':

—jChiox naa, maestro!

Na'ch bnop'e'ne'. 50 Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te beŋ'ka' bex'gake' Jesúza'.

51 Na' ka bex'gake'ne', to beena' nake'ne' txen wleje' spad che'na' na' wdine'n xmos bxoꝝ choo bxoꝝ xenna', bchogtie' tlaa nague'na'. 52 Na'ch goll Jesúza'ne':

—Bigooshao' spad cho'na', la' yog' beŋ'ka' chitgakile' beŋ' yesya, lekzka' len guetgakile'. 53 ¿Achakile bi gak inabid' Xa'na' gaklene' nad' na' lii wsel'tie' anjl zan inleeb, shel'ka'? 54 Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

55 Na'ch goll Jesúza' beŋ'ka' ba nox'gake'ne':

—¿Achakile' no wban no nad' za'lenzle no spad no yag kwenche gox'le nad'? Yog' lla bli' bsedid' beŋ' loo yoodo'na', ¿biche bi bex'le nad' shlak bli' bsedid' beŋ' na'? 56 Per daa chonle ki, chillinin ka na Cho'a Xtill' Chioza' daa bzej dii beŋ'ka' wdixjee daa golle' legake'.

Na'ch yog'lol beŋ'ka' nak Jesúza' txen bxonjgake' na' bkwaan'gake' toze'.

Jwa'gake' Jesúza' lao beŋ'ka' chŋabia' beŋ' Israelka'

(Mr. 14:53-65; Lc. 22:54-55, 63-71; Jn. 18:12-14,19-24)

57 Na' beŋ'ka' bex'gake' Jesúza' jwa'gake'ne' lill Caifáza', beena' nak bxoꝝ choo bxoꝝ xen, na' lille'na' ba ndop nllag beŋ'ka' chli' chsedi leya' na' beŋ' golka' chŋabia'. 58 Na' Pédrone' janoe' Jesúza' de zit'la, bllintie' lesh' chyoo che bxoꝝ choo bxoꝝ xenna' na' jche'lene' beŋ'ka' chap yoodo'na' kwenche ile'ile' ka gak che Jesúza'.

59 Na' bxoꝝka' chŋabia' len beŋ'ka' chŋabia' beŋ' Israelka' wdiljgake' beŋ' chiljlallee che Jesúza' kwenche wchoglogake' guete'. 60 Na' la'kzi beŋ' zan beŋ'ka' biya dii biyiljall'gake' che Jesúza', aga bidili cho'a dill' che'ka', axt ki bllin chop beŋ' 61 be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shoŋ llazə yiyontia'n dii yoblə.”

62 Na'ch wzolla' bxoꝝ choo bxoꝝ xenna', golle' Jesúza':

—¿Abikz bi ino' cheyi dga nagake' cho'?

63 Na' Jesúza' bikzə wnie'. Na'ch che' bxoꝝ choo bxoꝝ xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

⁶⁴ Na' goll Jesúza'ne':

—Awe, kan' nakan. Na' lekzka' nia' le', wle'ile nad', Ben' Bsel' Chioza' Yell-lioni, kwi'a shlaa de shli che Chioza', beena' zeelo nap yel' wak choo yel' wak xenna', na' lekzka' ile'ile nad' zizaa ladj bejka' ze xan yabana'.

⁶⁵ Na'ch bsho' bchez' xa bxoꝝ choo bxoꝝ xenna'. Na' daa bene' ka', bli'e nan le blee, na' wne:

—iKwinle ba benile naz beeni nake' Xiin Chioza'! Bich chyalljicho ben' gao xya che'. ⁶⁶ iBi ka inale?

Na'ch gollgake'ne':

—Chiyal' guete'.

⁶⁷ Na'ch blaa xeneeka' cho'alao Jesúza' na' wdap' wlall'gake'ne'. ⁶⁸ Na' che'gake'ne':

—Shi lin' Crístona', wnashki non wdap' wlall' li'.

Pédrona' bi bchebe' shi nombi'e Jesúza'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' shlak chak ka', Pédróna' chi'e lesh' chyooná' ka bllin to noolá wen mandad kwite'na' chi'ene':

—Lenon' nako' txen Jesúza', ben' Galileana'.

⁷⁰ Na' lao yog' ben'ka' lle' na', aga bcheb Pédróna' shi nake' Jesúza' txen, na' golle' noola':

—Bi nezid' bin no'.

⁷¹ Na' ka ziyaje' cho'a puerta' bizle'i sto ben' yoblá le' na' chi'e ben'ka' lle' na':

—Len beenin nake' txen Jesúza', ben' Nazareta'.

⁷² Na' lekzka' aga bizcheb Pédróna' shi nake' Jesúza' txen, bzoatie' Chioza' de taschiw, chi'ene':

—Bi nombi'a beena'.

⁷³ Na' gokzə txit na' jabig' ben'ka' lle' na' kwit Pédróna' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

⁷⁴ Na'ch wzolo Pédróna' chone' zña, chi'e:

—iDii balkan nia' bi nombi'ane'! iChioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'. ⁷⁵ Na'ch jadini Pédróna' daa goll Jesúza'ne': “Shon shii bi wchebo' shi nombi'o nad' ka zi' kwell shikwteza'.” Na'ch biza' Pédróna' chbellyeshee.

27

Jwa'gake' Jesúza' lao Pilátóna'

(Mr. 15:1; Lc. 23:1-2; Jn. 18:28-32)

¹ Na' ka wyeeni', yog'lol bxoꝝzka' chñabia' na' ben' golka' chñabia' ben' Israelka' bengake' toz dill' witgake' Jesúza'. ² Na' bchejgake'ne' jwa'gake'ne' lao Pilátóna' beena' chñabia' gana' mbani Judeana'.

Wit Juda'

³ Juda', beena' bene' Jesúza' lo na' ben'ka', ka gokbe'ile' ba nakan witgake' Jesúza' na' wdáo bdiachgan le'. Na'ch wyaje' lao bxoꝝzka' chñabia' na' lao ben' golka' chñabia' jasane' shichoate mech de plata' daa be'gake'ne'.

⁴ Na' chi'e legake':

—Le malchga ben' daa bdia' to ben' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z ñezilo' bin beno'.

⁵ Na' jazal' Juda' mecha' loo yoodo'na', na' tech jayet kwine' jaloo do yene'.

⁶ Na' b̄xozka' chñabia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

⁷ Na' be'gake' dill' yizi'gakile' mecha' to yell-lio dii le Yell-lio che Ben' Wen Yes' gana' wkwash'gake' ben' zit'ka'. ⁸ Daan axt ñaanlla yell-liona' len Yell-lio Chen. ⁹ Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': "Bikaagake' shichoa mech plat daa b̄chogbia' ben' Israelka' zak' beena'. ¹⁰ Na' kon len wxi'gakile' Yell-lio che Ben' Wen Yesaa, kon kana' wna Xancho Chioza' nad'."

Bllin Jesúza' lao Pilátona'

(Mr. 15:2-5; Lc. 23:3-5; Jn. 18:33-38)

¹¹ Ka bllin Jesúza' lao Pilátona', na'ch che' Pilátona'ne':

—¿Alin' ben' wñabia' che ben' Israelka'?

Na' che' Jesúza'ne':

—Kan' ba wno'.

¹² Na' shlak b̄xozka' chñabia' na' ben' golka' chñabia' ben' Israelka' chaogake' xya che', bibi dill' billi'e legake'. ¹³ Na'ch goll Pilátona'ne':

—¿Abi chenilo' diika' chaogake' xya cho'?

¹⁴ Per Jesúza' ni to diika' chaogake' xya che' ni shcho'a dill' bi billi'e, na' le bibanchgayi Pilátona'.

Bchoglogake' guet Jesúza'

(Mr. 15:6-20; Lc. 23:13-25; Jn. 18:38–19:16)

¹⁵ Na' ben' wñabia'na' yooloe' yog' yiz chisane' to ben' de lillyana' lla ñni Paskwa', kon beena' inab yog' ben' yell yisane'. ¹⁶ Na' de to ben' lillyana', ben' le zeyi che' nake' ben' mal, na' lie' Barrabás. ¹⁷ Na' ka ndop nllag ben' yellka', che' Pilátona' legake':

—¿No ben'ki cheenile yisan'?, ¿aBarrabáza', awa Jesúzi, beeni nsi'gake' Cristo?

¹⁸ Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

¹⁹ Shlak chi' Pilátona' gana' chone' yel' joschisa', bsel' xooole'na' to rson, chi'ene': "Bi gaklebilo' ben'ka' chao xya che beena', la' aga bi dol' che' de, la' nll'e'yi wñeid' to yel' che', na' le bsheban nad'."

²⁰ Per b̄xozka' chñabia' na' ben' golka' chñabia' ben' Israelka' wlooyel'gake' ben'ka' lle' lla' na' inabgake' yisane' Barrabáza' na' gone' mandad guet Jesúza'. ²¹ Na' Pilátona' sto shii wñabile' legake':

—¿No ben'ki chop cheenile yisan'?

Na' ben'ka' che'gake'ne':

—¿Bisan Barrabáza'!

²² Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'lóle' che'gake'ne':

—¿Bdee lee yag cruza'!

²³ Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¿Bdee lee yag cruza'!

24 Na' ka gokbe'i Pilátona' bich bi de gone' daa zizikchli ba chakllesh-gakile', bene' mandad jxi'gake' nisa' kwenche binee lao yog' ben'ka', na' chi'e:

—Aga bi dol' nap' nad' daa guet beeni. Len' gak xbag'lene'.

25 Na' yog'lol' ben'ka' che'gake'ne':

—jNeto' len xiinto'ka' idobinto'ne'!

26 Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

27 Na' soldadka' bche'gake' Jesúza' gana' chon Pilátona' yel' joschisa' na' biti'agake' yog'lol' soldadka' nakgake' txen. 28 Na'ch wdingake' xa Jesúza' na' bwakwgake'ne' to lech' xna ka che to ben' wñabia'. 29 Na' bengake' to bxoõn de xis yesh' na' bllingake'n yichje'na' ka to corona, na' nee de shlina' bgox'gake'ne' to bar. Na'ch bchek' xibe'ka' lawe'na' na' btitjgakile'ne' che'gake':

—jToshiizi sechgayi che beeni chñabia' ben' Israelka'!

30 Na'ch no chlla' xeneeka' le', no chikaagake' bara' daa bgox'gake'ne' na' chyingake'n yichje'na'. 31 Na' ka wde btitjgakile'ne' na'ch biyingake' lechaa bwakwgake'ne' na' biwakwgake' xe'na' nakwkze'. Na'ch bche'gake'ne' kwenche wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

32 Na' ka ba chchejgake' cho'a yell Jerusalenna', billaggake' to ben' Cirene, ben' le Simón, na' bengake' byen bi'e yag cruz che Jesúza'.

33 Na' ka' bllingake' latja' le Gólgota, na' zejin Latj che llit yichj ben' wet.

34 Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

35 Na' ka biyoll bda'gake'ne' lee yag cruza', soldadka' bengake' to wiytj kwenche got'bia' nogake' yidol' xa Jesúza'. 36 Na'tech wche'gake' wdapgake'ne'. 37 Na' yichj yag cruz che'na' bda'gake' to dii choe'n dill' biche nda'gake'ne' na', na' nan: “Beenin Jesúza', ben' wñabia' che ben' Israelka'.”

38 Na' lekzka' bda'gake' chop ben' wban shlaa wej kwit yag cruz che Jesúza'. 39 Na' ben'ka' chde gana' dee, chta yichje'ka' na' chgoogake'ne' belban, 40 che'gake'ne':

—Li' wno' yichinjo' yoodo'na' na' shon llazə yiyontio'n, jbisla kwino' lee yag cruzi shi leilo' nako' Xiin Chios!

41 Na' lekzka' bxozka' chñabia' na' ben'ka' chli' chsedi leya', na' fariseoka' len ben' golka' chñabia' btitjgakile'ne', che' ljwelle':

42 —Gok hisle' ben' yoblə per bi chak yisla kwine'. Shi leile' len' ben' wñabia' chechona', cho' ben' Israel, yiyetjshkile' lee yag cruza' naa kwenche shajle'cho che'. 43 Nxenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

44 Na' axt wbanka' da' lee yag cruza' kwite'na' lekzka' biya dii che'gake'ne'.

Wit Jesúza'

(Mr. 15:33-41; Lc. 23:44-49; Jn. 19:28-30)

45 Na' do ka gobill kat' bichol' doxen yell-lioni axt do ka chida shonch biyeeni'. 46 Na' do ka chida shonə besyaa Jesúza' zilljə, ne':

—Elí, Elí, ¿lama sabactani? —na' zejin: Chios cha', Chios cha', ¿biche ba wlej yichjzo' nad'?

⁴⁷ Na' baḷ beṅ'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

⁴⁸ Na' toe' lii zejdotie' jxi'e to dii bleeje' loo vino daa nak zichj zla', na'ch bzoen' to lo xis na' jazoe'n cho'a Jesúza' kwenche yeeje'n. ⁴⁹ Na' beṅ'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

⁵⁰ Na' ka biyoll besyaa Jesúza' zilljə dii yoblə, na' wite'. ⁵¹ Na' ka wite', lechaa ze loo yoodo'na' lii bchez'ten gokan choplə. Na' gok to bedxo' na' wlaa yajka'. ⁵² Na' lekzka' axt biyalj gana' bgash' beṅ' wetka'. Na' zan beṅ' wetka', beṅ'ka' beṅ'ilall' Chioza', bibangake' sto shii ⁵³ na' bichejgake' gana' bgash'gake'. Na' ka bibanch Jesúza', biyoogake' yell Jerusalenna', na' beṅ' zan ble'gakile' legake'.

⁵⁴ Na' xan soldadka' len beṅ'ka' chaplene' Jesúza' le bblebgake' ka wxo' na' bichlə diika' gok. Na' wntagake':

—Dii likzan Xiin Chios beeni.

⁵⁵ Na' zan noolka' wno Jesúza' dezd gana' mbani Galileana', beṅ'ka' goklengake'ne' che bi dii byalljile', lle'gake' de zitlə bwiagake' doxen ka gok. ⁵⁶ Na' ladje'ka' len María, beṅ' yell Magdálana', na' María beena' nak xna' Jacóbona' len Joséna', na' xna' beṅ'ka' nak xiin Zebedewa'.

Bkwash'gake' Jesúza'

(Mr. 15:42-47; Lc. 23:50-56; Jn. 19:38-42)

⁵⁷ Na' ka chzeles yela' bllin to beṅ' wni'a lie' José, beena' nak beṅ' yell Arimatea na' goke' txen Jesúza'. ⁵⁸ Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'. ⁵⁹ Na' bikaa Joséna' kwerp che Jesúza' na' bitobe'ne' to lech' xtil. ⁶⁰ Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee. ⁶¹ Na' María, beṅ' yell Magdálana', len Maríana' sto wche'gake' cho'a bana'.

Beṅ'ka' wdap cho'a ba che Jesúza'

⁶² Na' betiyo, llana' chombaṅ beṅ' Israelka', wyaj bxožka' chṅabia' len fariseoka' lao Pilátona', ⁶³ che'gake'ne':

—Beṅ'do', ba jadininto' ka wna dii beṅ' wxiye'na' kana' mbane', wne' yiyon lla yibane' dii yoblə ladj beṅ' wetka'. ⁶⁴ Na' bsel'gach beṅ' lljtape' gana' bkwash'gake'ne' axt ka gakch shon lla kwenche bi shaj beṅ'ka' nakgake'ne' txen do wal chel lljalejgake' kwerp che'na', na' tena' ye'gake' beṅ': “Ba bibane' dii yoblə ladj beṅ' wetka'.” La' shi ba bengake'ka', na'ch gongake' to dii wxiye' walch aga ka dii necha'.

⁶⁵ Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gaggake'.

⁶⁶ Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

28

Biban Jesúza' ladj beṅ' wetka'

(Mr. 16:1-8; Lc. 24:1-12; Jn. 20:1-10)

¹ Na' ka wde lla sabda', llana' chombaṅgake', ni baḷ lla nech che xmanna' sto, wyaj María nool Magdálana', len Maríana' sto jawiagake' cho'a bana'. ² Na' wzolo to bedxo' xen wal daa betj to anj che Xancho Chioza' yabana', na' ka blline' cho'a bana' na' bikwase' yaja' daa nsejan

cho'a bana' na' wllie' lawinna'. ³ Na' anjla' chey cheeni'e kakzə ga chep yes na' xe'na' nakan xtil inlleb. ⁴ Na' ka ble'i soldadka' le' axt bxiztitgake' daa le bllebgake' na' axt witgake' shlet. ⁵ Na'ch che' anjla' noolka':

—Bi illeble. Ne'zid' Jesúzan' chiyiljle, beena' wit lee yag cruza'. ⁶ Koch no de ni. Ba bibane' kon ka wne'. Li dakachi wwiale gani wdxjgake'ne'. ⁷ Na' li yiyajdo li lljayell beñ'ka' nakgake'ne' txen: “Ba bibane' ladj ben' wetka' na' ba ziyaje' Galileana' lljaleze' le', na' na'kzə ile'ilene'.” Na' ba wnia' le' ka'.

⁸ Na'ch biza'do noolka' cho'a bana' chllebgake' na' le chibagakile' zjadixje'gakile' beñ'ka' nak Jesúza' txen daa goll anjla' legake'. ⁹ Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ni'ena' be'la'ogake'ne'. ¹⁰ Na' che' Jesúza' legake':

—Bi illeble. Li lljayell beñ' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹ Na' ka biza' noolka', bał soldadka' wdap gana' bkwash'gake' Jesúza' biyajgake' yell Jerusalénna' jayellgake' bxo'zka' chñabia' yog' diika' gok. ¹² Na'ch wyaj bxo'zka' chñabia' je'lengake' beñ' golka' chñabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen, ¹³ che'gake':

—Inatezle wał chel shlak chesle, beñ'ka' nak Jesúza' txen bidlejgake' kwerp che'na'. ¹⁴ Na' shi ba binezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵ Na'ch soldadka' bex'gake' mecha' na' biza'gake' jazegake'n dill' kon ka gollgake' legake'. Na' axt naanlla beñ' Israelka' ni nagake' ka'.

Jesúza' golle' legake' we'gake' xtilleena' doxen yell-lioni

(Mr. 16:14-18; Lc. 24:36-49; Jn. 20:19-23)

¹⁶ Na' wyaj beñ'ka' shnej, beñ'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'. ¹⁷ Na' ka ble'gakile' Jesúza', be'la'ogake'ne', per balgake' gokchoplall'gake'. ¹⁸ Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni. ¹⁹ Daan, li shaj doxen yell-lioni, li lljali' lljasedi yog' beñ' kwenche gakgake' nad' txen. Na' wchoale legake' nis daa ba nonlilall'gake' Xacho Chioza', na' nad', Xiine', len Espíritu Sántona'. ²⁰ Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

Dill' wen dill' kob daa bzej Márcona'

Juanna', beena' bchoa ben' nis

(Mt. 3:1-12; Lc. 3:1-9, 15-17; Jn. 1:19-28)

¹ Ki wzolo dill' wen dill' kob che Jesucristona', beena' nak Xiin Chioza'.

² Gok ka wna dii Isaíaza', beena' wdixjee daa goll Chioza'ne':

Wselaa to ben' kwialoe' lawo'na',

wi'e xtilloona' kwenche ba lle' ben' wzenague' cho' kat' illino'.

³ To ben' wnie' zillja to lo latj gana' bibi chashj chleb, chi'e:

“Li se kwas wzenagle che Xanchona' na' wsalj yichjall'do'leka' kat' zee.”

⁴ Na' bllin Juanna' latja' gana' bibi chashj chleb. Bchoe' ben' nis, na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' saaxya che'ka'. ⁵ Na' yog' ben'ka' lle' gana' mbani Judeana' na' ben'ka' lle' yell Jerusalenna' jazenaggake' dillaa cho'e. Na' bixoadol'gake' saaxya che'ka', na' bchoa Juanna' legake' nis loo yao Jordánna'.

⁶ Na' xa Juanna' gokan de xa kamey na' bchej lsieneena' to yid. Na' wdawe' bish'zo na'ch shin baser dii de lyixaa. ⁷ Na' wdixje'ile' ben'ka' cho'a xtil' Chioza', chi'e:

—Zi' za'lə beena' napch ye' wak xench ka nad', na' ni bi zakaa gak' xmose' kwenche wlechj' xele'na'. ⁸ Nad' ba bchoa' le' nisa', san le', gone' ka yidsoa Espiritu che Chioza' loo yichjall'do'lena'.

Jesúza' wchoe' nisa'

(Mt. 3:13-17; Lc. 3:21-22)

⁹ Na' kana'yen' Jesúza' wzee yell Nazareta' daa llia gana' mbani Galileana' na' wyaje' cho'a yao Jordánna' gana' bchoa Juanna'ne' nisa'.

¹⁰ Na' shlak chichej Jesúza' loo nisa', ble'ile' byalj yabana' na' betj Espiritu che Chioza' jsoalene'ne' na' ble'ile' Espirituna' ka to palom. ¹¹ Na' bengak-ile' wne Chioza' yabana', chi'e Jesúza':

—Lin' nako' Xiin', chakchgaid' li' na' le' chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹² Na' lli bche'te Espiritu che Chioza' le' latja' gana' bibi chashj chleb.

¹³ Na' wzoe' na' choa lla ladj ba zniaka', na' Satanáza' daa chnabia' dii xiw'ka' goklalliin kooyela'n le' gone' ka cheenin. Na' ka wde, jaklen anjlka' le'.

Wzolo Jesúza' choe'lene' ben' xtil' Chioza' gana' mbani Galileana'

(Mt. 4:12-17; Lc. 4:14-15)

¹⁴ Biyoll wloogake' Juanna' lillyana', Jesúza' wyaje' gana' mbani Galileana' na' je'lene' ben' dill' wen dill' kob che Chioza', ¹⁵ chi'e:

—Ba bllin lla inabia' Chioza' loo yichjall'do'lena'. Li yiyaj yileni dii malka' chonle na' li shajle' dill' wen dill' kob che'na'.

Jesúza' goxe' tap ben' wxen bel

(Mt. 4:18-22; Lc. 5:1-11)

¹⁶ Shlak ngoo Jesúza' nez cho'a nido' che Galileana', ble'ile' Simónna' len ben' bishee Andrésa', chzal'gake' yixj daa chzengakile' belka' loo nido'na', la' lennan' noni xshingake'. ¹⁷ Na' goll Jesúza' legake':

—Li da, dino nad'. Na' ka chonle chbejle belka' loo nisi, ka'kzan gonle yibejle ben' lao dii mala'.

¹⁸ Na' ka biyoll golle' legake' ka', lii bkwaan'tegake' yixja' daa chzengakile' belka' na' zejlengake'ne'.

¹⁹ Ka ba wza'gake' zi lat', ble'i Jesúza' Jacóbona' len ben' bishee Juanna', ben'ka' nak xiin Zebedewa', lle'gake' loo barkwa' chiyonshao'gake' yixja' daa chzengakile' belka'. ²⁰ Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlen-gake' Jesúza'.

Jesúza' bibeje' dii xiwaa yoo to ben'

(Lc. 4:31-37)

²¹ Na' bllingake' yell Carpernaúma'. Na' lla sabda', llana' chombaan ben' Israelka', wyaj Jesúza' gana' chdop chllaggake' choe'llwillgake' Chioza' na' wzoloe' chli' chsedile' legake'. ²² Na' bibani ben'ka' lle' na' ka chli' chsedi Jesúza', la' bli' bsedile' legake' lega ben' nap yel' wnabia', na' bi chli' chsedile' ka ben'ka' chli' chsedi leya'. ²³ Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

²⁴ —jwayi neto', Jesús, ben' Nazaret! ¿Abido' kwenche wlliaayoo neton'? Nad' nombi'a li' na' nezid' nako' dowalj ben' li ben' shao' che Chios.

²⁵ Na' Jesúza' bsheshlene'n, chi'e:

—jLliza' wzoa! ¡Bichej loo yichjall'do' beeni!

²⁶ Na' dii xiwaa wchoonan beena' na' bchix botoan le' na' bichejan chosyaadian. ²⁷ Na' yog' ben'ka' lle' na' bibangakile', na' che' ljwellgake':

—¿Bi dii kob dga chli' chsedi beeni, lla? ¡Nakbia' nape' yel' wnabia', la' axt len dii xiw'ka' chsheshlene' na' chzoagakan xtillee!

²⁸ Na' lii wzete dill' doxen gana' mbani Galileana' ka nak daa chon Jesúza'.

Jesúza' biyone' tobiin che Simón Pédróna'

(Mt. 8:14-15; Lc. 4:38-39)

²⁹ Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'. ³⁰ Na' tobiin che Simónna' die' yo'e dii la. Na' gollgake' Jesúza' daa chak che'. ³¹ Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' ben' zan

(Mt. 8:16-17; Lc. 4:40-41)

³² Na' ka ba wxoa wbillá', jwa'gake' lao Jesúza' yog' ben'ka' bi shao' na' ben'ka' yoo dii xiwaa. ³³ Na' yog' ben'ka' lle' yella' bdi'a bllaggake' cho'a yooná' gana' zoe'. ³⁴ Na' Jesúza' biyone' ben' chak wde wdeli yillwe'. Na' lekzka' bibeje' dii xiw'ka' yoo ben', na' bi bi'e latj inegakan daa nombia'gakan le'.

Jesúza' cho'e cho'a xtill' Chioza' gana' mbani Galileana'

(Lc. 4:42-44)

³⁵ Na' Jesúza' wyase' ni bal, na' bcheje' yella' jelwille' Chioza' ga kono ben' lle'. ³⁶ Na' wyaj Simónna' len ben'ka' nakgake'ne' txen jadiljgake'ne', ³⁷ na' ka billelgakile'ne' na'ch gollgake'ne':

—Yog'z ben' chiyiljgake' li'.

³⁸ Na' che' Jesúza' legake':

—Li sho' yellka' sto, diika' llia gaoza, kwenche lekzka' llje'len' cho'a xtill' Chioza' ben'ka' lle' na', la' ni cheyinnan' bid'.

39 Na' wda Jesúza' yog' yellka' llia doxen gana' mbani Galileana' choe'lene' beñ'ka' cho'a xtill' Chioza' yog' gana' chdop chllag beñ' Israelka' choe'lwilgake' Chioza', na' bibeje' dii xiw'ka' yoo beñ'.

Jesúza' biyone' to beñ' chak yillwe' daa le lepra

(Mt. 8:1-4; Lc. 5:12-16)

40 To beñ' chak yillwe' daa le lepra blline' lawe'na' na' bçhek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

41 Na' biyesh'lallii Jesúza'ne', na' bçxa neena' yichje'na' chi'e:

—Cheenid'x. Na' naate yikwasa'n.

42 Na' katena' lii bikwaste léprana' na' biyakile'. 43 Na' Jesúza', chi'ene':

44—Kono yoo dga ba beñ' cho'. San wyaj jali'lawo' lao bçzoza', na' jwa' daa chiya' lljoo lao Chioza' ka nllia dii Moiséza' bia' goncho kwençhe inezile' ba biyakilo'.

45 Per ka bizee, wzoloe' bi'e dill' lao yog'lol beñ' daa gokə. Na' daa bene' ka', bich gok sho' Jesúza' ka nla'zə yellka', san bigaane' ga kono beñ' lle'. Per bia'kzə wyaj beñ' za' wde wdeli yell jawiagake'ne'.

2

Biyon Jesúza' to beñ' net ni'a neena'

(Mt. 9:1-8; Lc. 5:17-26)

1 Wde to çhop lla, Jesúza' billine' sto shii yell Capernaúma'. Na' ka wnezi beñ'ka' lle' na' ba billine' yoona' gana' wzoe', 2 na' bdi'a bllag beñ' zan inlleb loo yoona' axt bich chaki lesh' chyoon'a she'gake'. Na' bli' bsedile' legake' cho'a xtill' Chioza'. 3 Na' bllin tap beñ' nłengake' to beñ' net ni'a neena'. 4 Na' daa bi gok illingake' gana' zete Jesúza' daa lle' beñ' zan inlleb, na' wzologake' bsaljgake' koll' yoona' na' bletjgake'ne' do daa çhe'na'. 5 Na' ka gokbe'i Jesúza' çajle'gake' che', golle' beñ' we'na':

—Xiin, ba biyakxen saaxya ço'ka'.

6 Na' chi' bal beñ'ka' chli' chsedi leya', na' wza'lall'gake': 7 “¿Berache naz beeni ka? Chonz kwine' ka Chioza'. Kono zoa sto beñ' gak yizi'xen saaxya çhe beñ', san toz Chioza' gak yizi'xene'n.” 8 Na' lii gokbe'teyi Jesúza' daa chza'lall'gake', na' wñabile' legake', chi'e:

—¿Berache chza'lall'zle ka? 9 ¿Achakile chyalljchid' yel' wak xench yep' beeni: “Ba bizi'xen' saaxya ço'na'”, ka daa yepee: “Biyas na' bigoo nez”? 10 Na' wliid' le', nad' Beñ' Bsel' Chioza' nap' yel' wñabia' yell-lioni kwençhe yizi'xen' saaxya çhe beñ'.

Na'ch golle' beena' net ni'a neena':

11—Nia' li', biyas, bitob daa ço'na', na' biyaj lillo'na'.

12 Na' lii biyastie' bitobe' daa çhe'na' na' bizee chwiate beñ'ka' lle' na'. Na' yog'zgake' bibani na' be'la'ogake' Chioza', che'gake':

—Bigan' ile'icho ka dga.

Jesúza' goxe' Levína' kwençhe gake'ne' txen

(Mt. 9:9-13; Lc. 5:27-32)

13 Na' wyaj Jesúza' sto shii cho'a naldo'na' na' beñ' zan janogake'ne', na' bli' bsedile' legake'. 14 Na' wde Jesúza' gana' chi' Levína', xiin Alfewa', chçhixje' daa chkaa beñ' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

¹⁵ Na' to shii Jesúza' len beṅ'ka' nakgake'ne' txen cheej chaogake' lill Levína', na' zan beṅ' wixhixjka' na' beṅ'ka' zeyi chegake' nakgake' beṅ' mal cheej chaolengake'ne', la' beṅ' zan ba nak beṅ'ka' no le'. ¹⁶ Na' baḷ fariseoka', beṅ'ka' lekzka' chli' chsedi leya', ka ble'gakile' cheej chaolen Jesúza' beṅ'ka', na' gollgake' beṅ'ka' nakgake'ne' txen:

—¿Berache cheej chaolenz beena' chli' chsedi le' beṅ' wixhixjka' na' beṅ' malka'?

¹⁷ Na' ka beni Jesúza' che'gake' ka', na'ch chi'e:

—Beṅ'ka' zoa shi'a shao' aga no wen rmech chyalljgakile', san beṅ'ka' bi shawaan chyalljgakile'ne'. Ka'kzə nad', aga bid' ni che beṅ'ka' nak beṅ' li beṅ' shao', san ni che beṅ' malkan' bid'.

Wnabgakile' Jesúza' biche bi chon beṅ'ka' nakgake'ne' txen wbasaa
(Mt. 9:14-17; Lc. 5:33-39)

¹⁸ To shii beṅ'ka' nak Juanna' txen na' beṅ'ka' nak fariseoka' txen chzoagake' wbas'. Na' baḷ beṅ' wyajgake' lao Jesúza' na' che'gake'ne':

—Beṅ'ka' nak Juanna' txen na' beṅ'ka' nak fariseoka' txen chzoagake' wbas'. ¿Berache beṅ'ka' nakgake' li' txen bi chongake'n?

¹⁹ Na' che' Jesúza' legake':

—¿Awak soa beṅ'ka' chaxe' to ga chak wishagna' wbasaa shlak chak lnina'? Bi gakan, la' shlak zoalen beena' chshagna' legake' aga wak soagake' wbasaa. ²⁰ San wllin lla kat' yikwas beṅ' beena' chshagna' ladje'ka', kana'chan soagake' wbasaa.

²¹ Ni to beṅ' bi chida' chichollee lee lech' gola' lat' lech' kob, la' lech' koba' yibe'n kat' chibe'n na' zizikli wchez'chan lech' gola', na' dii xench gak gana' nchez'. ²² Ni biga zoa beṅ' chguee vino koba' loo yid golka', la' vino koba' wchezaan yid gola' na' kwiayi' vino koba' lente yid gola'. Na' daan, chiya' sholl vino koba' loo yid koba'.

Beṅ'ka' non Jesúza' txen chyishjgake' do che trígona' llana' chombaangake'
(Mt. 12:1-8; Lc. 6:1-5)

²³ Na' to lla sabd, llana' chombaang beṅ' Israelka', wdelen Jesúza' beṅ'ka' nakgake'ne' txen to ga naz to beṅ' trigo, na' wzolo beṅ'ka' nakgake'ne' txen wdishjgake' trígona' wdaogake'n. ²⁴ Na' goll fariseoka'ne':

—¿Berache chonz beṅ'ki nako' txen daa bi chiya' gongake' llani chombaanchcho?

²⁵ Na' golle' legake':

—¿Ani shlin bin' wlable daa ben dii Davina' to shii kon beṅ'ka' nakgake'ne' txen ka byallj daa gaogake'? ²⁶ Kana' nak Abiatará' bꞑoz choo bꞑoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdaolene'n beṅ'ka' nakgake'ne' txen, la'kzi toz bꞑozkan' chiya' gaogake'n.

²⁷ Na' lekzka' golle' legake':

—Chioza' wleje' llani chombaanchcho kwenche gaklenan benecha', aga bꞑe bsile' benecha' kwenchezə we'la'ogake' llani chombaanchon. ²⁸ Daan, nad', Beṅ' Bsel' Chioza' Yell-lioni, chnabi'a lao llani chombaanchcho.

3

Beena' net neena' tlaa
(Mt. 12:9-14; Lc. 6:6-11)

¹ Na' sto shii wyaj Jesúza' gana' chdop chllaggake' choe'llwillgake' Chioza' na' ladj beṅ'ka' lle' na' len to beṅ' net neena' tlaa. ² Na' chwiayen'gake' shi

wiyon Jesúza'ne' lla sabda', llana' chombaangake', kwenche gaogake' xya che'. ³ Na' che' Jesúza' beena' net neena' tlaa':

—Wzolla' na' wze gchol ben'ki.

⁴ Na'ch wñabile' ben'ka' ndop nllag na':

—¿Beran na leya' chiyal' goncho lla sabdka'? ¿Agoncho daa nak wen, anti goncho daa nak mal? ¿Ayislacho ben', anti witchone'?

Na' kokzno billii xtilleena'. ⁵ Na' ka chwie' ben'ka' lle' na', bllee na' gokyeshile' daa nakgake' ben' lall'do' chech, na' chi'e beena':

—Bli noona'.

Na'ch bli na' beena' na' lii biyakteyin. ⁶ Na' bichej fariseoka' na' wzologake' chgoogake' xñezin len ben'ka' non Heródeza' txen kwenche witgake' Jesúza'.

Ben' zan bdop bllag cho'a nido'na' gana' chda Jesúza'

⁷ Na' biza' Jesúza' gana' zoe' na' zejlene' ben'ka' nakgake'ne' txen cho'a nido'na' na' ben' zan ben' Galiléaka' wnogake' legake'. ⁸ Na' ben' zan ben'ka' lle' gana' mbani Judeana', na' yell Jerusalénna', na' gana' mbani Idumeana', na' ben'ka' lle' shlaa yao Jordánna' na' yellka' ndil nllag yell Tírona' na'ch yell Sidónna', ka wñezgakile' chon Jesúza' dii zan yel' wak, na' wyajgake' jawiagake'ne'. ⁹ Na' daa lle' ben' zan inleeb, golle' ben'ka' nakgake'ne' txen yisbig'gake' to barkw gana' lljshie' kwenche bi idakwyill' ben' be ben' zilka' le'. ¹⁰ La' ben' zan inleeb ba biyone' na' yog' ben'ka' bi shao' chdi'a chllaggake' lawe'na' kwenche gox'gake'ne' na' yiyakgakile'. ¹¹ Na' dii xiw'ka' yoo bal ben'ka', ka chle'gakin Jesúza', chongakan ka chchek' xib ben'ka' lawe'na' na' chosyaagakan, che'gakan: —jLin' nako' Xiin' Chioza'!

¹² Na' Jesúza' bsheshlene'gakan kwenche bi inagakan ka' ga lle' lla' ben'.

Jesúza' chbeje' shllin postlka'

(Mt. 10:1-4; Lc. 6:12-16)

¹³ Ka biyoll ben Jesúza' diika', na' wleje' bal ben'ka' wyazlallee gake'ne' txen na' wyajlengake'ne' to lo yaa. ¹⁴ Na' wleje' shllin ben'ka' kwenche talengake'ne' txen na' kwenche wselee legake' llje'gake' cho'a xtill' Chioza', na' bsi'e legake' postl. ¹⁵ Na' bi'e legake' yel' wñabia' kwenche yiyongake' ben'ka' bi shao' na' yibejgake' dii xiw'ka' yoo ben'. ¹⁶ Ben'kin wleje' shllin: Simónna', beena' bisi'e Pedro; ¹⁷ Jacóbona' len ben' bishee Juanna', ben'ka' nak xiin' Zebedewa', (ben'ka' bsi'e Boanerges, daa zeji ben' nak ka yi' wziw' dii chashj chtin); ¹⁸ na' Andréza', Felípena', Bartoloména', Matewa', Tomáza', Jacóbona', xiin' Alfewa', Tadewa', Simón, beena' wlen cananistka', ¹⁹ na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

²⁰ Na' Jesúza' len ben'ka' nakgake'ne' txen biyajgake' gana' zoagake'. Na' daa bizdi'a bizllag ben' zan inleeb, ni bi gok latj gaogake'. ²¹ Ka wñezi ben'ka' nak bish' lljwell Jesúza', wyajgake' nan lljaxi'gake'ne', la' gokgakile' ba chaktonte'n.

²² Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chñabia' dii xiw'kan' yo'e, na' yel' wak cheyinnan' chisheshile' dii xiw'ka'.

23 Na' gox Jesúza' legake' na' bzo'e to jempl lawe'ka', chi'e:

—¿Nakra gon Satanáza' yibej ljwell dii xiwiinna'? 24 Ben'ka' lle' toz yell shi til-len ljwellgake' na' gaggake' choplə, aga ssha soagake'. 25 Na' ben'ka' lle' toz yoo shi illaa ljwellgake' na' gaggake' choplə, aga ssha soagake'. 26 Na' shi Satanáza' na' dii xiw'ka' nak lall' na'yin yiyakdilgakan na' gaggakan choplə, bi idiagakan, san ba bllin lla kwiayi'gakannan', shi naa.

27 'Kono gak sho' loo yoo lill to ben' wal na' kwane' bi de che' shi bi wcheje'ne' zigaate, na'chan wtesh wlo'e' loo lille'na'.

28 'Dii li nia' le', Chioza' yizi'xene' yog'lol saaxya na' yog'lol dii mal daa chbell chne ben' che'; 29 san beena' ine zban che Espíritu Sántona', biga yizi'xene' che', na' toshiizi gak xbagee cheyi daa wchell wnie' che'.

30 Golle' legake' ka' daa wnagake' che' dii xiwaan yo'e.

Xna' Jesúza' na' ben' bisheeka'

(Mt. 12:46-50; Lc. 8:19-21)

31 Na'ch bllin xna' Jesúza' len ben' bisheeka', wzegake' lesh' chyoona' na' bsel'gake' ben' janegake'ne'. 32 Na' ben'ka' chi' kwit Jesúza' gollgake'ne': —Ba chiyilj xnoona' li' len ben' bishooka'.

33 Na' chi'e legake':

—¿Anezile noran xna'na' na' ben' bishaaka'?

34 Na' chwie' ben'ka' chi' kwite'na' na'ch chi'e:

—Ben'kin xna'na' na' ben' bishaaka'. 35 Nottezə beena' chon ka cheeni Chioza', len' ben' bishaana', ben' zanna' na'ch xna'na'.

4

Jempl che to ben' goz goon

(Mt. 13:1-9; Lc. 8:4-8)

1 Sto shii wzolo Jesúza' bli' bsedile' ben' cho'a niso'na', na' daa bdop bllag ben' zan inlbejshie' to loo barkw daa chi' cho'a niso'na', na' ben'ka' bdi'a bllag wll'gake' cho'a niso'na'. 2 Na' dii zan dii bli' bsedile' legake' na' bchine' jemplka', na' golle' legake':

3 —Li wzenag dga. To ben' goz goon wzee zeje' goza'. 4 Na' ka zej chzalee binna', bałan bxop cho'a neza' na' bllin byinka' wdaogakban. 5 Na' zi bałan bxop ladj yajka', gana' bitek bi yo chi'. Na' tolbe' bilaan, daa bi chi'tekan yona'. 6 Per ka bla' wbillā, bkwedgakan. Na' daa bi bde loinna', wbillan. 7 Na' zi bałan bxop ladj yag yesh'ka' na' yag yesh'ka' bi be'gakan latj igolgakan na' bibi wllian. 8 Na' zi bałan bxop gana' chi' yo wenna', na' bgolgakan na' le wlligakan. Bałan wllia shichoa wej, na' zi bałan guiyon wej, na'ch to guiyoa wej.

9 Na' chi'e legake':

—Ka le' chenile dga nia', li sen wneyi.

Jesúza' bzajniile' legake' biche chseese jemplka'

(Mt. 13:10-17; Lc. 8:9-10)

10 Na' ka bgaan stoz Jesúza', ben'ka' wll'e' gaoshosh kwite'na' len ben'ka' shllin, wnabgakile'ne' bi zeji jempla' daa bseesile' legake'. 11 Na' chi'e legake': —Chioza' cho'e latj inezile daa kono wnezi che yel' wnabia' che'na'. Per ben'ka' bi chzenag che', chseesid' legake' jemplka' 12 kwenche la'kzi ile'tegakile' ka chon', bi shajni'gakile' bi zejín, na' la'kzi yentegakile' xtillaana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

*Jesúza' bizajniile' bi zeji jempla'**(Mt. 13:18-23; Lc. 8:11-15)*¹³ Na' chi'e legake':

—Shi bi chajniile jempli, ¿nakra gonle shajniile diika' sto? ¹⁴ Beena' chaz zaklebile' beena' choe' cho'a xtill' Chioza'. ¹⁵ Zoa ben' chengakile' cho'a xtill' Chioza' na' kat' ba bengakile'n, lii zejte dii xiwaa chikwasan daa loo yichjlall'do'eka'. Na' chak chegake' ka gok che binna' daa bxop cho'a neza'. ¹⁶ Zi balgake' chak chegake' ka gok che binna' daa bxop ladj yajka' na' aga bi logakin bde. La' ka chengakile' cho'a xtill' Chioza' chiba chizak'gakile' chzenaggake'n ¹⁷ per shlollchga chajle'gake'. Na' kat' bi chen chle'gakile' ni che cho'a xtill' Chioza', lii chbej yichjtegake'n. ¹⁸ Zi balgake' chak chegake' ka gok che binna' daa bxop ladj yag yesh'ka'. Chengakile' cho'a xtill' Chioza', ¹⁹ per chi' yichjgake' diika' chak chegake', na' zetegake' wneyi che yel' wni'ana' na' chzelall'tegake' yog'lolte daa de yell-lioni. Na' legakannan' chsej chllongakan gon xshin cho'a xtill' Chioza' loo yichjlall'do'eka'. ²⁰ Na' zoa zi bal ben' chengakile' cho'a xtill' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka binnyo' bxop lo yo wenna' daa wllia shichoa wej, na' guiyon wej na'ch to guiyoa wej.

*Jempl che to kandil**(Lc. 8:16-18)*²¹ Na' lekzka' chi'e legake':

—Biga zoa ben' chxene' kandila' na' chdose'n to dii wkwashaan len wa chni'en xan xlague'na', san chzoe'n sibə kwenche wzeeni'n doxen loo yoona'. ²² Na' lekzka' yog'lolte dii ngash' naa wllin lla yila' lawin, na' daa kono nezi naa wllin lla inezi beñaan. ²³ Le' chenile dga nia', li sen wneyi.

²⁴ Na' lekzka' chi'e legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench. ²⁵ Beena' chzenag, zizikchli shajni'chile', na' beena' bi chzenag, axt daa ba benile' lat' yiya'l-lalle.

*Jempl che binna' daa chgol*²⁶ Na' lekzka' chi'e legake':

—Yel' wñabia' che Chioza' zaklebin daa chak che binna' chaz ben'. ²⁷ Beena' chaz chaan, chila' daa chaze' na' chgolan la'kzi chese' wa chechj chdaze', ka'kzə shi wal' wa tella, na' ni bi nezile' nak chak chgolan. ²⁸ Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian. ²⁹ Na' kat' ba gol daa chbian, na' chizi' chilape'n.

*Jempl che sa mostásana'**(Mt. 13:31-32; Lc. 13:18-19)*³⁰ Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon? ³¹ Yel' wñabia' che Chioza' nakan ka sa mostásana' daa chazgake'. La'kzi lennan' binna' daa liizelozi nesh'ch, ³² kat' ba bla'n na'ch chgolan na' chakan dii xench ka yog'te yix' kwan yoblə, na' chak xoziiinka' dii xen axt byindo'ka' wak ljshdiagakban na' sho'gakb xol cheyinna'.

*Jesúza' bchine' jempl ka bli' bsdile' ben'**(Mt. 13:34-35)*

³³ Dii zan jempl bchin Jesúza' ka bli' bsedile' ben'ka' cho'a xtill' Chioza', bene' kon ga zeelo wyajni'gakile'. ³⁴ Na' toshiizi bzoe' jemplka' lao ben'ka' bdi'a bllag, na' toz ben'ka' nakgake'ne' txen bizajniile' bi zejín yog' diika'.

Jesúza' bkweze' to yejpe' wal lo nisdo'na'

(Mt. 8:23-27; Lc. 8:22-25)

³⁵ Na' ka gol, golle' ben'ka' nakgake'ne' txen:

—Techo shlaa nisdo'ni.

³⁶ Na' biza'gake' kwit ben'ka' bdi'a bllag na' biche'gake' Jesúza' loo barkwa' daa chi' cho'a nisdo'na', na' lench barkw yoblə ziyajlengake'.

³⁷ Na' wze to yejpe' wal na' wzolo nisdo'na' chas chataan axt ba chiyollan loo barkwa', na' ba wzolo chbe'n yel. ³⁸ Na' ba de Jesúza' chese' xaninna' nkogtie' to dii nkogue', na' jasangake'ne' che'gake':

—¡Maestro! ¿Abikzə chakbe'ilo' ba chbe'cho yel?

³⁹ Na' wyase' bsheshlene' be'na', na' chi'e nisdo'na':

—Lliz wzoa.

Na' wlez be'na' na' wche'lli nisdo'na'. ⁴⁰ Na' golle' ben'ka' nakgake'ne' txen:

—¿Biche chllebzle? ¿Abikzan' gonlilall'le nad'?

⁴¹ Na' le bllebgake', na' che' ljwellgake':

—¿Nora beeni, lla?, axt be'na' na'ch nisdo'ni chzoagakan xtillee.

5

Bibej Jesúza' dii xiwaa yoo ben' Gadárana'

(Mt. 8:28-34; Lc. 8:26-39)

¹ Na'ch bllingake' gana' mbani Gadárana' daa llia shlaa nisdo'na'. ² Na' ka bichej Jesúza' loo barkwa', na' wbig' to ben' yo'e dii xiwaa. Na' beeni bcheje' loo kapsanta' ³ gana' none' ka lill xlatje'. Na' kono gok wchej le', ni gdenna' bi ben llin. ⁴ Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'. ⁵ Ka wal ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'. ⁶ De zit'lə ble'ile' zej Jesúza' na' bxonjdoe' jatile'ne' na' jachek' xibe'na' lawe'na', ⁷ na' besyee zillj, chi'e:

—¡Bi wllali' cho' kon nad', Jesús, Xiin Chios, ben' choo ben' xen! Chat'yoid' li', jbeheb lao Chioza' bi wsak'zi'o nad'!

⁸ Gollan ka' daa goll Jesúza' len:

—¡Dii xiw', bichej loo kwerp che beeni!

⁹ Na' goll Jesúza' len:

—¿Bin lio'?

Na' che'n:

—Legiónan lia', la' zannto' nak.

¹⁰ Na' got'yochgain Jesúza' bi wseleegakan gan yoblə. ¹¹ Na' gaozə kwit yaana' gana' lle'gake', lle' zan kush chaogakb. ¹² Na' got'yo' dii xiw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

¹³ Na' bi'e latj chegakin, na' bichejgakan jayoogakan kushka'. Na' nakgakb ka chopá mil, na' wzologakb chxonjdogakb jabixgakb loo nisdo'na', na' jche'gakb yel.

¹⁴ Na' ben'ka' chap kushka' ziyajdogake' jayellgake' ben'ka' lle' yella' na' ben'ka' lle' lyixaa daa ble'gakile', na' ben' zan jawia daa gok. ¹⁵ Na' ka bllingake' gana' ze Jesúza', ble'gakile' beena' wyoo dii xiw'ka' chi'e

kwite'na' ba biyakw xe'na' na' ba biyeen biyeeniile', na' bllébgake'. ¹⁶Na' ben'ka' ble'i daa gok che beena' wyoo dii xiw'ka' na' daa gok che kushka', be'gake'n dill' lao ben'ka' bllin. ¹⁷Na' got'yogakile' Jesúza' yiyaje' gan yoblə.

¹⁸Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'. ¹⁹Per bi bi'e latj, san chi'ene':

—Biyaj lillo'na' gana' lle' bish' l'jwello'ka', na' jayellgake' ka nak diiki ba ben Xancho Chioza' cho' na' ka ba biyesh'lallile' li'.

²⁰Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' ben' bibani.

Biyon Jesúza' noola' bex' xe'na' na' lekzka' xiin Jairona'

(Mt. 9:18-26; Lc. 8:40-56)

²¹Ka billinlen Jesúza' barkwa' shlaa niso'na', na' bdi'a bllag ben' zan cho'a niso'na' gana' billine'. ²²Na' bllin to ben' le Jairo, nake' to ben'ka' chgoogake' xnezi diika' chon ben' Israelka' gana' chdop chllaggake' choe'lwillgake' Chioza'. Na' ka blline' gana' ze Jesúza', bchek' xibe' lawe'na' ²³na' benyesh'chgue', chi'e:

—Ba chet bi' cha'na'. Ben goklen sho'gach wxoa noona' yichjbaa kwenche yiyakib' na' ibanchb'.

²⁴Na' wyajlen Jesúza' le', na' ben' zan inleeb nogake'ne' axt bdakwyillgake'ne'. ²⁵Na' ladj ben' zan walka' len to noolə ba gok shllin yiz chzoe' wbaa. ²⁶Dii zan dii ba ben ble'ile' lao ben' wen rmechka', na' ba blliaeye yog' dii de che' na' bi gokkze' rmech, san gokxinlile'. ²⁷Na' ka benile' xtill' Jesúza', jni'e ladj ben' zan walka' no le' na' jexee xe'na'. ²⁸La' gokile': "La'ch' xe'na' shel' ba bexaa, na' yiyakid'." ²⁹Na' katena' wlez wbaana' na' gokbe'ile' ba bigaa yillwe' che'na'. ³⁰Na' gokbe'i Jesúza' bchej ye'l' wak che'na', na' biyechje' chi'e ben'ka':

—¿Noran bex' xa'na'?

³¹Na' ben'ka' non le' txen che'gake'ne':

—Ben' zan walan ndakwyill li'. ¿Biche nazo': "Non ba bex' nad'?"

³²Na' ze Jesúza' chwie' ben'ka' lle' kwite'na' kwenche inezile' non bex' le'. ³³Na'ch noola', daa ba gokbe'ile' biyakile', de chall chllebzile' wdie' na' bchek' xibe'na' lawe'na' na' golle' le' doxen daa ba gok che'. ³⁴Na' che' Jesúza'ne':

—Xiin', daa chonjilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

³⁵Na' ni chshaljte Jesúza' ka bllin to chop ben' wza' lill Jairona', chi'ene':

—Ba wit bi' cho'na'. Bich gonilo' maestroni zed.

³⁶Na' bi ben Jesúza' legake' kwent, na' golle' Jairona':

—Bi illebo'. Kon bxenilall' nad'.

³⁷Na' bi bi'e latj shajlen ben' yoblə le', lete Pédrona' na' chop bish'te, Jacóbona' na'ch Juanna'. ³⁸Na' ka bllingake' lill Jairona', ble'ile' le chakyeshii ben'ka' lle' na' na'ch chbellgake' na' le chosyaagake'. ³⁹Na' jabiguae gana' lle'gake' na' golle' legake':

—¿Berache chonzle dane' na' chbellzle? Aga ba wit bi'do'nan', san cheszbään.

⁴⁰Na' bxillgakile' Jesúza'. Na' bisheshe' yog'lóle' na' wyoolene' xaxna'baa na' ben'ka' zejlene' txen gana' de bi'do'na'. ⁴¹Na' bexee na'baa na' golle'b':

—Talita, cumi* —na' zejın: Bi' nooldo', nia' li' biyas.

⁴² Na' bi' nooldo'na' lii biyasteb' na' bidab', la' ba gokkzib' shllin yizan. Na' bibanchgayi ben'ka' lle' na'. ⁴³ Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

6

Billin Jesúza' yell Nazareta'

(Mt. 13:53-58; Lc. 4:16-30)

¹ Na' biza' Jesúza' biyaje' lalle'na', na' ben'ka' nakgake'ne' txen ze-
jlengake'ne'. ² Na' ka bllin lla sabda', llana' chombaän ben' Israeika',
wyaje' gana' chdop chllaggake' choe'lwıllgake' Chioza' na' wzoloe' bli'
bsedile' ben'ka' lle' na'. Na' zan ben'ka' bzenag xtilleena' bibangakile', na'
che'gake':

—¿Gara jasedz beeni diiki, lla? ¿Gara za' ye! sin' che beeni, na' ye!
wakka' chone', lla? ³ ¿Aaga beenin karpintera', beena' nak xiın Marıana',
na' ben' bish' Jacóbona', Joséna', Júdaza' na'ch Simónna'? Na' lekzka' ben'
zane'ka' zoagake' lallchoni.

Na' bi wyajle'gake' che'. ⁴ Na' che' Jesúza' legake':

—To ben' chyixjee daa che' Chioza'ne', gattez chgoogake'ne' balaän,
san lall lille'na' aga no chgoo le' balaän.

⁵ Na' aga bitek ye! wak gok gone' na', lete xonjchga ben' we'ka' bxoä
neena' yichje'ka' na' biyone' legake'. ⁶ Na' bibanile' daa bi chajle' ben'ka'
che'. Na' wde' bli' bsedile' ben'ka' lle' to to yellka' llia gaozä yell Nazareta'.

Jesúza' bselee ben'ka' shllin llje'gake' cho'a xtill' Chioza'

(Mt. 10:5-15; Lc. 9:1-6)

⁷ Na' wnie' ben'ka' shllin, na' bselee chop weje', na' bi'e legake' ye!
wnabia' kwenche yibejgake' dii xiw'ka' yoo ben'. ⁸ Na' golle' legake' bibi
gox'gake' kat' koogake' nez; bi chiyal' wa'gake' yixj ga koo xshinlaze'ka', ni
dii gaogake', ni mech, san twejz yag bar gox'gake'. ⁹ Na' shkwe'z xelgake'
wlej, na' zi shkwe'z xe'ka' gawk. ¹⁰ Na' chi'e legake':

—Yoonä' gana' illinle, na'z soale axt ka illinch lla yiza'le. ¹¹ Na' yella'
gana' bi wlebgake' le' ni bi wzenaggake' chele, ka yiza'le na', yishible
bishtena' llia ni'aleka' kwenche gakbe'gakile' aga wenan chongake' bi
chlebgake' cho'a xtill' Chioza'. Dii li nia' le', kat' illin lla wchoglo Chioza'
che ben', ben'ka' lle' yella' gana' bi wlebgake' le', ile'gakile' ye! zak'zi'
xench aga ka ben'ka' wlle' yell Sodómana' na' yell Gomórrana'.

¹² Na' wza'gake' zjtixje'gakile' ben' chiyal' yiyaj yilengakile' saaxya
che'ka'. ¹³ Na' bibejgake' zan dii xiw'ka' yoo ben', na' bshongake' lat' wej
seta' yichj ben'ka' bi shao' na' biyakgakile'.

Betgake' Juanna', beena' bchoa ben' nis

(Mt. 14:1-12; Lc. 9:7-9)

¹⁴ Na' Heródeza', beena' wnabia' gana' mbani Galileana', benile' yog' daa
chon Jesúza', daa le ba zeyi che'. Bal' ben'ka' che'gake':

—Dii Juanna', beena' bchoa ben' nisan' ba biban, daan chone' ye!
wakka'.

¹⁵ Zi bale' che':

—Elıazan' ba biyed.

Na' zi bale' che':

* 5:41 Talita, cumi: dill'ki nakgakan dill' arameo.

—Nake' ben' chyixjee daa che' Chioza'ne', ka ben'ka' wzoa kani'yi.

¹⁶ Ka beni Heródeza' dill'ki, na' chi'e:

—j'Beenan' dii Juanna', beena' ben' mandad wchog yichje'na'! j'Ba bibane' ladj ben' wetka'!

¹⁷ La' kwin Heródeza' bene' mandad bex'gake' Juanna' na' bseje'ne' lillyana' daa bseshlene'ne' daa bikee Herodíaza', xool ben' bishee, Felípena'. ¹⁸ Juanna' golle'ne':

—Xya nleeb nakan bikoo xool ben' bishoona'.

¹⁹ Na' blaa Herodíaza' Juanna' na' goklallee wite'ne', per bibi gok gone' ²⁰ daa chleeb Heródeza' Juanna', daa nezile' nake' to ben' li ben' shao' ben' nak lall' na' Chioza', na' bi bi'e latj no bi goni le'. Na' la'kzi chakchoplallee che dill'ka' cho'e, bibaile' bzenague' che'. ²¹ Per ka wyayi Heródeza' yiz, bene' to lni na' goxe' ben'ka' chnabia', na' xan soldadka', na' ben'ka' mbejlawin gana' mbani Galileana'. Na' got' xlatjin gon Herodíaza' ka cheenile'. ²² Na' bi' nool wew' che Herodíaza' byaab' lao ben'ka' lle' lina', na' le bibayi Heródeza' len ben'ka' chaolene' ka byaab'. Na' golle'b':

—Wnab bittezə cheenilo' na' gona'n.

²³ Na' bchebe' wi'eb' daa cheenib', la'kzi ax̄t gashj gana' chnabi'e wi'eb'.

²⁴ Na' bichejb' janabib' xna'baa:

—j'Bera ka inab', lla?

Na' che' xna'baa:

—Wnab yichj Juan wichoa nisa'.

²⁵ Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat lilj naate.

²⁶ Na' le gokyeshii Heródeza', per daa ba bcheble' lao yog' ben'ka' goxe', bi goklallee wllonile'b' daa chnabib' le'. ²⁷ Na' lii bsel'tie' to soldad jachogue' yen Juanna' loo lillyana' ²⁸ na' blie' yichje'na' to lo plat. Na' bi'en bi' nool wewaa na' leb' be'baan xna'baa.

²⁹ Ka wnezi ben'ka' nak Juanna' txen, na' jaxi'gake' kwerp che'na' na' jakwash'gake'ne'.

Bwao Jesúza' gayaa mil ben'

(Mt. 14:13-21; Lc. 9:10-17; Jn. 6:1-14)

³⁰ Ka billin postlka' gana' zoa Jesúza', na' gollgake'ne' yog' diika' jen-gake' na' daa jali' jasedgakile' ben'. ³¹ Na' che' Jesúza' legake':

—Li sho' shajcho ga kono ben' lle' kwenche yizi'lall'lat'cho.

Golle' ka' daa le chdia chllag ben' zan lawe'ka', na' ni bi chak latj gaogake'. ³² Na' wyoogake' to barkw wyajgake' ga kono ben' lle'. ³³ Na' ben' zan ble'gakile' ka wza'gake' na' biyombia'gake' legake', na' wza'do ben'ka' lle' to to yell zejdogake' gana' illin barkwa' na' nechlagake' bllin. ³⁴ Na' ka bichej Jesúza' loo barkwa' ble'ile' ba bdi'a bllag ben' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsdile' legake'. ³⁵ Na' ka wlle', ben'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaochi. ³⁶ Goll ben'ki yiyajgake' ranshka', na' yellka' lia gaozə kwenche lljxi'gake' daa gaogake'.

³⁷ Na' che' Jesúza' legake':

—Len', li we' dii gaogake'.

Na' che'gake'ne':

—¿Nakra gonnto' lļxi'nto' yetxtilka' gao yog' beŋ'ki? la' wyejljain che chop guiyoa lla che laxj beŋ'.

³⁸ Na' che' Jesúza' legake':

—Li lļawia ka'k' yetxtilka' napple.

Na' ka wnežgakile' ka'ka'n de, na' che'gake'ne':

—De gayaan, na' zi chop bel.

³⁹ Na'ch goll Jesúza' legake' kwekgake' xonj wej beŋ'ka' lo yixa'. ⁴⁰ Na' wche' to guiyoa wejgake' na' shiyon wejgake'. ⁴¹ Na' beŋ' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choŋken, na' bxoxje' yetxtilka' bi'en beŋ'ka' nakgake'ne' txen kwenche be'gake' che che beŋ'ka'. Na' lekzka' yog'gake' be'gake' belka'. ⁴² Na' yog'lolgake' wdaogake' ka beljgakile'. ⁴³ Na' postlka' bitopgake' yetxtilka' len belka' bichoonan, na' biyakan zi shllin xet'. ⁴⁴ Na' beŋ'ka' wdao, to beŋ' byoka'zə gokgake' gayaa mil.

Jesúza' wzee lo nido'na'

(Mt. 14:22-27; Jn. 6:16-21)

⁴⁵ Na' ka wde, bigoo Jesúza' beŋ'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa lliā zi shłaa nido'na', shlak bisee beŋ'ka' bdi'a bllag na'. ⁴⁶ Na' ka biya beŋ'ka' billesh, na' wyaje' lo yaana' jelwille' Chioza'. ⁴⁷ Na' ka gol, ba zej barkwa' gchol nido'na' na' stoz Jesúza' bgaane' gana' biza'n. ⁴⁸ Na' ble'ile' le chllaglogaken' daa za' be'na' gana' zejləgake'. Na' ni bał wlo'e nez tlo nido'na' zeje' gana' ziyajlgake'. Na' ba zoa yidie' lawe'ka' ⁴⁹ ka ble'gakile'ne' zeje' tlo nido'na' na' gokgakile' yel' bzenzan. Na' besyaagake' ⁵⁰ daa le bllebgake' daa ble'gakile'. Na' lii wnetie' legake', chi'e:

—Bi illeble, nad'kzan.

⁵¹ Na' biyep'e loo barkwa' na' wche'lli be'na'. Na' le bibangakile', ⁵² la' aga ba wyajni'gakile' yel' waka' daa bene' che yetxtilka' daa gokgake' beŋ' lall'do' wal.

Jesúza' biyone' beŋ'ka' bi shao' gana' mbani Genesareta'

(Mt. 14:34-36)

⁵³ Na' ka biyoll wdegake' lo nido'na' na' bllingake' yell-lío daa mbani Genesareta', na' bda' barkw che'ka' yag cho'a nido'na'. ⁵⁴ Ka bchejgake' loo barkwa', lii biyombia'te beŋ' Genesaretka' Jesúza'. ⁵⁵ Na' wdadogake' doxen gana' mbani lalle'ka' btopgake' beŋ' bi shao', na' lo daazə nxoagake' legake' chjwa'gake' legake' gana' nežgakile' bllin Jesúza'. ⁵⁶ Na' gattezə chaje' laa yelldo'ka' laa yell xenka', wa laa ranshka', chyixjgake' beŋ'ka' bi shao' tneza' gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' beŋ'ka' gok beŋ'gake'n biyagkakile'.

7

Diika' chxinj chlenan yichjlall'do'chona'

(Mt. 15:1-20)

¹ Fariseoka' len zi bał beŋ'ka' chli' chsedi leya', beŋ'ka' zaak Jerusalenna', bllingake' lao Jesúza'. ² Na' ka ble'gakile' bał beŋ'ka' nak Jesúza' txen bi bixis biyib neeka' ka zi' gaogake', na' wdaogake' xya chegake'. ³ (La' fariseoka' len yog'z beŋ' Israelka' ni ndogake' daa bli' bsemi dii xozxtoe'ka' legake' nan bi gak gaogake' shi biŋ' yixis yiyib neeka'. ⁴ Na' ka chiyoll chajgake' lao yaana' shi bi yixis yiyib neeka' bi

gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.) ⁵ Na' fariseoka' len ben'ka' chli' chsedi leya' wñabgakile' Jesúza', che'gake':

—¿Biçhe bi chon ben'ki nako' txen ka bli' bsemi dii xoxzto'choka' cho'?, la' bi chixis chiyib neeka' kat' cheej chaogake'.

⁶ Na' che' Jesúza' legake':

—Kwaslol inleban wñe dii Isaiaza' chele, le' ben' wxiye', kana' bzeje' daa na:

Ka nak ben'ki, de cho'a dill'zan choe'la'ogake' nad',

na' aga choe'la'ogake' nad' do yichj do lall'gake'.

⁷ Bibi zjanayin chongake' ka choe'la'o nad';

na' daa chli' chsedgakile' nakan dii chyiljall'z ben'.

⁸ Na' le' chbej yichjle daa nllia Chioza' bia' gonle kwenche gonle daa chyiljall' ben' yell-lioni.

⁹ Na' lekzka' golle' legake':

—Chzoale ka'lá daa nllia Chioza' bia' gonle kwenche gonle daa bli' bsemi dii xoxzto'leka' le'. ¹⁰ Moiséza' wne': “Li koo xaxna'lana' balaan”, na' “Beena' ine zban che xaxneena' chiyal' guete.” ¹¹ Na' le' choe'le latj yee ben' xaxneena': “Bi gak gaken' le', la' yog' dga de cha' ba ncheb' wi'an Chioza'.” ¹² Na' daa nale ka', bich chonle byen gaken' ben' xaxneena'. ¹³ Na' daa chonle ka', chzoale cho'a xtil' Chioza' ka'lá kwenche chonle daa bli' bsemi dii xoxzto'leka' le'. Na' dii zanch ka dga chonle.

¹⁴ Na' wñe Jesúza' yog' ben'ka' lle' na', na' golle' legake':

—Li wzenag dga inia' le', na' li shajniin: ¹⁵ Aga daa cheej chao ben' yell-lionin chxinj chlenan le'. San daa chalj chxe loo yichjlall'do'enan' chxinj chlenan le'. ¹⁶ Ka le' chenile dga nia', li sen wñeyi.

¹⁷ Na' ka bikwase' kwit ben'ka' lle' na' biyo'e loo yoona' gana' zoagake', na' ben'ka' nakgake'ne' txen wñabgakile'ne' bi zejín daa golle' ben'ka'.

¹⁸ Na' golle' legake':

—¿Ani le' bi chajniilen? ¿Abi chajniile aga daa cheej chao banaan chxinj chlenan le'? ¹⁹ La' aga loo yichjlall'do'enan' illinan, san loo li'enan' lljche'n, na'tech yichejan.

Na' daa golle' ka', zejín bittezə yel' wao wak yeej gaocho. ²⁰ Na' lekzka' golle':

—Daa chchej loo yichjlall'do' ben' yell-lioni, lënan' chxinj chlenan le'.

²¹ La' loo yichjlall'do'ekan' chalj chxe diiki bi nak wen: yel' chza'lall' mal, yel' chñelen ljwellin, yel' chiyit ljwellin, ²² yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che ben', yel' chep cha'lall', na' yel' nchol nnti. ²³ Yog'lol dii malki chalj chxegakan loo yichjlall'do' ben' na' chxinj chlengakan legake'.

To noola bi nake' ben' Israel ben'lilallee Jesúza'

(Mt. 15:21-28)

²⁴ Na' biza' Jesúza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok wkwashee. ²⁵ Na' to noola, ben' zoa to bi' nool che' yoob' dii xiwaa, ka wñezile' bllin Jesúza', lii wyajtje' jaçhek' xibe'na' lawe'na'. ²⁶ Na' noola' nake' ben' griego, na' golje' gana' mbani Sirofeníciana'. Na' got'yoile' Jesúza' yibeje' dii xiwaa yoo bi' nool che'na'. ²⁷ Na' goll Jesúza' le':

—Yog'zə beŋ' zigaate chwawe' xiine'ka'. ɭa' bi nakan wen koyocho daa chao xiinçhoka' na' wzal'chon lao bekw'ka'.

²⁸ Na' che' noola' le':

—Lekzilo'n, beŋ'do', per bekw'ka' chbe'gakb xan mesa' na' chitopgakb bl̥aaka' chxop.

²⁹ Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

³⁰ Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúza' to beŋ' kwell na' bi chak inetie'

³¹ Na' biza' Jesúza' gana' mbani Tírona' na' bidie' yell Sidónna' na' billine' gana' de nido' che Galileana', gana' mbani Decápoliza'. ³² Na' jwa'gake' lawe'na' to beŋ' kwell na' leyi bi cha'yen' inie', na' got'yogakile'ne' w̥xoaneena' yichje'na'. ³³ Na' b̥che' Jesúza'ne' ka'lə gana' kono lle', na' b̥ne' xbene'na' loo nague'na', na' bl̥laa xeneena' lo xbene'na', bshile'n lo lol' beena'. ³⁴ Na' bl̥is jalawe'na' cha'lə, wkaalallee, na' golle'ne':

—jÉfata! —zejin: jByalj!

³⁵ Na' lii byaljte nague'na', na' gok bita lolleena' na' bishalje' wen. ³⁶ Na' che' Jesúza' beŋ'ka' ble'i kono ye'gake'ka'. Na' la'kzi golle' legake'ka', zizikli bzegake'n dill'. ³⁷ Na' le bibangakile', che'gake':

—Yog'lolte chak gon beeni, chiyone' beŋ'ka' bi cheni, na' beŋ'ka' bi chak ine, chone' ka ch̥negake'.

8

Jesúza' bwawe' tapa mil beŋ'

(Mt. 15:32-39)

¹ Do kana', beŋ' zan inleeb bdop bllag. Na' daa bibi de yeej gaogake', w̥ne Jesúza' beŋ'ka' nakgake'ne' txen chi'e legake':

² —Chiyeshid' beŋ'ki, la' ba gok shoŋ lla zoalengake' nad' na' bibi de yeej gaogake'. ³ Na' shi yiseɭaa legake' bi neej naogake', xoll ichol̥-lall'gake' tneza', la' balgake' za'gake' zit'.

⁴ Na' beŋ'ka' nakgake'ne' txen che'gake'ne':

—¿Gatg lljxi'cho dii gao yog' beŋ'ki?, la' gani lle'cho kono zoa wit' dii gaocho.

⁵ Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

⁶ Na' bene' mandad kwe' beŋ'ka' lo yona', na' bexee gallte yetxtilka', na' ka biyoll bi'e Chioza' yel' choxken, na' b̥xoxje'n na' bi'en beŋ'ka' nakgake'ne' txen kwenche chisgake' che che beŋ'ka'. ⁷ Na' lekzka' nox'gake' zto chop beɭ. Na' bi'e Chioza' yel' choxken, na' golle' beŋ'ka' nakgake'ne' txen we'gake' che che beŋ'ka'. ⁸ Na' yog'lolgake' weej wdaogake' axt ka beljgakile', na' bitopgake' zi gall xet' diika' bichoonan. ⁹ Beŋ'ka' weej wdao gogkake' ka tapa mil. Na' Jesúza' bisee legake' ¹⁰ na' bizee biyoolene' beŋ'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to yel' wak lawe'ka'

(Mt. 16:1-4; Lc. 12:54-56)

11 Na' bllin fariseoka' na' wzologake' chakguedlengake' Jesúza'. Na' daa goklall'gake' wchixgake'ne', wñabgakile'ne' gone' to yel' wak lawe'ka' kwenche gakbia' shi Chioza'kzan bseleene'. 12 Na' Jesúza' axt wkaalallee, golle':

—¿Berache le' zoale naa chñabzle gon' to yel' wak dii ile'ile'? Dii li nia' le', aga bi yel' wak gon' ile'ile'.

13 Na' bizee kwite'ka', na' biyo'e loo barkwa' sto shii ziyaje' shlaa niso'na'.

Dill' wxiye' che fariseoka' zaklebin levadúrana'

(Mt. 16:5-12)

14 Na' ben'ka' nak Jesúza' txen gol-lall'gake' wa'gake' yetxtil che'ka', na' tlish'chga dii noa'gake' loo barkw che'ka'. 15 Na' che' Jesúza' legake':

—Wsak'gale bi shajle'le dill' wxiye' che fariseoka' na' che Heródeza', daa zaklebi levadúrana'.

16 Na' ben'ka' nakgake'ne' txen che' ljwellgake':

—Daa bi bi'acho yetxtilan' ne' ka'.

17 Na' gokbe'i Jesúza' dillaa choe'gake', na' golle' legake':

—¿Berache chakzile daa bi bi'ale yetxtilan' nia' ka'? ¿Abin' shajni'kzile' ni bin' gakbe'ile ka nak diika' chon'? ¿Abin' iyalj yichjlall'do'lenan'?

18 Zoate jalaoleka' na' bi chle'ile, na' zoate nagleka' na' bi chenile'. ¿Abi chjadinile ka ben'? 19 Kana' bxo'xj' gay' yetxtilka' na' wdao ben'ka' gaya' mil, ¿bał xet' diika' bichoonan'?

Na' gollgake'ne':

—Shllinan.

20 —Na' kana' bxo'xj' gall yetxtilka' na' wdao ben'ka' tapa mil, ¿bał xet' diika' bichoonan'?

Na' che'gake'ne':

—Zi gallan.

21 Na' che' Jesúza' legake':

—¿Ana' ni ka' bin' shajni'kzile'?

Jesúza' biyone' to ben' lchol'yell Betsáidana'

22 Na' bllingake' yella' le Betsaida, na' ben'ka' lle' yella' jwa'gake' to ben' lchol' lao Jesúza' na' got'yogakile'ne' gox'gache'ne'. 23 Na' be'x' Jesúza' na' ben' lchola' na' wleje'ne' yella'. Na' bll'e' xeneena' jalawe'na' na' b'xoa neena' yichje'na', na' wñabile'ne' shi ba chle'ile'. 24 Na' che' ben' lchola':

—Chle'id' xonj ben', na' nakgake' ka yag dii chza'.

25 Na' Jesúza' be'xee jalawe'na' sto shii, na' biyakile'. Na' ble'ile' kwasloł yog'lołte. 26 Na' biseł' Jesúza'ne' shlıcha lille'na', chi'ene':

—Bi lljayoo dill' yella'.

Pédrona' bi'e dill' Jesúzan' nake' Crístona'

(Mt. 16:13-20; Lc. 9:18-21)

27 Na' biza'len Jesúza' ben'ka' nakgake'ne' txen wyajgake' yellka' mbani Cesarea de Filipona'. Na' shlak ngoogake' nez, wñabile' legake', chi'e':

—¿Non na ben' nak'?

28 Na' che'gake'ne':

—Balgake' nagake' lin' dii Juanna', beena' bchoa ben' nisa', na' zi balgake' nagake' lin' Eli'aza', na' zi balgake' nagake' nako' sto ben' wdixjee daa goll Chioza'ne' kani'yi.

29 Na' chi'e' legake':

—Shera le', ¿nora nale nak'?

Na' che' Pédrona':

—Lin' Cristona', beena' n̄cheb Chioza' wselee.

³⁰ Na' che' Jesúza' legake' kono ye'gake' ka'.

Jesúza' cho'e dill' guete'

(Mt. 16:21-28; Lc. 9:22-27)

³¹ Na' wzolo Jesúza' bli' b̄sedile' legake' nan le', Beñ' Bsel' Chioza' Yell-lioni, chonan byen sak'zi'e dii xen, na' beñ' golka' ch̄n̄abia' na' b̄xozka' ch̄n̄abia' na'ch beñ'ka' chli' ch̄sedi leya' gakzbangakile'ne', na' chonan byen witgake'ne' na' yibane' ka gak shon̄ lla. ³² Na' bshaljlene' legake' kwasloj daa gak che'. Na'ch wlej Pédrona'ne' ka'lə na' wzolo golle'ne' bi koo cho'e daa. ³³ Na' biyechj Jesúza' chwie' beñ'ka' nakgake'ne' txen, na' bsheshlene' Pédrona', chi'ene':

—jKwas ka'lə, Satanás!, la' bi chajniilo' daa cheeni Chioza' gone', san de yell-liozan chajniilo'.

³⁴ Na' w̄ne Jesúza' beñ'ka' nakgake'ne' txen len beñ'ka' lle' na', na' chi'e:

—Shi no cheeni gake' nad' txen, chiya! w̄sanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa.

³⁵ La' beena' bi chzanile' yel' mban che'na', beenan' kwiayi', san beena' chzanile' yel' mban che'na' ni cha' na' ni che dill' wen dill' kob cha'na', beenan' gat' to yel' mban che' zejli kani. ³⁶ Bibi zjanayin gap beñ' yog'lol daa de yell-lioni, shi le' kwiayee. ³⁷ Na' aga zakii chixje' kwenche yisla yel' mban che'na'. ³⁸ Nottezə beena' chido'i w̄chebe' nombi'e nad' wa wi'e cho'a xtilaana' lao beñ' saaxyaka' beñ'ka' bi chon̄ilall' nad', ka'kzə nad', Beñ' Bsel' Chioza' Yell-lioni, yiyii yido'id' le' kat' yiyedlen' anjl cha'ka' na' zinsa' balaan̄ xen che Xa' Chioza'.

9

¹ Na' lekzka' golle' legake':

—Dii li nia' le', ba!-le lle'leni, ni mbanle ile'ile ka ch̄n̄abia'len Chioza' yel' wak xen che'na'.

Jesúza' biyake' nlla'lə

(Mt. 17:1-13; Lc. 9:28-36)

² Wde xop lla, Jesúza' wyaje' to lo yaa sibə, na' b̄chi'e Pédrona', Jacóbona' na'ch Juanna'. Na' lawe'ka' biyake' nlla'lə. ³ Na' xe'na' axt chep cheeni'n, na' biga zoa beñ' chibe'n xtil inleeb ka gokan. ⁴ Na' ble'gakile' Elíaza' na'ch dii Moiséza' chshaljlengake' Jesúza'. ⁵ Na' che' Pédrona' Jesúza':

—Maestro, jwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

⁶ Kon bi billet-lallee golle', daa chllebchgagake'. ⁷ Na' wze to bej bkwashaan legake', na' loo beja' w̄ne Chioza', chi'e:

—Beenin xiñaa, na' le chakidee. Li wzenag che'.

⁸ Na' ka bwiagake' gana' wle' beñ'ka' shon̄, stoz Jesúza' ze.

⁹ Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Beñ' Bsel' Chioza' Yell-lioni, ba bibane' ladj beñ' wetka'. ¹⁰ Na' daa golle' ka', ni to kono beñ' yoblə gollgake' daa ben ble'gakile', la'kzi w̄nabi ljwellgake', bi zejin daa golle' yibane' ladj beñ' wetka'. ¹¹ Na' w̄nabgakile' Jesúza', che'gake'ne':

—jBiče naz beñ'ka' chli' ch̄sedi leya' nan zigaate Elíazan' yiyed?

¹² Na' chi'e legake':

—Dii li, Elíaza' yide' zigaate yidgwee xnezi yog'lolte. ¿Abi nezile biçe Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gakzbani beñ' le'? ¹³ Na' nia' le', ba biyed Elíaza', na' bengakile'ne' daa nazan çhegake', kon ka na Cho'a Xtill' Chioza' gongake' che'.

Biyon Jesúza' to bi' yoo dii xiw'

(Mt. 17:14-21; Lc. 9:37-43)

¹⁴ Na' ka billingake' gana lle' beñ'ka' sto, beñ'ka' nakgake'ne' txen, na' ble'gakile' lle' beñ' zan inleeb kwite'ka', na' len bal beñ'ka' chli' chsedi leya' chakguedlengake' legake'. ¹⁵ Na' beñ'ka' lle' na' ka ble'gakile' Jesúza', bibangakile' na' wza'dogake' jawapgake'ne' chiox. ¹⁶ Na' chi'e legake':

—¿Bi çheyin chakguedlenile beñ'ka'?

¹⁷ Na' to beena' len ladj beñ'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoob' to dii xiw' na' chllonan ineb'. ¹⁸ Gattezə chdab' dii xiwaa choxa'n le'b' na' ch chchoonan le'b' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' beñ'ki nako' txen yibejgake' dii xiwaa yoob', per bi chakgake'.

¹⁹ Na' che' Jesúza' legake':

—¡Le' beñ' bi çajle'! ¿Zi' ka'k'tek chiyal' soalen' le'? ¿Zi' ka'k'tek chiyal' soid' le'? Li lljxi'shki' ni.

²⁰ Na' jwa'gake'b' lawe'na'. Na' ka ble'i dii xiwaa Jesúza', benan ka wyazb' shona'. Na' billeeb' lo yona' na' wbiç wtolb' na' wllia bllin'na' cho'abaa. ²¹ Na' wñabi Jesúza' xabaa, chi'e:

—¿Batrate wzolo chakb' ki?

Na' che' xabaa:

—Kana' nakteb' bi'do' chakb' ka'. ²² Na' zan shii ba bza' dii xiwaa' lo yi'na' na' loo nisa' kwençe witan le'b'. Na' shi wak yiyono'b', biyesh'lall'gachi neto' na' goklengach neto'.

²³ Na' che' Jesúza':

—¿Biçe nazo' shi wak'?, la' beena' chonlilal' Chioza' aga bi dii lallj gat' che'.

²⁴ Na' besyaa xabaa, chi'e:

—Chonlilallaane'. ¡Goklen nad' gonlilal'chee!

²⁵ Na' ka ble'i Jesúza' ba chdop chllag beñ' zan inleeb, na' bsheshlene' dii xiwaa, chi'en:

—Dii xiw', lin' chono' kwençe bi cheni bi'ni ni bi chak ineb', nad' nia' li', bichej, na' bich gak yiyoo sto shii.

²⁶ Na' besyaa dii xiwaa, na' bxizan le'b' zibia' wal na' bichejan, na' gotb' ka bi' wet. Na' beñ' zan wñagake': “Ba witb'.” ²⁷ Na' bex' Jesúza' na'ba' kwençe bisolleeb'.

²⁸ Na' ka biyoo Jesúza' to loo yoo, beñ'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

²⁹ Na' chi'e legake':

—Kwençe gak yichej dii xiw' ka dga, chiyal' soale wbas' na' we'lwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

³⁰ Na' biza'gake', na' bidegake' gana' mbani Galileana'. Na' Jesúza' bi goklallee no inēzi gan zoagake' ³¹ daa chzajniile' ben'ka' nakgake'ne' txen. Na' chi'e legake':

—Nad', Ben' Bsel' Chioza' Yell-lioni, gon ben' nad' lo na' ben' malka' na' witgake' nad', na' ka gak shon' lla, yiban' ladj ben' wetka'.

³² Na' bi wyajni'gakile' daa chi'e legake', na' bi biyaxjgakile' inabgakile'ne' biçe che'ze' ka'.

¿Noran zak'chi?

(Mt. 18:1-5; Lc. 9:46-48)

³³ Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi çeyin chakguedzle shlak zingoocho neza'?

³⁴ Na' ni togake' bi wne, daa gokguedgake' che noyen'gaken' nak ben' zak'chi. ³⁵ Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiyal' gon kwinqe ka wen llin che ben'.

³⁶ Na'ch bzoe' to bi'do' ladj'e'ka'. Na' blene'b' chi'e legake':

³⁷ —Nottezə ben' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'.

Beena' bi chakzbani cho', txenkzan nake' cho'

(Lc. 9:49-50; Mt. 10:42)

³⁸ Na' che' Juanna' le':

—Maestro, ba ble'into' to ben' chzetje' lio'na' kwençe chibeje' dii xiw'ka' yoo ben' na' blonnto' gone' ka', la' bi nake' cho' txen.

³⁹ Na' che' Jesúza':

—Bi wllonle gone' ka', la' beena' chzetj lia'na' kwençe chone' yel' wak, aga wak inie' zban çha'. ⁴⁰ La' beena' bi chakzbani cho', txenkzan nake' cho'. ⁴¹ Na' nottezə beena' gone' le' la'çh' lat' nis yeejle daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

⁴² 'Nottezə beena' gon ka ibix to ben' zi' chzolo chonlilallee nad', naklan wen wwal'gake' yene'na' to yaj che molinna' na' lljazal'gake'ne' loo nisdona' aga ka daa gone' ka ibix ben' lao dii mala'. ⁴³ Na' shi noona' chonan ka ibix' lao dii mala', bçhogan. Wenchlan bi de noona' tlaa yillino' kwit Chioza' aga ka daa yiyaj doxentio' lo yi' gabiła' daa biga yiyol, ⁴⁴ gana' ni bzogaa bi chet ni biga chiyol yi'na'. ⁴⁵ Na' shi ni'ona' chonan ka chono' to dii mal, bçhogan. Wenchlan bi de ni'ona' tlaa yillino' kwit Chioza' aga ka daa yiyaj doxentio' lo yi' gabiła', ⁴⁶ gana' ni bzogaa bi chet ni biga chiyol yi'na'. ⁴⁷ Na' shi jalawo'na' chonan ka chono' to dii mal, wlejan. Wenchlan bi de jalawo'na' tlaa yillino' gana' zoa Chioza' chnabi'e aga ka daa yiyaj doxentio' lo yi' gabiła', ⁴⁸ gana' bi chet bzogaa ni biga chiyol yi'na'.

⁴⁹ 'Ka yog'te diika' chzangakile' choe'gake' Chioza' chgoogake'n zed', ka'kzan yog'te ben'ka' nonlilall' nad' yen ile'gakile' yel' zak'zi'na' yell-lioni. ⁵⁰ Zedaa nakan dii wen, per shi bich nakan xzi', aga wakch yiyonchon xzi' dii yoblə kwençe wchinchon. Chiyal' soalen ljwell-le mbalaz, na' shi gonle ka', nakle ka yel' wao daa yoo zed' na' sian.

10

Bi chiyal' yilaa beṅ'ka' nshagna'

(Mt. 19:1-12; Lc. 16:18)

¹ Biza' Jesúza' Capernaúma' ziyaje' gana' mbani Judeana' na' lo yell-liona' daa de shḷaa yao Jordánna'. Na' bizdi'a bizllag beṅ' zan lawe'na' na' wzoloe' chli' chsedile' legake' kon ka ba yooloe' chone'. ² Na' baḷ fariseoka' wbig'gake' lawe'na', na' kwenḷhezə wchixgake'ne' wṅabgakile'ne' shi de lsens yilaa xool beṅ'. ³ Na' chi'e legake':

—¿Bin bllia dii Moiséza' bia' gonle?

⁴ Na' che'gake'ne':

—Dii Moiséza' bi'e latj yichoon beṅ' byona' xoolo'na' na' wi'ene' to yish daa cho'e dill' ba bilaagake'.

⁵ Na' che' Jesúza' legake':

—Dii Moiséza' bllie' bia' gonle ka' daa nakle beṅ' widenag. ⁶ Per dii nech ka wxe wzil yell-lioni, Chioza' “bene' beṅ' byona' na'ch noola.” ⁷ “Daan, beṅ' byona' wlee xaxṅeena' kwenḷhe soalene' xoolo'na' ⁸ na' gaggake' toz.” Na' bich nakgake' chop, san ba nakgake' toz. ⁹ Na' beṅ'ka' ba non Chioza' toz, ni to beṅ' yell-lio bi chiyal' yilee legake'.

¹⁰ Ka billingake' yoona' gana' zoagake', beṅ'ka' nakgake'ne' txen wṅabgakile'ne' cheyi daa golle' ka'. ¹¹ Na' che' Jesúza' legake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chdalene' nool yoblə. ¹² Na' shi noola' yilee beṅ' che'na' na' yikee beṅ' yoblə, chone' ka beena' zoakzə beṅ' che' na' chdalene' beṅ' yoblə.

Jesúza' chonleeye' bi'do'ka'

(Mt. 19:13-15; Lc. 18:15-17)

¹³ Na' baḷ beṅ' jwa'gake' bi'do' che'ka' lao Jesúza' kwenḷhe wxoa neena' yichjb'ka' na' gonleeye' legakb'. Na' beṅ'ka' nakgake'ne' txen wzologake' chsheshlengake' beṅ'ka' zjwa' bi'do'ka'. ¹⁴ Na' ka ble'i Jesúza' chsheshlengake' beṅ'ka', bllie na' chi'e legake':

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'. ¹⁵ Dii li nia' le', beena' bi yiyak yichjlall'do'ena' ka che bi'do'ki kwenḷhe inabia' Chioza' le', bi yilline' gana' zoa Chioza'.

¹⁶ Na' blene' bi'do'ka', na' bḷoa neena' yichjb'ka' na' benleeye' legakb'.

To bi' wew', bi' wni'a, bshaljlem' Jesúza'

(Mt. 19:16-30; Lc. 18:18-30)

¹⁷ Ka ba chiza' Jesúza' yigwee nez, bllindo to bi' wew' bḷhek' xibbaa lawe'na' che'bee:

—Maestro, li' nako' beṅ' wen. ¿Beran chiyal' gon' kwenḷhe gat' to yel' mban cha' zejli kaṅi?

¹⁸ Na' che' Jesúza' leḷ':

—¿Berache nazo' nad' beṅ' wen? Toz Chioza' nake' beṅ' wen. ¹⁹ Ba nezkzilo' daa nllia Chioza' bia' goncho: “Bi wito' beṅ', bi soaleno' nool bi nak nool cho', bi kwano', bi chiljlalloo bizə gon ino' che beṅ', ni bi siyoo, na' wdap balaan xaxṅoo.”

²⁰ Na'ch che'bee:

—Maestro, kana' naktia' bi' xkwid' chon' yog' diika'.

²¹ Na' bwia Jesúza' leḷ' kon yel' chaki, chi'e:

—Stozə daa chyallj gono': jayet' yog' dii de cho' na' be'n beŋ' yesh'ka', na' gat' to yel' shao' cho' yabana'. Na' da dino' nad'.

²² Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

²³ Na' bwia Jesúza' beŋ'ka' lle' na', na' chi'e beŋ'ka' nakgake'ne' txen:
—jLallj inleeb chonan che beŋ' wni'aka' we'gake' latj inabia' Chioza' legake'!

²⁴ Na' bibani beŋ'ka' nakgake'ne' txen daa golle' ka'. Na' chizi'e legake':
—Le' xiindawaa, chonan lallj che beŋ' wni'ana' yilline' yabana' gana' chnabia' Chioza'. ²⁵ Lobe'ch te to kamey to xan yesh' aga ka to beŋ' wni'a yilline' yabana' gana' chnabia' Chioza'.

²⁶ Ka bengakile' golle' ka', zizikli bibangakile', na' che' ljwellgake':
—¿Notg gak yillin lao Chioza', shka'?

²⁷ Na' bwia Jesúza' legake' chi'e:
—Ni to beŋ' yell-lío bi' gak gone' dga, per Chioza' aga bi' dii lallj che' de, la' yog'lolte chak gone'.

²⁸ Na' Pédróna' chi'ene':
—Neto' ba wlej yichjnto' yog'lol dii napnto' kwenche nonnto' li' txen.

²⁹ Na' che' Jesúza':
—Dii li' nia' le', nottezə beŋ' ba bzanile' no lille', no xaxnee, no beŋ' bishee, no beŋ' zane', no xiin xooole', no yell-lío che' ni cha' nad' na' ni che dill' wen dill' kob cha'na', ³⁰ lo yell-lioni Chioza' yiyo'ene' dii zanch ka diika' wlej yichje', no lille', no beŋ' bishee, no beŋ' zane', no xiine', no yell-lío che' la'kzi chiya dii wsak'zi' beŋ' le', na' illin lla gat' to yel' mban che' zejli' kaní. ³¹ Per beŋ' zan nakgake' beŋ' zakii' naa, wllin lla bich bi sak'gake', na' beŋ' zan bi nakgake' beŋ' zakii, wllin lla gagkake' beŋ' zakii.

De wyon shii Jesúza' cho'e dill' guete'

(Mt. 20:17-19; Lc. 18:31-34)

³² Ka ziyajgake' Jerusalénna', na' zillialo Jesúza' lao beŋ'ka' nakgake'ne' txen. Na' le' chibangakile', na' beŋ'ka' zinoch le' le' chleebgake'. Na' bche' Jesúza' beŋ'ka' shllin ka'lə' na' wzoloe' cho'e dill' lawe'ka' daa gak che', ³³ chi'e legake':

—Ba gokbe'kzile' ba ziyajcho Jerusalénna', na' nad', Beŋ' Bsel' Chioza' Yell-lioni, gongake' nad' lo na' bxo'zka' chnabia' na' beŋ'ka' chli' chsedi leya', na' wchoglogake' cha' guet' na' gongake' nad' lo na' beŋ' zit'ka'. ³⁴ Na' wtitjgakile' nad', na' wlla' xeneeka' nad', na' wit chingake' nad', na' witagake' nad'. Na' ka' gak shon' lla yiban' ladj beŋ' wetka'.

To dii wñab Jacóbona' len Juanna' lao Jesúza'

(Mt. 20:20-28)

³⁵ Na' Jacóbona' len Juanna', beŋ'ka' nak xiin Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

³⁶ Na' chi'e legake':

—¿Beran cheenile' gon' chele'?

³⁷ Na' che'gake'ne':

—We'gacho' latj kwe'nto' shlaa wej kwito'na' kat' solo inabi'o gana' de balaan xen cho'na'.

³⁸ Na' che' Jesúza' legake':

—Aga nezile' bin chñable. ¿Awzoile' wtil'-le ka yel' zak'zi'ka' idil' illag' na' gak chele ka gak cha'?

39 Na' che'gake'ne':

—Wzointo'n.

Na' che' Jesúza' legake':

—Dii li, wtil-le ka yel' zak'zi'ka' idil illag' na' gak chele ka gak cha'. 40 Per daa nale kwe'le shlaa wej kwitaa bi nak lo na' gona'n, san ben'ka' ba mbej Chiozan', gakan chegake'.

41 Ka beni ben'ka' zi shi, na' bllaagake' Jacóbona' na'ch Juanna'. 42 Na' wne Jesúza' legake', chi'e:

—Nezkzile ben'ka' chñabia' yell-lioni na' ben'ka' zakii chongake' byen chzenag ben' chegake'. 43 Per aga kan' chiya'l' gonle. Shi nole cheenile gake ben' mbejlawin chiya'l' gon kwinle ka wen llin che ben'. 44 Na' shi nole cheenile gake ben' zakii, chiya'l' gake ka ben' ndoo lla yel chone' xshin ben'. 45 La' nad', Ben' Bsel' Chioza' Yell-lioni, aga bid' kwenche gaken ben' nad', san bid' kwenche gaken ben' na' wi'a yel' mban cha'na' kwenche yisla' ben' zan lao saaxyana'.

Jesúza' biyone' ben' lcho'la' le Bartimeo

(Mt. 20:29-34; Lc. 18:35-43)

46 Na' bllingake' Jericóna', na' ka ba chichej Jesúza' yella' kon ben'ka' nalgake'ne' txen na' len ben' zanch zinogake'ne', na' chi' to ben' lcho' cho'a neza' cheenile' no we' le' mech, na' lie' Bartimeo, xiin to ben' le Timeo. 47 Na' ka benile' nan Jesús, ben' Nazaretan', wdena', na' wzoloe' chosyee, chi'e:

—jJesús, xiin dia che dii Daví, biyesh'lall'gachi nad'!

48 Na' ben' zan bsheshlengake'ne' daa chosyee, na' zizikli chosyaache', chi'e:

—jXiin dia che dii Daví, biyesh'lall'gachi nad'!

49 Na' wlez Jesúza' chi'e:

—Li inie'.

Na' wnegake'ne', che'gake':

—Btiplaloo, wzolla', ba chñie' li'.

50 Na' bza'lee ka'lə lechaa nxo'a kolleena' na' wzollee jsie' lao Jesúza'.

51 Na' wñabile'ne', chi'e:

—¿Bin cheenilo' gon' cho'?

Na' che' ben' lcho'la'ne':

—Maestro, cheenid' ile'id'.

52 Na' che' Jesúza'ne':

—Wak yiyajo'. Daa ba ben'li'laloo nad', ba biyakilo'.

Na' katena' lii ble'teile' na' wnoe' Jesúza'.

11

Ka billin Jesúza' Jerusalénna'

(Mt. 21:1-11; Lc. 19:28-40; Jn. 12:12-19)

1 Ka ba zoa yillingake' Jerusalénna', na' wdegake' gaozə gana' llia yell Betfagéna' na' yell Betániana', kwit Yaa Olívoza', na' Jesúza' bselee chop ben'ka' nalgake'ne' txen, 2 chi'e legake':

—Li shaj yella' daa llia gaozə, na' ka illinle na', ile'ile to burr chbando', ba konon' kwia, da'b yaga'. Na' wsell-leb wche'leb nilə. 3 Na' shi no inaz le': “¿Berache chsellzleb?”, na' ye'lene': “Xanchonan' chyalljile'b xtit, na' yiyontie'b.”

4 Na'ch wyaj beṅ'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

5 Na' beṅ'ka' lle' na' wṅabgakile' legake':

—¿Bin chonle? ¿Biḱe chsellzleb?

6 Na' gollgake' legake' daa goll Jesúza', na' be'gake' latj bḱe'gake'b.

7 Na' bḱoagake' xe'ka' koll' burra' na' jasangake'b lao Jesúza', na' wllie'b.

8 Na' beṅ' zan bshiljgake' xe'ka' tneza', na' zi baḷe' bḱhoggake' no zin na' wdixjgake'n tneza'.

9 Na' ka beṅ'ka' llialo lao Jesúza' ka beṅ'ka' nogake'ne', chosyaagake', nagake':

—iLi we'la'o Chioza! iGonleeyshga Xancho Chioza' beeni ba bselee!

10 iGonleeyshga Xancho Chioza' ye! wṅabia' ḱe beeni zee lo dia ḱe dii xoxzto'cho Davina! iLi da we'la'ocho Chioza' zoa yabana'!

11 Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len beṅ'ka' shllin, daa ba wlle'.

Bllaa Jesúza' daa bibi dii zix llia yag yixwewa'

(Mt. 21:18-19)

12 Na' betiyo ka biza'gake' Betániana', wdon Jesúza'. 13 Na' zit'lə ble'ile to yag yixwew llia xlaguinna', na' jawie' shi lekzka' llia yixwewa'. Na' ka blline' zeelo xlaguinna' llia, la' aga tiemp ḱe yixwew kana'. 14 Na'ch golle' yaga':

—iBatch kwio' dii gao beṅ'!

Na' beni beṅ'ka' nakgake'ne' txen ka golle'n.

Jesúza' bisheshe' beṅ'ka' chit' chde lesh' chyoodo'na'

(Mt. 21:12-17; Lc. 19:45-48; Jn. 2:13-22)

15 Na' ka billingake' Jerusalénna', Jesúza' wyo'e lesh' chyoodo'na' na' wzoloe' bishesh biḱeeṅe' beṅ'ka' chit' chde na' beṅ'ka' cha'o chzi'. Na' bishi'e mes ḱe beṅ'ka' chshaa mecha' na' bzoles bzolline' gana' chi' beṅ'ka' chit'gake' palomka'. 16 Na' bi bi'e latj no sho'lench dii wit' wdie' lesh' chyoodo'na'. 17 Na' wzoloe' chli' chsedile' beṅ'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te beṅ' lle' doxen lo yell-lioni nad’”, per le', ba nonzlen ka to ga chdop chllag wban.

18 Na' ka beni bḱozka' chṅabia' na' beṅ'ka' chli' chsedile' leya' ka wne', wzologake' wdiljall'gake' nak gongake' witgake'ne', daa le chllibgake'ne', la' yog' beṅ' chibangakile' ka chli' chsedile' legake'. 19 Na' ka gol, biza'len Jesúza' beṅ'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

20 Na' betiyo shzila' ka wdegake' gana' zoa yag yixwewa', ble'gakile' ba wbill axt loinna'. 21 Na' jadini Pédrone' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

22 Na' che' Jesúza' legake':

—Li gonlilall' Chioza'. 23 Dii li nia' le, nottezə beena' yee yaani: “Bkwaa ka'lə na' jsoa loo niso'na'”, na' bi gonḱhoplallee, san shajli'e, na' gak ka in'e'. 24 Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen. 25 Na' kat'ka' choe'lwill-le Chioza', li si'xen ḱe bish' ljwell-lena' shi bi chone' ḱele kwenḱe Xalena' beena' zoa

yabana' si'xene' saaxya cheleka'. ²⁶La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

Yel' wñabia' che Jesúza'

(Mt. 21:23-27; Lc. 20:1-8)

²⁷ Na' billingake' Jerusalénna' sto shii, na' shlak chda Jesúza' lesh' chyoodo'na', wbig' b'xozka' chñabia', len ben'ka' chli' chsedi leya' na' ben' golka' chñabia', ²⁸ na' che'gake'ne':

—Wnashki neto', ¿nora lsens cheyi chono' diiki? ¿No ben li' yel' wñabia'na' kwenche chono' diiki?

²⁹ Na' che' Jesúza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki. ³⁰ ¿Noran bsel' Juanna' kwenche bidchoe' ben' nisa'? ¿AChiozan' bseleene', anti ben' yell-liona'zan? Li inashki nad'.

³¹ Na'ch choe'len ljwellgake' dill', che'gake':

—Shi ye'chone' Chioza' bseleene', lobe' ine' cho': “¿Berache ki wyajle'le che', lla?” ³² Na' bite gag yize'chone' nozə beñaan bseleene'.

Bi biyaxjgake' ye'gake'ne' ka' daa bllebgake' ben' yellka', la' yog'zgake' yoo yichgake' Juanna' goke' to ben' wdixjee daa goll Chioza'ne'. ³³ Na' gollgake' Jesúza':

—Bi nezinto'.

Na' che' Jesúza' legake':

—Lekzka' nad', bi inia' le' no ben nad' yel' wñabia'na' chon' diiki.

12

Jempl che wen linka' ben'ka' nak ben' mal

(Mt. 21:33-46; Lc. 20:9-19)

¹ Na' wzolo Jesúza' bseesile' legake' to jempl, chi'e:

—To ben' biyaze' yag uva. Na' wlo'en leeja', na' benshawee gana' wsigake' uvaka', na' bene' to yoo sibə, gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. ² Na' ka bllin lla yishibgake' uvaka', bselee to wen llin che'na' lao ben'ka' chap yag uvaka' kwenche lljaxe' daa chidolee. ³ Per ben'ka' be'x'gake' wen llin che'na', na' bet wdingake'ne' na' bilaggake'ne' to ka che'. ⁴ Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'. ⁵ Na'ch bselee stoe', na' betgake'ne'. Na'tech bselee zanch ben' yoblə; na' balgake' bengakile' zibia', na' zi balgake' betgake'.

⁶ Na' ni chgaan bi'na' nakyen' xiine', bi'na' le chakile'. Na' bseleeb', la' gokile': “Wapgake' balaan bi' cha'ni.” ⁷ Na' ben'ka' nak lo na'gake' yag uvaka' che' ljwellgake': “Bi'nin gaki cheb' dga chapcho. Li da witchob', na' gakin checho.” ⁸ Na' be'x'gake'b' na'ch betgake'b' na' bibejgake' kwerp chebaa gana' lle' yag uvaka'.

⁹ Na' wñabi Jesúza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lio che'na' gana' lle' yag uvaka' lo na' ben' yoblə.

¹⁰ ¿Abigan' wlable Cho'a Xtill' Chioza'?, gana' na:

Yaja' daa bi wyoolall' wen yooka',
leyen'lannan' yaja' daa ba nchejcha yoon'a.

¹¹ Dgan ben Xancho Chioza' na' nakan to dii yibanicho.

¹² Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllebgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiyal' chixjgake' daa chñab ben' Rómaka'
(Mt. 22:15-22; Lc. 20:20-26)

¹³ Na' bsel'gake' lao Jesúza' bał fariseoka' na' zi bał ben'ka' nak Heródeza' txen, kwenchezə kweyjelgakile'ne' na' lljadaogake' xya che'. ¹⁴ Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiyał' chixjcho daa chñab beena' chñabia' Rómána', anti bi chiyal' chixjchon?

¹⁵ Na' gokbe'i Jesúza' aga do lall'gake'n che'gake'ne' ka', na'ch chi'e legake':

—¿Berache chyiljall'zle wchixle nad'? Li gonshki ni to mech kwenche ile'ida'n.

¹⁶ Na' be'gake'ne'n, na' che' Jesúza' legake':

—¿Nora cho'alawin na' no lein da' lee mechi?

Na' che'gake'ne':

—Che beena' chñabia' Rómanan'.

¹⁷ Na' che' Jesúza' legake':

—Na'len li we' beena' chñabia' Rómána' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wnabgakile' Jesúza' nak gak kat' yiban ben' wetka'
(Mt. 22:23-33; Lc. 20:27-40)

¹⁸ Na' wyaj bał saduceoka' lao Jesúza'. Na' daa nagake' bich yiban ben' wetka', wnabgakile'ne' dga:

¹⁹ —Maestro, ley daa bzej dii Moiséza' nan shi to ben' byo guete' na' yigaañ xoolle'na' wizeb na' kono xiingake' wzoa, ben' bisheena' chiyal' yikee nool wizeba' kwenche soa xiin dia che dii ben' bisheena'. ²⁰ Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa. ²¹ Na' ben' wchopina' bikee noola', na' lekzka' wite' na' kono xiine' wzoa. Na' ka'kzə gok che ben' wyonina'. ²² Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'. ²³ Na' kat' yiban ben' wetka', ¿norayen'en' gak ben' che noola', lla? la' gall bish'tegaken' wkaagake'ne'.

²⁴ Na' che' Jesúza' legake':

—Naklejjilen, daa bi nombia'le Cho'a Xtill' Chioza' ni yel' wak che'na'. ²⁵ Kat'ka' yiban ben' wetka', koch no ikaa ljwellin, ni koch no wit' wde xiinin, san yiyakgake' ka anjlka' lle' yabana'. ²⁶ Na' ka nak daa yiban ben' wetka', ¿abin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': “Nadaan Chios che Abrahamá', Isaaca', na'ch Jacoba'”? ²⁷ Na' bi nake' Chios che ben' wet, san nake' Chios che ben' ban. Dii xen inlleb naklejjile.

Daa llialach lao diika' bllia Chioza' bia' goncho
(Mt. 22:34-40)

²⁸ Na' beni to ben' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wnabile'ne':

—¿Beran lliachte nllia leya' bia' goncho?

²⁹ Na' che' Jesúza'ne':

—Daa lliáloté lao diika' nllia Chioza' bia' goncho, len daa na: “Li wzenag, le' ben' Israel, Xancho Chioza' zeelo nake' Chios. ³⁰ Goki Xano' Chioza' do yichj do lalloo, ax̄t ga zeelo chajniilo', na' do ka nak fuerz cho'na'.” ³¹ Na' de wchopina' nakan ka dii necha': “Chiyal' gakilo' bish' ljwello'na' ka chaki kwino'.” Bich de dii zak'chi ka diiki.

³² Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'. ³³ Na' daa gakicho Chioza' do yichj do lall'cho, na' ax̄t ga zeelo chajniicho, na' do ka nak fuerz chechona', na' gaki bish' ljwellchona' ka chaki kwincho, zak'chan aga ka yog'lołte bayix'ka' chitgake' na' chzeygake'b lao Chioza'.

³⁴ Na' ka gokbe'i Jesúza' kayen'nan billii beena' xtilleena', na' chi'ene':

—Zi lat'zə chyalljilo' kwenche in'abia' Chioza' yichjlall'do'na'.

Na' koch no biyaxji in'abchile'ne'.

Crístona' nake' xiin dia che dii rey Davina'

(Mt. 22:41-46; Lc. 20:41-44)

³⁵ Na' shlak chli' chsedi Jesúza' ben'ka' lesh' chyoodo'na', na' chi'e legake':

—¿Berache nazə ben'ka' chli' chsedi leya' nan Crístona', beena' ba mbej Chioza' in'abi'e, nake' xiin dia che dii Davina'? ³⁶ La' kwin dii Davina' bi'e dill' daa goll Espiritu che Chioza'ne', kana' wne':

Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li'.”

³⁷ Len kwin dii Davinan' golle' Crístona': Xan', ¿berache nazgake' Crístona' nake' xiin dia che dii Davina'?

Na' ben' zanka' ndop nllag bibagakile' xtilleena'.

Jesúza' chawe' xya che ben'ka' chli' chsedi leya'

(Mt. 23:1-36; Lc. 11:37-54; 20:45-47)

³⁸ Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'. ³⁹ Na' gana' chdop chllagcho choe'lwilcho Chioza' le chibagakile' kwe'gake' gana' chbe' ben'ka' zakii, na' ka'kzə chongake' ga de yel' wao. ⁴⁰ Na' lekzka' chkaatezgake' lill nool wizebka', na' kwenche ina ben' le shlichə zej ben'ki lao Chioza', chongake' ka choe'lwil Chioza' ssha nlləb. Na' daa chongake' ka', ba nakten ile'chgakile' yel' zi' walch.

Daa bzani to nool wizeb, bi'en Chioza'

(Lc. 21:1-4)

⁴¹ To shii chi' Jesúza' gaozə gana' chgoogake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen. ⁴² Na' bllin to nool wizeb, ben' yesh', wlo'e chop sintabdo'.

⁴³ Na' wne Jesúza' ben'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench. ⁴⁴ La' yog'gake' daa chichoanzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

13

Jesúza' bi'e dill' wllin lla kwiayi' yoodo'na'

(Mt. 24:1-2; Lc. 21:5-6)

¹ Ka chichej Jesúza' lesh' chyoodo'na', to ben'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

² Na' che' Jesúza' le':

—Ka nak yooki chwiale naa, wllin lla kwiayi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Lc. 21:7-24; 17:22-24)

³ Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wñabgakile'ne' to lezgake':

⁴ —Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

⁵ Na' che' Jesúza' legake':

—Bi we'le latj no siye' le'. ⁶ La' ben' zan ichej na' inazgake': “Nadaan Crístona”, na' ben' zan shajle'.

⁷ 'Na' ka yenile chak wdil' to ni to na', bi illeble. La' chonan byen gakgakan, per aga ba bllin lla te che yell-lionin. ⁸ La' yidil'-len ljwell yellka' na' ben' wñabia'ka' yidil'-len ljwellgake'. Na' zan latj gak bedxo', na' gat' wbin, na' kwe' wdil wishesh. Kat' ba chak diiki shinz chzolo ka nak daa yen ile'i ben' yell-liokin.

⁹ 'Wsak'gale, la' gongake' le' lall' na' ben'ka' chñabia' cho' ben' Israel, na' wit chingake' le' gana' chdop chllagcho choe'ljwillcho Chioza'. Na' daa nakle nad' txen, ljwa'gake' le' lao ben' wñabia' xenka' na' lao nochla ben'ka' chñabia', na' ka' gak we'le xtilaana' lawe'ka'. ¹⁰ Na' ka zi' te che yell-lioni, chiyal' illilj dill' wen dill' kob cha'na' doxen yell-lioni. ¹¹ Na' kat' ba zjwa'gake' le' lao ben'ka' chñabia', bi sele wñeyi bin ye'le legake', san daa wzajni Chioza' len' inele, la' aga tobia'lall'zlen inele, san Espíritu Sántonan' ine. ¹² Beena' zoa ben' bish' golje', leteze' gone'ne' lo na' ben'ka' witgake'ne', na' beena' zoa xiine', leteze' gone' xiine'na lo na' ben'ka' witgake'ne', na' bal' ben', xiine'ka'tezə gongake' xaxneeka' lo na' ben'ka' witgake' legake'. ¹³ Na' yog'zə ben' gakzbangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to yel' mban che' zejli kan.

¹⁴ 'Na' kat' ile'ile' ba zoa daa nak dii zban inlebb latja' gana' bi chiyal' soan, na'ch ben'ka' lle' Judeana' chiyal' wxonjgake' shajgake' lo yaaka'lə. (Le' chlable dga, li shajniin.) ¹⁵ Na' beena' llia koll' lille'na' ni bi gal' yiyetje' ljaleje' dii de loo lille'na'. ¹⁶ Na' beena' chda lyixaa, ni bich gal' yiyaje' lille'na' kwenche lljadoyoe' xe'na'. ¹⁷ nyesh'laz gak che noolka' noa' na' noolka' chwall' chxop llana' gak ka'! ¹⁸ Li inabi Chioza' bi gak dga kat'ka' chbe' dii zaga', ¹⁹ la' yel' zak'zi' wal inlebban nak daa yen ile'ile', daa konon' yen ile'kzi' dezd ka bxe bsil Chioza' yell-lioni axt naa, na' kat' ba wde gokan kochno yen ile'i ka len. ²⁰ Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' ben'ka' ba wleje' nakgake' lall' nee.

²¹ 'Na' kat' gak diika', shi no ina le': “Li wwia, ni ze Crístona”, wa ine', “Li wwia, na' zie’”, bi shajle'le. ²² La' wchej ben' siye'gake' inazgake': “Nadaan Crístona”, na' ben' chonz ka chyixjee daa che' Chioza'ne', na' wli'gake' no

yel' wak kwenche siye'gake' beñ', axt shel' wxegakile' siye'gake' beñ'ka' ba wlej Chioza' nakgake' lo nee. ²³ Wsak'gale. Ba bzenid' le' ka nak yog' diiki zi' gak.

Kat' yiyed Crístona' dii yoblá

(Mt. 24:29-35, 42-44; Lc. 21:25-36)

²⁴ 'Na' kat' ba biyoll wde yel' zak'zi'ka', lii yicholte lao wbillá' na' beo'do'na' bich wzeeni'n. ²⁵ Na' beljdo'ka' ixopgakan na' yog' diika' lliá xan yabana' inibgakan. ²⁶ Na' ile'gakile' nad', Beñ' Bsel' Chioza' Yell-lioni, zizaa ladj bejka' kon yel' wak choo yel' wak xen cha'na' na' balaan cha'na'. ²⁷ Na' wselaa anj' cha'ka' tap laate yell-lioni axt gana' zeelo chiyollan kwenche yitopgake' beñ'ka' nak lall' na'.

²⁸ 'Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'. ²⁹ Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni. ³⁰ Dii li nia' le', aga ba wit beñ'ki zoa naa kat' gak yog' diiki. ³¹ Yabana' na' yell-lioni te chegakin, san cho'a xtilaana' aga wde bi gak ka nan.

³² 'Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

³³ 'Li wsak', na' li se kwas, na' li we'llwill Chioza', la' bi nezile bat illin lla gakan. ³⁴ Nakan ka ben to beñ' ba zoa see shaje' to yell zit', na' golle' beñ'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen. ³⁵ Li se kwas, la' bi nezile bat yila' xan yona'; shi yilee chaldo'za, wa yilee chel, wa kat' chbell tezka', wa yilee cheeni'lesdo'. ³⁶ Shi tokonganə yilee na' yidolile' le' bich ze kwasle. ³⁷ Dga nia' le', lekzka' yog'lol beñaan chep' ka', li se kwas.

14

Wloogake' xnezin gox'gake' Jesúza'

(Mt. 26:1-5; Lc. 22:1-2; Jn. 11:45-53)

¹ Chyallj zi chop llazə gal' lni Paskwa', kana' chaogake' yetxtila' bi yoo levadúrana', na' bəoxka' chnabia' na' beñ'ka' chli' chsedi leya' biy-ijlall'gake' naklə siye'gake' Jesúza' kwenche gox'gake'ne' na' witgake'ne'.

² Na' che' ljwellgake':

—Bi gox'chone' lo lnina' kwenche bi wsees wcheencho beñ' yell.

Bwazj to noolə set zixá' yichj Jesúza'

(Mt. 26:6-13; Jn. 12:1-8)

³ Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix de nardo na' dii xen zakaan. Na' wdishje' yen lmeta' na' bwazje' set zixá' yichj Jesúza'. ⁴ Na' bal beñ'ka' lle' na' bllaagake', na' che' ljwellgake':

—¿Berache benditjz nooli set zixá'? ⁵ Shel' bet'chokle'n na' bi'e mecha' beñ' yesh'ka', la' zakaan che shon guiyoa lla che laxj beñ'.

Na' bsheshlengake' noola' daa bene' ka'.

⁶ Na' che' Jesúza':

—Bibi ye'lene'. ¿Berache chsheshlenzlene'? Daa ba bene' cha' nakan dii wen. ⁷ Ka nak beñ' yesh'ka', toshiizi soagake' ladjlana', na' wak gakenle legake' kat'ka' cheenile'; san nad', aga toshiizin soalen' le'. ⁸ Ka nak

nooli ba bene' daa zeelo gok bene'. Ba bwazje' nad' set zix̄a' kwenche gakshao'zega kwerp cha'ni kat' wkwash'gake' nad'. ⁹ Dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' chchebe' gone' Jesúza' lo na' ben' malka'

(Mt. 26:14-16; Lc. 22:3-6)

¹⁰ Na' Jud Scariota', beena' nake' txen ben'ka' shllin, wyaje' lao b̄oxzka' chñabia' kwenche gone' Jesúza' lo na'gake'. ¹¹ Na' ka golle' ka', bibagakile' na' b̄chebgake' we'gake'ne' mech. Na' wzolo Juda' chioe' nakan gone' kwenche gone' Jesúza' lo na'gake'.

Lle'na' zeelo wdaolengake' Jesúza'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' lla nech che lnina' kat' chaogake' yetxtila' daa bi n̄chix̄ə lev-adúrana', llana' chitgake' xil'do'na' chaogake' ln̄i Paskwa', ben'ka' nak Jesúza' txen w̄nabgakile'ne':

—¿Ga cheenilo' lljasini'anto' xshe' che ln̄i Paskwi?

¹³ Na' bselee chopgake', chi'e legake':

—Li shaj yell Jerusaléna' na' yillagle to ben' byo zino'e to chee nis, na' lljanólene'. ¹⁴ Na' gana' yiyo'e, li yee x̄an yoona': "Maestrona' ne': ¿Garan zoa yoona' gana' gaolene' ben'ka' nakgake'ne' txen lle' ln̄i Paskwi?" ¹⁵ Na' wliile' le' to yoo xen dii lliá shkwia cha'lə ga ba nonshao'tie'. Na' nan' wsini'ale daa gaocho xshe'na'.

¹⁶ Na' wza' ben'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' ln̄i Paskwa'.

¹⁷ Na' ka gol billinlen Jesúza' ben'ka' shllin yoona'. ¹⁸ Na' shlak chi'gake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' ben'ka' chakzi' chakzbani nad'.

¹⁹ Na' gokyesh'gakile', na' wzolo to togake' chñabgakile'ne':

—¿Anadaan gon' ka', lla?

²⁰ Na' che' Jesúza' legake':

—Ladjleni, ka le' nakle shllin chleejlenle nad' yetxtila' loo yeeni, len beena' gon ka'. ²¹ Ka nak nad', Ben' Bsel' Chioza' Yell-lioni, wit ben' nad' ka na Cho'a Xtill' Chioza'. Per nyesh'laz gak che beena' gone' nad' lo na' ben'ka'. Naklan wen shel'ka' bi golje'.

²² Na' shlak chaogake', bex̄' Jesúza' yetxtila' na' bi'e Chioza' yel' chox̄ken, na' bxoxje'n na' bi'en legake', chi'e:

—Li gao dga. Lennan' kwerp cha'ni.

²³ Na' bex̄ee kopa', na' bi'e Chioza' yel' chox̄ken na' bdie'n lawe'ka' na' yog'lolgake' weejgake' daa yollan. ²⁴ Na' chi'e legake':

—Lennan' x̄chen'na' daa gon ka gak li dii koba' b̄cheb Chioza' gone'. Na' laljan kwenche gaklenan ben' zan. ²⁵ Dii li nia' le', bichga yeej' x̄is uvana' axt ki illin lla yeeja'n gana' chñabia' Chioza'.

Jesúza' golle' bi w̄cheb Pédrone' shi nombi'ene'

(Mt. 26:30-35; Lc. 22:31-34; Jn. 13:36-38)

²⁶ Na' ka biyoll belgake' be'la'ogake' Chioza', na'ch wyajgake' lo Yaa Olívoza'. ²⁷ Na' che' Jesúza' legake':

—Yog'le le' kwej yichjle nad'. La' Cho'a Xtill' Chioza' nan: “Wit' beena' chap xil'ka', na' guesles xil'ka' chape'.” ²⁸ Per kat' ba biban' ladj beṅ' wetka', na' yiyaa Galileana' lljalez' le'.

²⁹ Na' che' Pédrona'ne':

—La'kzi yog' beṅ'ki choonlall'gake' li', nad' bi gon' ka'.

³⁰ Na' che' Jesúza'ne':

—Dii li nia' li', naanyel ka zi' kwell teza' de wchop shii, shon shii wi'o dill' nan bi nombi'o nad'.

³¹ Na' zeyid Pédrona' chi'ene':

—La' guetlentia' li', biga inia' bi nombi'a li'.

Na' yog'zgake' che'gake'ne' ka'.

Be'lwil Jesúza' Chioza' gana' le Getsemani

(Mt. 26:36-46; Lc. 22:39-46)

³² Na' wyajgake' to latj gana' le Getsemani, na' che' Jesúza' beṅ'ka' nakgake'ne' txen:

—Nizə li kwe' shlak llje'lwil' Chioza'.

³³ Na' bchi'e Pédrona', Jacóbona', na'ch Juanna', na' wzoloe' chakyeshile' na'ch chakchgaile' dii wal inleeb. ³⁴ Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁵ Na' wzee zi lat' kwite'ka', na' bchek' xibe'na' lo yona' na' be'lwille' Chioza' chi'ene' shi wak ten ka'zə daa wtile'. ³⁶ Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

³⁷ Na' biyaje' gana' lle'gake' na' ble'ile' ba chesgake'. Na' chi'e Pédrona':

—Simón, ¿Aba cheson'? ¿Abikzə bchejlat'gailo' la'ch' tgor bi gueso'? ³⁸ Bi guesle, li we'lwil Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

³⁹ Na' wyaje' sto shii jelwille' Chioza', na' toz ka golle'ne'. ⁴⁰ Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'. ⁴¹ Na' ka billine' de wyon shii, chi'e legake':

—¿Ani cheskzle? Ba gok. Ba bllin gor nad', Ben' Bsel' Chioza' Yell-lioni, gak' lo na' beṅ' saaxyaka'. ⁴² Li chas. Li sho'. Ba za' beena' gone' nad' lo na'gake'.

Bex'gake' Jesúza'

(Mt. 26:47-56; Lc. 22:47-53; Jn. 18:2-11)

⁴³ Ni choe'te Jesúza' dill' ka bllin Juda', beena' wlen beṅ'ka' shllin, lene' ben' zan beṅ'ka' bsel' bxoza' chnabia' len beṅ'ka' chli' chsedi leya' na'ch beṅ' golka' chnabia', nox'gake' spad, na' no yag. ⁴⁴ Na' Juda', beena' bene'ne' lo na' beṅ'ka', ba be'le' dill', chi'e:

—Beena' wnop', len' gox'le, na' wche'lene'.

⁴⁵ Na' ka bllingake', jabiguae lao Jesúza' na' chi'ene':

—¡Maestro!

Na'ch bnop'e'ne'. ⁴⁶ Na' lii bex'tegake' Jesúza' bche'gake'ne'.

⁴⁷ Na' to beena' len na' wleje' spad che'na' bchogue' shlaa nag xmos bxoza' choo bxoza' xenna'. ⁴⁸ Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no beṅ' wban? ⁴⁹ Yog' lla wzoa' ladjlana' bli' bseidid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

50 Na' yog'lol ben'ka' ben Jesúza' txen wchoonlall'gake'ne' na' bxonjgake'.

Bi' xkwidaa bixonj

51 Na' to bi' xkwid' nob' le' ndobb' to lech'. Na' ka be'gake'b' 52 bsam' lechaa ndobb' na' bxonjb' gal'yidzb'.

Bdegake' Jesúza' lao ben'ka' chnabia' ben' Israelka'

(Mt. 26:57-68; Lc. 22:54-55, 63-71; Jn. 18:12-14, 19-24)

53 Na' jwa'gake' Jesúza' lao b'oz choo b'oz xenna', na' bdi'a yog'lol b'ozka' chnabia' na' ben' golka' chnabia' na'ch ben'ka' chli' chsedi leya'. 54 Na' zit' zit'lə jano Pédrona'ne' bllintie' lesh' lill b'oz choo b'oz xenna'. Na' wche'lene' ben'ka' chap yoodo'na' chbillgake' cho'a yi'na'.

55 Na' b'ozka' chnabia' na' yog'lol ben'ka' chnabia' ben' Israelka' lle' na' chiyiljyollgake' ga si' sengake' kwenche' wchoglogake' che Jesúza' guete', per bi' bllle' dii gao xya che'. 56 La'kzi ben' zan chiya de wxiye' che'gake' che', bi' bidili' cho'a dillaa choe'gake'. 57 Balgake' wzolla'gake' chziye'gake' na' chaogake' xya che', che'gake':

58 —Neto' ba beninto' ne': "Nad' wchinj yoodo'ni dga ben ben' yell-lioki. Na' ka gak shon' lla yilis' ston na' aga ben' yell-lionichan gone'n."

59 Na' la'kzi wxiye'gake', bi' bidili' cho'a xtilleeka'.

60 Na' b'oz choo b'oz xenna' wzollee ladj ben'ka' na' chi'e Jesúza':

—¿Abikz bi' ino' cheyi dga na' ben'ki cho'?

61 Na' Jesúza' wzie' lliz bibi gollkze'. Na' b'oz choo b'oz xenna' chizi'ene':

—¿Alin' Crístona', Xiin Chioza'?

62 Na' che' Jesúza'ne':

—Awe, nadaan. Na' ile'ile nad', Ben' Bsel' Chioza' Yell-lioni, chi'a de shli' che Chioza', ben' yel' wak choo ben' yel' wak xenna', na' lekzka' ile'ile' zizaa ladj bejka' ze xan yabana'.

63 Na' b'oz choo b'oz xenna' bsho' b'chez' xe'na' kwenche' chli'n nan le chlllee. Na' chi'e:

—Bich chyalljicho ben' gawe' xya che beeni. 64 Kwinle ba benile ka chnie' che Chioza'. ¿Nakra gonchon?

Na' yog'logake' b'choglogake' che' nan chiya' guete'.

65 Na' balgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' ben'ka' chap yoodo'na' wdap'gake' xague'na'.

Bi' b'cheb Pédrona' shi nombi'e Jesúza'

(Mt. 26:69-75; Lc. 22:56-62; Jn. 18:15-18, 25-27)

66 Na' Pédrona' zie' lesh' chyoo'na' de lli'lə ka bllin to noolə, ben' nak xmos b'oz choo b'oz xenna'. 67 Na' ka ble'ile' Pédrona' chbille' cho'a yi'na', na' wzie' chwie'ne' chi'e:

—Lenon' nako' txen Jesús, ben' Nazareta'.

68 Na' bi' b'cheb Pédrona', san chi'e:

—Bi' nombi'a beena', ni bi' nezid' bi' dillaan choo.

Na' bicheje' na' jazie' cho'a leeja'. Na' wchell to tez. 69 Na' ble'i noola'ne' sto shii, na' golle' ben'ka' sto:

—Beenin lene' ben'ka' nak Jesúza' txen.

70 Na' sto shii bi' b'chebe' nake'ne' txen. Na' ka gok zi shloll, ben'ka' lle' na' gollgake'ne' sto shii:

—Dii li' lenon' nako'ne' txen, la' nakbia' nako' ben' Galilea.

71 Na' Pédróna' wzoloe' chone' zñia, chi'e:

—Chioza' gone' yeł' zi' čha' shi chziye'zan nia' bi nombi'ane'.

72 Na' katena' lii wchellte teza' de wchop shii. Na' jadini Pédróna' daa goll Jesúza'ne': “Ka zi' kwell teza' de wchop shii, na' gak shon shii bi wčhebo' shi nombi'o nad'.” Na' wzoloe' chbelle'.

15

Bdegake' Jesúza' lao Pilátóna'

(Mt. 27:1-2, 11-14; Lc. 23:1-5; Jn. 18:28-38)

1 Na' ka wyeeni' bidi'a b̄xozka' chñabia' len beñ' golka' chñabia', na' beñ'ka' chli' chsedi leya' na'ch yog'loł beñ'ka' chñabia'gake' yell Israela'. Na' b̄chejgake' Jesúza' jwa'gake'ne' lao Pilátóna'. 2 Na' wñabi Pilátóna'ne', chi'e:

—¿Alin' nako' beñ' wñabia' čhe beñ' Israelka'?

Na' che' Jesúza'ne':

—Kan' ba wno'.

3 Na' b̄xozka' chñabia' dii zan dii chaogake' xya čhe'. 4 Na' che' Pilátóna'ne' sto shii:

—¿Abibi inakzo'? Bwialat', dii zan dii chaogake' xya čho'.

5 Na' bibi goll Jesúza'ne'. Na' bibani Pilátóna' daa bibi golle'ne'.

Bchoglogake' guet Jesúza'

(Mt. 27:15-31; Lc. 23:13-25; Jn. 18:38–19:16)

6 Na' kat' chal' Inina', Pilátóna' chisane' to beñ'ka' nseje' lillyana', beena' inab beñ' yellka' wsane'. 7 To beñ' le Barrabás die' lillyana' len beñ'ka' benlene' xyana' daa b̄xegake' wdila'. 8 Na' bdi'a bllag beñ' yellka', na' che'gake' Pilátóna' gone' ka chonkze' yog' yiz. 9 Na' che' Pilátóna' legake':

—¿Acheenile yisan' beñ' wñabia' čheleni, le' nakle beñ' Israel?

10 La' chakbe'ile' nan b̄xozka' chñabia' daa chakxe'zgakile'nen' jwa'gake'ne' lawe'na'. 11 Na' b̄xozka' chñabia' bta b̄negake' beñ'ka' lle' na' kwenče inabgake' yisane' Barrabáza'. 12 Na' che' Pilátóna' legake':

—Na' bera cheenile' gonid' beena' nale nake' beñ' wñabia' čhele, le' beñ' Israel.

13 Na' besyaagake' che'gake':

—¿Bdee lee yag cruza'!

14 Na' che' Pilátóna' legake':

—¿Bera dii malan' bene'?

Na' zizikli besyaagake' che'gake':

—¿Bdee lee yag cruza'!

15 Na' daa goklall' Pilátóna' yigaane' wen lao beñ'ka' lle' na', bisane' Barrabáza'. Na' bene' mandad wit čhingake' Jesúza', na'tech bene'ne' lo na' beñ'ka' wda'gake'ne' lee yag cruza'.

16 Na' b̄che' soldadka' Jesúza' lesh' chyoona' gana' chon Pilátóna' yeł' joschisa', na' biti'a bishaggake' yog' soldadka' lle' na'. 17 Na' bwakw-gake'ne' to lech' xña, na' bengake' to b̄xoon de xis yesh' na' bllingake'n yichje'na' ka to corona. 18 Na' wzologake' chosyaagake' nagake':

—¿Soashga beñ' wñabia' čhe beñ' Israelka' mbalaz!

19 Na' wdingake' xisa' yichje'na', na' blaa xeneeka' le', na' bchek' xibe'ka' lawe'na' bengake' ka beṇ' chgwee balaan. 20 Ka biyoll btiitj-gakile'ne', bikwasgake' lech' xṇana' daa bxoagake' kolleena' na' biwak-wgake'ne' xe'na'kzə. Na' wlejšgake'ne' kwenche lljada'gake'ne' lee yag cruza'.

Bda'gake' Jesúza' lee yag cruza'

(Mt. 27:32-44; Lc. 23:26-43; Jn. 19:17-27)

21 To beṇ' yell Cirene lie' Simón, xa Alejándrona' na' Rúfona', zizee lyixaa. Na' ka billague' legake', bengake' byen bi'e yag cruz che Jesúza'.

22 Na' bche'gake' Jesúza' latja' le Gólgota, na' zejín: Latj che llit yichj ben' wet. 23 Na' bshabgakile'ne' vino daa nchixə mírrana', per bi weeje'n. 24 Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yidoł' to togake'.

25 Na' chida ga kana' bda'gake'ne' lee yag cruza'. 26 Na' yichj yag cruz che'na' bda'gake' to dii cho'en dill' biče nda'gake'ne' lee yag cruza', nan: "Beenin ben' wṇabia' che beṇ' Israelka'." 27 Na' bda'lengake'ne' chop beṇ' wban, toe' wda' kwite' de shlina', na' stoe' kwite' de robesaa'. 28 Na' billinin ka na Cho'a Xtill' Chioza' daa nan: "Ble'gakilene' ka to beṇ' mal."

29 Na' beṇ'ka' chde na', chnelegakile'ne', na' chta yichje'ka' che'gake':
—iLin' wnzao' yichinj'o' yoodo'na' na' lo shon llazə yiyono'n, 30 bislashki kwino' na' biyetj lee yag cruza'!

31 Na' lekzka' chon bxožka' chṇabia' len beṇ'ka' chli' chsedi leya', chnelegakile'ne', che'gake':

—Beṇ' yoblə gok bisle', na' bi chak yisla kwine'. 32 Shi leile' len' Crístona', beṇ' wṇabia' chechona', cho' beṇ' Israel, yiyetjshkile' lee yag cruza' ṇaa kwenche ile'teicho na' shajle'cho che'.

Na' axt len beṇ'ka' da'lene' lee yag cruza' chnelegakile'ne'.

Ka wit Jesúza'

(Mt. 27:45-56; Lc. 23:44-49; Jn. 19:28-30)

33 Ka bllin gobill, doxen yell-liona' bičhoł, bllinte chida shon. 34 Na' chida shon besyaa Jesúza' zillj, chi'e:

—Eloí, Eloí, ¿lama sabactani? —na' zejín: Chios čha', Chios čha', ¿biče ba wlej yichjzo' nad'?

35 Na' bał beṇ'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

36 Na' zejdo toe' na' bleeje' to dii chzi' nisa' gana' yolla vino daa zichj zla' na' bzoe'n to lo xis kwenche bzoe'n cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

37 Na' besyaadia Jesúza', na'ch wite'. 38 Na' ka wite', lechaa ze loo yoodo'na' bcheza'n gokan choplə. 39 Na' beena' chṇabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

40 Lekzka' zi bał noolka' lle'gake' de zit'lə chwiagake'. Na' ladje'ka' len María beṇ' Magdálana', na' Saloména', na'ch María, beena' nak xna' Joséna' len Jacóbona', beṇ' neshaa. 41 Noolkin wnogake' Jesúza' na' goklengake'ne' kana' zoe' gana' mbani Galileana'. Na' lekzka' len zanch noolka' beṇ'ka' wyajlengake'ne' Jerusaléna'.

*Bkwash'gake' Jesúza'**(Mt. 27:57-61; Lc. 23:50-56; Jn. 19:38-42)*

⁴² Na' llana' gok ka' nakan llana' chsini'a beṇ' Israelka' che llana' chombaangake'. Na' ka goḷ, ⁴³ bllin José beṇ' Arimatéana', beena' nak txen beṇ'ka' chṇabia' beṇ' Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' jaṇabe' lsens yiletje' kwerp che Jesúza'. ⁴⁴ Na' bibani Pilátona' daa ba wite'. Na' goxe' beena' chṇabia' soldadka' kwenche inabilene' shi dii likzan ba witen'. ⁴⁵ Na' ka che' beena' chṇabia' soldadka' ba wite' na' wxenlallee, na' bi'e lsens biletj Joséna' kwerp che'na'. ⁴⁶ Na' wxi' Joséna' to lech' de lino na' biletje' kwerp che Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen. ⁴⁷ Na' María beṇ' yell Magdálana', na' María, xṇa' Joséna', chwiayen'gake' gana' jlo'ene'.

16*Biban Jesúza' ladj beṇ' wetka'**(Mt. 28:1-10; Lc. 24:1-12; Jn. 20:1-10)*

¹ Na' ka wde lla sabda', llana' chombaṇ beṇ' Israelka', María beṇ' Magdálana' len Saloména', na'ch María, xṇa' Jacóbona', wxi'gake' diika' chla' zix kwenche wlla'gake'n kwerp che Jesúza'. ² Na' lla nech che xmanna', shinzə chla' wbilldo'na', wyajgake' cho'a ba che'na'. ³ Na' ka zejgake' che' ljwellgake':

—¿Nora gaklen cho' wkwase' yaja' daa chi' cho'a ba che'na', lla?

⁴ Per ka bllingake', ble'gakile' bich chi' yaj xenna' cho'a bana'. ⁵ Na' ka wyoogake' loo bana', ble'gakile' chi' to beṇ' xkwid' de shli che bana' nakwe' to lech' llyish dii toṇ. Na' le bllib noolka'. ⁶ Na' chi'e legake':

—Bi illeble. Le' chiyilje Jesús, beṇ' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'. ⁷ Li ziyaj lao beṇ'ka' nakgake'ne' txen na' len lao Pédróna', na' li lljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

⁸ Na'ch bichej noolka' loo bana' ziyajdogake' axt chxiztitgake' daa le chllebgake'. Na' kono bi gollgake' daa le bllibgake'.

*Bli'lao Jesúza' María beṇ' yell Magdálana'**(Jn. 20:11-18)*

⁹ Na' ka biban Jesúza' ladj beṇ' wetka' lla nech che xmanna' shzildo', zigaate bli'lawe' María beṇ' yell Magdálana', beena' bibej Jesúza' gall dii xiw'ka'. ¹⁰ Na' Maríana' wyaje' lao beṇ'ka' wdalen Jesúza' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúza'. ¹¹ Na' ka beni beṇ'ki mban Jesúza' na' ba ble'teyi Maríana'ne', bi wyajle'gake'.

*Bli'lao Jesúza' chop beṇ'ka' nakgake'ne' txen**(Lc. 24:13-35)*

¹² Ka biyoll gok ka', chop beṇ'ka' nak Jesúza' txen ngoogake' nez zejgake' lyixaa, na' bli'lawe' legake' na' nake' nlla'lə. ¹³ Na' biyajgake' gana' lle' beṇ'ka' sto, jayellgake' legake' ba ble'gakile'ne', na' ni chegake' bi wyajle'gake'.

Jesúza' golle' beṅ'ka' nakgake'ne' txen we'gake' xtilleena' doxen lo yell-lioni

(Mt. 28:16-20; Lc. 24:36-49; Jn. 20:19-23)

¹⁴ Na' wdetect, bli'lao Jesúza' beṅ'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che beṅ'ka' ble'gakile'ne' ka wde bibane'. ¹⁵ Na' chi'e legake':

—Li shaj doxen yell-lioni, li lljtixje'i yog'lol beṅ' dill' wen dill' kob cha'na'. ¹⁶ Beena' shajle' na' choe' nisa', gat' yel' mban che' zejli kaṅi, san beena' bi shajle', chogbi'a kwiayee. ¹⁷ Na' diikin gon beṅ'ka' nonlilall' nad': wchingake' lia'na' yibejgake' dii xiwaa yoo beṅ'; na' inegake' dill' kob dii bi nombia'gake'; ¹⁸ na' shi gonzin gox'gake' no beḷ wa yeejgake' dii nak yierb, aga bi gакgакile'. Na' lekzka' wxoa neeka' yichj beṅ' we'ka' na' yiyakgакile'.

Biyep Jesúza' yabana'

(Lc. 24:50-53)

¹⁹ Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'. ²⁰ Na' beṅ'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúza' goklene' legake' bengake' yel' wakka' kwenche wyajle' beṅ' dillaa be'gake' nakan dii li.

Dill' wen dill' kob daa bzej Lúcaza'

Dga bzej Lúcaza' na' bseleen lao Teófilona'

¹ Ben' zan ba goklall'gake' wzejgake' to to diika' ba gok ladjnto'ni ² kon ka wna ben'ka' bli' bseedi neto', ben'ka' ble'gakile' daa gok dezd nech na' gok lo na'gake' be'gake'n dill'. ³ Na' ka'kz nad', ba wnabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, ⁴ kwenche inezilo' daa ba bli' bsedegakile' li' nakan dowalj dii li.

Wdixjee anjla' galj Juanna'

⁵ Kana' chnabia' rey Heródeza' gana' mbani Judeana' wzoa to ben' wlie' Zacarías, goke' toz bxoza' nonlen dii Abíaza'. Na' xoolo', Elizabeta', lezkka' goke' xiin dia che dii bxoza' Aarónna'. ⁶ Na' chop xooltie' chongake' wen lao Chioza', na' chongake' yog'lolte daa nllie' bia'. ⁷ Na' aga no xiingake' wzoa daa nak Elizabeta' nool will; na' ba naktegage' ben' gol.

⁸ Na' to shii ka bido! bxoza' nak Zacaríaza' txen gongake' xshin Chioza' daa nak lo na'gake', ⁹ bengake' to wyijt, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bido! Zacaríaza' gone'n. ¹⁰ Na' shlak chgwee llen yala' loo yoodo'na', ben' zan bgaan chyoolə choe'llwillgake' Chioza'. ¹¹ Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'. ¹² Ka ble'i Zacaríaza' anjla', bikzə bi billet-lallee gone' daa le bllebe'. ¹³ Na' anjla' chi'ene':

—Bi illebo' Zacarías, la' Chioza' ba bzenague' daa chnabilo'ne', na' xoolo' Elizabeta' sane' to xiino' na' wsi'ob' Juan. ¹⁴ Na' yibachgailo' kat' galjb', na' lezkka' ben' zan yibayi, ¹⁵ la' xiino'na' gakb' to ben' zakii lao Chioza'. Bi chiyal' wnixb' vino wa bichlə dii gonan ka sollib', na' Espiritu Sántona' soloe' inabi'e yichjlall'do'baa ka zi' galjləb'. ¹⁶ Na' yigoob' ben' zan xiin dia che Israela' lo xnez Chioza', beena' nak Xangake'. ¹⁷ Na' kwialob' lao Xanchona', na' soalen Espiritu che Chioza' leb' ka wzoalene' Elíaza', na' gapb' yel' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸ Na'ch che' Zacaríaza' anjla':

—¿Nakra gak inezid' shi lezkilo'n?, la' ba nak' ben' gol na' lezkka' nool cha'na'.

¹⁹ Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. ²⁰ Na' daa bi wyajli'o daa wnia' li', idap shi'ona'. Bich gak inio' axť kat'ch illin lla gak yog' dga ba wnia' li'.

²¹ Na' ben'ka' lle' chyoolə chbezgake' yichej Zacaríaza', goklejjgakile' daa wllaille' loo yoodo'na'. ²² Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³ Na' ka biyoll' ben Zacaríaza' daa lia bia' gone' yoodo'na', na'ch biyaje' lille'na'. ²⁴ Na' ka wde gok diiki, na' bia' xoolo', Elizabeta'. Na' lao gay'

beo' bichkzə ga bcheje', na' wne': ²⁵ “Xancho Chioza' ba goklene' nad' kwenche bich sia' yel' zto' lao ben'.”

Wdixjee anjla' galj Jesúza'

²⁶ Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana', ²⁷ gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. ²⁸ Na' wyoo anjla' gana' zoa Maríana' na' chi'ene':

—iChwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lolte nool.

²⁹ Na' Maríana' bibanile' daa golle'ne' ka', na' gokile' berache naz beeni nad' ka'. ³⁰ Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. ³¹ Na' naa woo to bdo' na' kat' galjb' na' wsi'ob' Jesús. ³² Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xozxto'b' Davina' ³³ kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴ Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

³⁵ Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios. ³⁶ Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e. ³⁷ Aga bi de dii bi chak gon Chioza'.

³⁸ Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹ Na' llii wza'te Maríana' wyaje' to yell dii llia yaa yao che Judeana'.

⁴⁰ Na' blline' lill Zacariaza' na' bwape' Elizabeta' chiox. ⁴¹ Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena', ⁴² na' wñie' zillj, chi'ene':

—Chioza' ba benleeyche' li' ladj yog'lol nool, na' lekzka' bdo' cho'na'. ⁴³ ¿Nora nak' nad' zidwia'zə xna' Xan'na' nad', lla? ⁴⁴ La' kon ka bwapo' nad' chiox, llii bxit'te bdo' cha'ni loo li'ani daa chibaib'. ⁴⁵ Chakomba li' wyajli'o ka wna anjla', la' yog' daa wna Xanchona', aga wde bi gakan.

⁴⁶ Na'ch wna Maríana':

Do yichj do lallaa choe'lawaa Xancho Chioza'.

⁴⁷ Chibayi yichjlall'dawaani lao Chioza', beena' chisla nad'.

⁴⁸ Ba biyesh'lallile' nad' nak' xmose',

naa solo yog' ben' ine' nad': “Chakomba li'.”

⁴⁹ La' Chioza', beena' nap yel' wak choo yel' wak xen, ba bene' dii wen inlleb cha'.

Nake' liizelozi ben' li ben' shao',

⁵⁰ na' chiyesh'lallile' yog'te ben'ka' chall chllebgake'ne'.

⁵¹ Dii zakii nllle ba benlene' yel' wak che'na'.

Ba bchinj bselle' yog'lol daa nan gon ben'ka' chep cha'lall'.

⁵² Ba bikwase' yel' wñabia' che ben' wñabia'ka',

na' beṅ'ka' ble'gakile' nakzi, Chioza' ba bene' legake' beṅ' zakii.

⁵³ Na' beṅ'ka' chbiḷ chdon, ba bzhesh bzeljile' legake' kon dii wen dii shao' che'na',

na' bilague' beṅ' wni'aka' to ka cha'gake'.

⁵⁴ Ba goklene' cho' beṅ' Israel, cho' nakcho xmose',

na' toshiizi chiyesh'lallile' cho',

⁵⁵ kon ka bchebe' gone' che dii xozxto'cho Abrahamaa'

na' yog' beṅ' zizaak lo dia che'na'.

⁵⁶ Na' Maríana' bgaane' ka do shon beo' lill Elizabeta', na'ch bizee ziyaje' lille'na'.

Golj Juanna'

⁵⁷ Na' ka bllin lla wxan Elizabeta', wxane' to bi' byodo'. ⁵⁸ Na'ch ka wṅezi beṅ' wlill che'ka' na' beṅ' dialla che'ka', wyajgake' bibalengakile'ne' daa ba biyeshii Xancho Chioza' le'. ⁵⁹ Na' ka gokib' to xman, jloogake'b' seṅ daa ne' circuncisión, na' goklall'gake' wsi'gake'b' Zacaríasa' ka le xabaa. ⁶⁰ Na' che' xna'baa:

—iBi gakan! Juanan chiyal' wsi'nto'b'.

⁶¹ Na' gollgake'ne':

—¿Bi che wsi'zo'b' ka'? La' aga no dialla cho' le ka'.

⁶² Na'ch bengake' seṅ kwenche wṅabgakile' xabaa bi cheenile' wsi'e bdo'na'. ⁶³ Na'ch wṅabe' to yagla'do' kwenche bzeje'n, na' daa bzeje' nan: “Juanan wsi'nto'b'.” Na' yog' beṅ'ka' bibani. ⁶⁴ Na' lii gokte biṅe Zacaríaza', na'ch wzoloe' choe'lawee Chioza'. ⁶⁵ Na' beṅ' wlill che'ka' bllebgake' ka nak daa gok, na' yog' yellka' lle' ladj yaa yao che Judeana' wze dill' ka gok. ⁶⁶ Na' yog' beṅ'ka' beni ka gok, gokgakile':

—¿Noran gak bi'do'ni, lla?

Wnagake' ka', la' nakbia' zolen Xancho Chioza' le'b'.

Daa wna Zacaríaza'

⁶⁷ Na' Espiritu Sántona' wṅabi'e yichjlall'do' xab' Zacaríaza' na' bi'e cho'a xtill' Chioza', wne':

⁶⁸ Choe'lawaa Xanchona', beena' nak Chios checho, cho' beṅ' Israel, la' ba bide' ladjchoni, cho' nakcho beṅ' yell che', kwenche yisle' cho' lawi dii mala'.

⁶⁹ Na' ba bselee to beṅ' nap yel' wak xen yisle' cho',

na' zee lo dia che dii Davina', beena' gok xmose'.

⁷⁰ Ba chak ka bchebe' gone' kani'yi daa golle' dii beṅ'ka' wdixjee cho'a xtilleena', beṅ'ka' gok lall' nee.

⁷¹ Bchebe' yisle' cho' lao beṅ'ka' bi chle'shii cho', na' lao yog' beṅ'ka' chakzi' chakzbani cho'.

⁷² Na' golle' dii xozxto'choka' yiyeshile' legake',

na' bi gal-lallee ka nak diika' bchebe' gone'.

⁷³ Ki nak daa bcheb Chioza' gone' che dii xozxto'cho Abrahamaa':

⁷⁴ Bchebe' yisle' cho' lao beṅ'ka' bi chle'shii cho'

kwenche we'la'ochone' na' bibi wwall wsheban cho',

⁷⁵ na' gon kwincho lall' nee na' goncho ka yiyoolallile' shlak mbancho.

⁷⁶ Na'ch Zacaríaza' chi'e bdo' che'na':

Na' li', xiindawaa, ina beṅ' li' beṅ' chyixjee daa na Chioza', beena' nak liizelozego' beṅ' choo beṅ' xen.

Na' kwialozego' lao Xanchona' kwenche wzenaggake' che' kat' zee.

⁷⁷ Wzenilo' beṅ' wlall chechoka' daa chiyal' gongake'

kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

⁷⁸ La' Chios chechona' chakile' cho' na' chiyesh'lallile' cho',

na' wselee to ben' za' yabana' nsee to beeni' che yichjlall'do' ben' yell-lioni

⁷⁹ kwenche sho' beeni'na' loo yichjlall'do' ben'ka' chda gani nak shgasj shchol ni che dii mala' daa nsa' yel' wit,

na' wliile' cho' nez li che'na' na' soacho mbalaz.

⁸⁰ Shlak bgol Juanna', ben Chioza'ne' ben' wal. Na' wzoe' to latj gana' bibi chashj chleb ax̄t ka bllin lla wzoloe' be'lene' ben' Israelka' cho'a x̄till' Chioza'.

2

Golj Jesúza'

(Mt. 1:18-25)

¹ Kana' chñabia' César Augústona', bene' byen ibab bal ben' lle' to to yell doxen yell-liona' gana' chñabi'e. ² Na' ka wbabgake' dii nech, beena' le Cirenio nake' gobernador che Síriana'. ³ Na' benan byen biyaj yog' ben' yell che chegake' kwenche jada' lie'ka'. ⁴ Na' daa nak Joséna' xiin dia che dii Davina', bizee yell Nazareta' daa lliia gana' mbani Galileana', na' biyaje' yell Belénna' gana' golj dii Davina', daa lliia gana' mbani Judeana'. ⁵ Na' kwenche ibabgake' biyaje' yell Belénna' len Mariana', beena' ba nakan ikee. Na' Mariana' ba no'e. ⁶ Na' shlak zoagake' Belénna', bllin lla sane'. ⁷ Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan ben'.

Jtixje'i anjla' ben'ka' chap xil'ka' ba golj Jesúza'

⁸ Na' lle'na' goljb', gaozə yell Belénna' lle' xonj ben' chapgake' xil' che'ka'. ⁹ Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllebgake'. ¹⁰ Na' che' anjla' legake':

—Bi illeble, la' zidtxje'id' le' dill' wen dill' koba' daa gonan ka yibach-gayi yog' ben'. ¹¹ La' naa yell che dii Davina' ba golj beena' yisla le' lao dii mala'. Na' len' Xancho Crístona', beena' chbezle wsel' Chioza'. ¹² Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

¹³ Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

¹⁴ jWe'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi Chioza' yel' goklen che'na'.

¹⁵ Na' ka biza' anjlka' ziyajgake' yabana', na'ch che' ljwell ben'ka' chap xil'ka':

—Li yidoshki Belénna', li sho' diwiashki daa ba gok, daa ba wdixje'i anjl che Xanchona' cho'.

¹⁶ Na'ch ziyajdogake' Belénna' na' bllingake' gana' zoa Mariana' len Joséna', na' bdo'na' deb' gana' chao bayix'ka'. ¹⁷ Na' ka biyoll ble'gakile'b', na' be'gake' dill' lao ben' wllal che'ka' daa goll anjla' legake' che bdo'na'.

¹⁸ Na' yog' ben'ka' beni ka wna wap xil'ka' bibangakile' ka dillaa be'gake'. ¹⁹ Na' Mariana' kon ka biyoll bzenague' dill'ka' na' bgaanan loo yichjlall'do'ena', na' gokile' bera zejín dga. ²⁰ Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

²¹ Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

²² Na' kon ka na ley che dii Moiséza' gongake', wlezgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. ²³ Bengake' ka, la' ley che Xanchona' nan: "Bi' byo nech che yog'lol ben', chiyal' gongake'b' lo na' Chioza'." ²⁴ Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

²⁵ Na' kana' jwa'gake' Jesúza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zoalen Espíritu Santo che Chioza' le'. ²⁶ Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbezgake' wsel' Xancho Chioza' kwenche inabi'e. ²⁷ Na' Espíritu Sántona'kz bseleene' yoodo'na', na' na' zie' ka bllinlen xaxna' Jesúza' leb' kwenche gongakile'b' ka na leya'. ²⁸ Na'ch blen Simeónna' leb' na' be'lawee Chioza', chi'e:

²⁹ Chios cha', be' latj guet' mbalaz naa,
la' ba beno' daa bchebo' gono' cha', nad' nak' xmoso'.

³⁰ La' ba ble'id' beena' yisla neto',

³¹ beena' ba bseloo lao yog'lol ben' yell-lioki.

³² Len' kwee beeni'na' loo yichjlall'do' ben'ka' bi nakgake' ben' Israel.

Na' gone' ka neto' ben' Israel sho'nto' balaan, neto' naknto' yell cho'.

³³ Na'ch Joséna' len xna'ba bibangakile' ka nak daa wna Simeónna' cheb'. ³⁴ Na'ch wnabi Simeónna' Chioza' gaklene' legake', na' chi'e Maríana', xna' Jesúza':

—Ba nchogbi'a Chioza' che bi'do'ni gom' kwenche zan ben' Israelka' kwiayi'gake' na' lekzka' zane' yila. Na' wliib' ben' ka nak yel' wak che Chioza', na' ben' zan inegake' zban cheb' na' bi shajle'gake' cheb', ³⁵ na'ch gakbia' ka chza'lall' ben' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

³⁶ Na' lekzka' yoodo'na' zoa to nool goldo', ben' chyixjee daa che Chioza'ne', na' lie' Ana. Nake' xiin dii Fanuela' na' xiin dia che dii Asera'. Ben' xkwid'ze' bshagnee, na' gall yizchga wzoalene' ben' che'na' ka wite'. ³⁷ Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal ka tella zoe' choe'lawee Chioza', na' tlizi chzoe' wbas' na' choe'lwille'ne'. ³⁸ Na' lekzka' wbiguee kwite'ka' na' bi'e Chioza' yel' choxken daa ba bselee beena' gaklene' ben' Israelka'. Na' bi'e dill' che Jesúza' lao ben' Jerusalénka', ben'ka' chbez wsel' Chioza' beena' yisla legake' lao dii mala'.

Biyajgake' Nazareta'

³⁹ Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. ⁴⁰ Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashajlem' ben' sin'ka' yoodo'na'

⁴¹ Xaxna' Jesúza' chajgake' Jerusalénna' yog' yiz kat' chal' lni Paskwa'.

⁴² Na' ka goki Jesúza' shllin yiz, wyajlengake'b' lnina' kon ka yoologake'.

⁴³ Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'. ⁴⁴ Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na'

ben'ka' nombia'gake' ⁴⁵ aga billelgakile'b'. Na' bibiigake' jadiljgake'b' Jerusalénna'.

⁴⁶ Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtilleeka' na' chnabib' legake' che daa choe'gake' dill'. ⁴⁷ Na' yog' ben'ka' chzenag xtill'baa chibangakile' yel' chajni chē'baa na' ka chilliib' xtill' ben'ka' chli' chsedi leya'. ⁴⁸ Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿biche benzilo' neto' ka? Xo'ni na' nad' ba gokshe-jlall'chgainto' biyiljnto' li'.

⁴⁹ Na'ch che' Jesúsza' legake':

—¿Biche chiyiljzle nad'? ¿Abi nezile chiyal' soa' lill Xa'na'?

⁵⁰ Na' aga wyajni'gakile' bi zejin daa gollb' legake'.

⁵¹ Na'ch Jesúsza' biyajlem' legake' Nazareta' na' bzenagb' chegake' toshi-izi. Na' xna'baa aga gol-lallee diika' gok. ⁵² Na' Jesúsza' zejch bgolb' na' wdapchb' yel' sin', na' Chioza' bibachile'b', na' lekzka' bibayi ben' leb'.

3

Juanna', beena' bchoa ben' nis

(Mt. 3:1-12; Mr. 1:1-8; Jn. 1:19-28)

¹ Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na' Heródeza' chnabi'e gana' mbani Galileana', na' ben' bishee Felípena' chnabi'e gana' mbani Ituréana' len Traconítana', na' Lisániaza' chnabi'e gana' mbani Abilíniana', ² na' Anáza' len Caifáza' nakgake' bxo'z choo bxo'z xen che ben' Israelka'. Na' kana'yen' wne Chioza' Juanna', xiin Zacaríaza', kana' zoe' to latj gana' bibi chashj chleb. ³ Na'ch wyaj Juanna' jte' doxen yell-liona' de cho'a yao Jordánna' na' wdixje'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'. ⁴ Bene' kon ka bzej dii Isaiáza' gana' nan:

To ben' gosyee latja' gana' bibi chashj chleb, na' ine':

“Li se kwas wzenagle che Xanchona'

na' wsalj yichjlall'do'leka' kat' zee.

⁵ La' le' gone' ka chon ben' chillee ga nak xitj yao,

na' ka ben' chchinj yaa kwenche chileshe'n.

Na' chilie' yog'lol' nez dii nyok nlew,

na' chillee xitjka' chi' lo neza'.

⁶ Na' yog'lol' ben' ile'gakile' ka gon Chioza' yisle' ben' lawi dii mala'.”

⁷ Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—jLe' naklikzle ka bel znia! ¿Achakile wak wxonjile' yel' zak'zi' daa wsel' Chioza'? ⁸ Li gon ka gakbe'i ben' nan dii li ba biyaj bilenile'. Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abraham'a.” Ni inia' le' axt yajki wak gon Chioza' xiin dia che dii Abraham'a. ⁹ Yog'lol'-le shi bi chonle ka chiyoolallii Chioza' na' gak chele ka chak che to yag dii choe' dii zix dii bi nak wen, na' lii chchogtegabe'n na' chzal'gabe'n lo yi'na'.

¹⁰ Na' ben'ka' chzenag xtill' Juanna' che'gake'ne':

—¿Beran chiyal' gonnto', shka'?

¹¹ Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

¹² Na' lekzka' bllin bal ben' wichixjka' kwenche wchoa Juanna' legake' nisa', na' wñabgakile'ne':

—Maestro, ¿beran chiyal' gonnto', shka'?

¹³ Na'ch che' Juanna' legake':

—Bi wchixjle dii xenchlæ ka to daa chiyal' wchixjle.

¹⁴ Na' lekzka' bal ben'ka' nak soldad wñabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble ben' kwenche ikaazle bi de che', ni bi wtobilene' dii bi nak ka'. Li gon banez laxjlæna'.

¹⁵ Na' ben' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'. ¹⁶ Na' Juanna' golle' legake':

—Zi' za' beena' napch yel' wak xench ka nad'. Na' nad' ni bi zakaa gak' xmose' kwenche wlechj' xele'na'. Nad' chchoa' le' nis daa chiyaj chilenile, san len' gone' ka yidsoa Espíritu Sántona' loo yichjlall'do'læna', na' ben'ka' bi chiyaj chileni, wselee legake' lo yi' gabiła'. ¹⁷ Na' daa gon Crístona' che ben' chzaklebin ka daa chon beena' nox' yag xoz' daa chpa'ile' trígonæ', na' yitope' trígonæ' kooshaween na' wzeye' beb cheyinna' lo yi'na' daa biga yiyolkzæ.

¹⁸ Kan' nak diika' bzajnii Juanna' ben'ka', na' dii zanch dill' dii be'lene' legake' kana' bi'e dill' wen dill' kob che Chioza'. ¹⁹ Na' Juanna' lekzka' bsheshlene' Heródeza', beena' wñabia' Galileana', daa bikee Herodíaza', xool ben' bishee Felípena', na' che bichlæ dii malka' ba bene'. ²⁰ Na'ch Heródeza' benche' bish' ljwell dii malka' ba bene' daa wlo'e Juanna' lillyana'.

Wchoa Jesúza' nisa'

(Mt. 3:13-17; Mr. 1:9-11)

²¹ Kana' chchoa Juanna' ben' nisa', len Jesúza' bchoe'n. Na' shlak choe'llwill Jesúza' Chioza', byalj yabana' ²² na' betj Espíritu Sántona' jsoalene'ne', na' ble'gakile' Espírituna' ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.

Ben'ka' nak dia che Jesucrístona'

(Mt. 1:1-17)

²³ Na' do shichoa yizi Jesúza' ka wzoloe' bene' yog' daa lliæ bia' gone'. Na' yog' ben' wnagake' xiin' Joséna'. Na' Joséna' goke' xiin' Elína', ²⁴ Elína' goke' xiin' Matata', Matata' goke' xiin' Levína', Levína' goke' xiin' Mélquina', Mélquina' goke' xiin' Jánana', Jánana' goke' xiin' Joséna'. ²⁵ Joséna' goke' xiin' Matatíaza', Matatíaza' goke' xiin' Amóza', Amóza' goke' xiin' Nahuma', Nahuma' goke' xiin' Éslina', Éslina' goke' xiin' Nagaina'. ²⁶ Nagaina' goke' xiin' Maata', Maata' goke' xiin' Matatíaza', Matatíaza' goke' xiin' Semeina', Semeina' goke' xiin' Joséna', Joséna' goke' xiin' Judána'. ²⁷ Judána' goke' xiin' Joánana', Joánana' goke' xiin' Résana', Résana' goke' xiin' Zorobabela', Zorobabela' goke' xiin' Salatiela', Salatiela' goke' xiin' Nérina'. ²⁸ Nérina' goke' xiin' Mélquina', Mélquina' goke' xiin' Ádina', Ádina' goke' xiin' Cosama', Cosama' goke' xiin' Elmodama', Elmodama' goke' xiin' Era'. ²⁹ Era' goke'

xiin Josuéna', Josuéna' goke' xiin Eliezera', Eliezera' goke' xiin Jorima', Jorima' goke' xiin Matata'. ³⁰ Matata' goke' xiin Levína', Levína' goke' xiin Simeónna', Simeónna' goke' xiin Judána', Judána' goke' xiin Joséna', Joséna' goke' xiin Jonánna', Jonánna' goke' xiin Eliaquima'. ³¹ Eliaquima' goke' xiin Meleana', Meleana' goke' xiin Mainána', Mainána' goke' xiin Matátana', na' Matátana' goke' xiin Natánna'. ³² Natánna' goke' xiin Davina', Davina' goke' xiin Isaína', Isaína' goke' xiin Obeda', Obeda' goke' xiin Booza', na' Booza' goke' xiin Salmónna', Salmónna' goke' xiin Naasónna'. ³³ Naasónna' goke' xiin Aminadaba', Aminadaba' goke' xiin Arama', Arama' goke' xiin Ezroma', Ezroma' goke' xiin Fáreza', Fáreza' goke' xiin Judána'. ³⁴ Judána' goke' xiin Jacoba', Jacoba' goke' xiin Isaaca', Isaaca' goke' xiin Abrahama', Abrahama' goke' xiin Taréna', Taréna' goke' xiin Nacora'. ³⁵ Nacora' goke' xiin Seruga', Seruga' goke' xiin Ragauna', Ragauna' goke' xiin Pelega', Pelega' goke' xiin Hebera', Hebera' goke' xiin Sálana'. ³⁶ Sálana' goke' xiin Cainánna', Cainánna' goke' xiin Arfaxada', Arfaxada' goke' xiin Sema', Sema' goke' xiin Noéna', Noéna' goke' xiin Lameca'. ³⁷ Lameca' goke' xiin Matusalénna', Matusalénna' goke' xiin Enoca', Enoca' goke' xiin Jareda', Jareda' goke' xiin Mahalaleela', Mahalaleela' goke' xiin Cainánna'. ³⁸ Cainánna' goke' xiin Enóza', Enóza' goke' xiin Seta', Seta' goke' xiin Adánna', na' Adánna' goke' xiin Chioza'.

4

Dii xiwaa goklalliin kooyela'n Jesúza' gone' ka cheenin

(Mt. 4:1-11; Mr. 1:12-13)

¹ Ka biza' Jesúza' cho'a yao Jordanna', Espiritu Sántona', beena' chñabia' loo yichjall'do'ena', bchi'ene' latja' gana' bibi chashj chleb. ² Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdane'. ³ Na'ch che' dii xiwaane':

—Shi leilo' nako' Xiin Chios, goll yaji yiyakan yetxtil.

⁴ Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵ Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yell-lioni. ⁶ Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. ⁷ Na' gona'n li' shi wchek' xibo'na' we'lawoo nad'.

⁸ Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹ Na'ch ka wde, bizche' dii xiwaa Jesúza' Jerusalénna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. ¹⁰ La' Cho'a Xtill' Chioza' nan:

Chioza' wselee anjl che'ka' gap wwiagake' li',

¹¹ na' gox'gake' li'

kwenche ki koo wchewo' yajka'.

¹² Na'ch che' Jesúza':

—Lekzka' na' Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

13 Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

Wzolo Jesúza' bi'e Cho'a Xtill' Chioza' Galileana'

(Mt. 4:12-17; Mr. 1:14-15)

14 Jesúza' billine' gana' mbani Galileana' ziyoochgue' yel' wak çe Espiritu Sántona', na' doxenə na' wze dill' daa chone'. 15 Na' chjali' chjasedile' ben' Israelka' gana' chdop chllaggake' choe'lwilgake' Chioza', na' yog' ben' nagake' le xochi cho'e dill'.

Billin Jesúza' yell Nazareta'

(Mt. 13:53-58; Mr. 6:1-6)

16 Na'ch biyaje' Nazareta', yella' gana' bgole'. Na' ka bllin lla sabda', llana' chombaən ben' Israelka', wyaje' gana' chdop chllaggake' choe'lwilgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'. 17 Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

18 Espiritu çe Xancho Chioza' zoalene' nad', na' Chioza' ba bzoe' nad' zidyelen' ben' yesh'ka' dill' wen dill' kob çe'na'. Ba bselee nad' kwenche zidtip' lall' ben'ka' chakyeshii yichjall'do'eka', na' zidtxje'id' ben' wak yisell yilaagake', na' gon' ka ile'i ben' lcholka', na' gaklen' ben'ka' chchi' chsak' ben' legake',

19 na' wi'a dill' ba bllin lla gaklen Xanchona' ben' yell-lioki.

20 Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'.

21 Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

22 Na' yog' ben'ka' lle' na' che' ljwellgake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiñ Joséna'?

23 Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lekzka' wnaljale nad': “Daa beninto' beno' Capernaúma' lekzka' benshkin lall' choni.”

24 Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' çe' yell çe'na'. 25 Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. 26 Na' bi bsele' Chioza' Elíaza' kwenche gaklene' nool wizebka' lle' ni, san bseleene' to yell zit' daa le Sarepta, daa llii gaozə yell Sidónna', gana' goklene' to nool wizeb zoa na'. 27 Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

28 Na' yog' ben'ka' lle' gana' chdop chllaggake' le bllaagake' daa wna Jesúza' ka'. 29 Na' lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal, goklall'gake' ljachixgake'ne'. 30 Per Jesúza' bicheje' ladje'ka' na' ziyaje'.

Bibej Jesúza' dii xiwaa yoo to ben'

(Mr. 1:21-28)

³¹ Jesúza' wyaje' Capernaúma', sto yell daa lia gana' mbani Galileana', na' bli' bsedile' ben'ka' lla sabda', llana' chombaan ben' Israelka'. ³² Na' bibangakile' ka chli' chsedi Jesúza', la' bli' bsedile' legake' lega ben' nap yel' wñabia'.

³³ Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

³⁴ —jwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li', na' neqid' nako' liizelozoi ben' li ben' shao' che Chios.

³⁵ Na'ch bsheshlen Jesúza' dii xiwaa, golle'n:

—jLizə wzoa! jBichej!

Na' chwiata ben'ka' bchix boto dii xiwaa beena', na' bichejan na' bikzə gayile' bi goki. ³⁶ Na' yog' ben'ka' lle' na' bibangakile', na' che' ljjwellgake':

—¿Naktekan nak cho'a xtil' beeni, lla? Ka chneze' chillsh dii xiw'ka' yoo ben' daa napchgue' yel' wñabia' na' yel' wak.

³⁷ Na' doxen na' wze dill' ka nak daa chon Jesúza'.

Biyon Jesúza' tobiin che Simón Pédrone'

(Mt. 8:14-15; Mr. 1:29-31)

³⁸ Na' biza' Jesúza' gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wñabgakile' Jesúza' gaklene'ne'. ³⁹ Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesúza' biyone' ben' zan

(Mt. 8:16-17; Mr. 1:32-34)

⁴⁰ Na' ka ba chxoa wbilla', ben'ka' lle' na' jwa'gake' lao Jesúza' ben'ka' chak wde wdeli yillwe'. Na' bxoā neena' to togake' na' biyakgakile'. ⁴¹ Na' bibeje' dii xiwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiin Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístona', beena' chbez ben' Israelka' wsel' Chioza' inabi'e.

Wda Jesúza' bi'e Cho'a Xtil' Chioza' Galileana'

(Mr. 1:35-39)

⁴² Ka wyeeni', bchej Jesúza' yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaanlene' legake'. ⁴³ Na'ch goll Jesúza' legake':

—Lekzka' chiya' chixje'id' ben'ka' lle' yell yoblə ka nak yel' wñabia' che Chioza', la' daan bselee nad'.

⁴⁴ Na' wda Jesúza' wdixji'e cho'a xtil' Chioza' to to gana' chdop chllag ben' Israelka' choe'ljwillgake' Chioza'.

5

Wxengake' bel' zan

(Mt. 4:18-22; Mr. 1:16-20)

¹ To shii bllin Jesúza' cho'a nido' che Genesareta' na' bllin ben' zan wal ax̄t bdakwyillgake'ne', daa cheengakile' wzenaggake' cho'a xtil' Chioza'. ² Na' ble'i Jesúza' chop barkw chigakan cho'a nido'na'. Ba bichej ben' wxen belka' na' ba chiyibgake' yixj che'ka'. ³ Na'ch wyoo Jesúza' loo barkw che Simónna', na' wñabile'ne' wllig' zilateen loo nido'na'. Na' wche' Jesúza'

loo barkwa' na' wzoloe' bli' bsedile' beṅ'ka'. ⁴ Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

⁵ Na'ch che' Simónna':

—Maestro, do yel ba bennto' llinna' na' ni tlish'b bi bdoḷinto', per shi kan' no', wzal'chnto' yixjki.

⁶ Na' ka bzal'gake' yixj che'ka', wxenan bel zan inleeb. Na' ka nan yibejgake' yixja' wzolo chcheza'n. ⁷ Na' blaa neeka' beṅ'ka' lle' loo barkwa' sto kwenche jaklengake' legake'. Na' ka bllin beṅ'ka', na'ch bissha'chagake' chopte barkwka' axt ba chakgakan ka dii kwe' yel. ⁸ Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' beṅ' saaxyaz nad'.

⁹ Golle'ne' ka' daa bibanile', na' ka'kzə beṅ'ka' lene' bibangakile' daa bdoḷ' bel' zan inleeb. ¹⁰ Na' lekzka' bibani Jacóbona' len Juanna' xiin Zebedewa', la' lengaken' nakgake' t xen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' beṅ' lao dii mala'.

¹¹ Na' ka billinlengake' barkwka' cho'a nisdona', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to beṅ' chake' yillwe' daa le lepra

(Mt. 8:1-4; Mr. 1:40-45)

¹² Na' shlak zoa Jesúza' to yell, bllin to beṅ' lawe'na' chak doxen kwerc che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nejid' wak yikwaso' yillwe'ni chak' shi cheenilo'.

¹³ Na'ch Jesúza' bxoə neena' yichj beena', na' chi'ene':

—Cheenid'x. Na' naate yikwasa'n.

Na' kon ka golle' ka' lii biyakteyi beena'. ¹⁴ Na'ch che' Jesúza'ne':

—Kono yoo ka ba beṅ' cho'. Lete wyaj lao bxoza' kwenche ile'ile' ba biyakilo', na' jwa' daa chiyaḷ' lljoo che Chioza' daa nllia dii Moiséza' bia' kwenche inezi beṅ' ba biyakilo'.

¹⁵ Na' la'kzi golle'ne' ka', zizikchli wzeyi che', na' beṅ' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'. ¹⁶ Per Jesúza' yooloe' chaje' ga kono beṅ' chak kwenche chjelwille' Chioza'.

Biyon Jesúza' to beṅ' net ni'a neena'

(Mt. 9:1-8; Mr. 2:1-12)

¹⁷ To lla ka chli' chsedi Jesúza', xonj fariseoka' na' beṅ'ka' chli' chsedi leya', na' beṅ'ka' za' yog' yellka' daa mbani Galileana' na'ch daa mbani Judeana' na' lekzka' beṅ' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' beṅ'ka' bi shao'. ¹⁸ Na'ch bllin to chop beṅ' nlengake' to beṅ' net ni'a neena' nxoagake'ne' to lo daa. Goklall'gake' sho'lengake'ne' loo yoonā' kwenche lljwa'gake'ne' lao Jesúza', ¹⁹ per bi gok sho'lengake'ne' daa nyichachga beṅ'ka' loo yoonā'. Na'ch wyepgake' koll' yoonā'lə na' bkwasgake' dexka' kwenche gok bletjgake'ne' do daa che'na' ladj beṅ'ka' lle' na' kwenche blline' lao Jesúza'. ²⁰ Na' ble'i Jesúza' le nxenilall'gake'ne', na'ch chi'e beṅ' we'na':

—Bish'dawaa, ba biyakxen saaxya cho'ka'.

21 Na'ch ben'ka' chli' chsedi leya' na' fariseoka' wza'lall'gake', chak-gakile': "¿Nora beeni chonz kwine' ka Chioza'? ¡La' toz Chiozan' chak chizi'xene' saaxya che ben'!"

22 Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'? 23 ¿Achakile chyalljchid' yel' wak xench yep' beeni: "Ba bizi'xen' saaxya cho'na'", ka daa yepee: "Biyas na' bigoo nez"? 24 Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.

Na'ch golle' beena' net ñi'a neena':

—Naa nia' li', biyas, bitob daa cho'na' na' biyaj lillo'na'.

25 Na' lii biyaste beena' chwiate ben'ka' lle' na', bitobe' daa che'na' bizee ziyaje' lill-le' choe'lawee Chioza'. 26 Na' yog'loj ben'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

27 Ka biza' Jesúza', na' ble'ile' to ben' wıchıxj lie' Levı, chi'e gana' chchıxjgake'. Na' chi'ene':

—Da, dino nad'.

28 Na'ch lii wzolla'te Levína', wlej yıchje' xshine'na' na' janoe' Jesúza'.

29 Na' Levína' bene' to lni xen che Jesúza' lille'na'. Na' wyaj ben' zan ben' wıchıxjka' na' zi bal ben' yoblə wdaogake' txen. 30 Na' fariseoka' na' ben'ka' chli' chsedi leya' wzologake' chakdıł-lengake' ben'ka' nak Jesúza' txen, che'gake':

—¿Berache cheej chaolenle ben' wıchıxjka' na' ben' malka'?

31 Na'ch che' Jesúza' legake':

—Beena' zoa shı'a shao' aga no wen rmech chyalljile', san beena' bi shawaan chyalljile'ne'. 32 Aga bid' ni che ben'ka' nak ben' li ben' shao', san bid' kwenche yep' ben' saaxyaka' chiyał' yiyaj yilengakile'.

Wñabgakile' Jesúza' che wbasaa

(Mt. 9:14-17; Mr. 2:18-22)

33 Na' wñabgakile' Jesúza', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi chzoagake' wbas' na' choe'lwillgake' Chioza'. Na' ¿berache ben'ki nakgake' li' txen bi chzoagake' wbas'?

34 Na' chi'e legake':

—Kat' de to yel' wishagna', aga wak gonle byen ben'ka' chdop chllag soagake' wbasaa shlak zoaengake' bi'na' chshagna'. Na' ka'kzan ben'ki nakgake' nad' txen, cheej chaogake' naa zoaalen' legake'. 35 Per wllin lla wkwas ben' nad' ladje'ka', kana'chan soagake' wbasaa.

36 Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wllıayee dii koba', na' dii gola' aga wñelebin lech' koba'. 37 Na' ni kono chгаа vinona' daa zi' chchejte to loo yid gola'. La' shi no gon ka', vino koba' wchezaan yid gola' na' chopten kwıayi'. 38 San vino koba' chiyał' shollan loo yid koba'. 39 Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

6

*Wdishjgake' do che trígona' lla sabda'**(Mt. 12:1-8; Mr. 2:23-28)*

¹ To lla sabd, llana' chombaañ ben' Israelka', wdelen Jesúza' ben'ka' nakgake'ne' txen to ga naz ben' trígona', na' ben'ka' zejlangake'ne' wzolo wdishjgake' trígona' na' wxobgake'n wdaogake'n. ² Na' bal' fariseoka' gollgake' legake':

—¿Biche chonzle daa bi chiyał' goncho llani chombaañcho?

³ Na'ch che' Jesúza' legake':

—¿Abiñ' wlable gana' cho'en dill' ka ben dii Davina' len ben'ka' nakgake'ne' txen ka wdongake'? ⁴ Wyo'e loo lill xlatj Chioza' na' wdooye' yetxtilka' daa naki che Chioza' daa toz b̄xozka' de lsens gaogake'. Na' lekzka' bi'en ben'ka' nakgake'ne' txen.

⁵ Na' lekzka' chi'e fariseoka':

—Nad', Ben' Bsel' Chioza' Yell-lioni, chñabi'a lao llani chombaañcho.

*Biyon Jesúza' to ben' lla sabda'**(Mt. 12:9-14; Mr. 3:1-6)*

⁶ Na' sto lla sabd, llana' chombaañ ben' Israelka', wyaj Jesúza' gana' chdop chllaggake' choe'łwillgake' Chioza' na' wzoloe' chli' chsedile' legake'. Na' ladj ben'ka' len to ben' net nee de shlina'. ⁷ Na' fariseoka' na' ben'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaangake', kwenche gaogake' xya che'. ⁸ Na' gokbe'i Jesúza' daa chza'lall'gake', na'ch golle' beena' net tlaa neena':

—Wzolla' na' wze gchola'.

Na'ch wzolla' beena', wzie' gchola'. ⁹ Na'ch goll Jesúza' ben'ka':

—Ni inabid' le': ¿Beran na leya' chiyał' goncho lla sabdka'? ¿Agoncho dii wenna' anti goncho dii mala'? ¿Ayislacho ben' anti witchone'?

¹⁰ Na'ch bwia Jesúza' legake', na' chi'e beena' net tlaa neena':

—Bli noona'.

Na'ch bli neena' na' biyakin. ¹¹ Na' fariseoka' na' ben'ka' chli' chsedi leya' le bllaagake' na' choe'gake' dill' nak ka gongake' che Jesúza'.

*Wlej Jesúza' postlka' shllin**(Mt. 10:1-4; Mr. 3:13-19)*

¹² Na' wyaj Jesúza' to lo yaa kwenche jelwille' Chioza', na' do yel be'łwille'ne'. ¹³ Ka wyeeni', goxe' ben'ka' nakgake'ne' txen na' ladj ben'ka' wleje' ben'ki shllin na' bsi'e legake' postl: ¹⁴ Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména', ¹⁵ Matewa', Tomásza', Jacobo xiin Alfewa', Simónna', beena' bsi'gake' Zelote, ¹⁶ Judas, ben' bish' Jacóbona'* na' Jud Scariota', beena' bene' Jesúza' lo na' ben' malka'.

*Bli' bsemi Jesúza' ben' zan**(Mt. 4:23-25)*

¹⁷ Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a nisdona' gana' mbani yell Tírona' na' yell Sidónna'. ¹⁸ Wyajgake' kwit Jesúza' kwenche wzenaggake' xtillena' na' yiyakgake' bi yillwe' dii chakgake'. Na' lekzka' biyaki ben'ka' chsak'zi' dii

* **6:16** Ben' bish' Jacóbona': ben'ka' nsed nagake' chiyał' inan xiin Jacóbona'.

x̄iw'ka' legake'. ¹⁹Yog'z beṇ' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' beṇ'.

Ben'ka' zoa mbalaz na' beṇ'ka' bi zoa mbalaz
(Mt. 5:1-12)

²⁰Na'ch bwia Jesúza' beṇ'ka' nakgake'ne' txen, na' chi'e legake':

—Chakomba le' nakle beṇ' yesh' daa chleble yel' wṇabia' che Chioza'.

²¹'Chakomba le' chbil chdonle naa; wllin lla yesh yeljile.

'Chakomba le' chbell-le naa; wllin lla yixill-le.

²²'Chakomba le' shi chakzbani beṇ' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to beṇ' wen dii mal ni cha', nad', Beṇ' Bsel' Chioza' Yell-lioni. ²³Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beṇ' dii xozxtoe'ka' beṇ'ka' wdixjee daa goll Chioza' legake' kani'yi.

²⁴'Nyesh'laz gak chele, le' nakle beṇ' wni'a, la'kzi le' wen chak chele naa.

²⁵'Nyesh'laz gak chele, le' de dii cheej chaole naa, la' wllin lla ibil idonle.

'Nyesh'laz gak chele, le' chytj chxill-le naa; wllin lla kwellyesh'le.

²⁶'Nyesh'laz gak chele, le' choe'la'o yog' beṇ' le', la' ka'kzə be'la'o dii xozxto'leka' dii beṇ'ka' benzə ka chyixjee daa che' Chioza' legake'.

Chiyal' gakicho beṇ'ka' chakzbani cho'
(Mt. 5:38-48; 7:12)

²⁷'Le' chzenagle naa, nia' le', li gaki beṇ'ka' chakzbani le'. Li gonigake' wen. ²⁸Li inabi Chioza' gone' ka gak wen che beṇ'ka' chyishj bia' blag' chele. Li inabi Chioza' gaklene' beṇ'ka' chiya dii nagake' chele. ²⁹Shi no kap' xag'lena' tlaa, li wze daa zi shlaa. Na' shi no koyo xachel-lena', li we'tega len xkamislēna'. ³⁰Nottezə beṇ' shi bi inabe' chele, li we'n. Na' ka', shi no ikaa bi de chele, bi yinabzilene'n. ³¹Li goni beṇ' kon ka cheenile gongakile' le'.

³²'Shi to beṇ'ka' nllagzile chakile, ¿garan de dii wenna' daa chonle? La' ka'klen chon beṇ' saaxyaka'. ³³Lekzka' shi to beṇ'ka' chonzi le' wen chiyonile wen, ¿garan de dii wenna' chonle? La' ka'klen chon beṇ' saaxyaka'. ³⁴Na' shi choe'le bi choe'le beṇ' daa nezile yigwee wzonna', ¿garan de dii wenna' daa chonle? La' ka'klen chon beṇ' ssaxyaka', choe'gake' bi choe'gake' daa nongake' lez wigoogake' wzon che'ka'. ³⁵Na' le', naalla, chiyal' gakile beṇ'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inezi beṇ' nakle xiin Chios, beena' nak beṇ' choo beṇ' xen, la' le' chone' wen che beṇ'ka' bi choe' le' yel' choxken na' beṇ' wen dii malka'. ³⁶Chiyal' yiyeshii ljwell-le ka chiyeshii Xacho Chioza' yog' beṇ'.

Bi wwia wyile bi chon beṇ'
(Mt. 7:1-5)

³⁷'Bi wwia wyile bi chon beṇ', kwenche bi gon Chioza' xya chele. Bibi wtobile' beṇ', kwenche bi gaple do! lao Chioza'. Li si'xen che ljwell-le, na' Chioza' si'xene' chele. ³⁸Li we' beṇ' bi chyalljile' na' Chioza' yiyone'n. Na' yiyonchle' dii xench, ka chon beṇ' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le beṇ' bi de chele, ka'kzan goni Chioza' le'.

³⁹Na' bzoa Jesúza' to jempl, chi'e legake':

—Nezicho bi gak to ben' l'chol' wchi'e sto ben' l'chol' la' choptegake' lljabixgake' to loo yech. ⁴⁰ Na' beena' chsed bi gak ine': "Chonch' ka beena' chli' chsedile' nad'." Kat'ch yiyoll yido wsede', kana'chan gake' ka beena' bli' bsdile'ne'.

⁴¹ '¿Biche chwiazoz' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴² Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Ben'shki yibej' bicha' yoo loo jalawo'na'?" ¿Ben' wxiye'! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa

(Mt. 7:17-20; 12:33-35)

⁴³ Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. ⁴⁴ Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. ⁴⁵ Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

Chop ben' bengake' twej yoo

(Mt. 7:24-27)

⁴⁶ '¿Berache nazle nad' "Xan', Xan'", na' bi chonle daa nia' le'? ⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'. ⁴⁸ Zaklebile' beena' ben to yoo. Zigaate wdene' zitz wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. ⁴⁹ Na' beena' cheni cho'a xtillaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliaiy'tekkan.

7

Biyon Jesús'a xmos xan soldadka'

(Mt. 8:5-13)

¹ Ka biyoll be'len Jesús'a ben'ka' dill', biyaje' Capernaúma'. ² Na' yella' zoa to ben' Roma ben' chnabi'e to guioa soldad, na' zoa to xmose' lille'na', beena' le' chakile', na' chake' to yillwe' dii chonan ka witan le'. ³ Na' ka beni xan soldadka' choe'gake' xtill' Jesús'a, na'ch bselee bal' ben' golka' chnabia' Israela' kwenche ljet'yogakile'ne' lljayene' beena' bi shao'. ⁴ Na' ka bllin ben' golka' kwit Jesús'a, got'yogakile'ne', che'gake':

—Xan soldadka' chidolee gakleno'ne', ⁵ la' le' chakile' cho' ben' Israel na' len' bene' yoona' gana' chdi'anto' choe'lwillnto' Chioza'.

⁶ Na'ch wyajlen Jesús'a legake'. Na' ka ba zoa yillingake' lille'na', xan soldadka' bselee bal' ben' nllaguile' kwenche jellgake' Jesús'a dill'ki:

—Xan', bi sio' wneyi yido', la' bi chidolaa shoo loo lillii. ⁷ Daan bi biyaxjid' yid' kwini' yidtil' li'. La'ch' to chop cho'a dill' shel' ino' na' yiyakile'. ⁸ La' zoa no chnabia' nad', na' lekzka' chnabi'a soldad cha'ka'. Na' kat' chep' toe': "Wyaj ni", na' chaje'. Na' kat' chep' stoe': "Da ni", na' chide'. Na' kat' chep' xmosaa: "Ben dga", na' chone'n.

⁹ Na' ka beni Jesús'a xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

10 Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmose'na'.

Bisban Jesúza' xiin to nool wizeb bi' ba wit

11 Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. 12 Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlis'h, na' xna'baa nake' noolə wizeb. Na' ben' zan ben' yellka' zjakwash'gake'b'. 13 Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

14 Na'ch jabigúee bexee gana' xoa bi' weta', na' wlez ben'ka' n̄lengake'b'. Na' golle' bi' weta':

—Bi' xkwid', nia' li', j̄biyas!

15 Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa. 16 Na' ka ble'i ben'ka' daa bene', yog'lołze' blleb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

17 Na' doxen gana' mbani Judeana' na' yellka' llia gaozə wnezzgakile' daa ben Jesúza'.

Ben'ka' bsel' Juanna' lao Jesúza'

(Mt. 11:2-19)

18 Na' ben'ka' nongake' Juanna' txen jayellgake'ne' yog' diika' chon Jesúza'. Na'ch Juanna' wnie' chope' 19 na' bselee legake' gana' zoa Jesúza' kwenche janabgakile'ne' shi leyen'en' beena' llia bia' yid wa shi chiyal' kwezgake' sto ben' yoblə. 20 Na' ka bllin ben'ka' bsel' Juanna' kwit Jesúza', che'gake'ne':

—Juanna', beena' chchoa ben' nisa', bselee neto' kwenche zidnabinto' li' shi li'yen'kzan nako' Cristona', beena' chbeznto' wsel' Chioza' kwenche inabi'e, wa shi chiyal' kweznto' stoe'.

21 Na' shlak zegake' na', biyon Jesúza' ben' zan ben' chak yillwe', na' lekzka' bibeje' dii xiw'ka' yoo ben', na' bene' ka ble'i ben' zan ben' l̄cholka'.

22 Na'ch che' Jesúza' ben'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' l̄cholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwelka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. 23 Chakomba beena' chajle' cha' na' bi chakchoplallee.

24 Na' ka biza' ben'ka' bsel' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? 25 Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezkzile ben'ka' nakw lech' dii zakii, na' naptégake' bittezə dii chzelall'gake', zoagake' lill ben' wñabia'ka', aga zoagake' latja' gana' bibi chashj chleb. 26 Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'. 27 La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',

na' chixji'e xtilloona' kwenche soa ben' wzenaggake' cho' kat' illino'.

28 Na' nia' le', lao yog'lo_lte be_n' yell-lioni, ni to konon' ichej be_n' zak'teche' ka Juanna'. Per nottezə beena' choe' latj in_abia' Chioza' loo yichj_lall'do'ena', zak'teche' ka Juanna'.

29 Na' yog'lo_l be_n'ka' bchoa Juanna' nisa', no be_n' wichixjka' na' zan be_n' yoblə, ka bengakile' daa wna Jesúza', gokbe'gakile' dill' li' dill' shao' nak cho'a xtill' Chioza'. 30 Na' fariseoka' na' be_n'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' chegake'. 31 Na'ch goll Xancho Jesúza' legake':

—¿Bi ka wsaklebid' le' mbanle naa? ¿No ka in_a' nakle? 32 Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' bllaja' na' bi byaale, na' be_n'to' dii chon nyesh', na' ni bi wchell-le.” 33 La' bid Juan wchoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.” 34 Na'ch bid' nad', Be_n' Bsel' Chioza' Yell-lioni, na' chle'ile cheej chaw', na' nale cha': “Le be_n' waoxat nak beeni na' cheejtie', na' nllagteile' be_n' saaxyaka' na' be_n' wichixjka'.” 35 Per yel' sin' che Chioza' chli'lawin ka nsa' che be_n'ka' chzenaggake' cheyin.

Jesúza' wyaje' lill Simónna', beena' nak fariseo

36 To fariseo wnie' Jesúza' kwenche gaogake' lille'na'. Ka blline' na' wchi'e cho'a mesa'. 37 Na' to noolə wda zoa yella', ka wnezile' zjtao Jesúza' lill farisewa', na'ch wyaje' noxee to lmet de yaj xochi na' yollan set zix. 38 De chbellzile' jabigee xni'a Jesúza' na' bisbisile' ni'ena' nis xchell che'na'. Na' bisbillile'n yish' yichje'na', na' bnop'e'n na' bwazje'n set zixa'. 39 Na' farisewa', beena' wnie' Jesúza' lille'na', ka ble'ile' ka chon noola', na' gokile': “Shel'ka' dii li' nak beeni to be_n' chyixjee daa che' Chioza'ne', wakbe'ile' nan nooli chox' ni'ena' nake' be_n' saaxya.” 40 Na'ch che' Jesúza' farisewa':

—Simón, de to dii cheenid' in_a' li'.

Na' che' Simónna':

—Wna, Maestro.

41 Na'ch che' Jesúza':

—Chop be_n' chbag'gake' mech che to be_n' chon yichjin. Toe' chbaguee gay' guioa mech plat*, na' stoe' chbaguee shiyonan. 42 Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no be_n'ka' chop gakchile'ne'?

43 Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

44 Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi be_n'o' nisa' kwenche chib ni'ani, per nooli ba wdbile' nis xchell che'na' ni'ani na' bisbillile'n yish' yichje'na'. 45 Bi bnop' nad', per nooli kon ka wyo'a chnoptezi chnopo' ni'ani. 46 Bi wdebo' yichjii set, per nooli ba bwazje' set zixa' ni'ani. 47 Daan nia' li', la'kzi dii zan saaxya ba ben nooli, ba biyakxengakan daa le chakchgaile' nad'. Na' beena' lat'zə biyakxen che', lekzka' lat'chga chakile' nad'.

48 Na'ch golle' noola':

—Ba biyakxen saaxya cho'ka'.

49 Na' be_n'ka' ch'lengake' Jesúza' txen wzologake' che' ljwellgake':

* 7:41 Mech plat: dill' griegona' nan denario, na' nakan to mech dii zak' che shlla llin.

—¿Nora beeni, lla, axt saaxyaka' chizi'xene'?

⁵⁰ Na' Jesúza' chi'e noola':

—Daa chonlilaloo nad', ba bilo' lao yeł' zak'zi'na'. Biyaj mbalaz.

8

Noolka' goklengake' Jesúza'

¹ Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chnabi'e loo yichjlall'do' ben'ka' chzenag che'. Na' postl che'ka' shllin chdalengake'ne' txen. ² Na' lekzka' len bał noolka' ba biyone'. Bałe' bibeye' dii xiw'ka' wyoogake', na' zi bałe' gokgake' yillwe' na' biyone' legake'. Na' ladje'ka' len Mariana', noola' nsi'gake' Magdalena, beena' bibej Jesúza' gall dii xiw'ka'. ³ Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' ben'ka' jano Jesúza' na' bçhingake' dii de chegake' kwenche goklengake'ne'.

Jempl che to ben' goz goon

(Mt. 13:1-9; Mr. 4:1-9)

⁴ Ben' zan bllesh to to yell jawiagake' Jesúza', na' ka bdop ben' zan wal na'ch bseesile' legake' to jempl, chi'e:

⁵ —To ben' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj ben' len, na' bllin byinka' wdaogakban. ⁶ Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. ⁷ Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan. ⁸ Na' zi balan bxop lo yo wenna', na' le bgolgakan na' axt do to guiyoa wej wllia to ton.

Na' ka biyoll bseese jempla', na'ch wñie' zilljə chi'e:

—Le' chenile dga nia', li sen wñeyi.

Bzajni Jesúza' biche chzoe' jemplka'

(Mt. 13:10-17; Mr. 4:10-12)

⁹ Na'ch wñab ben'ka' nakgake'ne' txen bi zejin jempla' daa bseese. ¹⁰ Na' che' Jesúza' legake':

—Chioza' cho'e latj inezile daa kono nezkzi, ka chnabi'e loo yichjlall'do' ben'ka' chzenaggake' che'. Na' ben'ka' sto chseesid' legake' shgal' jempl, la' la'kzi chle'gakile' bin chon', kon chongake' ka ben' bi chle'i. Na' la'kzi chengakile' bin nia', aga chajni'gakile'n.

Bzajni Jesúza' bi zeji jempl che ben' goz goona'

(Mt. 13:18-23; Mr. 4:13-20)

¹¹ 'Kin zeji jempl che ben' goz goona': cho'a xtill' Chioza' nakan ka binna' daa goze'. ¹² Na' zoa ben' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. ¹³ Na' zoa ben' chibagakile' chzenaggake' cho'a xtill' Chioza' na' chlebgake'n, per kat' chak bi chak chegake' na' chbej yichjgake'n. Chak chegake' ka gok che binna' bi bde loinna' daa bxopan lo yaja'. ¹⁴ Na' zoa ben' chzenague' cho'a xtill' Chioza', per chi'ch yichjgake' daa chak chegake' na' che yeł' wni'ana', na' che bichlə dii chzelall'gake', na' bi chakchagake' lo xnez Chioza'. Chak chegake' ka gok che binna' bxop ladj yag yesh'ka'. ¹⁵ Na' zoa ben' chzenaggake' cho'a xtill' Chioza' do yichj do lall'gake' na' chongake'

ka nan, na' chzo chzakgakile' bittezə dii chak chegake'. Ben'kin chak chegake' ka gok che binna' bxop lo yo wenna' daa le wllia.

Jempl che to kandil

(Mr. 4:21-25)

¹⁶ Biga zoa to ben' chxene' kandila' na' chdose'n to dii kwwashaan daa wa chzoe'n xan xlague'na', san chzoe'n sibə kwenche ile'i ben'ka' sho' loo yoona'. ¹⁷ Na' lekzka' yog'lofte dii ngash' naa, wllin lla yila' lawin, na' daa kono nezi naa, wllin lla inezi beanaan.

¹⁸ Li wzenag dga nia' le' naa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lofan yiyal-lallee.

Xna' Jesús'a' len ben' bisheeka'

(Mt. 12:46-50; Mr. 3:31-35)

¹⁹ Na'ch bllin xna' Jesús'a' len ben' bisheeka' gana' zoe', na' bi gok ibig'gake' kwite'na' daa lle' ben' zan. ²⁰ Na' wbig' to ben' golle' Jesús'a':

—Xnoona' len ben' bishooka' lle'gake' lesh' chyoonaa' na' cheengakile' wshaljlengake' li'.

²¹ Na' goll Jesús'a':

—Ben'ka' chzenaggake' cho'a xtil' Chioza' na' chongake' ka nan, legaken' nakgake' xna' na' ben' bishaa.

Jesús'a' bkweze' to be' wal lo niso'dna'

(Mt. 8:23-27; Mr. 4:35-41)

²² To lla wyoo Jesús'a' to loo barkw len ben'ka' nakgake'ne' txen na' golle' legake':

—Techo shlaalə niso'dni.

Na'ch wza'gake'. ²³ Na' shlak ngoo barkwa' nez, wtes Jesús'a'. Na'ch wze to be' wal lo niso'dna' na' wzolo chas chat' nisa' na' biyollan loo barkwa', na' zi lat'zə nan kwe'n yel. ²⁴ Na' jasangake' Jesús'a', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesús'a' na' bsheshlene' be'na' len niso'dna'. Na' wlezkakan, bich bi gok. ²⁵ Na'ch golle' legake':

—¿Abi chon'ilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' niso'dna' chzenaggakan che'.

Bibej Jesús'a' dii xiwaa yoo to ben' Gadara

(Mt. 8:28-34; Mr. 5:1-20)

²⁶ Na'ch bllingake' yell-lío che ben' Gadáraka', daa llia shlaa niso'dna' ndil yell-lío che Galileana'. ²⁷ Ka bichej Jesús'a' loo barkwa' jabig' to ben' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. ²⁸ Na' ka ble'ile' Jesús'a', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, ben' nak liizelozi ben' choo ben' xen. Ben goklen bi wsak'zi'o nad'.

²⁹ Gollan ka' daa ba chon Jesús'a' byen yichejan. Ba wlla chnabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono ben' lle'. ³⁰ Na' che' Jesús'a':

—¿Bin lio'?

Na' chi'e:

—Legíonan lia'.

Golle' ka', la' zanannan' yo'e. ³¹ Na' got'yogakin Jesúza' bi wseleegakan gana' kwiayi'gakan. ³² Na' gaozə zoa to yaa gana' lle' kush zan chao-gakb. Na' dii xiw'ka' wzeyidgakan wñabgakin Jesúza' wi'e latj yiyooگان kushka', na' bi'e latj. ³³ Na'ch bichej dii xiw'ka' yoo beena' na' biyooگان kushka'. Na' lii goklleshtegakib na' jabixgakb to cho'a bđinj na' jshoogakb loo nisa' na' witgakb.

³⁴ Na' ben'ka' chap kushka' ka ble'gakile' daa gok, biyajdogake' jazen-gakile'n ben'ka' lle' yella' na' ben'ka' lle' lyixaa. ³⁵ Na'ch bllesh ben'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. ³⁶ Na' ben'ka' ble'gakile' daa gok, gollgake' ben'ka' zi' bllin nakan gok biyaki beena' wyoo dii xiw'ka'. ³⁷ Na' yog'lol ben' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'. ³⁸ Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹—Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bexee xe'na' na' lekzka' xiin' Jairona'

(Mt. 9:18-26; Mr. 5:21-43)

⁴⁰ Ka bllin Jesúza' shlaa nisdona', le chiba chizaki ben'ka' lle' na', la' yog'zgake'n chbezgake' le'. ⁴¹ Na'ch bllin to ben' le Jairo, nake' to ben'ka' chgoo xnezi cheyi' diika' chon ben' Israelka' gana' chdop chllaggake' choe'llwillgake' Chioza'. Na' bchek' xibe'na' lao Jesúza' na' got'yoile'ne' shaje' lille'na', ⁴² daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' ben' zan janogake'ne' ax̄t bdakwyillgake'ne'.

⁴³ Na' ladj ben'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajtezi chaje' lao ben' wen rmechka', na' ni to kono gok yiyon le'. ⁴⁴ Na'ch wbiguee koll' Jesúza' bexee xe'na', na' katena' lii biyakteile'.

⁴⁵ Na'ch goll Jesúza' ben'ka' zjano le':

—¿No beena' ba bex' nad'?

Na' ni to kono bcheb. Na'ch goll Pédrona'ne':

—Maestro, ben'kin chdakwyillgake' li' na' chllig'gake' li' to ki to ka'la. ¿Biche nazo': "Non ba bex' nad'?"

⁴⁶ Na' che' Jesúza' legake':

—Nochodan' ba bex' nad', la' gokbe'teid' bchej yeļ' wak cha'na'.

⁴⁷ Na' noola', ka gokbe'ile' aga wak wkwashee, do chllebze' jachek' xibe'na' lao Jesúza'. Na' lao yog'lol ben'ka' lle' na', golle' biche bex'ze' xe'na' na' daa bexeen lii biyakteile'. ⁴⁸ Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' ben' yoblə, lete Pédrona', Jacóbona', Juanna' na' xaxna' bi' weta'zə. ⁵² Yog'lol ben'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

⁵³ Na' bxill-ləgake' che', la' nezgakile' ba witbaan. ⁵⁴ Na'ch bex' Jesúza' na' bi' wetdo'na' na' wnie' zilljə, chi'e:

—Biyas, bi'do'.

⁵⁵ Na' bibam' na' lii biyasteb'. Na' goll Jesúza' legake' we'gake' dii gaob'. ⁵⁶ Na' xaxna'baa le bibangakile', na' che' Jesúza' legake' ni to kono ye'gake' daa gok.

9

Ben'ka' shllin jtixje'gake' cho'a xtil' Chioza'

(Mt. 10:5-15; Mr. 6:7-13)

¹ Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche yibejgake' yog'lol dii xiw'ka' yoo ben' na' yiyongake' ben' che'i yillwe'. ² Na' bselee legake' kwenche llje'gake' dill' ka nak yel' wñabia' che Chioza', na' yiyongake' ben'ka' bi' shao'. ³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale. ⁴ Na' yoonā' gana' illinle, na'tezə soale ax̄t ka illinch lla yiza'le. ⁵ Na' yella' gana' bi wleb'gake' le', kat' yiza'le, yishible bishtena' lliā ni'aleka' kwenche gakbe'gakile' aga wenan chongake' bi chleb'gake' cho'a xtil' Chioza'.

⁶ Na'ch wza' ben'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'

(Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúza'. Na' chakile' nora beena', la' bal ben' nagake' dii Juan wichoā nisan' ba bibane' dii yoblə. ⁸ Na' zi bal' nagake' Eliāzan' ba bila' dii yoblə. Na' zi bal' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'. ⁹ Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

Jesúza' bwawe' gayaa mil ben'

(Mt. 14:13-21; Mr. 6:30-44; Jn. 6:1-14)

¹⁰ Na' ka billin postlka' shllin, na' gollgake' Jesúza' yog'lol diika' jen-gake'. Na'ch bchi'e to lezgake' yella' le Betsaida. ¹¹ Na' ka wñezi ben'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

¹² Na' ka ba wlle', ben'ka' shllin jabig'gake' kwit Jesúza' na' gollgake'ne':

—Goll ben'ki yiyajgake' yellka' wa no ranshdo'ka' lliā gaozə lljadiljgake' dii gaogake' na' ga guesgake', la' ga ni zoacho bikzə bi de.

¹³ Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

¹⁴ Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

¹⁵ Na' bzoagake' xtillee na' wlekgake' beṅ'ka'. ¹⁶ Na'ch bex' Jesúza' yetxtilka' gay' na' bel'ka' chop. Na' blis jalawe'na' yabana' bi'e Chioza' yel' choxken, na' bxoje'n na' bi'en beṅ'ka' nakgake'ne' txen na'ch be'gake' che che beṅ'ka'. ¹⁷ Na' yog'gake' wdao ka beljgakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúza'n beena' wlej Chioza' inabi'e

(Mt. 16:13-19; Mr. 8:27-29)

¹⁸ To shii ka choe'lwill Jesúza' Chioza', na' lle' beṅ'ka' nakgake'ne' txen, na' wṅabile' legake':

—¿Non na beṅ'ka' nak'?

¹⁹ Na' che'gake'ne':

—Baḷe' nagake' nako' dii Juan wichoa nisa', na' zi baḷe' nagake' nako' Elíaza', na' zi baḷe' nagake' nako' to beṅ' wdixjee daa goll Chioza'ne' kani'yi, na' ba bibane' ladj beṅ' wetka'.

²⁰ Na'ch chi'e legake':

—Shera le', ¿nora nale nak'?

Na'ch che' Pédróna'ne':

—Lin' Cristóna', beena' ncheb Chioza' wselee.

²¹ Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit beṅ' le'

(Mt. 16:20-28; Mr. 8:30-9:1)

²² Na' chi'e legake':

—Kon ka nchogbia' cha', nad', Beṅ' Bsel' Chioza' Yell-lioni, biya dii wchi' wsak'gake' nad'. Na' beṅ' golka' chṅabia' wzoagake' nad' ka'lə na' ka'kzə bxoza' chṅabia' na' beṅ'ka' chli' chsedi leya'. Na' chonan byen wítgake' nad', na' ka gak shoṅ lla yiban' ladj beṅ' wetka'.

²³ Na'ch golle' yog'lole':

—Shi no cheeni gon nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. ²⁴ La' beena' bi chzani yel' mban che'na' yen ile'ile' bittez ni cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani. ²⁵ Bibi zjanayin gap beṅ' yog'loḷ daa de yell-lioni, shi le' kwiayee. ²⁶ Nottezə beṅ' chiyii chido'i nad' na' che cho'a xtilaana', ka'kz nad', Beṅ' Bsel' Chioza' Yell-lioni, yiyii yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. ²⁷ Na' dii li nia' le', baḷ-le lle'le ni, ni mbanle kat' wli' Chioza' yel' wṅabia' che'na'.

Jesúza' biyake' nlla'la

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' bchi'e Pédróna', Juanna' na' Jacóbona'. ²⁹ Na' shlak choe'lwille' Chioza', biyak cho'alawe'na' nlla'la, na' biyak xe'na' xtil axt chey cheeni'n. ³⁰ Na' gokxe chop beṅ' bshaljengake'ne', toe' dii Moiséza' na' beena' sto Elíaza'. ³¹ Na' yel' chey cheeni'na' nechjan legake'. Na' chshaljengake'ne' che ka nak yel' wita' ile'ile' Jerusalénna'. ³² Na' Pédróna' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' yel' chey cheeni' che Jesúza' na' che beṅ'ka' zi chop bllin kwite'na'. ³³ Na' ka ba chikwas dii Moiséza' na' Elíaza' kwit Jesúza', Pédróna' golle' Jesúza':

—Maestro, ¡le wen zoacho nizə! Gonnto' shonə ransh, to cho', to che dii Moiséza' na' sto che Elíaza'.

Na' ni bi gokbe'i Pédróna' bin golle'. ³⁴ Na' ni choe'tie' dill', ka wze to bej gana' lle'gake' na' bkwashaan legake'. Na' le bllebgake' ka gokbe'gakile' ba yoogake' loo beja'. ³⁵ Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

³⁶ Na' ka wde goll Chioza' legake' ka', na' ble'gakile' stozə Jesúsza' ze. Na' ni to kono gollgake' daa ben ble'gakile'.

Biyon Jesúsza' to bi' wew' yoo dii xiwaa

(Mt. 17:14-21; Mr. 9:14-29)

³⁷ Betiyo, ka biyetjgake' lo yaana', ben' zan wal jatilgake' legake'. ³⁸ Na'ch ladj ben'ka' wne to ben' byo zillj, chi'e Jesúsza':

—Maestro, ben goklen bwiagach bi' cha'ni, la' tlish' tyajchgabaan zoa. ³⁹ Dii xiwaa choxa'n leb' na' tokonganz chosyaab', na' chonan ka chazb' shon ax̄t chbia bllin' cho'abaa. Na' chiya dii chonin leb', na' aga cheenin wsanan leb'. ⁴⁰ Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

⁴¹ Na'ch che' Jesúsza':

—¡Zi'tegalə chelena', le' ben' mal na' ben' bi chajle'! ¿Zi ka'k'tek chiya'! soalen' le'? Na' ¿zi ka'k'tek chiya'! soid' le'? Da diwa' bi' cho'na' ni.

⁴² Na' ka zej bi'na' kwit Jesúsza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúsza' dii xiwaa na' bichejan, na' biyakib'. Na' biyone'b' lall' na' xabaa. ⁴³ Na' yog' ben'ka' lle' na' bibangakile' daa ble'gakile' yel' wak xen che Chioza'.

Sto shii wdixjee Jesúsza' witgake'ne'

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúsza', na' golle' ben'ka' nakgake'ne' txen:

⁴⁴—Li wzeyen' nagle dga inia' le': gongake' nad', Ben' Bsel' Chioza' Yellioni, lall' na' ben'ka' chakzi' chakzbani nad'.

⁴⁵ Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllebgake' inabgakile'ne' bi zejín daa golle' legake'.

¿Noran zak'chi?

(Mt. 18:1-5; Mr. 9:33-37)

⁴⁶ Na' wzolo chakdil'-len ljwellgake' nogaken' nak ben' zak'chi. ⁴⁷ Ka gokbe'i Jesúsza' daa chza'lall'gake', na'ch wdoyoe' to bi'do' na' bzie'b' kwite'na'. ⁴⁸ Na' chi'e legake':

—Nottezə ben' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

⁴⁹ Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllonnto' gone' ka', la' bi nake' cho' txen.

⁵⁰ Na' che' Jesúsza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

Jesúsza' bsheshlene' Jacóbona' len Juanna'

⁵¹ Na' ka ba zoa yiyaj Jesúza' yabana', na'ch btoblallee yiyaje' Jerusalénna'. ⁵² Na' bselee ben' wllialozegagake' na' wyajgake' to yell daa mbani Samáriana' jtijgake' gana' yigaane'. ⁵³ Na' ben' Samáriaka' bi blebgake'ne' daa nezgakile' Jerusalénna'lan yiyaje'. ⁵⁴ Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega ben'ki?

⁵⁵ Na' biyeçhj Jesúza' bsheshlene' legake', chi'e:

—Aga nezile non chnabia' yichjlall'do'lena' nazle ka'. ⁵⁶ Nad', Ben' Bsel' Chioza' Yell-lioni, aga zaa kwenche wlliyaa yel' mban che ben', san zaa kwenche yisla' yel' mban che'kan'.

Na'ch biyajgake' yell yoblə.

Ben'ka' goklall' lljano Jesúza'

(Mt. 8:19-22)

⁵⁷ Na' ka zejgake' tneza', to ben' chi'e Jesúza':

—Xan', cheenid' sa'len' li' gattezə shajo'.

⁵⁸ Na' che' Jesúza'ne':

—Zoa yech ga chiyoo bez'ka', na' byiṇdo'ka' non lilldo'gakb, san nad', Ben' Bsel' Chioza' Yell-lioni, biga de yigaan'.

⁵⁹ Na'ch che' Jesúza' sto ben':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

⁶⁰ Na'ch che' Jesúza'ne':

—Bibi gakilo', wikwash'kzə ljwell ben' wetka'. San li', jtixje'i ben' ka nak yel' wñabia' che Chioza'.

⁶¹ Na'ch sto ben' yoblə chizi'e Jesúza':

—Xan', cheenid' sa'len' li' per zigaate be' latj lljalaaçh' dill' bish' ljwell'ka'.

⁶² Na' che' Jesúza'ne':

—To ben' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nçhoglallee aga wak gone' ka cheeni Chioza'.

10

Jesúza' bselee guiyon shllin ben' jtixje'gake' cho'a xtilleena'

¹ Na' ka wde dga, Jesúza' wleje' zi guiyon shi ben'* na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'. ² Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilapgake'n. ³ Li shajshki naa, nad' chselaa le' ka xil'do' ba zej ladj ba znia. ⁴ Bi wa'le ga koo xshinlazole, ni mech, ni zi shkwe' xel-le; na' bi shazile wwaple ben' chiox tneza'. ⁵ Na' ka sho'le to lill ben', zigaate wwaplene' chiox, ye'lene': “Soashgale mbalaz, le' zoale yooni.”

⁶ Na' shi zoa ben' cheenile' soe' mbalaz, na' yel' mbalaza' yigaanlenan le'. Na' shi bi cheenile', na' yibiilenan le'. ⁷ Na' yoonaa' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo. ⁸ Kat' illinle to yell ga wlebgake' le', yeej

* 10:1

gaotezle bittezə dii gongake' le'. ⁹ Na' yiyonle ben'ka' bi shao' yella', na' ye'le legake': "Yel' wñabia' che Chioza' ba bla'n laoleni." ¹⁰ Na' shi illinle to yell ga bi wlebgake' le', li yide lyell, li ye'gake': ¹¹ "Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chlebe cho'a xtill' Chioza'. Na' li koosha yichjle dga inanto' le', yel' wñabia' che Chioza'n ba bla'n laoleni." ¹² Na' nia' le', ben'ka' lle' yellka' gana' bi wlebgake' le', dii xench nak yel' zak'zi'na' ile'gakile' aga ka ben' yell Sodómaka' llana' wchoglo Chioza' che ben'.

Ben'ka' bi bzenag xtill' Jesúza'

(Mt. 11:20-24)

¹³ 'iNyesh'laz gak chele, le' ben' yell Corazín na' le' ben' yell Betsaida! La' shel' gok yel' wakka' yell Tírona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'. ¹⁴ Kat' illin lla wchoglo Chioza' che ben', yel' zi' xench ile'ile' aga ka ben' yell Tíroka' na' ben' yell Sidonka'. ¹⁵ Na' le' ben' yell Capernaúm, bi gonle lez yillinle yabana', la' Chioza' wza'lee le' gana' sak'zi'le.

¹⁶ Na'ch che' Jesúza' ben'ka' bse'lee:

—Ben'ka' chzenaggake' chele, cha'kzan chzenaggake'. Na' ben'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsel' nad'.

Billin ben'ka' guiyon shi

¹⁷ Na' ben'ka' guiyon shi† le chibagakile' ka billingake' kwit Jesúza', na' che'gake'ne':

—Xan', axt dii xiw'ka' chilleshgakan ka chzetjnto' lio'na'.

¹⁸ Na'ch che' Jesúza' legake':

—Ble'id' Satanáza' daa chñabia' dii xiw'ka' bxopan yabana' ka chxop to yi' wziw'. ¹⁹ Nad' ba ben' le' yel' waka' kwenche la'kzi' gad' no bel' znia wa no be'xjoni' le' aga bi gakile', na' wlej wshoshjtele' yog' daa chon dii xiwaa. ²⁰ Per bi yibaile daa chisheshle dii xiw'ka', san li yibayi daa ba da' lelana' lee libra' de yabana'.

Jesúza' bibaile'

(Mt. 11:25-27; 13:16-17)

²¹ Na' katena' Espíritu Sántona' bene' ka bibachgayi Jesúza', na' wne':

—Xa, li' nako' Xan' yabana' na' yell-lioni, na' choe'lawaa li' daa ba bliilo' ben'ka' bibi chajni' daa bi bliilo' ben' sin'ka' na' ben'ka' nteyi. Kan' ba wyazlalloo gono', Xa.

²² Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' ne'zile'n. Na' ni to kono nezi noyen'an' nak' Xa'na'; toz nad' Xiine' ne'zid', na' chon' ka inezi ben'ka' cheenid' ine'zgakile'n.

²³ Na'ch biyechje' bwie' ben'ka' naggake'ne' txen, chi'e legake':

—Chakomba ben'ka' chle'gakile' diika' chle'ile' naa. ²⁴ Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile' naa, na' bi ble'gakile'n. Goklall'gake' yengakile' dga chenile' naa, na' bi bengakile'n.

To ben' Samaria bene' to dii wen

25 Na'ch wbig' to beṇ' chli' chsedi leya' wṇabile' Jesúza' kwenḅezeḅ inezile' shi wak yillii Jesúza' xtilleena', na' wṇabile'ne':

—Maestro, ḅbin chiyal' gon' kwenḅe gat' to yel' mban ḅha' zejli kaṇi?

26 Na'ch che' Jesúza'ne':

—ḅBin na leya' chiyal' goncho? ḅBi na daa chlabo'?

27 Na'ch beena' chli' chsedi leya' chi'e:

—“Chiyal' gakicho Xancho Chioza' do yichj do lall'cho, do ka nak fuerz ḅchchona', na' axt ga zeelo chajniicho; na' gaki bish' ljwellcho ka chaki kwinchō.”

28 Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban ḅcho' zejli kaṇi.

29 Na' beena' bi goklall' wṇit kwine', na'ch chi'ene':

—ḅNoran bish' ljwell'?

30 Na'ch che' Jesúza'ne':

—To beṇ' ziyo'e nez daa ziza' Jerusalenna' daa ziyaj Jericólā, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'.³¹ Na' shintk gok ka' ka wde to bḅoz lo neza'. Na' ka ble'ile' beena' de na', to wdeze' ka'lā. ³² Na' lekzka' wde to beṇ' nake' xiṇṇ dia che dii Levína'. Na' ka ble'ile' chtoḷ beena' na', lekzka' to wdeze' ka'lā. ³³ Na' sto beṇ' Samaria lekzka' zeje' tneza' ka ble'ile' beena' chtoḷ na', na' biyeshile'ne'.³⁴ Na' jabiguee kwite'na', na'ch blie' lo we'na' set na'ch vino, na' bḅheje'n. Na' biḷepe'ne' koll' bayix' ḅhe'na', biḅhi'ene' to yoo gana' wdape'ne'.³⁵ Na' betiyo, ka ba zoa yiza' beṇ' Samáriana', wleje' ḅhop mech plat[‡], na' bi'en xan yoona' kwenḅe gap wwie'ne' zan lla, na' chi'ene': “Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblā.”³⁶ Na' ḅnora beṇ'ki shoṇ chakilo' beni bish' ljwell beena' wlan beṇ' wbanka'?

37 Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyal' gono'.

Jesúza' jawie' Márтана' na' Maríana'

38 Na' shlak ngoo Jesúza' nez, bline' to yelldo' na' to noolā le Marta blebe'ne' lille'na'.³⁹ Na' zoa to beṇ' bil Márтана' lie' María, na' Maríana' wchi'e lao Jesúza' chzenague' dillaa cho'e. ⁴⁰ Na' Márтана', dechga daa gone' na' wzeche' wneyi ḅheyin, na'ch wyaje' kwit Jesúza', chi'ene':

—Xan', goll-lat' beṇ' bila'ni gaklene' nad'. Toz' ndakw' yog' mandadka'.

41 Na' che' Jesúza'ne':

—Marta, Marta, chi'chga yichjo' na' zechgo' wneyi ḅheyi diika' gono'.

⁴² Per toz daa de nakan dii llialoch na' Maríani ba wleje'n, na' kono gak yikaan lawe'na'.

11

Bli' Jesúza' nak we'lwillgake' Chioza'
(Mt. 6:9-15; 7:7-11)

[‡] 10:35 Mech plat: dill' griegona' nan denario, na' nakan to mech dii zak' ḅhe shlla llin.

¹ Shlin choe^lwill Jesúza' Chioza' to latj, na' ka biyoll be^lwillne', to beena' nake'ne' txen golle'ne':

—Xan', bli'yi neto' nakan chiyal' we^lwillnto' Chioza', ka ben Juanna' bli' bstedile' ben'ka' bengake'ne' txen.

² Na'ch che' Jesúza' legake':

—Kat' we^lwill-le Chioza' kin inale:
Xanto' Chios, ben' zoa yaba,
we^lla'oshga yog^lol ben' li'.

Na' inabia'gacho' loo yichjlall'do' yog^lol ben'
kwenche gak lo yell-lioni ka chazlalloo, kon ka chak yabana'.

³ Ka nak daa chono' cheej chaonto' yog' lla, bengachan naanlla.

⁴ Wxi'xen chento', ka chon neto' chzi'xennto' bittezə dii choni ben' neto'.
Bi we'gacho' latj ibixnto' gonnto' daa bi nak wen, san bislagach neto' lo
ni'a na' dii mala'.

⁵ Na'ch che' Jesúza' legake':

—Inatezcho shi zoa to ben' nllaguile na' do chel shajle lille'na' na' ye'lene': "Ben' bish'dawaa, ben' shloll nad' shon yetxtil, ⁶ la' ba bla' lilla'na' to ben' nllaguid', zee zit', na' bikzə bi de cha' wshabidee." ⁷ Na'ch beena' yoo loolə lii inatie' le': "Bi gonzilo' nad' zed, ba nsejl' lillii na' ba delen' bi' cha'ki. Aga wak chas' gon' daa chyalljilo'." ⁸ Na' nia' le', la'kzi nllagteile'ne', bi chase' wi'ene' daa chnabile'ne'. San shi seyide' inabe'n, chen ki cheenile' chase' wi'e yog' daa chyalljile. ⁹ Daan nia' le': Li inabi Chioza' bin cheenile' na' gone'n. Li yiyiljan na' willelkzilen. Li wtankw lee puerta', na' wsaljzke'n. ¹⁰ La' beena' chnabile' to bi chnabile' ben', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgabe'n.

¹¹ 'Ka chak chele le' nakle ben' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to bel gaob', aga we'leb' to bel znia. ¹² Wa shi inabib' le' to llit gaob', aga we'leb' to bexjoni'. ¹³ Le' naktele ben' mal, chak we'le xiinleka' daa nak dii wen. Na' Xacho Chioza' zoa yabana' nakteche' ben' wench! Na' wi'e Espiritu Santo che'na' soe' loo yichjlall'do' yog' ben' inabe'ne'.

Nagake' Jesúza' chibeje' dii xiw'ka' kon ye' wak che Bezlona'

(Mt. 12:22-30; Mr. 3:19-27)

¹⁴ Jesúza' chibeje' to dii xiw' yoo to ben' bi chak inie', na' ka bichejan na'ch gok binie'. Na' ben'ka' lle' na', bibangakile' daa bene'. ¹⁵ Na' bale' che'gabe':

—Kon ye' wak che Bezlona', daa chnabia' dii xiw'kan', chibeji beeni dii xiw'ka'.

¹⁶ Na' zi bale' wñabgakile'ne' gone' to ye' wak dii ile'gakile' kwenche wli'n shi Chioza'kzan bseleene'. ¹⁷ Na' ba nezli Jesúza' daa chza'lall'gabe', na'ch chi'e legake':

—Shi ben'ka' lle' to yell gaggake' choplə na' til-len ljwellgabe', na' kwiayi' yella', shi naa. Na' lekzka' shi ben'ka' lle' toz yoo til-len ljwellgabe', aga ssha soagake' toz. ¹⁸ Na' ka'kzə Satanáza' na' dii xiw'ka' yoo lo na'yin, shi gaggakan choplə na' kwiayi' ye' wñabia' cheyinna'. Nia' le' ka' daa nale ye' wak che Bezlonan' chibejid' dii xiw'ka' yoo ben'. ¹⁹ Shi chibej' dii xiwaa yoo ben' kon ye' wak che Bezlona', † sheralə ben'ka' nakle txen?

* **11:18** Bezlonan': lekzannan' Beelzebú de txil na' nakan sto le Satanáza'. † **11:19** Bezlona': lekzannan' Beelzebú de txil na' nakan sto le Satanáza'.

¿Alezkka' lennan' chibejlengake' dii xiwaa yoo beñ'? Daa bi nakan ka, chli'n nakllejilen. ²⁰ Na' daa chibej' dii xiwaa yoo beñ' kon yel' wak che Chioza', lennan' chli'n ba bla' yel' wñabia' che Chioza' ladjleni.

²¹ 'Kat' to beñ' wal nape' dii gonile' zña na' chape' lille'na', aga no gak lljtoyo dii de che'. ²² Per shi illin sto beñ' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che beñ'ka' nakgake'ne' txen.

²³ 'Beena' bi nake' nad' txen, chakzbanile' nad'. Na' beena' bi chaklen kwenche wzenag beñ' cho'a xtill' Chioza', len' chsej chllone' wzenag-gake'n.

Chillin dii xiwaa sto shii gana' bichejan

(Mt. 12:43-45)

²⁴ 'Kat' chichej to dii xiw' dii yoo beñ', na' chjadan ga bibi dezkə na' chyljan gana' yizi'lalliin. Na' shi bi chllelin gana' yizi'lalliin na'ch chakin: "Yiyaachkz' dii yoblə gana' bichejkz'." ²⁵ Na' ka chillinan gana' bichejan, nakan ka to loo yoo dii nxi nloa na' nakan xochi. ²⁶ Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

Chakomba beena' chzenag cho'a xtill' Chioza'

²⁷ Na' shlak che' Jesúza' ka', to noolə zie' ladj beñ'ka' lle' na' wñie' zilljə, chi'e:

—jChakomba noola' wxane' li' na' bwall bxope' li'!

²⁸ Na' che' Jesúza'ne':

—jMbalazch beñ'ka' chzenaggake' cho'a xtill' Chioza' na' chongake' ka nan!

Beñ'ka' bi chajle' che Jesúza' wñabgake' wli'e to yel' wak

(Mt. 12:38-42; Mr. 8:12)

²⁹ Na' bdi'a bllagch beñ'ka' kwit Jesúza' na' golle' legake':

—Le' zoale naa, nxinj yichjlall'do'leka'. Chñable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'. ³⁰ Daa gok che Jonáza' bli'n yel' wak che Chioza' lao beñ' Níniveka'. Kakzə nad', Beñ' Bsel' Chioza' Yell-lioni, wli'a yel' wak che Chioza' laolena', le' zoale naa. ³¹ Na' llana' wchoglo Chioza' che beñ', na' yiban noola' wñabia' do lli'lə, na' gawe' xya chele lao Chioza', le' zoale naa, ine' chiyal' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' beñ' zak'chi ka dii Salomónna', na' bi chzenagle cha'. ³² Na' lekzka' llana' wchoglo Chioza' che beñ', na' yiban beñ' Níniveka' na' gaogake' xya chele lao Chioza', le' zoale naa, inagake' chiyal' sak'zi'le. La' legake' biyaj bileni saaxya che'ka' ka be'len Jonáza' legake' cho'a xtill' Chioza', na' nad' zoa' ni, nak' beñ' zak'chi ka dii Jonáza', na' bi chzenagle cha'.

Jalaochona' nakan ka to yi' che kwerp chechona'

(Mt. 5:15; 6:22-23)

³³ Na' lekzka' chi'e legake':

—Biga zoa beñ' chxene' to kandil na' chzoe'n to ga ngash' wa wdoseen to dii kwwashaan len, san chzoe'n sibə kwenche ile'i beñ'ka' sho' loo yoona'. ³⁴ Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i

jalawo'na', kwerp cho'na' zoan lo yel chola'. ³⁵ Na' bsak' wze wneyi kwenche ki lwaa to' lo beeni'na', tazo' lo yel cholalə. ³⁶ Shi doxen kwerp cho'na' yoon beeni', na' ni to dii shgasj shchol bi yoon, na' ile'ilo' kwaslōl ka chle'ilo' kat' ze to yi' chzeeni'n doxen.

Jesúza' chsheshlene' fariseoka' na' ben'ka' chli' chsedi leya'

(Mt. 23:1-36; Mr. 12:38-40; Lc. 20:45-47)

³⁷ Na' ka biyoll be' Jesúza' dillaa, na' bche' to fariseo le' lltawe' lille'na'. Na' wyoo Jesúza' lille'na' na' wchi'e cho'a mesa'. ³⁸ Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'. ³⁹ Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le' ben' wen nakle, len le' chibaile chkaale bi de che ben' na' chibaile chonle bichlə dii mal. ⁴⁰ Le' ben' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjall'do'choni? ⁴¹ Li izani bi de chele, li we'n ben' bibi de che', na'ch yixi' yiyech yichjall'do'lena'.

⁴² Nyesh'laz gak chele, le' fariseo! Choe'le Chioza' lat' wej† no yixwej, no kwanirod na' bichlə yix' kwan dii mbekle. Na' bi chonle daa nak shlichə na' bi chakteile' Chioza'. La' daayen'an llialocho gonle per lekzka' bi wsanle kwejle daa chnab Chioza'.

⁴³ Nyesh'laz gak chele, le' fariseo! Le' chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

⁴⁴ Nyesh'laz gak chele, daa nakle ben' wxiye'! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loola.

⁴⁵ Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

⁴⁶ Na' goll Jesúza':

—Le' Lekzka' nyesh'laz gak chele, le' chli' chsedile leya'! Dii zan dii che'le ben' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gakenle legake'.

⁴⁷ Nyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xozxto'leka'. ⁴⁸ Na' daa chonle ka' zejin chonle txen dii xozxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

⁴⁹ Na' daan, lo yel' sin' che Chioza' wne': “Wselaa ben' chixjee daa yepee na' len ben' wi'e cho'a xtillaana', na' bale' witgake' na' zi' bale' biya dii gongakile'ne'.” ⁵⁰ Na' le' zoale naa, lenle ile'ile ka yel' zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxw wzil yell-lioni. ⁵¹ Le' zoale naa, lenle chido'le sak'zi'le ni che yel' wit che dii Abela' axt dii Zacariáza', beena' betgake' cho'a yoodo'na' kwit gana' chzeygake' bayix'ka'.

⁵² Nyesh'laz gak chele, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chllontele shajnii ben'ka' chzenagan.

† 11:42 Lat' wej: literalmente la décima parte.

⁵³ Na' ka goll Jesúza' ka', beṅ'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wṅabgakile'ne' chiya dii nak lallj, ⁵⁴ goklall'gake' we' Jesúza' dill' dii wchixa'n le'.

12

Dill' wxiye' che fariseoka' zaklebin levadúrana'

¹ Na'ch bdop bllag beṅ' zan inlebb gana' zoa Jesúza' axt chdakw ljwell-gake', na' wzoloe' zigaate be'lene' beṅ'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'. ² La' daa kono nezi naa, wllin lla inezi beṅaan, na' yog'lol' daa ngash' naa, wllin lla ila' lawin. ³ Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yoonā, axt gosya'i beṅ' wzie'n dill'.

Beena' chiya' illebcho
(Mt. 10:26-31)

⁴ Le' nllaguid', nia' le' bi illeble beṅ'ka' witgake' le', la' kachokzan zeelo gak gongakile' le'. ⁵ Per ni inia' le' non chiya' illeble: li illeb Chioza', la' ka yiyoll yikee yel' mban chelena' lekzka' nape' yel' wṅabia' wzalee le' lo yi' gabila'. Len', li illeb.

⁶ Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. ⁷ Na' ka'kzə le', axt to to yish' yichjlēna' mbab. Na' bi illeble, la' zak'chle aga ka zan byindo'ka'.

Beṅ'ka' chchebgake' nakgake' Crístona' txen
(Mt. 10:32-33; 12:32; 10:19-20)

⁸ Na' nia' le', beena' wṅheb lao beṅ' nake' nad' txen, lekzka' nad', Beṅ' Bsel' Chioza' Yell-lioni, wi'a dill' lao yog'lol' anjl che Chioza', yepgakee beeni nake' nad' txen. ⁹ San beena' bi wṅheb nake' nad' txen, lekzka' nad', wi'a dill' lao yog'lol' anjl che Chioza', yepgakee beeni bi nake' nad' txen.

¹⁰ Na' beena' biz gon ina' cha', nad', Beṅ' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

¹¹ Kat' lljwa'gake' le' lao beṅ'ka' chṅabia' gana' chdop chllagcho choe'llwill-cho Chioza', wa lao beṅ' chṅhogbia' che beṅ' wa lao joschis, bi sele wṅeyi naklə yilliile cho'a xtil' beṅ'ka' wa bin inale. ¹² La' kat' inele, Espíritu Sántona'kzan wzajniile' le' daa chiya' inale.

Dii nxolla' nsa' yel' wni'ana'

¹³ Na' ladj beṅ'ka' ndop nllag wṅe to beṅ', golle' Jesúza':

—Maestro, gollgach beṅ' bishaana' gone' daa chidol' ikaa che dii xanto'na'.

¹⁴ Na' che' Jesúza'ne':

—¿Nora bzoa nad' ladjleni ka to beṅ' chon yel' joschis che beṅ' wa beṅ' chlaa bi dii de che beṅ'?

¹⁵ Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yel' mban chelena'.

¹⁶ Na'ch bzoe' to jempl, chi'e legake':

—Wzoa to beṅ' wni'a na' dii zan bizi' bilape' lo yell-lío che'na'. ¹⁷ Na'ch chakile': “¿Nakra ka gona'n naa? Biga de kooshawaa dga bizi' bilap'.”

¹⁸ Na'ch wne': “Ba nezid' bi gon'. Yichinj' yoonā gana' chgooshawaa daa

chizi' chilap' na' yiyona'n dii xench, na' kooshawaa daa bizi' bilap' na' bichlā dii de cha'. ¹⁹ Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz." ²⁰ Na' goll Chioza'ne': "Li', ben' bi nteyi, naanle' gueto' na' daa ngooshawoo, nola cheyi gakan." ²¹ Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' ben'ka' nak xiine'

(Mt. 6:25-34)

²² Ka wde dga, Jesúza' golle' ben'ka' nakgake'ne' txen:

—Naa nia' le': Bi sele wneyi che daa yeej gaole, ni bi sele wneyi che xalaanlena'. ²³ La' zak'techlā yel' mban chelena' aga ka daa yeej gaole, na' zak'tech xkwerplena' aga ka xalaanlena'. ²⁴ Li' wwiakachi bech'ka', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazā. ²⁵ Ni tole bi gak yischoochle yel' mban chelena' ni zi tgor la'kzi nall inleeb selen wneyi. ²⁶ Shi dga nak diido'zā bi chak gonlen, ¿berache zezele wneyi che bichlā dii yoblā?

²⁷ 'Li' wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ²⁸ Shi Chioza' none' xochi yejdo'ka' ze liyxaa, la'kzi xtitchgan mbanan na'ch wtop ben' len wlli'en lo yi'na', ¿alechlin ki gone' chele, la'kzi bitek chajle'le gaklene' le'? ²⁹ Na' daan bi setekle wneyi ga sa' daa yeej gaole. ³⁰ La' ben'ka' bi nonlilall'gake' Chioza' to daazā chinogake'. Per le', Chioza' nake' Xale, na' nezile' chyalljilen. ³¹ Li' se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

³² 'Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. ³³ Li' wit' wde bi de chele, na' li' gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. ³⁴ Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

³⁵⁻³⁶ Na' lekzka' chi'e legake':

—Li' gakto ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chigake' chbezgake'ne' na' noxtegake' yi' che'ka' kwenche kate wtankwe' lee puerta' lii wsaljte-gake'n. ³⁷ Chakomba wen llinka' chbezgake' kat' yillin xane'ka', la' dii li' nia' le', kwine' kweke' legake' cho'a mesa' na' wi'e dii gaogake'. ³⁸ Chakomba ben'ka' chbezgake' yillin xane'ka' la'kzi yilline' do chel wa do zbalzā. ³⁹ Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. ⁴⁰ Ka'kzan le' chiyal' sele wneyi toshiizi kwezle nad', Ben' Bsel' Chioza' Yell-lioni, la' tokonganzā yiyed'.

Wen llinna' chon wen na' beena' bi chon wen

(Mt. 24:45-51)

⁴¹ Na'ch wñabi Pédróna' Jesúza', chi'ene':

—Xan', ¿ato neto'zan no' ka', anti che yog' beñaan no' ka'?

⁴² Na'ch goll Xancho Jesúza':

—¿Nakra chakile chon to wen llin wen, beñ' ñezi nak gone' llinna', shi xane'na' gone' lall' nee yog'te beñ'ka' zoa loo yoo lille'na' kwenche wweej wwawe' legake' gor cheyin? ⁴³ Chakomba wen llinna' chilalile' chone' daa nak lall' nee ka yillin xane'na'. ⁴⁴ Dii li nia' le', xane'na' gone' lall' nee yog'lol dii de che'. ⁴⁵ Na' shi wen llinna' gakile': "Akza ñaa yila xan'na'", na'ch soloe' gonile' zban wen llinka' sto, ka nool ka beñ' byo, na' soloe' yeej gawe' na' sollile'. ⁴⁶ Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba ñhogloe' gak che beñ'ka' bi chongake' daa chiyal' gongake'.

⁴⁷ 'Ben' wen llinna' ñezi bin cheeni xane'na' gone', na' bi chone'n ni bi zie'n wñeyi, na' wit chinchga xane'na' le'. ⁴⁸ Per beena' bi ñezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lolte diika' bene' lall' nee.

Gak beñ' choplə ni che Jesúza'

(Mt. 10:34-36)

⁴⁹ 'Daa bid' yell-lioni nakan ka inacho yin' bidxen'. Na' cheenchgaid' shel' ñaate ba chal'ñinan. ⁵⁰ Biya dii yen ile'id', na' le ba chakyeshid' axt ni illini llana'. ⁵¹ ¿Achakile bid' yell-lioni kwenche gon' ka soalen ljwell beñ' mbalaz? Aga kan', san daa bid' illaa ljwellgake' na' gakgake' choplə. ⁵² La' ñaa, shi to yoo lle' gayee, na' gakgake' choplə, shone' til'lengake' beñ'ka' chop, na' beñ'ka' zi chop til'lengake' beñ'ka' zi shonə. ⁵³ Xa bi' byona' til-lene'b', na' leb' til-lem' xabaa. Na' xna' bi' noola' til'lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejin daa chon Jesúza'

(Mt. 16:1-4; Mr. 8:11-13)

⁵⁴ Na' lekzka' che' Jesúza' beñ'ka' lle' na':

—Kat' chle'ile ziza' beja' gana' chxoalə wbillə, lii natele: "Wakə yeja'", na' kayen' chak. ⁵⁵ Na' kat' chde be'na' daa za' lli'lə, na' nale: "Le zey'chga yizak", na' kayen' chak. ⁵⁶ ¡Le' beñ' wxiye! Kat' chle'ile bin chak xan yabana' na' lo yell-lioni ñezile beran gak. ¿Biçhe bi chakbe'ile bin zeji daa chon Chioza' llaki zoacho ñaa?

Chiyal' yiyoe'xenko beñ'ka' chao xya checho

(Mt. 5:25-26)

⁵⁷ ¿Biçhe ki chiyiljle to kwinzle daa nak dii li dii shao'? ⁵⁸ Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chçhobia' che beñ', na' le' gone' le' lo na' beena' wseje' le' lillyana'. ⁵⁹ Na' nia' le', aga wichejle lillyana' axt ki chixjle doxen daa chiyal' chixjle.

13

Chiyal' yiyajyilenicho dii malka' choncho

¹ Na' lo llana'tezə bllin bañ beñ' lao Jesúza' gollgake'ne' ka ben Pilátona' bene' mandad betgake' bañ beñ' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon xchen bayix'ka' betgake'. ² Na' che' Jesúza' legake':

—¿Achakile beñ' Galiléaka' betgake' nakchgake' beñ' malch aga ka nochlə beñ' wlall che'ka'? ³ Nia' le' bi nakan ka'. Shi le' bi yiyajyilenile dii

malka' chonle, lekzka' yog'le kwiayi'. ⁴ Shera ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napch-gake' dol' aga ka ben' wlall che'ka'? ⁵ Nia' le' bi nakan ka'. Na' shi le' bi yiyaj yilenile dii malka' chonle, lekzka' yog'le kwiayi'.

Jempl che yag yixwewa' daa bi wllia

⁶ Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi lian yixwewa', na' ka blline' ni tlish' bi lian. ⁷ Na'ch chi'e beena' chap yell-lío che'na': “Ba gok shon yiz chidwia' shi lian yixwewa', na' ni to bibi chbian. Bchogchoklan, la' nlanchozkan yell-lioni.” ⁸ Na' beena' chape' yell-lío che'na' chi'e: “Xan', zi' zoashkin zi twiz na' wcheen' xaninna' na' wllan' ben'na'. ⁹ Shera shicholə wbian. Na' shi bi wlliakzan, na' wchogo'n.”

Biyon Jesúza' to noolə llana' chombaan ben' Israelka'

¹⁰ Na' to lla sabd, llana' chombaan ben' Israelka', chli' chsedi Jesúza' ben'ka' chdop chllag gana' choe'lwilgake' Chioza'. ¹¹ Na' len to noolə ba gok shin'shon yiz nlew dii xiwaa le', na' bichkzə gok yizie' shli. ¹² Na' ka ble'i Jesúza'ne' wnie'ne' na' golle'ne':

—Noolə, ba bikwas yillwe' cho'na'.

¹³ Na'ch bxoə neena' koll' noola' na' katena' lii bizetie' shlichə, na' wzoloe' choe'lawee Chioza'. ¹⁴ Na' beena' chgoo xnezi cheyi diika' chongake' gana' chdop chllaggake' blee daa biyon Jesúza' noola' llana' chombaangake', na'ch chi'e ben'ka' lle' na':

—De xop lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaanchə.

¹⁵ Na'ch che' Xancho Jesúza' legake':

—Le' ben' wxiye', ¿abi wsell-le goon cheleka' wa burr cheleka' ll-jaweejlegakb nisa' llani chombaanchə? ¹⁶ Nooli nake' xiin dia che dii Abrahamə, na' ba gok shin'shon yiz Satanəza' daa chnabia' dii xiw'ka' nonan le' ka ben' ncheje'. ¿Ana' chakile bi nakan wen biyonee llani chombaanchə?

¹⁷ Na' ka goll Jesúza' ka', yog' ben'ka' chakzbangakile'ne' biyii bido'gakile', na' yog' ben'ka' sto bibagakile' daa ble'gakile' yel' wakka' chone'.

Jempl che sa mostásana'

(Mt. 13:31-32; Mr. 4:30-32)

¹⁸ Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n? ¹⁹ Zaklebin sa mostásana' daa goz to ben' lo yell-lío che'na', na' ka bla'n na' bgolan gokan to yag xen na' ax̄t byindo'ka' ben lillbka' lo xoziiinna'.

Jempl che levadúrana'

(Mt. 13:33)

²⁰ Na' lekzka' chize' Jesúza':

—Dga sto wsaklebida'n yel' wñabia' che Chioza'. ²¹ Zaklebin lev-adúrana' daa chchix̄ to noolə shonə rob yezj kwenche yisgolan kwa che yetxtila'.

Chiyal' sho'cho puertdo'naz

(Mt. 7:13-14, 21-23)

²² Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsedile' ben'. ²³ Na' bchej to ben' wñabile'ne', chi'ene':

—Maestro, ¿ato chopcha ben' yila bi kwiayi'gake'?

Na'ch che' Jesúza'ne':

²⁴ —Li gon byen sho'le cho'a puert daa nak diido'zə kwenche soalenle Chioza'. La' ben' zan gaklall'gake' sho'gake'n, na' bi gak sho'gake'. ²⁵ Na' ka solla' xan yoona' wseje' puerta', na' le', igaanle cho'a puerta' wtankwle le'inna' na' ye'lene': "Ben'do', bsaljgach kwenche sho'nto'." Na' xan yoona' ine' le': "Bi nombi'a le' ni bi ne'zid' ga ben' le'." ²⁶ Na'ch ye'lene': "Weej wdaolennto' li' txen, na' bli' bsedilo' neto' yell chento'na'." ²⁷ Na'ch ine' le': "Bi nombi'a le', ni bi ne'zid' ga ben' le'. Li lljayaak do na'lə yog'lol-le le' ben' wen dii mal." ²⁸ Na' kwelchgale axt gaoxaxj leylena' daa le gakshejlall'le ka ile'ile dii Abrahama', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. ²⁹ Na' wde wdeli ben' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'. ³⁰ Na' bal ben' bi nak ben' zakii naa gakgake' ben' zakii, na' ben'ka' nak ben' zakii naa bich gakgake' ben' zakii.

Wchell Jesúza' ni che ben' Jerusalénka'

(Mt. 23:37-39)

³¹ Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

³² Na' che' Jesúza' legake':

—Li yiyaj na' li lljayell ben' wxiye'na': "Nin soa' to chop shon lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'." ³³ Chonan byen kooch' nez naa, wxə len willj kwenche yiyaa Jerusalénna' gana' chitgake' ben'ka' chyixjee daa che' Chioza', la' agagan' witgake' legake' gan yoblə.

³⁴ 'iLe' ben' Jerusalén, chitle ben'ka' chidtxjee daa che' Chioza' legake', na' yaja' chitile ben'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'. ³⁵ Li koo yichjle dga inia' le', Chioza' kwey yichje' gani zoale. Na' nia' le', aga wle'chile nad' axt kat'ch illin lla inale: "¡Gaklenshga Xancho Chioza' beeni ba bselee!"

14

Jesúza' biyone' to ben' yo'e yi

¹ To lla sabd, llana' chombaən ben' Israelka', wyaj Jesúza' jtawe' lill to fariseo, ben' chñabia', na' fariseoka' sto china' chinogake'ne'. ² Na' lawe'na' ze to ben' yo'e yi. ³ Na'ch Jesúza' wñabile' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaəncho, anti bi den'?

⁴ Na' legake' bikzə bi gollgake'ne'. Na'ch Jesúza' bexee beena' yoo yina' na' biyone'ne', na' golle'ne':

—Wak yiyajo'.

⁵ Na'ch chi'e fariseoka':

—Shi to burr chele wa to goon chele ixopb to loo yech to lla chombaəncho, ¿abi yibejleb katena' la'kzi nakan llana' chombaəncho?

⁶ Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

⁷ Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jempl, chi'e legake':

⁸ —Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le', ⁹ na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin. ¹⁰ Na' bi gonle ka'. San kat' no gax le', chiya' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao ben'ka' chi'lenle cho'a mesa'. ¹¹ La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

¹² Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalanzo' wen, no ben' bishoo, no ben' dialla cho', ni no ben' wlill cho', ben' nake' ben' wni'a, la' legake' lekzka' wak yigoogake' wzonna' yiwaogake' li' ka beno' chegake'. ¹³ Aga kan' gono', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiya' gaxo', ¹⁴ na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yishane' ben' wenka' ladj ben' wetka'.

Jempl che to ben' ben to lni xen

¹⁵ Na' to beena' chi'lene' Jesúza' cho'a mesa', ka benile' wne' ka', na' chi'ene':

—jChakomba ben'ka' lljadaogake' gana' chnabia' Chioza'!

¹⁶ Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenche shajgake' lille'na' lljtaogake'. ¹⁷ Na' ka gol' gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.” ¹⁸ Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lio na' chonan byen lljawia'n. Ye'gacho'ne' si'xene' bi gak yid'.” ¹⁹ Na' beena' sto chi'ene': “Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'.” ²⁰ Na' beena' sto chi'ene': “Zi' bshagna', na' bi gak yid'.” ²¹ Na'ch biza' wen llinna' jayelle' xane'na' yog' daa goll ben'ka' le'. Na'ch blaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.” ²² Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.” ²³ Na'ch che' xane'na': “Wyaj do yawi nezka' na' ben byen yid ben'ka' yillago' kwenche yilla' loo lilla'ni. ²⁴ Na' nia' le', ka nak ben'ka' bya' dii nech, ni toe' bi gaogake' daa ba bsini'a.”

Yel' zak'zi'na'yen ile'icho ni che Jesucristona'

²⁵ Ben' zan zjanogake' Jesúza', na'ch biyechje' chi'e legake':

²⁶ —Shi nole cheeni gake' nad' txen, chiya' gakhile nad' aga ka xaxna'le, xool-le, xiinle, ben' bish'le, ben' zanle, na' axt yel' mban chelena'. Shi bi gake' nad', aga wak gake' nad' txen. ²⁷ Na' lekzka' beena' bi chzanile' yel' mban che'na', gak bittezə dii gak che', kwenche gone' daa chazlallaa, aga wak gake' nad' txen. ²⁸ Shi nole cheenile gonle to yoo sib wal, zigaate chiya'! wwiale ka'k' gaki na' shi waki xmechlana' sheeloin. ²⁹ La' shi ba wlekwle leninna' na' tena' bich bi de wzeeloilin, na' yog'

ben'ka' ile'gakile' bi biyollan wxillgakile' le'. ³⁰ Na' inagake': "Kon wdishj beena' len yoona' na' bi goki xmeche'na' wzeeloe'n." ³¹ Na' ka'kz to ben' wñabia', shi cheenile' til'lene' sto wñabia' yoblə, na' lekzka' chiyal' wsakee shi wzoi shi mil ben'ka' nape' til'lengake' beena' nap galja mil ben'. ³² Na' shi gakbe'ile' bi soi ben'ka' nape', na' zi' illinlə ben' wñabia'na' sto, wselee to chop ben' lljellgake'ne': "Bizə til'cho." ³³ Na' ka' le', shi bi choonlall'le yog' dii de chele, aga wakə gake nad' txen.

Kat' bich zxi' zedaa
(Mt. 5:13; Mr. 9:50)

³⁴ Zedaa nakan dii wen, na' shi bich zxi'n aga wakch yiyonchon zxi' dii yoblə kwenche wchinchon. ³⁵ Ni bi gak wchinchon lwaa ben', san choonchon. Na' le' chenile dga nia', li sen wneyi.

15

Jempl che xilaa wnit
(Mt. 18:10-14)

¹ Yog' ben' wichixjka' na' ben' saaxyaka' jabig'gake' kwit Jesúza' kwenche bzenaggake' dillaa cho'e. ² Na' fariseoka' na' ben'ka' chli' chsedi leya' wzologake' biz chon chnagake' che Jesúza', che'gake':
—Chlebeza beeni ben' saaxyaka' na' chaolenteze' legake'.

³ Na'ch bzoa Jesúza' to jempl, golle' legake':

⁴ —Shi tole naple to guiyoa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle. ⁵ Na' ka yillelb, yibaile yixoaaleb yaaxizlena'. ⁶ Na' ka yillinle lill-lena' wtope ben'ka' nllaguile na' ben' wlill cheleka', na' ye'le legake': "Li yibaleni nad', la' ba biljel xil' cha'na' bana' wnit." ⁷ Na' nia' le', ka'kzan chibayi Chioza' len anjl che'ka' yabana' kat' to ben' wen dii mal chiyajile' saaxya che'na' aga ka taplalj twalj ben'ka' bi chonan byen yiyajgakile'.

Jempl che mecha' wnit

⁸ Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n. ⁹ Na' ka yillelile'n na' wtope' noolka' nllaguile' na' ben' wlill che'ka', na' yee legake': "Li yibaleni nad', la' ba biljel mech cha'na' daa wnit." ¹⁰ Na' nia' le', ka'kzan chibayi Chioza' len anjl che'ka' kat' chiyaj chileni to ben' saaxya.

Jempl che bi'na' benditj xmech xabaa

¹¹ Na' lekzka' che' Jesúza' legake':

—To ben' wzoa chop xiine', ¹² na' bi' neshaa gollb' xabaa: "Xa, blaa daa de cho' na' ben' nad' daa chiyal' ikaa." Na'ch blaa xabaa daa de che' na' bi'en legakb'. ¹³ Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. ¹⁴ Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. ¹⁵ Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nllée kushka' kwenche jtabb' legakb'. ¹⁶ Na' daa le chdom' goklall'b' gaob' daa chao kushka', na' ni len bi be'gake'b'. ¹⁷ Na' gokib': "Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni." ¹⁸ Ba ziyaachoklə kwit xa'na' na' yepee: Xadawaa, ba bxinj' blen' lao Chioza' na' lawo'na'. ¹⁹ Bich chidolaa gak' xiino', san beni nad' ka notteza wen llin cho'ki." ²⁰ Na'ch biza'b' ziyajb' lill xabaa.

'Na' zi dii xench yillim' lillbaa ble'i x̄abaa le'b' na' biyesh'lallile'b'. Na'ch zejdoe' jatile'b' na' wdele'b' na' bnope'b'. ²¹ Na'ch che'b' x̄abaa: "X̄adawaa, ba b̄xinj b̄len' lao Chioza' na' lawo'na', bich chidolaa gak' xiino'." ²² Na' x̄abaa chi'e wen llin che'ka': "Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy x̄bema na' li wllin yel ni'abaa. ²³ Na' li lljxi' me'do'na' mbejchlawin, li witb kwenche gaochob na' goncho to lni, ²⁴ la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' l̄nina'.

²⁵ 'Na' ka wzolo l̄nina', xiine' bi' necha' chdab' lyixaa. Na' ka billim' gaozə lillbaa, benib' chkwel' wikwellka' na' chakte wiyaana'. ²⁶ Na'ch wneb' to wen llinka' na' w̄nabibee bin chak lillbaa. ²⁷ Na' wen llinna' chi'e: "Bi' bishoonan' ba bila', na' ben x̄o'na' mandad betgake' me'do'na' mbejchlawin daa bila'b' shi'a shao'." ²⁸ Na' xiine' bi' necha' bllaab' na' bi goonib' yiyoob'. Na'ch bchej x̄abaa got'yoile'b' kwenche yiyoob'. ²⁹ Na'ch che'b' x̄abaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' goño' nad' la'ch' to shibdo' kwenche wit'b yeej gaolem' bi'ka' nllaguid'. ³⁰ Na' naa bila' xiino'ni biyit' bideb' yog' daa bi'ob' na' benditj' xmecho'na' kon noolə wdaka', na' ba betzo' me'do'na', bana' le nak, ni cheb'." ³¹ Na'ch che' x̄abaa: "Xiindawaa, li' zoaleno' nad' toshiizi, na' yog' bi' de cha' chekzo' daa. ³² Per chonan byen naa yibaicho na' goncho l̄nini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

16

Jempl che wen llinna', beena' benditj daa de che x̄ane'na'

¹ Na' lekzka' goll Jesúza' ben'ka' nakgake'ne' txen:

—Wzoa to ben' wni'a nape' to wen llin che', na' bene' lo nee yog' dii de che'. Na' wyaj bał ben' jellgake'ne': "Le chonditj beena' daa beno' lo nee." ² Na'ch w̄ne x̄ane'na' le', chi'ene': "Ba benid' ka nagake' chono', na' chiyal' yidio' kwent diika' ngoo lo no', la' bich gon' xshino'na'." ³ Na'ch chaki wen llinna': "¿Nakra gona'n naa, bich gon' x̄an'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'. ⁴ Ba nezd' nak gon' kwenche wleb ben' nad' lille'ka' kat' bich gat' llin cha'na'." ⁵ Na'ch goxe' to to ben'ka' chal'gake' che x̄ane'na', na' ben' necha' w̄nabile'ne', chi'ene': "¿Ka'k' chaloo che x̄an'na'?" ⁶ Na' beena' chi'e: "Chalaa to guiyoa medid* set." Na'ch chi'ene': "Ni de yisha', lobe'zə wche' na' bda'n shiyonzannan' chaloo." ⁷ Na' ka wde, w̄nabile' beena' sto, chi'ene': "¿Shera li? ¿Ka'k' chaloo?" Na' beena' chi'ene': "Chalaa to guiyoa gush trigo." Na'ch chi'ene': "Ni de yisha' na' bda'n taplalj gushzannan' chaloo." ⁸ Na' x̄an wen llinna' be'lawee wen llin mal che'na' daa biyiljlalle neklan gone'n. La' ben'ka' zech w̄neyi che daa chak lo yell-lioni, chiyiljall'chgake' nak soalen ljwellgake' wen kwenche ile'shi'ij wellgake', aga ka ben'ka' ba yoo beeni' che Chioza' loo yichjall'do'eka'.

⁹ 'Na' nia' le', li wchin yel' shawaa de chele yell-lioni kwenche gakenle ben', na' kat' ba wde che yel' shawaa, Chioza' wlebe' le' soalenlene' zejli kani.

¹⁰ 'Na' beena' chon ka chiyal' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiyal' kon daa nak

* **16:6** Medid: to to medidki gokan ka do 37 litr.

lall' nee, ka'kzə gone' shi bitekchlə dii xench koo lall' nee. ¹¹ Shi bi chonle ka chiyał' kon yel' shawaa de yell-lioni, bi gonzle lez ikaale yel' shawaa de yabana'. ¹² Na' shi bi chonle ka chiyał' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

¹³ 'Aga ga zoa to ben' wlane' xshin chop ben', la' wazkbanile' beena' to, na' gakhile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

¹⁴ Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'. ¹⁵ Na'ch che' Jesúza' legake':

—La'kzi nale nakle ben' wen, Chioza' nezile' nakan nak yichjlall'do'lena'. La' daa chaki ben' yell-lioni nakan dii lliate, leyen'lannan' chakzbani Chioza'.

Leya' na' yel' wñabia' che Chioza'

¹⁶ Na' lezkza' che' Jesúza':

—Leya' na' daa bli' bsemi dii ben'ka' wdixjee daa goll Chioza' legake', legakannan' wñabia'gakan axt ka bllin lla bid Juanna'. Na' ka bid Juanna', wzolo chzenag ben' dill' wen dill' kob che yel' wñabia' che Chioza', na' chongake' to dii byen kwenche inabi'e loo yichjlall'do'eka'.

¹⁷ 'Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiyał' yilaa ben'ka' nshagna'

(Mt. 19:1-12; Mr. 10:1-12)

¹⁸ 'Shi to ben' byo yilee xoolə'na' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa ben' che'na' le', lezkza' chone' ka chon beena' zoalente nool che'na' na' chdalene' noolə yoblə.

Ben' wni'ana' na' Lázaron'a'

¹⁹ Na' chize' Jesúza' ben'ka':

—Wzoa to ben' wni'a na' chakwe' shgal' lech' dii wen na' yog' lla chaoshawe'. ²⁰ Na' lezkza' wzoa to ben' yesh' wlie' Lázaro, na' lliia we'na' doxen kwerp che'na'. Na' tlizi chjchi'e cho'a yoo che ben' wni'ana', ²¹ gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'. ²² Na' bllin lla wit ben' yeshaa, na' bi'che' anjl che Chioza'ne' kwenche jazoalene' dii Abrahama'. Na' lezkza' wit ben' wni'ana' na' bkwash'gake'ne'. ²³ Na' dii ben' wni'ana' chdezi'chgue' gana' lle' ben' wetka', na' blis jalawe'na' na' zit'lə ble'ile' dii Lázaron'a' chi'e kwit dii Abrahama'. ²⁴ Na'ch wnie' zilljə chi'e: “Xadawaa Abraham, biyesh'gachi nad' na' bsel' Lázaron'a' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.” ²⁵ Na' Abrahama' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. ²⁶ Na' ziznakan sto, ze to bdiñj xen gholi, na' aga wak te ben'ki yidgake' gana' lle'le, na' ben'ka' lle' na' aga wak tegake' yidgake' gani zoanto'.” ²⁷ Na'ch che' ben' wnia'na'ne': “Chñabid' li' shka', xadawaa Abraham, ben goklen bsel'gach Lázaron'a' lill xa'na' ²⁸ gana' zoa zi gay' ben' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.” ²⁹ Na' Abrahama' chi'ene': “Napkzgage' daa bzej dii Moiséza' na' daa bzej dii ben'ka' wdixjee daa goll Chioza'. ¡Na' chiyał'

wzenaggake'n!" ³⁰ Na' che' beṇ' wnia'na'ne': "Aga wakan, xadawaa Abraham, san shel' to beṇ' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'." ³¹ Na' che' Abrahamane': "Shi bi chzenaggake' daa bzej dii Moiséza' na' daa bzej dii beṇ'ka' wdixjee daa goll Chioza', lekzka' aga wyajle'gake' la'kzi yiban to beṇ' wet."

17

Bi goncho ka ixop beṇ' yoblə gone' dii mala'
(Mt. 18:6-7, 21-22; Mr. 9:42)

¹ Na'ch che' Jesúza' beṇ'ka' nakgake'ne' txen:

—Bia'kzə de dii gon ka ixop beṇ' gone' dii mala', per jnyesh'laz gak che beena' wchixə beṇ' yoblə gone' dii mala'! ² Wenlan shel' wwal'gake' yene'na' to yaj che molin na' lljazal'gake'ne' loo nisdona' aga ka daa wchixə to beṇ'ki chajle'gake' cha'. ³ Daan, li wsak'.

'Shi to bish' ljwell-le gone' mal chele, li wsheshlene', na' shi yiyajile' daa bene' chele, li yizi'xen che'. ⁴ La'kzi axt gall shii shlla gone' bi gone' chele, na' gall shiite ine' le': "Chiyajid' daa ben' cho'", chiyal' yizi'xenle che'.

Daa gag gon to beṇ' chajle'

⁵ Na'ch goll postlka' Xancho Jesúza':

—Goklen neto' gonlilall'chnto' Chioza'.

⁶ Na'ch che' Xancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': "Blall'shki, na' jsoa loo nisdona'lə", na' gon yaga' daa ye'len, shel'ka'.

Daa chiyal' gon to wen llin

⁷ Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': "Biyoo, na' wche' kwenche gawo'." ⁸ Aga we'lene' ka', san ye'l-lene': "Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'." ⁹ Na' ni bi we'lene' yel' choxken daa ba bene' daa che'lene' gone'. ¹⁰ Lekzka' le', kat' ba biyoll benle yog' daa non Chioza' mandad gonle, chiyal' inale: "Neto' bi chizo chizakinto' gonnto' yog'loten, shinchga bizointo' ba bennto' daa chonan byen gonnto'."

Biyon Jesúza' shi beṇ' chak yillwe' daa le lepra

¹¹ Na' shlak zjada Jesúza' Jerusalenna', wdie' gana' ndil yell-lioka' mban Samáriana' na' Galileana'. ¹² Na' ka blline' to cho'a yelldo', bllesh shi beṇ' chakgake' yillwe' daa le lepra kwenche lljatil'gake'ne', na' de zit'lə wzegake' ¹³ besyaagake' zilljə, che'gake'ne':

—Jesús, Maestro, biyesh'lall'gachi neto'!

¹⁴ Na' ka ble'i Jesúza' legake', na' golle':

—Li shaj lao bxožka' kwenche ile'gakile' le'.

Na' shlak zejgake' bigaa yillwe' che'ka'. ¹⁵ Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'. ¹⁶ Na' bchek' xibe'na' lao Jesúza' na' bdose' lo yona' kwenche bi'ene' yel' choxken. Na' beena' ben ka' nake' beṇ' Samaria. ¹⁷ Na'ch che' Jesúza':

—¿Aaga shigaken' biyaki? ¿Garaṇ beṇ'ka' zi ga? ¹⁸ ¿Atochga beṇ' zitiin bibi'e choe'lawee Chioza'?

¹⁹ Na'ch che' Jesúza' beena':

—Bizolla' na' biyaj. Ba biyakilo' daa wyajli'o' cha'.

Yel' wñabia' che Chioza'

(Mt. 24:23-28, 36-41)

²⁰ Na'ch wñabi fariseoka' Jesúza' batran solo inabia' Chioza' lo yell-lioni. Na' chi'e legake':

—Ka nak yel' wñabia' che Chioza', aga nakan ka to dii ile'tekzicho.

²¹ Aga no ina: “Ni chñabia' Chioza'”, wa “Na' chñabi'e”, la' ladjenikzan ba bla' yel' wñabia' che'na'.

²² Na'ch chi'e ben'ka' nakgake'ne' txen:

—Wllin lla kat' gaklall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'. ²³ Na' ichej ben' ine': “Ni zoe'”, wa “Na' zoe'.” Na' bi shajle, ni bi gonle ben'ka' txen. ²⁴ La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni. ²⁵ Na' chonan byen zigaate biya daa yen ile'id', na' ben'ki zoa naa wzoagake' nad' ka'la. ²⁶ Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni. ²⁷ Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' blinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha lawinna' nisa', na' blliai'y'n yog'lole'. ²⁸ Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. ²⁹ Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'. ³⁰ Na' ka'kzan gak llana' kat' yiyed', nad', Ben' Bsel' Chioza' Yell-lioni.

³¹ 'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetje' kwenche lljaleje'n. Na' shi to ben' zeje' lyixaa, bi yiyajze' lille'na'. ³² Li lljadini ka gok che dii xool Lota'. ³³ Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kanj.

³⁴ Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan. ³⁵ Na' gana' lle' chop noolə chotgake', toe' yichi'a na' stoe' yigaan. ³⁶ Na' chop ben' byo chongake' llin lyixaa, toe' yichi'a na' beena' sto yigaane'.

³⁷ Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

18

Jempl che to nool wizeb na' to ben' wen yel' joschis

¹ Na' bzoa Jesúza' to jempl kwenche bli' bsedile' legake' bi lljshyagakile' we'llwillgake' Chioza'. ² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. ³ Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.”

⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon', ⁵ gonch' yel' joschis che nooli kwenche bich yidyembeguile' nad'.”

⁶ Na' Xancho Jesúza' chi'e legake':

—Li wzenag ka ben ben' wen yeḷ' joschisa', beena' bi chall chlleb Chioza'. ⁷ ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'ḷwillgake'ne' ka waḷ ka tella? ¿Awllaile' gaklene' ḷegake'? ⁸ Bi nakan ka', san nia' le' katena' gaklene' ḷegake'. Per kat' zizaa, nad', Ben' Bseḷ' Chioza' Yell-lioni, ¿alle'ch ben' nonḷilall' nad' yell-lioni, lla?

Jempl che to fariseo na' to ben' wichixj

⁹ Na' bzoa Jesúza' sto jempl che ben'ka' chakgakile' nakgake' ben' wen lao Chioza' na' chongakile' ben' yoblə nakzi. Na' wne':

¹⁰ —Chop ben' wyajgake' yoodo'na' kwenche je'ḷwillgake' Chioza'. Toe' nake' fariseo na' beena' sto nake' ben' wichixj. ¹¹ Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwey yichj' nool cha'na' kwenche soalen' nool yoblə, na' ni bi chon' ka chon ben' wichixji. ¹² Chop shii to xman chzoa' wbas', na' lawi yog' daa chon' gan chbej' daa chidoḷoo ikoo.”* ¹³ Na' ben' wichixja', zit'lə wzie' na' ni bi biyaxjile' wḷis lawe'na' wwie' yabana', san chballee cho'a lcho'ena' chi'e: “jChios cha', biyesh'gachi nad' daa nak' ben' saaxya!” ¹⁴ Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chakile' bibi zakee, Chioza' gone'ne' ben' choo ben' xen.

Benleey Jesúza' bi'do'ka'

(Mt. 19:13-15; Mr. 10:13-16)

¹⁵ Na' lekzka' ben' zan jwa' bi'do' che'ka' lao Jesúza' kwenche bxoā neena' yichjb'ka' na' wnable' Chioza' gaklene'gakb'. Na' ka ble'i ben'ka' nakgake'ne' txen, bsheshlengake' ḷegake'. ¹⁶ Na' Jesúza' goxe' bi'do'ka', na' chi'e ben'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chnabi'e ḷoo yichjlall'do' ben'ka' nak ka ḷegakb'. ¹⁷ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To ben' zakii ben' nak ben' wni'a be'lene' Jesúza' dill'

(Mt. 19:16-30; Mr. 10:17-31)

¹⁸ To ben' zakii wnable' Jesúza', chi'ene':

—Maestro, li' nako' ben' wen. Wna nad' beran chiyaḷ' gon' kwenche gat' to yeḷ' mban cha' zejli kani.

¹⁹ Na'ch che' Jesúza'ne':

—¿Berache nazo' nad' ben' wen? Toz Chioza' nake' ben' wen. ²⁰ Ba nezkiḷo' daa nllia Chioza' bia' goncho: “Bi soaleno' nool bi nak nool cho', bi wito' ben', bi kwano', bi chiljalloo bizə gon ino' che ben', na' wdap balaan xaxnoo.”

²¹ Na'ch che' beena'ne':

—Kana' naktia' bi' xkwid' chon' yog' diika'.

²² Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n ben' yesh'ka'. Na' shi gono' ka', na' gat' to yeḷ' shao' cho' yabana'. Na' da, dino' nad'.

* **18:12** Daa chidoḷoo ikoo: literalmente la décima parte.

23 Na' ka beni beena' ka goll Jesúza'ne', le gokyeshile', la' beñ' wni'a nleban'. 24 Na' ka ble'i Jesúza' le gokyeshile', na' chi'e:

—iLallj inleeb chonan che beñ' wni'aka' we'gake' latj inabia' Chioza' legake'! 25 Lobe'ch te to kamey xan yeshaa aga ka to beñ' wni'a yiyoe yabana'.

26 Na' beñ'ka' beni, gollgake'ne':

—¿Noran yila shka'?

27 Na'ch che' Jesúza' legake':

—Daa bi chak gon beñ'cha', Chioza' chak gone'n.

28 Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

29 Na'ch che' Jesúza' legake':

—Dii li nia' le', nottezə beñ' ba bzanile' no lille', no xaxnee, no beñ' bishee, no beñ' zane', no xiin xoole' kwenche cho'e latj chñabia' Chioza'ne', 30 Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to ye! mban zejli kani.

De wyon shii wdixjee Jesúza' guete'

(Mt. 20:17-19; Mr. 10:32-34)

31 Na'ch wlej Jesúza' beñ'ka' shllin ka'lə, beñ'ka' nakgake'ne' txen, chi'e legake':

—Dga ziyajcho Jerusalenna' naa, yillinin daa bzej dii beñ'ka' wdixjee daa goll Chioza' kani'yi daa gak cha', nad', Beñ' Bsel' Chioza' Yell-lioni.

32 La' gongake' nad' lo na' beñ'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. 33 Na' wit chingake' nad' na'tech witgake' nad', na' yiyon lla yiban' ladj beñ' wetka'.

34 Na' beñ'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesúza' to beñ' lcho! yell Jericóna'

(Mt. 20:29-34; Mr. 10:46-52)

35 Na' ka ba chillin Jesúza' yell Jericóna', na' chi' to beñ' lcho! cho'a neza' chñabile' beñ' yiyesh'lall'gakile'ne' we'gake' lat' wej xmeche'. 36 Na' ka benile' chde beñ' zan na'ch wñabe' bin chak. 37 Na' gollgake'ne':

—Jesús, beñ' Nazaretan', chda ni.

38 Na'ch besyee, chi'e:

—iJesús, Xiin dia che dii Daví, biyesh'lall'gachi nad'!

39 Na' beñ'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—iXiin dia che dii Daví, biyesh'lall'gachi nad'!

40 Na'ch wlez Jesúza' na' bene' mandad lljxi'gake'ne'. Na' ka bllin beñ' lchola' lawe'na' na'ch wñabile'ne':

41 —¿Beran cheenilo' gon' cho'?

Na'ch che' beñ' lchola'ne':

—Xan', cheenid' ile'id'.

42 Na'ch che' Jesúza'ne':

—Daa ba chonlilalloo nad' na' ile'ilo'.

43 Na' katena' lii bile'teile', na'ch janoe' Jesúza' choe'lawee Chioza'. Na' yog' beñ'ka' ble'i daa ben Jesúza' be'la'ogake' Chioza'.

19

Jesúza' na' Zaquewa'

¹ Na'ch bllin Jesúza' yell Jericóna' na' wdie' gchol yella'. ² Na' yella' zoa to ben' wni'a lie' Zaqueo, na' ngoo lall' nee xonj wichixjka'. ³ Na' goklallee ile'ile' Jesúza', per bi gok ile'ile'ne' daa nake' ben' bchekwdo' na' daa zejlen Jesúza' ben' zan. ⁴ Na'ch wllialodoe' lawe'ka' na' wyepe' to lo yag xen kwenche ile'ile'ne' ka tie'. ⁵ Na' ka bllin Jesúza' xan yaga', na' blis lawe'na' chi'ene':

—Zaqueo, btalalloo biyetj, la' lillo'nan' yigaana' naa.

⁶ Na'ch biyetjdo Zaquewa' chibaile' bichi'e Jesúza' lille'na'. ⁷ Na' ka ble'i ben'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill ben' saaxyani, na.

⁸ Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' ben' yesh'ka', na' yog' ben'ka' ba bchixj' dii xench, yiyoe'gakee taplə ka daa ba wlan' chegake'.

⁹ Na'ch che' Jesúza'ne':

—Naaanlla ba bisla Chioza' ben'ki zoa loo yooni kwenche bi kwiaiy'gake', daa len Zaquewi nake' xiin dia che dii Abrahama'. ¹⁰ La' ka nak' nad', Ben' Bsel' Chioza' Yell-lioni, bid' kwenche yiyilj' na' yisla' ben'ka' yoo nez daa wlliaiy'n legake'.

Jempl che beena' bkwaanlen wen llin che'ka' mech

¹¹ Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalenna' na' legake' gogkakile' daa nake' ben' bsel' Chioza' lii solotie' inabi'e. ¹² Na'ch chi'e legake':

—To ben' zakii bcheje' wyaje' to yell zit' wal kwenche lljalane' yej' wñabia' che lalle'na', na' ka yilline' inabi'e. ¹³ Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mech, li gonlenan delgens shlak bi soa'.” ¹⁴ Na' ben' wlall che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto'.” ¹⁵ Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'. ¹⁶ Na' ka bllin ben' necha' lawe'na' na' chi'ene': “Xan', xmecho'na' bkwaan'leno' nad' bena' gan shin.” ¹⁷ Na'ch ben' wñabia'na' chi'ene': “Wenkzan beno'. Daa beno' ka chiya' kon lat' mecha' bkwaanlen' li', wzoa' li' inabi'o shi yell.” ¹⁸ Na' ka bllin beena' sto lawe'na' na' chi'ene': “Xan', xmecho'na' bkwaan'leno' nad' bena' gan gayaan.” ¹⁹ Na' lekzka' chi'e beena': “Wzoa' li' inabi'o gay' yell.” ²⁰ Na'ch bllin stoe' lawe'na' na' chi'ene': “Xan', ni de xmecho'na' bkwaan'leno' nad'. Blall'tipteza'n to lech' na' wlooshawaan ²¹ daa bbleb' li', la' le ben' zña nako'. Chkaatezo' dii bi naki cho', na' chizi' chilaptezo' dii goz goon ben' yoblə.” ²² Na'ch che' ben' wñabia'na' le': “Bikzbi yejni'alalli beno'. Kon ka ba wno' ka'kzan gak cho'. Nezilo' nak' ben' zña, na' chkaatez' dii bi naki cha' na' chizi' chilap' dii goz goon ben' yoblə. ²³ Na' daa nezilo' ka' chon', çberache ki bi'o xmechaa gon yichjin kwenche yikaan naa ba biyed'?” ²⁴ Na'ch chi'e ben'ka' lle' na': “Li yikaa mecha' daa bi'ane' na' li we'n beena' bene' gan shin.” ²⁵ Na'ch che' ben'ka'ne': “Xan', ba napkzə beena' shin.” ²⁶ Na' che' ben' wñabia'na' legake': “Nia' le', beena' chonlene' llin daa yoo lo nee, wakch lall' nee dii xench; san beena' bi chonlene'

llin daa yoo lo nee, axt daa ngoo lo nee lat' yidooyo. ²⁷ Na' ka nak beṅ'ka' chakzbangakile' nad', beṅ'ka' bi cheengakile' inabi'a, li lljxi'gake' ni na' li witgake' ile'teid'."

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

²⁸ Na' ka wde wna Jesúza' ka', na'ch bigoolene' nez beṅ'ka' nakgake'ne' txen ziyajgake' Jerusalénna'. ²⁹ Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop beṅ'ka' nakgake'ne' txen, ³⁰ na' chi'e legake':

—Li shaj yella' llia na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə. ³¹ Na' shi no inaz le': "¿Berache chsellzeb?", na' ye'lene': "Xanchonan' chyalljile'b."

³² Na'ch wyaj beṅ'ka' bselee, na' ka bllingake' ble'gakile' to burr chbando' da'b yag, kon kayen' goll Jesúza' legake'. ³³ Na' ka chsellgake' burra' na'ch che' xama' legake':

—¿Berache chsell-leb?

³⁴ Na'ch che'gake'ne':

—Xanchonan' chyalljile'b.

³⁵ Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blliangake' Jesúza' koll'ba'. ³⁶ Na' shlak zej Jesúza' llie' burra', chshilj xa beṅ'ka' tlo neza'. ³⁷ Na' ka ba chillingake' gaozə gana' chiyetj nez daa ziza' Yaa Olivoza', yog'lol beṅ'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' ye'l' wakka' bene'. ³⁸ Na'ch nagake':

—jGaklenshga Xancho Chioza' beeni ba bselee inabi'e! jLi da, we'la'ocho Chioza' zoa yabana' daa bene' ka zوالenchone' mbalaz!

³⁹ Na' bal' fariseoka' len ladj beṅ'ka' no Jesúza', che'gake'ne':

—Maestro, goll beṅ'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi beṅ'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalénna', gokyeshile' ka ble'ile'n na' wchelle' che beṅ'ka' zoa na'. ⁴² Na' chi'e:

—jShe'l'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. ⁴³ Wllin lla ila' beṅ'ka' chakzbangakile' le' na' wzechjgake' yelli leej na' kono gak sho' ichej. ⁴⁴ Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' beṅ'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' beṅ'ka' chit' chde.

⁴⁶ Na' chi'e legake':

—Cho'a Xtill' Chioza' nan: "Lilla'na' nakan ga choe'lwill beṅ' nad'", na' le' naa ba nonzlen ka to ga chdop chllag wban.

⁴⁷ Na' yog' lla bli' bsemi Jesúza' beṅ' gana' zoa yoodo'na', na' bxoazka' chnabia' na' beṅ'ka' chli' chsedi leya' na' nochlə beṅ' wṅabia' che beṅ' Israelka' la'kzi biyiljlall'gake' naklə gongake' kwenche witgake'ne' ⁴⁸ bikzə bi gok gongake', la' yog'zə beṅ' chibagakile' chzenaggake' dill'ka' cho'e.

20

Yel' wnabia' che Jesúza'

(Mt. 21:23-27; Mr. 11:27-33)

¹ Na' bllin to lla, shlak chli' chsedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin b̄oxzka' chñabia' na' ben'ka' chli' chsedi leya' len beñ' golka' chñabia'. ² Na' che'gake'ne':

—Wnashki neto', ¿bi yel' wnabia' napo' chono' diiki? Na' ¿nora beñ li' yel' wnabia'ni?

³ Na'ch che' Jesúza' legake':

—Lekzka' nad' de to dii inabid' le', li inashki nad': ⁴ ¿Noran bsel' Juanna' kwenche bidchoe' beñ' nisa'? ¿AChiozan' bseleene'? ¿Anti beñ' yell-liona'zan bseleene', lla?

⁵ Na'ch wzologake' choe'len ljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' in'e' cho': “¿Berache ki wyajle'le che', shka'?” ⁶ Na' shi yize'chone' nozə beñ' bseleene', yog' beñ'ki wliagake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷ Na'ch gollgake' Jesúza':

—Bi nezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran beñ nad' yel' wnabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹ Na' Jesúza' bseese to jempl lao ben'ka' lle' na':

—To beñ' billee yag uva, na' bene'n lall' na' beñ'ka' gap wwian, na' wzee wyaje' ssha gan yoblə. ¹⁰ Na' ka bizi' bilap beñ'ka' uvana', xaninna' bselee to wen llin che' kwenche lljelle' beñ'ka' nak lall' na'gake' yag uvaka' we'gake'ne' daa chidolee yikee. Na' beñ'ka' chapgake' yag uvaka' beñ'gake'ne' bet wdingake'ne', na'tech bilaggake'ne' to ka' che'. ¹¹ Na'ch bselee sto wen llin che'na'. Na' lekzka' bet wdingake'ne', na' biya dii ben-gakile'ne', na' bizlaggake'ne' to ka' che'. ¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'.” ¹⁴ Na' ka ble'i beñ'ka' chap yag uvaka' xiine'na', na'ch che' ljwelle': “Bi'nin yigaanlem' yell-lioni. Li da witchob' kwenche yigaanlenchon.” ¹⁵ Na' wlejgake'b' gana' lle' yag uvaka' na' betgake'b'.

Na'ch wnabi Jesúza' beñ'ka' chzenag:

—¿Nakra ka chakile goni xan yag uvaka' beñ'ka', lla? ¹⁶ Ba nakten shaje' na' lljete' beñ'ka' chap yag uva che'na' na' yiyone' yell-lio che'na' lall' na' beñ' yoblə.

Na' ka beni beñ'ka' wne' ka', na' wnagake':

—iBat we' Chioza' latj gak ka'!

¹⁷ Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:

Yaja' daa bi wyoolall' wen yooka',
leyen'lannan' yaja' daa ba nchejcha yoon'a?

¹⁸ Nottezə beñ' lljchaze' lawinna' kwiajee, na' shi idakwan beñ', axt wshoshjan le'.

Janabgakile' Jesúza' shi chiyał' chixjgake' daa chñab beena' chñabia' Rómana'

(Mt. 21:45-46; 22:15-22; Mr. 12:12-17)

¹⁹ Na' b̄xozka' chñabia' na' ben'ka' chli' chsedi leya' goklall'gake' gox'gake' Jesúza' ka biyoll golle' ka', la' gokbe'gakile' chezgaken' wñie' daa bi chajle'gake' che'. Per bllebgake' ben'ka' ndop nllag na'. ²⁰ Na'ch bsel'gake' to chop ben' wiwia wiyi, na' bentezgake' ka ben' cheenchgayi wzenag che'. Per aga do lall'gaken' wyajgake', san kwenchezə kweyjel-gakile' Jesúzan' na' lljadaogake' xya che' lao beena' chñabia' gana' mbani Judeana'. ²¹ Na' wñabgakile'ne':

—Maestro, nezinto' daa no' na' daa chli'o nakan dii li, na' aga chwio' nak nak ben', shi nake' ben' zakii wa shi bi nake'. Nezinto' chli'o nez li che Chioza' kon ka nakan. ²² Wnashki neto': ¿Achiyał' chixjcho daa chñab Césara', beena' chñabia', anti bi chiyał' chixjchon?

²³ Na' gokbe'i Jesúza' aga do lall'gaken' wñabgakile'ne', na'ch chi'e:

²⁴ —Li wli'shkayı nad' to mech. ¿Nora cho'alawın na' no leyın da'n?

Na' che'gake'ne':

—Che Césaran', beena' chñabia' Rómana'.

²⁵ Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

²⁶ Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wñabgakile' Jesúza' nak gak kat' yiban ben' wetka'

(Mt. 22:23-33; Mr. 12:18-27)

²⁷ Ka wde dga, bllin bał saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

²⁸ —Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiyał' yikee nool wizeba' kwenche soa xiin dia che dii ben' bisheena'. ²⁹ Ki gok to shii, wzoa gall bish' ben', na' ben' necha' bshagne, na' wite' na' kono xiine' wzoa. ³⁰ Na' ben' wchopina' bikee noola, na' lekzka' wite' na' kono xiine' wzoa. ³¹ Na' ben' wyoñina', lekzka' bizkee noola, na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'. ³² Na' ka bllin lla lekzka' wit noola'. ³³ Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

³⁴ Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' yeł' wishagna' che xiine'ka'. ³⁵ San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', ³⁶ ni koch no guet, san soagake' ka zoa anjlka'. Na' gakgake' xiin Chios daa ba bisbane' legake' ladj ben' wetka'. ³⁷ Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'nin. Na' wne' Xancho Chioza' nake' Chios che Abrahamá', Isaaca' na' Jacoba'. ³⁸ Na' Chioza' aga nake' Chios che ben' wet, san nake' Chios che ben' de yeł' mban cheyin. La' yog'lol ben' nxenilallii Chioza', dekzə yeł' mban chegake'.

³⁹ Na'ch bał ben'ka' chli' chsedi leya' gollgake'ne':

—Maestro, ka ba wñayenoon nakan.

40 Na' bich bi biyaxjchgakile' inabchgakile'ne'.

Crístona' nake' xiin dia che dii Davina'
(Mt. 22:41-46; Mr. 12:35-37)

41 Na' che' Jesúza' legake':

—¿Berache nazə ben' Crístona' nake' xiin dia che dii Davina'?, 42 len kwín dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

43 shlak wzoa' xni'ona' ben'ka' chakzbani li'.”

44 ¿Berache chakzile Crístona' nake' xiin dia che dii Davina', len kwín Davina' golle'ne': “Xan”?

Jesúza' wne' nan ben'ka' chli' chsedi leya' chongake' mal
(Mt. 23:1-36; Mr. 12:38-40; Lc. 11:37-54)

45 Na' shlak chzenag yog' ben'ka' lle' na', Jesúza' golle' ben'ka' nalgake'ne' txen:

46 —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheengakile' yog'zə ben' gaggake' legake' balaan ladj lkwe' ben'. Na' gana' chdop chllagcho choe'llwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw. 47 Na' lekzka' chkaatezgake' lill nool wizebka', na' chongake' ka chshaljlen Chioza' ssha nllab kwenche' gaki ben' le wen chongake'. Na' daa chongake' ka', ba naktén ile'gakile' yel' zak'zi' wala'.

21

Daa bzani to nool wizeb, bi'en Chioza'
(Mr. 12:41-44)

1 Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'. 2 Na' lekzka' ble'ile' to nool yesh', ben' wizeb, wlo'e chop sintabdo'. 3 Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'. 4 La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyalljile'n.

Jesúza' chi'e wllin to lla kwiaiyi' yoodo'na'
(Mt. 24:1-2; Mr. 13:1-2)

5 Na' bal' ben'ka' choe'gake' xtill' yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

6 —Ka nak diiki chwiale' naa, wllin lla kwiaiyi' yogaan, ni sto yaj bich kwia koll' ljjwellin.

Diika' gak kat' ba zoa te che yell-lioni
(Mt. 24:3-28; Mr. 13:3-23)

7 Na'ch wñabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche' inezinto' nan ba zoa gaoshosh gakan?

8 Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': “Nadaan Crístona”, na' lekzka' inazgake': “Ba bllin lla kwiaiyi' yell-lioni.” Bi gonle legake' txen. 9 Na' ka yenile' chak no wdil wa chtop chshag ljjwell ben' kwenche' soshiy'gake' ben' wñabia'ka', bi

illeble. Chonan byen zigaate gak diiki, per aga lii tete che yell-lioni kat' ba chakgakan.

¹⁰ Na'ch golle' legake':

—Ganga kwe' wdila' na' til yell kon yell. ¹¹ Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

¹² 'Na' ka zi gak diiki, gox'gake' le' na' biya dii gongakile' le'. Na' lljwa'gake' le' gana' chdop chillagcho choe'lwil-cho Chioza' na' yiya yiy-iljgake' le' na' koogake' le' lillya, na' lljwa'gake' le' lao ben' wñabia' xenka' na' lao ben' wñabia'ka' sto ni cha'. ¹³ Na' kat' gak chele ka', na'chlə gat' latj we'le cho'a xtillaana' lawe'ka'. ¹⁴ Na' bi sezle wñeyi naklə inale kat' lljsele lao ben' wñabia'ka', ¹⁵ la' nad'kzan wzajniid' le' nakan inale na' gon' le' yel' sin'na' kwenche ni to ben'ka' chakzbangakile' le' bi sogakile' inagake' bi nakan ka nale. ¹⁶ Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wñabia'ka', na' witgake' bal-le. ¹⁷ Na' ax't yog'zə ben' gakszbangakile' le' daa nonlilall'le nad'. ¹⁸ Per li koo yichjle, Chioza' gaklene' le' na' ni tlish' yish' yichjləna' bi kwiayi'. ¹⁹ Na' shi sechale lawi daa yen ile'ile na' bi gaxchoplall'le, na'chan gat' to yel' mban chele dii bi te cheyin.

²⁰ 'Na' kat' ile'ile neçh' soldadka' Jerusalenni, kanan' inezile nan ba zoa kwiayi'n. ²¹ Na'ch ben'ka' lle' gani mbani Judeani, chiyal' wxonjgake' lljakwash'gake' do yaa yaoka', na' ben'ka' lle' yelli, chiyal' wxonjgake', na' ben'ka' zej lyixaa, bichoklə yiyedgake' yelli. ²² La' kanan' gon Chioza' yel' zi' che yog'ze' kwenche yillinin doxen ka na Cho'a Xtilleena'. ²³ Nyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i ben' Israelki. ²⁴ Balgake' guet lo wdila' na' zi bale' wche'gake' pres yell zit'ka'. Na' ben' zit'ka' wlej wshoshjgake' yell Jerusalenni ax't kat'ch illin lla yiyoll yido ka llia bia' gongake'.

Kat'ka' yiyed Jesúza'

(Mt. 24:29-35, 42-44; Mr. 13:24-37)

²⁵ 'Na' lo wbillal', lo bewaa na'ch lo beljka' gak dii gonan ka yibani ben'. Na' ben'ka' lle' yell-lioni gakshejlall'gake' na' illebgake' kat' gon nisdona' sshag wal daa so' kwe'n. ²⁶ Na' ax't ichol'-lall' ben' daa chllebgake' kwiayi'lengake' yell-lioni, la' ax't yog' diika' llia xan yabana' inibgakan. ²⁷ Na'ch ile'gakile' nad', Ben' Bsel' Chioza' Yell-lioni, zizaa to lo bej kon yel' wak xen na' balaan xen. ²⁸ Na' kat' solo gak diiki, li wtipch lall'le, la' ba zoa gaoshosh yidsla' len'.

²⁹ Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlə yag. ³⁰ Kat' chle'ile ba chibia xlaguiinka', chakbe'ile ba zoa yiyoo la'o linna'. ³¹ Ka'kzə, kat' ile'ile ba chak diiki ba wnia', chiyal' inezile ba zoa gao wli' Chioza' yel' wñabia' che'na'.

³² 'Dii li nia' le', aga ba wit ben'ka' zoa naa kat' gak yog' diiki. ³³ 'Yabana' na' yell-lioni te chegakin, san cho'a xtillaana' aga wde bi gak ka nan.

³⁴ 'Li wsak' bi we'le latj sho' diika' wxinjan yichjlall'do'ləna'. Bi wlanzle yel' weezo, na' bi sezle wñeyi bi chak chele. Li wsak' kwenche aga sha chel-le chon llana' zizaa. ³⁵ La' tokonganzan gak diiki yen ile'i yog'te ben'ka' lle' doxen yell-lioni. ³⁶ Na' le', li se wñeyi, li inabi Chioza' toshiizi gaklene' le' kwenche yilale lao yog' diiki llia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

³⁷ Na' Jesúza' bli' bsedile' ben' yog' lla yoodo'na', na' ka chal, chjagaane' lo Yaa Olívoza'. ³⁸ Na' yog' zil yog' ben' chajgake' yoodo'na' chjazenaggake' daa chli' chsedile'.

22

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ba zoa gaozə lni Paskwa' kat' chaogake' yetxtil daa bi nchix levadúrana'. ² Na' bꝑozka' chnabia' len ben'ka' chli' chsedi leya' chiy-iljlall'gake' naklə gongake' witgake' Jesúza' ka kono gakbe'i, la' blleb'gake' shi bi goni ben' wllall che'ka' legake'.

³ Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen ben'ka' shllin. ⁴ Na' wyaje' lao bꝑozka' chnabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'. ⁵ Na' le bibagakile' na' bchebgake' we'gake'ne' mech. ⁶ Na'ch bchebe' gone'ne' lall' na'gake'. Na' wzolo chinoe' batan gat' latj kat' kono ben' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Na' bllin llana' chsini'agake' che lnina', llana' chzolo chaogake' yetxtil daa bi' nchix levadúrana' na' chitgake' to xil'do', bana' gaogake' lle' Paskwa'. ⁸ Na'ch wlej Jesúza' Pédrone' len Juanna' na' chi'e legake':

—Li lljasini'a daa gaocho lni Paskwi.

⁹ Na'ch che'gake'ne':

—¿Garan cheenilo' lljasini'anto'n?

¹⁰ Na' che' Jesúza' legake':

—Ka sho'le Jerusalenna', na' ile'ile to ben' byo zino'e to chee nis, na' li lljanoe' axt yoona' gana' yilline'. ¹¹ Na' ye'le xan yoona': “Maestrona' chnabile' li': ¿Garan zoa yoona' wyoone' gana' gaolene' ben'ka' nakgake'ne' txen lle' Paskwi?” ¹² Na' wliile' le' to yoo xen dii lla shkwiana' cha'lə ga ba nonshao'tie'. Nan' wsini'ale daa gaocho xshe'na'.

¹³ Na' wloogake' nez zejgake', na' kon kayen' golle' legake' gok. Na' bsini'agake' daa wdaogake' lle' lni Paskwa'.

¹⁴ Na' ka gol' gaogake' xshe'na', Jesúza' wche'lene' postl che'ka' cho'a mesa'. ¹⁵ Na'ch chi'e legake':

—Ba goklall'chga' yeej gaolen' le' lni Paskwi naa bin' witgake' nad'. ¹⁶ Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yel' wñabia' xen che'na', kana'ch yeej gawa'n dii yoblə.

¹⁷ Na' beꝑee kopa' na' bi'e Chioza' yel' choꝑken, na' chi'e:

—Li goꝑ' dga, li yeejan lat' wej. ¹⁸ Na' nia' le', bichga yeej' nis uvani axt ki illin lla wli' Chioza' yel' wñabia' xen che'na'.

¹⁹ Na'ch beꝑee yetxtila' na' bi'e yel' choꝑken Chioza'. Na' bꝑoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

²⁰ Na' lekzka' bene' ka wde wdaogake' xshe'na', beꝑee kopa' sto shii, na'ch chi'e:

—Dga yoll loo kopi zejín xchen'na' daa laljə ni chele daa gonan ka gakli dii koba' bcheb Chioza' gone'.

21 'Na' naa, beena' gone' nad' lo na' beṇ'ka' chakzi'gakile' nad' chi'lene' nad' cho'a meso. 22 La' ba bllin lla gak ka nak daa llia bia' gak cha', nad', Beṇ' Bsel' Chioza' Yell-lioni, per jnyesh'laz gak che beena' gone' nad' lo na' beṇ' malka'!

23 Na'ch beṇ'ka' nakgake'ne' txen wzologake' chṇabi ljwellgake' noen' gone'ne' lo na' beṇ'ka'.

Gokgued beṇ'ka' nak Jesúza' txen nogaken' zak'chi

24 Na' lekzka' chakdil-len ljwellgake' nogaken' nak beṇ' zak'chi. 25 Na' che' Jesúza' legake':

—Zoa beṇ' wṇabia' to to nación, na' chongake' byen chzenag beṇ' chegake' na' nagake' che kwingake' le chaklengake' beṇ'. 26 San le', bi chiyal' gonle ka'. Shi nole nakle beṇ' zakii, chiyal' wṇhek' yichjle ka to bi' xkwid', na' shi nole chṇabia', chiyal' gonle ka nottezə beṇ' wen mandad. 27 ¿Noran nak beṇ' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' beṇ' zak'chi. San nad', la'kzi naktia' xanle, zoa' ladjleni ka to beṇ' wen mandad chele.

28 'Le' ba wzoalenle nad' lao yog'te daa ba gok cha'. 29 Na' daan, gon' le' yel' wṇabia'na' ka daa beṇ' Xa'na' nad'. 30 Na' yeej gaolenle nad' gana' inabi'a. Na' kwe'le gana' inabia'le yizi'le kwent che shllin kwen beṇ'ka' nak xiin dia che dii Israela'.

Jesúza' wne' bi wṇheb Pédrona' shi nombi'ene'

(Mt. 26:31-35; Mr. 14:27-31; Jn. 13:36-38)

31 Na' lekzka' golle' Simón Pédrona':

—Simón, Simón, Satanáza', daa chṇabia' dii xiw'ka', ba wṇaban le' gake lo na'yin kwenche gondinj gonganin le'. 32 Na' nad' ba wṇabid' Chioza' gaklene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gakleno' beṇ'ki nako' txen kwenche soachechgake' gonlilall'gake' nad'.

33 Na' che' Simónna':

—Xan', ba nchogllalaa laa lillyana' sa'len' li' wa axt guetlen' li' txen.

34 Na' che' Jesúza':

—Pedro, nia' li', naanlle' shon shii bi wṇhebo' shi nombi'o nad' ka zi' kwell shikwteza'.

Ba zoa gaaz wtil Jesúza' daa gak che'

35 Na'ch che' Jesúza' legake':

—¿Azyalljile bi byalljile kana' bselaa le' na' bibi beṇ'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

36 Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. 37 Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to beṇ' wen dii mal.”

38 Na' che'gake':

—Xan', ni napnto' chop spad.

Na' chi'e:

—Lliz li soachokla.

*Be'lwil Jesúza' Chioza' gana' le Getsemani'**(Mt. 26:36-46; Mr. 14:32-42)*

³⁹ Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano beñ'ka' nakgake'ne' txen. ⁴⁰ Na' ka bllingake' latja', na' chi'e legake':
—Li we'lwil Chioza' kwenche bi we'zle latj gon beli chenna' le' gan.

⁴¹ Na' bkwase' kwite'ka', ka to ga zeelo chllin to yaj dii chza'cho, na'ch bçhek' xibe'na' be'lwille' Chioza'. ⁴² Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

⁴³ Na'ch bli'lao to anjl beñ' za' yabana' le', na' biyo'ene' fuerz. ⁴⁴ Na' daa le chakyesh'chgaile', zizikli be'lwilche' Chioza' axt biyaklolje'. Na' nis yes che'na' daa chxop lo yona' nakan ka to blon wej chen.

⁴⁵ Biyoll be'lwille' Chioza', na' bizollee biyaje' gana' lle' beñ'ka' nakgake'ne' txen, na' ka billine' kwite'ka' ba chesgake' daa chakyesh'gakile'. ⁴⁶ Na' chi'e legake':

—¿Berache cheszle? Li çhas na' li we'lwil Chioza' kwenche bi we'zle latj gon beli chenna' le' gan.

*Bex'gake' Jesúza'**(Mt. 26:47-56; Mr. 14:43-50; Jn. 18:2-11)*

⁴⁷ Ni choe'te Jesúza' dill', ka bllin beñ' zan, na' beena' le Jud, beena' nak txen beñ'ka' shllin, nchi'e legake'. Na' ka blline' jabigüee kwit Jesúza' na' bnopé' xagueena'. ⁴⁸ Na'ch che' Jesúza'ne':

—Jud, çakon dga bnopo' nad' chono' nad', Beñ' Bsel' Chioza' Yell-lioni, lo na' beñ'ki?

⁴⁹ Na' beñ'ka' lle'len Jesúza', ka ble'gakile' ka ba chak che', na'ch gollgake'ne':

—Xan', çawniayinto' spadki?

⁵⁰ Na' toe' lii wdintie'n to mos che bçoz choo bçoz xenna' bçhogtie' nague' de shljina'. ⁵¹ Na' che' Jesúza':

—Bich bi gonile beñ'ka'.

Na'ch bida' Jesúza' nag beena'. ⁵² Na' daa bllin bçozka' chñabia' len beñ'ka' chap yoodo'na', na' beñ' golka' chñabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidnizle nad' ka to no beñ' wban? ⁵³ Yog' lla wzoa' ladjlena' yoodo'na' na' bi bex'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj shçhol.

*Bi bçheb Pédróna' shi nombi'e Jesúza'**(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

⁵⁴ Na'ch bnizgake' Jesúza' na' bçhe'gake'ne' lill bçoz choo bçoz xenna', na' zit' zit'lə zjano Pédróna'ne'. ⁵⁵ Na' bxengake' yi'na' lesh' chyoo che bçoz choo bçoz xenna' na' wche'gake' cho'a yi'na', na' wlen Pédróna' legake'. ⁵⁶ Na' to noolə wen mandad, ka ble'ile' chi' Pédróna' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

⁵⁷ Na' Pédróna' aga bçhebe', na' chi'ene':

—Noolə, aga nombi'a beena'.

⁵⁸ Na' gokzə xtit bizle'i beñ' yoblə Pédróna' na' chizi'ene':

—Lekzka' lenon' nako' beñ'ka' txen.

Na' Pédróna' chi'ene':
—Bi len' nak' ben'ka' txen.

⁵⁹ Na' wizak ka do zi' tgor na' wize' sto ben' yobla:

—Dii likzan len beeni nake' txen Jesúza' la' lekzka' ben' Galilean.

⁶⁰ Na'ch che' Pédróna'ne':

—iNi bi nezid' bi dillaan choo!

Na' ni che'telə Pédróna' ka', ka wchell to shikwtez. ⁶¹ Na'ch biyechj Xancho Jesúza' bwie' Pédróna', na' Pédróna' jadinile' daa golle'ne', kana' chi'e: “Naanlle' shon shii bi wchebo' shi nombi'o nad' ka zi' kwell shikwteza.” ⁶² Na' bichej Pédróna' gana' lle' ben'ka' na' wchellyeshee.

Btitiġgākile' Jesúza'

(Mt. 26:67-68; Mr. 14:65)

⁶³ Na'ch ben'ka' chapgake' Jesúza' btitiġgākile'ne' na' wdap' wllall'gake'ne'. ⁶⁴ Na' bsejgake' jalawe'na', na'ch wllall'gake'ne', che'gake'ne':

—iWnashki non wllall' li'!

⁶⁵ Na' biya dii gollgake'ne' kwenche' gākile' zi'.

Wde Jesúza' lao ben'ka' chñabia'gake' ben' Israelka'

(Mt. 26:59-66; Mr. 14:55-64; Jn. 18:19-24)

⁶⁶ Na' ka wyeeni', bidop ben'ka' chñabia' ben' Israelka', len bñozka' chñabia' na' ben'ka' chli' chsedi leya'. Na' bdegake' Jesúza' lawe'ka'. Na'ch wñabgākile'ne', che'gake':

⁶⁷ —Wnashki neto' shi li'kzan Crístona', beena' chbeznto'.

Na' che' Jesúza':

—Shi inia' le': “Awe, nadaan”, aga wyajle'le' cha'. ⁶⁸ Na' shi inabid' le' bi dii inabid' le', aga williilen na' ni bi yisanle nad', shi ñaa. ⁶⁹ Na' ñaate, nad', Ben' Bsel' Chioza' Yell-lioni, kwi'a kwit de shli' che' Chioza', beena' nap yel' wak xenna'.

⁷⁰ Na'ch yog'ze' wñabgākile'ne':

—¿Ana' lin' nako' Xiñ Chioza'?

Na'ch che' Jesúza':

—Awe, shlikzan ba wnale.

⁷¹ Na'ch che' lġwellgake':

—Kochno chyalljicho gawe' xya che' beeni. Kwintekzcho ba benicho ka ba wne'.

23

Wde Jesúza' lao Pilátóna'

(Mt. 27:1-2, 11-14; Mr. 15:1-5; Jn. 18:28-38)

¹ Na'ch yog'lol' ben'ka' bizolla'gake' na' jwa'gake' Jesúza' lao Pilátóna'.
² Na'ch wzologake' chaogake' xya che' Jesúza', che'gake':

—Ba bidolinto' beeni chta chñie' ben' wllall' chentoka'. Chi'e bi chiyal' chixjcho daa chñab Césara', beena' chñabia', na' lekzka' naze' nake' Crístóna', na' daa ne' ka' zejin nake' to ben' wñabia'.

³ Na'ch wñabi Pilátóna' Jesúza', chi'ene':

—¿Alin' nako' ben' wñabia' che' ben' Israelki?

Na'ch che' Jesúza'ne':

—Kan' nakan.

⁴ Na'ch che' Pilátóna' bñozka' chñabia' na' yog' ben'ka' lle' na':

—Ni to dii mal bi chillelid' chon beeni.

⁵ Na' zizikchli che'gake':

—Diika' chli' chsedile' chta chñen yog'loł beñ' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶ Ka gollgake' Pilátona' ka', na'ch wñabile' legake' shi nak Jesúza' beñ' Galilea. ⁷ Na' ka wñezile' nake' beñ' Galilea, na'ch bdie'ne' lao Heródeza', beena' nłane' chñabi'e Galileana', la' kana'yen' zoa Heródeza' Jerusalénna'. ⁸ Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' beñ' xtilleena'. Na' goki Heródeza' ile'ile' gone' to yel' wak. ⁹ Na' biya dii wñabile' Jesúza', na' ni to daa wñabile'ne' bi billi'e. ¹⁰ Na' lekzka' na' lle' bñozka' chñabia' len beñ'ka' chli' chsedi leya', na' zizikli chaogake' xya che Jesúza'. ¹¹ Na'ch Heródeza' len soldad che'ka' biya dii bengakile'ne', na' bñitjgakile'ne' bwakwgake'ne' to lech' na' daa chakw to beñ' wñabia'. Na'tech bizsel' Heródeza'ne' lao Pilátona'. ¹² Na' lo llana' bizoalen Pilátona' Heródeza' wen, la' kana'te chakzbani ljwelle'.

Bchoglogake' guet Jesúza'

(Mt. 27:15-26; Mr. 15:6-15; Jn. 18:39–19:16)

¹³ Na'ch biti'a Pilátona' bñozka' chñabia', na' beñ'ka' chñabia'gake' beñ' Israelka' na'ch beñ' yell, ¹⁴ na' golle' legake':

—Le' bidwa'le beeni lawii, nale chta chñie' beñ', na' nad' ba wñabidee laoleni, na' bi chillelid' ni to daa nale che' shi li ka chone'n. ¹⁵ Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' inacho wchoglozcho guete'. ¹⁶ Na' ñaa gon' mandad wit chingake'ne' na'tech yisane.

¹⁷ Na' ka chakz yog' yiz, chiyal' yisane' to beena' nej lillyana' kat' chal' lñi Paskwa'. ¹⁸ Na' yog' beñ'ka' ndop nllag na', wzologake' chosyaagake', che'gake':

—jGuettega beeni! jNa' bisan Barrabáza'!

¹⁹ Nyixjgake' Barrabáza' lillyana' daa bñie' wdila' yell Jerusalénna', na' bettie' to beñ'. ²⁰ Na' daa cheeni Pilátona' yisane' Jesúza', na' stokzə wñabile' beñ'ka' shi wisane'ne'. ²¹ Na' beñ'ka' zizikchli chosyaagake', che'gake':

—jBdee lee yag cruza'! jBdee lee yag cruza'!

²² Na' de wyon shiyi che' Pilátona' legake':

—¿Bera dii malan' ñezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

²³ Na' beñ'ka' wzeyidgake' chosyaagake' chñabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'. ²⁴ Na' bchoglall' Pilátona' gone' ka cheeni beñ'ka'. ²⁵ Na' bisane' beena' wñabgake', beena' de lillyana' daa bñie' wdila' na' daa bettie' to beñ'. Na' bene' Jesúza' lo na'gake' kwenche gongakile'ne' ka chaklall'gake'.

Bda'gake' Jesúza' lee yag cruza'

(Mt. 27:32-44; Mr. 15:22-32; Jn. 19:17-27)

²⁶ Na' ka nche'gake' Jesúza' lljada'gake'ne' lee yag cruza', billaggake' to beñ' Cirene lie' Simón zizee lyixaa. Na' bex'gake'ne' bwa'gake'ne' yag cruz che Jesúza' na'ch janoe'ne'.

²⁷ Na' beñ' zan zjanogake'ne', na' zan noolka' chbellgake' na' chosyaa-gake' ni che Jesúza'. ²⁸ Na' biyechj Jesúza' bwie' legake' na' golle':

—Le' nool Jerusalén, bi kwelzle cha'; li kwell che kwine na' che xiinleka'. ²⁹ La' wllin lla kat' ina ben': "Chakomba nool willka', ben'ka' bi wxan na' bi bwall bxopgake'." ³⁰ Na'ch ben'ka' zoa llana' gak ka', solo inagake': "Shel' iyinjtega yaa yaoki idakwtegan neto'." ³¹ Shi yag yaa yag banna' chongakile'n kon daa nazan chegake', zalechla ki gongakile' yag billa'?

³² Na' lekzka' nche'gake' chop ben' wen dii mal kwenche witgake' legake' txen len Jesúza'. ³³ Na' ka bllingake' latja' gana' le Llit Yichj Ben' Wet, bda'gake' Jesúza' lee yag cruza'. Na' lekzka' bda'gake' chopte ben' wen dii malka' shlaa wejkwite'na'. ³⁴ Na' ka chda'gake' Jesúza' lee yag cruza', chi'e:

—Xa, wxi'xen chegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yidol' xe'na'. ³⁵ Na' lle' ben' zan chwiagake', na' axt ben'ka' chnabia'gake' ben' Israelka' btitjgakile'ne', nagake':

—Gok bisle' ben' yoblə, na' naa yishashki kwine' shi leile' len' Crístona', beena' ba wlej Chioza'.

³⁶ Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. ³⁷ Na' che'gake'ne':

—Shi lin' nako' ben' wñabia' che ben' Israelki, bislashki kwino'.

³⁸ Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: "Beenin ben' wñabia' che ben' Israelka'." Bzejgake'n dill' griego, dill' latín na' dill' hebreo.

³⁹ Na' to ben' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

⁴⁰ Na' beena' sto bsheshlene'ne', chi'e:

—zAbikzə chall chlleblatoo Chioza'?, len kon ka chak chen' ba chak cho'.

⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, lljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴ Na' do ka gobill bichol' doxen yell-liona', bllinte do ka chida shon, ⁴⁵ daa bich bzeeni' wbillā'. Na' lechaa ze loo yoodo'na' bllon' gokan chop laalə. ⁴⁶ Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

⁴⁷ Na' ka ble'i beena' chnabia' soldadka' diika' gok, be'lawee Chioza', chi'e:

—Dii li beeni nake' dowalj ben' wen.

⁴⁸ Na' yog' ben'ka' lle' na', ka ble'gakile' ka gok, ziyajgake' chball'gake' cho'alcho'eka'. ⁴⁹ Na' yog' ben'ka' nombia'gake' Jesúza', do noolka' za'langake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

⁵⁰ Wzoa to beṅ' wlie' José, beṅ' yell Arimatea, daa mban Judéana'. Na' Joséna' nake' txen beṅ'ka' chṅabia' beṅ' Israelka'. Nake' to beṅ' wen na' to beṅ' chon ka cheeni Chioza', ⁵¹ na' zoe' chbeze' wsel' Chioza' beena' inabia'. Na' Joséna' aga wyoolallee ka ben beṅ'ka' chṅabia'lene' daa betgake' Jesúza', na' bi benlene' legake' txen. ⁵² Na'ch wyaje' lao Pilátona' na' wṅabe' lsens yiletje' kwerp che Jesúza'. ⁵³ Na' bi letje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga biṅ' wkash'gake' ni tlish' beṅ' wet. ⁵⁴ Na' llana' gok diiki nakan lla chsini'a beṅ' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

⁵⁵ Na' noolka' za' lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. ⁵⁶ Na'ch biza'gake', na' ka billingake' gana' zoagake', benschao'gake' daa chl'a' zix. Na' bizi'all'gake' lla sabda' kon ka na leya'.

24

Biban Jesúza' ladj beṅ' wetka'

(Mt. 28:1-10; Mr. 16:1-8; Jn. 20:1-10)

¹ Na' lla necha' chizolo xmanña', wizaj noolka' ni baḷ cho'a bana', nox'gake' diika' chl'a' zix daa benschao'gake', na' wyaj zi baḷ noolə yoblə kon legake'. ² Na' ble'gakile' aga chi'ch yaja' cho'a bana'. ³ Na' wyoogake' loo bleja', na' ble'gakile' aga bich bi kwerp che Xancho Jesúza' de na'. ⁴ Na' shlak chakgakile' bera zejín dga, kat'kzali ble'gakile' chop beṅ' byo, nakwgake' lech' dii chey cheeni', zegake' kwite'ka'. ⁵ Na' noolka' bllebchagake' na' b'chek' yichje'ka' axt lo yona'. Na'ch beṅ'ka' zena' che'gake':

—¿Berache chiyiljzle beena' mban ladj beṅ' wetki? ⁶ Kochno de ni. Ba bibane' ladj beṅ' wetki. Li ljadini daa wne' le' kana' zoalene' le' Galileana'. ⁷ Wne' chonan byen Beena' Bsel' Chioza' Yell-lioni gake' lo na' beṅ' malka', na' witgake'ne' lee yag cruza', na' ka yiyon lla yibane' ladj beṅ' wetka'.

⁸ Na'ch jadini noolka' daa goll Jesúza' legake'. ⁹ Na' biza'gake' biyajgake' gana' lle' postlka' shnej len yog' beṅ'ka' sto gokgake'ne' txen, na' be'gake' dill' yog' daa gok chegake'. ¹⁰ Na' noolkin jayellgake' postlka' daa gok chegake': María beṅ' yell Magdálana', Juánana', María xṅa' Jacóbona', na' len zi baḷ nool yoblə. ¹¹ Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

¹² Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'la. Na'ch bizee zjade' gana' zoe' chibanile' ka nak daa ba gok.

Bli'lao Jesúza' chop beṅ' tnez Emaúza'

(Mr. 16:12-13)

¹³ Na' lo llana' gok ka', chop beṅ'ka' nak Jesúza' txen wyajgake' to yell dii le Emaús, na' nḷaa ljwellin ka do shnej kilometro kon Jerusalénna'. ¹⁴ Na' lo zej ngoogake' nez choe'gake' dill' cheyi diika' ba gok. ¹⁵ Na' shlak choe'gake' dill' cheyi diika' gok, na' jabig' kwín Jesúza' kwite'ka' na' zejlene' legake' txen. ¹⁶ Na' la'kzi chwiagake'ne', aga gokbe'gakile' no beena'. ¹⁷ Na'ch wṅabi Jesúza' legake':

—¿Bera dillaan choe'le za'le ni? ¿Berache chakyesh'zile?

¹⁸ Na' toe', beena' le Cleofas, chi'ene':

—Yog'zə beŋ' neʒgakile' daa ba gok Jerusalénna' llaki ba wde. ¿Astozo' li' bi neʒilo' daa ba gok?

¹⁹ Na'ch chi'e legake':

—¿Beran gok?

Na'ch che'gake':

—Diika' gok che Jesús, beŋ' Nazareta'. Goke' to beŋ' wdiʒjee daa che' Chioza'ne', na' bene' yel' wak na' bi'e dill' zakii dii nak shli' lao Chioza' na' lao beŋ'. ²⁰ Na' bʒoxka' chŋabia' na' beŋ'ka' chŋabia'gake' cho' beŋ' Israel bengake'ne' lo na' joschiska' kwenche bchoglogake' che' guete', na' bda'gake'ne' lee yag cruza'. ²¹ Neto' nonnto' lez nan len' yibeje' cho' beŋ' Israel lo na' beŋ' zit'ka'. Na' ba gok shon' lla gok diiki. ²² Na' bal' noolka' nak neto' txen wyajgake' cho'a bana' daa baabali, na' le bibaninto' ka wnagake' ²³ bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, beŋ' goll legake' mbankzə Jesúsza'. ²⁴ Na'ch wyaj bal' beŋ' byoka' nonlennto' txen cho'a bleja', na' nakan kon ka wna' noolka', per aga no Jesúsza' ble'gakile'.

²⁵ Na'ch che' Jesúsza' legake':

—¡Le' beŋ' bi chajni! ¡Bi llabia' bat shajle'le daa bzej dii beŋ'ka' wdiʒjee daa goll Chioza' legake'! ²⁶ ¿Abi neʒile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

²⁷ Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' beŋ'ka' wdiʒjee daa goll Chioza' legake'.

²⁸ Na' ka bllingake' yella' gana' zejgake', bentezə Jesúsza' ka beŋ' shaj gan yoblə. ²⁹ Na' beŋ'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúsza' bigaanlene' legake'. ³⁰ Na' ka ba chi'gake' cho'a mesa', bexee to yetxtil na' bi'e yel' choʒken Chioza', na'tech bʒoxje'n na' bi'en legake'. ³¹ Na'ch biyombia'yen'gake' nan len' Jesúsza', na' to binitloze'. ³² Na'ch che' ljwelle':

—¡Bera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

³³ Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə beŋ'ka' nakgake'ne' txen, ³⁴ na' gollgake' legake':

—Dii likzan ba biban Xanchona' ladj beŋ' wetka'. Ba bli'lawe' Simónni.

³⁵ Na'ch beŋ'ka' chop gollgake' legake' ka gok chegake' tneza', na' ka biyombia'gake' Jesúsza' ka bʒoxje' yetxtila' bi'en legake'.

Jali'lao Jesúsza' beŋ'ka' nakgake'ne' txen

(Mt. 28:16-20; Mr. 16:14-18; Jn. 20:19-23)

³⁶ Na' shlak ni choe'gake' dillaa, tokonganzi jaze Jesúsza' ladje'ka' na' bwape' legake' chiox, chi'e legake':

—Soashgale mbalaz.

³⁷ Na' le bllebgake' daa chakgakile' yel bʒenzan chwiagake'. ³⁸ Na' che' Jesúsza' legake':

—¿Berache chllebzle? ¿Bi'che chak choplall'zle? ³⁹ Li wwia ni'a na'ki kwenche ineʒile nad'kzan. Li gox' nad' kwenche ineʒile aga nak' to yel bʒen, la' to yel bʒen bibi bel' bibi llit yoon ka nak' nad'.

⁴⁰ Na' ka golle' legake' ka, bliile' legake' ni'a neena'. ⁴¹ Na' ye'l' chiba chizaki che'ka' na' ye'l' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

⁴² Na'ch be'gake'ne' lat' be'l' ba bwey'gake' lo yi'na'. ⁴³ Na' be'xeeb wdawe'b chwiategake'. ⁴⁴ Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' lia bia' yillinin gak cha' yog' diika' bzej dii Moiséza', na' diika' bzej dii be'n'ka' wdxjee daa goll Chioza' legake' na' diika' da' lee sálmoka'.

⁴⁵ Na'ch ben Jesúsza' ka wyajni'gakile' diika' na Cho'a Xtill' Chioza', ⁴⁶ chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj be'n' wetka'. ⁴⁷ Na' lekzka' nan: ides cho'a xtilleena' daa nan shi yiyaj yileni be'n' dii malka' chongake' na' yiyakxen chegake'. Na' solozan Jerusalénni na' illiljan doxente. ⁴⁸ Na' le' chiyal' ye'le be'n' yog' diiki ba ble'ile gok cha'. ⁴⁹ Na' nad' wselaa beena' bcheb Xa' Chioza' gone' gaklene' le', na' li soatezə Jerusalénni x̄t kat'ch X̄a'na' gone' le' ye'l' waka' daa za' yabana'.

Biyep Jesúsza' yabana'

(Mr. 16:19-20)

⁵⁰ Na'ch bche' Jesúsza' legake' wyajgake' yell Betániana'. Na' blis neena' benleeye' legake'. ⁵¹ Na' ni chonleeytie' legake', ka bikwase' kwite'ka' na' biyep'e yabana'. ⁵² Na' be'n'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'. ⁵³ Na' wzoatezi wzoagake' be'la'ogake' Chioza' yoodo'na'.

Dill' wen dill' kob daa bzej Juanna'

Beena' nak Xtill' Chioza' golje' goke' to ben'

¹ Ba zoakzə beena' le Xtill' Chios ka wxe wzil yog'lołte dii de. Len' ba zoalene' Chioza', na' lekzen' Chioza', ² na' dezd nechte ba zoalenkze' Chioza'. ³ Len' bene' yog'te dii de, na' biga de to dii bi bene'. ⁴ Len' cho'e yel' mban, na' nake' beeni' che ben' yell-lioni. ⁵ Na' beeni' che'na' chzeeni'n yell-lioni gani nak shgasj shçhol ni che dii mala', na' yel çholə' bi bizoyin yisolan beeni'na'.

⁶ Wzoa to ben' bsel' Chioza' wlie' Juan. ⁷ Juanna' bidyee dill' che beena' nsa' beeni'na' kwenche yog' ben' gonlilall'gake'ne'. ⁸ Aga Juanna'yen'nan nsee beeni'na', san to bidtixje'ze' che beena' nsa' beeni'nan'. ⁹ Beena' nsa' beeni'na' daa nak dowalj daa wzeeni'n lao yog'loł ben', ba zee yell-lioni.

¹⁰ Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, ben'ka' lle' lawinna' aga gokbe'gakile' non nake'. ¹¹ Blline' ladj ben'ka' nak ben' yell che', na' legake' bi blebgake'ne'. ¹² Per yog' ben'ka' blebgake'ne' na' benlilall'gake'ne', bene' legake' xiin' Chios. ¹³ Na' aga daa nakgake' ben' de beli chenan, wa daa cheeni ben' soalen ljwellen', ni aga daa cheeni ben' soa xiinen', san daa benlilall'gake'nen' gokgake' xiin' Chios.

¹⁴ Na' beena' le Xtill' Chios golje' goke' to ben' de beli chen na' wzoe' ladjnto'ni. Na' ble'into'ne' nake' ben' zakii nleeb daa nake' Xiin' tlish' tyaj Xacho Chioza', na' nake' ben' lall'do' xen inleeb na' bli'e do ka nak dii lina'. ¹⁵ Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' ben' zak'chi aga ka nad', la' ba zoakze' kana' zi' soa' nad'.”

¹⁶ Daa nake' ben' wen inleeb na' daa chakchgaile' cho', dii zan dii wenka' ba bene' che yog'cho. ¹⁷ Dii Moiséza' bzajniile' cho' diika' bllia Chioza' bia' goncho; per Jesucrístona' bli'e yel' chiyesh'lalli che Chioza' len dii li che'na'. ¹⁸ Ni to konoñ' ile'i Chioza', per Xiine'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa ben' nisa', bi'e xtill' Jesucrístona'

(Mt. 3:11-12; Mr. 1:7-8; Lc. 3:15-17)

¹⁹ Ben' wñabia' che ben' Israelka' lle' Jerusaléna' bsel'gake' to çhop bxoz na' sto çop ben'ka' nak xiin' dia che dii Levína' kwenche janabgakile' Juanna' non nake'. ²⁰ Na' bi bkwashee non nake', san golle' legake':

—Aga nadaan Crístona', beena' chbezcho wsel' Chioza'.

²¹ Na'ch wiznabgakile'ne':

—¿Norakzan nako' shka? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche çixji'e daa che' Chioza'ne', shka'?

Na' che' Juanna':

—Akza le' nad'.

²² Na'ch che'gake'ne':

—¿Norakzə li', shka'? Cheenin^{to} inezinto' kwenche lljayellnto' beŋ'ka' bsel' neto' non nako'. ¿Bi ka ino' che kwino'?

²³ Na'ch che' Juanna' legake':

—Dii Isaíaza', beena' wdxjee daa goll Chioza'ne' kani'yi, dill' chan' bi'e kana' wne': "To beŋ' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee."

²⁴ Na' beŋ'ka' bsel' fariseoka' ²⁵ wñabgakile'ne':

—¿Berache chchoazo' beŋ' nis shi aga lin' Crístona', ni Elíaza', ni beena' llia bia' wsel' Chioza' kwenche chixji'e daa chi'ene'?

²⁶ Na' che' Juanna' legake':

—Nad' chchoa' beŋ' nis, per ladjleni zoa to beŋ' bi nombia'le, ²⁷ na' len' zi' wli'lawe'. Na' nad' ni bi zakaa gak' xmosé' kwenche galj' la'ch' xe'le'na'.

²⁸ Yog' diiki gok gana' le Betania, daa llia shlaa yao Jordanna', gana' bchoa' Juanna' beŋ' nisa'.

Jesúza', beena' bsel' Chioza', zaklebile' xil'do'na' chitgake'

²⁹ Na' betiyo ble'i Juanna' Jesúza' zeje' kwite'na', na' chi'e:

—Li wwia, beenin bsel' Chioza' na' zaklebile' xil'do'na' chitcho, la' len' yikwase' saaxya che beŋ' yell-lioni. ³⁰ Na' xtill' beenin bi'a kana' wnia': "Zi' za' to beŋ' zak'chi ka nad', na' ba zoakz beeni kana' zi' soa'." ³¹ Ni nad' bi wnezid' no xtilliin bi'a, per kwenche gombia' beŋ' Israelki le', bidchoa' beŋ' nis.

³² Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' le'. ³³ La' ni nad' bi wnezid' no xtilliin bi'a, per Chioza', beena' bsel' nad' chchoa' beŋ' nis, wne': "Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjall'do' beŋ'." ³⁴ Ba ble'id' gok ka wna Chioza' nad', na' ñaa nia' le' beenin Xiñ Chioza'.

Beŋ'ka' bengake' Jesúza' txen dii nech

³⁵ Na' betiyo Juanna' zelene' chop beŋ'ka' nakgake'ne' txen. ³⁶ Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenche chiyakxen saaxya chechoka'.

³⁷ Na' chop beŋ'ka' nak Juanna' txen, ka bengakile' wna Juanna' ka', na' janogake' Jesúza'. ³⁸ Na'ch ka biyechj Jesúza', ble'ile' zjanogake'ne' na' chi'e legake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejín: beŋ' chli' chsedi beŋ'.) ³⁹ Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana, la' ka do chida tapan billinlengake'ne' gana' zoe'.

⁴⁰ Na' beena' le Andrés, beŋ' bish' Simón Pédróna', len sto beŋ' yoblə gogkake' chopə janogake' Jesúza' ka bengakile' daa wna Juanna' che'. ⁴¹ Na' Andrésa' lii jadjiltie' beŋ' bishee Simónna', na' chi'ene':

—Ba billelinto' beena' nak Mesíaza'— Na' Mesías zejín Cristo, beena' chbezgake' wsel' Chioza' kwenche inabi'e.

42 Na'ch Andréza' b̄chi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin̄ Jonáza', na' ŋaa yilio' Cefas—. Na' Cefas zejín Pedro.

Jesúza' golle' Felípena' len Natanaela' gakgake'ne' txen

43 Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

44 Felípena' nake' beñ' yell Betsaida, gana' nak lall Andréza' na' Pédróna'.
45 Na'ch jadilj Felípena' Natanaela' na' chi'ene':

—Ba billelinto' beena' bzej dii Moiséza' xtillena' lee libr̄ che leya'. Na' lekzka' chen' bzej dii beñ'ka' wdixjee daa goll Chioza' legake' kani'yi. Len' Jesúza', beñ' Nazareta', xiin̄ Joséna'.

46 Na' Natanaela' chi'ene':

—¿Aka Nazareta' ichej to beñ' zakii?

Na' Felípena' golle'ne':

—Dakachi kwenche gakbe'ilo'.

47 Na' ka ble'i Jesúza' zej Natanaela' gana' zie', golle':

—Ni za' to beñ' nak dowalj beñ' Israel, to beñ' bi nak beñ' wxiye'.

48 Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yid̄nel̄ Felípena' li', ble'id' li' xan yag yixwewa'.

49 Na' goll Natanaela'ne':

—Maestro, lin' nako' Xiin̄ Chioza'. Na' lin' beena' zid̄nabia' neto' beñ' Israel.

50 Na' goll Jesúza'ne':

—¿Aadaa wnia' ble'id' li' xan yag yixwewan' chajli'o cha'? Zi' ile'chilo' dii xench aga ka dga.

51 Na' lekzka' gollch Jesúza':

—Dii li nia' le', ile'ile yabana' nyaljan, na' beñ'ka' nak anjl̄ che Chioza' chep chetjgake' lawa', nad', Beñ' Bsel' Chioza' Yell-lioni.

2

Got' to wishagna' yella' le Caná

1 Na' biyon̄ lla got' to wishagna' yella' le Caná daa lliá gana' mbani Galileana', na' na' len x̄na' Jesúza'. 2 Na' lekzka' goxgake' Jesúza' na' beñ'ka' nakgake'ne' txen. 3 Na' shlak chak l̄nina' bibill vino che'ka', na' goll x̄na' Jesúza'ne':

—Ba bibill vino che beñ'ki.

4 Na'ch che' Jesúza'ne':

—¿Berache nazo' nad' ka'? Bin' gal' gon' daa lliá bia' gon'.

5 Per x̄neena' golle' wen mandadka':

—Li gon kon bin in̄e' le'.

6 Na' na' zoa x̄op yes' xen de yaj, dii choll nis, diika' chon llin kat' beñ' Israelka' chixi chiyechgake' kon ka na ley che'ka'. Na' to to yes'ka' chollan ka do shon̄ yid nis. 7 Na' che' Jesúza' wen mandadka':

—Li kaa nisa' loo yes'ki.

Na' wda'gake'n̄ ax̄t ka billa'chagakan. 8 Na'ch che' Jesúza' legake':

—Li gash' lataan ŋaa na' li lljeen beena' ngoo lo neen.

Na' bengake' ka golle'. ⁹ Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna', ¹⁰ chi'eb':

—Yog' ben' zigaate chdie' vino wenna', na' kat' ba weej ben'ka' len lina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹ Yel' waki dga ben Jesúza' yell Canána' daa llia gana' mbani Galileana', lannan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen benlilall'gake'ne'.

¹² Na' ka wde, biyaje' Capernaúma' len xneena', len ben' bisheeka' na' len ben'ka' nakgake'ne' txen, na' wzoagake' na' to chop shon lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr. 11:15-18; Lc. 19:45-46)

¹³ Na' ka ba zoa gal' lni Paskwa' daa chon ben' Israelka', wyaj Jesúza' Jerusalénna'. ¹⁴ Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'. ¹⁵ Na' ka ble'ile' ka chak, bene' to do tashj, na' kon len bisheshile' yog'lol' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'. ¹⁶ Na' ben'ka' chit' palomka', golle' legake':

—iLi yishesh baki ni! iBi gonzle lill Xa'na' ka lao yaa!

¹⁷ Na'ch ben'ka' nakgake'ne' txen jadingakile' Cho'a Xtill' Chioza' gana' nan: “Daa le chakid' lill xlatjo'na' len wlliaiyi'n nad'.”

¹⁸ Na'ch ben' Israelka' lle' na' che'gake' Jesúza':

—iBi yel' wak gono' dii wli'n napo' yel' wñabia' kwenche chono' diiki?

¹⁹ Na' che' Jesúza' legake':

—Li yichinj yoodo'ni na' lo shonə llazə yiyona'n.

²⁰ Na'ch che' ben' Israelka' le':

—Xopiyon yiz bengake' yoodo'ni, na' li' nazo' shonə llazə yiyono'n.

²¹ Per daa goll Jesúza' legake' ka', kwerp che'nan' bsakleBILE' yoodo'na'.

²² Na'ch ka biban Jesúza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúza'.

Nombia' Jesúza' yichjlall'do' yog'cho

²³ Na' shlak zoa Jesúza' lni Paskwa' Jerusalénna', ben' zan wyajle'gake' che' daa ble'gakile' yel' wakka' bene'. ²⁴ Per Jesúza' bi bxnilallee legake', la' nombi'e yichjlall'do' yog'lol' ben'. ²⁵ Aga byalljile' no yee le' nakan nak benecha', la' kwaslol' nombi'e yichjlall'do'eka'.

3

Jesúza' bshaljlene' Nicodémona'

¹ Wzoa to fariseo ben' wle Nicodemo, na' goke' to ben' wñabia' ladj ben' Israelka'. ² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gag gono' yel' wakka' chono' shel' bi zoalen Chioza' li'.

³ Na'ch Jesúza' chi'ene':

—Dii li nia' li', beena' bi yiyalj dii yoblə aga wak lljazoe' gana' chñabia' Chioza'.

⁴ Na' che' Nicodémona'ne':

—¿Nakra gon to beṅ' gol yiyalje' dii yoblə? La' aga wak yiyo'e loo lee xneena' kwenche yiyalje' sto shii.

⁵ Na' Jesúza' chi'ene':

—Dii li nia' li', kono gak yiyaj gana' zoa Chioza' chṅabi'e shi biṅ' galjlenile' nis * na' yikob Espíritu che Chioza' yichjallal'do'ena' kwenche gake' ka beṅ' galj sto shii. ⁶ Beena' nak xiṅ beṅ' de beli chen, de beli chenchokzan nake'. Per beena' chikob Espíritu che Chioza'ne', nake' xiṅ Chios na' de to yel' mban che' daa bi te cheyin. ⁷ Bi yibanilo' daa nia' li': “Yog' beṅ' chiya' galje' dii yoblə.” ⁸ Kat' chze be'na' na' chajan kon ga cheenin, na' la'kzi chenicho ka sshag chonan aga nezechico galan za'n, ni bi nezechico galan zejan. Lekzkan' aga nezechico nakan chon Espíritu che Chioza' kwenche chiya'lj beṅ' dii yoblə.

⁹ Na'ch wiznabi Nicodémona'ne':

—¿Nakra gak gakz dga?

¹⁰ Na' che' Jesúza'ne':

—Len naktio' to beṅ' chli' chsedi beṅ' Israelki, ¿ana' bi nezi'lo' diiki? ¹¹ Dii li nia' li', choe'nto' dill' che daa nezingto' na' daa ben ble'into', per bi chajle'le daa nanto' le'. ¹² Shi bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

¹³ Ni to konon' shep yabana', toz nad', Beṅ' Bsel' Chioza' Yell-lioni, nak' beṅ' za' yabana'. ¹⁴ Na' ka ben dii Moiséza' gana' bibi chashj chleb bdee be' de broncena' lee yaga', ka'kzan gongakile' nad', Beṅ' Bsel' Chioza' Yell-lioni. Wda'gake' nad' lee yaga' ¹⁵ kwenche nottez beṅ' gonlilal' nad' bi kwiayee, san gat' to yel' mban che' zejli kaṅi.

Chaki Chioza' yog' beṅ' yell-lio

¹⁶ Daa le chakchgayi Chioza' beṅ' yell-lioni, bselee Xiine'na' tlish' tyaj kwenche nottez beṅ' gonlilalleene' bi kwiayee, san gat' yel' mban che' zejli kaṅi. ¹⁷ Chioza' bselee xiine'na' yell-lioni aga kwenche wlliyee beṅa'an, san kwenche yisle' legaken'.

¹⁸ Beena' nonlilal' Xiṅ Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilalle Xiṅ tlish' tyaj Chioza'. ¹⁹ Ba nchoglo kwiayi' beṅ' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel cho'la' aga ka beeni'na'. ²⁰ Yog' beṅ'ka' chon diika' bi yejni'alallii chakzbangakile' beeni'na', na' aga willjabig'lat'gake' lawinna' daa chllebgake' wli'lawi dii mala' chongake'. ²¹ San beṅ'ka' zoagake' chongake' ka na' dill' li' che Chioza', chbig'gake' lao beeni' che'na' kwenche gakbia' chongake' ka cheeni Chioza'.

Juanna', beena' bchoa beṅ' nisa', be'che' xtill' Jesúza'

²² Ka wde, wyaj Jesúza' Judeana' len beṅ'ka' nakgake'ne' txen na' wzoagake' na' xtit wen, na' bchoagake' beṅ' nis. ²³ Na' Juanna' lekzka' chchoe' beṅ' nis gana' le Enón, gaozə gana' le Salim, la' na' de nis zil, na' chaj beṅ' kwenche chchoe' legake' nisa'. ²⁴ Diiki gokgakan kana' zi' koogake' Juanna' lillyana'.

²⁵ Na'ch beṅ'ka' nakgake' Juanna' txen gokdil'-lengake' sto beṅ' Israel ni cheyi diika' yoologake' chongake' kwenche chixi chiyechgake' lao Chioza'. ²⁶ Na' wyajgake' jellgake' Juanna':

* **3:5** Galjlenile' nis: ba' beṅ'ka' nsed nagake' zejin daa chchoacho nisa', na' zi balgake' nagake' zejin nisa' daa chzani xṅa'chona' cho', na' zi balgake' nagake' zejin daa chixis chiyeb Espírituna' cho' kat' chonlilal'cho Cristona'.

—Maestro, beena' wzeleno' sh_laa yao Jordanna', beena' bi'o xtilleena', ba chchoe' beñ' nis na' yog'zə beñ' chajgake' kwite'na'.

²⁷ Na'ch che' Juanna' legake':

—Kono gak bi gon shi Chioza' bi wi'e latj. ²⁸ Kwinkzle benile kana' wnia' aga nadaan Crístona', beena' chbezcho wsel' Chioza', san nak' to beñ' bselee kwenche kwialoa' lawe'na' na' yep' beñ' wzenaggake' che'. ²⁹ To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka chenib' chshaljb'. Kayen'nan chak cha', le chibaid' daa chzenaggake' che Crístona'. ³⁰ Len' zizikchli seyi che', na' nad' bichtek seyi cha'.

Beena' za'yabana'

³¹ 'Ka nak beena' za' yabana', len' zak'chi' aga ka yog'lol beñ'. Na' beñ'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte beñ', ³² na' choe' dill' cheyi diika' ba ben ble'ile' yabana', per balcha beñ' chajle' xtilleena'. ³³ Na' nottez beena' chajle' che', chli'e Chioza' cho'e dill' li. ³⁴ Beena' bsel' Chioza', cho'a xtil' Chiozan' cho'e, la' Chioza' no'ene' do ka nak Espíritu che'na'. ³⁵ Chioza' chakile' Xiine'na', na' ba bene' lall' nee yog'lolte dii de. ³⁶ Na' beena' gonlilall' Xiin' Chioza' gat' yel' mban che' zejli kañi. Per beena' bi cheeni gonlilalleene' bi gat' yel' mban che' zejli kañi, san ile'ile' yel' zak'zi'na' we' Chioza'.

4

Bshaljlen Jesúza' to nool Samaria

¹ Fariseoka' gokbe'gakile' beñ' zanch nakgake' Jesúza' txen, na' beñ' zanch chchoe' nisa' aga ka Juanna', ² la'kzi' aga kwín Jesúzan' bchoe' beñ' nisa', san beñ'ka' nakgake'ne' txenan. ³ Na' ka gokbe'i Jesúza' ba nezi fariseoka' beñ' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴ Na' kwenche yilline' gana' mbani Galileana' chiya'l' yidie' gana' mbani Samáriana'. ⁵ Na' billingake' to yell dii le Sica, daa lliá gana' mbani Samáriana'. Na' yella' llian gaoozə gana' de yell-liona' be' dii Jacoba' xiine' dii Joséna'. ⁶ Na' lo yell-liona' lliá posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill. ⁷⁻⁸ Na' beñ'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Ben lat' nis yeej'.

⁹ Na'ch che' noolə Samáriana'ne':

—¿Berache chñabzilo' nad' nisa' yeejo?', la' beñ' Israel li', na' nool Samaria nad'.

Golle' ka' la' beñ' Israelka' bi zoalengake' wen beñ' Samáriaka'. ¹⁰ Na'ch che' Jesúza'ne':

—Shel'ka' nezshailo' daa chon Chioza' na' no nad' chñabid' li' nisa' yeej', ba wñabilo' nad' gon daa yeejo', shel'ka', la' nap' to nis yaa nis ban daa gon li'.

¹¹ Na' noola' chi'ene':

—Ben'do', bibi noxo wlepilo' nisa', na' posi le zitjan. ¿Gara lljxi'o nis yaa nis banna' gon' nad' nazo' ka'? ¹² Dii xoxto'cho Jacoba' bkwaanlene'

neto' posi gani weeje', na' weej xiine'ka' na' bayix' che'ka'. ¿Achakilo' zak'chilo' ka le'?

¹³ Na' che' Jesúza'ne':

—Nottezə ben' cheeje' nis che posi, wbilchzkile' dii yoblə. ¹⁴ San beena' yeej nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kanı.

¹⁵ Na'ch che' noola'ne':

—Ben'do', ben' nad' nisa' no' ka' kwenche bich ibilid' na' bich yid beja' ni.

¹⁶ Na' che' Jesúza'ne':

—Biyaj jəne ben' cho'na', na' dalene' ni.

¹⁷ Na' che' noola'ne':

—Aga no ben' cha' zoa.

Na' Jesúza' chi'ene':

—Lekzilo' no' ka', aga no ben' cho' zoa. ¹⁸ La' ba gok gay' ben' cho'ka', na' beena' zoaleno' naa ni bi nshagna'lenkzo'ne'. Shlikzan ba wnio'.

¹⁹ Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'. ²⁰ Dii xoxzto'nto'ka' be'la'ogake' Chioza' lo yaani, na' le' ben' Israel nale chonan byen we'la'ochone' Jerusalenna'.

²¹ Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalenna' kwenche we'la'ole Xacho Chioza'.

²² Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjnto'nan' ichej beena' yisle' ben' kwenche bi kwiayi'gake'. ²³ Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. ²⁴ Chioza' nake' Espiritu, na' ben'ka' cheengakile' we'la'ogake'ne', chiyal' we'la'ogake'ne' dowalj na' do yichj do lallgake'.

²⁵ Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

²⁶ Na' che' Jesúza'ne':

—Nad'kzan' beena' no' ka', na' len' chshaljlene' li'.

²⁷ Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'. ²⁸ Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

²⁹ —Li da lljawiacho to ben' ba wne' nad' yog' diika' ba ben'. ¿Aaga len' Crístona', lla?

³⁰ Na'ch blleshgake' yella' wyajgake' gana' chi' Jesúza'. ³¹ Na' shlak ziyaj noola' zeyid ben'ka' nak Jesúza' txen che'gake'ne':

—Maestro, wdao lat'.

³² Na' Jesúza' chi'e legake':

—De to yel' wao cha' daa bi nombia'le.

³³ Na'ch che' ljwell ben'ka' nakgake'ne' txen:

—¿Anti no ba bidwa' dii wdawe', lla?

³⁴ Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'. ³⁵ Le' nazle: “Chyalljch zi tap beo' kwenche

yizi' yilapcho.” Per nad' nia' le', li wwiakachi ba de daa yizi' yilapcho. ³⁶ Beena' chyixjee cho'a xtill' Chioza' naa, zaklebile' to ben' ba chilalile' chizi' chilape'. Na' ben'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap. ³⁷ Nakan ka dillaa de daa na: “Ben' yoblan chaz na' ben' yoblə chizi' chilap.” ³⁸ Nad' ba bselaa le' lljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdixjee ben' yoblə.

³⁹ Ben' zan ben' Samáriaka', ben'ka' lle' yell Sicara' ben'li' lall' gake' Jesúza' daa goll noola' legake': “Ba wne' nad' yog'te dii ba ben'.” ⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla. ⁴¹ Na' ben' zanch ben'li' lall' gake'ne' daa bengakile' dillaa cho'e. ⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla ben' yell-lioni kwenche bi kwiaiy'gake'.

Jesúza' biyone' xiin to ben' wñabia'

⁴³ Na' ka gok chop lla, bizee biyaje' gana' mbani Galileana'. ⁴⁴ Kwinkz Jesúza' wne' nan to ben' chyixjee daa che' Chioza'ne' aga no chgoo le' balaan lalle'na'. ⁴⁵ Na' ka billine' gana' mbani Galileana', blebgake'ne' daa ble'gakile' yog' daa bene' Jerusalénna' ka gol' lni Paskwa'.

⁴⁶ Na' dii yoblə wizaj Jesúza' yell Canána' daa llii gana' mbani Galileana', gana' biyone' nisa' vino. Na' yella' zoa to ben' zakii ben' chon llin che ben' wñabia'na', na' zoa to xiine' bi' byo bi shao'b'. ⁴⁷ Na' ka wnezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' lljayene' bi' che'na' daa ba chakshwetb'. ⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' ben' wñabia'na' chi'ene':

—Ben'do', ben' goklen dagach naate, shategali bin' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee. ⁵¹ Na' ka ba zoa yilline' lille'na' jatil xnose'ka' le', che'gake'ne':

—Ba biyaki bi' cho'na'.

⁵² Na'ch wñabile' legake' ka do bi gor wzolo chiyakshao'lall'b'. Na' che'gake'ne':

—Daa neji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': “Biyaj jawia. Aga wet bi'na'.” Na' le' len yog' ben'ka' zoa lille'na' ben'li' lall' gake' Jesúza'.

⁵⁴ Dga gok de wchopi yel' wakka' ben' Jesúza' Galileana' ka zizee Judeana'.

5

Biyon Jesúza' to ben' net ni'a nee

¹ Ka wde gok diiki, gol' to lni che ben' Israelka' Jerusalénna', na' biyaj Jesúza' lina'. ² Na' Jerusalénna', gaozə cho'a puerta' le Puert Che Xil'ka' llii to tang dii le Betesda dill' hebreo. Na' gay' koridor nechjan tanga'. ³ Na' loo koridorka' de ben' zan ben' we', no ben' lchol, no ben' bi chak sa' wen, na' no ben' net ni'a nee, chbezgake' ta nisa'. ⁴ La' zoa kat' chetj to anjl cho'a

tanga' chte' nisa', na' beena' chyobi cho'e loo nisa' chiyoll chta anjlan' chiyakile' bittezə yillwe' che'ile'. ⁵ Na' ladj ben'ka' lle' na' len to ben' ba gok shin'shonichoa yiz bi shawee. ⁶ Na' ble'i Jesúza'ne' na' gokbe'ile' ba willa die' ka', na'ch chi'ene':

—¿Acheenilo' yiyakilo'?

⁷ Na'ch beena' bi shao' chi'ene':

—Ben'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', ben' yoblə lii chjsho'tie' lo'inna'.

⁸ Na'ch che' Jesúza'ne':

—Biyas, bitob daa cho'na' biyoa'n na' bigoo nez.

⁹ Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'. ¹⁰ Na' ben'ka' chnabia' ben' Israelka' gollgake' beena' biyaki:

—Lla chombaanchō naa. Aga bi lsens de woo daa cho'na'.

¹¹ Na'ch che' beena' legake':

—Beena' biyone' nad' len' wne': “Bitob daa cho'na' biyoa'n na' bigoo nez.”

¹² Na'ch che'gake'ne':

—¿Nora beena' wna li': “Bitob daa cho'na' biyoa'n na' bigoo nez”?

¹³ Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'. ¹⁴ Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

¹⁵ Na'ch beena' biyaje' lao ben' wnabia' che ben' Israelka' jayelle' legake' nan Jesúza' biyone'ne'. ¹⁶ Na' daa ben Jesúza' yel' waka' lla sabda', llana' chombaangake', goklall'gake' witgake'ne'. ¹⁷ Na' Jesúza' chi'e legake':

—Xa'na' bittezə lla chone' llin na' ka'kzə nad'.

¹⁸ Na'ch ben' wnabia' che ben' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wnabia' daa nap Xiin Chioza'

¹⁹ Na' Jesúza' chi'e legake':

—Dii li nia' le', nad', Xiin Chios, aga bi gak gon' tobia'loz', san daa chle'id' chon Xa'nan' lekzannan' chon'. ²⁰ La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibançhile. ²¹ Ka chon Xa'na' chisbane' ben' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə ben' cheenid' wi'an. ²² Na' Xa'na' aga ga chçhogloe' che ben', san nad' nak' Xiine', ba bene' lall' na' wchogloa' che yog'lol ben'. ²³ Bene' ka' kwenche yog' ben' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bsel' nad'.

²⁴ 'Dii li nia' le', beena' chzenag xtilaana' na' chonlilallee beena' bsel' nad', gat' yel' mban che' zejli kani. Na' aga bi de dii gonan ka çhoglo che' sak'zi'e, san ba bile' lo yel' wita' na' ba zoe' lo yel' mban daa bi te çheyin.

²⁵ Dii li nia' le', wllin lla kat' ben' wetka' yengakile' inia' legake', nad' nak' Xiin Chios, na' ben'ka' yengakile' kat' inia' na' yibangake'. ²⁶ Xa'na' nape' yel' wak kwenche wi'e yel' mban che ben' daa bi te çheyin. Ka'kzə ba bene' nad' Xiine' yel' wak kwenche wi'a yel' mban che ben' daa bi te çheyin. ²⁷ Na' lekzka' ba bene' nad' yel' wnabia' kwenche gon' yel' joschis daa nak' Ben' Bsel' Chioza' Yell-lioni. ²⁸ Bi yibanile daa nia' ka', la' wllin

lla wllin gor yeni yog'te ben' wetka' kat' inia' legake'. 29 Na' ka yengakile' inia' na'ch yichejgake' loo bana'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kañi.

Jesúza' bli'e yel' wñabia' che'na'

30 'Ni to bibi gag gon' tobia'loz', san chchogloa' che ben' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'. 31 Na' shi nad' wi'a dill' che kwini', nezid' aga no shajle' cha'. 32 San zoa to ben' cho'e xtillaana', na' nezid' daa ne' cha' nakan shlichá. 33 Le' bsel'le ben' janabgakile' Juanna' bi ka ine' cha', na' dillaa daa bi'e cha' nakan dii li. 34 La'kzi nad' bi chyalljid' we' ben' yell-lioni xtillaa; nia' le' diiki kwenche yilale na' bi kwiaiyi'le. 35 Juanna' goke' ka to yi' dii bzeeni' na' le bibaile bzenagle che' tolde. 36 Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. 37 Xa'na', beena' bsel' nad', lekzka' ba bi'e dill' cha'. Ni shlin bigañ' yenile inie' ni bin' ile'ilene' nak nake'. 38 Na' cho'a xtilleena' bin' sho'n loo yichjall'do'lena', la' bi chajle'le cha', nad' ben' bselee. 39 Le' chsedchgale Cho'a Xtil' Chioza' daa chakile le'inna' yillelile naklā ka gonle kwenche gat' yel' mban chele zejli kañi. Na' la'kzi Cho'a Xtil' Chioza' choe'n xtillaana', 40 aga cheenile gake' nad' txen kwenche gat' yel' mban chele daa bi te cheyin.

41 'Aga chyalljid' no koo nad' balaan. 42 Na' nombia' le', na' nezid' aga chakile Chioza'. 43 Xa' Chioza' bselee nad' na' ba bid', na' bi chzenagle cha'. San shi yid ben' yoblā tobia'loze', beena'lan le' gag chele. 44 ¿Nakrakzā gonle shajle'le cha'? La' gangazā chgoo ljwell-le balaan, na' bi chinole sho'le balaan che beena' zeelo nak Chios. 45 Bi gake' nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'. 46 La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzej' xtillaana'. 47 Na' daa bi chajle'le che daa bzej dii Moiséza', ¿nakra gonle shajle'le che diiki nia'?

6

Bwao Jesúza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

1 Na' ka wde, Jesúza' wyaje' shlaa nido' che Galileana', daa lekzka' le nido' che Tiberias. 2 Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. 3 Na'ch wyep Jesúza' to lo yaa na' wche'lene' ben'ka' nakgake'ne' txen. 4 Na' ba zoa gal' lni Paskw che ben' Israelka'. 5 Ka ble'i Jesúza' ben' zan ba bllin gana' chi'e, na' chi'e Felípena': —¿Gara lljxi'cho dii gao yog' ben'ki?

6 Golle' ka' daa chakile' la'shki bi yee Felípena', la' ba nezczile' nakan gone'. 7 Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

8 Na' sto beena' nak Jesúza' txen lie' Andrés, ben' bish' Simón Pédróna', chi'ene':

9 —Ni ze to bi' xkwid' no'ab' gay' yetxtil de cebada na' zi chop bel. Per bizā daa par yog' ben'ki.

10 Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil. 11 Na'ch bex' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka beljgakile'. Na' lekzka' bene' che belka'. 12 Na' ka beljgakile', na'ch chi'e ben'ka' nakgake'ne' txen:

—Li yitop yog'lol dii lao'ka' bichoonan kwenche bibi gakditj.

13 Na'ch bitopgake'n, biyakte shllin xet' diika' bichoonan lao yetxtilka' gay'. 14 Na' ka ble'i ben'ka' yel' waka' daa ben Jesúza', na'ch che' ljjwell-gake':

—Dii li beenin nake' beena' llia bia' yid yell-lioni kwenche chixji'e daa che' Chioza'ne'.

15 Na' daa gokbe'i Jesúza' cheengakile' yiche'gake'ne' kwenche wzoa-gake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo nido'na'

(Mt. 14:22-27; Mr. 6:45-52)

16 Ka ba chal, ben'ka' nak Jesúza' txen biyetjgake' cho'a nido'na'. 17 Na' biyoogake' to loo barkw kwenche ziyajgake' yell Capernaúma'. Ba gol na' bin' yillin Jesúza' kwite'ka'. 18 Na'ch wzolo wzechga be'na' na' wzolo chas chat' nido'na'. 19 Na' ka do gay' wa xop kilómetro ba wza'len barkwa' legake' lo nido'na' kat' ble'gakile' Jesúza' zeje' tlo nido'na' zjatile' barkwa' na' le bllebake'. 20 Na' Jesúza' chi'e legake':

—Nad'kzan, jbi illeble!

21 Na' chibagakile' bigoogake'ne' loo barkwa', na' lii bllintekzgake' gana' chwiagake' illingake'.

Zan ben' chiyiljgake' Jesúza'

22 Na' betiyo gokbe'i ben'ka' bigaan shlaa nido'na' nan tochga barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'. 23 Na' gaozə gana' wdaogake' yetxtilka' ka wde be' Xancho Jesúza' Chioza' yel' choxken, bllin sto chop barkw dii za' yell Tibériaza'. 24 Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

Jesúza' nake' ka to yel' wao dii chona'n yel' mban

25 Na' ka bllingake' shlaa nido'na' jadi'gake'ne', na' gollgake'ne':

—Maestro, ¿bat biyedo' ni?

26 Na' Jesúza' chi'e legake':

—Dii li nia' le', chiyiljle nad' aga daa wyajni'lati'le bi zejín yel' wakka' benan', san daa wdaozele axt ka beljilen. 27 Bi yilal yizodzile kwenche gat' dii yeej gaole, la' dii te cheyin nak daa. San li gal' kwe'no daa gon yel' mban chele zejli kaní, daa gon' nad', Ben' Bse! Chioza' Yell-lioni. La' Xa' Chioza' ba bene'n lall' na' wi'an.

28 Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

29 Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

30 Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'?
 31 Dii xoxto'choka' wdaogake' daa le maná latja' gana' bibi chashj chleb,
 ka na Cho'a Xtill' Chioza' gana' na: “Yel' wawa' daa za' yabana' bi'en
 wdaogake'.”

32 Na' che' Jesúza' legake':

—Dii li nia' le', aga dowaljen' yel' wao daa za' yabanan' be' dii Moiséza'
 legake', san Xa'na' chone' daa nak dowalj yel' wao daa za' yabana'. 33 La'
 nad', ben' za' yabana', nak' ka to yel' wao dii choe' Chioza' ben' yell-lioki
 kwenche ibangake'.

34 Na'ch che'gake'ne':

—Ben'do', bengach neto' toshiizi yel' wawa' no' ka'.

35 Na' che' Jesúza' legake':

—Nad' nak' ka yel' wawa' daa choe'n yel' mban che ben'. Beena' gake'
 nad' txen, gake' ka ben' nelj nlla'i toshiizi. Na' beena' gonlilallee nad',
 gake' ka to ben' bichga ibili. 36 Per kon ka ba wnia' le', la'kzi ba ble'ile
 nad' bi chajle'le. 37 Yog' ben'ka' chon Xa'na' lall' na', gakgake' nad' txen.
 Na' beena' gake' nad' txen aga wzoa'ne' ka'la. 38 La' zaa yabana' na' zoa'
 yell-lioni aga kwenche gon' daa nazan chan', san zaa kwenche gon' daa
 cheeni Xa'na', beena' bsel' nad'. 39 Na' Xa'na', beena' bsel' nad', cheenile'
 bi wi'a latj kwiayi' ni to ben'ka' ba wleje' kwenche gakgake' nad' txen. San
 cheenile' yisban' legake' ladj ben' wetka' kat' illin lla te che yell-lioni. 40 Na'
 dgan cheeni Xa'na', beena' bsel' nad': chaklallee gat' yel' mban zejli kani
 che yog'loł ben' gakbe'i nak' Xiine' na' gonlilallee nad'. Na' nad' yisbanee
 ladj ben' wetka' kat' te che yell-lioni.

41 Na'ch ben' wnabia' che ben' Israelka' wzologake' biz chon chnagake'
 che Jesúza' daa wne': “Nad' nak' yel' wao daa za' yabana'.” 42 Na'
 che'gake':

—¿Aaga beenin Jesús, xiin Joséna'? Nombia'cho xaxna' beeni. ¿Berache
 naze: “nad' za' yabana'”?

43 Na'ch che' Jesúza' legake':

—Bibi gon inazle cheyi daa wnia' le'. 44 Ni to kono gak gon nad'
 txen shi Xa'na', beena' bsel' nad', bi gone' le' lall' na'. Na' ben'ka' nak
 nad' txen, yisban' legake' kat' te che yell-lioni. 45 Lee librka' bzej dii
 ben'ka' wdixjee daa goll Chioza' legake' kani'yi nan: “Chioza' wli' wsdile'
 yog'lołte ben'.” Na' yog' ben' chzenag che Xa'na' na' chajni'gakile' daa ne',
 legaken' chongake' nad' txen.

46 'Aga ga zoa ben' ba ble'ile' Xa'na'; toz nad', ben' za' yabana', ba
 ble'idee. 47 Dii li nia' le', nottez ben' nonlilallee nad' de yel' mban che' zejli
 kani. 48 Nadaan nak' ka yel' wawa' daa choe'n yel' mban che ben' zejli
 kani. 49 Dii xoxto'leka' wdaogake' daa le maná latja' gana' bibi chashj
 chleb na' bia'kzə witgake'. 50 San nad' cho'a dill' che yel' wao daa za'
 yabana', na' beena' gawe'n aga bi yel' wit zejli kani ile'ile'. 51 Nadaan nak'
 yel' wao daa za' yabana' daa cho'en yel' mban che ben'. Beena' gao yel'
 wawi, ibane' zejli kani. Na' yel' wawa' daa wi'ane', lennan' beli chen cha'ni
 daa chzanid' kwenche gat' yel' mban che ben' yell-lioni.

52 Na'ch ben' Israelka' wzolo chshesh chnegake', che' ljwelle':

—¿Nakra gon beeni gone' beli chen che'na' gaochon?

53 Na' che' Jesúza' legake':

—Nad', Ben' Bsel' Chioza' Yell-lioni, dii li nia' le', shi bi gaole kwerp
 cha'ni na' shi bi yeejle chen cha'ni, aga wat' yel' mban chele daa bi te

cheyin. ⁵⁴ La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kani. Na' kat' illin lla te che yell-lioni, nad' yisbangakee ladj ben' wetka'. ⁵⁵ La' kwerp cha'ni nakan dowalj yel' wao, na' chen cha'ni nakan dowalj dii cheeje'. ⁵⁶ Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen. ⁵⁷ Xa'na', beena' bsel' nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'. ⁵⁸ Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kza witgake'. Beena' gao yel' wawa' daa za' yabana', ibane' zejli kani.

⁵⁹ Diikin wna Jesúza' shlak bli' bsdile' ben' gana' chdop chllag ben' Israelka' choe'lwilgake' Chioza' yell Capernaúma'.

Dill' dii nsa' yel' mban

⁶⁰ Na' zan ben'ka' nogake'ne', ka bengakile' daa wna Jesúza', na' wna-gake':

—Lallj inleeb nak dga chli' chsedi beeni. ¿Notgui gon ka ne'?

⁶¹ Na' Jesúza' gokbe'ile' bi wyazlall'gake' xtillee'na', na'ch wnable' legake':

—¿Achakzbanile dga ba wnia' le'? ⁶² ¿Nakra gonle shel'ka' ile'ile nad', Ben' Bsel' Chioza' Yell-lioni, yiyep' gana' wzaa? ⁶³ Espiritu che Chioza' cho'e yel' mban che ben', la' beli chenna' aga bi zakiin. Dill'ka' ba wnia' gonan ka soalen Espirituna' le' na' gat' yel' mban chele. ⁶⁴ Per bia'kza zoa bal-le bi chajle'le.

Goll Jesúza' legake' ka', la' dezd nechte ba nezkzile' no ben'ka' bi chajle' che' na' non gon le' lo na' ben' malka'. ⁶⁵ Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

⁶⁶ Na' lo llana'tez ben' zan ben'ka' nakgake'ne' txen bkwasgake' bich janogake'ne'. ⁶⁷ Na'ch che' Jesúza' ben'ka' shllin, ben'ka' nakgake'ne' txen:

—¿Alezkka' lenle cheenile yiyajle?

⁶⁸ Na' Simón Pédróna' chi'ene':

—Xan', aga nochla cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kani. ⁶⁹ Ba wyajle'nto' cho', na' nezinto' lin' Crístóna', Xiin Chios yaa Chios banna'.

⁷⁰ Na' Jesúza' chi'e legake':

—Ba wlej' shllinle gake nad' txen. Per tole nakle dii xiwaa txen.

⁷¹ Wne' ka' che Jud Scariota', xiin to ben' le Simón, la' nezile' nan Juda' gone'ne' lall' na' ben' malka', la'kzi wlene' ben'ka' shllin.

7

Ben'ka' nak ben' bish' golj Jesúza' bi wyajle'gake' che'

¹ Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni ben' wñabia' che ben' Israelka' witgake'ne'. ² Na' ka ba zoa gal' lni che ranshdo'ka' daa chon ben' Israelka' yog' yiz, ³ ben'ka' nak ben' bish' golj Jesúza' che'gake'ne':

—Bi yigaano' niza, san wyaj Judeana' kwenche ben'ka' ba non li' txen ile'gakile' yel' wakka' chono'. ⁴ La' beena' cheeni seyi che', aga chkwashée diika' chone'. Bachgali chono' yel' wakki, jentegan lao yog'lol ben'.

⁵ La' ni ben' bisheekan' bi wyajle'gake' che'. ⁶ Na'ch che' Jesúza' legake':

—Bin' illin lla illin gor gon' daa lla bia' gon'. San le', bat'tez wak shajle. ⁷Ben' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'. ⁸Li shaj le' lnina'. San nad' bi saa, la' bin' illin lla illin gor gak cha' daa lla bia'.

⁹Biyoll golle' legake' ka' na' bigaane' Galileana' zi xtit.

Wyaj Jesúza' lnina'

¹⁰Na' ka wde wza' ben' bisheeka', lekzka' wzee wyaje' lnina' do ngash'z. ¹¹Na' ben'ka' chnabia' ben' Israelka' chiyiljgake'ne' lo lnina', che' ljwell-gake':

—¿Garanzi beena', lla?

¹²Na' ladj ben'ka' lle' lnina', ben' zan choe'gake' xtill' Jesúza'. Ba'le' che': "Nake' ben' wen." Na' zi ba'le' che': "Bi nake' ben' wen, la' chdaze' chziyee ben'."

¹³Per ni to kono biyaxji we' xtill' Jesúza' ka nla'z daa chllebgake' ben'ka' chnabia' ben' Israelka'.

¹⁴Na' ba zej shon tap lla chak lnina' ka bllin Jesúza' gana' zoa yoodo'na' na' wzoloe' chli' chsedile' ben'. ¹⁵Na' chibani ben' Israelka', na' che' ljwelle':

—¿Nakra chak chli' chsedi beeni ben', len aga bi nsede'?

¹⁶Na' che' Jesúza' legake':

—Diika' chli' chsedid' aga nakan dii chyiljlall'z', san beena' bsel' nad', len' bli' bsedile' nad' diiki. ¹⁷Nottez ben' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljlall'z'. ¹⁸Beena' tobia'loze' cho'e xtillee, balaan che kwinzen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹'Dii Moiséza' bene' le' ley che Chioza', na' ni tole bi chonle ka nllian bia' gonle. ¿Bi che' cheenzile witle nad'?

²⁰Na'ch ben'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

²¹Na' che' Jesúza' legake':

—Tochga yel' waka' ba ble'ile ben' llana' chombaanch' na' yog'le chibanile. ²²Dii li dii Moiséza' bene' byen yog'tele nakle ben' byo chiyal' sho'le sen daa le circuncisión, la'kzi aga len' wzololene'n, san dii xozxto'leka'ten. Daan chgoole bi' byodo'ka' sen na' la'kzi nakan lla chombaanch'. ²³Na' shi choe'le latj sho' bi' byodo'ka' sen daa le circuncisión lo llana' chombaanch' kwenche gak ka na leya' daa bzej dii Moiséza', ¿bi che' chllaa'zle nad' daa biyon' to ben' llana' chombaanch'? ²⁴Bi wchoglizle che ben' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúza' wne' zee gana' zoa Chioza'

²⁵Na'ch bal ben' Jerusalénka' nagake':

—¿Aga beenin cheengakile' witgake', lla? ²⁶Li wwia ka cho'e dill' ladj lkwe' ben', na' ni to kono bi che'. ¿Anti ba chajle'lza ben' wnabia'ka' nan dii li beeni nake' Crístona', beena' wsel' Chioza' inabi'e, lla? ²⁷Cho' nezicho ga ben' beeni. San kat' yid beena' nak Crístona', ni to kono inezi galə za' beena'.

²⁸Jesúza' chli' chsedile' ben'ka' yoodo'na', na' ka benile' daa wna ben'ka' che', na' wnie' zillj chi'e:

—Chakzile nombia'le nad' na' nezile ga ben' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', ²⁹ san nad' nombi'ane', la' gana' zoen' wzaa, na' len' bselee nad'.

³⁰ Na'ch bale' goklall'gake' gox'gake'ne', per ni toe' bi bex' le', la' bin' illin lla illin gor gak che' daa llia bia'. ³¹ Na' ben' zan wyajle'gake' che', na' wnagake':

—Kat' yid beena' nak Crístona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

³² Na' fariseoka' bengakile' dillaa daa choe' ben'ka' che Jesúza'. Na' legake' len bxoza' chnabia' bsel'gake' ben'ka' chap yoodo'na' kwenche lljex'gake' Jesúza'. ³³ Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'. ³⁴ Na' yiyilje nad' per aga willelile nad' daa bi gak yidle gana' ljazoa'.

³⁵ Na'ch ben' Israelka' che' ljwellgake':

—¿Garan yiyaj beeni na' bich yillelichone', lla? ¿Anti gana' lle' ben' wllall chechoka', ben'ka' lle' lall ben' zit'kan' shaje' kwenche lljasedile' ben' griegoka', lla? ³⁶ ¿Beran zejin daa ne': "Yiyilje nad', per aga willelile nad' daa bi gak yidle gana' ljazoa'?"

Espíritu che Chioza' nake' ka nis yaa nis ban

³⁷ Na' llana' zeelo gok lnina', llana' nak lla choo lla xen, wzolla' Jesúza' na' wnie' zillj, chi'e:

—Shi nole chbili, li da yeeje nisa' daa gon' le'. ³⁸ Na' gak kon ka na Cho'a Xtill' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

³⁹ Na' daa wna Jesúza' ka', zejin soa Espíritu che Chioza' loo yichjlall'do' beena' gonlilall' le'. La' ka gora' bin' yidsoa Espírituna' loo yichjlall'do' ben' daa bin' sho' Jesúza' balaanna' daa llia bia' sho'e kat' yiyepe' gana' zoa Chioza'.

Gok ben'ka' chop shon kwenla

⁴⁰ Na' bal' ben'ka' bengakile' daa wna Jesúza' na' wnagake':

—Dii li beeni nake' beena' llia bia' yid kwenche chixji'e daa che' Chioza'ne'.

⁴¹ Na' zi bale' che'gake':

—Beenikzan' Crístona', beena' chbezcho wsel' Chioza' inabi'e.

Na' zi bale' che'gake':

—¿Achakile ladj ben' Galileaka' ichej beena' wsel' Chioza' inabi'e? ⁴² Cho'a xtill' Chioza' nan lo dia che dii Davina' galj beena' nak Crístona', na' gake' ben' yell Belén ka dii Davina'.

⁴³ Ka' gok, gogake' chop shon kwenla ni che Jesúza'. ⁴⁴ Bale' goklall'gake' gox'gake'ne', per ni toe' bi biyaxji.

Ben'ka' wnabia' ben' Israelka' bi wyajle'gake' che Jesúza'

⁴⁵ Na'ch ben'ka' chap yoodo'na' billingake' gana' zoa fariseoka' len bxoza' chnabia'. Na'ch che'gake' legake':

—¿Biche bi bche'lene'?

⁴⁶ Na' ben'ka' chap yoodo'na' che'gake':

—Ni to konon' we' dill' ka dillaa choe' beena'.

⁴⁷ Na'ch che' fariseoka':

—¿Alekzka' lenle ba wxiyee? ⁴⁸ Ni to beñ' wñabia' chechoka', ni neto' fariseo bi chajle'nto' che'. ⁴⁹ Per beñ'ki bi nombia'gake' leya', ba wllia-ayi'gake'.

⁵⁰ Na' farisewa' le Nicodemo, beena' wyajlao Jesúza' wal-lə, chi'e legake':

⁵¹ —Ley chechona' nan aga wak wchoglocho che to beñ' inacho chone' mal shi bin' wzenagcho dillaa wi'e kwenche inezicho bin chone'. ¿Anti aga kan' nakan?

⁵² Na'ch che'gake'ne':

—¿Alekzka' beñ' Galilea li'? Bsed kwenche inezilo' ni to beñ' chyixjee daa che' Chioza'ne' bin' ichej gana' mbani Galileana'.

⁵³ Na'ch billeshgake' ziyaj lill che chegake'.

8

Noola' bidol'len beñ' byona'

¹ Na' Jesúza' wyaje' lo Yaa Olívoza'. ² Na' betiyo ka wyeeni' wizaje' yoodo'na'. Na' beñ' zan inlleb wbig' kwite'na', na' wchi'e wzoloe' bli' bsedile' legake'. ³ Na'ch beñ'ka' chli' chsedi leya' len fariseoka' nche'gake' to noola' bidol'lene' to beñ' byo, na' bzegake'ne' ladj beñ'ka' lle' na'. ⁴ Na' che'gake' Jesúza':

—Maestro, ba bidol'into' nooli kon to beñ' byo. ⁵ Na' nezinto' leya' daa bzej dii Moiséza' nan chiya' witocho noolka' chon ka' kon yaj. ¿Shera li', bi ka ino'?

⁶ Che'gake'ne' ka' kwenchez kweygake'ne' dill' ga si' sengake' na' gaogake' xya che'. Na'ch Jesúza' bchekee bzeje' lo yona' kon xbene'na'. ⁷ Na' daa zeyidgake' chñabgakile'ne', na' bibe'shawe' chi'e legake':

—Beena' bibi saaxya che' de, wak soloe' wtakwe'ne' yaja'.

⁸ Na'ch bizchekee chizzeje' lo yona'. ⁹ Na' ka goll Jesúza' legake' ka', na' biza' twej tweje', wzolozan beñ' golka' na'tech beñ' xkwid'ka', na' stoz noola' bgaanlene' Jesúza'. ¹⁰ Na' bibe'shao' Jesúza' dii yoblə, na' chi'ene':

—Noola, ¿garan beñ'ka' chao xya cho'? ¿Ani toe' bibi beni li'?

¹¹ Na' che' noola'ne':

—Ni toe', beñ'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

Jesúza' nsee beeni' che beñ' yell-lioni

¹² Na'ch Jesúza' bizoloe' choe'lene' beñ'ka' lle' na' dill', chi'e:

—Nad' nak' beeni' che beñ' yell-lioni. Beena' gone' nad' txen bich soe' lo yel chol' che dii mala', san loo yichjlall'do'ena' gape' beeni' daa nsa' yel' mban zejli' kani.

¹³ Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

¹⁴ Na' che' Jesúza' legake':

—La'kzi choa' dill' che kwini', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa. ¹⁵ Le' chhoglole che beñ' lega beñ' yell-lío. San nad' bi chhogloa' che beñ'. ¹⁶ Per shi nad' wchogloa' che beñ', kon ka nakannan' wchogloa'n, la' aga tobia'lozan chhogloa'n, san Xa'na', beena' bsel' nad', naknto' txen chhoglonto' che beñ'. ¹⁷ Ley chelena' nan shi chop beñ' toz ka chitili

xtilleeka' chiyal' shajle'cho chegake'. ¹⁸ Na' nak chopnto', nad' cho'a dill' che kwin', na' lekzka' Xa'na', beena' bsel' nad', cho'e dill' cha'.

¹⁹ Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

²⁰ Jesúza' bi'e dill'ki shlak bli' bsedile' ben' latja' gana' chi' daa chogogake' mech che yoodo'na', per ni to kono bex' le' daa bin' illin lla bin' illin gor gak che' daa lia bia'.

Jesúza' wne' kono gak yiyaj gana' yiyaje'

²¹ Na'ch Jesúza' wizi'e legake':

—Nad' yiyaa, na' yiyilje nad', na' gana' yiyaa aga wak sa'le, la' lao saaxya cheleka' guetle.

²² Na'ch ben' wñabia' che ben' Israelka' che' ljwellgake':

—¿Acheenile' yiyit kwinen', lla? ¿Adaan naze': "Gana' yiyaa bi gak sa'le"?

²³ Na'ch che' Jesúza' legake':

—Le' nakle ben' yell-lío, na' nad' zaa yabana'. Le' chonle lega ben' yell-lío, san nad' bi chon' ka le' ben' yell-lío. ²⁴ Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

²⁵ Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wñiakz' le' dii nechte. ²⁶ Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lënnan' choe'len' ben' yell-lioni dill'.

²⁷ Na' legake' aga wyajni'gakile' shi xtill' Xe'nan' choe'lene' legake'. ²⁸ Na' daan chi'e legake':

—Kat' ba bda'le nad', Ben' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lënnan' cho'a dill'. ²⁹ La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

³⁰ Na' ka biyoll be' Jesúza' dill'ka', ben' zan ben' lillal' gake'ne'.

Ben'ka' chñabia' dii mala' yichjlall'do'eka'

³¹ Na'ch che' Jesúza' ben' Israelka' ba chajle' che':

—Shi le' soachechle gonle ka ba wnia', dii li txenan ba nakle nad', shi naa. ³² Na' gombia'le dill' li cha'na', na' kat' ba nombia'len, gakle ka to ben' ba biyell bila' lao daa ntakw nchejan le'.

³³ Na'ch che'gake'ne':

—Neto' naknto' xiin dia che dii Abrahama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiyell yila'nto'?

³⁴ Na' che' Jesúza' legake':

—Dii li nia' le', nottez beena' chon dii mala' nake' ka ben' ndoo lawinna' daa chñabi'an le'. ³⁵ To wen llin aga toshiizi soe' lill xane'na', san xiin xan llinna', toshiizi soe' lill xe'na'. ³⁶ Na' shi nad', Xiin Chios, yisell yilaa le' lawi dii mala', dii li wiyell wila'le lawinna'. ³⁷ Nezkid' nakle xiin dia che dii

Abrahama', per cheenile witle nad' daa bi chleble cho'a xtilaani. ³⁸ Nad' cho'a dill' che daa ba ble'id' gana' zoa Xa'na', na' le', chonle ka na xalena'.

³⁹ Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—Shel' nakle dowalj xiin dia che dii Abrahama', kon ka ben dii Abrahama' chonle, shel'ka'. ⁴⁰ La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle. ⁴¹ Le' chonle kon ka chon xalena'.

Na'ch che'gake'ne':

—Aga naknto' ka to ben' bi wyoo xayin. Toz Chioza' nake' Xanto'.

⁴² Na'ch che' Jesúza' legake':

—Shel' lekzile Chioza' nake' Xale, wakile nad' shel'ka', la' kwite'nan' wzaa. Aga tobialozaan bid', san Chiozan' bselee nad'. ⁴³ Na' aga chajniile diika' nia' le' daa bi cheenile wzenagle dill'ka' cho'a. ⁴⁴ Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' naktan xan yel' wxiye'na'. ⁴⁵ Na' nad', daa cho'a dill' lina' aga chajle'le cha'. ⁴⁶ Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'? ⁴⁷ Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abrahama'

⁴⁸ Na'ch ben' wñabia' che ben' Israelka' che'gake'ne':

—jAga naznto' nanto' nako' ben' Samaria na' yootio' to dii xiw'!

⁴⁹ Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chnit chdele nad'. ⁵⁰ Aga chylj' koo ben' nad' balaan. San zoa beena' cheeni sho'a balaan, na' len' chchogloe' che ben' kon ka nakan. ⁵¹ Dii li nia' le', beena' chon ka nia', ibane' zejli kani.

⁵² Na'ch ben' wñabia' che ben' Israelka' che'gake'ne':

—Naach ba wñezinto' dii xiw'kzan yoo. Dii xozxto'cho Abrahama' wite' na' lekzka' yog' ben'ka' wdixjee daa goll Chioza' legake' kani'yi. Na' li' naa, nazo': “Beena' chzenag cha' ibane' zejli kani.” ⁵³ ¿Achakilo' zak'cho' aga ka dii xozxto'cho Abrahama'? Le' wite' na' ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

⁵⁴ Na'ch che' Jesúza' legake':

—Shel' nadaan chgwaa kwín' balaan aga bi zakiin, shel'ka'. Per Xa'na', beena' nale nake' Chios chele, len' chgwee nad' balaan. ⁵⁵ La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' ben' wxiye'. Per nombi'ane' na' chon' ka ne'. ⁵⁶ Dii xozxto'cho Abrahama' bibaile' daa wñezile' ile'ile' llaki zoa' yell-lioni. Na' ba ble'ile'n na' bibaile'.

⁵⁷ Na'ch ben'ka' chñabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abrahama'.

⁵⁸ Na'ch che' Jesúza' legake':

—Dii li nia' le', kana' zi' galjte dii Abrahama', bakz zoa' nad'.

⁵⁹ Na'ch lii wdoyetegake' yaja' nan wtakwgake'ne'n, per lii bkwash'tie' na' bizee gana' zoa yoodo'na'. Na' ni bi gokbe'gakile' bidie' ladje'ka' ziyaje'.

9

Biyon Jesúza' to beñ' l̄chol

¹ Ka zej Jesúza' na' ble'ile' to beñ' byo beñ' golje' n̄chole'. ² Na' beñ'ka' nakgake'ne' txen che'gake'ne':

—Maestro, ¿berache golj beeni n̄chole', lla? ¿An̄chole' ni che saaxya che'na', anti ni che saaxya che x̄ax̄neekan', lla?

³ Na' che' Jesúza' legake':

—Aga ni che saaxya che'nan' ni aga ni che saaxya che x̄ax̄neekan', san kwenche wli'lawi yeł' wak che Chioza' lo yeł' mban che'nan' nake' ka'.

⁴ Shlak naa ni de latj, chiyal' goncho xshin beena' bsel' nad'. La' wllin lla kat' kochno bi gak gon. ⁵ Shlak ni zoa' yell-lioni nak' beeni che beñ' yell-lioni.

⁶ Na' ka biyoll wna Jesúza' ka', na'ch bll̄e x̄eneena' lo yona' na' bene' lat' beñj kon x̄eneena', na'ch wdebe'n jalao beñ' l̄choła'. ⁷ Na' chi'ene':

—Wyaj jadib jalawo'na' cho'a tanga' daa le Siloé —na' Siloé zejın Beñ' Nselee.

Na'ch wyaj beñ' l̄choła' jadib jalawe'na', na' ka bizee na', ba chle'ile'.

⁸ Na'ch beñ' wllil che'ka' na' beñ'ka' ble'gakile'ne' kana' n̄chole' che'gake':

—¿Aaga beenin chbi'e ch̄nabe' mecha'?

⁹ Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

¹⁰ Na'ch w̄n̄abgakile'ne':

—¿Nakra gok ba chle'ilo'?

¹¹ Na' chi'e legake':

—To beñ' le Jesús bene' benja' na' wdebe'n jalaw'ki na'ch wne' nad':

“Wyaj gana' llia tanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

¹² Na'ch che'gake'ne':

—¿Garañ beena' no' ka'?

Na' chi'e legake':

—Bi nezid'.

W̄n̄abyolli fariseoka' nak gok ble'i beñ' l̄choła'

¹³ Na'ch jwa'gake' beena' gok beñ' l̄chol lao fariseoka'. ¹⁴ Na' llana' wdeb Jesúza' benja' jalao beena' kwenche ble'ile' nakan lla chom-baangake'. ¹⁵ Na'ch fariseoka' lekzka' w̄n̄abgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

¹⁶ Na'ch bał fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaanchō.

Na' zi bale' che'gake':

—¿Nakra gon to beñ' saaxya gone' yeł' wak ka diiki chon beeni?

Na'ch gokgake' chopl̄. ¹⁷ Na'ch dii yobl̄ gollgake' beena' gok beñ' l̄chol:

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to beñ' chyixjee daa che' Chioza'ne'.

¹⁸ Na' beṇ'ka' chṇabia' beṇ' Israelka' bi wyajle'gake' shi dii li gok beena' beṇ' l̄choḷ na' ṇaa ba chle'ile'. Na'ch goxgake' xaxṇeena', ¹⁹ na' wṇabgakile' legake':

—¿Abeenin xiṇlena', beena' nale n̄choḷe' ka golje'? Na' ¿nakra gok ba chle'ile' ṇaa, shka'?

²⁰ Na' xaxṇeena' billiigake' xtilleeka':

—Nezinto' beenin xiṇnto'na' na' golje' n̄choḷe'. ²¹ Per aga nezinto' nak gok chle'ile' ṇaa, ni bi nezinto' non biyon le'. Li inabile', la' aga nake' bi'do' in̄acho bi gak ine' non biyon le'.

²² Goll xaxṇeena' ka' daa chllebgake' beṇ'ka' chṇabia' beṇ' Israelka', la' ba bgaangake' dill' nottezə beṇ' ine' Jesúza' nake' Crístona' bi wlebgake'ne' gana' chdop chllaggake' choe'l̄willgake' Chioza'. ²³ Daan golltezə xaxṇeena': "Li inabile', la' aga nake' bi'do' in̄acho bi gak ine' non biyon le'."

²⁴ Na'ch dii yoblə goxgake' beena' gok beṇ' l̄choḷ, che'gake'ne':

—Bzoashki Chioza' de taschiw shi leilo' choo dill' li, la' nezinto' beena' biyon li' nake' beṇ' saaxya.

²⁵ Na'ch golle' legake':

—Bi nezid' shi nak beena' beṇ' saaxya. Lete dii nezid', golj' n̄choḷ' na' ṇaa ba chle'id'.

²⁶ Na'ch che'gake'ne':

—¿Beran benile' li'? ¿Nak bene' kwenche chle'ilo'?

²⁷ Na' chi'e' legake':

—Ba wniakz' le', na' bi chzi'le cho'a xtillaana'. ¿Biḷe cheenzile in̄ia'n dii yoblə? ¿Anti lekzka' lenle ba cheenile gonlene' txen?

²⁸ Na'ch wṇegake'ne' zibia', che'gake'ne':

—Lin' nako' beena' txen, san neto' Moisézan' naknto' txen. ²⁹ Nezinto' Chioza' wṇie' Moiséza', san beena', ni bi nezinto' ga zee.

³⁰ Na'ch beena' gok beṇ' l̄choḷ chi'e' legake':

—iNakkzan dii yibanicho daa bi nezile ga za' beena' na' ba bene' ka chle'id'! ³¹ Nezkzicho aga chzenag Chioza' che beṇ' saaxyaka', san chzenague' che beṇ'ka' choe'la'ogake'ne' na' chongake' daa chazlallee. ³² Dezd ka wx̄e wzil yell-lioni biṇ' yenicho shi zoa beṇ' chak chone' ka chle'i to beṇ' golje' n̄choḷe'. ³³ Shel' beeni bi nake' to beṇ' bsel' Chioza', ni to yel' wak bi gak gone', shel'ka'.

³⁴ Na'ch che'gake'ne':

—Dezd ka goljo' nako' beṇ' saaxya. ¿Ana' chakilo' wli' wsedilo' neto'? Na'ch bibejgake'ne' ladje'ka'.

Beṇ'ka' n̄choḷ n̄niti yichjlall'do'eka'

³⁵ Na' wṇezi Jesúza' bibej fariseoka' beena' gok beṇ' l̄choḷ ladje'ka', na' ka billague'ne' na'ch chi'ene':

—¿Achon̄ilalloo Beena' Bsel' Chioza' Yell-lioni?

³⁶ Na' beena' chi'ene':

—Beṇ'do', wnashki nad' nora beena' kwenche gon̄ilallaane'.

³⁷ Na' che' Jesúza'ne':

—Ba ble'kzilo'ne', na' lekzen' chshaljleno' ṇaa.

³⁸ Na'ch lii b̄chek'te xibe'na' lao Jesúza', na' chi'ene':

—Chon̄ilallaa li', X̄an' —na'ch be'laweene'.

³⁹ Na'ch che' Jesúza':

—Ba bid' yell-lioni kwenche wchogloa' che ben' yell-lioni. Zaa kwenche ben'ka' nak ka ben' lchol' ile'gakile', na' ben'ka' chakgakile' chle'gakile' yiyakgake' ka ben' lchol'.

⁴⁰ Na'ch ba' fariseoka' lle' na', ka bengakile' chi'e ka', che'gake'ne':

—¿Achakilo' lennton' naknto' ben' lchol'?

⁴¹ Na'ch che' Jesúza' legake':

—Shel' nakle ben' lchol', aga bi xtol'le de, shel'ka'. Per daa nale chle'ile, daan de xtol'le.

10

Jempl che leej che xil'ka'

¹ Dii li nia' le', beena' bi choo cho'a leej che xil'ka' san chiyiljallee cho'e gan yoblə, beenan' ben' wban'na'. ² San beena' choo cho'a leeja, len' ngoo lall' nee chape' legakb. ³ Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'. ⁴ Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'. ⁵ Aga willjanogakb ben' yoblə, san wxonjdogakib le' daa bi nombia'gakb shi'ena'.

⁶ Bzoa Jesúza' jempli kwenche bzajniile' ben'ka'. Per legake' aga wya-jni'gakile' bin zeji daa golle' legake'.

Jesúza' chapshi'e cho' ka ben' chapshi'e xil' che'

⁷ Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'. ⁸ Yog' ben'ka' bid kana' bin' yid', nakgake' ka ben' wban. Na' ben'ka' nia' nakgake' xil' cha' bi bzenaggake' chegake'. ⁹ Nad' nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

¹⁰ 'Ka nak wban'na', za'ze' kwenche kwane' na' wite' na' wliayee legake'. San nad', zaa kwenche wi'a to yel' mban shao' chegake', na' soagake' mbalaz. ¹¹ Nad' nak' ka to ben' chapshi'e xil' che'na', beena' ax't chzani yel' mban che'na' ni che xil'do'ka' nape'. ¹² San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zni'ana' chox'b xil'ka' na' chsheshlesb legakb. ¹³ Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombi'a'gake' nad'. ¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'. ¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gaggake' txen xil' cha'ka'. Na' chiyal' gaxgakee kwenche wzenaggake' cha', na' yog'gake' gaggake' tozə, na' toz nad' gak lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii. ¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel' wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə beŋ' Israelka' lle' na' gogkake' choplə ka bengakile' daa wne'. ²⁰ Zane' che'gake':

—¿Biche chzenagzle che beena'? Dii xiwaan yo'e, na' chaktonte'n.

²¹ Na' zi bale' che'gake':

—Aga choe' beeni dill' ka beŋ' yoo dii xiw', la' aga bi yel' wak nap dii xiwaa yiyonan to beŋ' l'chol.

Beŋ'ka' chñabia' beŋ' Israelka' bi bzenaggake' che Jesúza'

²² Na' do kana', gol' lñina' Jerusalenna' daa chisa'lall'gake' llana' benga'gake' lall' na' Chioza' yoodo'na', na' nak beo' zag. ²³ Na' chda Jesúza' loo koridor che dii Salomónna' daa ze kwit yoodo'na'. ²⁴ Na' beŋ'ka' chñabia' beŋ' Israelka' wyeçhijyobgake'ne', che'gake'ne':

—¿Axt batrakzə yikwaso' yel' chakçhoplall' çhento'ni? Shi li'kzan Crístona', beena' chbeznto' wsel' Chioza', lla wnatega neto' kwençhe inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wnabia' che Xa'na', na' chli'n nan len' bselee nad'. ²⁶ Na' le', bi chajle'le daa bi nakle txen beŋ'ka' nia' nakgake' xil' cha'. ²⁷ Nombi'a beŋ'ka' nia' nakgake' xil' cha', na' legake' chzenaggake' xtillaana' na' nogake' nad'. ²⁸ Na' cho'a legake' yel' mban zejli kani, na' bi kwiayi'gake'. Na' ni to kono gak yibej legake' lo ni'a na'ni. ²⁹ Xa'na' ba bene' legake' lall' na' gapshii'gakee, na' len' chñabia'che' lao nottez. Na' ni to kono gak yikwas legake' lo ni'a neena'. ³⁰ Ka Xa'na'kz, nad'.

³¹ Na'ch beŋ' Israelka' bizgoyogake' yaja' kwençhe nan wtakwgake'n Jesúza'. ³² Na' chi'e legake':

—Dii zan dii wen ba ble'ile chonlen' yel' wak che Xa'na'. Na' çnonnan' bi choollall'le daa cheenile' wtakwle nad' yaja'?

³³ Na' beŋ'ka' chñabia' beŋ' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' beŋ'zə li'.

³⁴ Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.” ³⁵ Cho'a Xtill' Chioza' toshiizi nakan ka wne', na' shi cho'en dill' bsi'e “chios” beŋ'ka' wdixjee xtilleena', ³⁶ çbiche nazle nad' chñia' che Xacho Chioza' daa nia' nak' Xiine', len len' wleje' nad' na' bselee nad' yell-lioni? ³⁷ Shi bi chon' ka chon Xa'na', aga wyajle'le cha'. ³⁸ Na' shi chle'ile chon' ka diika' chon Xa'na', li' shajle' che diika' chon', la'kzi bi cheenile shajle'le cha', kwençhe inezyen'ile Xa'na' zualene' nad' na' nad' zualenee.

³⁹ Na'ch dii yoblə goklall'gake' gox'gake'ne' na' bene' gan bile' lawe'ka'.

⁴⁰ Na'ch bizyaj Jesúza' dii yoblə shlaa yao Jordánna' jazoe' latja' gana' bchoa Juanna' beŋ'ka' nisa' kana'. ⁴¹ Na' beŋ' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

⁴² Na' beŋ' zan wyajle'gake' che Jesúza' na'.

11

Wit Lázarona'

¹ Yell Betániana' wzoa to beŋ' bi shao' wlie' Lázaro, na' lekzka' na' wzoa beŋ' zane'ka' Maríana' len Mártana'. ² Maríana', beŋ' zan Lázarona', len'

bwazje' set zixa' ni'a Xancho Jesúza' na' bisbillile'n yish' yichje'na'. ³ Na' chop bilte beñ' zan Lázaron'a' bsel'gake' rson lao Jesúza' che'gake'ne':

—Xan', bi shao' beñ' zannto'ni, beeni nllaguilo'.

⁴ Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

⁵ La'kzi Jesúza' chakchgaile' Mártana', na' beñ' bile'na' na' Lázaron'a', ⁶ ka benile' rson bi shao' Lázaron'a', wllachile' zi chop lla gana' zoe'. ⁷ Na' ka wde, chi'e beñ'ka' nakgake'ne' txen:

—Li sho' Judeana' sto shii.

⁸ Na'ch beñ'ka' nakgake'ne' txen che'gake'ne':

—Maestro, kani batchgana' goklalli beñ' Israelka' lle' na' witgake' li' kon yaja'. ¿Ana' cheenilo' yizajo' na'?

⁹ Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga willjachewee daa de beeni'na' yell-lioni. ¹⁰ San shi chde' wal-lə, willjachewee daa bi nla'.

¹¹ Na'tech golle' legake':

—Ba ches Lázaron'a', beena' nllaguicho, na' sha' lljasbanee.

¹² Na'ch che' beñ'ka' nakgake'ne' txen:

—Xan', shi ba chese', wiyakshao'lall'kzile'.

¹³ Jesúza' golle' ka' daa nezile' ba wit Lázaron'a', na' legake' chakgakile' daa cheszen' golle' ka'. ¹⁴ Na'ch be'len Jesúza' legake' dill' ka' to shajni'gakile', chi'e:

—Ba wit Lázaron'a'. ¹⁵ Na' chibaid' bi wzoa', la' chyaljch gon' ka shajle'chle cha'. Li sho' shajcho gana' die'.

¹⁶ Na'ch Tomáza', beena' che'gake' Dídimo*, chi'e beñ'ka' sto:

—Li sho'lene' kwenche lencho guetlenchone' shi witgake'ne'.

Jesúza' chakyisbane' beñ' wetka'

¹⁷ Na' ka bllingake' yella', na' che'gake'ne' ba gok tap lla bgash' Lázaron'a'. ¹⁸ Na' Betániana' llian gaozə Jerusalénna', ka do shon kilómetro nlaagakan. ¹⁹ Na' beñ' zan beñ' Israelka' lle' Jerusalénna' wyajgake' jensenlall'gake' Mártana' len Mariana' daa wit beñ' zane'ka'. ²⁰ Na' ka wnezi Mártana' ba zoa illin Jesúza', na'ch jatile'ne', per Mariana' bigaane' lille'ka'. ²¹ Na' ka blline' kwite'na', chi'ene':

—Xan', shel' zo' ni kana' wlen yillwe' che beñ' zan'na' bi wite', shel'ka'.

²² Na' naa la'kzi ba wite', nezid' gon' Chioza' bittezə dii inabilo'ne'.

²³ Na' che' Jesúza'ne':

—Wiban beñ' zano'na'.

²⁴ Na'ch che' Mártana':

—Awe, nezid' wibane' kat' yiban beñ' wetka' llana' te che yell-lioni.

²⁵ Na' che' Jesúza'ne':

—Nad' chon' ka chiban beñ' wetka' na' nap' yeñ' mban dii bi te cheyin. Beena' chonlilallee nad', la'kzi ba wite', wibanchkze'. ²⁶ Na' yog' beñ'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

²⁷ Na' che' Mártana'ne':

—Awe, Xan', chajli'a lin' nako' Crístona', na' lin' Xiin Chioza', beena' llia bia' yid yell-lioni.

Wchell Jesúza' gana' bkwash'gake' Lázaron'a'

28 Na' biyoll wna Márтана' ka', na'ch ziyaje' zjanie' beṇ' bile' Maríana', na' chi'ene' xochizi:

—Ba bid Maestrona' chnie' li'.

29 Na' kon ka golle' Maríana' ka', lii wzolla'tie' jawie' Jesúza'. 30 Bilan' sho' Jesúza' yella', ni zetie' gana' jatil Márтана'ne'. 31 Na' beṇ' Israelka', beṇ'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

32 Na' ka bllin Maríana' kwit Jesúza', lii b̄chek'te xibe'na' lawe'na' chi'ene':

—Xan', shel' zoasho' ni, bi wit beṇ' zan'na', shel'ka'.

33 Na' ka ble'i Jesúza' chbell Maríana', na' ka'kzə beṇ'ka' zejlengake'ne', na' to dii wal inlebb gokile'. 34 Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

35 Na' wchell Jesúza'. 36 Na'ch che' ljwell beṇ' Israelka' lle' na':

—Li wwia ka gokchgaile'ne'.

37 Na'ch bale' che'gake':

—Beeni bene' ka ble'i beṇ' l̄chola', ¿Aaga zak bisle' Lázaron'a', na' bi wite' shel'ka', lla?

Bisban Jesúza' Lázaron'a' ladj beṇ' wetka'

38 Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'. 39 Na'ch che' Jesúza':

—Li yikwas yaja' ka'lə.

Na' Márтана', beṇ' zan beṇ' weta', chi'ene':

—Xan', ba chl̄a' beena' zban, l̄a' ba gok tap lla wite'.

40 Na' che' Jesúza'ne':

—¿Aaga ba wnia' li' shi shajli'o, na' ile'ilo' yel' wak choo yel' wak xen che Chioza'?

41 Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'. 42 Neqid' toshiizi chzenago' cha', per chnia' li' kwenche shajle' beṇ'ki lle' ni nan lin' bse'loo nad'.

43 Na' ka biyoll wne' ka', na'ch wnie' zillj, chi'e:

—¿Lázaro, bichej na'!

44 Na' lii bichejte Lázaron'a' ndob ni'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xnezin gox'gake' Jesúza'

(Mt 26:1-5; Mr 14:1-2; Lc 22:1-2)

45 Na' zan beṇ' Israelka', beṇ'ka' jen Maríana' txen daa wit beṇ' zane'na', ble'gakile' ka ben Jesúza' na' benlilall'gake'ne'. 46 Per bale' wyaj lao fariseoka' na' jellgake' legake' ka ben Jesúza'. 47 Na'ch b̄xozka' ch̄nabia' na' fariseoka' bitopgake' yog' beṇ'ka' ch̄nabia' beṇ' Israelka', na' che'gake':

—¿Nakraz ka gonchon, lla? L̄a' zan yel' wak chli' beeni. 48 Na' shi inacho jwayi beena', yog'z beṇ' gonlilall'gake'ne' na'ch yid beṇ' Rómaka' na' williayi'gake' yoodo' chechoni len yell chechoni.

49 Na' len to beṇ' le' Caifás, nake' b̄xoz choo b̄xoz xen ka lo yiza'. Na' chi'e legake':

—Bi nezzilen, ⁵⁰ ni bi chakbe'ile wenlan toz beṇ' guet ni che beṇ' wllall chechoka', aga ka daa kwiayi' doxen lallchoni.

⁵¹ Na' aga kon ka wnaz Caifáza' kan', san daa nake' b̄xoz choo b̄xoz xen lo yizan', ben Chioza' ka bi'e dill' guet Jesúza' ni che beṇ' Israelka'. ⁵² Na' aga ni che toz beṇ' Israelkan' guet Jesúza', san lekzka' ni che yog' beṇ'ka' ba wleje' gakgake' xiine' doxen yell-lionin, kwenche gakgake' toz. ⁵³ Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

⁵⁴ Na' daa wzolo chongake' ka', aga wdatekch Jesúza' ladj beṇ' Israelka', san wzee wyaje' to yell dii le Efraín, daa llia gaozə latja' gana' bibi chashj chleb, na' na'z wzoe' len beṇ'ka' nakgake'ne' txen.

⁵⁵ Na' ba zoa gao gal' lni Paskw che beṇ' Israelka', na' beṇ' zan beṇ' yell yoblə wyajgake' Jerusalénna' ka zi' gal' lnina' kwenche yixi yiyechgake' ka nllia leya' bia'. ⁵⁶ Na' chdagake' chiyiljgake' Jesúza', na' shlak lle'gake' lesh' chyoodo'na', chñabi ljwelle':

—¿Beraka chakile? ¿Awide' lnina', lla?

⁵⁷ Na' b̄xozka' chñabia' len fariseoka' bengake' mandad shi no nezi ga chda Jesúza' do na' lljellgake' legake' ka' kwenche gox'gake'ne'.

12

Bwazj Maríana' set zixa' ni'a Jesúza'
(Mt 26:6-13; Mr 14:3-9)

¹ Zi' xop lla gal' lni Paskwa' wyaj Jesúza' yell Betániana', gana' zoa Lázarona', beena' bisbane' ladj beṇ' wetka'. ² Na' beṇ'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázarona' wche'lene' Jesúza' cho'a mesa' na' nochlə beṇ'ka' wdaolengake'ne'. ³ Na'ch beṇ' Maríana' ka do gashj litr set zixa' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yichje'na'. Na' doxen loo yooná' wche' shii set zixa'. ⁴ Na' len Jud Scariota', beena' nak Jesúza' txen, beena' gone'ne' lo na' beṇ' malka'. Na' golle':

⁵ —¿Berache bi betee set zixa' na' wi'e mecha' gaklenan beṇ' yesh'ka', lla? Len la' ka che twiz laxj bənaan zakaan.

⁶ Juda' wne' ka' aga inacho daa chiyeshile' beṇ' yesh'kan', san daa nake' to beṇ' wbanan. La' len' gok lall' nee xmeche'ka' na' chbane' lat' wejan. ⁷ Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' wkwash'gake' nad'. ⁸ Ka nak beṇ' yesh'ka', toshiizin soakz beṇ'ka' ladjleni, san nad', aga toshiizin soalen' le'.

Wloogake' xnezin witgake' Lázarona'

⁹ Na' zan beṇ' Israelka' wnezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázarona', beena' bisban Jesúza' ladj beṇ' wetka'. ¹⁰ Na'ch b̄xozka' chñabia' bengake' toz dill' witgake' len Lázarona'. ¹¹ La' daa biban Lázarona' ladj beṇ' wetka', zan beṇ' Israelka' benlilall'gake' Jesúza' na' bich bzenaggake' che b̄xozka'.

Ka biyoo Jesúza' Jerusalénna'
(Mt. 21:1-11; Mr. 11:1-11; Lc. 19:28-40)

¹² Na' betiyo beṅ' be beṅ' zil, beṅ'ka' lle' yell Jerusalénna' daa chaḷ' lṅi Paskwa', wneṅgakile' ba ngoo Jesúza' nez yilline' yella'. ¹³ Na'ch wyajgake' jleṅgake'ne' noṅ'gake' zinka', na' choe'la'ogake'ne', nagake':

—jLi we'la'o Chioza'! jGonleeyshga Xancho Chioza' beeni ba bselee inabi'e cho' ben' Israel!

¹⁴ Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵ Le' beṅ' yell Jerusalén, bi illeble.

Lṅi wwia, ni ba za' beena' inabia' le' na' llie' to burr chbando'.

¹⁶ Na' beṅ'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj beṅ' wetka', kana'ch gokbe'gakile' nan Cho'a Xtill' Chioza' daa bzej beṅ'ka' kani'yi choe'n dill' che', na' che' diika' bengakile'ne'.

¹⁷ Na' beṅ'ka' lle'len Jesúza' kana' bisbane' Lázaron'a' ladj beṅ' wetka', beṅ'ka' bengakile' binie'ne' kwenche bicheje' loo bana', legaken' be'gake' dill' daa bene'. ¹⁸ Daan beṅ' zan jatilgake' Jesúza' daa bengakile' ka nak yel' waka' bene'. ¹⁹ Na'ch fariseoka' che' ljwellgake':

—Lṅi wwia ka ba chak, bibi de goncho. Lṅi wwia, yog'lolzə beṅ' ba nogake' le'.

Baḷ ben' griegoka' chiyilgake' Jesúza'

²⁰ Ladj beṅ'ka' wyaj lṅina' Jerusalénna' je'la'ogake' Chioza' na' len baḷ ben' griego. ²¹ Na' beṅ'ki jabig'gake' gana' ze Felípena', beena' nak beṅ' yell Betsaida daa lia yell-lío daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

²² Na' Felípena' jelle' Andréza' ka', na' choptie' wyajgake' jellgake' Jesúza' ka'. ²³ Na'ch che' Jesúza' legake':

—Ba bllin lla, nad', Beṅ' Bsel' Chioza' Yell-lioni, sho'a balaan xenna'. ²⁴ Dii lṅi nia' le', shi to biṅ che' trígon'a' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal. ²⁵ Beena' ze wneye' che' yel' mban che'na' yell-lioni, len' kwiayee. San beena' chzani yel' mban che'na' bittezə dii gak che', beenan' gat' yel' mban che' zejli kani. ²⁶ Nottezə beṅ' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷ 'Naatek chakyeshid' dii wal inlleb. ¿Awnabid' Xa'na' yisle' nad' lawi dga wtil', lla? Bi gak gon' ka', la' ni cheyi dgayen'kzan bid'. ²⁸ Na'ch golle':

—Xa, benschki ka shoo balaan.

Na'ch wne Chioza' yabana', chi'e:

—Ba ben' kwenche wyo'a balaan, na' naa gon' ka sho'a balaan sto shii.

²⁹ Na' beṅ'ka' lle' na' bengakile' shii Chioza', na' baḷe' wnagake' wziwa'zan wne. Na' zi baḷe' wna to anjlan' ba wnie' le'.

³⁰ Na'ch Jesúza' chi'e legake':

—Aga ni cha' nadaan wne Chioza', san ni che len'. ³¹ Na' ba bllin lla gone' yel' joschis che' yog' beṅ' lle' yell-lioni, na' naa kweje' dii xiwaa daa chnabia' yell-lioni. ³² Na' kat'ka' wḷisgake' yaga' cha'lə'gana' nda'gake' nad', kanan' gat' latj gonlilall' nottezə beṅ' nad'.

³³ Na' daa wne' ka', bzajniile' legake' nakan guete'. ³⁴ Na' beṅ'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kani. Na' ¿biche nazo' Beena' Bsel' Chioza' Yell-lioni wligake'ne' cha'la wwia beñ' le' lee yaga' gana' dee? ¿Nora Beena' Bsel' Chioza' Yell-lioni no' ka'?

³⁵ Na'ch che' Jesúza' legake':

—Nad' nak' beeni' che beñ' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak chele ka chak che to beñ' chalile' kat' ngwee' nez. La' beena' chda' gana' shchol' bi nezile' galan zeje'. ³⁶ Li gonlilall' nad' naa shlak ni zoalen' le' kwenche sho' beeni' cha'na' loo yichlall'do'lena'.

Biyoll wna Jesúza' ka' na'ch bizee jakwashi'le' legake'.

Ben' zan beñ' Israelka' bi wyajle'gake' che Jesúza'

³⁷ La'kzi beñ' Israelka' ble'gakile' yel' wak zan daa ben Jesúza', zangake' bi benlilall'gake'ne'. ³⁸ Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Xan' ¿azoa beñ' ba wyajli'e dillaa chyixje'nto'?

Na' ¿azoa beñ' ba gokbe'ile' bli'o yel' wak cho'na'?

³⁹ Na' bi wyajle'gake', la' Chioza' bene' chegake' ka na sto dii bzej dii Isaíaza':

⁴⁰ Bene' legake' ka beñ' lchol' na' lall'do' chech

kwenche bi gakbe'gakile' bi zejin diika' chle'gakile',

ni bi shajni'gakile' diika' chengakile',

kwenche ki yiyaj yilengakile' na' yiyone' legake' beñ' wen.

⁴¹ Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' che'.

⁴² Na' la'kzi ka', beñ' zan beñ' Israelka' lente no beñ' wnabia' che'ka' benlilall'gake' Jesúza'. Per bi be'gake'n dill' daa bllbgake' bich wleb fariseoka' legake' gana' chdop chllaggake' choe'lwillgake' Chioza', ⁴³ la' wyoolall'chgake' ina beñ' nakgake' beñ' wen aga ka daa ina Chioza' nakgake' beñ' wen.

Cho'a xtill' Jesúza' nakan dii lialo

⁴⁴ Na'ch wne Jesúza' zillj chi'e:

—Nottez beñ' chonlilall' nad', aga toz' nadaan chonlilallee, san len beena' bsel' nadaan chonlilallee. ⁴⁵ Na' nottez beñ' chle'ile' nad', lezkka' chle'ile' beena' bsel' nad'. ⁴⁶ Zaa yell-lioni kwenche beena' gonlilallee nad' te' lo beeni' cha'na' na' bich soe' lo yel chol'a'. ⁴⁷ Na' shi no beñ' chenile' cho'a xtilaani na' bi chone' ka nia', aga nadaan wchogloa' che', la' aga zaa kwenche wchogloa' che beñ' yell-lionin, san zaa kwenche yislagakee na' bi kwiayi'gake'. ⁴⁸ Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtilaana' daa ba bi'a, lennan' gawan xya che' kat' illin lla te che yell-lioni. ⁴⁹ La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiya' inia' na' bin chiya' wli' wsedid' beñ'. ⁵⁰ Na' nezid' dill' daa nllia Xa'na' bia' inia' nsa'n yel' mban zejli kani. Daan, yog'lol' diika' nia', nakan kon ka wna Xa'na' nad'.

¹ Ka ba zoa gal' lni Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' axt ga zeelo.

² Na' ka chaogake' xshe'na', ba wloolə dii xiwaa loo yichjall'do' Jud Scariota', xiin Simónna', gone' Jesúza' lo na' ben' malka'. ³ Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə. ⁴ Na' lo zej chaogake' xshe'na', wzolla' Jesúza' na' bkwise' xe' dii toña' ka'lə, na' bchele' to lech' lsineena'. ⁵ Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

⁶ Na' ka bidol' chibe' ni'a Simón Pédrone', na'ch che' Pédrone'ne':

—Xan', çali'lə chibzo' ni'ani?

⁷ Na' che' Jesúza'ne':

—Aga chajniilo' dga chon' naa, per techlə shajniilo'n.

⁸ Na'ch che' Pédrone'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

⁹ Na'ch chize' Pédrone'ne':

—Shi kan' nakan, Xan', aga toz ni'ani chibo' san len yichji na' na'ki.

¹⁰ Na'ch che' Jesúza'ne':

—Beena' nosh' nazje', toz ni'enan' chiyal' shech, la' ba nechkz kwerc che'na'. Ka'kzan le', ba nxi nyechle, la'kzi aga yog'le.

¹¹ Daa nezi Jesúza' non gon le' lo na' ben' malka', daan chi'e legake': “Aga yog'le ba nxi nyech.”

¹² Na' ka biyoll wdibe' ni'eka', na'ch biyakwe' xe' dii toña' na' jachi'e cho'a mesa' sto shii. Na' chi'e legake':

—çAnezile bi zejın dga ba ben'? ¹³ Le' nale nad' Maestro na' Xan', na' lezkile, la' kan' nakan. ¹⁴ Na' shi nad', naktia' Maestro chele na' Xanle, ba wdib' ni'alena', lezkka' le' chiyal' chib ni'a ljwell-le. ¹⁵ Ba ben' dga kwenche bliid' le' kan' chiyal' gon che ljwell-le. ¹⁶ Dii li nia' le', aga zak'chi to mos ka xane'na', na' to ben' zej mandad aga zak'che' ka beena' bseleene'. ¹⁷ Shi chajniile diiki ba wnia' na' gonlen, na' soale mbalaz.

¹⁸ 'Na' aga yog'len nia' ka'. Nezi' nolen ba wlej' kwenche nonlilall'le nad'. Na' chiyal' gak ka na Cho'a Xtill' Chioza', gana' na: “Beena' chaolentie' nad' txen ba chiyechje' nad' gone' mal cha'.” ¹⁹ Naa nia' le' dga zi' gak, kwenche kat' ba chakan shajle'le nak' beena' ba wnia' nak'. ²⁰ Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' ben' malka'

(Mt 26:20-25; Mr. 14:17-21; Lc 22:21-23)

²¹ Na' biyoll wna Jesúza' ka', le gokyeshii loo yichjall'do'ena', na' bi'e dill' kwaslöl, chi'e:

—Dii li nia' le', tole gonle nad' lo na' ben' malka'.

²² Na'ch ben'ka' nakgake'ne' txen chwia ljwellgake' chakgakile' no-gaken' chi'e ka'. ²³ Na' to beena' nak Jesúza' txen, beena' chakchgaile', chi'e kwite'na'. ²⁴ Na' Simón Pédrone' bene' sen' kwenche inabi beena' chi' kwit Jesúza' noen' chi'e ka'. ²⁵ Na'ch jabig'ch beena' gaoch kwit Jesúza' na' wñabile'ne', chi'ene':

—çNoran gon ka', Xan'?

26 Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiin beena' le Simón.
27 Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

28 Na' ni to ben'ka' chaolengake'ne' bi wyajni'gakile' biche gollze'ne' ka'.
29 Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech ben' yesh'ka'. La' len' nak lall' nee xmeche'ka'.
30 Na' ka wde wdao Juda' yetxtila' daa be' Jesúza'ne', lii wza'tie'. Na' ba gol ka wzee.

Dii koba' daa nllia Chioza' bia'

31 Na' ka wde wza' Juda', na'ch che' Jesúza':

—Ba bllin lla sho'a balaan, nad', Ben' Bsel' Chioza' Yell-lioni, na' lekzka' dga gon', gonan ka sho' Chioza' balaan. 32 Na' daa gon' ka sho' Chioza' balaan, lekzka' kwin Chioza' gone' kwenche nad', Ben' Bsel' Chioza' Yell-lioni, sho'a balaan, na' lii gontie'n. 33 Le' xiindawaa, zi shlollchga zoalen' le'. Na' yiyilje nad', na' chiznia' le' ka gosh' ben'ka' chnabia' ben' Israelka': Gana' yiyaa, bi gak sa'le. 34 Na' to dii kob chllia' bia' gonle naa: Li gaki ljwell-le. Ka chakid' le', kan' chiya' gaki ljwell-le. 35 Shi gaki ljwell-le, na'ch inezi yog'lo'lte ben' nakle nad' txen.

Wáixjee Jesúza' bi wcheb Pédróna' shi nombi'ene'

(Mt. 26:31-35; Mr. 14:27-31; Lc. 22:31-34)

36 Na'ch Simón Pédróna' wñabile' Jesúza', chi'ene':

—Xan', ¿garan yiyajo'?

Na' che' Jesúza'ne':

—Aga wak soo gana' yiyaa naa, per wllin lla soo.

37 Na'ch che' Pédróna'ne':

—Xan', ¿berache bi gak sa'len' li' naa? Ba nchoglallaa guet' ni cho'.

38 Na' Jesúza' chi'ene':

—¿Achakilo' ba nchoglalloo gueto' ni cha'? Dii li nia' li', shon shii bi wchebo' shi nombi'o nad' ka zi' kwell-la shikwteza'.

14

Jesúza' nake' neza' chillin kwit Xe' Chioza'

1 Bi gakshejlall'le. Li gonlilall' Chioza' na' lekzka' li gonlilall' nad'. 2 Lill xlatj Xa'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa lljayenshawaa gana' yidzoale. 3 Na' kat' ba benschawaan, na'ch yiyed' yidxia' le' kwenche lenle soale gana' zoa'. 4 Na' ba nombia'le neza' daa chillin gana' lljazo'.

5 Na'ch Tomáza' chi'ene':

—Xan', bi nezinto' gan yiyajo'. ¿Nakran gonnto' yillelinto' neza'?

6 Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a ben' yel' mban zejli kani. Aga no yillin kwit Xa'na' shi bi gonlilallee nad'. 7 Daa ba nombia'le nad', lenkz Xa'nan' ba nombia'le. Na' naa ba nombia'lene' na' ba ble'ilene'.

8 Na'ch che' Felípena'ne':

—Xan', ben ka ile'into' Xo'na' na' xenlall'nto'.

⁹ Na'ch billii Jesúza' xtilleena', chi'e:

—Felipe, ba wlla zoalen' le', ¿ana' bikzan' gombia'yenoo nad'? Beena' ba ble'ile' nad' lekzka' ba ble'ile' Xa'na'. ¿Berache chnabzo' gon' ka ile'ilene'?
¹⁰ ¿Abi chajli'o zoalen Xa'na' nad' na' nad' zoalenee? Diika' nia' le' aga to bia'lozan' chnia'n, san daa cheeni kwin Xa'na', beena' zoalene' nad', lennan' cho'a dill' na' lennan' chon'.
¹¹ Li shajle' daa nia' zoalen Xa'na' nad', na' nad' zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'.
¹² Dii li nia' le', nottez ben' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit Xa'na'.
¹³ Na' gon' bittez daa inabile Xa'na' daa nakle nad' txen kwenche sho'e balaan ni cha'.
¹⁴ Nad' gon' bittez daa inabile daa nakle nad' txen.

Bcheb Jesúza' wselee Espiritu Sántona'

¹⁵ Shi chakile nad', li gon diika' nllia' bia' gonle. ¹⁶ Na' inabid' Xa'na' wselee sto ben' gaklene' le' na' soalene' le' toshiizi. ¹⁷ Len' Espiritu Sántona', beena' chli' daa nak dii li. Na' ben' yell-lioki aga wak wleb-gake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjall'do'lena'.
¹⁸ Aga wikwaan' le' ka bi wizeb, san wiyedch' soalen' le'.
¹⁹ Aga chllach bich ile'i ben' yell-lioni nad', san le' wle'chkzile nad'. Na' daa mban' toshiizi, lekzka' le' toshiizi ibanle.
²⁰ Kat' illin llana' nia' ka', na' gakbe'ile zoalen' Xa'na', na' le' zoalenle nad' na' nad' zoalen' le'.
²¹ Nottez ben' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

²² Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi len ben' yell-lioki, ben'ka' bi chonlilall'gake' li'?

²³ Na' billii Jesúza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalennto'ne'.
²⁴ Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljallzaan, san Xa'na', beena' bsel' nad', chzajniile'n nad'.

²⁵ Yog' diiki choe'len' le' dill' naa shlak ni zoalen' le'.
²⁶ Na' kat' bich soa' len le', Espiritu Sántona', beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

²⁷ Yel' mbalaza' chkwaanlana'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble.
²⁸ Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiyaa gana' zoa Xa'na', la' zak'che' aga ka nad'.
²⁹ Na' ba nia' le' diiki zi' gak kwenche kat' gakan shajle'le.

³⁰ Na' bich bitek dill' we'lench' le' naa, la' ba za' dii xiwaa, daa chnabia' yell-lioni. Per aga wak inabia'n nad'.
³¹ La' chon' kon ka nllia' Xa'na' bia' gon' kwenche inezi ben' yell-lioki chakid' Xa'na'. Li yizolla'. Li yidó.

15

Jesúza' chzaklebi kwine' to yag uva

¹ Nad' nak' ka yag uva daa nak dowalj, na' Xa'na' nake' ka beena' chaz chaanan.
² Na' yog'lol' xoz' xka'inna' daa bi chbia, chchogue'n. Na' diika'

chbia, chonshao'che'n kwenche zizikli kwian. ³ Na' le', nakle ka xoz' xka'inna' daa chbia, daa bzenagle ka nak dill'ka' be'len' le'. ⁴ Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵ 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gagle ka xoz' xka'inna' daa chbiachga. Shi le' bi nakle nad' txen aga bi gak gonle. ⁶ Beena' bi gone' ka dii le gone' nad' txen, nake' ka xoz' xka'inna' daa ba bchogue' na' ibillan, na' yitope'n wzaleen lo yi'na' kwenche sheyan.

⁷ 'Shi le' soatezi soale gonle nad' txen na' toshiizi chzoale xtilaana', li inab daa cheenile na' gakan. ⁸ Xa'na' cho'e balaan kat' chonle dii wenna', na' daa chonle ka', chli'lawin dii li nakle nad' txen. ⁹ Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'. ¹⁰ Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia' Xa'na' bia' gon', na' ka' chakbe'id' le chakile' nad'.

¹¹ 'Ba wnia' le' ka' kwenche yiba yizaklenile' nad', na' yiyoll yido soale mbalaz. ¹² Na' dgan nllia' bia' gonle: Gaki ljwell-le ka chakid' le'. ¹³ Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'. ¹⁴ Len' nakle ben'ka' nllaguid' shi chonle ka nllia' bia' gonle. ¹⁵ Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'. ¹⁶ Aga len' wlejle nad', san nadaan wlej' le' na' ba bzoa' le' shajle ljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen. ¹⁷ Na' dgan chllia' bia' gonle: Gaki ljwell-le ganga.

Ben'ka' bi nombia' Chioza' gatzbangakile' ben'ka' nak Críston'a' txen

¹⁸ 'Bibi gakile shi ben'ka' bi nombia' Chioza' gatzbangakile' le', la' nezkiye ka'kzan gokzbangakile' nad'. ¹⁹ Shel' nakle legake' txen na'ch gatzgakile' le', shel'ka'. Per daa ba wlej' le' kwenche gagle nad' txen, daan chatzbangakile' le'. ²⁰ Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtilaana', lekzka' wzenaggake' chele. ²¹ Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

²² 'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. ²³ Beena' chatzbanile' nad' lenkz Xa'nan' chatzbanile'. ²⁴ Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile' diika' chon', bia'kza chatzbangakile' nad' na' Xa'na'. ²⁵ Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

²⁶ 'Na' wselaa Espiritu che Xa' Chioza', beena' gaklene' le'. Espirituna', beena' chli' daa nak dii li, see gana' zoa Xa' Chioza' na' yidyee xtilaa. ²⁷ Na' lekzka' lenle we'le cho'a xtilaana', la' ba gokle nad' txen ka wzoloo' chli' chsedid' ben'.

16

1 'Ba wnia' le' diiki kwenche bi yidinjile' daa chonlilall'le nad'. 2 La' bich wlebgabe' le' gana' chdop chllagcho choe'lwilcho Chioza', na' wllin lla axt wit ben' le' daa gakile' kan' chazlall' Chioza'. 3 Gongake' ka' daa bi nombia'gabe' Xa'na', ni bi nombia'gabe' nad'. 4 Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espiritu Sántona'

5 'Na' naa yiyaa lljazoalen' Xa'na' beena' bsel' nad', na' ni stole bich chnabile nad' gan yiyaa. 6 Na' daa ba wnia' le' ka' le chakyesh'zi'le'. 7 Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba ziyaa, na' wselaaane'. 8 Na' kat' yide', gone' kwenche gakbe'i ben' yell-lioki nakgabe' ben' saaxya daa bi biyombia'gabe' beena' nak dowalj ben' li ben' shao', na' gakbe'gakile' chidol'gabe' wchoglo Chioza' chegake' ni che xtoleeka'. 9 Yiyakbe'gakile' napgabe' dol' daa bi chonlilall'gabe' nad'. 10 Na' yiyakbe'gakile' nak' ben' li ben' shao' daa yiyaa gana' zoa Xa'na' na' aga wle'chile nad'. 11 Na' lekzka' yiyakbe'gakile' Chioza' wi'e yel' zak'zi' che ben'ka' bi chzenag cha', la' ba bchogloe' sak'zi' dii xiwaa daa chnabia' yell-lioni.

12 'Dii zanch de dii inia' le', dii bi shajniile naa. 13 Per kat' ila' Espiritu Sántona', beena' chli' daa nak dii li, len' wzajniile' le' kwasloj daa nak dii li. La' aga dii chiljall'ze'n ine', san ine' daa che' Xa'na'ne', na' chixje'ile' le' diika' zi' za' gak. 14 Na' gone' ka sho'a balaan, la' wzajniile' le' diika' ba wnia'. 15 La' yog'lolte daa na Xa'na' lennan' cho'a dill'. Daan nia', Espirituna' wzajniile' le' diika' ba wnia'.

Yel' chakyeshiina' yiyakan yel' xaba

16 'Aga chllach bich ile'ile nad', na' lekzka' aga wlla yizle'ile nad'.

17 Na' bal' ben'ka' nakgabe'ne' txen wñabi ljwelle':

—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? 18 ¿Bi zejin daa naze' "aga chllach"? Bi chajniicho bi che naze' ka'.

19 Na' Jesús'a' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achñabi ljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'? 20 Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii chelena' yiyakan yel' xaba. 21 Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' che' yell-lioni. 22 Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

23 'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'. 24 Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucrístona' ba bene' gan daa chnabia' yell-lioni

25 'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen. 26 Na' kat' ba bllin llana', kanan' inabile Xa'na' bittezə dii inabilene' daa nonlilall'le nad',

na' bi chonan byen kwin' inabidee gaklene' le', ²⁷ la' kwinkz Xa'na' chakile' le' daa chakile nad' na' daa chajle'le bselee nad'. ²⁸ Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

²⁹ Na'ch che' ben'ka' nakgake'ne' txen:

—Naach ba choo dill' dii najni, na' bich bi jempl chchino'. ³⁰ Na' chakbe'into' nez nle'ilo' yog'lolte, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li' zoo gana' zoa Chioza'.

³¹ Na' che' Jesúza' legake':

—¿Anaach chajle'le? ³² Ba zoa illin lla, wa ba bllinkz llana', illeshlesle na' gala ikaa twej twejle, na' yikwaanle toz'. Per aga tozan' yigaana', la' zoalenkz Xa'na' nad'. ³³ Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li' gondiplall', la' ba ben' gan daa chnabia' yell-lioni.

17

Be'llwill Jesúza' Chioza' che ben'ka' nakgake'ne' txen

¹ Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloo nad' balaan, nad' nak' xiino', kwenche lekzka' nad' kwaa li' balaan. ² La' ba beno' lo na' inabia' lao yog'lol ben', kwenche gon' ka gat' yel' mban zejli kani che ben'ka' wlejo' gonlilall'gake' nad'. ³ Na' daa gat' yel' mban zejli kani che ben', zevin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

⁴ Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'. ⁵ Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdapgz' kana' wzoalen' li' ka zi' xe sil yell-lioni.

⁶ Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. ⁷ Na' naa ba nezgakile' yog' dill'ka' bi'a nakan dii wno'. ⁸ La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li' wzaa gana' zo' na' ba wyajle'gake' lin' bseloo nad'.

⁹ Chnabid' li' gakleno' legake'. Aga chnab' gakleno' yog' ben' yell-lioki, san chnab' gakleno' ben'ka' wlejo' kwenche gonlilall'gake' nad', la' lall' non' nakgake'. ¹⁰ Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

¹¹ Na' naa ba chiza' yell-lioni. Na' legake' yigaangake' ni. Xa, li' nako' dowalj ben' wen ben' shao'. Wdapgach ben'ka' ba beno' nonlilall'gake' nad' kon yel' wak cho'na' kwenche gaggake' toz, ka nakcho cho' nakcho toz. ¹² Shlak wzoalen' legake' yell-lioni ba wdap bwia' legake' kon yel' wak cho'na'. Na' ni toe' bi williayi', letechokzə beena' ba nakan kwiaeye, kwenche gak ka na Cho'a Xtilloona'.

¹³ Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'. ¹⁴ Nad' ba bzajniid' legake' cho'a xtilloona', na' ben'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'. ¹⁵ Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'. ¹⁶ Bi nongake' txen ben'ka' bi nombia' li', ka chon' nad' bi chon'

ben'ka' txen. ¹⁷ Bengach kwenche ben'ki nonlilall' nad' gachgake' ka chazlalloo daa chzenaggake' dill' li cho'na', la' cho'a xtilloona' nakan dii li. ¹⁸ Ka beno' bseloo nad' kwenche bidsoa' yell-lioni, ka'kzan chselaa legake' kwenche shajgake' ladj ben' yell-lioki. ¹⁹ Chzanlallaa kwin' gon' ka no' ni chegake', kwenche lekzka' gongake' ka no' daa ba chzenaggake' dill' li cho'na'.

²⁰ Aga chnabid' li' gakeno' to lezgake', san lekzka' chnab' gakeno' ben'ka' gonlilall' nad' kat' wzenaggake' cho'a xtilloona' daa we' ben'ki. ²¹ Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gachgake' cho' toz kwenche ben'ka' bi nonlilall' li' shajle'gake' lin' bseloo nad'. ²² Ba wlo'a legake' balaan ka daa wloo nad', kwenche gachgake' toz ka nakcho cho' nakcho toz. ²³ Nad' nakgakee toz ka nakcho cho' nakcho toz. Bengach ka gachgake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴ Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan cha'na' daa beno' nad' ka zi' xe silte yell-lioni daa chakilo' nad'. ²⁵ Xa, li' nako' ben' li' ben' shao'. La'kzi ben'ka' bi nonlilall' nad' bi nombia'gake' li', nad' nombi'a li' na' ben'ki nonlilall' nad' nezgakile' lin' bseloo nad'. ²⁶ Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gachgakile' ben', na' nad' soalenkzgagee.

18

Bex'gake' Jesúza'

(Mt. 26:47-56; Mr. 14:43-50; Lc. 22:47-53)

¹ Na' ka biyoll wna Jesúza' ka, wza'lene' ben'ka' nakgake'ne' txen wyajgake' shlaa yao Cedróna', na' wyoolene' legake' to yell-lio ga lle' lla' yag olivo. ² Na' Juda', beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'. ³ Na' bllinlen Juda' ben' zan soldad na' zi' xonj ben'ka' chap yoodo'na', ben'ka' bsel' bxoza' chnabia' len fariseoka'. Zejgake' nox'gake' no kandil, no yi' yech, na' dii wniagakile'. ⁴ Na' Jesúza' ba nezgzile' yog' daa zi' gak che', na'ch bcheje' jatile' legake', na' chi'e:

—¿Non chiyilje?

⁵ Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'. ⁶ Na' ka goll Jesúza': “Nadaan”, to biza'zgake' jayetgake' wza'che'la. ⁷ Na'ch wiznabi Jesúza' legake':

—¿Noran chiyilje?

Na' che'gake'ne':

—Jesús, ben' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyilje, li we' latj yiyaj ben'ki.

⁹ Golle' legake' ka' kwenche billinin daa wne': “Xa, ba wdap' ben'ka' beno' nad' na' ni toe' bi wliayi'.” ¹⁰ Na' Simón Pédróna' no'e to spad, na'ch

wleje'n b̄hogue' t̄laa nag to beñ' le Malco, de sh̄lina'. Na' Málcona' nake' xmos b̄xoz choo b̄xoz xenna'. ¹¹ Na'ch che' Jesúza' Pédrona':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

¹² Na'ch soldadka' len x̄ane'ka', na' beñ'ka' chap yoodo' che beñ' Israelka', beñ'gake' Jesúza' na' b̄chejgake'ne'. ¹³ Na' zigaate jwa'gake'ne' lao Anáza' xtobiñ che Caifáza', na' Caifáza' nake' b̄xoz choo b̄xoz xen lo yiza'. ¹⁴ Na' Caifáza', len' beena' golle' beñ'ka' ch̄nabia' beñ' Israelka' wenchlan witgake' toz Jesúza' aga ka daa kwiayi' yog' beñ' wlall che'ka'.

Bi b̄cheb Pédrona' shi nombi'e Jesúza'

(Mt 26:69-70; Mr. 14:66-68; Lc 22:55-57)

¹⁵ Na' Simón Pédrona' len sto beñ' nake' Jesúza' txen janogake'ne'. Na' beena' zejlen Pédrona' txen nombia' b̄xoz choo b̄xoz xenna'ne', daan gok wyoolene' Jesúza' lesh' chyoo che b̄xoz choo b̄xoz xenna'. ¹⁶ Na' Pédrona' wzie' cho'a leeja'. Na'ch beena' nombia' b̄xoz choo b̄xoz xenna', bicheje' jashaljlene' bi' nool wewaa chap cho'a leeja' kwenche be'b' latj wyoo Pédrona'. ¹⁷ Na'ch bi' nool wewaa chap cho'a leeja' che'b' Pédrona':

—¿Aaga lenon' nako' beeni txen?

Na' che' Pédrona'b':

—Bi len' nakee txen.

¹⁸ Na' moska' len beñ'ka' chap yoodo'na' wlekgake' yi'na' kwenche wbillgake' daa ba chak zag. Na' jselen Pédrona' legake' cho'a yi'na' kwenche billa'ile'.

Wnabyolli Anáza' Jesúza'

(Mt 26:59-66; Mr. 14:55-64; Lc 22:66-71)

¹⁹ Na' beena' nak b̄xoz choo b̄xoz xen wnabyollile' Jesúza' no beñ'ka' nakgake'ne' txen na' beran chli' chsedile'. ²⁰ Na' che' Jesúza'ne':

—Ladj lkwe' beñaan ba bi'a dill'. Ba bli' b̄sedid' beñ' lesh' chyoodo'na' na' gachl̄a chdop chllag beñ' wlallka' choe'l̄willgake' Chioza'. Na' bibi dill' bi'a do ngash'za. ²¹ ¿Berache ch̄nabzilo' nad'? Wnabi beñ'ka' ba bli' b̄sedid' kwenche inagake' li' beran ba goshgakee. La' ñezgakile' bin ba bli' b̄sedid' legake'.

²² Na' ka wde wna Jesúza' ka', to beñ'ka' chap yoodo'na' wdape' xagueena', chi'ene':

—¿Bi che chilliizo' b̄xoz choo b̄xoz xenni dill'?

²³ Na' che' Jesúza'ne':

—Shi bi dii mal ba wnia', wnashki beran ba wnia'. Na' shi sh̄likzan ba wnia', ¿berache chitzo' nad'?

²⁴ Na'ch de nchejzi Jesúza' bde Anáza'ne' lao Caifáza', beena' nak b̄xoz choo b̄xoz xen.

Sto shii bi b̄cheb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

²⁵ Na' shlak ze Pédrona' chshee cho'a yi'na', beñ'ka' lle' na' che'gake'ne':

—¿Aaga lenon' nako' beeni txen?

Na' bi b̄chebe', san chi'e:

—Bi nakee txen.

²⁶ Na' to xmos b̄xoz choo b̄xoz xenna', beena' nak bish' ljwell beena' b̄hog Pédrona' nague'na', chi'ene':

—¿Aga lenon' ble'lenid' Jesúza' gana' lle' yag olívoka'?

²⁷ Na' stokzə bi b̄heb Pédrona', na' lii wchellte shikwteza'.

Bdegake' Jesúza' lao Pilátona'

(Mt. 27:1-2, 11-14; Mr. 15:1-5; Lc. 23:1-5)

²⁸ Na' cheeni'lesdo' bichejgake' lill Caifáza' na' biche'gake' Jesúza' gana' chon Pilátona' yel' joschisa'. Na' ben' Israelka' aga wyoolengake' Jesúza' gana' chon Pilátona' yel' joschisa', la' aga wak gaogake' daa chsini'agake' che Paskwa' shi ba wyoogake' loo yooná'. ²⁹ Na'ch bchej Pilátona' chí'e legake':

—¿Bi xyan chaole che beeni?

³⁰ Na' che'gake'ne':

—Shel' bibi dii mal chone' aga widwa'nto'ne' lawo' ni, shel'ka'.

³¹ Na'ch che' Pilátona' legake':

—Li yichi'e na' li gon yel' joschis che' kon ka na ley chelena'.

Na' ben'ka' chn̄abia' ben' Israelka' che'gake'ne':

—Aga bi lsens chento' de witnto' ben'.

³² Na' daa gok ka', billinin ka wna Jesúza' gak kat'ka' guete'. ³³ Na'ch biyoo Pilátona' gana' chone' yel' joschisa', na' goxe' Jesúza' chí'ene':

—¿Alin' nako' ben' w̄n̄abia' che ben' Israelki?

³⁴ Na' che' Jesúza'ne':

—¿Adii chza'z lalloon no' ka'? ¿Awa ben' yoblan ba be'lene' li' xtilaana'?

³⁵ Na'ch che' Pilátona'ne':

—¿Achakilo' ben' Israel nad'? Ben' wlall cho'kikzan na' bxozka' chn̄abia' le', ba bengake' li' lo na'. ¿Beran beno'?

³⁶ Na'ch che' Jesúza'ne':

—Aga nak yel' w̄n̄abia' cha'na' ka che ben' yell-lioki. Shel' nakan ka', ben'ka' nak nad' txen wllongake' nad' kwenche bi gox' ben' wlall cha'ki nad', shel'ka'. Per aga nak yel' w̄n̄abia' cha'na' de yell-lioz.

³⁷ Na'ch che' Pilátona'ne':

—¿Ana' ben' w̄n̄abia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lōl ben'ka' chzenaggake' dill' lina', chzenaggake' cha'.

³⁸ Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' ben' w̄n̄abia' che ben' Israelka', na' chí'e legake':

—Ni to dii mal bi chillelid' chon beeni. ³⁹ Na' kon ka yoolole chak yog' yiz chsan' to ben' de lillyana' kat' cha' l̄ni Paskwi, ¿abi cheenile yisan' ben' w̄n̄abia' cheleni, le' nakle ben' Israel?

⁴⁰ Na'ch yog'gake' besyaagake' zillj, che'gake'ne':

—¡Aga beenan' yisano'! ¡Barrabázan' bisan'!

Na' Barrabáza' nake' to ben' wban.

19

¹ Na' ka' gok ben Pilátona' mandad bet wdingake' Jesúza'. ² Na' soldadka' bengake' to bxoon de xis yesh' na' bllingake'n yichje'na' ka corona na'

bwakwgake'ne' to lech' de morad. ³ Na'ch wbig'gake' lawe'na' chtitjgak-ile'ne', chongake' ka beṇ' chgoo le' balaan, che'gake':

—¡Toshiizi sechgayi che beeni chṇabia' beṇ' Israelka'!

Na' wdapgake' xagueena'.

⁴ Na'ch bizchej Pilátona', chi'e beṇ' Israelka':

—Li wwia, ni kwejee kwenche inezile ni to dii mal bi chillelid' bene'.

⁵ Na' bchej Jesúza' mbinte bxoön de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

⁶ Na' bxožka' chṇabia' na' beṇ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¡Bdee lee yag cruza'! ¡Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

⁷ Na' beṇ' wṇabia' che beṇ' Israelka' che'gake'ne':

—De to ley chento' daa na chiya' guete' daa nalze' nake' Xiin Chios.

⁸ Na' ka gollgake' Pilátona' ka', zizikchli bllbe'. ⁹ Na'ch biyo'e sto shii gana' chone' yel' joschisa' na' chi'e Jesúza':

—¿Gara beṇ' li'?

Na' Jesúza' bikzə bi dill' billi'e.

¹⁰ Na'ch che' Pilátona'ne':

—¿Berache ki chilli'o xtillii? ¿Abi nezilo' nap' yel' wṇabia' kwenche wdaa li' lee yag cruza' na' naptia' yel' wṇabia' kwenche yisan' li'?

¹¹ Na'ch che' Jesúza'ne':

—Aga bi yel' wṇabia' napo' bi gonilo' nad' shej' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

¹² Na'ch ka beni Pilátona' wne' ka', biyiljallee naklə ka gone' kwenche yisane' Jesúza', per beṇ'ka' chṇabia' beṇ' Israelka' axt chosyaayigake', che'gake'ne':

—Shi yisano'ne' bi nako' txen César'a, la' nottez beena' ina nake' beṇ' wṇabia', César'an chizoshi'e.

¹³ Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yel' joschisa', gana' le Gábata de dill' hebreo, na' zejín latj ga ntaogake' yaj. ¹⁴ Na' gok dga llana' chsini'agake' che Ini Paskwa'. Na' ka do gobill goll Pilátona' beṇ' Israelka':

—Ni ze beṇ' wṇabia' cheleni.

¹⁵ Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beṇ' wṇabia' cheleni lee yag cruza'?

Na' bxožka' chṇabia' che'gake'ne':

—Toz César'an chṇabi'e neto'. Koch no beṇ' yoblə zoa.

¹⁶ Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

¹⁷ Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejín Latj che llit yichj beṇ' wet. ¹⁸ Na' na' bda'gake' Jesúza' lee yag cruza', na' lekzka' bda'gake' zi twej beṇ' shlaa wej.

19 Na' Pilátóna' bzeje' to dii bda'gake' yichj yag cruz che Jesúza', na' nan ki: “Jesús, ben' Nazaret, ben' wñabia' che ben' Israelka'.” 20 Na' bzeje'n dill' hebreo, dill' latin na' dill' griego. Na' zan ben' Israelka' blabgake' daa da' yichj yag cruzá, la' gana' bda'gake' Jesúza' lee yag cruzá' chgaañan gaozə yell Jerusalénna'. 21 Daan bñozka' chñabia' ben' Israelka' gollgake' Pilátóna':

—Bi chiyal' inan “Ben' wñabia' che ben' Israelka'”; san inan “Beenin nalze' nake' ben' wñabia' che ben' Israelka'.”

22 Na' Pilátóna' chi'e legake':

—Kon ka ba bzeja'n, ka'kzan igaañan.

23 Na' biyoll bda' soldadka' Jesúza' lee yag cruzá, na'ch bex'gake' xe'na' na' bengake'n taplə kwenche bikaa twej chegake'. Na' lekzka' bex'gake' xe' dii toná' daa nak to shwiłizə. 24 Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Bilaagake' xa'na', na' bengake' to wyitj kwenche got'bia' nogake' wkaan.”

25 Na' kwit yag cruz che Jesúza' ze xñeena' len ben' bile'na', na' len María, xool Cleófaza', na' María ben' yell Magdálana'. 26 Na' ka ble'i Jesúza' xñeena', na' lekzka' ble'ile' gaozə ze to beena' nake'ne' txen, beena' le chakile', na'ch chi'e xñeena':

—Beenin yiyoni xiño' ñaa.

27 Na'ch chi'e beena' nake'ne' txen:

—Beenin yiyoni xñoo ñaa.

Na' lo llana' bichi'e xña' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

28 Na' ka wde, ñezi Jesúza' ba gok yog' daa llia bia' gakə, na' kwenche yillinin ka na Cho'a Xtill' Chioza', wne':

—Chbilid'.

29 Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis* kwenche bzoagake'n cho'ena'. 30 Na' wde weej Jesúza' daa nak zichj zla', na'ch wne':

—Ba gok yog' daa llia bia' gak ñaa.

Na' bchek' yichje'na', na' wite'.

To soldad willibe' to ya dii nla' lawinna' kwit lee Jesúza'

31 Na' ben'ka' chñabia' ben' Israelka' bi goongakile' yigaan kwerp che ben'ka' lee yag cruzka' llana' chombaangake'. Daan gollgake' Pilátóna' gone' mandad lltishjgake' ñi'a ben'ka' da' lee yag cruzá' kwenche yob guetgake' na' yiletjgake' kwerp che'ka' lee yag cruzka'. 32 Na'ch bselee soldad che'ka', na' jtishjgake' chop laate ñi'a ben' necha' da' kwit Jesúza', na' lekzka' bengake' che beena' sto da' zi shłaa kwite'na'. 33 Na' ka jabig'gake' gana' da' Jesúza' ble'gakile' ba wite', na' bi wdishjgake' ñi'ena'.

34 Na' to soldada' willibe' to ya lo tosh' kwit li'ena' na' lii bchejten chen len nis. 35 Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e. 36 Gok diiki kwenche billinin ka na Cho'a Xtill' Chioza' gana' na: “Ni to litka' yo'e bi

* 19:29 To lo xis: literalmente en una rama de hisopo.

chishjgake'." 37 Na' gan yoblə lee Cho'a Xtill' Chioza' chiznan: "Wwiagake' beena' wllibgake' yana'."

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

38 Na' ka wde gok diiki, José ben' yell Arimatéana', wñabile' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zə daa bllebe' ben'ka' chñabia' ben' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'. 39 Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chl'a' zix daa nongake' de mirra na' nchixan daa le áloe. 40 Na'ch btobgake' kwerp che Jesúza' to lech' ton na' blla'gake'n daa chl'a' zix, kon ka chon ben' Israelka' kat' chkwash'gake' to ben' wet. 41 Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii bin' koogake' ni tlis'h' ben' wet. 42 Na' daa chakbyengakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

20

Biban Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

1 Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. 2 Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le gokile', jayelle' legake':

—Ba jalejgake' Xanchóna' loo bana' na' bi nezingto' galə jaloogake'ne'.

3 Na'ch wza' Pédróna' len beena' sto zejgake' cho'a bana'. 4 Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'. 5 Na' bchekee bwie' loo bana' na' ble'ile' lech'ka' chi' na', per bi wyo'e. 6 Na' ka bllin Simón Pédróna' na' wyo'e loo bana' na' lekzka' ble'ile' lech'ka' chi' na'. 7 Na' lecha' bdob yichje'na' aga lenan chi' kwit lech'ka', san ndoban chi'n ka'lə. 8 Na'ch lekzka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'. 9 La' kana' aga ba wyajni'yen'gakile' Cho'a Xtill' Chioza' gana' cho'en dill' yiban Jesúza' ladj ben' wetka'. 10 Na'ch ben'ka' chop non Jesúza' txen biyajgake' gana' zoagake'.

Jali'lao Jesúza' María, ben' yell Magdálana'

(Mr. 16:9-11)

11 Na' Mariana' bigaane' cho'a bana' chbelle'. Na' lo zej chbelle' bchekee kwenche bwie' loo bana'. 12 Na' ble'ile' chop anjl zoagake' do xtill, chi'gake' loo bana', toe' chi' yichjinna' na' stoe' chi' xñ'alin gana' got' kwerp che Jesúza'. 13 Na'ch che'gake' Mariana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi nejid' galə jaloogake'ne'.

14 Shingt wne' ka', ka bllii jalawe'na' na' ble'ile' ze Jesúza' kolleena', per bi biyombi'e shi Jesúzan'. 15 Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Mariana' chakile' beena' chap yag zixkan', na' chi'ene':

—Ben'do', shi ba bibejo'ne', wngach nad' galə jadixjo'ne' kwenche yichi'ane'.

¹⁶ Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejín: ben' chli' chsedi ben'.

¹⁷ Na' che' Jesúza'ne':

—Bi goxoo nad', la' biñ' yiyep' kwit Xa'na'. Lete biyaj, jane ben'ka' nak nad' txen jayellgake' ba ziyaa kwit Xa'na', beena' lekzka' nak Xale. Lljazoalen' Chios cha'na', beena' lekzka' nak Chios chele.

¹⁸ Na'ch biza' María, ben' yell Magdálana', jayelle' ben'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

Jali'lao Jesúza' ben'ka' nakgake'ne' txen

(Mt 28:16-20; Mr. 16:14-18; Lc 24:36-49)

¹⁹ Na' ka goł lo llana' bibane', lla nech che xmanña', ba ndop nllag ben'ka' nak Jesúza' txen na' nsejtegake' yoona' daa chllebgake' ben'ka' chñabia' ben' Israelka', ka gokbe'gakile' ba ze Jesúza' ladje'ka', na' chi'e legake':

—Soashgale mbalaz.

²⁰ Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben'ka' nakgake'ne' txen le bibagakile' ble'gakile'ne'.

²¹ Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' lje'le cho'a xtilaana' yell-lioni.

²² Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'. ²³ Na' ben'ka' yizi'xenle saaxya che'ka', wiyakxenan. Na' ben'ka' bi yizi'xenle cheyin, bi yiyakxen chegake'.

Tomáza' bi wyajli'e shi biban Jesúza' ladj ben' wetka'

²⁴ Tomáza', beena' che'gake' Dídimo nake' txen ben'ka' shllin, na' bi lene' ka jali'lao Jesúza' legake'. ²⁵ Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

²⁶ Na' ka wde xon' lla, dii yoblə bidop ben'ka' nongake' Jesúza' txen loo yoona' na' len Tomáza'. Na' la'kzi nsejtegake' yoona', wyoo Jesúza' jsie' ladje'ka'. Na' chi'e legake':

—Soashgale mbalaz.

²⁷ Na'ch chi'e Tomáza':

—Bwia na'ni, na' bñe'n xbeno'na'; na' bñe' noona' kwit li'ani. Bi gакчoplalloo, san wyajle'.

²⁸ Na'ch che' Tomáza'ne':

—¡Lin' nako' Xan' na' naktio' Chios cha'!

²⁹ Na' che' Jesúza'ne':

—Galj ble'ilo' nad' na'ch chajli'o. Chakomba ben'ka' chajle'gake' la'kzi biñ' ile'gakile' nad'.

Bzej Juanna' libri kwenche shajle' ben' Jesúza' nake' Xiin Chios

³⁰ Zan yel' wak daa ben Jesúza' lao ben'ka' nakgake'ne' txen bi nyojgakan lee libri. ³¹ Per diiki nyojgakan kwenche shajle'le Jesúza' nake' Xiin

Chioza' na' len' Crístona', beena' wleje' inabi'e, na' daa gonlilall'lene' gat' yel' mban chele dii bi te cheyin.

21

Jali'lao Jesúza' ben'ka' nakgake'ne' txen

¹ Ka wde, Jesúza' jali'lawe' sto shii ben'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok: ² Simón Pédróna' len Tomáza', beena' nsi'gake' Dídimó, na' Natanaela', ben' yell Canána' daa lia gana' mbani Galileana', na' chopte xiin Zebedewa' na' zi chop ben'ka' nongake' Jesúza' txen lle'gake' Galileana'. ³ Na' Simón Pédróna' chi'e legake':

—Sha'ch' lljxen' bel'a.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen bel'a, na' ni tlish' kono wxengake' do yel. ⁴ Na' cheeni'lesdo' bllin Jesúza' cho'a nisdona', na' ben'ka' nakgake'ne' txen aga chakbe'gakile' shi len'. ⁵ Na'ch Jesúza' wnie' legake', chi'e:

—Le' ben' bish'dawaa, ¿abin' senle bel'a gaocho?

Na' che'gake'ne':

—Aga no de.

⁶ Na'ch che' Jesúza' legake':

—Li wza' yixj chelena' shlaa de shli che barkwa' na' idol'gakk.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan belka'. ⁷ Na' beena' le chaki Jesúza'ne', golle' Pédróna':

—iXanchoan'!

Na' kon ka beni Pédróna' golle'ne' ka', lii biyakwte xe'na', na' bxitee loo nisa'. ⁸ Na' ben'ka' sto biyajlengake' barkwa' cho'a nisdona'la, zingoyon yixja' daa zinyichachga belka', la' aga nakchan zit', ka sto guiyoa metrzan. ⁹ Na' ka bichejgake' loo barkwa', ble'gakile' ba chi' yi'na' xna' na' xoa to bel lawinna', na' dete yetxtil. ¹⁰ Na' che' Jesúza' legake':

—Li yiyox'to belka' zi' wxenle.

¹¹ Na'ch wyoo Simón Pédróna' loo barkwa' kwenche jaselle' yixj bel'a na' bigoyoe'n ax't cho'a nisdona'. Na' la'kzi tolla'cha nak yixja' daa ziyoon to guiyoa shiiniyon bel yelka', bi bcheza'n. ¹² Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxjgakile' ye'gake'ne': “¿Nora li'?” La' gokbe'gakile' Xancho Jesúza'kzan'. ¹³ Na'ch wbig' Jesúza' na' bexee yetxtila' len bel'a na' bi'e che chegake'.

¹⁴ Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljlen Jesúza' Simón Pédróna'

¹⁵ Na' ka bidaogake' xsila', na'ch che' Jesúza' Simón Pédróna':

—Simón, xiin Jonás, ¿achakchilo' nad' aga ka to chaki ben'ki nad'?

Na' Pédróna' chi'ene':

—Xan', nezczilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

16 Na' de wchop shii wiznabile'ne', chi'ene':

—Simón, xiin Jonás, ¿achakilo' nad'?

Na' Pédrona' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beñ'ka' chonlilall'gake' nad', beñ'ka' nak ka xil' cha'.

17 Na' de wyon shii wiznabile'ne', chi'ene':

—Simón, xiin Jonás, ¿ana' chakilo' nad'?

Na' gokyeshii Pédrona' daa ba gok shon shii chñab Jesúza' shi chakile'ne', na' chi'ene':

—Xan', nez nle'ilo' yog'lołte, na' nezkzilo' chakid' li'.

Na'ch che' Jesúza'ne':

—Na'len wdap bwia beñ'ka' chonlilall'gake' nad', beñ'ka' nak ka xil'do' cha'. 18 Dii li nia' li', ka goko' beñ' wew', gowk xalaano' to kwanzo' na' wyajo' kon ga wnan cho'. Per kat' ba goxoo, wli nooka' na' yiwakw beñ' yoblə xalaano'na', na' wchi'e li' ga bi cheenilo' shajo'.

19 Na' daa goll Jesúza'ne' ka', bzajniile' legake' ka guet Pédrona', na' daa guete' ka' sho' Chioza' balaan. Na' ka wde golle' Pédrona' ka', chi'ene':

—Btiplaloo beñlilall' nad' toshiizi.

Beena' le chaki Jesúza'ne'

20 Na' biyechj Pédrona' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wnable'ne', chi'ene': “Xan', ¿norakznton' gon li' lo na' beñ' malka'?” 21 Na' ka ble'i Pédrona'ne', na'ch chi'e Jesúza':

—Xan', ¿shera beeni?

22 Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wneyi. Lin' btiplaloo beñlilall' nad' toshiizi.

23 Na' daa golle' ka', wze dill' ladj beñ'ka' chonlilall' Jesúza' nan aga wet beena'. Per bi goll Jesúza' Pédrona' bi guet beena', san chi'ene': “Shi cheenid', ni mbankze' kat' yiyed'. Bi sio' beena' wneyi.”

24 Na' beena' nake' Jesúza' txen, beena' le chakile', cho'e dill' kon ka goka' na' bzeje'n lee libri. Na' nezinto' dillaa cho'e nakan dii li'.

25 Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.

Diika' ben postlka'

Bcheb Jesúza' wselee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsdile' dezd ka wzoloe' ² axt ka bllin lla biyep'e yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' linna' daa bene' lall' na'gake'. ³ Na' ka wde wite' na' bibane' ladj ben' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

⁴ Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵ Dii li Juanna' bchoe' ben' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' ben'ka' ndop nllag kwit Jesúza', wñabgakile'ne':

—Xan', ¿awibejo' cho' ben' Israel lo ñi'a na' ben' zit'ka' ñaa kwenche inabi'o neto'?

⁷ Na' Jesúza' golle' legake':

—Bi chidol'le inezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n. ⁸ Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtilaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaañ yell-lioni.

⁹ Na' ka biyoll golle' ka', wzolo biyep'e yabana' chwiate ben'ka', na' wze to bej bkwashaan le' na' bich ble'gakile'ne'. ¹⁰ Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹ Na' gollgake':

—Le' ben' Galilea, ¿berache chwiazle yabana'? Kwin Jesúza', beena' ble'ile bichej ladjleni na' biyep'e yabana', kakzan ile'ilene' yiyede'.

Wlejgake' Matíaza' bizoe' lo laz Juda'

¹² Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'.

¹³ Na' ka billingake' Jerusalénna', biyepgake' yoona' lla shkwiana' cha'lə gana' zoagake'. Na' ben'kin billin: Pédrona', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas ben' bish' Jacóbona'.* ¹⁴ Yog' ben'ki chdopgake' yog' lla kon ben'ka' nak ben' bish' Jesúza' kwenche choe'lwillgake' Chioza', na' len Maríana' xña Jesúza' na' zi' bal' noolka'.

¹⁵ Na' llaka' wzoagake' na', Pédrona' wzie' ladj ben'ka' chonjilall'gake' Jesucrístona', nakgake' ka do to guiyoa galja, na' golle' legake':

¹⁶ —Le' ben' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e ben'ka' bex'gake' Jesúza'. ¹⁷ Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. ¹⁸ Na'

* **1:13** Ben' bish' Jacóbona': ben'ka' nsed nagake' chiyal' inan xiin Jacóbona'.

mecha' daa be_xee che dii mala' daa bene', lennan' biziile' to yell-lío gana' bxope' de gozyichjla' na' goshj li'ena' na' bchej yog' xjloe'na'. ¹⁹ Na' ka w_nezi ben' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lío Chen. ²⁰ La' lee libr che Sálmoka' nan:

Yidesh yiloashga lill xlatje'na',

na' ni sto kochno soan.

Na' lekzka' nan:

Ben' yoblə yiyakshga lo nee daa nan gok lo nee gone'.

²¹ Na' chonan byen kwejcho to ben'ki bengake' cho' txen toshiizi kana' wzoalen Xancho Jesúza' cho', ²² ben'ki nakgake' cho' txen dezd ka bchoa Juanna' Jesúza' nisa' ax̄t ka biyepé' yabana', kwenche gone' cho' txen we'cho dill' nakan gok biban Jesúza' ladj ben' wetka'.

²³ Na'ch wlejgake' chope': toe' le Matías, na' sto ben' yoo shonə leyin, José, Barsabás, na'ch Justo. ²⁴ Na' be'lwilgake' Chioza', che'gake':

—Chios, ben' nak Xannto', li' nombi'o yichjlall'do' yog' ben'. Bliyi neto' no ben'ki chop ba wlejo' ²⁵ kwenche gake' neto' txen naknto' postl, la' Juda' ba bnite' daa ndolee yel' wen dii mal che'na' na' ziyaje' latja' gana' chidolee.

²⁶ Na'ch bengake' to wyitj kwenche wnezgakile' noran ba wlej Chioza', na' bidol' Matiaza', na' wlene' postlka' shnej.

2

Ka bid Espíritu Sántona'

¹ Na' ka bllin lla gol' lni Pentecostéza', yog' ben'ka' chonlilall'gake' Jesúza' tozga ndop nllaggake'. ² Na' tokonganzi bengakile' to sshag ka ga za' to be' wal, za'n yabalə na' w_nin doxen loo yoona' gana' lle'gake'. ³ Na'ch ble'gakile' dii nak ka bel' yi' chal'ninan, na' yog'ze' zen yichje'ka'. ⁴ Na' Espíritu Santo che Chioza' wyo'e loo yichjlall'do' to toe', na' wzologake' wnegake' wde wdeli dill', kon ka goklall' Espíritu Sántona' ine to toe'.

⁵ Na' lo llana' ben' zan ben' Israelka' lle' Jerusalénna' choe'la'ogake' Chioza', no ben' zaak wde wdeli yell dii lle' yell-lioni. ⁶ Na' ka bengakile' sshaga' daa chak, na' bdop bllaggake' gana' chak ka'. Na' gokleij gokgangakile' ka biyombia'gake' xtilleeka' daa chne ben'ka' lle' na'. ⁷ Na' le chibangakile', na' che' ljwelle':

—¿Aaga ben' Galilea yog' ben'ki choe' dill'ki? ⁸ ¿Nakra chak chakzgake' dill'ka' chne to tocho, lla? ⁹ La' ni zoa ben' Partia, ben' Media, ben' Elam, ben' Mesopotamia, ben' Judea, ben' Capadocia, ben' Ponto, ben' Asia, ¹⁰ ben' Frigia na' Panfilia, ben' Egipto na' zi bale' ben' África, ben' zaak gaozə yell Cirénena', na' lekzka' len ben' za' Rómante. Balcho nakcho ben' Israel, na' zi balcho choncho ben' Israelki txen. ¹¹ Na' lekzka' zoa ben' Creta na' ben' Arabia. Na' yog'techo chenicho chne ben'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

¹² Na' yog' ben'ka' bdop bllag na', bibangakile' na' gokleij gokgangakile'. Na' che' ljwellgake':

—¿Bi zejín dga, lla?

¹³ Na' bale' wnelegakile' legake', nagake':

—Zolli ben'kin.

Daa goll Pédrona' ben'ka' bdop bllag

14 Na'ch Pédróna' wzechaile' len postlka' zi shnej, na' wñie' zillj chi'e ben'ka' ndop nllag na':

—Le' ben' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'. 15 Ben'ki nak' txen aga zollgakilen' ka chza'lall'zle, la' shzilgaz naa. 16 Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

17 Kat' ba zoa illin lla te che yell-lioni, nad' Chios wi'a Espíritu cha'na' soe' loo yichjlall'do' ben'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib', na' ben' golka' inegakile' yel.

18 Na' ka'kzə wi'a Espíritu cha'na' yog' ben'ka' choe'la'ogake' nad' llana' gak ka', ka ben' byo ka noolə,

na' we'gake' dill'ka' wxo'a cho'a lolleeka'.

19 Na' xan yabana' wli'a dii gonan ka yibani ben',

na' ka'kzə lo yell-lioni

wli'gakidee chen, na' yi', na' llen.

20 Wbilla' bich wzeeni'n,

na' bewaa yiyakan xna ka chen

ka zi' illin lla choo lla xen che Xanchona'.

21 Na' nottez ben' inabile' Xancho Chioza' gaklene'ne', na' yisle'ne' kwenche bi kwiayee.

22 'Na' le' nakle ben' Israel, li wzenag dga inia' le'. Nezkzile Chioza' wleje' Jesús, ben' Nazareta', daa bi'ene' yel' wñabia'na' kwenche bidylene' ladjleni dii zan yel' wak choo yel' wak xen na' bichlə dii benan ka bibani ben'. 23 Na' beeni goke' lall' na'le kon ka bllia Chioza' bia' gak che', na' béx'lene' bénlene' lo na' ben' malka' kwenche betgake'ne' lee yag cruza'.

24 Per Chioza' bisbane'ne' ladj ben' wetka', na' bi bi'e latj guete' toshiizi, daa bi gok inabia' yel' wita' le'. 25 Dii Davina' bi'e dill' che Jesús'a kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

26 Daan le chibayi lall'dawaani na' cho'a dill' ka mbalaz zoa'.

Na' beli chen cha'ni nonan lez yibanan,

27 la' aga wsanlalloo nad' toshiizi ladj ben' wetka',

ni bi wi'o latj gooll' iteb beli chen cha'ni daa nak' lall' no'.

28 Ba bliilo' nad' nakan nak neza' sho'a kwenche gat'ch yel' mban cha', na' yiba yizakid' daa soalen' li' toshiizi.

29 'Le' ben' bish', nezkzicho dii xozxto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'. 30 Na' dii Davina' bi'e dill' diika' goll Chioza' le', na' wnezile' kwin Chioza' bchebe' wzoe' to xiin dia' che' inabi'e. 31 Chioza' bliile' dii Davina' diika' zi' gak che Crístona', na' bi'e dill' yibane' ladj ben' wetka' ka wne' aga wigaane' ladj ben' wetka' na' ni bi gooll' iteb beli chen che'na'. 32 Na' ka' gok, Chioza' bisbane' Jesús'a ladj ben' wetka', na' yog'nto' ble'into'ne' na' choe'nto' dill' bibane'. 33 Na' ka biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bchebe'. Na'

Espíritu Sántona' ba bene' yog' dga ba ben ble'ile naa. ³⁴ Bi gakile dii Davinan' biyep'e yabana', la' kwine', wne':

Ḳancho Chioza' golle' Ḳan'na':

“Wche' kwit' de shli ni

³⁵shlak wzoa' xni'ona' beḅ'ka' chakzbani li.”

³⁶'Na' nia' le', yog'cho cho' beḅ' Israel chiyal' inezicho, Jesúza', beena' betle lee yag cruza', Chioza' bzoe'ne' nake' Ḳancho, na' len' Crístona', beena' wlej Chioza' inabi'e cho'.

³⁷Na' beḅ'ka' lle' na' ka bengakile' goll Pédrona' legake' ka', le nyesh'chga gogkakile', na' wḅabgakile' Pédrona' na' postlka' sto, che'gake':

—Le' beḅ' bish', ¿beran chiyal' gonnto' shka'?

³⁸Na'ch Pédrona' chi'e legake':

—To tole, li yiyaj yileni na' li choa nisa' shi ba chonlilall'le Jesucrístona', na' yiyakxen xtol'leka' na' yidsoa Espíritu Sántona' loo yichjllall'do'lena'.

³⁹Chioza' ba bchebe' gone' le Espíritu che'na', na' len xiinleka', na' nottez ben' zit'. La' nchebe' wi'ene' yog' beḅ' gaxe' kwenche gonlilall'gake'ne'.

⁴⁰Na' dii zanch dill' be'len Pédrona' legake', got'yoile' legake', chi'e:

—Li yisla kwinle lao yel' zi'na' daa ile'i beḅ' wen dii malka' bi chajle' che Chioza'.

⁴¹Na' beḅ'ka' wyajle' daa goll Pédrona' wchoagake' nisa'; na' lo llana' shoḅa mil beḅ'ka' wleḅgake' beḅ'ka' nonlilall' Jesúza'.

Ka ben beḅ'ka' benlilall' Jesucrístona' dii nech

⁴²Na' yog'gake' wzegake' wḅeyi bengake' diika' bli' bsemi postlka' legake', na' xochi wzoagake'. Na' bdop bllaggake' be'lwillgake' Chioza' na' weej wdaogake' txen. ⁴³Na' yog'ze' bibani daa ble'gakile' yel' wak zanka' ben postlka'. ⁴⁴Na' yog' beḅ'ka' chonlilall'gake' Jesúza' gogkake' toz, na' choe' ljwelle' bi ka dii chyallji to toe'. ⁴⁵Na' biyit' bidegake' no yell-lío, no yoo chegake' wa bichla dii napgake' na' choe' ljwellgake' ka to dii chyallji to toe'. ⁴⁶Na' yog' lla bdopgake' lesh' chyoodo'na' choe'lwillgake' Chioza', na' lekzka' bibagakile' weej wdaogake' txen lill ljwellgake'. ⁴⁷Na' wzoatezi wzoagake' be'la'ogake' Chioza' na' yog'za beḅ' gokbe'gakile' ka mba chongake'. Na' yog' lla, Ḳancho Chioza' bene' ka wyanch beḅ'ka' benlilall' Jesucrístona'.

3

Biyaki to beḅ' bi chak sa'

¹To lla do ka chida shoḅa shlle'na', ka gora' chdop chllag beḅ' Israelka' choe'lwillgake' Chioza', Pédrona' len Juanna' wyajgake' yoodo'na'. ²Na' cho'a puert che zeena' daa nechj yoodo'na', puert daa nsi'gake' Puert Xochi, chi' to beḅ' nxinj ni'ena' ka goljtie'. Na' yog' lla chjlekgake'ne' na' kwenche chḅabe' karidá lao beḅ'ka' chdop chllag yoodo'na'. ³Na' ka bllin Pédrona' na' Juanna' gana' chi'e, na' wḅabile' legake' izangakile' lat' mech we'gake'ne'. ⁴Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

⁵Na' beena' bwie' legake', gokile' mechan' we'gake'ne'. ⁶Na' Pédrona' chi'ene':

—Bibi mech nap' gon' li', lete dii nap' gon' li'. Kon yel' wak che Jesucristo, beḅ' Nazareta', nia' li' bizolla' na' bigoo nez.

7 Na'ch Pédróna' wdooye' nee de shlina' na' bisolléene', na' lii biyakteyi ni'ena'. 8 Na'ch ka beñ' bxit'zə bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. 9 Na' yog' beñ'ka' lle' na' ble'gakile'ne' chde' choe'lawee Chioza', 10 na' billej bibangakile' daa nombia'gake'ne' chbi'e chñabe' karidá cho'a puert daa nsi'gake' Puert Xochi.

Bzajnií Pédróna' beñ'ka' ndop nllag lesh' chyoodo'na'

11 Na' beena' biyaki ni'ena' aga bsane' Pédróna' len Juanna', kon noe' legake'. Na' yog' beñ'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor Che dii Salomón gana' zelengake' beena' biyaki. 12 Na' ka ble'i Pédróna' beñ'ka' chdop chllag na', golle' legake':

—Le' beñ' Israel, ¿berache chibanzile daa biyaki beeni? ¿Na' berache chwiazle neto'? ¿Achakile kon yel' wak chento'nán' biyaki beeni? ¿Awa chakile daa zoanto' chonnto' ka chiyoolallii Chiozan' biyakile'? Aga daan. 13 Chios, beena' be'la'o dii Abrahama', dii Isaaca', dii Jacoba', na' nochlə dii xozto'choka', len' wlo'e Xiine' Jesúza' balaan xenna', beena' benle lo na' beñ'ka' betgake'ne'. Na' ka goklall' Pilátóna' yisane'ne', bi be'le latj. 14 Lwaa dii nan inable yisane' Jesúza', beena' nak liizelozi beñ' li beñ' shao', beñ' wen xyana'lə wñable bisane'. 15 Kan' benle betle Jesúza', beena' chon yel' mban daa nak dowalj. Per Chioza' bisbane'ne' ladj beñ' wetka', na' neto' choe'nto' dill' daa nezinto' bibane'. 16 Daa chonjilall'nto' Jesúzan', ba biyaki beeni chwiale na' nombia'le. Dii li, daa nonjilall'nto' Jesúzan' chwiatele ba biyakchaile'.

17 'Le' beñ' bish', nezid', ka le' na' ka beñ'ka' chñabia' le', bi gokbe'ile bin benle ka betle Jesúza'. 18 Na' Chioza' bi'e latj gok ka' kwenche billinin ka wna dii beñ'ka' wdixjee xtilleena' kani'yi, daa wnagake' Crístóna' biya dii wchi' wsak' beñ' le'. 19 Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz. 20 Na' yiselee Crístóna', beena' wleje' kwenche inabi'e, kon ka wdixjee dii beñ'ka' kani'yi. 21 Chonan byen yigaane' yabana' axt ka illin lla yiyonshao' Chioza' yog'lolte dii de, kon ka goll Chioza' dii beñ'ka' wleje' wdixje'gake' cho'a xtilleena' kani'yi. 22 La' dii Moiséza' golle' dii xozxto'choka' dill'ki: “Xancho Chioza' kweje' sto beñ' ka nad' ladjleni, beñ' chixje'ile' le' bi dill' we'lene'ne'. Na' li wzenag yog' daa ine'. 23 Na' beena' bi wzenag che', Chioza' kwej yichje'ne' na' bich gak gone' txen beñ'ka' nak yell che Chioza'.”

24 'Na' yog'lol dii beñ'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa. 25 Len', naki chele daa ba bcheb Chioza' lao dii beñ'ka' wdixjee daa golle' legake' kani'yi. Na' lekzka' naki chele dii wenna' daa bcheb Chioza' gone' che dii xozxto'cho Abrahama', ka golle'ne': “Ni' che xiin dia cho'na' gon' dii wen che yog'lol beñ' lle' zbii zkaan yell-lioni.” 26 Na' ka bsel' Chioza' Xiine' Jesúza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

4

Pédróna' len Juanna' gokgake' lo na' beñ'ka' chñabia' beñ' Israelka'

¹ Na' ni choe'lente Pédrona' len Juanna' ben'ka' dill' ka bllin b̄oxzka' len beena' ngoo lo nee ben'ka' chap yoodo'na' na' len zi baḷ saduceoka'. ² Le chllaagake' daa chli' chsedi Pédrona' len Juanna' ben'ka' lle' na' nakan gok biban Jesúza' ladj ben' wetka'. ³ Na'ch bex'gake' legake', na' daa ba wille', j̄loogake' legake' lillyana', axt betiyoch bibejgake' legake'. ⁴ Per ben' zan ben'ka' bzenaggake' dillaa be' Pédrona' len Juanna' ben'j̄lall'gake' Jesúza'. Na' ka', wyanch ben'ka' ben'j̄lall'gake'ne', na' gokgake' ka do gayaa mil to ben' byoka'zə.

⁵ Na' betiyo bidop billag ben'ka' ch̄n̄abia' ben' Israelka' yell Jerusalénna', len ben' golka' ch̄n̄abia', na' ben'ka' chli' chsedi leya'. ⁶ Na' lekzka' len Anáza', beena' nak b̄oxz choo b̄oxz xen, na' Caifáza', Juanna', Alejándrona', na' nokchlə ben'ka' nak dialla che b̄oxz choo b̄oxz xenna'. ⁷ Na'ch bzegake' Pédrona' len Juanna' gchole'ka', na' w̄n̄abgakile' legake':

—¿No lsens cheyi na' no bsel' le' chonle diiki?

⁸ Na' Espíritu Santo che Chioza' bzajniile' Pédrona' kwenche golle' legake' ki:

—Le' ben' w̄n̄abia', na' le' ben' gol ch̄n̄abia'le yell Israeli, ⁹ ch̄n̄abile neto' ka nak dii wenna' gok che beeni, na' cheenile inezile nakan gok biyakile'. ¹⁰ Cheeninto' yog'loḷ-le inezile na' yog'loḷ ben' Israelka' inezgakile', beeni chwiale ze laoleni biyakile' kon yel' wak che Jesucristo, ben' Nazareta', beena' betle lee yag cruza', per Chioza' bisbane'ne' ladj ben' wetka'. ¹¹ Che Jesúzan' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yoonā.” ¹² Bichga zoa sto ben' yoblə gag yisle' cho' kwenche bi kwiaiyi'cho. L̄a' kochno zoa doxen yell-lioni ben' ba wlej Chioza' kwenche yisle' cho'.

¹³ Le bibani ben' w̄n̄abia'ka' daa chwiagake' bi bleb Pédrona' len Juanna' choe'gake' dillaa lawe'ka', l̄a' nakbia' aga bi nsedgake' na' aga no nalgake'. Na' gokbe'gakile' daa wdalengake' Jesúza' txenan chongake' ka'. ¹⁴ Na' daa ze beena' biyaki ni'ena' kwite'ka', bibi gok ye'gake' legake'. ¹⁵ Na'ch bibejgake' legake' shlak be'len ljwellgake' dill' nak koogake' x̄nezin. ¹⁶ Che' ljwelle':

—¿Nakra goncho che ben'ki? L̄a' yog'zə ben' zoa Jerusalénni inezgakile' ba bengake' to yel' wak xen, na' aga wak inacho bi nakan ka'. ¹⁷ Na' kwenche bich ides dill'ka' choe'gake', chiyaḷ' kooshebchogake' kwenche kochno we'lengake' dill' che Jesúza'.

¹⁸ Na'ch goxgake' Pédrona' len Juanna' dii yoblə, na' gollgake' legake' bich wli' wsedgakile' ben' ni bi we'lengake' legake' xtill' Jesúza'. ¹⁹ Na' Pédrona' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. ²⁰ Bi gag wsannto' we'nto' dill' daa ben ble'into' che Jesúza'.

²¹ Na'ch ben' w̄n̄abia'ka' biya dii gollgake' legake' kwenche nan illeb-gake', na'ch bisanchokləgake' legake', l̄a' bibi billet-lall'gake' gongake' daa yog'zə ben' choe'la'ogake' Chioza' ni che daa gok. ²² Na' beena' biyaki ni'ena' kon yel' wak che Jesúza' ba wdeille' choa yiz.

W̄n̄abgakile' Chioza' gaklene' legake' we'gake' xtilleena'

²³ Na' ka bisangake' Pédrona' len Juanna', biyajgake' gana' zoa ben'ka' nonlengake' txen na' gollgake' legake' yog' daa goll b̄oxzka' ch̄n̄abia' na' ben' golka' ch̄n̄abia'. ²⁴ Na' ka bengakile' daa gollgake' legake', na'ch gokgake' toz be'ljwillgake' Chioza', che'gake':

—Chios, li' nako' beŋ' zeelo chŋabia'. Li' beno' yabana', yell-lioni, na' nido'na', na' yog'te dii de lo yell-lioni. ²⁵ Na' Espiritu Santo cho'na' bxo'e' dill'ki cho'a loll' dii Davina' kana' wne':

¿Berache chllaa chlokz beŋ' yell-lioki?

¿Berache toshiizi chgoo beŋ'ki xnezin gongake' daa bi nxe bi nzak'?

²⁶ Beŋ'ka' chŋabia' lo yell-lioni gokgake' toz gokzbangakile' na' biŋiatezgake' Xancho Chioza' len Crístona', beena' wleje' kwenche inabi'e.

²⁷ 'Dii li yell Jerusalénni Heródeza' na' Poncio Pilátona', len beŋ' zit'ka' na' beŋ' Israelka', bdop bllaggake' gokgake' toz goklall'gake' wlliyi'gake' Jesúza', beena' nak liizelozi beŋ' li beŋ' shao', beena' wlejo' kwenche inabi'e. ²⁸ Na' daa bengake' ka', gok ka' bllio' bia'. ²⁹ Na' naa Chios, bwia ka' ngoosheb beŋ' wŋabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. ³⁰ Bli' ye!' wak cho'na' kwenche yiyaki beŋ' bi shao' na' kwenche gonnto' bichlæ dii yibani beŋ' kon ye!' wak che Xiño' Jesúza', beena' nak liizelozi beŋ' li beŋ' shao'.

³¹ Na' ka' biyoll be'lwillgake' Chioza', wxo' wŋib latja' gana' ndop nllaggake', na' wŋabia'chga Espiritu Sántoná' legake' na' bi bllibgake' we'gake' cho'a xtil' Chioza'.

Daa de che to toe' benin che yoguee

³² Na' yog' beŋ'ka' ba chonlilall' Jesúza', toz ka' gok yichjlall'do'eka'. Na' yog' daa de che to toe', benin che yoguee. Ni toe' bi wna: “Cha' dga.”

³³ Na' postlka', kon ye!' wak xen che Chioza', be'chgake' dill' che Xancho Jesúza' daa bibane' ladj beŋ' wetka', na' Chioza' dii xen goklene' yog'lolé'.

³⁴ Na' ni toe' bibi byallji, la' beena' de yell-lío che' wa lille' na' chiyiteen, na' mecha' daa choxee cheyin ³⁵ cho'en postlka' kwenche choe'gake' kon ka'k' wej chyalji to toe'. ³⁶ Na' wzoa to beŋ' Chipre lie' José. Nake' dia che dii Levína', na' postlka' bsi'gake'ne' Bernabé, na' zejín witip lall' beŋ'.

³⁷ Na' Joséni biyitee to yell-lío dii nape', na' mecha' bi'en postlka'.

5

Ananíaza' na' Safirana' wxiye'gake'

¹ Na' wzoa to beŋ' wlie' Ananías, na' xoole'na' wlie' Safira, na' biyit'gake' shkwe' yell-lío che'ka'. ² Na' Ananíaza' len xoole'na' gokgake' toz bkwaangake' lat' mecha' na' bentezgake' ka' be' doxenán postlka'. ³ Na'ch Pédróna' golle'ne':

—Ananías, ¿berache be'zo' latj wŋabia' Satanáza' yichjlall'do'na' na' chakilo' siyoo Espiritu Sántoná' daa bgaanleno' lat' mecha' daa wdixjgake' che yell-lío cho'na'? ⁴ Cho' yell-liona' kana' zi' yiyitooon, na' cho' mecha' daa be'xoo cheyin ka' biyitooon. ¿Berache wloolzæ yichjlall'do'na' siyoo? Aga beŋ' yell-lionin chziyoo, san Chiozan' cheenilo' siyoo.

⁵ Na'ch ka' beni Ananíaza' daa goll Pédróna', to ka' billeeze' wite'. Na' le' bllib yog' beŋ'ka' wŋezi ka' gok che'. ⁶ Na' bllin to chop bi' wew' gana' chtol Ananíaza', na' bitobgakbee to lech' na' jakwash'gakbee.

⁷ Na' gok ka' do shon' gor ka' bllin xoole'na', aga nezile' bin ba gok che' beŋ' che'na'. ⁸ Na' wŋabi Pédróna'ne', chi'ene':

—Wnashki nad', ¿aka to nakz beŋ' cho'na'n biyit'le yell-lío chelena'?

Na' Safirana' chi'ene':

—Awe, ka't'kzan biyit'nto'n.

⁹ Na'ch che' Pédrone'ne':

—¿Berache benzle toz dill' kon beñ' cho'na' chakile wak siye'le Espiritu che Chioza'? Cho'a yooni ba ziza' bi'ka' jakwash'gakb' dii beñ' cho'na', na' naa lljakwash'gakb' li'.

¹⁰ Na' lii billeete Saffrana' wite' lao Pédrone'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii beñ' che'na'. ¹¹ Na' le blleb beñ'ka' nonlilall' Jesucristona' len yog' beñ'ka' wnezi ka gok che dii Ananíaza' na' dii Saffrana'.

Postlka' bengake' dii zan yel' wak

¹² Na' postlka' bengake' dii zan yel' wak na' bichlæ dii chonan ka yibani beñ' ladj beñ'ka' lle' Jerusalénna'. Na' yog' beñ'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón. ¹³ Na' nochlæ beñ'ka' aga biyaxjgakile' gongake' legake' txen, la'kzi le ble'shiigakile' legake'. ¹⁴ Na' beñ' zan, ka noolæ ka beñ' byo, benlilall'gake' Xancho Jesúsza'. ¹⁵ Na' chyixjgake' tnezka' beñ'ka' bi shao', nxoagake' legake' no lo yagla' na' no lo daa, kwenche kat' te Pédrone' la'ch' bñen che'na' ten gana' degake' na' yiyakgakile'. ¹⁶ Na' lekzka' zan beñ' yellka' lliá gaoza Jerusalénna' chjgake' lao postlka' chjwa'gake' beñ' che'i yillwe' na' beñ' yoo dii xiw'ka'. Na' yog'lolzgage' chiyaki.

Wloogake' postlka' lillyana'

¹⁷ Na'ch bñoz choo bñoz xenna' na' saduceoka', beñ'ka' nakgake'ne' txen, gokxee gokzbangakile' postlka'. ¹⁸ Na'ch beñ'gake' postlka' na' wloogake' legake' lillyana'. ¹⁹ Na' wala' bllin to anjl che Xancho Chioza' bsalje' lillyana' na' bibeje' legake', na' golle':

²⁰ —Li yiyaj yoodo'na', na' li wzajni beñ'ka' chdop chllag na' doxen ka nak yel' mban zejli kani daa we' Chioza' legake'.

²¹ Na'ch ka wyeeni', biyajgake' yoodo'na' ka goll anjla' legake', na' bli' bsedgakile' beñ'ka'.

Na'ch bñoz choo bñoz xenna' na' beñ'ka' nakgake'ne' txen bitopgake' yog'lol beñ'ka' chñabia' yell Israela', na' bsel'gake' beñ' kwenche nan lljxi'gake' postlka' de lillyana'. ²² Na' ka bllin beñ'ka' chap yoodo'na' cho'a lillyana', kochno postlka' de na'. ²³ Na'ch jayellgake' beñ'ka' chñabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to beñ' bi yoo lo'inna'.

²⁴ Na' beena' ngoo lo nee beñ'ka' chap yoodo'na', len bñozka' chñabia', ka bengakile' che'gake' ka', na' gokgakile' gate yiyoll yido dga. ²⁵ Na' ni choe'tegake' dill', bllin to beñ' chi'e legake':

—Beñ'ka' wloole lillyana' lle'tgake' yoodo'na' chli' chsedgakile' beñ'ka' lle' na'.

²⁶ Na'ch wyaj beñ'ka' chap yoodo'na' kon beena' chñabia' legake' jaxi'gake' postlka' xochi. Bibi bengakile' legake' daa bllebgake' shi beñ'ka' chzenag chegake' wlligake' legake' yaj. ²⁷ Na' ka billinlengake' postlka' lao beñ'ka' chñabia' yell Israela', na' bñoz choo bñoz xenna' chi'e legake':

²⁸ —¿Abi chajle'kzlen nanto' le' bich wli' wsedzile beñ' xtill' Jesúsza'? Na' li wwia ka ba benle, ba bli' bsedile yog' beñ' Jerusalénki cho'a xtilleena', na' cheenile wtoibile neto' daa betgake'ne'.

²⁹ Na'ch Pédrone' len postlka' sto che'gake':

—Chonchan byen wzenagnto' che Chioza' aga ka che beñ' yell-lioni. ³⁰ Le' betle Jesúsza' na' bda'lene' lee yag cruza'. Na' Chios, beena' be'la'o dii

xoxzto'choka', le' bisbane'ne' ladj ben' wetka'. ³¹ Na' Chioza' ba mbeke'ne' kwite' de shlina' gana' ba chi'e chnabi'e, na' nzo'e'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. ³² Na' neto' choe'nto' dill' daa ble'into' gok che Jesúza', na' daa betj Espíritu Sántona', beena' ba bzoa Chioza' loo yichjlall'do' yog' ben' chzenague' che', lekzka' chli'n nakan ka nannto'.

³³ Na' ka beni ben' wñabia'ka' daa goll postlka', le bllaagake' na' gok-lall'gake' witgake' legake'. ³⁴ Na' ladj ben'ka' chñabia' len to fariseo, ben' le Gamaliel, ben' chli' chsedi leya', na' yog'z ben' chle'shi'gakile'ne'. Na' wzollee, golle' legake' kweygake' postlka' xtit chyoolə, ³⁵ na' golle' ben' wñabia'ka':

—Le', ben' Israel, li wsak' shi bin gonile ben'ki. ³⁶ Li lljadini kani batz bchej to ben' le Teudas, na' wne' nake' to ben' zakii, na' ka do tap guiyoa ben' bengake'ne' txen. Na' ka betgake'ne', yog' ben'ka' gokgake'ne' txen biyeslesgake', bich bi bengake'. ³⁷ Na' ka wde gok ka', wizak dii yoblə kana' chlabgake' bal ben' lle' to to yell, na' bizchej Judas ben' Galileana', na' ka'kzə ben' zan bengake'ne' txen. Na' lekzka' betgake'ne' na' biyesles ben'ka' gokgake'ne' txen. ³⁸ Na' naa, nia' le' bibi gonile ben'ki, la' ka nak dga chli' chsedgakile', shi nakan dii chyiljall'zgake' winitlokzan. ³⁹ Na' shi nakan che Chios, aga wak yisol yinitlen. Chiyal' wwiayen'le kwenche bi gakkil-lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'. Na' biyolla' bisangake' legake'. ⁴¹ Na'ch bichej postlka' gana' ndop nllag ben'ka' chñabia', na' le chibagakile' daa be' Chioza' latj bchi' bsak' ben'ka' legake' daa choe'gake' xtill' Jesúza'. ⁴² Na' yog' lla postlka' bli' bsedgakile' xtill' Jesucrístona' yoodo'na' na' lill ben'.

6

Wlelgake' gall ben' gak lall' nagake' mandadka'

¹ Na' ka zej chanch ben'ka' chonlilall' Jesúza', ben'ka' chne dill' griegona' wzolo che'gake' aga chaklebi ikaa noolə wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' yel' wawa' yog' lla. ² Na'ch postlka' shllin bti'agake' yog' ben'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao ben'. ³ Na' le' ben' bish', li kwej gall ben' ladjleni, ben' chon wen, ben' chajni, na' chñabia' Espíritu Sántona' legake'. Na' gak lall' na'gake' chisgake' yel' wawa'. ⁴ Na' neto' we'l-lall'chnto' we'llwillnto' Chioza' na' wli' wsedchinto' ben' cho'a xtilleena'.

⁵ Na' yog'z ben'ka' biyoolall'gake' ka goll postlka', na' wlelgake' beena' le Esteban, nake' ben' nonlilall'chgue' Chioza' na' chñabia' Espíritu Sántona' le'. Na' lekzka' wlelgake' Felípena', Prócorona', Nicanora', Timónna', Parménaza', na' Nicolásza', ben' Antioquíana', beena' bene' txen ben' Israelka'. ⁶ Na' jwa'gake' legake' gana' lle' postlka', na' postlka' bxoə neeka' yichje'ka' na' wñabgakile' Chioza' gaklene' legake'.

⁷ Na' ben' zanch beni cho'a xtill' Chioza' na' wyanchga ben'ka' benlilall'gake' Jesúza' Jerusalénna', na' zan bxo'zka' bzenaggake' na' benlilall'gake' Jesúza'.

Bex'gake' Estébanna'

⁸ Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlæ dii chonan ka yibani ben'. ⁹ Na'ch lle' shkwen ben' Israelka' ba biyell bila' lo na' ben'ka' wxi' legake', na' non chelagake' chdop chllaggake' gana' choe'lwilgake' Chioza'. Na' gokgake' toz bal ben' Cirene, ben' Alejandria, ben' Cilicia, na'ch ben' zaak do Ásiana', gokdil'-lengake' Estébanna'. ¹⁰ Na' aga gokgake' yel' sin' che Estébanna', daa chnie' kon ka che' Espiritu che Chioza'ne'. ¹¹ Na' wdixj-gake' bal ben' kwenche wxiye'gake', che'gake': "Ba beninto' Estébanna' chnie' zban che dii Moiséza' na' che Chioza'." ¹² Na' daa gollgake' ka', bta bnegake' ben' zan, len ben' golka' chnabia' na' ben'ka' chli' chsedi leya' kwenche bex'gake' Estébanna' na' jwa'gake'ne' lao ben'ka' chnabia' ben' Israelka'. ¹³ Na' wdiljchgake' ben'ka' wxiye', kwenche gollgake':

—Bi chsankzæ beeni inie' che yoodo' che Chios chechona', na' che ley che'na'. ¹⁴ Na' ba bizeninto' chizne' Jesús, ben' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵ Na' yog' ben'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7*Estébanna' bi'e dill' lao ben' wñabia'ka'*

¹ Na'ch bꞑoz choo bꞑoz xenna' wñabile' Estébanna', chi'ene':

—¿Alekzi ben'ki ka chono'n?

² Na' Estébanna' chi'e legake':

—Le' ben' bish' na' le' nakle ka xanto', li wzenag dga inia' le': Chios chechona', beena' liizelozoi nak ben' choo ben' xen, bli'lawe' dii xozxto'cho Abrahama' kana' zoe' yell-liona' mbani Mesopotámiana', kana' zi' shaje' yell Haránna'. ³ Na' Chioza' golle'ne': "Bkwaan yell cho'ni na' dialla cho'ka', na' wyaj yell-lío gana' wliid' li'." ⁴ Na'ch dii Abrahama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa. ⁵ Na' Chioza' bi bene' lo na' dii Abrahama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahama' ba zoa ka golle'ne' ka'. ⁶ Na' lekzka' Chioza' chi'ene' xiin dia che'ka' soagake' yell zit' na' inabia' ben'ka' legake' wgongake' legake' llinna', na' wsak'zi'gake' legake' tap guioa yiz. ⁷ Na' lekzka' Chioza' golle'ne': "Gon' yel' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'." ⁸ Na' ka bcheb Chioza' gone' dii wen che dii Abrahama', golle'ne' chiyal' sho'e senna' daa le circuncisión, le' na' xiin dia che'na'. Daan, dii Abrahama' wlo'e dii xiine' Isaaca' senna' ka gok xon' lla goljb', na' ka'kzæ ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin, ben'ka' gok dii xozxto'cho, cho' ben' Israel.

⁹ Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰ na'ch bisle'ne' lao yog'lo' dii ben ble'ile'. Na' bi'ene' yel' sin' kwenche faraónna', beena' chnabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

¹¹ 'Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xozxto'choka'. ¹² Na' ka wnezi dii Jacoba' de trígoná' Egíptona', na' bselee bi' che'ka', ben'ka' gok dii xozxto'cho, jxi'gake'n. ¹³ Na' ka wyajgake' de wchopi, dii Joséna' golle' legake' nan len' nake' ben' bish'gake', na'ch bembia' faraónna' dialla che dii Joséna'. ¹⁴ Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'. ¹⁵ Kan' gok jsoa dii Jacoba' Egíptona' gana' wite', na' lekzka' na' wit xiine'ka', ben'ka' gok dii xozxto'cho. ¹⁶ Na' jakwash'gake' legake' loo bana' daa bizi' dii Abrahama' yell Siquema' che xiin beena' le Hamor.

¹⁷ 'Na' ka ba zoa gao gon Chioza' daa bchebe' gone' che dii Abrahama', ba wyanchga xiin dia che dii Israela', ben'ka' lle' Egíptona', ben' zan wal ba nakgake'. ¹⁸ Na'ch bllin lla wzolo wñabia' sto ben' yoblə yell Egíptona', ben' bi bembie' dii Joséna'. ¹⁹ Na' ben' wñabia'na' wxiyee ben' wllall chechoka' na' biya dii bchi' bsakee dii xozxto'choka', na' bene' byen lljchoongake' bdo'do' che'ka' kwenche guetgakk'. ²⁰ Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'. ²¹ Na' ka bich gok wkwash'gake'b' lille'ka', benan byen jchoongake'b' kwenche nan gueth'. Na'ch noola' nak xiin faraónna' billegile'b' na' bikeeb' na' bisgole'b' ka xiine'. ²² Ka' gok bsed dii Moiséza' yog'lol' yel' sin' che ben' Egíptoka' na' bi'e dill' zakii na' leyi bene' dii zakii.

²³ 'Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wllall che'. ²⁴ Na' ka ble'ile' to ben' Egípto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. ²⁵ Na' goki dii Moiséza' ben' wllall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. ²⁶ Na' betiyo ble'ile' chop ben' wllall che', ben' Israel, chdil'gake'. Na' gokile' yizoe' legake' wen, na' chi'e legake': "¿Berache chdil-lenə lljwell-le?, aga ne' ben' bishee til-lene'." ²⁷ Na'ch beena' chit chiyine' ben' wllall che'na' blligee dii Moiséza' na' chi'ene': "¿No bzoa li' inabi'o neto' na' koo xnezi chento'ni?" ²⁸ ¿Alekzka' cheenilo' wito' nad' ka beto' ben' Egíptona' daa neji?" ²⁹ Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

³⁰ 'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'. ³¹ Na' le bibani dii Moiséza' daa ble'ile' daa, na' wbiguee kwenche bwiayenee kwaslo'. Na'ch benile' shii Xancho Chioza', chi'ene': ³² "Nadaan nak' Chios, beena' be'la'o dii xozxto'ka', Abrahama', Isaaca' na' Jacoba'." Na'ch dii Moiséza' le bllibe' ax't chxiztite', na' aga biyaxjchile' wwie'. ³³ Na'ch Xancho Chioza' golle' dii Moiséza': "Blechj xelo'na', la' nad' zoa' latji gani zio', na' aga ka nla'z no se ni. ³⁴ Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'."

³⁵ 'Na' Chioza' bseleene' kwenche yisle' ben' wllall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin. ³⁶ Na' dii Moiséza' bene' zan yel' wak

diika' ben ka bibani beṅ' Egíptoka' kana' bibeje' dii xozxto'choka' lalle'ka'. Na' bene' yeḷ' wak loo nisdó'na' le Nisdó' Xṇa, na' lekzka' latja' gana' bibi chashj chleb gana' wdagake' choa yiz. ³⁷ Na' golle' dii xozxto'choka': "Xancho Chioza' kweje' sto beṅ' ka nad' ladjleni, beṅ' chixje'ile' le' dillaa daa we'lene'ne'." ³⁸ Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yeḷ' mban daa bikwaanlene' cho'.

³⁹ 'Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. ⁴⁰ Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." ⁴¹ Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. ⁴² Na'ch Chioza' wlej yichje' legake' na' bi'e latj be'la'ogake' beljka' llia xan yabana'. Bengake' ka na lee libra' daa bzej dii beṅ'ka' wdixjee daa goll Chioza' legake' kani'yi, gana' nan:

Le', beṅ' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³ Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele,

na' be'la'ole belj che chios chele Refánna',

diika' benlilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

⁴⁴ 'Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'. ⁴⁵ Dii xozxto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtíl-lengake' yellka' ben Chioza' lall' na'gake', na' bgaan lallchoni axt ka bllin lla wṇabia' dii Davina'. ⁴⁶ Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wṇabile'ne' wi'e latj gone' to lill xlatje'. ⁴⁷ Per Salomónna'lə, beena' nak xiine', bene'n ⁴⁸ la'kzi Chioza', beena' nak liizelozi beṅ' choo beṅ' xen, bi zoe' to loo yoo dii chon beṅ' yell-lioni. La' ka wna dii beena' wdixjee daa goll Chioza'ne' kani'yi:

⁴⁹ Yabana' nakan gana' chi'a chṇabi'a,

na' lo yell-liona' nzoa' ni'ani.

¿Nakran chakile gonle yoona' gana' soa'?, na Xanchona'.

¿Achakile chyallj ga yizi'lallaa?

⁵⁰ ¿Abi chwiale nadaan ben' yog'loḷ dii de?

⁵¹ 'Na'ch Estébanna' chi'e beṅ'ka' lle' na':

—Le beṅ' yichjlall'do' wal nakle. Bi chzenagle che Chioza' na' chonle ka beṅ' bi nombia' Chioza'. Nakle beṅ' widenag ka gok dii xozxto'choka'. Bikzə chzenagle che Espíritu Sántona'. ⁵² Dii xozxto'choka' bchi' bsak'gake' yog' dii beṅ'ka' wdixjee daa goll Chioza' legake' kani'yi. Betgake' beṅ'ka' be' dill' nan Chioza' wselee beena' zeelo nak beṅ' li beṅ' shao'. Na' ka bide' na' bénlene' lo na' beṅ'ka' betgake'ne'. ⁵³ La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴ Ka beni beṅ'ka' daa goll Estébanna' ḷegake', ḷe bllaagake' axt chaoy-aaxaxj ḷeye'ka'. ⁵⁵ Na' Estébanna', chṅabia'chga Espíritu Sántona' ḷe', na' blis lawe'na' yabana' ble'ile' yeḷ' chey cheeni' che Chioza', na' ble'teile' ze Jesúza' kwit de shḷi che Chioza'. ⁵⁶ Na'ch golle' ḷegake':

—ḷi wwia! Chle'id' nyalj yabana', na' Beena' Bsel' Chioza' Yell-lioni zie kwit Chioza' shḷaa de shḷina'.

⁵⁷ Na' beṅ'ka' ḷle' na' bsej nague'ka' kwenche bi bengakile' xtilleena', na' de chosyaadiagake' beṅ'gake'ne'. ⁵⁸ Na' wleḷgake'ne' yell Jerusalénna' jalliagake'ne' yaja'. Na' beṅ'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. ⁵⁹ Na' ka chlliagake'ne' yaja', be'ḷwille' Jesúza', chi'ene':

—Jesús, li' nako' Xan', bizi' bikaagach nad'.

⁶⁰ Na' biyoll wne' ka', na' bchek' xibe'na' na' wṅie' zillj, wne':

—Xan', wxi'xen che beṅ'ki dga chongakile' nad'.

Na' biyoll wne' ka' wite'.

8*Sáulona' bchi' bsakee beṅ'ka' choe'la'o Jesúza'*

¹ Na' Sáulona' goke' toz beṅ'ka' betgake' Estébanna'.

Na' lo llana'tez wzolo bchi' bsak'gake' yog' beṅ'ka' nonḷilall' Jesúza' Jerusalénna'. Na' wisḷegake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. ² Na' to chop beṅ' nonḷilall' Jesúza' jakwash'gake' dii Estébanna' na' ḷe wchellgakile'ne'. ³ Na' Sáulona' bchi' bsakee beṅ'ka' nonḷilall' Jesúza', chaje' lill che chegake' chjtoyoe' ka nool ka beṅ' byo kwenche chgwee ḷegake' lillyana'.

Be'gake' dill' wen dill' kob che Crístona' gana' mbani Samáriana'

⁴ Na' beṅ'ka' bllesh Jerusalénna' be'gake' dill' wen dill' kob che Crístona' gattezə wyajgake'. ⁵ Na' beena' le Felipe, wyaje' to yell xen che Samáriana' na' be'lene' beṅ'ka' dill' che Crístona'. ⁶ Na' bdop bllag beṅ', na' yog'lolgake' bzenagyen'gake' dill' daa be' Felipena', daa ble'gakile' yeḷ' wakka' chone'. ⁷ Na' beṅ' zan biche' dii xiwaa, na' ka bichejgakan chosyaadiagakan. Na' ḷekzka' biyone' zan beṅ' net ni'a nee, na' beṅ' bi chak sa' wen. ⁸ Na' daa gok ka', ḷe biba bizaki beṅ'ka' ḷle' yella'.

⁹ Na' ḷekzka' yella' wzoa to beṅ' willa' lie' Simón, na' kon yeḷ' willa'na' chone' chziyee beṅ' doxen gana' mbani Samáriana', na' ben kwine' beṅ' choo beṅ' xen. ¹⁰ Yog' beṅ' ḷle' na' chzenaggake' xtilleena', ka bi' xkwid' ka beṅ' gol, na' nagake':

—Beenin nsi'gake' Yeḷ' Wak Choo Yeḷ' Wak Xen che Chios.

¹¹ Na' ḷe wyajḷe'gake' che', ḷa' zan yiz ba gok chziyee ḷegake' kon yeḷ' willa'na' daa chone'. ¹² Na' ka bzajnií Felipena' ḷegake' dill' wen dill' kob che yeḷ' wṅabia' che Chioza' na' che Jesucrístona', na' beṅ' zan wyajḷe'gake' xtilleena' na' wchoagake' nisa', ka noolə ka beṅ' byo. ¹³ Na' lente Simónna' wyajḷi'e na' wchoe' nisa', na' wzoloe' chdalene' Felipena' gattez zeje', na' chibanile' ka nak yeḷ' wakka' daa chon Felipena'.

¹⁴ Na' ka wṅezi postlka' ḷle' Jerusalénna' ba chajḷe' beṅ' Samáriaka' cho'a xtilḷ' Chioza', na' bsel'gake' Pédrona' len Juanna' Samáriana'. ¹⁵ Na' ka bllingake', be'ḷwillgake' Chioza' wṅabgakile'ne' soa ḷoo yichjlall'do' beṅ' Samáriaka' Espíritu Sántona'. ¹⁶ ḷa' biṅ' soa' Espíritu Sántona' ḷoo

yichjall'do'eka'. Tochga ba wchoagake' nisa' daa chajle'gake' che Xancho Jesúza'. ¹⁷ Na'ch Pédróna' len Juanna' bxoá neeka' yichj ben'ka', na' jsoa Espíritu Sántóna' loo yichjall'do'eka'.

¹⁸ Na' ka gokbe'i Simónna' jsoa Espíritu Sántóna' loo yichjall'do' ben'ka' biyoll bxoá na' postlka' yichje'ka', na' bshabile' legake' mech, ¹⁹ chi'e:

—Li gon nad' ye!' waki kwenche nottez ben' ka wxoa' na'ki yichje'ka' soa Espíritu Sántóna' loo yichjall'do'eka'.

²⁰ Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'leno'n daa chon Chioza' ka'z. ²¹ Bikz ga gak gono' ka nak dga chonnto', la' bi nak yichjall'do'na' ka cheeni Chioza'. ²² Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'. ²³ La' nakbia'cha bin nxe bin nzak' nak loo yichjall'do'na', na' lennan' ntakw nchejan li'.

²⁴ Na'ch che' Simónna' legake':

—Li we'llwillgach Chioza' ni cha' kwenche bi gak daa ba wnale gak cha'.

²⁵ Na' ka biyoll be' Pédróna' na' Juanna' cho'a xtill' Chioza', na' biza'gake' ziyajgake' Jerusalénna'. Na' ka zingooogake' nez, be'gake' dill' wen dill' kob che Jesucrístóna' zan yellka' gana' mbani Samáriana'.

Felípena' na' ben' Etiópiana'

²⁶ Na'ch to anjl che Xancho Chioza' wnie' Felípena', chi'e:

—Wyaj lli'lá na' goxoo neza' daa ziza' Jerusalénlá na' zejan yell Gázalá, neza' daa chde latja' gana' bibi chashj chleb.

²⁷ Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco,* ben' zakii, na' nak lall' nee mech che noolá wñabia' che Etiopiana' beena' le Candace. ²⁸ Na' ba zingwee nez ziyaje' lalle'nalá, na' ziyoe' loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi. ²⁹ Na'ch Espíritu che Chioza' chi'e Felípena':

—Jabig' kwit karreta'.

³⁰ Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

³¹ Na'ch ben' Etiopiana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

³² Na' Cho'a Xtill' Chioza' gana' chlabe' nan:

Betgake'ne' ka chite' to xil'do';
na' ka to xil'do', ba bi chosyaa kat' chshibe'b,
ka'kz le', ni shcho'a dill' bi wnie'.

³³ Na' bsi'gake'ne' ye!' zto', na' aga no goklen le' gone' ye!' joschis che'.

Na' kono xiin dia che wzoa,
la' bsol bñitgake' ye!' mban che'na'.

³⁴ Na'ch ben' Etiopiana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che ben' yoblan?

* **8:27** Eunuco: zejin ben' wlejgake' xshitin wa ben' bibi nsee ka chaltje'. Bwia glosáriona'.

³⁵ Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'. ³⁶ Na' ka bllingake' to ga llia nis, na' che' beñ' Etiopíana' Felípena':

—Ni llia nis, ¿ade daa wsej wllonan çhoa' nisa'?

³⁷ Na' che' Felípena'ne':

—Shi chajli'o do yichj do lalloo, wak wchoa' li' nisa'.

Na' che' beñ' Etiopíana':

—Chajli'a Jesucrístona' nake' Xiin Chioza'.

³⁸ Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'. ³⁹ Na' ka bichejgake' loo nisa', Espíritu che Xancho Chioza' biçhi'e Felípena' gan yoblə, na' aga ble'chi beñ' Etiopíana' le', per chiba chizakile' ziyaje'. ⁴⁰ Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' axt billintie' Cesareana'.

9

Bisha' Chioza' yichjlall'do' Sáulona'

(Hch. 22:6-16; 26:12-18)

¹ Na' Sáulona' kon chde' chwall chshebe' beñ'ka' nonlilall' Xancho Jesucrístona'. Chiyiljallee nak gone' kwenche wite' legake'. Daan wyaje' Jerusaléna' jawie' bəoz choo bəoz xenna' ² na' wñabile'ne' wzeje' twej yish che to to gana' chdop chllag beñ' wlall che'ka' choe'lwilgake' Chioza' yell Damáscona', na' we'n lsens yiyilje' beñ'ka' ba wyoo lo nez li nez shao' che Jesucrístona' na' goxee legake' kwenche yichi'e legake' pres Jerusaléna', ka noolə ka beñ' byo. ³ Ka ni ngwee nez, na' ba zoa illine' yell Damáscona', tokonganzi wyeçhj to beeni' xen wal le' dii za' yabalə. ⁴ Na' Sáulona' jçhaze' lo yona' na' benile' to shii beñ', chi'ene':

—Saulo, Saulo, ¿biçhe chçhi' chsak'zo' nad'?

⁵ Na'ch Sáulona' chi'e:

—¿Nora li', beñ'?

Na'ch billii beenan', chi'e:

—Nadaan Jesúza', beena' chçhi' chsakoo. Na' daa chono' ka', zi' che kwinzon' chono' na' chak çho' ka chak che goona' chilibb xisa' daa chbibe'b kwenche sa'b.

⁶ Na'ch Sáulona' axt chxiztite' daa chllebe', na' golle'ne':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiya' gono'.

⁷ Na' beñ'ka' zejlengake' Sáulona' txen legatega wzegake' bibangakile' na' bblebgake', daa bengakile' chak xne, per ni to kono ble'gakile'. ⁸ Na'ch biyas Sáulona' lo yona'. Na' ka bixa' jalawe'na' aga ble'chile'. Na' beñ'ka' zejlene' txen beç'gake' neena' kwenche bçhe'gake'ne' yell Damáscona'.

⁹ Na' shon lla bi gok ile'ile', ni bi weej wdawe'.

¹⁰ Na' Damáscona' zoa to beñ' chonlilallee Jesúza' na' lie' Ananías, na' ben Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹ Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inábo' to ben' Tarso, ben' le Saulo. Ba choe'lwille' nad', ¹² na' ba ble'do'ile' li' choo gana' zoe' na' chxoa noona'ne' kwenche yile'ile'.

¹³ Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e ben'ka' nonlilall' li' Jerusalénna'. ¹⁴ Na' naa ba blee ni noxee yish daa bzej bxoza' chnabia' daa cho'en lsens goxee yog'lointo', neto' choe'lwilinto' li', na' yichi'e neto' pres Jerusalénna'.

¹⁵ Na' Xancho Jesúsza' golle'ne':

—Wyaj, la' ba wlej' Sálona' kwenche wi'e xtilaana' lao ben'ka' bi nak ben' Israel, na' lao ben' wñabia' che'ka', na' lekzka' laole le' nakle ben' Israel. ¹⁶ Nad' wliidee ka chiya'li' si' sakee ni cha'.

¹⁷ Na'ch Ananíaza' wyaje' gana' zoa Sálona' na' wyo'e loo yona', na' bxoá neena'ne'. Na' chi'ene':

—Saulo, ben' bish', Xancho Jesúsza', beena' wñie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjall'do'na'.

¹⁸ Na' ka bxoá neena' Sálona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. ¹⁹ Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sálona' xtill' Chioza' yell Damáscona'

²⁰ Na' lii wzolote Sálona' cho'e xtill' Crístona' to to gana' chdop chllag ben' Israelka' choe'lwilgake' Chioza' yell Damáscona', na' chi'e ben'ka' Jesúsza' nake' Xiin Chioza'. ²¹ Na' yog' ben'ka' bengakile' dill' daa choe' Sálona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúsza' Jerusalénna'? Na' ¿aaga ni cheyinnan' bide' ni kwenche yichi'e yog'logake' pres ljasane' legake' lao bxoza' chnabia'?

²² Na' btipch lall' Sálona' kwenche zizikchli bi'e dill' nan Jesúsanz' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sálona' lo na' ben' Israelka'

²³ Ka ba gok zan lla choe' Sálona' xtill' Jesúsza' yell Damáscona', na' ben' Israelka' lle' na' bshag ljwellgake' nan witgake'ne'. ²⁴ Na' gokbe'i Sálona' ba chinogake'ne'. Ka wal' ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. ²⁵ Na'ch ben'ka' nonlene' txen, wal'-la wloogake'ne' to loo lloom na' bil'etjgake'ne' lee zeena' nechj yella' kwenche bile'.

Billin Sálona' Jerusalénna'

²⁶ Ka billin Sálona' Jerusalénna', gokile' lene' ben'ka' nonlilall' Jesúsza', per yog'lole' bllebgake'ne', bi wyajle'gake' shi dii li ba chonlilallee Jesúsza'. ²⁷ Na' Bernabéna' bchi'e Sálona' gana' lle' postlka'. Na' golle' legake' nan Sálona' ble'ile' Xancho Jesúsza' tneza' ka zeje' yell Damáscona', na' Jesúsza' be'lene'ne' dill'. Na' lekzka' golle' legake' bi bllebe' bi'e xtill' Jesúsza' yell Damáscona'. ²⁸ Na' ka' gok bigaane' Jerusalénna' goke' txen ben'ka' nonlilall' Jesúsza', na' wal inlleb goke' bi'e xtill' Xancho Jesúsza'. ²⁹ Na' be'lene' dill' ben' Israelka' chne dill' griegona' kwenche shajle'gake' che Jesúsza', per legake' goklall'ligake' witgake'ne'. ³⁰ Na' ka wñezi ben'ka' nonlilall' Jesúsza' ba chinogake' Sálona' kwenche witgake'ne',

b̄che'gake'ne' Cesareana'lə. Na' ka bllingake' na', na' bisel'gake'ne' Társona'lə gana' nak lalle'.

³¹ Na'ch beñ'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no b̄chi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwen̄che gokchachgake' lo x̄nez Chioza' na' kwen̄che wyanchgake'.

Biyaki beena' le Eneas

³² Do kana', chda Pédrona' chjawie' beñ'ka' nonlilall' Jesúza' to to yell, na' lekzka' jawie' beñ'ka' lle' yell Lídana'. ³³ Na' yell Lídana' jti'e to beñ' le' Eneas. Ba gok x̄on' yiz die' bi chak chase' daa net ñi'a neena'. ³⁴ Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. ³⁵ Na' yog' beñ'ka' lle' yell Lídana' na' yell Sarónna', ble'gakile' biyaki beena' na' benlilall'gake' X̄ancho Jesúza'.

Biban Dorcaza' ladj beñ' wetka'

³⁶ Na' lekzka' yell Jópena' wzoa to noolə benlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ñi'a neena' goklene' beñ', na' biyesh'lallile' beñ'ka' bibi de cheyin. ³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliá shkwiana' cha'lə. ³⁸ Na' Jópena' llian gaozə yell Lídana', na' beñ'ka' w̄nezgakile' zoa Pédrona' yell Lídana', na'ch bsel'gake' chop beñ' jellgake'ne':

—Sho'gach Jópena' ñaate.

³⁹ Na'ch Pédrona' wzee zejlene' beñ'ka' Jópena'. Na' ka blline', na' jwa'gake'ne' loo yona' gana' de beñ' weta', na' yog' nool wizebka' wyechjgake' Pédrona' chbellgake', na' bli'gakile'ne' xe'ka' daa ben dii Dorcaza' shlak wbane'. ⁴⁰ Na' Pédrona' bibeje' yog'lole' chyoolə, na' b̄chek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bix̄a'te jalao Dorcaza' chwie' Pédrona'. Na'ch biyase' bibi'e. ⁴¹ Na' Pédrona' b̄exee neena' na' bisolléene'. Na'ch binie' nool wizebka' na' nochlə beñ'ka' nonlilall' Jesúza' kwen̄che bizoe'ne' shi'a shbane' lawe'ka'.

⁴² Na' wze dill' doxen yell Jópena' ka gok che Dorcaza', na' beñ' zan benlilall'gake' X̄ancho Jesúza'. ⁴³ Na' Pédrona' bigaane' Jópena' zan lla lill Simónna, beena' chkoll yidxa bayix'ka'.

10

Pédrona' na' Cornéliona'

¹ Na' yell Cesareana' wzoa to beñ' wlie' Cornelio, na' nak lall' nee zan soldadka', na' beñ'ka' nak lall' nee wlegake' Beñ' Italia. ² Na' Cornéliona' len beñ'ka' nakgake' toz loo yoo lille'na' choe'la'ogake' Chioza' na' chall chllibgake'ne'. Na' zotezi zoe' choe'lwille' Chioza' na' cho'e mech xen kwen̄che chaklene' beñ' Israelka', beñ'ka' chyallj ch̄chinin. ³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllibze', na' golle'ne':

—¿Beran cheenilo' beñ'do'?

Na' anjla' chi'ene':

* 9:36 Tabita: dillii nakan dill' arameo.

—Chioza' chibaile' daa zoatezi zo' choe'lwillo'ne' na' daa chakleno' beṇ' yesh'ka'. ⁵ Na' naa bseḷ' beṇ' shajgake' yell Jópena' kwenche lljxi'gake' beena' le Simón Pedro. ⁶ Zoe' lill to beṇ' le Simón, beena' chkoll yid, na' lille'na' zoan gaoz cho'a nisdona'. Na' Simón Pédrone' ine' li' daa chiyaḷ' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez. ⁸ Na' golle' legake' yog' daa goll anjla', na'ch bseḷee legake' Jópena'.

⁹ Na' betiyo do ka gobill ba zoa illin beṇ'ka' bseḷ' Cornéliona' yell Jópena'. Na' ka lo gora', Pédrone' wyepe' koll' yooná' gana' zoe' kwenche we'lwille' Chioza'. ¹⁰ Na' wdone', na' goklallee gawe' shel'ka'. Na' shlak chongake' daa gawe', ble'do'ile' ¹¹ byalj yabana', na' to dii nak ka to lech' xen dii nchej tap yichjten chetjan lo yona'. ¹² Na' loo lechaa lle' biya bayix', no ba lliá tap ni'a na'in, na' no ba chxobi leeb lo yona' na' no ba zoa xilin. ¹³ Na'ch benile' shii to beṇ', chi'ene':

—Wzolla' Pedro. Bet baka', na' wdao.

¹⁴ Na'ch Pédrone' golle'ne':

—Bi gaw' baka', Xan'; ni shlin biṇ' gaw' baki bi nak ba xilall'.

¹⁵ Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶ Shon shii golle' ka', na'ch biyep lechaa yabana'. ¹⁷ Na' chibani Pédrone' chakile' bera zejín daa ble'do'ile', ka bllin beṇ'ka' bseḷ' Cornéliona' cho'a yooná' gana' zoe', daa ba wṇabgake' gan zoa lill beena' le Simón, beena' chkoll' yid xa bayix'ka'. ¹⁸ Na' ka bllingake', na' wṇegake' zillj wṇabgake' shi nan' zoa to beṇ' le Simón Pedro. ¹⁹ Na' Pédrone' zie' wneyi cheyi daa ble'do'ile', kat' wne Espiritu Sántona', chi'ene':

—Bwiakachi, na' lle' shon beṇ' chiyiljgake' li'. ²⁰ Bizolla' na' biyetj, na' wyajlengake'. Bi gachopilo', la' nadaan bseḷaa legake'.

²¹ Na'ch biyetj Pédrone' gana' lle' beṇ'ka' bseḷ' Cornéliona'. Na' chi'ene' legake':

—Nadaan beena' chiyiljle. ¿Beran chak chele zidwiale nad'?

²² Na'ch che' beṇ'ka' Pédrone':

—To beṇ' wṇabia' che soldadka' lie' Cornelio bseḷee neto'. Nake' to beṇ' zej shli lao Chioza' na' ngooshosh yichje'ne', na' yog' beṇ' Israelka' nezgakile' zoe' chone' wen. Na' to anj che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'lono'ne'.

²³ Na'ch Pédrone' wlo'e legake' loo yoolá gana' zoe', na' bigaangake' shyel. Na' betiyo wyajlen Pédrone' legake' na' len to chop beṇ' Jope, beṇ' nonlilall' Jesúza'.

²⁴ Na' llana' sto bllingake' Cesareana'. Na' Cornéliona' ba btope' yog'lol dialla che'na' na' beṇ'ka' nllaguile', na' ba lle'gake' lille'na' chbezgake' illin Pédrone'. ²⁵ Na' ka bllin Pédrone' lill Cornéliona', lii bchejte Cornéliona' bchek' xibe'na' lawe'na' choe'laweene'. ²⁶ Na' Pédrone' bisolléene', chi'ene':

—Bizolla', bi wchekz' xibo' lawii, la' lekzka' beṇ'zə nad'.

²⁷ Na'ch shlak chshaljgake' wyoogake' loo yooná', na' ble'i Pédrone' beṇ' zan ba lle'. ²⁸ Na'ch golle' legake':

—Le' nezile ka na ley chento'na', neto' beṇ' Israel bi chiyaḷ' gonnto' txen le' bi nakle beṇ' Israel, na' ni bi chiyaḷ' sho'nto' loo yoo lill-le. Per Chioza' ba bzajniile' nad' bi chiyaḷ' gakid' zban nottez beṇ'. ²⁹ Daan ka bla' beṇ'ki

chne'gake' nad', lii za'tia' bi bchia' dill'. Na' naa cheenid' ine'zid' bi'che bse'loo ben'ki bidxi'gake' nad'.

³⁰ Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'. ³¹ Na' wne' nad': “Cornelio, Chioza' ba bzenague' daa choe'lwillo'ne', na' lekzka' chle'ile' ka chakleno' ben' yesh'ka'. ³² Na' bse'l' ben' shajgake' yell Jópena' lljxi'gake' Simón Pédrone' kwenche yide' we'lene' li' dill'. Zoe' lill to ben' le Simón, ben' chkoll yid, na' lill beeni zoan gaoz cho'a niso'da'.” ³³ Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrone' dill' lill Cornéliona'

³⁴ Na'ch wzolo Pédrone' bi'e dill', chi'e:

—Chakbe'id' naa, dii li Chioza' aga nakzi ben' chakile', ³⁵ san chle'shiile' yog' ben' lle' gattez yell kon shi chall chlebgake'ne' na' chongake' daa nak shli. ³⁶ Chioza' bse'lee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bse'lee Jesucristona', beena' nak Xan yog'lolcho. ³⁷ Nezkzile kwas'lol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis. ³⁸ Nezile Chioza' bi'e Jesús, ben' Nazareta', yel' wak na' Espíritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'. ³⁹ Neto' choe'nto' dill' che yog'te diika' ben' Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. ⁴⁰ Per Chioza' bisbane'ne' ladj ben' wetka' biyon llana', na' bidli'lawe' neto'. ⁴¹ Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj ben' wetka'. ⁴² Na' Jesúza' bse'lee neto' chixje'into' ben' nan Chioza' nzoe'ne' kwenche gone' yel' joschis che yog'lol ben', ka ben' mban na' ka ben' ba wit. ⁴³ Na' lekzka' kani'yi yog' dii ben'ka' wdixjee daa goll Chioza' legake' be'gake' xtil' Jesúza', wnagake' Chioza' yizi'xene' saaxya che nottezə ben' gonlilallee Jesúza'.

Wyo Espíritu Sántona' loo yichjall'do' ben'ka' bi nak ben' Israel

⁴⁴ Na' ni chshaljte Pédrone', kat' Espíritu Sántona' wyo'e loo yichjall'do' yog' ben'ka' chzenaggake' xtilleena'. ⁴⁵ Na' ben' Israelka' nonlilall' Jesúza', ben'ka' blinlin Pédrone' lill Cornéliona', bibangakile' daa wyo Espíritu Sántona' loo yichjall'do' ben'ka' bi nak ben' Israel. ⁴⁶ Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. ⁴⁷ Na' Pédrone' golle' ben' Israelka' lle' na':

—Aga no gak wilon wchoa ben'ki nisa', la' ba yoo Espíritu Sántona' loo yichjall'do'eka' ka ba yo'e cho'.

⁴⁸ Na' ben Pédrone' mandad wchoagake' nisa' daa chonlilall'gake' Xancho Jesucristona'. Na' biyolla' wñabgakile' Pédrone' kwenche biga'nlene' legake' chop shon lla.

11

Pédrone' golle' ben' Jerusalénka' ka gok

¹ Na' postlka' na' nochlə beŋ'ka' nonlilall' Jesúza' Judeana' bengakile' nan beŋ'ka' bi nak ben' Israel lekzka' chajle'gake' cho'a xtil' Chioza'. ² Na' ka billin Pédróna' Jerusalénna' gokdil-len xonj beŋ' le', beŋ'ka' che' chonan byen sho' beŋ' byoka' nonlilall' Chioza' seŋ daa le circuncisión la'kzi bi nakgake' beŋ' Israel. ³ Na' gollgake'ne':

—¿Biçhe wyoozo' loo yoo lill beŋ'ka' bi nak ben' Israel na' weej wdaolen-zgako'ne'?

⁴ Na'ch Pédróna' golle' legake' yog' ka gok, chi'e:

⁵ —Kana' ni zoa yell Jópena', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶ Na' ka bwiayenaa diika' lia loo lechaa, na' ble'id' lle' bayix' ba zoa tap ni'a na'b, na' no ba zña, no ba chxobi le'in lo yona', na' ba zoa xilin. ⁷ Na' benid' shii to beŋ' ne' nad': “Wzolla' Pedro, bet baka' na' wdao.” ⁸ Na' goshee: “Bi, Xan', ni tshii biŋ' gaw' baki bi nak ba xilall'.” ⁹ Na' sto shii benid' shii beena' ne' nad': “Daa ba wna Chioza' wak gawo' bich inazo' bi nakan xilall'.” ¹⁰ Gokte shon shii wne ka', na'tech biyep lech' xenna' yabana'. ¹¹ Na' shintg ble'do'id' diika' kat' bidse shonə beŋ' cho'a yoona' gana' zoa, zaake' yell Cesareana' ziddiljgake' nad'. ¹² Na' Espíritu che Chioza' wne' nad' bi gonçoplallaa sha'len' legake'. Na' lenkz beŋ' bish'choki xop wza'lengake' nad', na' yog'tento' wyoonto' lill Cornéliona'. ¹³ Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': “Bsel' to çop beŋ' yell Jópena' kwençhe lljxi'gake' beena' le Simón Pedro. ¹⁴ Na' le' ine' li' nakan gono' kwençhe yilaleno' beŋ'ka' lle' loo yoo lillo'na' bi kwiayi'le.” ¹⁵ Na' ka wzoloa' choe'lengakee dill', betj Espíritu Sántona' wyo'e loo yichjlall'do'eka', ka bidsoe' loo yichjlall'do'choki. ¹⁶ Na'ch jadinid' daa wna Xancho Jesúza' kana' wne': “Dii li Juanna' bchoe' beŋ' nis, san le', dii zak'chi gak çhele, daa yidsoa Espíritu Sántona' loo yichjlall'do'lena'.” ¹⁷ La' Chioza' bene' ka zoa Espíritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' çnora nak' nad' wllon' gon Chioza' daa cheenile' gone'?

¹⁸ Na'ch ka biyoll bzenag beŋ' Jerusalénka' nonlilall' Jesúza' dillaa be' Pédróna', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len beŋ'ka' bi nak beŋ' Israel ba be' Chioza' latj yiyaj yilengakile' dii malka' chongake' kwençhe gat' yel' mban çegake' zejli kaŋi.

Beŋ'ka' nonlilall' Jesúza' Antioquíana'

¹⁹ Na' beŋ' Israelka' nonlilall' Jesúza', beŋ'ka' bsheshlesgake' ka wde wit dii Estébanna', bałe' wyaj zit' ax̄t Feníciana', na' zi bałe' bllin Chíprena' na' zibałe' bllin yell Antioquíana'. Na' gana' bllin to toe' be'lengake' to beŋ' wlall che'ka'z xtil' Jesúza'. ²⁰ Per bał beŋ'ka' nak beŋ' Chipre na' beŋ' Cirene, ka bllingake' yell Antioquíana', wzologake' be'lengake' beŋ' bi nak beŋ' Israel dill' wen dill' kob che Xancho Jesúza'. ²¹ Na' yel' wak che Xanchona' wzoalenan legake', na' beŋ' zan wlej yichjgake' diika' nxenilall'gake' na' benlilall'gake' Xancho Jesúza'.

²² Na' beŋ'ka' nonlilall' Jesúza' Jerusalénna', ka wneçgakile' ba nonlilall' beŋ' Antioquíana' Jesúza', na' bsel'gake' Bernabéna' jawie' legake'. ²³ Na' ka blline' Antioquíana', ble'ile' ba goklençga Chioza' legake' na' le bibaile'. Na' btipche' lall' beŋ'ka' kwençhe soaçheçgake' gonlilall'gake' Xancho Jesúza' do yichj do lall'gake'. ²⁴ Na' beŋ' zanch benlilall'gake' Xancho

Jesúza', la' Bernabéna' nake' to beṇ' wen, na' chṇabia' Espíritu Sántona' le', na' le benlilallee Chioza'.

²⁵ Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. ²⁶ Na' wzoalengake' beṇ'ka' nonlilall' Jesúza' Antioquíana' twiz, na' bli' bsdgakile' beṇ' zan. Na' Antioquíana' dii nechdo' bsi'gake' beṇ'ka' nonlilall' Jesucrístona' "Cristianos".

²⁷ Na' do kana'kzə, baḷ beṇ'ka' chyixjee daa che' Chioza' legake' wza'gake' Jerusalénna' bllingake' Antioquíana'. ²⁸ Na' wzolla' toe', beena' le Ágabo, na' bi'e dill' ka ba bzajnií Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chṇabia' beena' le Claudio gana' mbani Rómana'. ²⁹ Na' beṇ' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' beṇ'ka' nonlilall' Jesúza' gana' mbani Judeana', gana' chi' wbinna'. ³⁰ Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao beṇ'ka' ngoo lall' na' beṇ'ka' nonlilall' Jesúza' Judeana'.

12

Betgake' Jacóbona' na' wloogake' Pédrona' lillyana'

¹ Na' do kana'kzə beṇ' wṇabia' Heródeza' beṇee baḷ beṇ'ka' nonlilall' Jesúza' kwenche wchi' wsakee legake'. ² Na' bchogloe' gueti Jacóbona' yesya, beena' nak beṇ' bish' Juanna'. ³ Na' ka gokbe'ile' bibayi beṇ'ka' chṇabia' beṇ' Israelka' daa bene' ka', na'ch lekzka' beṇee Pédrona' lo lṇi Paskwa' kana' chaogake' yetxtila' daa bi nchix' lewadúrana'. ⁴ Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gokile' yiyoll lṇi Paskwa' kweje'ne' lao beṇ' yellka' na' wchogloe' che' guete'. ⁵ Shlak nej Pédrona' lillyana', beṇ'ka' nonlilall' Jesúza' toshiizi be'lwilgake' Chioza' ni che'.

Chioza' bibeje' Pédrona' lillyana'

⁶ Na' lle'na' ka wxəzə kwej Heródeza'ne' kwenche wchogloe' che' guete', Pédrona' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'. ⁷ Na' tokonganzi bllin to anjl che Xancho Chioza' gana' de Pédrona' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. ⁸ Na'ch che' anjla'ne':

—Bikaacha li'ona' na' bilej xelo'na'.

Na' ben Pédrona' daa chi'ene', na'ch che' anjla'ne':

—Bixoa koloo xachelo'na', na' da dino' nad'.

⁹ Na'ch zjano Pédrona' anjla', ni bi nezile' shi ka chakkzan, kon gokile' chle'do'zilen'. ¹⁰ Na' bidegake' gana' lle' soldadka' shkwen, na' bide-tegake' gana' lle' beṇ'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédrona'. ¹¹ Kana'ch gokbe'i Pédrona', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non beṇ' Israelki lez gak cha'.

¹² Na' ka gokbe'ile' ba bicheje' lillyana', na' ziyaje' lill Mariana' xṇa' Juanna', beena' nsi'gake' Marcos. Na' lill Mariana' ndop nllag beṇ' zan choe'lwilgake' Chioza'. ¹³ Ka blline', na' wnie' cho'a leeja', na' bchej to bi'

noolə le Rode, jawiab' no beena' chñe. ¹⁴ Na' ka biyombia'b' shii Pédrona' chibachgaib', na' daa le chibaib' bikz bsaljb'. Zigaate jayellb' ben'ka' lle' loo yoonə' ba ze Pédrona' cho'a leeja'. ¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédrona' ni zie' chñie' cho'a leeja'. Na' ka bsaljgake' ble'gakile'ne', bibanchgagakile'. ¹⁷ Na'ch Pédrona' bene' to seņ kon neena' kwençhe soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' ben' bish'choka' ka ba ben Xanchona' çha'.

Na'ch bizee ziyaje' gan yoblə.

¹⁸ Na' ka wyeeni', wche' to ye'l' wban xen ladj soldadka' daa bi gokbe'gakile' nak gok bichej Pédrona'. ¹⁹ Na'ch Heródeza' bta bñie' ben'ka' biyiljgake'ne', na' bi billelgakile'ne'. Na'ch wñabile' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

²⁰ Heródeza' chllēe ben' Tíroka' na' ben' Sidónka'. Na' ben'ki gokgake' toz bshaljlengake' Blástonə', to wen llin zakii che Heródeza', na' bengakile'ne' wen kwençhe goklene' legake', la' byalljgakile' si'gake' dii yeej gaogake' gana' chñabia' Heródeza'. Na' Blástonə' bshaljlēne' Heródeza' kwençhe wxi'xene' che ben' Tíroka' na' ben' Sidónka' na' yizoalene' legake' wen sto shii. ²¹ Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' ben'. Na'ch jshie' gana' chçhogloe' che ben', na' bi'e dill' lao ben'ka' ndop nllag na'. ²² Na' shlak cho'e dill', na' besyaa ben'ka' che'gake':

—To chioza'n chñe, aga konte le beñaan.

²³ Na' anjl che Xancho Chioza' lii be'tie' Heródeza' to yillwe' wal benan ka chyin çhlall' beļ bzog'ka' loo li'ena' na' wite', daa bi'e latj wloo ben'ka' le' balaan daa chidoļ' toz beena' nak dowalj Chios.

²⁴ Na' dill' wen che Chioza' zej chlliljchan doxen.

²⁵ Na' Bernabéna' len Sáulona' ka wde bengake' daa chiyal' gongake' Jerusalénna', biza'gake' biyajgake' Antioquíana', na' bçhe'gake' Juanna', beena' lekzka' nsi'gake' Marcos.

13

Bernabéna' na' Sáulona' je'gake' cho'a xtill' Chioza' yell zit'ka'

¹ Na' ladj ben'ka' nonlilall' Jesúza' yell Antioquíana' lengake' ben' chyixjee daa che' Chioza' na' ben' chli' chsedi cho'a xtill' Chioza'. Na' legake' ben'ki: Bernabéna', Simónna', beena' che'gake' ben' gasj, Lúciona' ben' Cirénena', Sáulona' na' Manaénna', beena' bgol-len Heródeza' beena' wñabia' gana' mbani Galileana'. ² Na' to shii ka zoagake' wbasaa na' choe'la'ogake' Chioza' wñe Espíritu Sátona' legake', chi'e:

—Li wzoa Bernabéna' na' Sáulona' kwençhe gongake' xshin'na', la' ni çheyinnan' ba wlej' legake'.

³ Na' ka wyeelo be'llwillgake' Chioza' na' biyoll wzoagake' wbasaa, na' bçxoə neeka' yichj ben'ka' çhop, na'ch bsel'gake' legake' gana' lljengake' xshin Chioza'.

Páblona' na' Bernabéna' be'gake' cho'a xtill' Chioza' gana' le Chipre

4 Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lio Chíprena' daa llia lo niso'na'. 5 Na' ka wlez barkwa' cho'a yell Salamánana', bchejgake' na' wzologake' wdixje'gake' cho'a xtill' Chioza' to to gana' chdop chllag ben' Israelka' choe'llwillgake' Chioza'. Na' nche'gake' sto ben' le Juan kwenche gaklene' legake'. 6 Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to ben' Israel, beena' le Barjesús. Nake' to ben' willa', na' chziyee ben' chi'e nake' to ben' chyixjee daa che' Chioza' le'. 7 Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to ben' chajnií, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. 8 Na' ben' willa'na', nsi'gake'ne' Elimas (na' zevin ben' willa'), goklallee gone' ka bi shajle' ben' wñabia'na' che cho'a xtill' Chioza'. 9 Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiaýenee Elímaza', 10 na' golle'ne':

—iLi' ben' wxiye', ben' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'? 11 Na' ñaa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka' lii wchołtie', na' chgan chtobzile' chñabe' no yiyox' neena' daa bich chle'ile'. 12 Na' ka ble'i ben' wñabia'na' daa gok, na' wyajli'e, na' le bibanile' ka nak cho'a xtill' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa llia gana' mbani Pisídiana'

13 Na'ch Páblona' na' ben'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfíliana', na' Juan Márcona' bixonje' ziyaje' Jerusalénna'. 14 Na' Páblona' len ben'ka' chdalene' na', biza'gake' yell Pérgena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaañ ben' Israelka', wyajgake' gana' chdop chllaggake' choe'llwillgake' Chioza', na' jche'lengake' ben'ka'. 15 Na' ka biyoll blabgake' lat' ley che Chioza' na' zi lat' daa bzej dii ben'ka' wdixjee daa goll Chioza' legake', na'ch ben'ka' chgoo xñezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len ñaa.

16 Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia': 17 Chios, beena' nonlilall'cho cho' ben' Israel, wleje' dii xoxxto'choka' na' bene' ka wyangake' shlak wzoagake' Egiptona'. Na' bllin lla bibeje' legake' kon yel' wak che'na'. 18 Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb. 19 Na' bliiayee yellka' gall kwen lle' gana' mbani Canaánna' kwenche bi'e dii xoxxto'choka' yell-lio che'ka'. 20 Kan' gok lawi tap guiyoa yoo gashj yiz. Na'tech, bzoa' Chioza' ben'ka' wloo lall' na'gake' legake', axť nika bllin lla wzoa dii Samuela', beena' wdixjee daa goll Chioza'ne'. 21 Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis,

beena' gok xiin dia che dii Benjamínna'. ²² Na' ka bikwas Chioza' ye! wñabia' che dii Saúla', bizoe' dii Davina' inabi'e na' bi'e dill' che', wne': "Davina', xiin Isaina', nake' to ben' chon ka chazlallaa, na' ñezid' gone' yog' daa cheenid' gone'." ²³ Na' lo dia che dii Davina' golj Jesucristona', beena' wlej Chioza' kwenche yisle' cho' ben' Israel lawi dii mala' kon ka bchebe' gone'. ²⁴ Na' ka zi' solo Jesúsza' wli' wsedile' ben', dii Juanna' golle' yog' ben' Israelka' chiya! yiyaj yilengakile' xtoleeka' na' choagake' nisa'. ²⁵ Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': "Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa' gag' xmore' kwenche wlechi' xele'na'."

²⁶ Le' ben' bish', le' nakle xiin dia che dii Abrahamana', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiaiy'gake'. ²⁷ Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúsza'. Ni bi wyajni'gakile' diika' bzej dii ben'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwllgake'ne'. Na' daa wnagake' chiya! guet Jesúsza', billinin daa bzej dii ben'ka' be' dill' daa goll Chioza' legake'. ²⁸ La'kzi bibi dii mal billegakile' ben Jesúsza' dii gonan ka wchoglogake' witgake'ne', wñabgakile' Pilátona' gone' mandad witgake'ne'. ²⁹ Na'ch ka biyoll bengakile'ne' yog' daa nyoj lee cho'a xtil' Chioza' gag' che', na'ch biletjgake'ne' lee yag cruza' na' jakwash'gake'ne'. ³⁰ Na' Chioza' bilise'ne' ladj ben' wetka'. ³¹ Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee ben' wllal chechoka' xtilleena' ñaa.

³² Na' chyixje'into' le' dill' wen dill' kob che Jesúsza' daa bcheb Chioza' lao dii xozxto'choka'. ³³ Na' ñaa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúsza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin', na' ñaa, daa solo inabi'o na' inezi ben' nadaan nak' Xo'." ³⁴ Chioza' ba bi'e dill' yilise'ne' ladj ben' wetka' na' bichga guete', na' wne': "Dii li' gaklen' le' dii xen wal ka bcheb' lao dii Davina'." ³⁵ Na' lekzka' sto Salmo nan: "Bi wi'o latj gooll' iteb beli chen cha'ni, daa nak' lall' no'." ³⁶ Na' ñezicho dii Davina' goklene' dii xozxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xozxtoe'ka', na' gooll' bteb beli chen che'na'. ³⁷ Per kwerp che Jesúsza', beena' bisban Chioza' ladj ben' wetka', bi wlliaiy'n. ³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúsza'. ³⁹ Nottez ben' gonlilalleene' yiyake' ben' li' bezen' shao' lao Chioza'. Aga no yiyak ben' li' bezen' shao' lao Chioza' daa chone' daa na ley che dii Moisésza'. ⁴⁰ Na' li' wsak' kwenche ki gag' chele ka bzej dii ben'ka' be' dill' daa goll Chioza' legake' kani'yi, gana' nan:

⁴¹ Li' wwia, le' ben' wenle. Li' yibani.

Wllin lla kwiaiy'le daa bi chajle'le.

Llaki mbanle gon' to dii wal

dii bi shajle'le la'kzi shi no ina' le' ki gag'.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi nak ben' Israel wñabgakile'ne' we'lene' legake' cho'a xtil' Chioza' lla sabda' sto. ⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza',

janogake' Páblona' len Bernabéna'. Na' Páblona' len Bernabéna' gollgake' legake' chiya! soachehgake' gonlilall'gake' Chioza' daa le chakile' legake'.

⁴⁴ Na' ka bizoa xmanna' sto, llana' chombaan ben' Israelka', zi lat'z ki biya ben'ka' lle' yella' bdop kwenche wzenaggake' cho'a xtill' Chioza'.

⁴⁵ Na' ka ble'i ben' Israelka' ben' zan ndop nllag, na' gokxe'gakile' Páblona' na' wnegake' zban che dillaa cho'e, na' biya dii wnegake' che'. ⁴⁶ Na'ch Páblona' len Bernabéna' aga bllebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chido! le gon Chioza' ye! mban chele zejli kan, na' solochoklanto' naa wzajniinto'n ben'ka' bi nak ben' Israel. ⁴⁷ La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi nak ben' Israel.

Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

⁴⁸ Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnegake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' ye! mban chegake' zejli kan benlilall'gake' Jesúsza'. ⁴⁹ Ka' gok blilij cho'a xtill' Xancho Jesúsza' doxen na'.

⁵⁰ Na' ben' Israelka', ben'ka' bi wyajle'gake' che Jesúsza', wlooyel'gake' bal noolə wnia'ka', ben'ka' choe'la'o Chioza', na' ben' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'. ⁵¹ Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell Icóniona'. ⁵² Na' ben'ka' nonlilall' Jesúsza' wzoachgagake' mbalaz, na' Espíritu Sántona' wñabi'e loo yichjlall'do'eka'.

14

Bllin Páblona' len Bernabéna' Icóniona'

¹ Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'lwlllgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúsza', ka ben' Israel na' ka ben' bi nak ben' Israel. ² Na' ben' Israelka', ben'ka' bi goni shajle' che Jesúsza', wlooyel'gake' bal ben'ka' bi nak ben' Israel kwenche gokzbangakile' ben'ka' nonlilall' Jesúsza'. ³ Daan bigaan Páblona' len Bernabéna' Icóniona' ssha, na' be'gake' xtill' Xancho Jesúsza' na' bi bllebgake', la' nxenilall'gake' zolan Xancho Chioza' legake'. Na' Xanchona' goklene' legake' bli'gake' ye! wak che'na' kwenche gokbe'i ben' nan choe'gake' dill' li. ⁴ Na' ben' Icónioka' gokgake' choplə, bale' wda'gake' ben' Israelka' na' zi bale' wda'gake' Páblona' len Bernabéna'. ⁵ Na'ch ben' Israelka' bengake' txen ben'ka' bi nak ben' Israel na' gokgake' toz len ben' wñabia'ka', goklall'gake' yiya dii gongakile' Páblona' len Bernabéna' na' wllliagake' legake' yaj. ⁶ Na' ka wñezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lia gana' mbani Licaóniana'. ⁷ Na' lekzka' be'gake' dill' wen dill' kob che Jesúsza' na'.

Bllliagake' Páblona' yaj yell Lístrana'

⁸ Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'. ⁹ Na' chi'e chzenague' dillaa choe' Páblona'. Na'

Páblona' chwie'ne' na' gokbe'ile' chajli'e wak yiyon Chioza' le' kwenche' gak see. ¹⁰ Na'ch golle'ne' zillj:

—Wzolla'.

Na' lii wzolla'tie' na' gok wzee. ¹¹ Ka ble'i beñ' Lístraka' daa ben Páblona', wzolo chosyaagake' chñegake' xtilleeka' daa nak dill' Licaonia che'gake':

—jBa betj chios chechoka' gani zoacho na' chle'gakichone' ka benech'!

¹² Na' wñagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³ Na' bñoz che yoodo' che Júpitera', daa zoa katez choogake' yella', jwee goonka' na' nwa'lee legakb bga de yej, na' le', na' beñ'ka' ndop nllag na', goklall'gake' witgake' legakb kwenche' we'la'ogake' Páblona' len Bernabéna'. ¹⁴ Na' ka gokbe'i Bernabéna' len Páblona' bin gon beñ'ka', na' wzologake' bchez' xe'ka', la' chakgakile' dii mal nllaban chon beñ'ka'. Na' jsedogake' ladje'ka', na' wñegake' zillj, che'gake':

¹⁵ —Le' beñ'do', ¿berache chonzle ka? Lekzka' beñ' yell-lioz neto', ka le', na' ba bidnto' kwenche' wzajniinto' le' chiya'l' kwejyichjle diiki bibi zak' na' gonlilall'le Chios, beñ' yaa beñ' banna', beena' ben yabana', yell-lioni, na' nido'na', na' yog' dii de xan yabana', lo yell-lioni, na' loo nido'na'. ¹⁶ Kani'yi Chioza' bwialoze' che benecha' bengake' kon daa nazan chegake'. ¹⁷ Na' la'kzi bwialoze' ka bengake', bliile' legake' ye'l' wak che'na' kwenche'ka' gakbe'gakile' zoe'. La' len' chone' yeja' kwenche' chak dii chaz chaancho na' chat' dii cheej chaocho kwenche' soacho mbalaz.

¹⁸ Na' la'kzi Páblona' len Bernabéna' gollgake' ka', kani' goongakile' bi witgake' goonka' daa nan we'la'ogake' legake'.

¹⁹ Na' bllin bal beñ' Israelka' zaak Antioquíana' na' Icóniona', na' wlooyel'gake' beñ' Lístraka' kwenche' blligake' Páblona' yaja'. Na' daa gok-gakile' ba witen', na'ch bñobgake'ne' jadixjgake'ne' cho'a yella'te. ²⁰ Na' beñ'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

²¹ Na' lekzka' wdixjeegake' dill' wen dill' kob che Jesúza' yell Dérbena', na' beñ' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch Antioquíana'. ²² Na' to to yellka' gana' bidegake' btipgake' lall' beñ'ka' ba chajle' che Jesúza' kwenche' soachechgake' gonlilall'chgake'ne'. Na' gollgake' chiya'l' yizo yizakicho bittez dii yen ile'icho kwenche' gak lljazoalencho Chioza' gana' chñabi'e. ²³ Na' to to yellka' wlejgake' to chop beñ' koo lall' na'gake' beñ'ka' ba nonlilall'gake' Jesúza'. Na' wzoagake' wbas' be'llwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

²⁴ Na' wde Páblona' len Bernabéna' gana' mbani Pisídiana' na' bllingake' gana' mbani Panfíliana'. ²⁵ Na' be'gake' cho'a xtill' Chioza' yell Pérgena'. Na'ch biza'gake' ziyajgake' yell Atáliana'. ²⁶ Na' yell Atáliana' biyoogake' to loo barkw na' billingake' yell Antioquíana' gana' lle' beñ'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. ²⁷ Na' ka billingake' yell Antioquíana', btopgake' beñ'ka' nonlilall' Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che beñ'ka' bi nak beñ' Israel

kwenche benlilall'gake' Jesúza'. ²⁸ Na' Páblona' len Bernabéna' bigaangake' ssha yell Antioquíana' len ben'ka' nonlilall' Jesúza'.

15

Bidopgake' Jerusalénna' na' be'gake' dill'

¹ Shlak zoa Páblona' len Bernabéna' yell Antioquíana', bllin bal ben' za' Judeana' na' wzologake' bli' bsdgakile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen daa le circuncisión kwenche Chioza' wi'e yel' mban chegake' zejli kani. ² Na' Páblona' len Bernabéna' gokdil-lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche lje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³ Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza' ka ba wyanchga ben'ka' bi nak ben' Israel ba yoogake' lo xnez Chioza'. Na' ka beni ben'ki dga, le bigakile'.

⁴ Ka bllin ben'ki Jerusalénna', ben'ka' nonlilall' Jesúza' len ben'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. ⁵ Na' bal fariseoka' nonlilall' Jesúza' wzolla'gake' na' wnagake':

—Ben'ka' bi nak ben' Israel chonan byen sho'gake' sen daa le circuncisión ka solo gonlilall'gake' Jesúza', na' chiyal' gongake' ka na ley che dii Moiséza'.

⁶ Na' bdop bllag postlka' len ben'ka' ngoo lall' na'gake' ben'ka' nonlilall' Jesúza' kwenche wwiagake' naklæ ka sho' xnez dga. ⁷ Ba gok ssha chdil cho'a xtilleeka' ka wzolla' Pédróna' na' golle' legake':

—Le', ben' bishaa, ba nez kile kana' wlej Chioza' nad' ladjleni kwenche lji'a dill' wen dill' kob che Jesúza' lao ben'ka' bi nak ben' Israel kwenche gonlilall'gake'ne'. ⁸ Chioza', beena' nombi'e yichjall'do' yog' ben', bli'e nan chlebe' ben'ka' bi nak ben' Israel daa bselee Espíritu Sántóna' zoe' loo yichjall'do'eka' kon ka bene' checho. ⁹ Toz ka ba ben Chioza' checho na' che ben'ka', la' lekzka' ba biyib bixise' loo yichjall'do'eka' daa ba nonlilall'gake' Jesúza'. ¹⁰ Na' ¿berache bi chajle'le daa ba ben Chioza'?, na' ¿biche cheenile gon ben'ka' bi nak ben' Israel diiki? La' ni cho' ni dii xoxzto'choka' bin' sakicho gonchon. ¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yel' wakka' ladj ben'ka' bi nak ben' Israel. ¹³ Na' ka biyoll be' Páblona' len Bernabéna' dill', na'ch wne Jacóbona', golle':

—Le' ben' bish', cheenid' wzenagle dga inia' le': ¹⁴ Simón Pédróni ba bi'e dill' ka wzolo Chioza' wleje' ben' ladj ben'ka' bi nak ben' Israel kwenche gagkake' lall' nee. ¹⁵ Na' dga gok ka' chidil-lebin daa bzej dii ben'ka' wdixjee daa goll Chioza' legake' kani'yi, gana' nan:

¹⁶ Ka te dga, yiyed'

na' wzoa' to xiin dia che dii Davina' inabi'e.

La'kzi yel' wnabia' che'na' nakan ka to yoo dii ba biyinj,

wllin lla yichisa'n.

¹⁷ Gon' dga kwenc̄he yog' ben'ka' bin' gonlilall'gake' nad' yiyiljgake' nad', lente yog'lol ben'ka' bi nak ben' Israel, ben'ka' ba nak lall' na'.

¹⁸ Kan' wna Xancho Chioza', beena' bzajniile' ben'ka' diiki kani'teyi.

¹⁹ 'Na'chan nia' le', bi chiyal' ye'cho ben'ka' bi nak ben' Israel, ben'ka' ba nonlilall'gake' Chioza', gongake' dii bi chonan byen. ²⁰ Kon wzejcho to yish ye'chogake' bich gaogake' yel' wawa' daa chllia ben' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool ben'. ²¹ La' kani'teyi zoakzə ben' to to yell chzajni'gakile' ben' ley che dii Moiséza', na' lennan' ni chlabgake' naa gana' chdop chllaggake' choe'lwillgake' Chioza' yog' lla sabd.

Yisha' daa bsel'gake' lao ben'ka' bi nak ben' Israel

²² Na'ch postlka', na' yog' ben'ka' nonlilall' Jesúza' len ben'ka' ngoo lall' na' legake' bengake' toz dill' wlejgake' to chop ben' ladje'ka' kwenc̄he shajlengake' Páblona' len Bernabéna' Antioquíana'. Na' wlejgake' Judas, beena' lekzka' lie' Barsabás, na' Silaza', naggake' ben' mbejlawin ladj ben'ka' nonlilall' Jesúza'. ²³ Na' bsel'lengake' ben'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel na' zoale yell Antioquíana', na' doxen gana' mbani Siriana' na' Cilíciana', neto' postl na' ben'ki ngoo lall' na' ben'ka' nonlilall' Jesúza' Jerusalénni, na' yog' ben' bish'choki le' ni, chwapnto' le' chiox. ²⁴ Ba wnezinto' ba bchej to chop ben' ladjnto'ni bidgake' to bia'lall'zgake' gana' zoale, na' benllejgakile' le' daa wnagake' chiyal' sho'le sen daa le circuncisión, na' chiyal' gonle doxen ka na leya'. ²⁵ Daan, ba bennto' toz dill' wlejnto' ben'ki chop ladjnto'ni zidwiagake' le'. Na' chsel'lennto' legake' Pábloni na' Bernabéni, ben' bish'choki le' chakicho, ²⁶ ben'ki chzoa dii nxoll yel' mban che'ka' daa chongake' xshin Xancho Jesucristona'. ²⁷ Na' chsel'nto' ben'ki le' Judas na' Silas, na' legake' wzajni'gakile' le' dga chzejnto' le'. ²⁸ Na' wyazlall'nto' ka bzajni Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle: ²⁹ Bi gaole yel' wawa' daa chllia ben' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool ben'. Shi wzenagle diiki nannto' le', wenkzan chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bsel'gake' Antioquíana', na' btopgake' yog' ben'ka' nonlilall' Jesúza', na' be'gake' legake' yisha' daa nox'gake'. ³¹ Na' ka blabgake'n le' bibagakile' ka dillaa choe'n. ³² Na' ka nak Júdaza' na' Silaza', daa lekzka' naggake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³ Na' biyoll wzoalengake' legake' shloll wen, na'ch ben'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit ben'ka' bsel' legake'. ³⁴ Na' Silaza' wyazlallee igaane' na'z. ³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtill' Xancho Jesúza'.

Sto shii wyaj Páblona' yellka' gana' ba ji'e cho'a xtill' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che ben'ka' ba wyajle'.

³⁷ Na' Bernabéna' goklalee wche'gake' Juan, beena' lekzka' nsi'gake' Marcos. ³⁸ Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfílana', na' bich jenlene' legake' xshin Chioza'. ³⁹ Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'. ⁴⁰ Na' Páblona' wzee bchi'e Sílaza'. Na' ben'ka' lle' Antioquíana', ben'ka' nonlilall' Jesúza', wñabgatile' Xancho Chioza' gaklene' legake' gattezə shajgake'. ⁴¹ Na' Páblona' len Sílaza' wdegake' gana' mbani Síriana' na' Cilíciana' kwenche goklengake' ben'ka' nonlilall' Jesúza' wzoatip wzoashoshch-gake'.

16

Timotewa' bene' txen Páblona' len Sílaza'

¹ Na'ch Páblona' len Sílaza' bllingake' yell Dərbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakb' xiin to noolə Israel, na' nooli nonlilallee Jesúza', per xabaa nake' ben' griego. ² Na' ben' Lístraka' len ben' Icónioka' nonlilall' Jesúza' be'gake' dill' le wen nsa' cheb'. ³ Na' Páblona' wñabile'b' shajlem' legake', na' wlo'eb' sen daa le circuncisión kwenche bi' gakzbani ben' Israelka' leb', la' nezgakile' xabaa bi nake' ben' Israel. ⁴ Na' yog' yellka' gana' wdegake' be'lengake' ben'ka' nonlilall' Jesúza' dill' che diika' chiyał' gongake', diika' be' postlka' dill' kon ben'ka' ngoo lall' na'gake' ben'ka' nonlilall' Jesúza' yell Jerusalénna'. ⁵ Na'ch ben'ka' nonlilall' Jesúza' yellka' benlilall' chgake'ne' do yichj do lall'gake', na' lla kon lla wyanchgake'.

Ble'do'i Páblona' to ben' Macedonia chñabile'ne' shaje' lalle'na'

⁶ Páblona' len Sílaza' na' Timotewa' to wdezgake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'. ⁷ Na' ka bllingake' gaoz yell-lío gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. ⁸ Na'ch wdegake' yell-lío che Mísiana' bllinte-gake' yell Tróaza' daa llia cho'a nisdona'. ⁹ Na' lo yela' Chioza' bene' ka ble'do'i Páblona' to ben' byo, ben' Macedonia, zie' chat'yoile'ne', chi'ene': “Dagach Macedóniani kwenche gakleno' neto.” ¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajni-into' Chioza' cheenile' shajnto' llje'lennto' ben'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹ Na' yell Tróaza' wyoonto' barkwa' na' wyajnto' shlichá gana' llia to yell-lío lo nisdona' daa le Samotracia. Na' betiyo bllinnto' to yell dii le Neápolis. ¹² Na' wza'nto' Neápoliza' wyajnto' yell Filípoza'. Nakan to yell ga lle' ben' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla. ¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdop bllag. ¹⁴ Na' ladj noolka' len to ben' le Lidia. Nake' ben' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche

bzenague' dillaa choe' Páblona'. ¹⁵ Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúsza', li sho' na' yigaanle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'lwilgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin ben', na' dii xen chon xama' gan daa chneyaab'. ¹⁷ Na'ch bi'ni wnob' Páblona' shlak zejlennto'ne', chosyaab' zillj, nab':

—Ben'kin chongake' xshin Chioza', beena' nak ben' choo ben' xen, na' chzajni'gakile' ben' nez li che Chioza' gana' sho'cho kwenche bi kwiayi'cho.

¹⁸ Na'ch kon ka' wnaab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' wñabia' che Jesucristona' nia' li' bichej.

Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch bex'gake' Páblona' len Síłaza' na' jwa'gake' legake' lao joschiska'. ²⁰ Na' ka bllinlen-gake' legake' lao joschiska', na' che'gake':

—Ben' Israelki chta chnegake' ben', lallchoni. ²¹ Na' chli' chsedgakile' ben' dii bi chiyal' goncho ni bi chiyal' wlebcho, cho' nakcho ben' Roma.

²² Na' ben' zan bdi'a na' wnegake' zban che Páblona' len Síłaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³ Na' ka wde bet wdinggagake' legake', na' wloogake' legake' lillyana', na' goll-gake' beena' chap lillyana' gape' legake' byendad kwenche ki yilagake'. ²⁴ Na' daa gollgake' beeni ka', wlo'e legake' bill' xyoote na' bñi'e yen ni'eka' to lee kwag' dii nyidjgake'.

²⁵ Na' do ka chel Páblona' len Síłaza' choe'lwilgake' Chioza' na' cholgake' choe'la'ogake'ne', na' ben'ka' sto de lillyana' chzenaggake' ka chongake'.

²⁶ Na' tokonganzi wde to bedxo' xen wal na' bñiban doxen lillyana'. Na' lii byaljen, na' n' gdenka' diika' nchejgake' ben'ka' de lillyana' tolazzin biyellgakan. ²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' ben'ka' de lillyana' ba billeshgake'. ²⁸ Na' Páblona' besyee, golle'ne':

—jBibi goni kwino'! Nikz lle' yog'nto'.

²⁹ Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Síłaza', na' lii bchek'te xibe'na' lawe'ka' do chxizze' daa le bllbe'. ³⁰ Na' lii bibejtie' legake' lillyana', na' chi'e:

—¿Le', ben'do', beran chiyal' gon' kwenche bi kwiayaa?

³¹ Na' gollgake'ne':

—Ben'lilalloo Xancho Jesucristona', li' na' do xiin xoolo', kwenche yisle' le' na' bi kwiayi'le.

³² Na' be'lengake' le' na' ben'ka' zoa lille'na' cho'a xtill' Xancho Jesúsza'. ³³ Na'ch beena' chap lillyana' wdibe' we'na' lliagake', la'kzi nakan wal chel. Na' lekzka' yog'loitie' lii wchoategake' nisa'. ³⁴ Na' bichi'e Páblona' len Síłaza' lille'na' na' bweej bwawe' legake'. Na' le chibayi beeni do xiin xoolo' daa ba nonlilall'gake' Chioza'.

³⁵ Na' ka wyeeni', joschiska' bsel'gake' beñ' jellgake' beena' chap lillyana' yisane' legake' kwenche yiyajgake'. ³⁶ Na' beena' chap lillyana' golle' Páblona':

—Ba bsel' joschiska' beñ'ki, na' nagake' ba de lsens yisan' le'. Na' wak yiyajle naa, kochno bi goni le'.

³⁷ Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' beñ' na' wdxjzgake' neto' lillyani. ¿Ana' naa cheenzgakile' yisangake' neto' do ngash'zə? Yidch kwingake' yibejgake' neto'.

³⁸ Na' jayellgake' joschiska' daa goll Páblona' legake', na' joschiska' le bblebgake' ka wnezgakile' Páblona' len Sílaza' ndegake' kwent ka beñ' Roma. ³⁹ Na'ch wyaj joschiska' jaye'xengake' Páblona' len Sílaza' na' bibejgake' legake' lillyana', na' got'yogakile' legake' bich yigaangake' yella'. ⁴⁰ Na' ka bichej Páblona' len Sílaza' lillyana', na' biyajgake' lill Lídiana' jawiagake' beñ'ka' ba nonlilall' Jesúza' na' btipchgake' lall'gake', na'tech biza'gake'.

17

Bta bne beñ' malka' beñ' Tesalónicaka'

¹ Na' ka biza' Páblona' len Sílaza', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yooná' gana' chdop chllag beñ' Israelka' choe'lwillgake' Chioza'. ² Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza', ³ bzajniile' legake' Crístona', beena' wlej Chioza' inabi'e, benan byen biya dii wxak'zi'e na' wite', na' bibane' ladj beñ' wetka'. Na' chi'e legake':

—Jesúza', beena' choe'len' le' xtilleena' naa, len' Crístona', beena' wlej Chioza' inabi'e.

⁴ Na' bal' beñ' Israelka' wyajle'gake' na' bengake' txen Páblona' len Sílaza', na' lekzka' zan beñ' griegoka', beñ'ka' ba choe'la'ogake' Chioza', wyajle'gake' che Jesúza', na' lekzka' zan noolka' zakii. ⁵ Na' beñ' Israelka' bi wyajle', gokxe'gakile' Páblona' len Sílaza', na' btopgake' beñ' wdallagka' nak beñ' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' beñ' yellka'. ⁶ Na' daa bi zoa Páblona' len Sílaza' na', na'ch wdoyogake' Jasónna' na' zi to chop beñ'ka' nonlilall' Jesúza' na' jwa'gake' legake' lao joschiska'. Na' wnegake' zillj che'gake':

—Beñ'ka' chda chbekgake' dii zed doxen yell-lioni ba bla'gake' yell chechoni. ⁷ Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto beñ' wñabia' le Jesús.

⁸ Na' beñ' yellka' len joschis che'ka' blaagake' na' gokllesh'gakile'. ⁹ Na' wxenlall' joschiska' bllia Jasónna' mech len beñ'ka' nakgake'ne' txen, na'ch bisangake' legake'.

Páblona' len Sílaza' wyajgake' Bereana'

¹⁰ Na' kon ka gol, beñ'ka' nonlilall' Jesúza' bisa'dogake' Páblona' len Sílaza' kwenche yiyajgake' yell Bereana'. Na' ka bllingake' yella', lii wyajtegake' gana' chdop chllag beñ' Israelka' choe'lwillgake' Chioza'. ¹¹ Na' beñ'

Bereaka' nakchgake' beṇ' wench aga ka beṇ' Tesalónicaka', na' bibagakile' bzenaggake' daa bzajnií Páblona' len Síłaza' legake'. Na' yog' ıla biyiljgake' lee Cho'a Xtill' Chioza' shi nakan ka daa chli' chsedgakile' legake'.¹² Na' zan beṇ' Israelka' zoa na' benlılall'gake' Jesúza' na' ka'kzə zan beṇ' griegoka', ka beṇ' byoka' na' ka noolka' zakii. ¹³ Na'ch beṇ' Israelka' lle' Tesalónicana', beṇ'ka' bi benlılall' Jesúza', ka wnezgakile' Páblona' choe'lene' beṇ' Bereaka' xtill' Chioza', na'ch wyajgake' jata jaṇegake' beṇ' yellka'.¹⁴ Na' beṇ'ka' nonlılall' Jesúza' lıi bsel'tegake' Páblona' cho'a nısdona'la, na' Síłaza' len Timotewa' bigaangake' Bereana'zə. ¹⁵ Na' beṇ'ka' zejlen Páblona' jwa'gake'ne' gana' lıiate yell Aténaza'. Na' ka zi yıza'gake' yiyajgake' Bereana', Páblona' golle' legake' ye'gake' Síłaza' len Timotewa' wıtalall'gake' shajgake' gana' zoe'.

Páblona' zoe' yell Aténaza'

¹⁶ Na' shlak chbez Páblona' Síłaza' len Timotewa' yell Aténaza', ıe bıllaa yıchje' daa ble'ile' to ni to na' nzoa beṇ' Aténaska' diika' choe'la'ogake'.¹⁷ Ni cheyi daan bzajniile' beṇ' Israelka' gana' chdop chllaggake' choe'ıwillgake' Chioza', na' len zi xonj beṇ' griego. Na' lekzka' yog' ıla wyaje' gana' chak yaana' gana' lle' ıla beṇ' na' be'lene' legake' dill'.¹⁸ Na' baı epıcúreoka', beṇ'ka' chsedgake' daa bıli' bseıi beena' wle Epicúreo, len baı estóıcoka', wzologake' wdıı xıllıleeka' len Páblona'. Na' baıe' che':

—¿Beran naz beeni chshaljchgue'?

Na' zi baıe' nagake':

—¿Aaga beenin zıdye'lene' cho' dıllaa daa nan chıyal' we'la'ocho sto chıos yoblə?

Wnagake' ka' daa chyıxje'ı Páblona' legake' dill' wen dill' kob che Jesúza', chí'e legake' bıbane' ladj beṇ' wetka'.¹⁹ Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bılinlengake'ne', che'gake':

—Cheeninto' inezinto' bı dii koban chli' chsedılo'.²⁰ La' ndantekzi nak dill'kı choo, na' cheeninto' inezinto' bı zejın.

²¹ La' yog' beṇ' Aténaska' na' lekzka' beṇ' zit'ka' zoa na', bıchkszə bılə chongake', to chınozgake' bı dill' kob wzenaggake' na' to xtıllıi daazə choe'gake' yog' ıla.

²² Na'ch Páblona' wzıe' ladje'ka' gana' nzi' Areópago, na' golle' legake':

—Le' beṇ' Atenas, chakbe'id' ıe chıbaıle choe'la'ole diika' noni chıos chele. ²³ La' ba ble'id' yell chełeni to to latj gana' chgoole diika' balaan, na' ble'id' to ga da' to dill' dii na: “Che Chıos, beena' kono nombia'.” Na' beena' chgoole balaan ıa'kzi bı nombia'lene', dill' che'nan' zıdye'len' le' ınaa.

²⁴ 'Chıos, beena' ben yell-lıoni na' yog' dii de lawınna' nake' Xan yabana' na' yell-lıoni. Aga zoe' ıoo yoodo' dii chıni ni'a na' beṇ'.²⁵ Na' aga bı chyalljı Chioza' dii ınacho gak gon beṇ' yell-lıona' che'. La' len' nonıe' yell' mban che yog'ıolcho, na' nonıe' bıshbe checho, na' yog' bı dii de checho.

²⁶ 'Len' bıxe bısele' to beṇ' yell-lıo, na' yog'ıolcho cho' nakcho xıın dia che beena' bıxe bısele', na' ıe'kze' ba nllıe' bıa' baı yız soacho yell-lıoni na' gana' soa to tocho. ²⁷ Na' bzoe' cho' yell-lıoni kwenche yıyıljcho nakan goncho gombia'chone'. Na' dii ıı gal' gllın zelen Chioza' to tocho, ²⁸ ıa' len' chone' ka mbancho na' ka chzo chdacho. Kan' bzej baı beṇ' sın' cheleka', beṇ'ka' wnagake': “Nakcho xıın Chioza'.”²⁹ Na' daa nakcho xıın Chioza', bı chıyal' gakıcho nake' to beṇ' de or, de plat, de yaj, de yag, ka chaljıall'

ben'ka' chongake' diiki. ³⁰ Kana'teyi Chioza' bwialoze' ben ben'ka' daa nazan chegake' yel' bi chajni che'ka', per naanlla chone' byen yog'lol ben' lle' doxen yell-lioni yiyaj yilengakile'. ³¹ La' Chioza' ba blie' bia' to lla gone' yel' joschis che to to ben' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj ben' wetka'.

³² Na' ka bengakile' wna Páblona' Chioza' chisbane' ben' ladj ben' wetka', bale' bxillgake', na' zi bale' gollgake'ne':

—Sto llagalə wzenagnto' cho' cheyi dga choo dill'.

³³ Na' biza' Páblona' gana' lle' ben'ka'. ³⁴ Na' bal ben' bengake'ne' txen na' ben'ilall'gake' Jesúza'. Na' ladje'ka' len to ben' lie' Dionisio, beena' len ben'ka' zakii chdop latja' nzi' Areópago, na' lekzka' sto noolə lie' Dámaris, na' sto chop ben' yoblə.

18

Biyaj Páblona' yell Coríntona'

¹ Ka wde biza' Páblona' yell Aténaza', na' biyaje' yell Coríntona'. ² Na' ka billine' Coríntona' billague' to ben' Israel lie' Aquila. Na' beeni nake' ben' yell Ponto na' nool che'na' lie' Priscila. Zi' blinzgake' Coríntona' biza'gake' gana' mbani Itáliana', la' Claudiona', ben' wñabia'na', bisheshe' yog' ben' Israelka' Rómána' gana' zoe'. Na' Páblona' jawie' legake', ³ na' daa nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaaw yoo. ⁴ Na' yog' lla sabd, Páblona' chaje' gana' chdop chllag ben' Israelka' choe'lwillgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

⁵ Na' Sílaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e. ⁶ Per wzololəgake' chakdil-lengake'ne' na' wñegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkzan wlliyi' kwintle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷ Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'lwillgake' Chioza'. ⁸ Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiin xoolə wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'. ⁹ Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtillaana' lao ben'ki na' bi so' llizə. ¹⁰ Nad' zoalen' li', na' bi wi'a latj no bi goni li', la' ben' zan zi' gombia'gake' nad' yelli.

¹¹ Na' bigaan Páblona' Coríntona' twiz yoo gashj bli' bsdile' ben' cho'a xtill' Chioza'.

¹² Na' kana' chñabia' beena' le Galión gana' mbani Acáyana', ben' Israelka' gokgake' toz bex'gake' Páblona' na' bche'gake'ne' gana' chon Galiónna' yel' joschisa'. ¹³ Na' che'gake' Galiónna':

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómána' daa chñabia' cho'.

¹⁴ Ka nan ine Páblona', lii wñete Galiónna' ben' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'. ¹⁵ San shi chaole xya che dill' daa cho'e, na' daa chzetje' le ben', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

¹⁶ Na' bibeje' legake' gana' chone' yel' joschisa'. ¹⁷ Na'ch yog' ben' griegoka' bex'gake' Sósteneza', beena' chgoo xnezin cheyi diika' chon ben' Israelka' gana' chdop chllaggake' choe'lwilgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' ben'ka' nonlilall' Jesúza' na' bizee kwenche shaje' gana' mbani Síriana'. Na' Priscilana' len Aquilana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. ¹⁹ Ka bllingake' yell Éfesona', Páblona' bikwaanze' Priscilana' len Aquilana', na' wzee wyaje' gana' chdop chllag ben' Israelka' choe'lwilgake' Chioza' na' be'lene' ben'ka' dill'. ²⁰ Na' ben'ka' ndop nllag na', wñabgatile' Páblona' yigaanlenche' legake', na' Páblona' bi goonile'. ²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw. ²² Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'. ²³ Na' bigaane' shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtill' Chioza' Éfesona'

²⁴ Na' do kana' bllin to ben' Israel Éfesona' lie' Apolos, ben' golj yell Alejandríana'. Na' chak cho'e dill' lao lkwe' ben', na' le nsede' Cho'a Xtill' Chioza'. ²⁵ Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bsedi Juanna' che daa chchoa ben' nisa'. ²⁶ Na' Apóloza' bi bllibe' bi'e dill' che Jesúza' gana' chdop chllag ben' Israelka' choe'lwilgake' Chioza'. Na' ka beni Priscilana' len Aquilana' ka chli' chsedi Apóloza', na'ch biche'gake'ne' kwenche bzajni'chgakile'ne' kwaslöl ka nak xnez Chioza'. ²⁷ Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexee che ben'ka' nonlilall' Jesúza' na', kwenche wlebgake'ne'. Na' ka blline', le goklene' ben'ka' ba biyesh'lallii Chioza' kwenche nonlilall'gake' Jesúza'. ²⁸ Na' bli' bsedile' ben' nan klelan chajni' ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na' Jesúza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' llia ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e bal' ben' ba nonlilall' Jesúza'. ² Na' wñabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' beñ'ka' gollgake'ne':

—Ni bi nezinto' shi zoa Espíritu Sántona' beena' no' ka'.

³ Na'ch Páblona' wizñabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' ben' chiyal' choagake' nisa' daa wli'n ba biyaj bilengakile' na' lekzka' golle' legake' chiyal' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶ Na' ka bxoá na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'. ⁷ Na' beñ'ki gok cheyin ka' nakgake' ka do shllin.

⁸ Na' wzoa Páblona' Éfesona' shon beo' bli' bsdile' ben' Israelka' gana' chdop chllaggake' choe'lwillgake' Chioza' na' bi bllebe'. Na' be'lenche' beñ'ka' dill' kwenche wyajni'gakile' ka chñabia' Chioza' loo yichjlall'do' beñ'ka' nonlilall'gake'ne'. ⁹ Na' bal beñ'ka' nak beñ' lall'do' wal aga goon-gakile' shajle'gake', na' biya dii wngake' lao lkwe' ben' che nez li nez shao' che Jesucristona'. Na'ch biza' Páblona' kwite'ka', na' bichi'e beñ'ka' ba nonlilall' Jesúza', wyajlene' legake' lill to beñ' le Tirano dii nak ka yoo skwel gana' chdi'a beñ', na' bli' bsdchile' legake' yog' lla. ¹⁰ Gokte chop yiz bli' bsdile' legake', na' yog'lol beñ'ka' lle' doxen Ásiana' bengakile' xtill' Xancho Jesúza', ka beñ' Israel ka beñ' griego. ¹¹ Na' Chioza' bchine' Páblona' kwenche bene' yel' wak xen dii benan ka bibanchgayi beñ'. ¹² Na' axt no bachyichj, no lech' chjatigake'ne' na' chiyox'gake'n ga de beñ' bi shao' na' chiyakgakile', na' lekzka' chichej dii xiwaa yoo beñ'.

¹³ Na' bal beñ' Israelka' chdagake' to to yell chibejgake' dii xiw'ka' yoo beñ', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to beñ' Israel le Esceva, beena' nak to wñabia' che bxoazka'. ¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶ Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷ Na' yog' beñ'ka' zoa Éfesona', ka beñ' Israel ka beñ' bi nak beñ' Israel, wnezgakile' ka gok che beñ'ka', na' le bllebgake' na' wloochgake' Xancho Jesúza' balaan.

¹⁸ Na' zan beñ'ka' ba nonlilall'gake' Jesúza' jaxoadol'gake' lao lkwe' beñ' ka nak dii malka' ba bengake'. ¹⁹ Na' zan beñ'ka' blan yel' willa'na' jwa'gake' libr che'ka' daa bsdgake' na' bzeygake'n lao yog' beñ'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat. ²⁰ Ka' gok bllilch xtill' Xancho Jesúza' na' beñ' zanch benlilall'gake'ne' daa gokbe'gakile' xtill' Chioza' nsa'n yel' wak xen.

²¹ Na' ka wde gok yog' diiki, Páblona' b̄choglallee shaje' lljawie' beṅ'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiyal' shaa Rómána'." ²² Na'ch bselee Timotewa' na' Erástona' Macedóniana', beṅ'ki ch̄op chaklengake'ne', na' le' bigaane' Ásiana' zi shloll wen.

Bta b̄ne Demétriona' beṅ' Éfesoka'

²³ Na' got' to dii zed wal Éfesona' daa chli' chsedi Páblona' che nez li nez shao' che Jesucrístona'. ²⁴ Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len beṅ'ka' chonlengake'ne' llinna'. ²⁵ Na' btope' beṅ'ka' chonlene' llinna' na' yog' beṅ'ka' n̄langake' llin ka daa, golle' legake':

—Nezile llin dga n̄lancho dii xen chkwaan̄an checho. ²⁶ Na' ba chen chle'ile ka chon beena' le Pablo, chde' chzajniile' beṅ' wllal chechoki na' doxen gani mbani Ásiani, chi'e aga bi zakii lwaa lsak' dii chon beṅ' kwenche we'la'ozgake'n. Na' beṅ' zan ba chzenaggake' che'. ²⁷ Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak beṅ' choo beṅ' xen. Na' beeni choe'la'o yog'zə beṅ' lle' gani mbani Ásiani na' beṅ' lle' doxen yell-lioni, gongakile'ne' ka to beṅ' bibi zakii.

²⁸ Ka goll Demétriona' legake' ka', le bllaagake' na' besyaagake', nagake':

—iBeṅ' choo beṅ' xen nak xnax Diana chechona', cho' beṅ' Éfeso!

²⁹ Na' yog'l̄ole' gokgake' toz, wlekgake' dii l̄chix wal yella', na' bex'gake' ch̄op beṅ' Macedonia, toe' le Gayo, na' stoe' le Aristarco, beṅ'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'. ³⁰ Na' Páblona' gokile' sho'e ladj beṅ'ka' ndop nllag na' kwenche nan we'lene' legake' dill', per beṅ'ka' non̄l̄ilal' Jesúza' aga be'gake' latj sho'e. ³¹ Na' lekzka' ladj jos̄chis che beṅ' Ásiaka' len beṅ' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' beṅ'ka'.

³² Na' beṅ'ka' ndop nllag na' chosyaagake', wde wdeli dii na to toe'. Na' zan beṅ'ka' len ladjeka' ni bi nēzgakile' biche lle'zgage' na'. ³³ Na' bal' beṅ' Israelka' bllig'gake' Alejándrona' lao beṅ'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'. ³⁴ Na' ka ble'gakile'ne' na' gokbe'gakile' nan beṅ' Israelan, na'ch bizologake' chosyaagake', nagake':

—iBeṅ' choo beṅ' xen nak xnax Diana chechona', cho' beṅ' Éfeso!

Ka do ch̄op gor besyaagake' che'gake' ka'.

³⁵ Na'ch beena' nak sikriban che yella' bzoe' legake' llizə. Na'ch golle' legake':

—Le' beṅ' wllal, yog' beṅ' yell-lio nēzgakile' cho' beṅ' Éfeso chido'cho gap wwiacho yoodo' che xnax Diana chechona', beena' nak beṅ' choo beṅ' xen. Na' nēzgakile' lwaa lsakeena' za'n yabalə, ³⁶ na' ni to kono gak in̄a aga kan' nakan. Na' li soa llizə kwenche bi gonle to dii bi chiyal' gonle. ³⁷ Ka nak beṅ'ki ba bidwa'le ni, bi in̄acho ba wlangake' bi de loo yoodo' chechona', ni bi in̄acho ba wnegake' zban che xnax Diana chechona'. ³⁸ Na' shi Demétrioni na' beṅ'ka' chonlengake'ne' llinna' de dii chak chegake' kon nottezə beṅ', daan chi' beṅ'ka' ch̄choglogake' che beṅ'

na' wak shajgake' lawe'ka' kwenche gongake' yel' joschis che'ka'. ³⁹ Na' shi bichlā dii cheenile gak, chiya' yitopcho yog'lo' ben' yell na' we'chon dill'. ⁴⁰ La' ka nak dga gok naa, nxoll ina ben' to cho'zan chta chnecho ben' yell, na' zbera inacho shi ba chnabgakile' cho' che dga ba gok naa?

⁴¹ Ka wde golle' legake' ka', na' bisheshe' legake'.

20

Biyaj Páblona' Macedóniana' na' Gréciana'

¹ Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúza' na' be'lene' legake' to chop dill' dii gакnenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ² Na' bidie' to to yellka' lia Macedóniana' na' be'lene' ben'ka' nonlilall' Jesúza' zan dill' dii btipan lall'gake'. Na' biyolla' billine' Gréciana', ³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'la. ⁴ Na' ben' zan zejlengake' Páblona' Ásiana'. Ladje'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dérbena'; Timotewa', na'ch Tíquicon'a' len Trófimona', ben' Ásiaka'. ⁵ Na' yog' ben'ki wllialogake' laonto'na', na' wlezcake' neto' yell Tróaza'. ⁶ Na' ka wde lni Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez ben'ka' neto'. Na' wzoanto' na' gall la.

Billin Páblona' yell Tróaza'

⁷ Na' ka bllin lla dmiwa', lla nech che xman'a', bdop bllagnto' weej wdaonto' txen len ben'ka' nonlilall' Jesúza', na' Páblona' bli' bsedile' legake'. Na' daa ba nakan yizee yetiyo, axt chelch wyeelo be'lene' legake' dill'. ⁸ Na' ndop nllagnto' to loo yoo dii lia shkvia cha'la, na' nakan bido yi'zi. ⁹ Na' to bi' wew' lliab' cho'a ventanna', na' leb' Eutico. Na' daa bshaljlen Páblona' ben'ka' ssha, be'kza bishgala' leb' na' bxopb' cho'a ventan che yoo de shon kwiana' gana' lliab', na' ka billisgake'b' ba witb'. ¹⁰ Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' ben'ka':

—Bi illeble; mbankzba'n.

¹¹ Na'ch biyep Páblona' dii yoblā, bxoxje' yetxtila' na' wdaogake'n. Na'tech bizoloe' choelene' legake' dill' ni ka wyeeni'teyi. Na'ch bizee. ¹² Na' ka billesh ben'ka', chibagakile' biche'gake' bi' wewaa shi'a shbam'.

Biza' Páblona' Tróaza'

¹³ Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. ¹⁴ Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. ¹⁵ Na'ch biza'nto' Mitilénena', na' betiyo bidento' gaozā yell-lío Quíona' daa lia lo nisdo'na'. Na' gok lillj billinnto' yell-lío Sámzoza' daa lia lo nisdo'na', na' llana' sto wyajchnto' yell Milétona'. ¹⁶ Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusaléna' daa ba zoa gal' lni Pentecostéza'.

Billag Páblona' ben'ka' ngoo lo na'gake' ben'ka' nonlilall' Jesúza' Éfesona'

¹⁷Na' ka zoanto' Milétona', Páblona' bselee rson na' goxe' beñ'ka' ngoo lo na'gake' beñ'ka' nonlilall' Jesúza' Éfesona'. ¹⁸Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. ¹⁹Ba wzoal' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' beñ' Israelka' nad'. ²⁰Na' aga ni che ka' bsan' bich wnia' le' daa chiya! inezile, san bli' bsedchkzid' le' gana' chdop chllagle na' ka'kzə lill to tole. ²¹Ka beñ' Israel ka beñ' bi nak beñ' Israel, be' lengakee dill' nan chiya! yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. ²²Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'. ²³Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'. ²⁴Na' aga bi chakid' cheyi diika' gak cha', la' aga llialo yel' mban cha'ni, san llialote yiyoll gon' yog'lol daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

²⁵'Na' ba bzajniid' le' ka chon Chioza' chnabi'e loo yichjall'do' beñ' chonlilalleene', na' naa ni stole le' bich ile'ile nad' yell-lioni. ²⁶Daan nia' le' naa, aga bi dol' nap' shi nole kwiayi'. ²⁷La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. ²⁸Na' li wsak', li gap wwia beñ'ka' nakle txen, la' Espíritu Sántona' wleje' le' kwenche gap wwiale beñ'ka' nonlilall' Xancho Jesúza', beñ'ka' biya'o bizi'lene' xchene'na' daa blalje' lee yag cruza'. ²⁹La' nezid' kat' bich soalen' le' na' yid beñ' gonllejgakile' le' kwenche kwej yichjle daa nonlilall'le' Jesúza'. Gongake' ka ba znia, ba hjatao xil'do' che beñ'. ³⁰Na' ladjlena' ichej beñ' wli' wsedile' le' daa bi nak shli kwenche gonlene' txen. ³¹Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

³²'Na' naa, chon' le' lo na' Chioza' len cho'a xtilleena' daa na le' chakile' cho'. La' lannan' napan yel' wak kwenche gaklenen' le' soachehle gonlilall'lene'. Na' ka' lljazoalenlene' txen len yog' beñ' nakgake' lall' nee. ³³Nezkzile bibin' selallaa chele, ni xmechle, ni xalaanle, ni bichlə dii napple. ³⁴Na' nezkzile ni'a na'ni benlen' llin kwenche bllelid' bi dii byalljlenid' beñ'ki chonlengake' nad' xshin Chioza'. ³⁵Ben' llinna' kwenche bliid' le' ka chiya! gaklencho beñ' kat' bi chyalljgakile'. La' chiya! lljadinicho xtill' Xancho Jesúza' kana' wne': "Mbalazch soacho shi we'cho beñ' bi we'chone', aga ka daa ikaacho bi dii gone' cho'."

³⁶Na' ka biyoll be'len Páblona' legake' dill', na'ch bchek' xibe'ka' be'llwillgake' Chioza'. ³⁷Na' yog'gake' wchell, na' wdel'gake' Páblona' na' bnopgake'ne'. ³⁸Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

¹Na' ka bilaanto' beñ' Éfesoka', na'ch biyoonto' loo barkwa' ziyajnto' shlich'a yell-lío Coza' daa llia lo nisdona', na' betiyo billinnto' yell-lío Ródaza' daa llia lo nisdona', na' biza'nto' billinnto' yell Pátarana'. ²Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. ³Na' ka zejnto' loo barkwa' ble'into' yell-lío Chíprena'

daa llia lo niso'da' na' na' to wdeznto' shlaana'lə zejnto' yell Tírona' daa llia gana' mbani Síriana'. Na' ka billin barkwa' Tírona', biłetjgake' yoa'na' noa'n na' biyetjnto'. ⁴ Na' jadjlnto' be'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'. ⁵ Na' ka gok to xman biza'nto'. Na' yog' be'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a niso'da', bçhek' xibnto' be'lwllnto' Chioza'. ⁶ Na'ch bilaa lıjwellnto' dill', na' biyoonto' loo barkwa', na' be'ka' biyajgake' lill che chegake'.

⁷ Na' biza'nto' Tírona' billinnto' yell Tolemáidana', na' bwapnto' chiox be'ka' nonlilall' Jesúza' na', na' bigaanlennto' legake' shlla. ⁸ Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen be'ka' gall chaklengake' postlka', na' bigaannto' lille'na'. ⁹ Na' zoa tap bi' nool wew' che', na' chyixje'gakb' daa che' Chioza' legakb'. ¹⁰ Na' ka ba gok shon tap lla zoanto' lille'na', na' bla' to be' Judea lie' Ágabo, be' chyixjee daa che' Chioza' le'. ¹¹ Bidwie' neto' na' wñabe' xpachlee Páblona' na' bichej ni'a na' kwine', na' chí'e:

—Ba bzajnií Espíritu Sántona' nad' ne' be' wllalka' lle' Jerusalénna' wçhejgake' ni'a na' xan bachleeni ka ba nçhej' ni'a na'ni, na' gongake'ne' lo na' be'ka' bi nak be' Israel.

¹² Na' ka beninto' wna Ágabona' ka', neto' len be' Cesareaka' got'yointo' Páblona' bi yiyaje' Jerusalénna'. ¹³ Na' Páblona' wne' neto':

—Bi kwell-le çha', bi gonle ka gakyeshid'. Zoakz' wtił' diika', aga toz daa wçhejgake' nad', san wakte witgake' nad' daa nonlilallaa Xancho Jesucrístona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúza'.

¹⁵ Na' ka wde, bisini'a çhento' kwençhe biza'nto' ziyajnto' Jerusalénna'. ¹⁶ Na' bał be' Cesareaka' nonlilall' Jesúza' wza'lengake' neto'. Na' bçhe'gake' neto' lill to be' le Mnasón, gana' yigaannto'. Beeni nake' be' Chipre na' ssha ba gok nonlilallee Jesúza'.

Páblona' jawie' Jacóbona' Jerusalénna'

¹⁷ Na' ka billinnto' Jerusalénna', le chibayi be'ka' naknto' txen nonlilall'nto' Jesúza'. ¹⁸ Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' be'ka' ngoo lo na'gake' be'ka' nonlilall' Jesúza' Jerusalénna'. ¹⁹ Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj be'ka' bi nak be' Israel. ²⁰ Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', be' bish', ñezkzilo' be' zan wal inleeb be' Israelka' ba nonlilall'gake' Jesúza', na' yoguee nagake' chonan byen goncho daa na leya'. ²¹ Na' ba bengakile' rson ka chono', na' nagake' chzajniilo' yog' be' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' se' daa le circuncisión, na' bich gongake' daa yoolocho choncho. ²² ¿Nakra gonchon, lla? La' lii idop illagte be' kat' ñezgakile' ba biyedo'. ²³ Wajlja gonon' ki: Ladjnto'ni zoa tap be' nçhebe' to dii nçhebe' lao Chioza', na' chonan byen wdelazgake' daa nçhebgake'.

24 Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya' bia'. Na' shi gono' ka, yog' ben' inezgakile' bi nakan ka nagake' cho', na' gakbe'gakile' lekzka' chzenago' daa na leya'. 25 Na' ka nak ben'ka' bi nak ben' Israel na' ba nonlilall'gake' Jesús'a', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiyal' gongake': bi gaogake' yel' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni xpel' bana' bi wlatj xchema', na' bi inelenzgake' xiin xool ben'.

Bex'gake' Páblona' yoodo'na'

26 Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' b'xozka' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

27 Na' ba zoa iza'a gall lla chongake' daa chiyal' gongake' kwenche yixi yiyechgake', na' bal ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'. 28 Na' wnegake' zilljə che'gake':

—Le', ben' Israel, li' gaklen neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zhan wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

29 Wnagake' ka' daa ba ble'gakile' Trófimona', to ben' yell Éfeso, chdalone' Páblona' txen Jerusalénna', na' gokgakile' lekzka' bche' Páblona'ne' yoodo'na'.

30 Yog'z ben' lle' yella' bllesh bcheengake' zejdogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'. 31 Na' ba llagdia'gake' Páblona' cheengakile' wittekgake'ne' ka bllin dillaa lao ben' wñabia' che soldadka' nan chak dane nllib doxen yell Jerusalénna'. 32 Na' lii btoptie' soldadka' na' ben'ka' ngoo lall' na' legake' na' wyajdogake' gana' lle' ben'ka'. Na' ben'ka' chit Páblona' ka ble'gakile' ben' wñabia'na' len soldad che'ka', na'ch bsangake' bich bet wdingake'ne'. 33 Na'ch jabig' ben' wñabia'na', na' bexee Páblona' na' bene' mandad bchejgake'ne' chop gden. Na'ch wñabile' ben'ka' no beena' na' bin bene'. 34 Na' ben'ka' kon chosyaagake' na' chiya dii na to toe', na' bi wyajni ben' wñabia'na' daa zi'te chongake' sshag. Na'ch bene' mandad biche' soldadka' Páblona' gana' zoagake'. 35 Na' ka bllingake' cho'a shkwiaka' lle' cho'a lill soldadka' benan byen bñen soldadka' Páblona' daa zej ben' Israelka' cheengakile' wñizgake'ne'. 36 Na' ben' zan nogake'ne' chosyaagake', che'gake':

—iLii wittegue'!

Páblona' cho'e dill' lao ben' Israelka'

37 Na' ka ba zoa lljloogake' Páblona' gana' zoa lill soldadka', na'ch golle' ben' wñabia'na':

—¿Awak we'len' li' to chop cho'a dill'?

Na' ben' wñabia'na' golle'ne':

—¿Achako' dill' griegona'? 38 ¿Aaga lin' ben' Egíptona' beena' wzoshyi' ben' wñabia'ka' kani batzə, na' bchi'e tapa mil ben' wen xyaka' latja' gana' bibi chashj chleb'?

39 Na'ch goll Páblona'ne':

—Aga le' nad'. Nad' nak' to ben' Israel, ben' yell Tarso dii nak to yell xen gana' mbani Cilíciana'. Ben goklen be' latj we'len' ben'ki dill'.

40 Na' ben' wñabia'na' bi'e lsens. Na'ch wze Páblona' lo shkwiaka' na' bze neena' lawé'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtil'gake', chi'e:

22

1—Le' ben' bish', na' le' ben' gol, li wzenag dill' cha'ni wi'a.

2 Na' ben'ka', ka bengakile' chñe Páblona' dill' hebrewa' na' wlle'gake' llizə. Na' Páblona' chi'e legake':

3—Nad' nak' ben' Israel na' golj' yell Társona' gana' mbani Cilíciana', per bgol' Jerusalénni, na' bli' bsedi maestro Gamaliela' nad' kwasloj ka na ley che dii xozxto'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' naanlla. 4 Na' bchi' bsakaa ben'ka' ba wyoo lo nez li nez shao' che Jesucristona' na' goklallaa guetgake'. Na' bexaa ka nool ka ben' byo, na' wlo'a legake' lillyana'. 5 Beena' nak bxyz choo bxyz xen na' yog' ben' golka' chñabia' ben' Israelka' nezgakile' ka ben'. Na' legake' bengake' nad' yish daa bexaa ka wzaa zyaa yell Damáscona', gokid' lljexaa yog'loj ben'ka' nogake' xtil' Jesucristona' na' yiche'gakee Jerusalénni kwenche sak'zi'gake'.

*Be' Páblona' dill' ka gok ben'li'laltee Jesúza'
(Hch. 9:1-19; 26:12-18)*

6 Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. 7 Na' to wzoatishz' lo yona'. Na'ch benid' shii to ben' wne' nad': "Saulo, Saulo, ¿berache chchi' chsak'zo' nad'?" 8 Na' wñabidee, chepee: "¿No li, ben'?" Na' wne': "Nadaan Jesús, ben' Nazareta', beena' chchi' chsakoo." 9 Na' ben'ka' zyaalen' txen ble'gakile' yi'na' daa wyalj na' bllebgake', per aga bengakile' daa wna beena' nad'. 10 Na'ch goshee: "¿Beran chiya' gon', Xan'?" Na' wne' nad': "Biyas na' wyaj Damáscona', na' na' inagake' li' yog' daa chiya' gono'." 11 Na' beeni' wala' bcholán nad', na' ben'ka' zyaalen' txen biyox'gake' na'na' na' bche'gake' nad' Damáscona'.

12 Na' Damáscona' zoa to ben' le Ananías, na' zoe' chone' yog' daa na leya', na' yog' ben' Israelka' zoa Damáscona' nagake' che' nake' to ben' chon dii wen. 13 Na' Ananíaza' bide' bidwie' nad', na' ka blee, wne' nad': "Saulo, ben' bish', naa yile'ilo' sto shii." Na' kate wne' ka', lii bile'teid', na'ch gok ble'idee. 14 Na'ch wne' nad': "Chioza', beena' be'la'o dii xozxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozí ben' wen, na' benteilo' kwine'n ba bshaljlene' li'. 15 Na' li' wi'o xtilleena' doxen yell-lioni, na' we'leno' ben' dill' yog'loj diika' ba ben ble'ilo'. 16 Na' naa, bibi wsej wllonan choatego' nisa' na' wñabi Xancho Jesúza' yisol yin'ite' saaxya cho'ka'."

17 Na' ka biyed' Jerusalénni, wyaa yoodo'na' je'llwill' Chioza', na' Chioza' bene' ka ble'do'id'. 18 Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtilleena' daa we'lengako'ne'." 19 Na'ch chepee: "Xan', legake' nezgakile' ka wya' to to gana' chdop chllagnto' choe'llwillnto' Chioza' jexaa ben'ka' nonlilal' li', na' bet wdíngakee na' biche'gakee ni, bsejgakee lillyana'. 20 Na' kana' betgake' dii Estébanna' beena' be' xtilloona', len' bi'a latj betgake'ne', na'

wdap' xa beṇ'ka' bet le'." ²¹ Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beṇ'ka' bi nak beṇ' Israel xtilaana'."

Páblona' goke' lo na' beṇ' wṇabia' che soldadka'

²² Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol biṇittegue' yell-lioni! ¡Aga chiyaḷ' soach ka le'!

²³ Na' bikzə bsangake' chosyaagake' daa le chllaagake'. Axt no xe'ka' chzaḷ'gake' ka'lə na' no bishte yona' chashgake'n chzaḷ'gake'n cha'lə. ²⁴ Na' beṇ' wṇabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa beṇ'ka' le'. ²⁵ Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to beṇ' nde kwent Rómana' la'kzi biṇ' yiyiljyoll-le bin bene'?

²⁶ Na' ka goll Páblona' xan soldadka' ka', na'ch jelle' beṇ' wṇabia' che'ka':

—Wsak'shkilo', nde beeni kwent yell Rómana', na.

²⁷ Na' beṇ' wṇabia' che soldadka' wyaje' kwit Páblona' na' wṇabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

²⁸ Na'ch beṇ' wṇabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

²⁹ Na' daa goll Páblona' ka', beṇ'ka' nan wit chingake'ne' lii bikwastegake' kwite'na'. Na' axt beena' chṇabia' soldadka', ka gokbe'ile' Páblona' ndie' kwent yell Rómana', le bblebe' daa bene' mandad bchejgake'ne' gdenka'.

Bzegake' Páblona' lao beṇ'ka' chṇabia' beṇ' Israelka'

³⁰ Na' betiyo, beṇ' wṇabia' che soldadka' btope' bṁozka' chṇabia' na' yog'lol beṇ'ka' chṇabia' beṇ' Israelka'. Na' bselle' gdenka' daa nchej ni'a na' Páblona', na' wleje'ne' bzie'ne' lao beṇ'ka' daa cheenile' inezile' biḥe chao beṇ' Israelka' xya che'.

23

¹ Na'ch Páblona' bwie' beṇ'ka' chṇabia' beṇ' Israelka' na' golle' legake':

—Le' beṇ' bish', nezi yichjlall'dawaani axt naa chon' daa chazlall' Chioza'.

² Na'ch Ananíaza', beena' nak bṁoz choo bṁoz xen, golle' beṇ'ka' ze kwit Páblona' kwall'gake' cho'ena'. ³ Na' Páblona' golle'ne':

—¡Chioza' wit chine' li', wxiye'! Li' chi'oni kwenche yiya yiyiljo' nad' kon ka na leya', per chyishjo' daa na leya' daa beno' mandad wlall'gake' cho'ani.

⁴ Na'ch beṇ'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak bṁoz choo bṁen che Chioza'?

⁵ Na'ch Páblona' golle' legake':

—Le' beṇ' bish', bi neqid' shi len' bṁoz choo bṁoz xenna'. Sheḷ'ka' neqid', aga goshee ka', la' Cho'a Xtill' Chioza' nan: "Bi inio' zban to beṇ' wṇabia' che yell cho'na'."

6 Na' Páblona' gokbe'ile' beñ'ka' chñabia' nakgake' chop kwenlə. Baļe' nak txen saduceoka' na' baļe' nak txen fariseoka'. Na'ch wñie' zillj chi'e:

—Le' beñ' bish', nad' nak' fariseo na' naktia' xiin fariseo. Na' chaole xya cha' daa non' lez yiban beñ' wetka'.

7 Ka goll Páblona' ka' na' gok to wishesh wal ladj fariseoka' len saduceoka'. Na' gokgake' choplə. 8 La' saduceoka' nagake' aga wibanch beñ' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beñ' wetka'. 9 Na' yog'gake' besyaagake' choe'gake' wde wdeli dill'. Na'ch wzolla' baļ beñ'ka' chli' chsedi leya' nakgake' txen fariseoka', na' che'gake':

—Ni to dii mal biñ' gon beeni. Shera shi to beñ' bi gak ile'icho wa to anjlan' ba wñie' le'. Bi chiyal' soshi'cho Chioza'.

10 Na' daa zi'telə gokdiļ-len ljuwell beñ'ka', bxolli beñ' wñabia' che soldadka' wxoxj wtingake' Páblona'. Na'ch wñie' soldadka' yibejgake' Páblona' ladje'ka' na' lljaloogake'ne' dii yoblə gana' zoa lille'ka'.

11 Na' llana' sto ka goļ, bli'lao Xancho Jesús'a Páblona' na' golle'ne':

—Bendiplaloo Pablo, ka ba be'kzo' xtillaana' Jerusalenni, ka'kzan chonan byen lljeno' Rómána'.

Chgoogake' xnezin witgake' Páblona'

12 Na' betiyo baļ beñ' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak biñ' witgake'ne'. 13 Wdeli choa beñ'ka' wloo cho'agake' witgake' Páblona'. 14 Na'ch wyajgake' lao bxożka' chñabia' na' lao beñ' gol che'ka' chñabia' beñ' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' biñ' witnto' Páblona'. 15 Na' le' nakle beñ' wñabia' chento', li' gak toz na' li inabi beñ' wñabia' che soldadka' kweje'ne' wxę na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

16 Na' bi' che beñ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. 17 Na' Páblona' wñie' to beñ' nak xan to guiyoa soldadka', golle'ne':

—Jwa'gach bi'ni lao beñ' wñabia' che soldadka', la' de to dii ye'b' le'.

18 Na' xan soldadka' jweeb' lao beñ' wñabia' che yog' soldadka', na' golle'ne':

—Páblona', beena' nej lillyana', wñabile' nad' yidwa' bi'ni lawo'ni, la' de to dii inab' li' na.

19 Na' beñ' wñabia' che yog' soldadka' bexee na' bi'na', na' bchi'eb' ga kono lle'. Na'ch wñabile'b':

—¿Beran cheeniło' ino' nad'?

20 Na' bi' xkwidaa gollb' le':

—Beñ' Israelka' ba gokgake' toz kwenche inabgakile' li' kwejo' Páblona' wxę na' wsełoone' lao beñ'ka' chñabia' legake', na' wda'tezgakile'n yiyiljyollgake' berakzan bene'. 21 Na' bi shajli'o chegake', la' wdeli choa beñ'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' biñ' guete'. Na' ba chbezgake' gono' ka cheengakile'.

22 Na'ch beñ' wñabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao ben' wñabia'na' le Félix

²³ Na'ch ben' wñabia' che soldadka' wñie' chop xan soldad che'ka' na' bene' mandad wzenagakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyogake' shajgake' ñi'azgake', na' giyonshigake' kwiagake' kabay na' zi chop guiyogake' gox'gake' lanza. ²⁴ Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix'a', beena' chñabia'. ²⁵ Na'ch bgox̄ee legake' to yish dii na ki:

²⁶ "Si'xengacho' ben' wñabia' Félix, nad' Claudio Lisias chzej' li', na' chwap' li' chiox. ²⁷ Ka nak beeni chselaa lawo'na', ben' Israelka' bex'gake'ne' na' ba zoa witgake'ne' shel' ki nad' jasla'ne' len soldad cha'ka', la' wñezid' ndie' kwent yell Rómana'. ²⁸ Na' daa goklallid' ñezid' berache chaogake' xya che', jwaane' lao ben'ka' chñabia' ben' Israelka'. ²⁹ Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. ³⁰ Na' ka wñezid' ben' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' ben'ka' chao xya che' yidgake' lawo'na' na' ñagake' li' bin chaklen chegake' Pábloni. Ka'tz dii nia' li'."

³¹ Na'ch soldadka' lle' na' bche'gake' Páblona' zejlengake'ne', bllinlente-gake'ne' yella' le Antípatris kon ka goll ben' wñabia' che'ka' legake'. ³² Na' betiyo, soldadka' zej' ñi'azgake' bibiigake' ziyajgake' Jerusalénna'. Na' ben'ka' lliia kabayka' zejlengchake' Páblona'. ³³ Na' ka bllingake' Cesareana', be'gake' ben' wñabia'na' yisha' nox'gake' na' bengake' Páblona' lo nee. ³⁴ Na' ka wde blab ben' wñabia'na' yisha', na'ch wñabile' Páblona' ga benaan. Na' ka wñezile' Páblona' nake' ben' yell Tarso, daa lliia gana' mbani Cilíciana', ³⁵ na'ch golle'ne':

—Na' wzenagshkid' bin ino' kat' yid ben'ka' chao xya cho'.

Na'ch bene' mandad lljasejgake'ne' yoon'a' ben dii Heródeza', gana' chzoa ben' wñabia'ka'.

24

Be' Páblona' dill' lao Félix'a'

¹ Gok gay' lla zoa Páblona' Cesareana' ka bllin b̄ox̄oz choo b̄ox̄oz xenna', beena' le Ananías, na' n̄chi'e bał ben' golka' chñabia' na' kon to ben' wide dill', ben' le Tértulo. Na' bllingake' lao beena' chñabia' kwenche gaogake' xya che Páblona'. ² Na'ch bdegake' Páblona' lao ben' wñabia'na' le Félix' na' wzolo Tértulona' chawe' xya che', chi'e:

—Choḡkeno' li', ben' wñabia', zoanto' mbalaz na' chak wen chento' lallnto'ni daa chak koo x̄nezi yog'lolte kon yell' sin' cho'na'. ³ Na' daan, gattez zoanto' toshiizi nanto' li' choḡkeno' dii zan las, li' ben' wñabia'. ⁴ Na' kwenche bich wshayinto' li', chñabinto' li' gono' goklen wzenago' to chop ka nak dga ñanto' li'. ⁵ Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta chñie' ben' kwenche neto' ben' Israel gaknto' chopla, na' ngoo lo nee xonj ben' chonlilall' to ben' Nazaret. ⁶ Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'. ⁷ Na' wyaz ben' wñabia' che soldadka', beena' le Lisias, na' bigoyoe'ne' lo na'nto'na'. ⁸ Na' wne' neto' chiyal' yidnto' lawo'ni kwenche gaonto' xya che'. ⁸ Na' kwino' ñaa, wak ñabilo' Pábloni kwenche ñezilo' biche chaonto' xya che'.

9 Na' beŋ' Israelka' lle'lengake' na', bischopgake' dillaa che'gake': "Ka nakannan'." 10 Na'ch beŋ' wŋabia'na' bene' seŋ' lao Páblona' kwenche wi'e dill', na'ch wzolo Páblona' chi'e:

—Nezid' ba gok zan yiz chono' yeŋ' joschis che beŋ'ki lle' gani mbanilo'. Daan chibaid' wi'a dill' daa chak cha' lawo'ni. 11 Zi' gok shllin' lla billin' Jerusaléna' jaye'lawaa Chioza', na' shi cheenilo' gakiyilo'n, wak inabo' kwenche xenlalloo ka nakannan'. 12 Na' kono ble'i nad' chakdil'-len' beŋ' wa chbekw' wdil' wishesh ladj beŋ', ni loo yoodo'na' ni gan yoblə ga chdop chllagnto' choe'lwillnto' Chioza' ni gachli yella'. 13 Na' ka nak diiki na beŋ'ki cha', ni ton bi gongake' gan inagake' ka nakannan'. 14 Lete to dii wchəb' lawo'ni choe'lawaa Chioza', beena' be'la'o dii xozxto'nto'ka', kon ka nak nez li nez shao' che Jesucristona' daa yo'a, daa na beŋ'ki bi zejan shli. Per chajli'a yog' daa na ley che Chioza' na' diika' bzej dii beŋ'ka' wdixjee daa golle' legake'. 15 Na' ka beŋ'ki chao xya cha' na' ka nad', toz ka nonnto' lez yisban Chioza' beŋ' wetka', ka beŋ' wen ka beŋ' mal. 16 Daan chon' byen yixi yiyech yichjall'dawaani, la' cheenid' bibi dol' gap' lao Chioza' ni lao beŋ' yell-lioni.

17 'Ba gok zan yiz chda' yell zit'ka', na' billin' Jerusaléna' kwenche wi'a mech dii gaklenan beŋ' wlall cha'ka'na' lekzka' wi'a bi dii wi'a yoodo'na'. 18 Na' diikin chon' ka biyoll bixi biyech' kon ka na leya', kat' to chop beŋ' Israel, beŋ' zaak Ásiana', ble'gakile' nad' yoodo'na'. Aga no beŋ' ntop nshag' na' ni to wdil' wishesh bi mbek'. 19 Legaken' chiyal' yidgake' ni gaogake' xya cha' shi bin ble'gakile' chon'. 20 Wa beŋ'ki zoa ni, inashkigake' shi bi dii mal billelgakile' cha' kana' jwa'gake' nad' lao beŋ' wŋabia' chento'ka'. 21 ¿Awa shi daa besyaa goshgakee: "Chaozle xya cha' daa chajli'a wllin lla yiban beŋ' wetka'?"

22 Na' ka biyoll beni Félix'a wna Páblona' ka', na' bsane' bich bene' yeŋ' joschis che'na', la' ba wnezile' nakan nak diika' chajle' beŋ'ka' yoo lo nez li nez shao' che Jesucristona'. Na' golle' beŋ'ka':

—Kat' yid Lísiaza', beena' chŋabia' soldadka', kana' inezyen'id' nakran nak dga chak chele.

23 Na'ch Félix'a' golle' xan soldadka' wseje' Páblona', per bi wllone' sho' beŋ'ka' nombia' le' na' llje'gake'ne' bi dii chyalljile'.

24 Na' ka wde chop shon' lla, bizllinlen Félix'a' xooole'na' le Drusila, to nool Israel. Na'ch ben Félix'a' mandad bllin Páblona' lawe'ka' kwenche wzenaggake' dillaa daa cho'e daa ne' chiyal' gonlilall'cho Jesucristona'. 25 Na'ch be' Páblona' dill' chi'e chiyal' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félix'a' xtilleena', le bllebe'. Na'ch golle' Páblona':

—Ba gokz to kat', na' kat' gat' latj cha'na' inia' li' dii yoblə.

26 Félix'a' lekzka' goklallew' we' Páblona' le' mech kwenche yisane'ne'. Daan zekizezi wŋie'ne' kwenche be'lene'ne' dill'. 27 Ka'z wde chop yiz, na' ka bichej Félix'a' bich wŋabi'e na' wyoo to beŋ' yoblə lie' Porcio Festo. Na' kwenche ile'shii beŋ' Israelka' Félix'a', bi bisane' Páblona'.

25

Páblona' bi'e dill' lao Féstona'

1 Na'ch ka bllin Féstona' Cesareana' kwenche inabi'e, na' wzoe' shon' lla. Na'tech wzee wyaje' Jerusaléna'. 2 Na' bxoza' chŋabia' na' nochlə beŋ'ka'

chnabia' ben' Israelka' ka wnezgakile' ba blline' Jerusalénna', na'ch jtagake' xya che Páblona' lawe'na'. ³Na' wñabgakile'ne' gone' to goklen yiselee Páblona' Jerusalénna' kwenche gak yel' joschis che'na'. Gollgake'ne' ka daa goklall'gake' witgake'ne' tneza'. ⁴Per goll Féstona' legake':

—Cesareana'zkæ yigaan Páblona', na' aga chllach yiyaa na'læ.

⁵Na' golle' legake':

—Ben'ka' chñabia' le' chiyal' sa'lengake' nad' Cesareana' kwenche gaole xya shi bi dii malan bene'.

⁶Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'. ⁷Na' ka wyoo Páblona' gana' chi' Féstona' lii wbig'te ben' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'. ⁸Na'ch Páblona' bzoa rson che', chi'e legake':

—Nad' ni tlish' dii mal bin' gon', ni bin' chishj' ley chento'na' neto' ben' Israel, ni bin' wnit' balaan che yoodo' chento'na', ni bigan' inia' zban che Césara' beena' chñabia'.

⁹Na' daa goklall' Féstona' ile'shii ben' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'læ?

¹⁰Na' Páblona' chi'ene':

—Ba zia' lawo'ni, na' ben' wñabia' Césara' ba nzoe' li' ni kwenche gono' yel' joschis, na' nin chiyal' gak yel' joschis cha'na'. Nezkzilo' aga bi ben' che ben' wllal' cha'ki. ¹¹Shi ba ben' dii chon ka chidolaa guet', wakkzæ guet'. Per shi bibi ben' che ben'ki' chao xya cha', kono gak gon nad' lo na'gake'. Na' chñab' wdio' nad' lao ben' wñabia' Césara' kwenche kwine' gone' yel' joschis cha'na'.

¹²Na'ch Féstona', ka wde be'lene' dill' ben'ka' chaklen le' chone' yel' joschisa', na'ch chi'e Páblona':

—Ba wñabo' tio' lao ben' wñabia' Césara' kwenche gone' yel' joschis cho'na', na' wselaa li' lawe'na'.

Páblona' bi'e dill' lao ben' wñabia' Agrípana'

¹³Na' gok chop shon' lla na'ch blin ben' wñabia' Agrípana' len Berenícena' yell Cesareana' jawapgake' Féstona' chiox. ¹⁴Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben' Félix'a yel' joschis che'na'. ¹⁵Ka wya' Jerusalénna', ben' wñabia' che bñozka' na' ben' golka' chñabia' ben' Israelka' wdaogake' xya che' lawa'na', goklall'gake' wchogbi'a guete'. ¹⁶Na' gosh'gakee ka choncho cho' ben' Roma, aga lii wchogbia'tezcho guet to ben' shi bi sie' wzoa rson che' lao ben'ka' chao xya che'. ¹⁷Daan, ka bid ben'ka' bidtao xya che', bi bshe'ida'n, san betiyo'z lii bentia' wneyi jxi'gake'ne' kwenche gon' yel' joschis che'na'. ¹⁸Na' ben'ka' bidtao xya che', ni tlish' diika' wza'lallaa bene' bi wñagake'. ¹⁹Daa zeelo nagake' che', nlla'læ chajli'e che Chioza' na' chde' cho'e dill' che to ben' wle Jesús, beena' ba wit, na' le' ne' mbankze'. ²⁰Na' daa bi ne'zid' nak gon' yel' joschis che ben'ki, wñabid' le' shi cheenile' yiza'lene' nad' Jerusalénna' kwenche gak yel' joschis che'na' na'. ²¹Per Páblona' wñabe' tie' lao César Augústona' kwenche gone' yel' joschis che'na', na' ben' mandad shejze' axt kat'ch gak wselaa'ne' Rómana'.

22 Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

23 Na' betiyo bllin Agrípana' lega ben' zakii, len Berenícena' na' len bal ben'ka' chñabia'gake' soldadka', na' ben'ka' mbejlawin yella'. Na'ch Féstona' bselee ben' jxi'gake' Páblona'. 24 Na' wne Féstona', chi'e:

—Li' ben' wñabia' Agripa, na' yog'le le' lle'le ni, ka nak beeni ze ni, yog' ben' Israelka', ka ben' lle' Jerusalénna' na' ka ben' lle' Cesareani, chaogake' xya che', na' chongake' byen chogbi'a guete'. 25 Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wñabe' tie' lao César Augústona' kwenche gone' yel' joschis che'na', na' ba bcheb' wdia'ne' na'lə. 26 Per bi chillelid' bin ben Pábloni kwenche wzej' César'a' yepée bin bene'. Daan ba nzia'ne' laoleni na' lawo'nien'kzə li', ben' wñabia' Agripa, kwenche inabollychone' bin bene', na' ka' wllia' lee yisha'. 27 La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

26

Páblona' bzoe' rson che' lao Agrípana'

1 Na' Agrípana' golle' Páblona':

—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

2 —Li' ben' wñabia' Agripa, mbalaz wal chakid' daa gak wzoa rson cha'ni lawo'ni che yog' diika' chao ben' Israelka' xya cha'. 3 La' nezkzilo' ka yoolo neto' ben' Israel chonnto', na' lekzka' che dil' chix chento'ka'. Daan chñab' gapgacho' yel' chxenlall' na' wzenaggacho' ka nak dga inia' li' naa.

4 'Yog'lol' ben' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'. 5 Na' lekzka' nezgakile' toshiizi nak' toz fariseoka', ben'ka' chzenagchgage' che ley che dii Moiséza' aga ka nochlə ben' yoblə. Na' wak yizi' cho'agake'n shi gueengakile'. 6 Na' naa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'. 7 Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na' daa non' lez gak daa bcheb Chioza', daan chao ben' Israelki xya cha', li' ben' wñabia'. 8 ¿Berache bi chajle'le wak yisban Chioza' ben' wetka'?

Páblona' bi'e dill' ka bsak'zi'e ben'ka' nonlilall' Jesúza'

9 'Lekzka' nad' gokid' chiyal' wsak'zi'a ben'ka' nonlilall' Jesús, ben' Nazareta'. 10 Na' ka' ben' Jerusalénna'. Na' bxoza' chñabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lekzka' len' chakid' kan' chiyal' gak. 11 Zan shii wya' gana' chdop chllagnto' choe'lwllnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasad'zi'gakee.

Sto shii be' Páblona' dill' ka gok blla' yichjlall'do'ena'

(Hch. 9:1-19; 22:6-16)

12 'Na' lekzka' nan lljenid' ben'ka' nonlilall' Jesúza' yell Damáscona', na' bxoza' chñabia' bsel'gake' nad' na' bengake' lsens lljasak'zi'gakee. 13 Na' ki gok cha', li' ben' wñabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbill'a', na' wyechjan nad' len

ben'ka' zyaalen'. ¹⁴Yog'tento' wzoatishnto' lo yona', na'ch nad' benid' shii to ben' wnie' nad' dill' hebreo, ne': "Saulo, Saulo, ¿berache chchi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b." ¹⁵Na'ch wnia', chepee: "¿Nora li', ben'?" Na' wne': "Nadaan Jesúza', beena' chchi' chsakoo. ¹⁶Na' naa biyas. Ba bli'lau' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'. ¹⁷Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'. ¹⁸Na' wselaa li' kwenche lljali' lljasedilo' legake' kwenche sho' beeni' cha'na' loo yichjall'do'eka' na' bich tagake' lo yel chola'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall' nee."

¹⁹'Kan' gok cha', li' ben' wñabia' Agripa, na'chan bzenag' daa wna Jesúza' ka bli'lawe' nad'. ²⁰Na' zigaate ben' Damáscoka' bli' bsedid' cho'a xtil' Jesucristona', na'tech ben' Jerusalénka', na' ben' lle' doxen yell-lío Judeana', na' lekzka' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'. ²¹Na' ni cheyi diikin, bex' ben' wllall cha'ka' nad' yoodo'na' na' nan witgake' nad'. ²²Per Chioza' chaklene' nad' kwenche choe'ch' xtilleena' lao ben' ax't naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakz dii ben'ka' wdixjee daa goll Chioza' legake' kani'yi, kon kakzan nia', aga bichlā dii yoblan nia'. ²³La' legake' wngake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' ben' necha' yibane' ladj ben' wetka', na' chixje'ile' ben' Israelka' na' ben'ka' bi nak ben' Israel nakan chiyal' gongake' kwenche sho' beeni' che'na' loo yichjall'do'eka'.

Páblona' goklallee gonlilall' Agrípana' Jesúza'

²⁴Na' shlak Páblona' chzoa rson che'na', besyaa Féstona', chi'ene':

—¿Chaktonto'n, Pablo! Daa zi'telā chsedo' ba chontontin li'.

²⁵Na' Páblona' chi'ene':

—Aga chaktonta'n, ben'do', san dill' lin cho'a, na' nakan dii shajle'cho.

²⁶Na' ben' wñabia' Agripani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la' ga lle' lla' beñaan gokan. ²⁷Na' li', ben' wñabia' Agripa, ¿achajli'o cho'a xtil' Chioza' daa bzej dii ben'ka' wdixjee daa golle' legake' kani'yi? Nad' nezid' chajli'o.

²⁸Na'ch Agrípana' chi'e Páblona':

—¿Achakilo' xtitz wshaljleno' nad' cho'a xtil' Jesúza' na' gonlilallaane'?

²⁹Na'ch Páblona' chi'ene':

—La' xtitzə wa la' ssha wshaljlen' li', Chioza' wi'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

³⁰Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'. ³¹Na'ch bichejgake' gana' lle'gake' na' be'gake' dill', che' ljjwelle':

—Aga bi ben beeni kwenche chogbi'a guete' ni bi chiyal' gatee lillyana'.

³²Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao ben' wñabia' Césara' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka b̄hoglall'gake' wsel'gake' neto' Itáliana' loo barkwlə, bengake' Páblona' kon sto chop pres yoblə lo na' beena' le Julio, nake' xan to guioa soldadka' beṅ'ka' nzi' soldad che beena' chṅabia' Rómana'. ² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beṅ' le Aristarco neto'. Nake' beṅ' Tesalónica, daa lia gana' mbani Macedóniana'. ³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' beṅ'ka' nombi'e yella' kwenche be'gake'ne' bi dii byalljile'. ⁴ Na' ka biza'nto' Sidonna' na' wdeteznto' yichjlə yell-lío Chíprena' daa lia lo nisdona' kwenche bkweejan neto' daa le ze be'na'. ⁵ Na' wdetento' lo nisdona' daa de tcho'a yell-lío gana' mbani Cilíciana' na' Panfília' na' bllinnto' cho'a yell Mírana', daa lia gana' mbani Líciana'.

⁶ Na' yell Mírana' xan soldadka' bllelile' to barkw dii za' Alejandría' na' zejan Itáliana', na' bidie' neto' lo'inna'. ⁷ Na' zan lla wyajlennto' barkwa' sho'lall'zə, na' kaṅi bllinnto' cho'a yell Gnídona'. Na' daa ze be'na' klelə, na' wyechjnto' yell-lío Crétana' daa lia lo nisdona', wdeteznto' cho'a yell Salmónna'. ⁸ Na' kaṅi gok zejnto' tcho'a nisdona' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo nisdona' daa ba zoa yilen dii zaga'. Na' goll Páblona' legake':

¹⁰—Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. ¹² Na' daa bi nak latja' wen yigaaṅnto' na'z shlak chi' dii zaga', zangake' b̄hoglall'gake' shajchnto' kwenche illinnto' yell Fenícena' gana' yigaaṅnto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nisdona'

¹³ Na'ch wzolo ze to be'les dii za' lli'lə, na' beṅ'ka' chsa' barkwa' gok-gakile' wakkzə shajgake'. Na'ch wdegake' tcho'azi yell-lío che Crétana' daa lia lo nisdona'. ¹⁴ Ka gok shloll, wzolo to be' wal dii za' cha'lə. ¹⁵ Na'ch wzolon chlligaan barkwa' na' bikzə bi gok gonnto', na' bsan-lall'choklento'n nllig' be'na' len. ¹⁶ Na' ka wdento' gaozə to yell-liodo' le Clauda daa lia lo nisdona', na' bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kaṅi gokan. ¹⁷ Na' ka biyoll bilepnto'n, na'ch b̄chejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len. ¹⁸ Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nisdona' kwenche bichtek gok barkwa' zii. ¹⁹ Na' ka gok shoṅ lla, axt len xshinlaz barkwa' bzal'nto' loo nisdona'. ²⁰ Na' zan lla bi bli'lao wbiila' ni beljka', na' daa zechga be'na', bich bennto' lez yilanto'.

²¹ Na' ka ba gok zan lla biṅ' gaonto', na'ch Páblona' wzie' ladj beṅ'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'. ²² Na' naa bikzə gonchoplall'zle, la' ni tole bi guet. Toz barkwi kwiayi'. ²³ La' daa nlle'yi Chios cha'na' beena' chonlilallaa bselee to anjl bli'lawe' nad'. ²⁴ Na' anjla' wne' nad': "Bi illebo' Pablo. Chonan byen illino' lao ben' wñabia' Césara', na' ni cho' li' yiyesh'lallii Chioza' yog' ben'ka' zejleno' txen loo barkwi na' bi guetgake'." ²⁵ Na' naa, li wtiplall'le, la' n̄xenilallaa Chioza' na' nezyenid' kon ka wna anjla' nad' kayen'nan gak. ²⁶ Per chonan byen wwiacho naklə goncho kwenche yichoonan cho' to lo yell-liodo' dii llia lo nido'ni.

²⁷ Na' ba gok shda' wbill ka bllinnto' gana' de Nido' Adriáticoná', na' ni chllig' be'na' barkwa' to ki to ka'lə lo nido'na'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'. ²⁸ Na'ch bletjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr. ²⁹ Na' daa bllibgake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰ Na' ben'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'. ³¹ Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³² Na'ch soldadka' bchoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. ³⁴ Na' nia' chonan byen gaolat'le kwenche yiyakshao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'. ³⁶ Na' ka ble'gakile' chawe', na'ch yoguee bendiplall'gake' wdaogake'. ³⁷ Yog'lol'neto' yoonto' loo barkwa' naknto' chop guiyoa guiyonshin'to. ³⁸ Na' ka beljgakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa'yel

³⁹ Na' ka wyeeni', ben'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlekwgake'n lo yoxa'. ⁴⁰ Na' bchoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklenan chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabigaan cho'a nisa'. ⁴¹ Na' jshia xin' barkwa' to ga zoayaa yoxa' loo nido'na' na' gogaan, na' aga gokch yichejan. Na'ch bli che nido'na' wzolon bxoxj btinan xan barkwa'. ⁴² Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. ⁴³ Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa', ⁴⁴ na' ben'ka' bi chak xoagake' yela' wchingake' yagla'ka' na' diika' ba goxj che barkwa' kwenche gak yillingake' lo yona'. Na' ka' bennton', na' yog'lolnto' billinnto' shi'a shao' lo yo billa'.

28

Páblona' wzo'e Máltana'

¹ Na' ka biyoll billin yog'nto' shi'a shao' lo yo billa', na' wñezinto' yell-liona' len Malta. ² Na' beñ'ka' lle' na' le wen bengakile' neto', na' daa chak zag na' leyi chakte jeja', bxengake' yi'na' xen na'ch goxgake' yog'nto' kwenche bishaanto'. ³ Na'ch Páblona' btope' xonj xis bill, na' ka bzaleen lo yi'na' bichej to beļ ladjinna' na' wdiñyaab neena'. ⁴ Na' ka ble'i beñ' Máltaka' nal' beļa' na' Páblona', na'ch che' ljawelle':

—Beñ' wen xyalja beeni. La'kzi bile' lo nisdona', Chioza' aga wi'e latj ibane'.

⁵ Na'ch Páblona' wllib neena' kwenche bxop beļa' lo yi'na', na' aga bi gokile'. ⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lio che beena' chñabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. ⁸ Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoa neena' yichje'na' na' biyakile'. ⁹ Na' ka wñezi beñ' Máltaka' daa ben Páblona', na'ch wyaj yog' beñ'ka' bi shao' lawe'na' na' biyaxgakile'. ¹⁰ Na' beñ'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómana'

¹¹ Shon beo' wzoanto' Máltana'. Na' ka biza'nto' biyoonto' to loo barkw dii bchej Alejandriana' daa lekzka' bigaanan Máltana' shlak wde dii zaga'. Na' xin' barkwa' da' chop lwaa lsak' chios che beñ' griegoka', beñ'ka' le Cástor na' Pólux. ¹² Na' ka bllinnto' yell Siracúsana', na' wzoanto' shonə lla. ¹³ Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. ¹⁴ Na' Puteólina' billagnto' baļ beñ'ka' nak neto' txen chonlilall'nto' Jesúza', na' wñabigake' neto' yigaanlennto' legake' to xman. Na' ka wde xman'na', na'ch biza'nto' zejnto' Rómana'. ¹⁵ Na' beñ' Rómaka' nonlilall' Jesúza', ka wñezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaan Beñ'. Na' ka ble'i Páblona' legake', bi'e yel' choxken Chioza' na' biyondioplallee. ¹⁶ Na' ka bllinnto' Rómana', xan soldadka' bene' preska' lall' na' beena' chñabia' soldadka' zoa na', san Páblona', bi'e latj wzo'e chele', na' toz soldada' wdape'ne'.

Páblona' bi'e xtill' Jesúza' Rómana'

¹⁷ Na' ka gok shon lla zoa Páblona' na', na'ch goxe' beñ' Israelka' zakii, beñ'ka' lle' Rómana'. Na' ka bdopgake' na' golle' legake':

—Le' beñ' bish', shlak wzoa' Jerusalenna' beñ' wlall' chechoka' lle' na' beñ'gake' nad' na' bengake' nad' lo na' beñ' Rómaki la'kzi aga bi beñ' chegake' na' biñ' chishj' diika' wna dii xozxto'choka' chiyal' goncho. ¹⁸ Na' biyoll wñabyollgakile' nad' bin beñ', beñ' wñabia'ka' goklall'gake' wsangake' nad', la' aga bi beñ' kwenche wchogbia'gake' guet'. ¹⁹ Per beñ' wlall' chechoka' lle' Jerusalenna' aga be'gake' latj yisangake' nad'. Na' benan byen wñab' tia' lao beñ' wñabia' Césara' kwenche gone' yel' joschis

cha'na'. Per aga gaw' xya daa ben' wllall chechoka' cha'. ²⁰ Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' ben' Israelan, nchejgake' nad' gdenki.

²¹ Na'ch che'gake' Páblona':

—Aga biñ' yish ila' laonto'ni dii za' Judeana' dii we'n dill' cho'. Na' ni to ben' wllall chechoka' biñ' ila' biz gon inagake' cho'. ²² Na' cheeninto' wzenagnto' bi dillaan wi'o, la' nezinto' doxenz chnegake' zban che ben'ka' nakgake' txen dii koba' chliile.

²³ Na'ch bzoagake' to lla kwenche idopgake'. Na' ka bllin llana' blligake' bia', ben' zan bdop gana' zoa Páblona'. Na' be'lene' legake' dill' do lla, bzajniile' legake' che yel' wñabia' che Chioza'. Na' bene' to dii byen kwenche shajle' ben'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii ben'ka' wdixjee daa goll Chioza' legake'. ²⁴ Na' bale' wyajle'gake' diika' goll Páblona' legake', na' zi bale' bi wyajle'. ²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espiritu Sántona' dii Isaíaza', daa bi'e dill' lao dii xoxto'choka' chi'e legake':

²⁶ Wyaj na' jellsha ben' Israelka':

La'kzi wzenagle bi shajni'kzile
Na' la'kzi chle'teile bi gakbe'kzile bin zejín.

²⁷ Bikzə bi rson chazle, daa naklikzle lall'do' wal,
na' chonle ka kwell lchol,
ni bi cheenile wzenagle,
ni bi cheenile ile'ile,
na' ni bi cheenile shajniile
kwenche yiyaj yilenile
na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle' ben'ka' bi nak ben' Israel kwenche bi kwiayi'gake', na' legake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyajgake' chakdil'-len ljwell-gake'.

³⁰ Chop yizyen' bigaan Páblona' yoonā' gana' wdixje', na' blebe' nottezə ben' jawia le'. ³¹ Na' aga no bsej bllon bzajni Páblona' ben'ka' nakan nak yel' wñabia' che Chioza' na' bli' bsedile' ben' cho'a xtil' Xancho Jesucristona'.

Kart daa bzej Páblona' na' bseleen lao ben'ka' nonlilall' Jesucrístona' yell Rómána'

¹ Nad' Pablo, nak' wen llin che Cristo Jesúsá'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na' ² cheyi daa bchebe' gone', na' dii ben'ka' wdxjee daa golle' legake' kani'yi bzejgake'n lee Cho'a Xtilleena'. ³⁻⁴ Na' cho'en dill' che Xiine' Jesucrístona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' yel' wak choo yel' wak xen daa bibane' ladj ben' wetka'. ⁵ Na' daa nonlilall'nto' Jesucrístona', Chioza' ba goklene' neto', na' nzoe' neto' naknto' postl che Jesucrístona', na' bene' lall' na'nto' lljtixje'nto' xtilleena' kwenche doxen yell-lioni soa ben' gonlilall'gake'ne' na' wzenaggake' che', na' sho'e balaan. ⁶ Na' lenle ba gox wñab Chioza' kwenche gackle lall' na' Jesucrístona'.

⁷ Chzej' yog'lol-le, le' lle'le yell Rómána', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucrístona' gaklensh-gagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' ben' dill' ba nonlilall'le Jesucrístona'. ⁹ Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tlizi chñabidee gaklene' le' kat' choe'lwillee. ¹⁰ Na' toshiizi chñabidee wi'e latj yidwia' le', na' shi cheenile' yid', lekze' kwee xnezin. ¹¹ Le chzelallaa yidwia' le' na' we'len' le' dill' daa gaklenan le' soachechchle gonlilall'chle Jesucrístona'. ¹² La' cheenid' wtipch lall' ljwellcho daa nonlilall'chone'.

¹³ Le' ben' bish' na' le' ben' zan', cheenid' inezile zan shii ba goklallaa yidwia' le' per axt naa bikzan' gakan. Cheenid' yidwia' le' kwenche gakchachle gonlilall'le Jesucrístona' na' soach ben' gonlilall'gake'ne' ladjlena', ka ba gok che ben'ka' bi nak ben' Israel yellka' gana' ba wyaa. ¹⁴ Nezd' chonan byen we'len' yog' ben' xtil' Crístona', ka ben' griego na' ka ben' bi nak ben' griego, ka ben' sin' na' ka ben' bi nteyi. ¹⁵ Daan, cheenid' lekzka' chixje'id' le' dill' wen dill' kob che'na', le' zoale Rómána'.

¹⁶ Bi chiyii chido'id' wi'a dill' wen dill' kob che Jesucrístona', la' nsa'n yel' wak che Chioza' kwenche yislan nottez ben' gonlilalleene', zigaate ben' Israelka', na' lekzka' ben'ka' bi nak ben' Israel. ¹⁷ Na' dill' wen dill' kob che'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiya' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa nonlilallee nad', beenan' ibane'."

¹⁸ Yel' zak'zi che Chioza' za'n yabana' ni che ben'ka' bi chzenag che' na' chongake' chiya dii mal, diika' chsej chllongakan gombia'gake' daa nak dii li. ¹⁹ Daa cheeni Chioza' inezgakile' che', ba nezkgakile'n, la' Chioza'kzan ba bliile'n legake'. ²⁰ La'kzi bi chle'icho Chioza', chle'icho diika' bene' na' chakbe'icho ka nake'. Daa bxe bsile' yell-lioni nakbia'cha nake' Chios na' yel' wak che'na' biga te cheyin. Na' bibi de dii wda'i ben' inagake' bi nezgakile' shi zoe'. ²¹ La' la'kzi nezgakile' zoa Chioza', bi choe'la'ogake'ne' ni bi choe'gake'ne' yel' choxken. San yoolə yichjgake' diika' bi zakii na' nchol nnti yichjlall'do'eka' daa bi ntegakile'. ²² La'kzi

nazgake' nakgake' beṅ' sin', daa chongake' chli'n nakgake' beṅ' bi nteyi.
 23 Lwaa dii nan koogake' Chioza' balaan, beena' biga te cheyin, lwaa lsak'
 beṅcha'lə, beṅ'ka' chde cheyin, wloogake' balaan, na' axt no lwaa lsak'
 ba ze xan yabana', na' lwaa lsak' ba zoa tap ṅi'a na'yin, na' lwaa lsak' ba
 chxob le'in.

24 Na' daa chongake' ka', Chioza' ba wchoonlallee legake' kwenche
 gonchgage' dii zbanka' cheeni beli chen che'ka', na' benlen ljwellgake'
 diika' nak zban. 25 Lwaa dii nan shajle'gake' daa nak dii li che Chioza',
 wyazlall'chgage' daa nak de wxiye'. Be'la'ogake' diika' bxe bsil Chioza'
 na' wloogake'n balaan lwaa dii nan koogake' le' balaan daa bxe bsile'
 legakan na' chidolee we'la'ochone' toshiizi. Kan' nakan.

26 Daan, Chioza' ba wchoonlallee legake' kwenche gonchgage' dii
 zbanka' cheeni beli chen che'ka', na' axt noolka' chiyat'len ljwell nool-
 gake' na' chongake' daa bi noe' Chioza' latj gongake'. 27 Na' ka'kzə beṅ'
 byoka', lwaa dii nan soalengake' noolə, chibalgakile' chiyat'len ljwell
 beṅ' byogake', na' chonlen ljwellgake' daa nak dii zban. Na' chzak'zi'len
 beli chen che'ka' yeṅ' zak'zi'na' daa chidoḷ'gake' daa chongake' dii malka'.

28 Na' daa bi goklall'gake' wzenaggake' che Chioza', wlej yichje' legake'
 kwenche gontegagake' dii mala' kon ka nan loo yichjlall'do'eka' daa nxinj.
 29 Shgal' dii bi yejñi'alallii chongake', choe'gake' cho'a xbayi beli chen
 che'ka', chzelall'gake' gat' kwe'gakile', chibagakile' gongake' dii malka'.
 Nakgake' beṅ' xe' beṅ' xga', beṅ' wen xya, beṅ' wishagdila, beṅ' wxiye',
 beṅ' chibayi gon mal che beṅ', beṅ' wichtj dill', 30 beṅ' chyilj chzan
 xtill' beṅ', beṅ' chakzbani Chioza', beṅ' bibi nalli, beṅ' cha'sibə na' beṅ'
 chshalj chshon. Chiyiljlall'gake' bi dii mal gongake', bi chzenaggake'
 che xaxna'gake', 31 bi ntegakile', bi chongake' daa chchebgake', bi chak-
 gakile' beṅ', ni bi chiyesh'gakile' beṅ'. 32 La'kzi nezgakile' ba bchoglo
 Chioza' chiyal' guet beṅ'ka' chon ka', zizikchli chongake'n, na' axt chiba
 chizak'gakile' kat' chon beṅ' yoblan.

2

1 Na' li' naa, nottezə nako', kat' chchoglo' che beṅ' nape' dol' lao Chioza',
 lekzka' che kwinoṅ' chñio', la' lenkzo' chono' diika' chongake', na' bibi de
 wda'ilo'n ino' bibi xtoḷoo de. 2 Na' nezhicho Chioza' chone' kon ka chiyal'
 gone' kat' chchogloe' sak'zi' beṅ'ka' chon dii malka' nak ka'. 3 Na' li' no'
 che beṅ'ka' chon dii malka' napgake' dol', bi gakzilo' wilo' lo yeṅ' zak'zi'
 che Chioza', la' ka'kzan chono'. 4 ḷAchakzilo' bi wsak'zi' Chioza' li' ni che
 daa chono'? ḷAbi chakbe'ilo' ni che yeṅ' beṅ' wen che'nan' chiyesh'lallile'
 cho' na' chape' yeṅ' chxenlall' checho, daa cheenile' yiyaj yilenicho che
 dii malka' choncho? 5 Per daa nako' yichjlall'do' chech na' bi cheenilo'
 yiyaj yilenilo', kwintezo' chkwa' chti'azo' yeṅ' zak'zi'ka' illaglo' kat' illin lla
 wchoglo Chioza' che beṅ' kon ka chiyal' gone'. 6 La' Chioza' gone' ka gag
 che to to beṅ' kon ka chidolee. 7 Beṅ'ka' zoatezi zoagake' chongake' daa
 nak wen kwenche sho'gake' balaan, wi'e yeṅ' mban chegake' zejli kaṅi
 na' biga lliia ile'gakile' yeṅ' wita'. 8 Na' beṅ' yaalall'ka', beṅ'ka' chzoagake'
 ka'lə daa nak dii li na' nogake' diika' bi yejñi'alallii, wsak'zi'e legake' daa le
 chllée legake'. 9 Yeṅ' zak'zi' wal yen ile'i yog' beṅ'ka' chon dii mala', zigaate
 beṅ' Israelka' na'tech beṅ'ka' bi nak beṅ' Israel. 10 Per beṅ'ka' chon
 dii wenna', sho'gake' balaan na' soagake' mbalaz, zigaate beṅ' Israelka'
 na'tech beṅ'ka' bi nak beṅ' Israel.

11 La' Chioza', tlap chone' yel' joschis, aga nakzi ben' chakile'. 12 Yog' ben'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi nezgakile' daa nan. Na' yog' ben'ka' ben dii mala' na' neztégakile' daa na leya', choglo chégake' kon ka na leya' gak chégake'. 13 La' kono yiyak ben' li ben' shao' lao Chioza' daa nombia'ze' leya', san beena' chon kon ka nan, len' yiyake' ben' li ben' shao' lawe'na'. 14 Ka nak ben'ka' bi nak ben' Israel na' bi nezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'. 15 Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'. 16 Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' ben' yell-lioni, kon ka na dill' wen dill' kob che'na' daa cho'a dill'.

17 Na' li' nako' ben' Israel, chakilo' nako' ben' wen lao Chioza' daa nezilo' daa na ley che dii Moiséza' na' chep cha'lalloo daa nombi'o Chioza'. 18 Chakilo' nezilo' daa cheeni Chioza' gono' daa chli' chsedi leya' li' gono' daa nakch wen. 19 Chakilo' wak koo ben' lo nez li che Chioza' na' gaktio' ka beeni' lao ben'ka' chda lo yel cholá'. 20 Na' chakilo' wak wzajniilo' ben' bi nteyi na' wakte wli' wsedilo' ben'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li. 21 Na' shi li' chli' chsedilo' ben' yoblə, ¿berache bi chli' chsedi kwino'? Na' shi chsedilo' ben' bi kwane', ¿berache li'lə chbanzo'? 22 Na' li' chsedilo' ben' bi chiya' soalene' nool bi nak nool che', wa ben' byo ben' bi nak ben' che', ¿berache li'lə chonzo' ka'? Na' li' chwiilo' lwaa lsak' diika' choe'la'o ben', ¿berache chzi' chbanzo' bi de loo lill xlatjinka'? 23 Chshalj chshono' daa nombi'o leya', per chnit chdio' Chioza' daa bi chono' ka nan. 24 Dii liyen'nan na Cho'a Xtill' Chioza': "Ben'ka' bi nak ben' Israel chnegake' zban che Chioza' ni chele daa chonle mal."

25 Dii li sen' daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo sen'na'. 26 Na' shi beena' bi yoo sen'na' chone' ka na leya', lao Chioza' nake' ka ben' yoo sen'. 27 Na' beena' chon ka na leya' la'kzi bi yo'e sen'na', yili'e lawo' napo' dol' daa bi chono' ka na leya' la'kzi nombi'on na' yootio' sen'na'. 28 Bi gakzilo' nako' dowalj ben' Israel daa chono' yog' diika' yoolocho choncho cho' ben' Israel, ni daa yoo kwerp cho'na' sen'na'. 29 San dowalj ben' Israel nak beena' nonlilall' Chioza' do yichj do lallee, na' daa ba bikob Espiritu che'na' yichjlall'do'ena' nakan ka sen'na' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

3

1 Na' ¿bera yel' goklen che ben' Israelka' de? Na' ¿bera banez si'gake' daa yoogake' sen' daa le circuncisión? 2 Dii xen wal banez chégake' de. La' zigaate, legaken' be' Chioza' Cho'a Xtilleena'. 3 ¿Anti chakile ni cheyi daa bi chajle' bal' ben' Israelka' che', ba wlej yichje' legake'? 4 ¿Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan zejan shli, na' gakbe'gakile' chono' yel' joschis kon ka chiya' gakan.

5 Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon

mal? (Nia' ka' daa chaki beṇ' yell-lioki ka'.) ⁶ Per ḡbi nakan ka'! La', sheḷ'ka' Chioza' bi nake' beṇ' li beṇ' shao', aga wak gone' yeḷ' joschis che beṇ' yell-lioni.

⁷ Na' zoa beṇ' nagake', shi yeḷ' wxiye' chechona' chli'n yeḷ' li che Chioza' na' chisgolan balaṇ che'na', ḡbi che naze' nakcho beṇ' saaxya, shka'? ⁸ Na' daa chakgakile' ka', wnaljagake': "Goncho dii mala' kwenche sho'che' balaṇ." Zoa beṇ' nagake' kan' chli' chsedinto', per bi nakan ka'. Na' beṇ'ka' naz ka' chidol'gake' yeḷ' zak'zi' che Chioza'.

⁹ ḡNakra lla? ḡAnakchnto' neto' beṇ' Israel beṇ' wench aga ka beṇ' yoblə, lla? ḡBi nakan ka'! La' ba wniakz' yog'cho, ka neto' beṇ' Israel na' ka'kzə beṇ'ka' bi nak beṇ' Israel, toz ka napcho dol' lao Chioza' daa ba bencho dii mala'. ¹⁰ La' Cho'a Xtill' Chioza' nan:

Kono beṇ' li beṇ' shao' zoa, ni tlišee.

¹¹ Ni to beṇ' bi chajniile' daa nak dii li, ni kono zoa beṇ' chiyilj Chioza'.

¹² Yog'z beṇ' ba wlaagake' lo nez lina', na' yog'zgake' nxinj yichjlall'do'eka'.

Ni togagake' bi chon dii wen.

Ni tliš' beṇ' chon wen bi zoa.

¹³ Ka zban chla' to loo ba che beṇ' wet dii nyalj, kan' nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che beḷ' nak dill'ka' choe'gake'.

¹⁴ Lillinzə chyishjgake' bia' blag' che beṇ' na' choe'gake' dill' zi'bia'.

¹⁵ Bi nallgakile' chittezgake' beṇ'.

¹⁶ Gattezə zejgake' chlliayi' chlliadegake' na' chgoogake' yeḷ' zi' yeḷ' yesh'.

¹⁷ Bi nombia'gake' bi daa ne' soalengake' beṇ' mbalaz.

¹⁸ Bi chall chllebgake' gon Chioza' xya chegake'.

¹⁹ Na' nezicho beṇ'ka' nagake' chongake' daa na ley che Chioza' chiyaḷ' gongake' doxen ka nan. Na' daa kono gok gonan, ba bchoglo Chioza' che yog'lolcho, cho' beṇ' yell-lio, ka neto' beṇ' Israel na' ka beṇ' bi nak beṇ' Israel, napcho dol', na' ni to kono gak ina: "Bibi dol' nap'." ²⁰ Daan, ni to beṇ' bi gak ine' nake' beṇ' li beṇ' shao' lao Chioza' daa chone' ka na leya'. La' leya' chonan ka chakbe'icho nakcho beṇ' saaxya.

²¹ Na' naa Chioza' ba bliile' cho' nakan goncho kwenche yiyakcho beṇ' li beṇ' shao' lawe'na', na' aga daa goncho ka na leyan'. La' ka leya', na' ka diika' bzej dii beṇ'ka' wdixjee daa goll Chioza' legake', toz ka choe'gakan dill' cheyin. ²² Chioza' ne' yog'lol beṇ' gonlilallee Jesucristona' yiyake' beṇ' li beṇ' shao' lawe'na', nottezə nake'. ²³ La' yog'lolzə beṇ' bxinj blengake' na' ni to kono nak dowalj beṇ' wen ka nak Chioza'. ²⁴ Per daa nak Chioza' beṇ' wen, chiyone' beṇ' beṇ' li beṇ' shao' daa wdixj Cristo Jesús'a saaxya che'ka', na' bibi zak'gakile'n. ²⁵ Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', nottezə beṇ' gonlilalleene', Chioza' yizi'xene' saaxya che'na'. Na' ka' chli'e nan nake' beṇ' chon daa nak shli. La' daa nape' yeḷ' chxenlall', bene' ka'z saaxyaka' ben beṇ' kana' bin' wselee Crístona'. ²⁶ Na' naa, daa bselee Jesucristona' chli'e nake' beṇ' chon daa nak shli daa ne' nottezə beṇ' gonlilallee Jesús'a nake' beṇ' li beṇ' shao' lawe'na'.

²⁷ Kono gak wshalj wshon ine' nake' beṇ' li beṇ' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' nottezə beṇ' gonlilallee Crístona' nake' beṇ' li beṇ' shao' lawe'na'. ²⁸ Na' ba nezicho

chiyakcho beṅ' li beṅ' shao' lao Chioza' daa chonlilall'cho Jesucristona' na' aga daa choncho daa na leyan'.

²⁹ ¿Achakile Chioza' nake' Chios che to beṅ' Israelka'zə? ;Bi nakan ka' Lekzka' nake' Chios che beṅ'ka' bi nak beṅ' Israel. ³⁰ La' toz Chiozan' zoa, beena' chiyone' beṅ' li beṅ' shao' beṅ'ka' chonlilall' Cristona'. Na' toz ka chone' che nottezə beṅ' chonlilalleene', ka beṅ' Israel, beṅ'ka' yoo seṅ daa le circuncisión, na' ka beṅ' bi nak beṅ' Israel. ³¹ ¿Achakile daa chonlilall'cho Jesús'a chzoacho leya' ka'lə? ;Bi nakan ka'! La' ñezicho nakan to dii zakii.

4

¹ ¿Bera ka inacho che dii xozxto'cho Abrahamama'? Nak gok biyake' beṅ' li beṅ' shao' lao Chioza'. ² Shel'ka' biyak dii Abrahamama' beṅ' li beṅ' shao' lao Chioza' ni cheyi diika' bene', zaklja bshalj bshone' lao beṅ' yell-lioni, per aga lao Chioza'. ³ La' Cho'a Xtill' Chioza' nan: “Dii Abrahamama' wyajli'e che Chioza', na' Chioza' wne' nake' beṅ' li beṅ' shao' lawe'na'.” ⁴ Kat' to wen llin chkaa laxje', bi nakan to dii chzani beṅ' cho'ene', san nakan dii chiya'kz wi'ene'. ⁵ Per shi to beṅ' shajli'e che Chios, beena' chiyon beṅ' saaxyana' beṅ' li beṅ' shao', Chioza' ile'ile'ne' beṅ' li beṅ' shao' daa gonlilalleene', la'kzi bibi bene' kwenche idolee yel' goklen che Chioza'. ⁶ Dii Davina' bi'e dill' che yel' mbalaz che beena' na Chioza' nake' beṅ' li beṅ' shao' la'kzi bibi bene' kwenche bdolile'n. ⁷ Ki wna dii Davina': Chakomba beena' ba biyakxen xtoleena', na' ba biyol binit saaxya che'na'.

⁸ Chakomba beena' bi yizi' Xancho Chioza'ne' kwent.

⁹ ¿Achakile to beṅ'ka' yoozgake' seṅ daa le circuncisión wak soagake' mbalaz? Bi nakan ka', san lekzka' beṅ'ka' bi yoo seṅna' wak soagake' mbalaz. La' ba wniakz' Chioza' wne' dii Abrahamama' goke' beṅ' li beṅ' shao' lawe'na' daa wyajli'e che'. ¹⁰ Na' ¿batran wna Chioza' ka'? ¿Aba wyoo dii Abrahamama' seṅna' kana' wna Chioza' nake' beṅ' li beṅ' shao'? ¿Awa bin' sho'en? Chioza' wne' ka' kana' bin' sho'en. ¹¹ Na'techlə wloo kwine' seṅ daa le circuncisión na' seṅna' bli'n ba nake' beṅ' li beṅ' shao' lao Chioza' daa benlilalleene'. Daan, dii Abrahamama' nake' xozxto' yog' beṅ' nak beṅ' li beṅ' shao' lao Chioza' daa nonlilall'gake'ne', la'kzi bi yoogake' seṅna'. ¹² Na' dii Abrahamama' lekzka' nake' xozxto' neto' yoonto' seṅ daa le circuncisión. Per aga daa yoonto' seṅna'zan, san daa nonlilall'nto' Chioza', beena' ba nonlilall' dii Abrahamama' kana' zi' sho'e seṅna'.

¹³ Chioza' bchebe' gaki che dii Abrahamama' len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahamama' Chiozan', wna Chioza' nake' beṅ' li beṅ' shao' lawe'na'. ¹⁴ La' shel' to beṅ'ka' chonz ka na leyan' gaki chegake' daa bcheb Chioza' wi'e dii Abrahamama', bibi zjanayin gonlilall'cho Chioza' na' aga bi zakii daa bchebe' gone', shel'ka'. ¹⁵ Leya' nsa'n yel' zak'zi' che beṅ'ka' bi chon ka nan. Per shi bibi ley de, aga bi de dii inan napgake' dol'.

¹⁶ Ka nak daa bcheb Chioza' gone' che dii Abrahamama', nakan to goklen daa chone' che nottez beṅ' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to beṅ'ka' chonz ka na leya', san lekzka' nakan che nottezə beṅ' chonlilall' Chioza' ka benlilall' dii Abrahamama' le'. La' dii Abrahamama' nake' xozxto' yog'cho cho' nonlilall'chone'. ¹⁷ Ka na Cho'a Xtill' Chioza': “Ba nzoa' li' kwenche gako'

xaxna' beṅ' zan inleḅ." Na' Chioza', beena' benlilall' dii Abrahamana', nape' yel' wak yisbane' beṅ' wetka' na' wx̄e wsile' diika' biṅ' gac.

¹⁸ Kana' bich non dii Abrahamana' lez soa xiine', wyajli'e daa goll Chioza'ne' na' bene' lez gac ka golle'ne'. Ka' gok biyake' xozxto' beṅ' zan inleḅ, kon ka goll Chioza'ne', chi'e: "Kan' shesh shan xiṅ dia cho'ka'."

¹⁹ Biga gokchoplallee che Chioza', la'kzi chakbe'ile' ba nake' beṅ' golə par soa xiine', la' ba zoa gakile' to guiyoa yizan. Na' ni bi gokchoplallee la'kzi gok dii Sárana' nool will. ²⁰ Bi gokchoplallee, san zizikli benlilallee gac daa bcheb Chioza' gone' na' be'laweene'. ²¹ La' wnezile' kwaslōl Chioza' nape' yel' wak kwenche gone' yog' diika' chchebe'. ²² Daan ble'i Chioza'ne' beṅ' li beṅ' shao' daa wyajli'e che'.

²³ Na' daa nan "Chioza' ble'ile'ne' beṅ' li beṅ' shao'", aga che tozen' nan ka', ²⁴ san lekzka' cho'en dill' checho cho' nonlilall'cho Chioza', beena' bisbane' Xancho Jesucristona' ladj beṅ' wetka', la' lenchon chle'i Chioza' beṅ' li beṅ' shao' daa nonlilall'chone'. ²⁵ Bzani Chioza' Xancho Jesucristona' wite' ni che saaxya chechoka' na' bisbane'ne' ladj beṅ' wetka' kwenche biyakcho beṅ' li beṅ' shao' lawe'na'.

5

¹ Chioza' ba biyone' cho' beṅ' li beṅ' shao' daa ba nonlilall'chone', na' ba bizoalenchone' wen daa wit Xancho Jesucristona' ni checho. ² Na' daa ba nonlilall'cho Cristona', Chioza' toshiizi chonile' cho' wen na' chibaicho daa noncho lez lljazoalenchone'. ³ Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa nezicho chongakan ka soachechcho gonlilall'chone'. ⁴ Na' shi zoachechcho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. ⁵ Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espiritu Santo che'na' loo yichjlall'do'choni.

⁶ Kana' ni nakcho beṅ' wen dii mal na' aga bi gok goncho kwenche bi kwiayi'cho, kana'yen' bid Cristona' wite' ni checho cho' nakcho beṅ' saaxya. ⁷ Aga ga zoa to beṅ' li izanteyi kwine' guete' ni che to beṅ' nak beṅ' li beṅ' shao'. Kayaadia shi yiyaxji to beṅ' izani kwine' guete' lwaas to beṅ' wen. ⁸ San Chioza' bli'e ka chakile' cho' daa bzanile' Cristona' wite' ni checho kana' ni nakcho beṅ' saaxya. ⁹ Daa blalj xchen Cristona' wite' ni checho, ba biyon Chioza' cho' beṅ' li beṅ' shao' lawe'na'. Na' daa wite' ni checho, zalechlin ki yisle' cho' lao yel' zak'zi'na' kat' illin lla wchoglo Chioza' che yog'lōl beṅ'? ¹⁰ Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, zalechlin naa ba bisbane'ne' ladj beṅ' wetka' ki yisle' cho' daa ba zaoalenchone' wen? ¹¹ Na' aga diika'z chibaicho, san lekzka' daa nombia'cho Chioza', la' ni che Xancho Jesucristonan' bizoalencho Chioza' wen.

¹² Ni che yel' widenag che toz beṅaan golj wx̄e saaxyana' yell-lioni, na' ni che saaxyana' wyoo yel' wita'. Ka' gok wzolo chet yog' beṅ', la' yog'zə beṅ' chongake' dii mala'. ¹³ Kana' zi' we' Chioza' dii Moiséza' ley che'na', ba chonkzə beṅ' yell-lioni dii mala'. Per shi bibi ley de, aga bi de dii gawan xya chegake'. ¹⁴ La'kzi aga bi ley got' dii gawan xya chegake', yel' wita' wṅabia'n lao yog'lōl beṅ'ka' ben dii mala' wzololenzan dii Adánna' bllinten kana' wban dii Moiséza', la'kzi bi wdishjgake' cho'a xtill' Chioza' ka ben

dii Adánna'. Ni che dii Adánna' wyoo yel' wita' yell-lioni, san Jesucristona', beena' wloo Chioza' xnezin wselee kani'teyi, bxie' yel' mban zejli kani.

¹⁵ Per ka nak dii mala' ben dii Adánna', bi gak wsaklebichon ka dii wenna' ben Chioza' checho, dii xen wal nlla'n. Daa bxinj blen dii Adánna' yog'za ben' chet, san daa bsel' Chioza' Jesucristona' kwenche wite' ni checho, bene' to dii wen inleeb che yog' ben' gonlilalleene'. ¹⁶ Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'lol ben' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' ben' li ben' shao' lawe'na', la'kzi nakcho ben' saaxya nleeb. ¹⁷ Shi yel' wita' wñabia'n daa bxinj blen dii Adánna', ¿alechlin ki inabia' ben'ka' ba biyon Chioza' ben' li ben' shao' daa nake' ben' wen inleeb, ni che Jesucristona', beena' be' to yel' mban kob chegake'?

¹⁸ Dii mala' ben dii Adánna' benan ka bhoglo Chioza' che yog' ben' guetgake', na' ka'kzə dii wenna' daa ben Jesucristona' benan ka yog' ben'ka' gonlilall'gake'ne' yiyakgake' ben' li ben' shao' na' gat' yel' mban chegake' daa bi te cheyin. ¹⁹ Daa gok dii Adánna' widenag, wchoglo che yog' ben' nakgake' ben' saaxya, per daa gok Cristona' ben' wizoa dill', ben' zan yiyak ben' li ben' shao'.

²⁰ Chioza' bi'e ley che'na' kwenche wyanch xtol' ben' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'. ²¹ Na' daa chet yog' ben', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' gonan yel' mban checho zejli kani ni che Jesucristona', beena' nak Xancho.

6

¹ ¿Beran inacho naa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'? ² ¡Aga kan' goncho! La' cho' ba nakcho ka ben' ba wit lao saaxyana' daa bich chñabi'an cho'. Daan, bich chiyal' gonchon txen. ³ ¿Abi nezile ka wchoacho nisa' daa nakcho Cristo Jesús'a' txen, lekzka' zejín witlenchonen'? ⁴ Daa wchoacho nisa' zejín witlenchone' na' bgash'lenchone' kwenche gat' to yel' mban kob checho ka gok che Cristona' kana' bisban Xacho Chioza' le' kon yel' wak xen che'na'.

⁵ Na' daa ba witlenchone', ka'kzan yibancho ka bibane' ladj ben' wetka'. ⁶ Nezicho yel' mbanna' nsa'cho kana', wlliyai'n ka wit Cristona' lee yag cruza' kwenche bich we'cho cho'a xbayi beli chenna' na' bich inabia' dii mala' cho'. ⁷ La' kat' to ben' ba wite', bich chñabia' dii mala' le'. ⁸ Na' shi ba witlencho Cristona', ba nxenlall'cho lekzka' ibanlenchone'. ⁹ Nezicho biban Cristona' ladj ben' wetka' na' bich guete' dii yoblə, la' bich so saki yel' wita' le'. ¹⁰ Na' ka wit Cristona', shlin shlaxjzan bsol bnite' yel' wak che saaxyana'. Na' daa mbane' naa, zoe' chone' ka cheeni Chioza'. ¹¹ Na' ka'kzə le', chiyal' gakbe'ile ba nakle ka ben' ba wit lao saaxyana' daa bich chñabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a' txen.

¹² Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'. ¹³ Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwinle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladj ben' wetka' daa ba bene' le' to yel' mban

kob. ¹⁴ Bich chiyal' inabia' dii mala' le', la' bich zoale xni'a leya', san daa biyesh'lallii Chioza' le', ba zoalenle yel' goklen che'na'.

¹⁵ ¿Nakrazə, lla? Naa ba biyesh'lallii Chioza' cho', na' bich zoacho xni'a leya', ¿agonchcho dii mala'? iBi chiyal' goncho ka! ¹⁶ Nezkzile shi ba ben kwinch lo na' ben' kwenche goncho bittez daa ne', choe'cho latj chnabi'e chon'. Ka'kzan, shi chzenagcho che dii mala', na' inabia'n cho' na' wlliyai'n cho'. Na' shi we'cho latj inabia' Chioza' cho', wiyone' cho' ben' li ben' shao'. ¹⁷ Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. ¹⁸ Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'. ¹⁹ Ba bi'a dill' che daa chak checho cho' benech kwenche shajniile dga nia' le'. Kana' ben kwintle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwintle lall' na' Chioza' kwenche soale gonle ka cheenile'.

²⁰ Shlak be'le latj wñabia' dii mala' le', aga bzenagle che Chioza' na' bi benle ka cheenile'. ²¹ Na' aga bi banez wxi'le che dii mala' benle na' naa chiyii chido'lenile'n, la' yel' witchokzan nsa'n. ²² San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheyin daa zejch chonle daa nak wen, na' gat' yel' mban chele zejli kañi. ²³ Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesús'a nakan to yel' mban zejli kañi.

7

¹ Le' ben' bish' na' le' ben' zan', nombia'le leya' na' nezile leya' chñabi'an ben' shlak mbane'. ² Na' ka nak leya', cho'en dill' nan noola' nshagna' chiyal' soalene' ben' che'na' shlak mbane', per shi guet ben' che'na', wak yikee ben' yoblə. ³ Shi lljsoalene' ben' yoblə shlak ni mban ben' che'na', nakan xya. Per shi ba wit ben' che'na', leya' nan wak yikee ben' yoblə, na' bi nakan xya.

⁴ Na' ka'kzan chele le', nakcho txen nonlilall'cho Crístona', le' ben' bish'dawaa na' le' ben' zandawaa. Daa nonlilall'le Crístona', beena' wit ni checho, zejín lekzka' ba nakle ka ben' ba wit lao leya' na' bich chñabi'an le'. Na' naa ba biyakle lall' na' ben' yoblə, beena' wite' na' bibane' ladj ben' wetka', kwenche goncho ka cheeni Chioza'. ⁵ Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit. ⁶ Per naa, ba nakcho ka ben' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chñabia' leya' cho'.

⁷ Bi chiyal' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selallaa bi de che ben' shel'ka' ki leya' nan: "Bi selalloo bi de che ben'." ⁸ Per dii mala' yoo loo yichjlall'dawaani bchinan dga bliia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho ben' wixinj wilen, shel'ka'. ⁹ Kana' bin' inezid' daa na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliyai' nad'. ¹⁰ Daa bliia Chioza' bia' goncho kwenche gакdenan cho' gat' yel' mban checho, bchoglolan cha' nan chiyal' guet'. ¹¹ La' dii mala' yoo loo yichjlall'dawaani bchinan leya' na' wxiye'n nad' kwenche bliiyai'n nad'.

¹² Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen. ¹³ Leya' nakan wen na' aga lënnan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche bliiyi'n nad'. Na' daa nakan ka', ni che leya' bli'lao saaxyana' nakan dii mal inleeb.

¹⁴ Neꝑicho leya' nakan che Chioza', san nad', lega ben' de beli chen chon', na' chñabia' dii mala' nad' daa chon' ka nan. ¹⁵ Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lëlan chonz'. ¹⁶ Na' kat' chon' daa bi cheenid' gon', chakbe'id' leya' nakan wen. ¹⁷ Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'. ¹⁸ Nad' neꝑid' aga bi dii wen cheeni beli chenni gonan. Na' la'kzi le lliallalaa gon' dii wenna', bi chak gona'n. ¹⁹ Bi chizoid' gon' dii wenna' daa cheenid' gon', san dii mala' daa bi cheenid' gon', lëlan chonz'. ²⁰ Na' daa chon' daa bi cheenid' gon', zejın aga nadaan chona'n, san dii mala' daa chñabia' loo yichjlall'dawaanin chonan daa.

²¹ Chakbe'yenid' la'kzi cheenid' gon' daa nak wen, dii malalə chon'. ²² La'kzi chibayi loo yichjlall'dawaani ley che Chioza', ²³ chakbe'id' de daa chsej chllonan gon' daa neꝑid' nak wen, la' dii mala' daa chñabia' nad' chtakw chchejan nad' kwenche gon' daa bi nak wen.

²⁴ Le nyesh' chak cha'! ¿Notgui yisell yila' nad' lao beli chenni dga ba nchogbia' kwiayi'? ²⁵ Cho'a Chioza' yel' choꝑken daa wit Xancho Jesuchristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8

¹ Na' naa, bich bi yel' zak'zi' che Chioza' yen ile'i ben'ka' nak Cristo Jesús'a t xen, ben'ka' bich chongake' ka na beli chen che'ka', san ba chongake' ka cheeni Espiritu che Chioza'. ² La' daa nonjilall'cho Cristo Jesús'a, Espiritu che Chioza' ba bene' yel' mban kob checho, na' daa chñabia' Espirituna' cho', bich chñabia' saaxyana' cho' daa nsa' yel' wita'. ³ Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'. ⁴ Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espiritu che Chioza'.

⁵ Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espiritu che Chioza', zegake' wneyi gongake' daa cheenile'. ⁶ Ben'ka' yoo yichjgake' gongake' dii mala', kwiayi'gake'; san ben'ka' yoo yichjgake' gongake' ka na Espiritu che Chioza', gat' yel' mban chegake' zejli kani na' soagake' mbalaz. ⁷ Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. ⁸ Ben'ka' ni chibayi chon dii mala', Chioza' bi chazlallee ka chongake'.

⁹ Per le', bich chzenagle che dii mala' san chzenagle che Espiritu che Chioza', shi ba zoe' loo yichjlall'do'lena'. Na' shi no bi zoa Espiritu che Crístona' loo yichjlall'do'ena', bi nake' lall' na' Crístona'. ¹⁰ La'kzi ba nakan guet kwerp chelena' daa nakle ben' saaxya, per shi nakle Crístona' toz,

Espíritu che'na' zoe' loo yichjall'do'lena' na' dekzə yel' mban kob chele daa ba biyakle beñ' li beñ' shao' lao Chioza'. ¹¹ Na' shi Espiritu che Chioza', beena' bisbane' Jesúza' ladj beñ' wetka', zoe' loo yichjall'do'lena', Chioza' lekzka' gone' to yel' mban kob che kwerp chehena' daa guet, daa zoa Espiritu che'na' loo yichjall'do'lena'.

¹² Daan, le' beñ' bish' na' le' beñ' zan', chonan byen goncho ka cheeni Chioza' na' bi goncho kon daa nazan che beli chenni. ¹³ La' shi we'chcho cho'a xbayi beli chenni, na' guetcho; san shi we'cho latj gaklen Espiritu che Chioza' cho' kwenche kwey yichjcho dii mala' daa nan goncho, na' gat' yel' mban checho zejli kani.

¹⁴ Yog' beñ'ka' chzenaggake' che Espiritu che Chioza' na' chongake' ka cheenile', legaken' nakgake' xiin Chios. ¹⁵ Cho' ba zoa Espiritu che Chioza' loo yichjall'do'choni, bich chak checho ka chak che beena' zoa beñ' chñabi'ene' na' chall chllebe'ne', san daa zoa Espiritu che'na' loo yichjall'do'chonan', zejin ba wkaa Chioza' cho' ka xiine'. Na' daa zoalen Espirituna' chon', chak che'chone': "Xadawaa." ¹⁶ Na' Espiritu che'na' lekzka' chzajniile' cho' kwenche chnezicho nakcho xiin Chios. ¹⁷ Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakhone' txen sho'lenchone' balaan.

¹⁸ Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. ¹⁹ Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'. ²⁰ La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gakhakan ka', la' Chiozan' bllie' bia' gakhakan ka', per lekzka' bene' kwenche chbezgakan yiyakshao'gakan. ²¹ La' wllin lla kat' yog' diika' bxe bsile' bich gakhakan dii kwiayi', san yiyakgakan mbalaz inlleb ka gak checho, cho' nakcho xiine'. ²² Na' nezicho axt naanlla yog' diika' bxe bsile' chak chegakin ka chak che to nool chllagloe' sane' bi'do' che'na'. ²³ Na' aga toz diika' ben Chiozan' chak chegakin ka', ka'kzan chak checho, cho' ba yoocho Espiritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'. ²⁴ Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. ²⁵ Per shi ni noncho lez ile'icho daa zi' gak, chiyal' gapcho yel' chxenlall' shlak ni chbezcho gakan.

²⁶ Na' lekzka' Espiritu che Chioza' chaklene' cho' choncho daa bi chak goncho. La' aga nezicho nakan chiyal'yen' we'llwillcho Chioza', per kwin Espiritu che'na' chbellyeshee chñabe' checho lawe'na'. Na' la'kzi aga bi dill' chchine', ²⁷ Chioza', beena' nombi'e yichjall'do' yog'cho, nezile' bin chñab Espiritu che'na' checho. La' daa chaklall' Chiozan' chñabe' checho, cho' nakcho lall' nee.

²⁸ Na' nezicho Chioza' chchine' yog' diika' chen chle'icho kwenche gakhengakan cho', cho' ba chakichone', cho' ba wleje' kwenche gakhochi lall' nee kon ka goklallee. ²⁹ Kana' bin' soatecho, Chioza' ble'shiile' cho' na' wleje' cho' kwenche yiyone' cho' beñ' wen ka nak Xiine' Jesucristona', kwenche Jesucristona' gake' beñ' llialo ladjchoni, cho' nakcho beñ' bishee na' beñ' zane'. ³⁰ Chioza' wleje' cho' kani'teyi, na' lekzka' gox wñabe' cho'

kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'? ³² Shi Chioza' axt ni Xiine'na' bi biyeshile' san bzanile'ne' wite' ni checho, ¿alechlin ki gone' cho' yog'lol diika bchebe'? ³³ Aga no gak gao xya checho lao Chioza', la' len' ba wleje' cho' na' biyone' cho' ben' li ben' shao'. ³⁴ Na' aga no gak wchoglo checho guetcho. La' Cristo Jesús'a' wite' ni checho, na' bibantie' ladj ben' wetka'. Na' chi'e kwit de shli che Chioza', chnabe' gaklene' cho'. ³⁵ Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbił chdoncho, ni daa bi de xalaancho, ni daa zoacho dii nxoll, wa shi wit ben' cho'. ³⁶ Chak ka na Cho'a Xtill' Chioza' daa na:

Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

³⁷ Per Crístona', beena' chakile' cho', chaklene' cho' kwenche goncho gan lao yog'lolte diika' chen chle'icho. ³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gakə, ³⁹ ni dii chak gana' zeelo nak sib wal, ni dii chak gana' zeelo nak zij wal, ni bittez dii yoblə dii bxe bsil Chioza' bi gak gonan ka bich gakile' cho', la' ba bli'e le chakile' cho' daa wit Xancho Cristo Jesús'a' ni checho.

9

¹ Daa nonlilallaa Crístona' cho'a dill' li, na' bi chziyaa. Na' lekzka' Espíritu Sántona' chzajniile' nad' kwenche nezi yichjlall'dawaani dga nia' nakan dii li. ² Le nyesh' zoa' na' toshiizi le chjeli lall'dawaani, ³ na' axt shel' wxe'id' bich gaklen Crístona' nad' na' kwiayaa kwenche shicholə gaklenan ben' Israelka' ben'ka' nak ben' wlall' cha' na' ben' bishaa. ⁴ Chioza' wleje' dii xoxzto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gagkake' yell che', na' bi'e legake' ley che'na'. Na' bzajniile' legake' ka chiyał' we'la'ogake'ne', na' dii zan dii bchebe' gone' chegake'. ⁵ Neto' ben' Israel naknto' dia che dii Abraham'a', dii Isaaca' na' dii Jacoba', na' Crístona' lekzka' golje' lo dia chento'na' ka bide' yell-lioni. Na' chiyał' we'la'ochone' zejli kani, la' len' nake' Chios na' chnabi'e lao yog'lolte dii de. Kan' nakan.

⁶ Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' nakgake' dowalj ben' Israel.

⁷ Aga yog' ben' goljgake' lo dia che dii Abraham'a' nakgake' dowalj xiin dia che'. Chioza' golle'ne': "Xiino' Isaaki gakb' xaxna' yog'lol xiin dia cho'ka' zi' zaak." ⁸ Dga chzajniin cho' nan aga ni che nakgake' xiin dia che dii Abraham'a' nakgake' xiin Chios, san ben'ka' chajle' gone' ka bchebe' gone', legaken' noni xiine'. ⁹ Ki nak daa bcheb Chioza' gone' che dii Abraham'a', chi'e: "Zi twiz ka naa zaa dii yoblə, na' Sárana' sane' to xiino' bi' byo."

¹⁰ Na' aga dgazan. Lekzka' Rebécana' wxane' chop bi'do' che dii xoxzto'nto' Isaaca'. ¹¹⁻¹² Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba bllie' bia' gak, na' chaxe' ben'ka' cheenile' gak xiine', ni bi chone' kwent shi

bi ba bengake'. ¹³ Nakan kon ka na Cho'a Xtill' Chioza' daa na: "Gokid' Jacoba', na' bwiyyid' Esaúna'."

¹⁴ ¿Bera ka inacho, naa? ¿Awak inacho Chioza' bi chone' wen? ¿Bi nakan ka! ¹⁵ La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaken' na' gaklenee." ¹⁶ Daan, nezechio aga daa le cheeni ben' gake' xiin Chiozan' kwey Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'. ¹⁷ La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' yel' wak cha'na' na' kwenche gakbe'i yog' ben' lle' doxen yell-lioni nad' nak' Chios." ¹⁸ Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjall'do' ben'ka' cheenile' gagkake' ben' widenag.

¹⁹ Na' wnaljo': "Shi choncho kon ka ba nllia Chioza' bia' goncho, bi gagk ine' napcho dol' lawe'na', la' aga wakə wsej wlloncho gagk ka cheenile'." ²⁰ Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' benan: "¿Biche benzo' nad' ki?" ²¹ La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliolate, na' sto dii wchine' che bittez.

²² Na' ka'kzə ba ben Chioza'. Ni che dii mala' chon ben' yell-lioni goklallee wiile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che ben'ka' chidol' yel' zak'zi'na', ben'ka' ba nakan kwiayi'. ²³ Na' lekzka', ba bli'e ka liizelozí ben' wen inleeb nake' daa ba biyesh'lallile' cho' na' bizi'xene' checho, na' biyone' cho' ben' li ben' shao' kwenche idol'cho balaan ka yillincho lawe'na'. ²⁴ Na' ba gox wñab Chioza' cho', aga balz neto' naknto' ben' Israelan', san len bal-le bi nakle ben' Israel. ²⁵ Chak ka wna Chioza' daa bzej dii Oseaza', daa na:

Ben'ka' bi nak yell cha', yepgakee: "Nakle yell cha'."

Na' ben'ka' bi gokid', yepgakee: "Chakid' le'."

²⁶ Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

²⁷ Ki wna dii Isaíaza' che ben' Israelka': "La'kzi shesh shan ben' Israelka' ax̄t gagkake' ben' zan ka yox daa chi' cho'a niso'na', balchokzgaken' yilagake' kwenche bi kwiayi'gake'. ²⁸ La' Xancho Chioza' lobe' wchogbi'e ka gagk che yog' ben' lle' yell-lioni." ²⁹ Ka bzej dii Isaíaza', kana' wne':

Shel' Xancho Chioza', beena' nak liizelozí ben' yel' wak choo yel' wak xen, bi bkwaane' sto chop dia chechoka', ba biyol binitcho ka gok che ben' yell Sodómaka' na' ben' yell Gomórraka', shel'ka'.

³⁰ ¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa ben'liilall'gake'ne', ba biyakgake' ben' li ben' shao' lawe'na'. ³¹ San ben' Israelka', la'kzi goklall'gake' yiyakgake' ben' wen lao Chioza' daa zejlelgake' ley che'na', bi wxakgakile'n. ³² Na' ¿biche bi biyakgake' ben' li ben' shao' lawe'na'? Daa bi ben'liilall'gake'nen'. Kon gogkakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj, ³³ yaja' daa chzetj Cho'a Xtill' Chioza', daa na:

Wselaa to ben' yell Siónna',

na' saklebile' ka to yaj daa chjachew' ben', na' ka to yaj dii lljsho'gake' na' ibixgake'.

Na' beena' wɣɛnilalleene', biga yiyajile' daa nɣɛnilalleene'.

10

¹ Na' le' beɛn' bish' na' le' beɛn' zan', daa lliallalaa na' daa chɛnab' kat' choe'lwill' Chioza' chɛnabidee yisle' beɛn' wlall ɕa'ka', beɛn'ka' nak beɛn' Israel, kwenɕhe bi kwiayi'gake'. ² Nez nle'id' ɕhegake' zechgagake' wɛneyi gongake' ka cheeni Chioza', toz daa bi neɛgakile' nakyeɛn'an cheenile' gongake'. ³ Daa bi chajni'gakile' toz Chiozan' chiyone' beɛn' beɛn' li beɛn' shao', chaklall'gake' yiyon kwingake' beɛn' wen, na' bi cheengakile' gonlilall'gake' Crístona' kwenɕhe yiyakgake' beɛn' li beɛn' shao' lawe'na'. ⁴ La' daa bid Crístona', bene' daa bi gok gon leya', na' yog' beɛn'ka' gonlilall'gake'ne' yiyakgake' beɛn' li beɛn' shao' lao Chioza'. Na' bich goncho lez daa goncho ka na leyan' yiyakcho beɛn' wen lawe'na'.

⁵ Dii Moiséza' bzeje' ka chiya'l' gon beɛn'ka' zoa xni'a leya' kwenɕhe yiyakgake' beɛn' wen lao Chioza', na' nan: "Nottezɔ beɛn' chon doxen ka na leya' si'e banez yel' mban ɕhe'na'." ⁶ Na' ɕhe beɛn'ka' nak beɛn' li beɛn' shao' lao Chioza' daa nonlilall'gake'ne', wne': "Bi sa'lall'zle, inale: ɕNora gak shaj yabana'?", (kwenɕhe gone' ka yetj Crístona' yell-lioni). ⁷ "Ni bi inale: ɕNora gak yetj gana' lle' beɛn' wetka'?", (kwenɕhe lljaleje' Crístona' ladje'ka'). ⁸ Ki chizna daa bzej dii Moiséza': "Dillaa daa ba wna Chioza' zoalenan le' na' ba yoon cho'a lol'l'lena' na' loo yichjall'do'lena'", na' lennan' daa choe'lennto' le', nanto' chiya'l' gonlilall'le Crístona'. ⁹ Shi wi'o dill' Jesúsza' nake' Xancho na' shajli'o do yichj do lalloo nan Chioza' bisbane'ne' ladj beɛn' wetka', na' yisla Chioza' li' kwenɕhe bi kwiayoo. ¹⁰ La' daa shajle'cho do yichj do lall'chon, yiyakcho beɛn' li beɛn' shao' lao Chioza', na' lekzka' daa choe'cho dill' nan Crístona' nake' Xancho, yisle' cho' kwenɕhe bi kwiayi'cho.

¹¹ Cho'a Xtill' Chioza' nan: "Nottez beɛn' gonlilalleene', biga yiyajile' daa benlilalleene'." ¹² Laa nakcho beɛn' Israel, laa bi nakcho beɛn' Israel, Crístona' nake' Xancho, na' chaklene' yog'cho cho' chɛnabcho yel' goklen lawe'na'. ¹³ La' nottezɔ beɛn' inabe' gaklen Xancho Crístona' le', na' yisle'ne' kwenɕhe bi kwiayee. ¹⁴ Per ɕnakra gon beɛn' inabgake' gaklene' legake' shi biɛn' gonlilall'gake'ne'? Na' ɕnakra gongake' gonlilall'gake'ne' shi biɛn' yengakile' xtilleena'? Na' ɕnakra gak yengakile' xtilleena' shi kono zoa ɕhixje'ile'n legake'? ¹⁵ Na' ɕnakra gak soa beɛn' ɕhixjee xtilleena' shi kono wsel' legake'? Ka na Cho'a Xtill' Chioza': "Mbalaz inleeb kat' ila' beɛn'ka' zidixje'gake' dill' wen dill' kob ɕhe Chioza'."

¹⁶ Per aga yog' beɛn' Israelka' chzenaggake' dill' wen dill' kob ɕhe Chioza'. Chak ka bzej dii Isaíaza', gana' na: "Xan', kono chajle' dillaa daa ɕhixje'nto'." ¹⁷ Daan, kwenɕhe gonlilall' beɛn' Crístona' chiya'l' yengakile' xtilleena'.

¹⁸ Na' nia': ɕAbin' yengakile' cho'a xtilleenan', lla? ɿYog'ze' ba bengakile'n! La' cho'a xtill' Chioza' nan: Cho'a xtilleeka' chllinan doxen yell-lioni axt gana' zeelo chiyoll chidon.

¹⁹ Na' chiznia', ɕanti neto' beɛn' Israelan bi wyajniinto'n, lla? Zajniinto'n. La' dii Moiséza' wdixji'e daa goll Chioza'ne' ɕhe beɛn' Israelka' kana' wne': Nad' Chios gon' wen ɕhe beɛn'ka' bi nakgake' yell ɕha' kwenɕhe gakkall'le gon' ɕhele ka chon' ɕhegake'.

Na' gon' kwenɕhe illaale daa chon' wen ɕhe beɛn' zit'ka' beɛn'ka' bi napgake' yel' chajni.

20 Na'tech dii Isaíaza' biyaxjile' wne':

Ben'ka' bi wze wneyi gombia'gake' nad', ben' ka bembia'gake' nad'.

Na' ben' kwenche ben'ka' bi wyoo yichjgake' nad' bembia'gake' nad'.

21 Na' dii Isaíaza' lekzka' wdixji'e daa goll Chioza'ne' che ben' Israelka' kana' wne': "Toshiizi goklallaa gaken ben' widenagka', ben'ka' bi chzoa xtilaana'."

11

1 Na' nia' zaba wlej yichj Chioza' yell che'na' toshiizin, lla? iBi nakan ka' La' lekzka' nad' nak' ben' Israel. Golj' lo dia che dii Abrahama' na' nak' xiin dia che dii Benjaminna'. 2 Kani'teyi wlej Chioza' neto' ben' Israel kwenche naknto' yell che', na' aga ba wlej yichje' neto'. zAbi chjtinile ka na Cho'a Xtill' Chioza' che Elíaza'? nan ka be'lwille' Chioza' wdawe' xya che ben' Israelka', chi'e: 3 "Xan', ben' wlall cha'ka' ba betgake' ben'ka' wdixjee daa gollo' legake' na' ba bliyai'gake' gana' chzeynto' bayix'ka' chonnto' li'. Stochga nad' chgaana', na' lekzka' cheengakile' witgake' nad'." 4 Na'ch Chioza' golle'ne': "Ni nzoa' galla mil ben' Israel, ben' chzenag cha' na' bin' wchek' xibe'ka' lao Baala'." 5 Na' ka'kzan chak naanlla, zi xonjchga neto' ben' Israel chzenagnto' che'. Na' yel' ben' wen che'na' wleje' neto' gaknto' lall' nee daa nake' ben' chiyesh'lallii. 6 Na' shi yel' ben' wen che'nan' wleje' neto', zejín aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

7 Ben' Israelka' goklall'gake' yiyakgake' ben' wen lao Chioza' to-bia'lall'zgake', na' bi gokan, san ben'ka' ba wlej Chiozan' bdo!' bllongakile'n. Na' ben'ka' sto, zizikchli gokchgake' ben' widenag. 8 Gok ka na Cho'a Xtill' Chioza' daa na: "Chioza' bchol bnitile' legake' kwenche bi shajni'gakile'. Na' ax't naanlla nakgake' ka to ben' bi chen chle'i." 9 Ki wna dii Davina':

"Yiyakshga lni che'ka' ka to yalj dii wzapan legake',

na' ka to dii chgoo chchew'gake', na' sak'zi'gake'.

10 Gakshgagake' ka ben' lchol;

na' toshiizi gak chegake' ka to ben' noa' to dii zii wal."

11 Na'ch nia': zAdaa bi bzenag ben' Israelka' che Chiozan' wchoonlallee legake' toshiizi, lla? iBi nakan ka'! San daa bi bzoagake' xtilleenan', na'chan bisle' ben'ka' bi naklè ben' Israel kwenche ben' Israelka' lekzka' gaktall'gake' yisle' legake'. 12 Shi yel' widenag che ben' Israelkan' benan ka gok wen che ben'ka' bi nak ben' Israel, zalechlè ki gakch wen chegake' kat' ben' Israelka' yiyonlilall'gake'ne'?

13 De to dii cheenid' we'len' le' dill', le' bi nakle ben' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon', 14 kwenche shi bal' ben' wlall cha'ka' gaktall'gake' gak chegake' ka ba chwiagake' chak chele, na' yilagake' bi kwiaiyi'gake'. 15 La' shi daa bzoa Chioza' ben' Israelka' ka'là, bene' ka ben'ka' bi nak ben' Israel bizoalengake'ne' wen, le mbalaz kat' illin lla yilebe' ben' Israelka' sto shii. La' gak chegake' ka to ben' biban ladj ben' wetka'. 16 Na' shi lee kwana' chbejcho daa chonicho yetxtil necha' daa choe'cho Chioza', zejín doxente kwana' nakan che'. Na' shi lo yaga' nakan che Chioza', lekzka' xoziiinka' nakgakan che'.

17 Ben' Israelka' zaklebgakile' yag olivo wenna' daa bchogue' bal' xoziiinka', na' le' bi nakle ben' Israel zaklebile' yag olivo yixaa daa bidee

lee yag wenna'. Na' yag wenna' noḵaan xozii yag olivo yixaa diika' bidee le'inna' na' cho'en yel' mban c̄egakan. ¹⁸ Per bi gakile nakchle ben' wench aga ka ben' Israelka', ben'ka' zaklebi xoz' yaga' diika' b̄chogue'. Bi shep sha'lall'le, la' aga xoz' yagan' cho'en yel' mban c̄heyin san loinnan' choe'n yel' mban c̄e xoziiinka'.

¹⁹ Na' wnaljale: "B̄chogue' xoziiinka' kwenḅe bidee neto' le'inna'." ²⁰ Lekzile kan' nakan, la' daa bi ben'liilall'gake' Chiozan', bzoe' legake' ka'lə, na' biyakle lall' nee daa non'liilall'lene'. Daan, bi shep sha'lall'le, san li gall illeb Chioza'. ²¹ La' shi Chioza' bi biyeshile' xoz' yaga' diika' nak dowalj, lekzka' gone' c̄hele shi naa. ²² Li gakbe'i ka ben' wen ben' shao' nak Chioza' na' lekzka' nake' ben' chsak'zi'. La' bsak'zi'e ben'ka' bi ben'liilall'gake'ne', na' ba chone' wen c̄hele. Na' gonche' wen c̄hele shi gonle ka dii le gon'liilall'lene', san shi bich gon'liilall'lene' lekzka' wzoe' le' ka'lə. ²³ Na' shi ben' Israelka' gon'liilall'gake'ne', na' yidee legake' sto shii lee yaga', la' Chioza' wak gone'n. ²⁴ Na' le' bi nakle ben' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xoziiin. ¿Alechlin diika' nak dowalj xoziiin ki yideen sto shii? Ben' Israelka' nakgake' ka xoziiin daa nak dowalj, na' aga bi lallj nakan yileb Chioza' legake' dii yoblə.

²⁵ Le' ben' bish' na' le' ben' zan', de to dii bin' inezile daa bzajni Chioza' nad', na' cheenid' inezilen kwenḅe bi gakzle ben' cha'sib na' gakzile zak'chle ka neto' ben' Israel. La' aga toshiizin gak ben' Israelka' ben' widenag, san kat'ka' ba bza' ben'ka' bi nak ben' Israel gon'liilall'gake' Crístonan', bich gak ben' Israelka' widenag. ²⁶ Na' ka illin lla gak ka', na'ch yog' ben' Israelka' yiyakgake' lall' na' Chioza'. Na' gak ka na Cho'a Xtilleena' daa na:

Yell Jerusalenna' ic̄hej to ben'
yisell yilee ben'ka' nak xiin dia c̄e dii Jacoba' lao dii mala'.

²⁷ Na' dgan chḅeb' gon' c̄hegake',
yizi'xen' saaxya c̄he'ka'.

²⁸ Na' daa bi bzenag ben' Israelka' dill' wen dill' kob c̄e Crístonan', bllaa Chioza' legake'. Na' daa gok ka' got' latj ben'liilall'lene', le' bi nakle ben' Israel. Per Chioza' ni chakile' neto' ben' Israel daa wleje' dii xozxto'nto'ka' kwenḅe gagake' ben' yell c̄he'. ²⁹ Na' daa chon Chioza', aga wikwase'n na' bi chiyajile' daa chax ch̄nabe' cho'. ³⁰ Kana', le' bi nakle ben' Israel, bi bzenagle c̄e Chioza'. Per naa, daa gok ben' wllall' cha'ka' ben' widenag lao Chioza', ba biyesh'lallile' le'. ³¹ Na' daa bi chzenaggake' c̄e Chioza' naa, chak ka' kwenḅe wliyi Chioza' legake' nan lekzka' chiyesh'lallile' legake' ka chiyesh'lallile' le'. ³² La' Chioza' bi'e latj yog'lol ben' gokgake' ben' widenag kwenḅe yog'lolgake' yiyesh'lallile'.

³³ ¡Dii xen inlleb nak yel' sin' na' yel' chajni c̄e Chioza'! ¡Ni to kono chajni daa nllie' bia' gak wa daa nllie' bia' gone'! ³⁴ La' "ni to kono nezi daa chza'lall' Xancho Chioza', na' ni to kono gak wzajniile'ne' nakan chiyal' gone'. ³⁵ Biga zoa ben' ba bi'e Chioza' dii naki c̄e' kwenḅe gone' lez yigoo Chioza' wzon c̄he'." ³⁶ La' len' b̄xe bsile' yog'lolte dii de na' bllie' bia' chongakan ka chaklallee, na' yog'lol dii de nakan c̄he'. ¡Le' chidolee koochone' balaan̄ zejli kan̄i! Kan' nakan.

12

¹ Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenḅe gakle dowalj

ben' wen ka chazlallee, la' kan' chiyal' we'la'ochone'. ² Na' bi gonle txen diika' de lo yell-lioni, san li we' latj yikob Chioza' yichjall'do'lena' kwenche yilla' yel' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³ Daa nzoa Chioza' nad' gon' xshine'na', nia' le': Ni tole bi gakile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'. ⁴ Ka nak che kwerp chechoni, dii zan dii nsa'n na' aga toz ka dii chongakan. ⁵ Ka'kzan cho', la'kzi nak zanchi, tozan nakcho daa nonlilall'cho Crístona', na' ndil nllagcho ka ndil nllag diika' nsa' to kwerp.

⁶ Chioza' ba bene' cho' wde wdeli daa gag goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiyal' wxenilalleene' gaklene' le' gone'n. ⁷ Na' beena' naki che' gaklene' ben', chiyal' gone'n do yichj do lallee. Na' beena' naki che' wli' wsedile' ben' yobla, chiyal' wli' wsedile' legake'. ⁸ Na' beena' naki che' wtipe' lall' ben', chiyal' wtipe' lall'gake'. Na' beena' naki che' izanile' bi wi'e ben', chiyal' wi'en do yichj do lallee. Na' beena' naki che' gag kwee xnezi dii chak che ben', chiyal' gone'n xochi ga zeelo gake'. Na' beena' naki che' yiyeshile' ben', chiyal' yibaile' gaklene' ben'.

⁹ Li gaki ljwell-le do yichj do lall'le. Li gakzbani dii mala' na' li soa gonle dii wenna'. ¹⁰ Li gaki ljwell-le ka bish' goljle, na' ganga goni ljwell-le ka ben' zak'chi ka le'.

¹¹ Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

¹² Li yiba yizaki daa nonle lez lljazoalenle Chioza', li gap yel' chxenall' kat' zaak yel' zak'zi'ka', na' li we'llwill Chioza' toshiizi.

¹³ Le' nakle lall' na' Chioza', li gaken ljwell-le shi bi dii chyalljile. Na' li we' ben' ga yigaangake' loo yoo lill-le.

¹⁴ Chiyal' inabile Chioza' gag wen che ben'ka' chsak'zi' le'. Li inab gag wen chegake' na' bi chishjle bia' blag' chegake'.

¹⁵ Li yiba yizakleni ben'ka' chiba chizaki na' li kwell-len ben'ka' chbell.

¹⁶ Li soalen ljwell-le wen. Bi gagle ben' cha'sib, san li gon txen ben' yesh'do'ka'. Na' bi gon kwintle ka to ben' sin'.

¹⁷ Shi ga zoa ben' chone' mal chele, bi yizi'le wzonna'. Chiyal' sho' yichjle gonle wen lao yog' ben'. ¹⁸ Chiyal' gonle axt ga zeelo gagle kwenche soalenle yog' ben' mbalaz. ¹⁹ Le' ben' bish' na' le' ben' zan', bi chiyal' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee."

²⁰ Na' lekzka' nan: "Shi chbil chdon beena' chakzbani li, be' dii yeej gawe'. Na' daa gono' ka', yiyii yido'ile'." ²¹ Bi we'le latj inabia' dii mala' le', san li gon wen kwenche gonle gan dii mala'.

13

¹ Yog'cho chiyal' wzenagcho che ben'ka' chnabia', la' aga bi yel' wnabia' de dii bi nak che Chioza'. Na' Chioza' nzoe' ben'ka' kwenche inabia'gake'. ² Na' beena' chizoshi' ben'ka' chnabia', daa nllia Chioza' bia' gonchon chizoshi'e. Na' ben'ka' chon ka', choglo chegake' sak'zi'gake'. ³ Ben'ka' chnabia', aga zoagake' kwenche wwall wshebgake' ben'ka' chon wanan, san ben'ka' chon malan chiyal' gall illebgake' legake'. Shi chall chllebo'

ben'ka' chnabia', ben wen, na' inegake' wen cho'. ⁴ La' Chioza' nzoe' ben'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə ben'ka' chnabia'n, san Chiozan' nzoe' legake' kwenche wsak'zi'gake' ka chiyali' beena' bi chon wen. ⁵ Daan, chonan byen wzenagcho che ben'ka' chnabia', aga kwenchezə bi wsak'zi'gake' chon', san daa nezicho chiyal' goncho wenan. ⁶ Na' lekzka' chiyal' we'cho daa chidol'cho chixjcho, la' Chioza' nzoe' legake' kwenche chnabia'gake', na' lennan' noni xshingake'.

⁷ Na' chiyal' yiyixjcho che yog' ben' shi bi chbag'cho chegake'. Shi chal'cho daa chchixj ben'ka' chnabia' cho', chiyal' chixjchon. Na' beena' chiyal' idap balaan, chiyal' gapchone' balaan. Na' beena' chidol' sho'e balaan, chiyal' koochone' balaan. ⁸ Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. ⁹ Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selaloo bi de che ben'." Yog'kzə diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'." ¹⁰ Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹ Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'. ¹² Ba zoa gao te che yell-lioni gani chnabia' dii mala' daa zaklebi yel cho'la', na' ba zoa gao ile'icho beeni' che Chioza'. Daan, chiyal' kwej yichjcho dii mala' na' soacho goncho dii wenna' lega ben' yoo beeni' che Chioza'. ¹³ Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlə daa nak zban. Na' bi chiyal' gakkil-lencho ben', ni bi chiyal' gakcho ben' xe'. ¹⁴ San chiyal' gon kwincho lall' na' Xancho Jesucristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14

¹ Li gap yel' chxenlall' che beena' bin' gakcha, na' bi gakkil-lenlene' ni che diika' bi nak dii llialo. ² La' bal' ben' chakgakile' nakkzan wen gaogake' bittezə yel' wao, na' zi' bale' chakgakile' chiyal' gaogake' shgal' yix' kwan. ³ Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi cheej chao yog'lol, bi chiyal' gakile' beena' cheej chao bittezə bi chone' wen. La' Chioza' ba noni xiine' choptegake'. ⁴ ¿Nora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵ Na' nit' ben' chakgakile' zoa lla nakchan lla choo lla xench aga ka lla yoblə. Na' lekzka' zoa ben' chakgakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen. ⁶ Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Cristona' balaan. Na' beena' chaki toz ka nak yog'te llaka', lekzka' Xancho Cristonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel'

choxken kat' chawe'n. Na' beena' bi chao yog'lol, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

⁷ Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'. ⁸ Shi mbancho na' goncho ka sho' Xancho Jesucrístona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho. ⁹ Crístona' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

¹⁰ Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho ljazecho lao Chioza' kwenche wchogloe' che to tocho. ¹¹ Cho'a Xtill' Chioza' nan:

Xancho Chioza' ne', dii li zoakz' nad', na' dii li yog' ben' wchek' xibe'ka' lawa'ni,

na' yoguee we'gake' dill' nan nad' nak' Chios.

¹² Na'chan to tocho yidecho kwent lao Chioza' che diika' bencho.

¹³ Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakchoplallee.

¹⁴ Daa bzajni Xancho Jesús'a' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjall'do'ena', bi nakan wen gawe'n shi naa. ¹⁵ Na' shi daa cheej chawo' chonan ka chakchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiaiyi' beena' wit Crístona' ni che'. ¹⁶ La'kzi chonle bittezə dii chakile nakan wen, bi chiyal' gonchlen shi chonan ka ina ben' yoblə aga wenan chonle. ¹⁷ La' shi ba chnabia' Chioza' cho', diika' cheej chaocho bi nakan dii lialo, san dii lialo yiyakcho ben' li ben' shao' na' soalen ljwellcho mbalaz, na' soacho yiba yizakicho daa zوالen Espírítu Sántona' cho'. ¹⁸ Na' shi zoacho choncho diiki chazlall' Crístona', na' yibayi Chioza' ka choncho na' lekzka' ben' yellioni inagake' choncho wen.

¹⁹ Daan, chiyal' goncho to dii byen soalen ljwellcho mbalaz na' gakchachcho ganga. ²⁰ Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen,

san bi nakan wen yeej gaocho to dii chonan ka gakchoplall' ben' yoblə.

²¹ Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall' bish' ljwellchoka'. ²² Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen. ²³ Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15

¹ Na' cho' ba zoachechcho chonlilall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzi-cho goncho. ² To tocho chiyal' goncho dii gaklenan bish' ljwellchoka' kwenche gakchagake'.

³ La' Crístona' aga bene' daa wyazlall' to kwintze', san gok che' ka na Cho'a Xtill' Chioza', daa na: "Daa wchell wne ben' cho' bzoazi'yaagakan nad'."

⁴ Na' yog' diika' na Cho'a Xtill' Chioza' bzejgake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho. ⁵ Chioza', beena' chon cho' yel' chxenlall' na'

chtipe' lall'cho, gaklenshgue' le' soalen ljwell-le wen kon ka bli'yi Cristo Jesúza' cho', ⁶ kwenche yog'le gakle toz we'la'ole Chioza', beena' nak Xa Xancho Jesucristona'.

⁷ Daan, li wleb ljwell-le, ka ben Crístona' blebe' le' bénlene' txen, kwenche koole Chioza' balaan. ⁸ Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xozxto'nto'ka' kwenche inezinto' chone' kon ka chchebe'. ⁹ Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawaa li' ladj ben'ka' bi nak ben' Israel,
na' gol' inia' we'lawaa li'.

¹⁰ Na' gan yoblə chiznan:

Le' bi nakle ben' Israel, li yibaleni neto' naknto' yell che'.

¹¹ Na' lekzka' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le yog'te yell, li gol' inie'.

¹² Na' lekzka' dii Isaíaza' bzeje' daa na:

Ka to yag dii chigaa, ka' yiyak xiin dia che dii Isaína',
daa galj to ben' inabi'e ben'ka' bi nak ben' Israel,
na' gongake' lez gaklene' legake'.

¹³ Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yel' wak che Espíritu Santo che'na' le'.

¹⁴ Le' ben' bish'dawaa na' le' ben' zandawaa, nezyenid' le ben' wen nakle na' le ba chajniile, na' ba chak wzajnii ljwell-le. ¹⁵ Na' lee yishi ba biyaxjid' bzej' le' che bal' diika' bi chiyal' guetlall'le, la' chaklen Chioza' nad' kwenche ¹⁶ chon' xshin Jesucristona' ladj ben'ka' bi nak ben' Israel. Na' llinni chon' nakan ka xshin bxoz, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crístona', na' yixis yiyib Espíritu Sántona' yichjlall'do'eka', na' gakgake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

¹⁷ Daa chaklen Cristo Jesúza' nad', chibaid' cho'a dill' chon' xshin Chioza' daa bene' lall' na'. ¹⁸ Aga wiyaxjid' wi'a dill' che bichlə dii ba ben', san cho'a dill' ka ba bchin Crístona' nad' kwenche zan ben'ka' bi nak ben' Israel chzenaggake' che'. Bchine' diika' wnia' na' diika' ben' ¹⁹ kon yel' wak che Espíritu che'na' kwenche gok diika' ben ble'i ben' na' wyajle'gake'. Wzoloz' Jerusalénna' na' wya' axt doxen gana' mbani Ilíricona' be'len' yog' ben' dill' wen dill' kob che Crístona'. ²⁰ Na' ben' byen jtixji'a dill' wen dill' kob che'na' gana' konon' inezin, kwenche bi jachish' jajan' xshin ben' yoblə. ²¹ San kon ka na Cho'a Xtill' Chioza', gana' nan:

Ben'ka' bin' gombia'gake' xtilleena', gombia'gake'n,
na' ben'ka' bin' yengakile' xtilleena', shajni'gakile'n.

²² Na' ni che llin dga chon' bin' gak yid' gana' zoale, la'kzi zan shii ba goklallaa yidwia' le'. ²³ Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chaklallaa yid'. ²⁴ Cheenid' tia' gana' zoale kat' sha' Españána', la' cheenid' ile'id' le', la'ch' shloll, kwenche soacho mbalaz. Na' chbez' gakenle nad' kwenche gak kooch' nez. ²⁵ Per naa, yiyaa Jerusalénna' lljasan' dii chyallji ben' bish'choka' lle' na'. ²⁶ La' ben'ka' choe'la'ogake' Crístona' Macedóniana' na' Acáyani do

yichj do lall'gake' ba btopgake' mech dii wsel'gake' che ben' yesh'do'ka' len ladj ben'ka' nonlilall' Crístona' Jerusalénna'. ²⁷ Do yichj do lall'gake' chaklall'gake' gaklengake' legake', na' dii li nakan to dii chiyal' gongake', la' lengake' ba naki chegake' dii wenka' ba bcheb Chioza' che neto' ben' Israel, na' chiyal' yigoogake' wzon che ben' Israelka' we'gake' daa chyalljgakile'. ²⁸ Na' ka yiyoll lljasan' mechi dga bengake' lo na', na' kwaa nez sha' Espáñana' na' tia' yidwia' le'. ²⁹ Na' nezid' kat' yidwia' le', dii xen inlleb gaklen Crístona' cho'.

³⁰ Le' ben' bish' na' le' ben' zan', daa nonlilall'cho Xancho Jesucrístona' na' daa chon Espíritu Sántona' ka chaki ljwellcho, chat'yoid' le' gake nad' txen inabgachile Chioza' gaklene' nad' lawi diika' chdil' chllag'. ³¹ Li inabi Chioza' yisle' nad' lo na' ben'ka' bi chonlilall'gake' Crístona', ben'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusalénna' dga lljasan' chegake', ³² kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen. ³³ Na' Chioza', beena' chon ka zoacho mbalaz, soalenshgue' yog'le. Ka' gakan.

16

¹ Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucrístona' yell Cencreana'. ² Daa nonlilallee Xancho Jesucrístona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gakenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³ Li wwapgach chiox Priscílana' len ben' che', Aquílana', ben'ka' chonlengake' nad' xshin Cristo Jesúsza'. ⁴ Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crístona' to to yell gana' jtixji'a xtilleena'. ⁵ Na' lekzka' li wwapgach chiox ben'ka' chdop chllag' choe'la'ogake' Crístona' lille'ka'. Na' wwapgachle chiox Epenétona', beena' le' chakid', beena' gok ben' nech benlilallee Crístona' gana' mbani Ásiana'. ⁶ Li wwapgach Maríana' chiox, la' le' ba bilal' bizodile' kwenche goklene' le'. ⁷ Li wwapgach chiox ben' wlall' cha'ka' Andrónicono' na' Júniaza', ben'ka' wyoolen' txen lillyana'. Nechgake' benlilall'gake' Crístona' ka nad', na' mbejlaogake' ladj ben'ka' chjtixjee xtilleena'.

⁸ Li wwapgach chiox Ámpliaza'. Le' chakidee daa nake' Xancho Jesucrístona' txen. ⁹ Li wwapgach chiox Urbánona', beena' chonlene' neto' xshin Cristo Jesúsza', na' Estáquiza', beena' le' chakid'. ¹⁰ Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' ben'ka' nake' txen loo yoo lille'na'. ¹¹ Li wwapgach chiox Herodiónna', beena' nak ben' wlall' cha'. Na' lekzka' li wwapgach chiox Narcísona' na' ben'ka' nake' txen loo yoo lille'na', ben'ka' nonlilall' Xancho Jesucrístona'. ¹² Li wwapgach chiox Trifénana' na' Trifósana', noolka' chon xshin Xancho Jesucrístona'. Na' li wwapgach chiox Pérsidana', beena' le' chakicho, la' le' ba bilal'ile' bene' xshin Xanchona'. ¹³ Li wwapgach chiox Rúfona' beena' le' zoacheche' chonlilallee Xancho Jesucrístona', na' lekzka' xneena', beena' chonile' nad' ka xiine'. ¹⁴ Li wwapgach chiox Asíncritona', Flegóntena', Hérmeza', Patróbaza', Hérmeza' na' ben' bish'choka' na' ben' zanchoka' zoalen legake'.

¹⁵ Li wwapgach chiox Filólogona' na' Júliana', na' Nerewa' len ben' zane'na', na' Olímpaza' na' yog' ben'ka' zoalen legake', ben'ka' nak lall' na' Chioza'.

¹⁶ Li wwapgach chiox ljwell-le lega ben' chaki ljwellin daa nakle Chioza' txen. Yog' ben'ka' nonlilall' Crístona' yellka' gana' ba wya' chwapgake' le' chiox.

¹⁷ Le' ben' bish' na' le' ben' zan', li wsak' bi wzenagle che ben'ka' chon ka chak ben' choplə, na' gongake' ka gakklejile che dill' lina' ba nsedle. Bi gonle legake' txen. ¹⁸ Ben'ka' chon ka' aga chongake' ka cheeni Xancho Jesucrístona', san chongake' daa nazan chegake'. Na' choe'la'o choe' dill'gake' na' choe'gake' dill' goll-lall' kwenche chonllej chongangakile' ben'ka' chajle'daz. ¹⁹ Yog'te ben' ba nezgakile' nakle ben' wizoa dill', na' le chiba chizakid' ka chonle. Na' cheenid' gakle ben' sin' kwenche gonchle diika' nak wen na' bibi dii mal gonle. ²⁰ Na' Chioza', beena' chon ka soacho mbalaz, lii wlliyai'tie' yel' wak che Satanáza' na' gone' ka wlej wshoshjen. Xancho Jesucrístona' gaklenshgue' le'.

²¹ Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípateri, ben'ki nak ben' wlall' cha'.

²² Nad', Tercio, chzej' dga na Pábloni, na' lekzka' chwap' le' chiox daa nakcho Xancho Jesucrístona' txen.

²³ Na' Gáyoni chwape' le' chiox, beeni none' lille'ni zoanto', na' lekzka' lille'ni no'en kwenche chdop chllag ben'ki choe'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljwellchoni le Cuarto.

²⁴ Xancho Jesucrístona' gaklenshgue' yog'loltele. Kan' gakan.

²⁵ Chiyal' we'la'ocho Chioza', beena' wak gone' ka soachechle gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucrístona'. Nakan daa kono wnezi kani'teyi, ²⁶ per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii ben'ka' wdixjee daa golle' legake' kani'yi kwenche yog' ben' lle' doxen yell-lioni shajle'gake'n na' wzenaggake' cheyin.

²⁷ Toz Chioza' zeelo nake' ben' sin'. Na' chiyal' koochone' balaan zejli kani daa bselee Jesucrístona'. Kan' nakan.

Kart nech daa bzej Páblona' na' bseleen lao ben'ka' nonlilall' Jesucrístona' yell Coríntona'

¹ Nad' Pablo nak' ben' gox wñab Cristo Jesúza' kwenche gak' postl che' kon ka chaklall' Chioza'. Nad', len ben' bish'cho Sóstenezi, chwapnto' le' chiox. ² Chzej' le', le' chdop chllagle choe'la'ole Chioza' yell Coríntona', na' nakle lall' nee daa ba nonlilall'le Jesucrístona'. Chioza' gox wñabe' le' kwenche gakte lall' nee len yog' ben'ka' choe'la'ogake' Xancho Jesucrístona' gatteza, la' Xancho Jesucrístona' lekzka' nake' Xangake'. ³ Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi cho'a Chioza' yel' choxken ka wen ba bene' chele daa nonlilall'le Cristo Jesúza'. ⁵ La' daa ba naklene' txen, Chioza' chaklene' le' kwenche chak gonle yog' diika' cheenile', ka choe'le xtilleena' na' leyi chajniilen. ⁶ Na' ka', ba nakbia'cha dii li ba wyajle'le xtil' Crístona' daa be'lennto' le'. ⁷ Na' daa ba non Chioza' le' daa chak gon to tole, ba chak chonle yog' daa cheenile gonle shlak chbezle yiyed Xancho Jesucrístona'. ⁸ Na' gaklene' le' soachechle gonlilall'lene' axt llana' yiyede', kwenche bibi xto'lle gat' lawe'na'. ⁹ Chios, beena' gox wñab le' kwenche nakle txen Xiine' Jesucrístona', beena' nak Xancho, toshiizi chone' ka chchebe'.

¹⁰ Le' ben' bish' na' le' ben' zan', chat'yoid' le' kon yel' wñabia' che Xancho Jesucrístona', li gak toz lao yog'lolte na' bi gonza che chele, san toz ka li se wñeyi na' li gon toz dill' lao bitteza dii gonle. ¹¹ Nia' ka', le' ben' bish'dawaa na' le' ben' zandawaa, la' ben'ka' lle' lill Cloéna' ba wnagake' nad' ka chakdil'-len l'jwell-le. ¹² Nia' ka', daa bal'-le nale: "Nad' chon' txen Páblona'", na' bal'-le nale: "Nad' chon' txen Apóloza'." Na' bal'-le nale: "Nad' chon' txen Céfaza'."* Na' zi bal'-le nale: "Nad' nak' txen Crístona'." ¹³ ¿Achakile' Crístona' nake' chop shon' kwenla? ¿Awa chakile nadaan wit' lee yag cruza' ni chele? ¿Anti lia'na' bzetjgake' ka wchoale nisa'? Nezkzile bi nakan ka'. ¹⁴ Choxken Chioza' ni tole bi bchoa' nisa', lete Crístona' na' Gáyona', ¹⁵ kwenche kono inaza daa chone' nad' txenan wchoe' nis. ¹⁶ Lekzka' bchoanis' ben'ka' lle' loo yoo lill Estéfanaza', na' bi chjadinid' shi nochla ben' yoblə bchoanis'. ¹⁷ La' aga bsel' Crístona' nad' wchoa' ben' nis, san kwenche chixje'id' legake' dill' wen dill' kob che'nan'. Na' ka chyixji'an, bi chpaa dill'ka' cho'a kwenche ki gaki ben' dill'ka' cho'a nakchan dii zak'chi aga ka daa wit Crístona' lee yag cruza'.

¹⁸ Kat' no cho'e dill' che daa wit Crístona' lee yag cruza', ben'ka' kwiayi' chakgakile' bizan chon chnan. San cho' yisla Chioza' kwenche bi kwiayi'cho, nezicho nakan dill' zakii dii nsa' yel' wak che'na'. ¹⁹ La' Cho'a Xtil' Chioza' nan:

Yiñitloa' yel' sin' che ben' sin'ka'.

Na' gonllejid' ben'ka' chaki le chajni.

²⁰ ¿Bitgui gak gon ben' sin'ka' na' ben'ka' le nsed ley che Chioza', na' ben'ka' choe' dill' dii chaki ben' nakan dill' sin'? La' Chioza' ba bli'e bibi zakii yel' sin' che ben' yell-lioni. ²¹ Lo yel' sin' che'na', ba bene' kwenche aga yel' sin' che ben' yell-lioki gaklenen legake' gombia'gake' le'.

* **1:12** Céfás: kan' le Pédrona' de dill' arameo, daa gok xtil' Jesúza'.

La' wyazlallee yisle' ben' kwenche bi kwiayi'gake' daa shajle'gake' xtill' Crístona' daa chyixje'i ben' legake', la'kzi chaki ben' bizan chon chnan.

²² Ka nak ben' Israelka', legake' chnabgake' ile'gakile' yel' wak kwenche shajle'gake', na' ben' griegoka' chiyiljgake' daa chakgakile' nak yel' sin'.
²³ San neto' chyixje'into' ben' daa wit Crístona' lee yag cruza', na' ben' Israelka' chakzbangakile' daa nanto' ka', na' ben'ka' bi nak ben' Israel chakgakile' biz dill' daa choe'nto'.
²⁴ San cho' ba gox wñab Chioza' kwenche nakcho lall' nee, ka neto' naknto' ben' Israel na' ka le' nakle ben' griego, nezicho Chioza' bli'e yel' wak na' yel' sin' che'na' daa bselee Crístona' wite' ni checho.
²⁵ Na' dga ben Chioza' daa chaki ben' yell-lioni bizan chon chnan, leyen'lannan' nakchan to yel' sin' xench aga ka bittezə yel' sin' che ben' yell-lioni. Na' daa chaki ben' yell-lioni chli'n bi nap Chioza' yel' wak, leyen'lannan' napchan yel' wak aga ka bittezə yel' wak dii nap ben' yell-lioni.
²⁶ Le' ben' bish', li se wñeyi ka nak daa gox wñab Chioza' le' kwenche nakle lall' nee la'kzi aga zanle naple yel' sin'na' de yell-lioni, ni aga zanle nakle ben' zakii, ni aga zanle goljle lo dia che ben' zakii.
²⁷ La' Chioza' ba wleje' ben' bi nake' ben' sin' yell-lioni kwenche wsi'e ben' sin'ka' yel' zto', na' wleje' ben' bibi zakii yell-lioni kwenche wsi'e ben'ka' zakii yel' zto'.
²⁸ Chioza' ba wleje' ben' bibi zakii, na' ben' choni ben' legake' nakzi, na' ben'ka' kono nakgake' yell-lioni, kwenche chli'e bibi zakii yel' zakii daa de yell-lioni.
²⁹ Na' ka', kono gag gon kwini ben' choo ben' xen lawe'na'.
³⁰ La' kwinkzen' ba bene' ka gokcho Jesucrístona' txen. Na' daa ba nakcho Crístona' txen, Chioza' ba none' cho' yel' sin' che'na', na' ba biyone' cho' ben' li ben' shao' lawe'na', na' ba bixis biyibe' yichjlall'do'chona' na' ba bisell bilee cho' lo ni'a na' dii mala'.
³¹ Na' kon ka na Cho'a Xtill' Chioza': "Shi no cheeni wshalj wshon, chiyal' wshalj wshone' che yog' diika' ba ben Xanchona' che'."

2

¹ Na' le' ben' bish' na' le' ben' zan', ka bidtixje'id' le' xtill' Chioza', aga bpaa dill'ka' be'len' le', ni bi bchin' dill' sin' che ben' yell-lioni.
² Kana' wzoa ladjlena', ben' to dii byen be'len' le' toz xtill' Jesucrístona' na' ka nak daa wite' lee yag cruza', na' bich bi dill' yoblə be'len' le'.
³ Na' ka wzoalen' le', bbleb' daa gokid' shi bi gak' wi'a xtill' Jesucrístona' ka chiyal'.
⁴ Na' ka bshaljlen' le' na' ka wdixje'id' le' xtill' Crístona', aga bi'a dill' dii chaki ben' nakan dill' sin' kwenche kooyelaa le' shajle'le. San daa bi'a xtilleena' kon yel' wak che Espíritu che Chiozan' wyajle'le.
⁵ La' aga goklallaa shajle'le ni che yel' sin' che ben' yell-lioni, san daa yenile' dill'ka' nsa' yel' wak che Chiozan'.

⁶ Dii li de to yel' sin' daa choe'lennto' ben'ka' ba nakcha nonlilall'gake' Crístona'. Per bi nakan yel' sin' che yell-lioni, ni bi nakan yel' sin' che ben'ka' chñabia'gake' lo yell-lioni, la' wllin lla te che ben'ka'.
⁷ San chzajniinto' le' yel' sin' che Chioza' daa ngash' kani'teyi, daa wlo'e xnezin kana' zi' wxə wsile' yell-lioni. La' kana'te wlo'e xnezin yid Crístona' chixje' xto'l'choka' kwenche soacho mbalaz.
⁸ Ni tlish' ben' wñabia'ka' zoa yell-lioni bi wyajni'gakile' yel' sin' che Chioza', la' shel'ka' wyajni'gakile'n, bi betgake' Xancho Crístona' lee yag cruza', beena' liizelozi nak ben' choo ben' xen.
⁹ Per ka na cho'a xtill' Chioza':
 Daa konoñ' ile'i na' konoñ' yeni, ni konoñ' sa'lall' shi gakan, lennan' wloo Chioza' xnezin gone' che ben'ka' chakgakile'ne'.

10 Na' Chioza' ba bene' kwenche Espíritu che'na' ba bzajniile' cho' cheyi diika'. Na' Espíritu che'na' nez nle'ile' yog'lol, na' chajniile' kwaslol yog' daa nak che Chioza'.

11 La' cho' ben' yell-lío shinchoza nezicho dii yoo loo yichjall'do' kwinchó, na' bi nezicho bi yoo loo yichjall'do' ben' yoblá. Ka'kzan, toz Espíritu che Chioza' nez nle'ile' daa ngoo Chioza' xnezin. 12 Na' cho' aga yel' sin' daa de yell-lionin chchincho, san Chioza' ba bene' cho' Espíritu che'na' kwenche chajniicho ka nak dii wenna' daa ba none' cho'. 13 Na' neto', kat' choe'nto' xtill' Crístona', aga chchinnto' yel' sin'na' de yell-lioniza, san chzajniinto' diika' chzajni Espíritu che Chioza' neto', na' chchinnto' dill' daa chzajniile' neto'.

14 Na' beena' bi yoo Espíritu che Chioza' loo yichjall'do'ena', bi chajli'e dill' daa chzajni Espíritu che Chioza', daa chakile' bizan chon chnan. Na' bi chajniile'n daa chyaljin gaklen Espírituna'ne' kwenche shajniile'n. 15 San beena' yoo Espíritu che Chioza' loo yichjall'do'ena' chajniile' che bitteza daa cheeni Chioza' inezile', na' kono gak bi ina che'. 16 Cho'a Xtill' Chioza' nan: "Ni to kono nezi daa cheeni Xancho Chioza' gone', na' ni to kono gak wzajniile'ne' nakan chiyal' gone'." San cho' ba yoo Espíritu che Chioza' loo yichjall'do'choni, ba chajniicho daa cheeni Crístona' gone'.

3

1 Le' ben' bish' na' le' ben' zan', bi gok we'len' le' ka dill'ka' choe'len' ben'ka' ba nakcha lo xnez Chioza', daa ni chonle ka nazan chele, na' ni nakle ka bi'do' daa bin' shajni'yen'ile che Crístona'. 2 Na' ka chon ben' kon bdo' cheenna' cho'eb' nillaa daa bin' gak gaob' yel' wawa', kan' ben' chele, bi be'len' le' dill' dii nak lallj, la' bin' gak shajniilen. Na' ni naa bin' shajni'kzilen. 3 Nia' ka', daa ni chonle daa nazan chele. Daa chakxe'ijwell-le, na' chakdil-len ljwell-le, chli'n ni chonle ka nazan chele na' chonle ka ben' bi nombia' Chioza'. 4 Daa na bal-le: "Nad' nak' txen Páblona'", na' zi bal-le nale: "Nad' nak' txen Apóloza'", ¿abi chakbe'ile ka ben' bi nombia' Chiozan' chonle?

5 ¿No nak Apóloza'? Na' ¿no nak' nad'? Zeelochoz naknto' wen llin che Xancho Crístona', na' le' bene' ka benlilall'lene' ka be'lennto' le' xtilleena'. To to neto' bennto' kon ka wlo'e xnezin gonnto'. 6 Nad' nak' ka beena' goz daa wdis' xtill' Crístona' ladjlena', na' Apóloza' nake' ka beena' wdil, daa bli' bsdchile' le'. Per Chioza' bene' ka wyajle'le daa bli' bsdinto' le'. 7 Na' aga no nak beena' chaz ni beena' chyl, la' toz Chiozan' chone' ka chgol daa ba byaz. 8 Toz ka zak' beena' chaz na' beena' chyl. Na' Chioza' gone' kwenche to toe' si'e banez kon ka nak llinna' daa bene'. 9 Neto' naknto' txen chonnto' xshin Chioza' ladjlena', na' naknto' ka ben' goz goon che', na' le' nakle ka yell-lío che' gana' chonnto' llinna'. Na' lekzka' nakle ka to yoo che' dii chonnto'.

10 Chioza' ba goklene' nad' chon' xshine'na' ladjlena', na' daa ben' ladjlena' nakan ka ben' wlek to len yoo, na' ben' yoblá chlise' zeeka'. Na' to to wen llin chiyal' wsakee shi chone' llinna' ka chiyal' gakan. 11 Na' kono gak wxe sto len yoblin, la' Jesucristonan' zaklebile' len yoona' ba chi'. 12 Na' lo len yooni, zoa ben' wxeile'n or wa plat, wa yaj dii zakii, na' zoa ben' wxeile'n yagla', wa yeje, wa yix. 13 Na' llinna' daa gon to toe' wli'lawin shi nakan dii zakii. La' kat' illin lla gon Chioza' yel' joschis che ben' yell-lioni, yi' che'na' wzeyan daa bi zakii, na' gakbia' nak nak llinna' ben to toe'. 14 Na' shi no ben to dii bi shey, na' si'e banez che xshine'na'.

15 Per shi daa bene' sheyan, na' bibi banez si'e cheyin. Na' kayaadia yile' bi kwiayee lo yi'na'.

16 ¿Abi chakbe'ile nan le' chdop chllagle choe'la'ole Crístona' nakle ka lill xlatj Chioza', na' Espíritu che'na' zoe' ladjlena'? 17 Na' shi no wlliaiyi' lill xlatje'na', Chioza' wlliaiyee beena' gon ka', na' len' nakle ka lill xlatj Chioza' daa nakle lall' nee.

18 Bi siye' kwinle. Shi nole chakile nakle ben' sin' daa naple yel' sin' che yell-lioni, chiyal' yiyakle ka to ben' bibi chajnií lao ben' yell-lioni kwenche Chioza' gone' le' dowalj yel' sin'na'. 19 La' yel' sin' che ben' yell-lioni aga bi zakaan lao Chioza'. Cho'a Xtill' Chioza' nan: "Chioza' chone' kwenche ben' sin'ka' chakchixgakile' lo yel' sin' che'ka'." 20 Na' lekzka' nan: "Xancho Chioza' nombi'e yog'lol' daa chza'lall' ben' yell-lioni, na' nezile' nakan dii bibi zakii." 21 Daan, ni tole bi chiyal' gakle ben' cha'sib daa shi non nakle txen, la' yog' ben' na' yog' dii de nakan chele kwenche si'le banez cheyin: 22 laa nad' Pablo, laa Apóloza', laa Céfaza', laa yell-lioni, laa yel' mbanna', laa yel' wita', laa daa chak naa, laa daa zi' gak. Yog'nto' len yog' diika' nakgakan chele kwenche si'le banez cheyin. 23 Na' le' nakle lall' na' Crístona', na' Crístona' nake' lall' na' Chioza'.

4

1 Chiyal' gakbe'ile neto' naknto' wen llin che Crístona', na' nak lo na'nto' chzajniínto' ben' daa kono wnezi daa wloo Chioza' xnezin. 2 Na' chonan byen gonnto' kon ka ba none' lall' na'nto' gonnto'. 3 Na' aga bitek wneyi zia' shi le' wa laa xonj ben' chi'e nad' kwent wneyi shi chak gon' xshin Chioza' ka chiyal'. Ni nad' biga chbi'a kwent wneyi che kwin' shi chon' ka chiyal'. 4 Na' la'kzi bibi de dii chao chdian nad', aga ni che ka' bibi dol' cha' de. Toz Xancho Crístona' nez nle'ile' shi chon' ka chiyal' gon'. 5 Na' daan, bi chiyal' sele kwent wneyi ben', san li kwez ax't kat'ka' yila' Xancho Crístona' na' wli'e lawi daa ngash' naa na' daa yoo loo yichjlall' do' yog' ben'. Kana'chan gon Chioza' ka sho'cho balaan shi bencho ka cheenile'.

6 Le' ben' bish' na' le' ben' zan', choe'len' le' dill'ki kwenche gak wen chele, na' cho'a dill' che kwin' len xtill' Apóloza' kwenche inezile ka chonnto' na' wsedle bi tele lawi daa na Cho'a Xtill' Chioza'. Na'ch bi gakle ben' cha'sib na' soazle che bal' ben' na' gonzile zi bale' nakzi. 7 ¿Achakile nakchle ben' zak'chi aga ka ben' yoblə? La' Chioza' bene' diika' ba naple. Na' daa ben' Chioza'gakan, ¿berache chshalj chshonzle cheyin ka inacho tobia'lozlen bllelilen?

8 Le' chakile bich bi chyalljile. Chakile ba nakle ka ben' wni'a daa non Chioza' diika' gak gon to tole. Chakile ba chnabia'lenle Crístona' na' bich chyalljile neto'. Le mba shel' dii li ba chnabia'le, kwenche len neto' inabia'lennto' le', shel'ka'. 9 Chakid' Chioza' ba none' kwenche neto' postl naknto' ka ben' liizelozí bibi zakii, na' ka ben' nchogbia' guet. Na' yog'te ben' yell-lioki na' len anjlka' chibangakile' chwiagake' ka chak chento'. 10 Ben' zan chakgakile' naknto' ben' bi nteyi daa chonnto' xshin Crístona', san le', chon kwinle ka ben' le' chajnií daa nonlilall'le Crístona'. Neto' chakbe'into' bibi chak gonnto', san le' chakile chak gonle bitteza. Chle'shii ben' le', san neto', chle'zbani ben' neto'. 11 Ax't naanlla zoa kat' chbil' chdonnto', chyallj xalaannto', chsak'zi' ben' neto', na' aga bi lill xlatjnto' de. 12 Na' chisto yichj chisto lall'nto' chonnto' llin kon ni'a na'nto'ki kwenche gat' dii yeej gaonto'. Zoa ben' chyishjgake' bia' blag' chento', na' neto' chnablnto' gaken Chioza' legake'. Chchi chsak'gake'

neto' na' chzo chzakinto' daa chongakile' neto'. ¹³ Chiya dii nagake' chento', na' neto' choe'lento' legake' dill' xochi. Na' chongakile' neto' ka ben' zeelo bibi zakii, ka to dii ba wchoon ben'. Axt naanlla ni chongakile' neto' ka'.

¹⁴ Aga chzej' dga kwenche wsi'a le' yel' zto', san kwenche wzajniid' le', daa chakid' le' ka xiin'. ¹⁵ Na' la'kzi zoa shi mil ben' wzajniile' le' che Crístona', toz beena' nak ka xalen zoa. La' nadaan nak' ka xale daa wlo'a le' lo xnez Cristo Jesúza' ka be'len' le' dill' wen dill' kob che'na'. ¹⁶ Daan chat'yoid' le', li gon ka chon'.

¹⁷ Na' daan, ba bselaa Timotewa' gana' zoale. Chakidee ka dowalj xiin' na' chone' xshin Crístona' ka chiya' gone'. Le' yisee lall'le ka nsa' cha' lo xnez Crístona', na' ka chzajniid' ben'ka' chdop chllag choe'la'ogake' Crístona' doxen gana' chda'. ¹⁸ Ba'le ba chep cha'lall'le daa chakile' bich yidwia' le'. ¹⁹ Per shi Xanchona' wi'e latj, yob yidwia' le' na' ile'id' shi ben'ka' chep cha'lall' dii li chak gongake' ka nagake' wa shi chshaljzaken'. ²⁰ Aga de dill'zan inacho ba chnabia' Chioza' cho', san daa gapcho yel' wak che'nan' na'chan gak goncho ka cheenile'. ²¹ ¿Nakra cheenile gon' kat' yidwia' le'? ¿Acheenile gonid' le' zña?, anti ¿we'len' le' dill' xochi daa le chakid' le'?

5

¹ Ba benid' dill' nagake' nan len to ben' ladjlena' zoalene' xna'zi'ena' ka xoole'. Daa chon beena' nakan to dii zban inlleb; ni ben'ka' bi nombia' Chioza' bi chongake' ka'. ² Na' la'kzi chak ka' ladjlena', ni chep cha'lall'zle daa chakile ba chonle ka cheeni Chioza'. Chiya'lə gakyeshilen na' yibejle beena' chon ka'. ³ La'kzi naa bi zoa' gana' zoale, le chi' yichj' ka nsa' chele. Na' kon li gaktezi na'kzan zoalen' le', na' li gon ka ba bchogloa' gak che beena' ben ka'. ⁴ Na' kat' ndi'a nllagle choe'la'ole Xancho Jesúza', li gaktezi na'kzan zoa' ladjlena', na' daa zoalen yel' wak che Xancho Jesúza' le', ⁵ li yibej beena' na' li gone' lall' na' Satanáza' kwenche shi yiyakbe'ile' na' yiyaj yilenile' na' yile' lo yel' zi'na' daa za llana' wchoglo Xanchona' che ben'.

⁶ Bi nakan wen chep cha'lall'le. Ba nezkzile dillaa de nan: "Lat'z levadúrana' chisgolan doxen kwa che yetxtila'." ⁷ Dii mal daa ben beena' ladjlena' nakan ka levadúrana'. Na' ka neto' ben' Israel bi choe'nto' latj yigaañ ni lat' levadúrana' loo yoo lillnto' kat' cha' lni Paskwa', ka'kzə le' chiya' kwejle beena' chon zban ladjlena' kwenche gagle ka kwa kob daa bi nchix levadúrana', kon ka ba nakkzle. La' Crístona', beena' zaklebi xil'do'na' chitgake' Paskwa', ba wite' ni checho. ⁸ Na' ka chon ben'ka' chon lni Paskwa' chbejgake' yog'lol' daa nchix levadúrana', ka'kzə cho' chiya' soa kwezcho bich goncho saaxyana' na' bi dii mal daa bencho kani'yi, san soacho do yichj' do lall'cho shajlencho daa nak dii li.

⁹ Ba bzej kz' le' to shii wnia' le' bi gonlenle txen ben'ka' chdalen ljwellin. ¹⁰ Daa wnia' bi chiya' gonle txen ben'ka' chdalen ljwellgake', wa chzelall'gake' gat' kwe'gakile' dii de yell-lioni, wa chbangake', wa choe'la'ogake' no yaj yag, aga che ben'ka' bi nombia' Chiozan' nia' ka', la' shel' bi gak lencho ladjeka' chiya' ichejtezkzcho lo yell-lioni, shel'ka'. ¹¹ San daa wnia' ka' zejin bi gak lencho nottezə ben' ne' nake' cho' txen nonlilall'cho Crístona' na' chdalene' xiin' xool ben', wa chzelallie' gat' kwe'ile' dii de yell-lioni, wa choe'la'owe' no yaj yag, wa chbell chnie' che ben', wa nake' weezo, wa nake' ben' wban. Yog' ben'ka' chon ka', ni bi

yeej gaolenle legake'. ¹² Bi nak lall' na'cho kwe'cho kwent wneyi ben'ka' bi nonlilall' Crístona'. San ben'ka' nakcho txen nonlilall'cho Crístona', legaken' chiyal' kwe'cho kwent wneyi. ¹³ Chioza' yizi'e kwent ben'ka' bi nonlilall' Crístona'. Na' le', li yibej beena' chon dii mala' ladjlena'.

6

¹ Kat' tole de to dii zed chele kon sto beena' nakle txen nonlilall'le Crístona', bi chiyal' shajle lao ben'ka' bi nonlilall' Crístona' kwenche gongake' yel' joschis chelena', san li shaj lao ben'ka' nak lall' na' Chioza' kwenche gongake' yel' joschis chelena'. ² ¿Abi nezile wllin lla le' nakle lall' na' Chioza' gonle yel' joschis che ben' yell-lioki? Na' shi len' gonle yel' joschis che'ka', lekzka' wak gonle yel' joschis che bizə diido'ka' chak naa. ³ ¿Abi nezile axt anjlka' goncho yel' joschis che'ka'? Na' shi goncho yel' joschis che anjlka', ¿abi gak goncho yel' joschis che diiki chak naa zoacho yell-lioni? ⁴ Na' shi le' chakdił-len ljjwell-le ni che biz diika' chak chele, ¿berache chajzle lao joschiska' ben'ka' bi nonlilall'gake' Crístona', ben'ka' bibi zakii ladjlena'? ⁵ Nia' le' ka' kwenche yido'latile. ¿Aniga tlish'le bi nteyi kwenche gak gonle yel' joschis che ben'ka' nonlilall'lenle Crístona'? ⁶ Latjin dii gonlen ladjle na'z, ba zejzle zjtaole xya che ljjwell-le lao joschiska' bi nonlilall' Crístona'.

⁷ Na' daa chao xya che ljjwell-le chli'n bi nsa' chele wen. ¿Biche ki chonxenlall'le yog' dii choni ben' le', wa ki chonle ka'z kat' no chzi' chban bi de chele? ⁸ Per le'la, lwaa dii gonle ka', dii zan dii choni ljjwell-le na' chizi' chibantezle che ljjwell-le.

⁹ ¿Abi nezile ben'ka' bi chon wen aga willingake' gana' zoa Chioza' chnabi'e? Bi siye'z kwinle, la' ka nak ben'ka' chdalen ljjwellin, ben'ka' choe'la'o yaj yagka', ben'ka' bi chon banez xoolin wa noolka' bi chon banez ben' cheyin, ben' xejka', ¹⁰ ben' wbanka', ben'ka' chzelalii gat' kwe'gakile' daa de yell-lioni, ben' weezoka', ben'ka' chbell chne che ben', wa ben'ka' chyiljlall' nakla si' kwangake' bi de che ben', ni to ben'ka' chon diiki bi yillingake' gana' zoa Chioza' chnabi'e. ¹¹ Na' bal-le gokle ka ben' malki kana'. Per naa Chioza' ba bixis biyibe' le', ba none' le' yell che', na' ba biyone' le' ben' li ben' shao' lawe'na' daa ba nonlilall'le Xancho Jesucristona' na' daa chon Espiritu che'na' llin lo yel' mban chelena'.

¹² Dill' de, nan: “De latj goncho bittezə.” Lıkan, per aga yog' daa goncho nakan wen. Na' la'kzi de latj goncho bittezə, bi chiyal' we'cho latj inabia'n cho'. ¹³ Nezicho yel' wawa' nakan che leechoni, na' leechoni none'n kwenche shoon yel' wawa'. Per Chioza' gone' ka te che chopte diiki. Na' kwerp chechoni aga none'n kwenche nottez gat'lencho, san kwenche goncho daa cheeni Xancho Crístona', na' Xanchona' nak lall' nee kwerp chechoni. ¹⁴ Na' ka bisban Chioza' Xancho Jesucristona' ladj ben' wetka' kon yel' wak che'na', ka'kzan yisbane' cho' ladj ben' wetka'.

¹⁵ Nezile yog'cho nonlilall'cho Crístona' chzaklebicho tkwen wej kwerp che'na'. Na' biga chiyal' wchincho kwerp chechoki nak ka tkwen wej kwerp che Crístona' kwenche gat'lencho noolə wdana'. ¹⁶ ¿Abi nezile nottezə ben' gat'lene' to noolə wda, chake'ne' toz? La' Cho'a Xtill' Chioza' nan: “Ben'ka' chop gakgake' toz kwerp.” ¹⁷ Per beena' chon kwine' lall' na' Xancho Crístona', chake'ne' toz daa yoo Espiritu che'na' loo yichjlall'do'ena'.

¹⁸ Bi wchinle kwerp chelena' gat'lenzle nottez ben', li ikwas lao dii mala' nak ka'. La' lennan' chxinj chlenchan kwerp chechona' aga ka bichlā dii mal yoblā. Beena' gon to dii mal yoblā, aga bi nonan che kwerp che'na', san daa chon beena' chchin kwerp che'na' chat'lene' nottez, chxinj chlenan do ka nake'. ¹⁹ ¿Abi nezile kwerp chechoni nakan lill xlatj Espiritu Sántona', beena' bzoa Chioza' loo yichjall'do'choni? Na' bi gag goncho daa nazan checho; ²⁰ la' Crístona' ba biya'o bizi'e cho' daa blalj xchene'na' na' wite' ni checho kwenche nakcho lall' na' Chioza'. Daan yog' daa gonlen kwerp chechoni chiya' gonchon ka sho' Chioza' balaan.

7

¹ Ka nak diika' wñabile nad' ka bzejle nad', nad' nia' nakan wen shi bi ikaa che ben' byona'. ² Per daa zoale dii nxoll gat'lenle nottez ka chon ben' yell-lioni, daan to to ben' byo chiya' soa nool che', na' lekzka' to to noolā chiya' soa ben' che'. ³ Na' ben'ka' nshagna', ka ben' byo ka nool, bi chiya' wlloni ljwellgake' kwerp che'ka'. ⁴ La' noola' aga nak kwerp che'na' che toze', san nakan len che ben' che'na'. Na' ka'kzā ben' che'na' bi nak kwerp che'na' che toze', san nakan len che xoolē'na'. ⁵ Na' daan bi wlloni ljwell-le kwerp cheleka', per shi choptele ba be'le dill' bi gat'len ljwell-le to tiemp kwenche we'llwill-le Chioza', aga bi nonan. Na' tena' chiya' yiyell ljwell-le dii yoblā kwenche bi soale dii nxoll gon dii xiwaa le' gan na' we'le cho'a xbayi beli chenna' talenle ben' yoblā.

⁶ Nia' le' ka' kwenche inezile wak wshagna' ben' byona' na' noola', per bi chonan byen shi bi cheengakile'. ⁷ Nad' chakid' nakan wen shel'ka' yog' ben' byo soe' toze' ka zoa' nad', per wde wdeli nak daa non Chioza' gon to tocho.

⁸ Na' le' bin' wshagna'le, na' lekzka' le' ba wit ben' cheleka', nia' le' naklan wen soa tozle, ka zoa' nad'. ⁹ Per shi bi yizoilen, wenchoklā ikaa chele kwenche bi sho' shejlall'le selall'le nool wa ben' byo daa chonan lallj inabia' kwinle.

¹⁰ Na' le' nshagna'le, nia' le' kon ka non Xancho Crístona' mandad gonle, aga nakan dii nia' nad': Noola' bi chiya' yilee ben' che'na'. ¹¹ Na' shi noola' yilee ben' che'na', bi chiya' yikee ben' yoblā, san wenlan yiyoe'xene' ben' che'na' na' yikeene' dii yoblā. Na' ka'kzā ben' byona' bi chiya' yilee xoolē'na'.

¹² Ka le' nshagna'le na' bi nonlilall'le Crístona' choptele, nia' le' dga, per bi nakan daa nllia Xanchona' bia' gonle: shi to ben' byo nshagna'lene' to noolā bi nonlilall' Crístona', na' noola' none' lez gax'she'lene'ne', bi chiya' yilaa ben' che'na' le'. ¹³ Na' shi to noolā nshagna'lene' to ben' byo bi nonlilall' Crístona', na' ben' che'na' none' lez gax'she'lene'ne', bi chiya' yilaa xoolē'na' le'. ¹⁴ Ben' byona', beena' bi nonlilallee Crístona' shi nshagnee to noolā ben' ba nonlilalleene', Chioza' chle'shiile'ne' ni che nool che'na'. Na' noola', beena' bi nonlilallee Crístona', shi nshagnee to ben' byo ben' ba nonlilalleene', Chioza' chle'shiilene' ni che ben' che'na'. Shel' bi nakan ka', bi chle'shii Chioza' xiine'ka', shel'ka'. San daa nonlilall' togake' Crístona', Chioza' chle'shiile' xiine'ka'. ¹⁵ Per shi xoolo'na' wa ben' cho'na', beena' bi nonlilallee Crístona', bich cheenile' soalene' li', be' latj yiyaje'. Bi chonan byen soayaadialenzo'ne', la' Chioza' ba gox wñabe' cho' kwenche soacho mbalaz. ¹⁶ Na' li' nonlilalloo Crístona', bi nezilo' shi wak gono' kwenche ben' cho'na' wa xoolo'na' gonlilallee Crístona' na' yile' bi kwiayi'e.

17 To tocho, ka beṅ' nshagna' ka beṅ' zoa toze', chiyal' soacho kon ka non Xanchona' checho ka gox wṅab Chioza' cho'. Ka'kzə chon' byen gon yog' kwen beṅ'ka' chdop chllag choe'la'ogake' Crístona'. 18 Shi nole yoole seṅ daa le circunsióon ka gox wṅab Chioza' le', bi gonle ka yinit senna'. Na' shi bi yoole senna' ka gox wṅab Chioza' le', bi koo kwinle seṅ. 19 Aga bi nonan shi yoocho senna' wa shi bi yoochon, san daa lliarote goncho ka nllia' Chioza' bia'. 20 To tocho chiyal' soacho kon ka nakcho ka gox wṅab Chioza' cho'. 21 Shi ba nzi' beṅ' li' kwenche gono' xshine'na' ka gox wṅab Chioza' li', bibi gakilo'. Per shi sho'ilo' xnezin yisane' li', ben to dii byen. 22 La' beena' ndoo chon xshin beṅ' ka gox wṅab Chioza'ne', Crístona' ba bisell bileene' lao dii mala'. Na' beena' chon xshinkze' ka gox wṅab Chioza' le', ba nak Crístona' Xane' daa ba biya'o bizi'ene' lao dii mala'. 23 Daa wit Crístona' biya'o bizi'e cho' lo ni'a na' dii mala'. Daan chiyal' wzenagchcho che' aga ka che nottez beṅ'. 24 Na' le' beṅ' bish' na' le' beṅ' zan', kon ka zoacho ka gox wṅab Chioza' cho', ka'kzan soa kwezcho lawe'na'.

25 Na' ka le' ni zoale tozle, bi nllia Xancho Crístona' bia' nak gonle, per nad' inia' ka chakid' chiyal' gonle. Na' daa ba biyesh'lallii Xanchona' nad', zak'kzi xtillaana' wzenaglen. 26 Nad' chakid' nakan wen soale kon ka zoale naa, la' llaki zoacho nakgakan dii lallj. 27 Shi zoa nool chele bi yilaalene'. Na' shi kono nool chele zoa, bi gonle byen ikaa chele. 28 Shi wshagna'le, bi nakan mal; na' shi to nool wew' wshagna'b' lekzka' aga bi mal nakan. Per dii zan dii zed chen chle'i beṅ'ka' nshagna', na' chaklallaa bi gak chele ka'.

29 Na' le' beṅ' bish' na' le' beṅ' zan', cheenid' inia' le' dga: Zi' lat'chga latj checho de. Daan, le' nshagna'le, bi we'le latj wsej wllon nool chelena' gonle ka cheeni Chioza'. 30 Na' shi nole zoale nyesh' bi we'le latj wsej wllonan gonle ka cheeni Chioza'. Na' shi nole zoale mbalaz, bi we'le latj wsej wllonan gonle ka cheeni Chioza'. Na' shi nole cha'o chzi'le bitteza, bi we'le latj wsej wllonan gonle ka cheeni Chioza'. 31 Na' shi nole chzi'le banez dii de yell-lioni, bi we'le latj wsej wllonan gonle ka cheeni Chioza'; la' yell-lioni dga nombia'cho nakan dii te cheyin.

32 Nad' chaklallaa bibi sele wṅeyi cheyin, shel'ka'. La' beṅ' byona' bi nshagna' chzeche' wṅeyi daa nak che Xanchona' kwenche gone' ka yiyoolallee. 33 San beena' nshagna' chzeche' wṅeyi cheyi daa de yell-lioni na' nak gone' kwenche yiyoolallii nool che'na' daa chone', 34 na' choplə nak diika' chzie' wṅeyi cheyin. Na' nool tona' na' ka'kzə nool wewaa zechgake' wṅeyi che daa nak che Xanchona', na' do ka nakgake' chon kwingake' lall' nee kwenche gongake' daa cheenile'. San noola' nshagna' chzeche' wṅeyi cheyi daa de yell-lioni na' nak gone' kwenche yiyoolallii beṅ' che'na' daa chone'.

35 Nia' le' ka' aga daa cheenid' wsej wllon' bi gonle, san daa cheenid' gaklen' le' gonle ka chiyali, kwenche bibi wllonan gon kwinle lall' na' Xancho Crístona' do ka nakle na' gonle ka cheenile'.

36 Shi to bi' wew' ba nakan ikaab' to nool wew' bi' ba nzag'b', na' chakib' wenan ikaab' leb' daa ba golb', wshagna'chb', aga bi mal chom'. 37 Per shi zoa bi' wew' chakib' bi chonan byen ikaab' noolə na' wzoib' beli chen chebaa kwenche bi wxinj wlem', wenan gom' bi wshagna'b'. 38 Na' bi'na' wshagna' wenkzan chom', per bi'na' bi wshagna'b' chontechb' wen.

39 Na' noola' nshagna', chonan byen soalene' toz beṅ' che'na',shlak mbane'; per shi guet beṅ' che'na', wak yikee beṅ' yoblə, kon shi nake'

ben' nonlilall' Xancho Crístona'. ⁴⁰ Per nad' chakid' wzoache' mbalazch shi bich yikaa che'. Na' dga ba wnia', chakid' Espíritu che Chioza' yoo loo yichjlall'dawa'nin na ka'.

8

¹ Na' ka nak che yel' wawa' daa chllia ben' lao lwaa lsak' chios che'ka', yog'cho nezicho cheyi dga. Per nxoll gakcho ben' cha'sib daa chakicho le nezicho. San shi napcho yel' chakina', wzecho wneyi gaken ljwellcho gakchachcho. ² Na' beena' chaki le nezile', chiyal' gakbe'ile' bi nezile' ka chiyal'. ³ Per beena' le chakile' Chioza', Chioza' nombi'ene'.

⁴ Na' ka nak yel' wawa' daa chllia ben' lao lwaa lsak' chios che'ka', nezicho lwaa lsak' chios che'ka' bibi zak'gakan, san toz Chiozan' zoa. ⁵ Dii li de dii zan daa na ben' nangkakan chios chegake'. Per la'kzi nagake' zoa chios chegake' na xangake' yabana' wa lo yell-lioni, ⁶ cho' nezicho toz Chiozan' zoa, beena' nak Xancho. Len' bxe bsil yog'lolte dii de, na' zoacho kwenche we'la'ochone'. Na' lekzka' zoa toz beena' nak Xancho, na' len' Jesucristona', beena' bxe bsile' yog'lolte dii de, na' ni chen' mbancho.

⁷ Per aga yog' ben' nezgakile' dga. Bal' ben' wyoologake' be'la'ogake' lwaa lsak' chios che'ka', na' kat' cheej chaogake' yel' wawa' daa ba bllia ben' lawinka' chakgakile' txenan chonlengake'n. Na' daa bin' gakbe'gakile' bibi zakii diika', chakgakile' malan' chongake' kat' cheej chaogake' yel' wawa'. ⁸ Per aga ni che daa cheej chaochon ile'shi'chi Chioza' cho' wa gonile' cho' nakzi; la' aga bi chon daa gaocho wa daa bi gaocho. ⁹ Per cho', la'kzi chakbe'icho aga bi zakii lwaa lsak' chios che'ka' na' nezicho aga bi nonan shi yeej gaocho diika' blligake' lawinka', chiyal' wsak'cho kwenche ki wchixcho beena' bin' gakcha lo xnez Chioza' gone' daa chakile' nakan mal. ¹⁰ La' shi nezile' aga bi zakii lwaa lsak' chios che'ka' na' cheej chaole gana' choe'la'ogake' legakan, na' ile'i to bish' ljwellle le', ben' bin' gakcha lo xnez Chioza', na' nxoll wchogalllee yeej gawe'n, la'kzi chakile' nakan mal. ¹¹ Na' daa chonle daa nezile' bi nakan mal, nxoll wlaale lo xnez Chioza' bish' ljwell-lena' beena' bin' gakcha, beena' lekzka' wit Crístona' ni che'. ¹² Na' daa chonle ka gon bish' ljwell-lena' to dii na yichjlall'do'ena' bi chiyal' gone', lao Crístona'kzan chxinj chlenle. ¹³ Daan shi daa cheej chaw' gonan ka wxinj wlen bish' ljwellaa, naklan wen bichga gaw' belaa, kwenche bi gon' ka wxinj wlene'.

9

¹ De lsens gon' daa chakid' nakan wen. Nad' nak' postl che Xancho Jesucristona'. Nad' ble'idee, na' le' ba nonlilall'lene' daa bzajniid' le' xtilleena'. ² Na' la'kzi zoa ben' bi chajle'gake' nak' postl che Jesucristona', le' nezile' nak' postl che'. Na' daa ba nonlilall'lene' chli'n kan' nakan.

³ Na' ki chilli'a xtill' ben'ka' na bi nak' dowalj postl: ⁴ Nezile' wak inabnto' gon ben' dii yeej gaonto' shel'ka'. ⁵ Na' lekzka' wak ikaanto' to noolə nonlilallee Crístona' na' wche'nto'ne' gana' gonnto' xshin Chioza', ka chon postlka' sto, na' ben'ka' nak ben' bish' Xancho Crístona', na' lekzka' Céfaza'.* ⁶ ¿Achakile' zeelo Bernabéna' len nad' chiyal' gonnto' llinna' kon ni'a na'nto'ki kwenche yeej gaonto'? ⁷ Aga ga zoa soldad chyixj gaxt che kwine'. Na' biga zoa ben' gaze' yag uvana' na' bi yeeje' daa chbian. Ni biga zoa ben' gape' no shib wa no xil' na' bi yeeje' xill'bka' kat' chsie'n. ⁸ Bi gakile' nad'zan nia' ka', la' lekzka' na leya' bzej dii Moiséza'.

* 9:5

⁹ Ƙa' leya' nan: “Bi wllino' yixja' cho'a goonka' kat' chlej chshoshjgakk trigona'.” Na' aga toz che goonkan' ze Chioza' wneyi. ¹⁰ San daa zie' wneyi chechon wne' ka'. Ƙa' leya' byojan kwenche gaklenan cho'. Ka beena' chwaan goonna', na' ka beena' chonshao' trigona', nongake' lez lengake' ikaagake' daa chizi' chilapgake'. ¹¹ Na' shi neto' naknto' ka ben' goz daa ba bzajniinto' le' cho'a xtill' Chioza', çachakile zi'telan gonnto' inabinto' le' shi bi chyalljinto'? ¹² Shi ben'ka' sto chli' chsedi le' choe'le daa chyallj chçhingakile', çalechla neto'?

Per chonnto' banez bibi chnabinto' le' kwenche bibi gombeg wzenagle dill' wen dill' kob che Crístona'. ¹³ Nezkzile ben'ka' chon llin loo lill xlatj Chioza' cheej chaogake' daa chjwa' ben'ka' lao Chioza'. Na' bxozka' chit bayix'ka' lao Chioza' de lsens gaogake' xpel' bayix'ka' chitgake'. ¹⁴ Na' ka'kzə Xancho Crístona' blie' bia' che ben'ka' chyixjee dill' wen dill' kob che'na', lekzan ibangakile'. ¹⁵ Per nad' ni tshii bin' inabid' le' gonle dii chyalljid', ni bi chzej' dga kwenche gonlen. Wenchlan guet' aga ka daa ina ben' cha' chon' xshin Crístona' daa naxjid'. Ƙa' chibaid' inia' bibi chçhixj' chon' xshine'na'.

¹⁶ Na' nad' bi gak wshalj wshon' daa chyixji'a dill' wen dill' kob che Crístona', la' chonan byen gon' daa none' lall' na'. ina' nyesh'laz gak cha' shi bi wi'a dill' wen dill' kob che'na'! ¹⁷ Na' shel'ka' chyixji'an daa goljan loo yichjlall'dawaani, na' chidol' sia' laxj', shel'ka'. Per aga chyixji'an daa goljan loo yichjlall'dawaanin, san zeelo chon' daa ben Crístona' lall' na' gon'. ¹⁸ Na' dgan baneza' chizi'a: daa le chibaid' chyixji'a dill' wen dill' kob che Crístona' na' bibi inabid' ben' wzenague'n, la' bi cheenid' ibanid' dill' wen dill' kob che'na', la'kzi wak gon ka', shel'ka'.

¹⁹ Ƙa'kzi kono ben' chnabi'e nad', chon kwini' ka ben' ndoo lla yel lao yog'lol' ben' daa choe'lengakee xtill' Crístona', kwenche shanch ben'ka' gonlilall'gake'ne'. ²⁰ Kat' zoa' ladj ben' Israelka', ben'ka' nak ben' wlall' cha', na' chsa' cha' ka nsa' chegake' kwenche gonlilall'gake' Crístona'. Na' chon' daa na leya' bzej dii Moiséza' daa nogake' la'kzi nezid' bich chnabi'an nad'. ²¹ Na' kat' zoa' ladj ben'ka' bi nombia' ley daa bzej dii Moiséza', na' chsa' cha' ka nsa' chegake' kwenche gonlilall'gake' Crístona'. Per bi inacho chzoa' ka'lə daa nllia Chioza' bia', la' chzenag' che leya' daa bzoa Crístona' loo yichjlall'dawaani. ²² Na' kat' zoa' ladj ben'ka' chaki dii zan dii bi de lsens gongake', na' chsa' cha' ka nsa' chegake' kwenche wzajni'chgakidee che Crístona'. Ba bsa' cha' ka nsa' che yog'logake' kwenche gon' gan yisla' balgake' na' bi kwiayi'gake'. ²³ Chon' yog' diiki kwenche wzenag ben' dill' wen dill' kob che Crístona' na' yizi'lengakee banez cheyin.

²⁴ Nezkzile ka nak che ben'ka' chxonj, zangake' chxonjgake', per to-chokzen' gone' gan na' ikee daa chidolee. Na' ka chon beena' chxonj kwenche gone' gan, kan' chiya' gonle, li gon ka dii le gonle ka cheeni Chioza' kwenche gone' daa si'le banez. ²⁵ Ben' wyitjka' chsed, chbej yichjgake' daa chzoazi'yaa kwerp che'ka'. Na' chongake' ka' kwenche idol' illongakile' daa yibagakile' xtit shloll na' te cheyin. San cho' choncho to dii byen kwenche idol' illonicho to dii biga lla te cheyin. ²⁶ Daan, nad' bi chon' ka beena' kon chxonj ni bi nezile' gan illine', ni bi chon' ka beena' chdil' na' bi chzakile' kwalle' beena' chdil'-lene'. ²⁷ San chnabi'a kwini' kwenche chon' daa chiya' gon' kwenche ki, ka yiyoll wli' wsedid' ben' nakan chiya' gone', nad'lə bi sho'lall'zi Chioza' ka nsa' cha'.

10

¹ Le' beñ' bish' na' le' beñ' zan', bi cheenid' gal-lall'le daa gok che dii xoxto'choka', yog'gake' wloogake' nez xan beja' daa bze Chioza' na' yog'gake' bidegake' lo neza' bsalje' loo nisdona'. ² Na' yog'gake' nakgake' ka beñ' wchoa nis daa gokgake' dii Moiséza' txen biyajlengake'ne' xan beja' na' daa bidelengake'ne' lo neza' daa byalj loo nisdona'. ³ Na' yog'lole' wdaogake' toz yel' wao daa be' Chioza' legake'. ⁴ Na' yog'lolgake' weejgake' toz nis daa bi'e legake', nisa' daa gol lee yaja', yaja' daa zaklebi Crístona', beena' wzoalene' legake'. ⁵ La'kzi yog'lolgake' wxi'gake' banex diika', zangake' bi biyoolallii Chioza' ka bengake', na' witgake' gana' bibi chashj chleb.

⁶ Na' yog' diika' gok chegake' chzajniin cho' bi chiyal' selall'cho goncho dii mala' ka bengake'. ⁷ Bi chiyal' we'la'ole diika' non beñ' lwaa lsak' chios che'ka' ka ben balgake', la' Cho'a Xtill' Chioza' nan: "Wche'gake' weej wdaogake' na' biyolla' bengake' kon daa nazan che beli chen che'ka'." ⁸ Na' bi chiyal' gat'lencho nottez beñ', ka ben balgake', na' daa bengake' ka', shllaz wit shonichoa milgake'. ⁹ Na' bi chiyal' wzoacho Chioza' gone' daa nazan checho, ka ben balgake', na' daa bengake' ka' wdinyaa belka' legake' na' witgake'. ¹⁰ Ni bibi gon inazle che Chioza' ka ben balgake' na' ni cheyin bselee anjl che'na' beena' bete' legake'.

¹¹ Na' yog' diiki gok chegake' nakan to dii chzajni cho' bi goncho ka bengake', na' lliagakan lee Cho'a Xtill' Chioza' kwenche chsi'nin cho' mbancho llaki zeelo. ¹² Daan, nottezcho shi chakicho zoachechcho nonlilall'cho Crístona', chiyal' wsak'cho kwenche bi ibixcho goncho dii mala'. ¹³ Yog' dii malaka' chdil chllagle nakgakan ka diika' chdil chllag nottez beñ'. Na' wak wxenilall'le Chioza' gaklene' le', la' len' bi wi'e latj idil illagle daa bi so sakile, san kat' idil illaglen, lekzen' gaklene' le' kwenche so sakile yichejle lawinna'.

¹⁴ Daan, le' beñ' bish'dawaa na' le' beñ' zandawaa, bi we'la'ole diika' non beñ' lwaa lsak' chios che'ka'. ¹⁵ Chshaljlen' le' ba nteile, na' kwinkzle gakbe'ile shi dga chzajniid' le' nakan shli. ¹⁶ Kat' chisa'lall'cho daa wit Crístona' ni checho, na' cheejcho lat' wej vinona' na' choe'cho Chioza' yel' choxken, zejín yetxcho Crístona' txen daa blalj xchene'na' ni checho. Na' kat' chxoxjcho yetxtila' na' chaochon, zejín nakchone' txen daa bzani kwerp che'na' wite' ni checho. ¹⁷ Na' la'kzi nakcho beñ' zan, toz yetxtilan' chaocho, na' zejín nakcho ka toz kwerp.

¹⁸ Na' li wwia ka chon beñ' Israelka'. Yog' beñ'ka' chaogake' xpel' bayix'ka' chitgake' lao Chioza' nakgake' toz choe'la'ogake'ne'. ¹⁹ Na' bi gakile nia' lwaa lsak' daa non beñ' chios che'ka' nakgakan dii zakii, ni bi gakile' bel' che bayix'ka' chitgake' lawinka' zak'chgakan ka bittezə bel'. ²⁰ San ki zejín daa nia' ka': kat' beñ'ka' bi nonlilall'gake' Chioza' chitgake' bayix'ka' chliagake'n lao lwaa lsak' chios che'ka', dii xiw'ka'lan choe'gake'n, na' aga Chiozan'. Na' bi cheenid' we'la'olenle legake' dii xiw'ka'. ²¹ Bi gak yeej gaocho daa cheej chaocho kat' chisa'lall'cho daa wit Xancho Crístona', na' lekzka' yeej gaotezcho daa cheej chao beñ'ka' choe'la'o dii xiw'ka'. ²² Bi chiyal' wshaacho Chioza', la' aga wzo wzakichone'.

²³ Dez dill', nagake': "Wak goncho bittez dii cheenicho." Dii likzan, per aga yog' daa gak goncho nakan wen. La'kzi de latj goncho bittezə, aga yog' daa goncho gaklenen bish' ljwellchoka' gakchachgake' lao Chioza'. ²⁴ Ni

tocho bi chiyał' goncho ka gak wen che tozcho, san chiyał' gакlencho beñ' yoblə kwenche gak wen che'.

²⁵ Bittezə bel' dii chit'gake' lao yaana' wakə si'len. Na' bi inable shi nakan dii bliagake' lao lwaa lsak' chios che'ka' kwenche bi gакchoplall'le cheyin. ²⁶ La' doxen yell-lioni na' yog'te daa de lawinna' nakan che Xancho Chioza'.

²⁷ Shi to beñ' bi nonlilallee Crístona' chaxe' le' lljtaole lille'na', na' cheenile' shajle, li yeej li gao daa gone', na' bi inabilene' shi nakan dii blie' lao lwaa lsak' chios che'na' kwenche bi gакchoplall'le cheyin. ²⁸ San shi no ina le': "Beli nakan dii wllia lao lwaa lsak' chios cha'ka'", na' bi gaolen ni che beena' wna le' ka'. La' beena' wna ka' wakte gакile' malan chonle shi gaolen. ²⁹ Bi gакile nia' malan gonle gaolen, san nia' ka' ni che beena' gакile' malan chonle shi gaolen.

La'kzi nezid' aga bi nonan gaw' bittezə, bi cheenid' gon' ka sa'lall' beñ' yoblə nan malan' chon'. ³⁰ Na' shi cho'a Chioza' yel' choxken cheyi daa gaw', ¿berache inaz beñ' malan chon' daa chaw' to dii ba bi'a Chioza' yel' choxken cheyin? ³¹ Na' bittezə dii chonle, shi cheej chaole wa shi bichlə dii yoblə chonle, chiyał' gonlen ka sho' Chioza' balaan. ³² Bi gonle ka ixop beñ' yoblə gone' to dii mal, laa nake' beñ' Israel, laa ni nake' beñ' Israel, laa nake' beñ' nakcho txen nonlilall'cho Chioza'. ³³ Li gon ka nad', la' chon' to dii byen toshiizi chon' ka yiyoolallii yog' beñ'. Aga chon' kwenche to nad'zə gak wen cha', san chon' ka gak wen che beñ' yoblə kwenche yilagake' bi kwiayi'gake'.

11

¹ Li wsa' to chele ka nsa' cha', la' nad' nsa' cha' ka bsa' che Crístona'.

² Le wen chonle daa toshiizi chjadinile nad' na' ni zejlenle diika' bli' bsedid' le'. ³ Per cheenid' shajniile dga: Chioza' chñabi'e Crístona', na' Crístona' chñabi'e yog'lol beñ' byo, na' beñ' byoka' chñabia'gake' nool che'ka'. ⁴ Na' nottezə beñ' byo shi nkwash' yichje'na' shlak choe'lwille' Chioza' wa shlak chyixji'e daa che' Chioza'ne', bi chgwee Crístona' balaan. ⁵ San shi nottezə nool bi wkwash' yichje'na' shlak choe'lwille' Chioza' wa shlak chyixji'e daa che' Chioza'ne', na' chñite' balaan che beñ' che'na'. Na' shi ka' chone', na' nake' ka to noolə beñ' nshib axt lo yej. ⁶ Na' shi to noolə bi wkwash' yichje'na', wenlan wshibteguen' axt lo yej. Na' shi chido'ile' wshiben', chiyał' wkwashen. ⁷ Na' beñ' byona' bi chiyał' wkwash' yichje'na' daa nake' lwaa lsak' Chioza' na' chli'e balaan che'na'. Na' noola' chli'e balaan che beñ' che'na'. ⁸ La' aga kwit lee noolan' wlej Chioza' beñ' byona', san noolan' wleje'ne' kwit lee beñ' byona'. ⁹ Na' ni bi bxie' beñ' byona' kwenche gакlene' noola', san bxie' noola' kwenche gакlene' beñ' byona'. ¹⁰ Ni cheyi daan, na' ni che anjlka' len ladjchoka', chiyał' wkwash' yichje'ka' kwenche nakbia' chapgake' balaan beñ' che'ka'. ¹¹ Per cho' nakcho Xancho Crístona' txen, nezicho noolka' chyallgакile' cho' beñ' byo, na' cho' beñ' byo chyalljicho noolka'. ¹² La' ka nak daa bchej noola' kwit lee beñ' byona', lekzka' beñ' byona', noolan' chzane' le'; per Chiozan' bxə bsile' yog'lol.

¹³ Na' le'zə, li wwiakachi shi nakan wen we'lwil noolka' Chioza' gal' yichjzgage'. ¹⁴ Kon ka yoolocho choncho, chakbe'icho nakan yel' zto' we'z beñ' byona' latj igol yish' yichje'na'. ¹⁵ San nakan wen we' noola' latj igol yish' yichje'na' na' nakan to balaan che'. La' Chioza' none'n kwenche

wkwasha'n yichje'na'. ¹⁶ Na' shi nole bi chazlall'le dga ba wnia', chiyal' inezile ka neto' na' ka yog' kwen ben'ka' chdop chllag choe'la'ogake' Chioza', toz ka yoolonto' chonnto'.

¹⁷ Na' ka nak dga inia' le', bi gak inia' le' wen chonle. La' kat' chdop chllagle choe'la'ole Chioza' lwaayin dii nan gакlenan le', chzoazi'yaalan le'. ¹⁸ Zigaate cheenid' inia' le' daa ba benid' nagake' chele nan kat' chdop chllagle choe'la'ole Chioza' nonzə che chel-le. Na' chajli'a dii lijakz ka chonlen. ¹⁹ Na' chakljayile chiyal' gакle chop shon kwenlə kwenche wli'lawin nolen chazlalli Chioza' ka chonle. ²⁰ Na' kat' chdop chllagle na' cheej chaolen ljwell-le txen kwenche chisa'lall'le daa wit Xancho Jesucristona', bi chonlen ka bllie' bia'. ²¹ La' kat' yeej gaole, bi chbez ljwell-le kwenche yeej gaole txen, san to tole lii cheej chaotele yel' wao cheleka'. Na' bal-le bibi de gaole na' zi bal-le axt chzollile. ²² ¿Abi zoa lill-le ga yeej gaole? ¿Berache chonzile nakzi ben'ka' nakcho txen choe'la'ocho Chioza' na' chsi'zle yel' zto' ben'ka' bibi de yeej gaogake'? ¿Bitgui iniale, lla? ¿Achakile inia' le' le' wen chonle? Bi inia' le' ka', la' aga wenan chonle.

(Mt. 26:26-29; Mr. 14:22-25; Lc. 22:14-20)

²³ Dga ba bli' bsedid' le' nakan daa bli' bсedi Xancho Jesucristona' nad'. Lle'na' ben Júda'ne' lo na' ben' malka', Xancho Jesús'a bexee yetxtila', ²⁴ na' biyoll bi'e Chioza' yel' choxken, na'ch bxoje'n na' chi'e: "Dgan kwerp cha'ni daa chzanid' ni chele. Li gox' lat' wejan gaolen. Li gon dga kwenche lljadinile nad'." ²⁵ Na' lekzka' biyoll wdaogake' xshe'na', bexee kopa' daa yoll vinona', na' chi'e: "Dga yollə loo kopi zejín xchen'na' daa laljə daa gon ka gакli dii koba' bcheb Chioza' gone'. Li gon dga, na' to to ka yeejlen li lljadini nad'." ²⁶ Na' to to ka gaole yetxtila' na' yeejle vinona' axt llana' yiyed Xancho Crístona' zejín chyixje'ile ben' ka nak daa wite' ni checho.

²⁷ Nottezə ben' gawe' yetxtila' wa yeeje' vinona' daa chonan ka lljadinicho Xanchona', na' bi chape' balaan ka nak daa chone', toz ka nak xtoleena' ka che ben'ka' betgake' Xanchona' na' blaljgake' xchene'na'. ²⁸ Daan, to tocho chiyal' yiya yiyilj kwincho kat' zi' gacho yetxtila' na' kat' zi' yeejcho vinona'. ²⁹ La' Chioza' wsak'zi'e nottez ben' kontele yeej gawe'n na' bi gone'n ka kwee Xancho Crístona' balaan daa bzani kwerp che'na' ni checho. ³⁰ Daan, zanle bi shao'le wa zoazi'yaale, na' bal ben'ka' nakle txen ba witgake'. ³¹ Per shi yiya yiyilj kwincho, Xancho Chioza' bi wsak'zi'e cho'. ³² Na' shi chsak'zi'e cho', chone'n kwenche yigooshlilall'cho na' bi wlliayi'lene' cho' ben'ka' bi nonlilall'gake'ne'.

³³ Na' le' ben' bish' na' le' ben' zan', kat' chdop chllagle kwenche yeej gaole, li kwez ljwell-le. ³⁴ Na' shi nole chbil chdonle, chiyal' yeej gaole loo yoo lill-le kwenche bi gonle ka gonan byen tele yel' zak'zi' daa bi chonle wen kat' chdop chllagle. Dech diika' cheenid' wzajniid' le', na' kwaa xnezin kat' yidwia' le'.

12

¹ Le' ben' bish' na' le' ben' zan', cheenid' inezile che diika' non Espiritu che Chioza' gак gon to tocho.

² Nezkzile kana' bin' gonlilall'le Xancho Jesús'a, bentezle txen ben'ka' choe'la'o lwaasak' chioska' diika' ni bi chak ine. ³ Daan, cheenid' inezile ni to ben' bi ine: "Aga bi zakii Jesús'a" shi zoalen Espiritu che Chioza'

le'. Na' lekzka' ni to ben' bi gak ine': "Jesúza' nake' Xancho" shi bi zoalen Espíritu Santo che Chioza' le'.

⁴ Wde wdeli daa chon Espíritu che Chioza' to tocho, per lekzen' chone' yog'tegakan. ⁵ Wde wdeli nak xshin Xancho Crístona' goncho, per toze' len' nak Xancho. ⁶ Na' wde wdeli nak daa none' lall' na'cho gon to tocho, per toz Chiozan' chaklene' cho' kwenche chak chonchon. ⁷ Chioza' chli'e zoalen Espíritu che'na' cho' daa none' to tocho diika' chak choncho kwenche chaklenen yog'cho. ⁸ Na' ba bene' kwenche Espíritu che'na' chaklene' balcho choe'lencho ben' dill' kon yel' sin' che'na', na' zi balcho, chone' ka chajniicho daa nak che Chios na' chak chzajniichon ben' yoblə. ⁹ Na' zi balcho, chon Espíritu che'na' ka chajle'chacho gone' daa inabichone'; na' zi balcho, chone' ka gak yioncho ben'. ¹⁰ Na' zi balcho, chchine' kwenche choncho yel' wak; zi balcho, chone' ka chak chyixje'cho daa na Chioza' cho'; zi balcho, chone' ka chakbe'icho shi dillaa choe' ben' dii li nakan che Chioza' wa shi nakan che dii xiwaa. Zi balcho, chone' ka chak chnecho wde wdeli dill' dii bi nsedcho; na' zi balcho, chone' ka chak chzajniicho bin wna beena' chne dillaa. ¹¹ Na' toz Espíritu che Chioza' chgwee xnezin goncho yog' diika', na' le' chgone' daa gon to tocho.

¹² Na' ka kwerp chechona' nakan toz la'kzi zan diika' ndil nllagan, ka'kzə cho' nonlilall'cho Crístona' nakchone' toz la'kzi nakcho ben' zan. ¹³ Na' yog'lolcho cho', ka ben' Israel, ka ben' griego, ka ben' ndoo lla yel chone' xshin ben', na' ka ben' chon xshinkze', Espíritu che Chioza' ba bene' kwenche nakcho ka toz kwerp. Na' toz len' yo'e loo yichjall'do' to tocho.

¹⁴ Na' ka nak kwerp chechona', zan diika' ndil nllagan. ¹⁵ Na' shi ni'achona' inan: "Daa bi nak' neena', bi ndil nllag' kwerpa'." La'kzi shi inan ka', ndil nllagkzan kwerpa'. ¹⁶ Na' shi nagchona' inan: "Daa bi nak' jalawe'na', bi ndil nllag' kwerpa'." La'kzi shi inan ka', ndil nllagkzan kwerpa'. ¹⁷ Na' shel'ka' doxen kwerp chechona' nakan jalaacho, znakra goncho kwenche yenicho? Na' shi doxen kwerp chechona' nakan nagcho, znakra goncho kwenche ila'icho? ¹⁸ Na' Chioza' bzoe' to to diika' ndil nllag kwerp chechona' kon gana' chakile' nakan wen soa to ton. ¹⁹ La' shel' toz ka nak yog'te daa ndil nllagan, bi nakan to kwerp shel'ka'. ²⁰ Na' la'kzi zan diika' ndil nllaggakan kwerp chechona', tozkz kwerpan nakan.

²¹ Na' jalaochoka' bi gak ye'gakan na'choka': "Bi chyalljid' le'." Ni bi gak ye' yichjchona' ni'achoka': "Bi chyalljid' le'." ²² Na' diika' ndil nllag kwerp chechona' daa chakicho bi nakan wal, leləgakannan' lliallote. ²³ Na' diika' ndil nllag kwerp chechona' daa chakicho bitek bi zaka'n, leləgakannan' chapshiicho. Na' diika' bi cheenicho ile'i ben' chkwashi'chon xachona'. ²⁴ Na' diika' ndil nllag kwerp chechona' na' bi chonan ka yiyi yido'icho ile'i ben' legakan, bi chonan byen wkwash'chon. Na' ka' ben Chioza' kwerp chechona' kwenche nkwash'cho diika' chonan ka yiyi yido'icho ile'i ben' legakan. ²⁵ Na' yog' diika' ndil nllag kwerpa' chaklen ljwellin daa naggakan toz. ²⁶ Daan shi gayi kwerp chechona' chey chla, doxen kwerpa' bi shao'. Na' shi gayi kwerp chechona' chonichon wen, doxenan chibayi.

²⁷ Na' le' nakle ka kwerp che Crístona' daa naklene' toz, na' to tole nakle ka tkwen wej kwerp che'na'. ²⁸ Na' ladjchona', cho' chdop chllagcho choe'la'och Crístona', Chioza' lliallote bzoe' neto' naknto' postl, na'ch bzoe' ben' chyixji'e daa chi'ene', na' de wyoni bzoe' ben' wli' wsedile'

ben' cho'a xtilleena'. Na'ch bzoe' ben' wli'e yel' wak che'na', na' ben' yiyone' ben', na' ben' gaken bish' ljwellchoka', na' ben' chgoo xnezin che xshine'na', na' ben' chne wde wdeli dill' dii bi nsede'. ²⁹ Nezicho aga yog'cho nakcho postl. Aga yog'cho chak chixje'cho daa na Chioza' cho'. Aga yog'cho chak wli' wsedicho cho'a xtilleena'. Na' aga yog'cho chak goncho yel' wak. ³⁰ Aga yog'cho chak yiyoncho ben'. Aga yog'cho chak inecho wde wdeli dill' dii bi nsedcho. Na' aga yog'cho chak yizajniicho bi zeji dill'ka'. ³¹ Na' le', li selall' gaken Espiritu che Chioza' le' kwenche gag gonle diika' zak'chi.

Na' naa wsedid' le' to dii lialaotech.

13

¹ Shi nad' chak' wde wdeli dill' dii chne ben' yell-lioni na' axt len xtil' anjlka' chak', per bi chakid' ben', aga bi zjanayin chak' diika', na' nak' ka to dii nak de ya dii chon dane wa ka platiy dii chon sshag. ² Na' la'kzi shi chak chixji'a daa na Chioza' nad', na' nezid' yog'lol daa nak che Chioza' axt daa kochnon' inezi, na' la'kzi shi le chajli'a che Chioza' axt chon' ka illa' xishna' yaaka', shi bi chakid' ben', aga bi zjanayin chak gon' diika'. ³ Na' la'kzi shi wi'a ben' yesh'do'ka' yog' dii de cha', wa izanid' kwerp cha'ni kwenche wzeygake'n, shi bi chakid' ben', aga bi gakenan nad' lao Chioza'.

⁴ Shi chakicho ben', gapcho yel' chxenlall' chegake', gonicho legake' wen, bi gaxe'icho legake', bi wshalj wshoncho lawe'ka', bi gakocho ben' cha'siba, ⁵ bi gonichogake' zban, bi chiljcho daa nak to banez chezcho, bi gakocho zgaal zyil, ni bi koolall'cho. ⁶ Ni bi yibaicho kat' no chon mal, san yibaicho kat' no chon wen. ⁷ Shi chakicho ben', bi goncho dii choo dii xen bittez dii chonile' cho', na' bi sa'lall'cho mal che', san toshiizi goncho lez gone' wen, na' so sakicho bitteze.

⁸ Yel' chakina' aga wiyoll widon. San ka nak daa chyixjee ben' daa che' Chioza'ne', na' daa ine ben' wde wdeli dill' dii bi nsede', wllin lla bich iyalljan, na' ni bich bi iyalljicho inezicho. ⁹ La' lat'chga daa nezicho naa, na' lat'chga daa na Chioza' cho' kwenche chyixje'ichon ben', ¹⁰ per kat' illin lla Chioza' gone' ka gombia'chone' kwaslol, na' te cheyi diika' chzajniin cho' lat' wej naa.

¹¹ Kana' nak' bi'do', bshalj' lega bi'do', ben' pensar ka bi'do', na' wya-jniid' lega bi'do'. Per ka bgol' bich bsa' cha' ka che bi'do'. ¹² Ka'kzan chak checho kon daa nak che Chioza' naa. Nakcho ka to ben' chwia to lo wan dii bi nlayen'. Per wllin lla kat' ile'yen'ichone' ka chle'i cho' alao ljwellcho. Bin' gombia'yen'cho Chioza' naa, per wllin lla kat' gombia'chone' kwaslol ka nombi'e cho'. ¹³ Na' naa diiki shonə nakgakan dii lialote goncho: gonlilall'cho Chioza', gonchone' lez, na' gapcho yel' chakina'. Na' daa lialote lawi diiki shon, lennan' yel' chakina'.

14

¹ Li gon byen gakile' bish' ljwell-leka' na' lekzka' li selall' gon Espiritu che Chioza' le' to dii gag gonle, na' daa lialoch selall'le gone' ka gag chixje'le daa ina Chioza' le'. ² La' beena' chne dill' daa kono chajni, Chiozan' chshaljlene', aga ben' yell-lionin. La' Espiritu che Chiozan' chone' ka cho'e dill' daa kono chajni. ³ San beena' chyixjee daa che' Chioza' le', chone' ka gakhach ben' lao Chioza', na' chtipe' lall'gake' na' chiyonxenlallee legake'. ⁴ Beena' chne dill' daa kono chajni, to le'zen'

chaklenan, san beena' chyixjee daa che' Chioza'ne' chaklene' yog' beñ'ka' chdop chllag choe'la'ogake' Crístona' kwenche' gachagake' lo xneze'na'.

⁵ Nad' cheenid' shel'ka' yog'lol-le' gach'inele' dill'ka' daa kono chajnií, per wibachid' shel'ka' gach'chixje'le' daa ña' Chioza' le'. La' dii zak'chi daa chyixjee beñ' daa na' Chioza' aga ka daa ñie' dill' daa kono chajnií, lete shi yizajniile' beñ'ka' bin zeji dill'ka' chñie' kwenche' gachachagake' lao Chioza'. ⁶ Na' le' beñ' bish' na' le' beñ' zan', shi nad' yidwia' le' na' ñia' dill' daa kono chajnií, bi gachlenan le'. Lete waklenan le' shi wzajniid' le' to dii ba bli' bsemi Chioza' nad', wa to dii chiya' ñezile' che', wa chixje'id' le' bi ñe' nad', wa wli' wsedid' le' cho'a xtilleena'.

⁷ Kachaka' blleja' wa no dii lia kwerd' cheyin, kono shajnií bin chkwel-gake' shi bi chllaa shiinka'. ⁸ Na' kat' chak to wdil, shi beena' chkwel clarínna' bi wkwelle'n kwas'lo, aga no idop illag kwenche' shajgake' lo wdila'. ⁹ Na' ka'kzan chak'chele, shi ñe'le' dill' daa bi chajnií beñ', nakra gone' shajniile' bin nale. Na' bibi zakii dill'ka' chñe'le' shi ñaa. ¹⁰ Nezi cho zan kwen'xtill' beñ' de yell-lioni na' to togakan chajnií beñ'ka' chñegake'n. ¹¹ Na' shi bi chajniid' dillaa we'len to beñ' nad', nak' ka beñ' zit' par le', na' lekzka' le' nake' ka beñ' zit' par nad'. ¹² Na' daa ba chzelall'le gon' Espíritu che' Chioza' daa gach gonle, li gon ka dii le' ñable daa gachlenan bish' l'jwell-leka' chdop chllag choe'la'ogake' Crístona' kwenche' gachachagake' lawe'na'.

¹³ Daan, beena' chñe' dill' daa kono chajnií, chiya' ñabile' Chioza' gachlene'ne' kwenche' gach yizajniile' beñ' bin zeji dillaa chñie'. ¹⁴ La' shi chshaljen' Chioza' dill' daa bi chajniid', yichjall'dawaani nezin chshaljen' Chioza', per bi chajniid' bin chepee. ¹⁵ ¿Beran chiya' gon', lla? Chiya' we'lwill' Chioza' kon dill' daa na' Espíritu che'na', na' lekzka' we'lwill' kon dill' daa chajniid'. Na' lekzka' chiya' gol' kon dill' daa na' Espíritu che'na', na' gol' kon dill' daa chajniid'. ¹⁶ La' shi we'la'ole Chioza' kon dill' daa kono chajnií, la'kzi nakan' che' Espíritu che' Chioza', beñ'ka' yengakile' dill'ka' chñe'le' aga gongake' le' txen we'le' yel' choxken Chioza' la' bi chajni'gakile' bin nale. ¹⁷ La'kzi choe'le' Chioza' yel' choxken do yichj do lall'le, bi chaklenan beñ' yoblə daa bi chajni'gakile' bin nale. ¹⁸ Cho'a Chioza' yel' choxken daa chñech' dill' daa kono chajnií aga ka yog'tele. ¹⁹ Per kat' ndop nllagcho choe'la'ocho Chioza' txen, wenchlan ñia' gay'za dill' daa chajniicho kwenche' wzajniid' beñ' yoblə, aga ka daa ñia' ga shi mil dill' daa kono chajnií.

²⁰ Na' le' beñ' bish' na' le' beñ' zan', bi gonzle pensar ka bi'do' bin' shajnií, san li gon pensar ka beñ' golə, beñ' ba chajnií. Per ka nak' che' dii mala', li gach ka to bi'do' bin' sho' yichjin dii mala'. ²¹ Cho'a Xtill' Chioza' nan: "Wchin' beñ' zit', beñ' chñe' dill' yoblə, kwenche' wzajniid' beñ' Israelki, per ni ka' bi wzenaggake' cha', na' Xancho Chioza'." ²² Daan, kat' chñecho dill' daa kono chajnií chonan kwenche' beñ'ka' bi chon'ilall'gake' Chioza' gachbe'gach'le' zoalene' cho' per bibi chzajniin cho' ba non'ilall'chone'. San daa chixje'cho daa na' Chioza' cho', chaklenan cho' ba non'ilall'chone' per bi chaklenan beñ'ka' bi chon'ilall'gake'ne'. ²³ Na' kat'ka' ndop nllagle choe'la'ole Crístona', shi yog'zle choe'le' dill' daa kono chajnií, na' sho' beñ' bi chajniile' bin chonle' wa beñ' bin' gon'ilall' Crístona', wak gach'le' bi nza'n' chelenan'. ²⁴ San shi yog'le' chyixje'le' daa na' Chioza' le', na' sho' to beñ' bin' gon'ilall' Crístona' wa to beñ' bi chajnií bin chonle, na' yiyakbe'ile' nake' beñ' saaxya na' yiyaj yilenile' dii malka'

chone' ka yenile' dill'ka' chyixje'le. ²⁵ Na'ch gonan ka wli'lawi daa yoo loo yichjall'do'ena', na' wchek' xibe' we'lawee Chioza', na' gakbe'ile' dii licha Chioza' zoalene' le'.

²⁶ Na' le' ben' bish' na' le' ben' zan', kat' chdop chllagle de latj kwenche bal-le gol-le dii koon Chioza' balaan, na' zi bal-le wli' wsedile, zi bal-le chixje'le daa na Chioza' le', na' zi' bal-le inele dill' daa kono chajni, na' zi bal-le yizajniile dillaa kono chajni. Yog' diiki chiyal' wchinlen kwenche gaklenan soachechle lo xnez Chioza'. ²⁷ Na' kat' inele dill' daa kono chajni, chopzle wa shonzle inelen, na' yizoayile inele, na' chiyal' soa to ben' yizajniile' bin wnale. ²⁸ Na' shi kono zoa ben' chak yizajniile' bin inale, bi chiyal' inelen gana' ndop nllagle choe'la'ole Crístona', san wak inelenlen Chioza' de loo yichjall'do'lena'zə. ²⁹ Na' lekzka' chop shonzlen chixje'le daa na Chioza' le', na' yizoayile inele. Na' ben'ka' chzenag, chiyal' wzenagyen'gake' shi dii li nakan daa na Chioza'. ³⁰ Shi shlak to ben' chyixji'e dillaa daa che' Chioza'ne', na' ine Chioza' sto ben' chi'e ladjlana', chiyal' kwez beena' chne kwenche chixjee beena' sto daa che' Chioza'ne'. ³¹ To tole yizoayile chixje'le daa na Chioza' kwenche yog'le shajni'chile diika' na Chioza' na' wtipch lall'le. ³² Na' beena' chyixjee daa che' Chioza'ne' chiyal' inabia' kwine' kwenche wi'e latj ine ben' yoblə, shi naa. ³³ La' Chioza' cheenile' gonle xochi yog' daa chonle kat' choe'la'olene' na' bi gonle kon daa nazan chele.

Ka yoolo ben'ka' choe'la'o Crístona' yog'te gana' chdop chllaggake', ³⁴ noolka' chiyal' soagake' llizə gana' chdop chllagle, la' bi de lsens inegake'. San chiyal' wchek' yichj wchek' laogake' lao ben'ka' chnabia' legake', kon ka na ley daa bzej dii Moiséza'. ³⁵ Na' shi de daa cheengakile' inezgakile', chiyal' inabgakile' ben' che'ka' loo yoo lillgake', la' bi nakan wen inegake' kat' ndop nllagle.

³⁶ Bi gakile zigaate ladjlanan' golj wxe cho'a xtill' Chioza', ni bi gakile le'chgan ba bleblen. ³⁷ Shi nole chakile nakle ben' chyixjee daa na Chioza', wa chakile Espíritu che Chioza' chzajniile' le', chiyal' gakbe'ile dga chzej' le' nakan dii chon Xancho Crístona' mandad. ³⁸ Na' shi no bi chzenag cheyi dga chzej' le', lekzka' kono wzenag che'.

³⁹ Na' le' ben' bish'dawaa na' le' ben' zandawaa, li selall' gak chixjeele daa na Chioza' le', na' bi wllonle ine ben' dill' daa kono chajni. ⁴⁰ Per bitteza dii gonle, li gonan kon ka chiyali na' xochi li gonan.

15

¹ Na' le' ben' bish' na' le' ben' zan', cheenid' yisaa lall'le dill' wen dill' koba' wdixje'id' le' daa ba bleble na' zoachechle chajle'le cheyin. ² La' lennan' yislan le' kwenche bi kwiaiyi'le shi toshiizi soachechle shajle'le daa ba wdixje'id' le'. Na' shi bi soachechle toshiizi aga bi zjanayin daa nale ba wyajle'le cheyin.

³ Bli' bsedid' le' dga bzajni Chioza' nad' daa nakan dii lliarote: nan Crístona' wite' ni checho daa nakcho ben' saaxya, kon ka na Cho'a Xtill' Chioza'. ⁴ Na' bkwash'gake'ne' na' biyon lla bibane' ladj ben' wetka', kon ka na Cho'a Xtill' Chioza'. ⁵ Na' bli'lawe' Céfaza',* na'tech bli'lawe' postlka' sto. ⁶ Na'tech bli'lawe' wdeli gay' guiyoa ben' bish'choka' na' ben' zanchoka' nonlilall'gake'ne'. Na' zan ben'ka' ni mban lla naanlla, na'

* 15:5 Céfás: kan' le Pédróna' de dill' arameo, daa gok xtill' Jesúza'.

bałgake' ba wit. ⁷ Na'tech bli'lawe' Jacóbona', na' wdena' bli'lawe' yog' postlka'.

⁸ Na' zeeloteyi bli'lawe' nad', la'kzi nak' ben' bibi zakii. ⁹ Nad' nak' liizelozi ben' bibi zakii ladj ben'ka' wlej Crístona' gongake' xshine'na', na' bi chidolaa ina ben' nad' "postl", daa bsak'zi'a ben'ka' chonlilall'gake'ne'. ¹⁰ Per daa nak Chioza' ben' chiyesh'lallii, wleje' nad' wi'a xtil' Crístona'. Na' daa biyeshlallile' nad' bi gokdadzan, la' ba bench' xshine'na' aga ka yog' postlka' sto. Per aga tobia'lozan' bena'n, san len' ba goklene' nad' kwenche' bena'n. ¹¹ Na' la'kzi nad' wa postlka' sto choe'lennto' ben' xtilleena', toz ka dill' choe'nto', na' lennan' ba wyajle'le.

¹² Na' daa chyixje'nto' biban Crístona' ladj ben' wetka', ¿berache naza bal-le bi yiban ben' wetka'? ¹³ La' shel' bi yiban ben' wetka', lekzka' aga biban Crístona' shel'ka'. ¹⁴ Na' shel' Crístona' bi bibane' ladj ben' wetka', aga bi zakii daa chyixje'nto' cho'a xtilleena', ni aga bi zakii daa nonlilall'lene', shel'ka'. ¹⁵ Na' shel' bi yiban ben' wetka', aga dill' li che Chiozan' be'lennto' le' daa wnanto' Chioza' bisbane' Crístona' ladj ben' wetka', shel'ka'. ¹⁶ La' shel' bi yiban ben' wetka', aga biban Crístona', shel'ka'. ¹⁷ Na' shel' Crístona' bi bibane' ladj ben' wetka', aga bi zjanayin nonlilall'lene', na' ni napkzle dol' che saaxya cheleka', shel'ka'. ¹⁸ Na' shel' nakan ka', ben'ka' ben'lilall'gake' Crístona' na' ba witgake', wlliyi'chokzgaken', shel'ka'. ¹⁹ Na' shel' to lo yell-lionizan noncho lez gaklen Crístona' cho', nyesh'lazch nakan checho aga ka che yog' ben' yoblə, shel'ka'.

²⁰ Per dii li Crístona' bibane' ladj ben' wetka', na' daa bibane' neche' ladj ben' wetka' zaklebile' dii necha' chizi' chilap ben'. ²¹ Daa bxinj blen toz ben', wyoo yel' wita' yell-lioni, na' lekzka' toz ben' bxie' daa yiban ben' wetka'. ²² Ka chet yog' ben' ni che daa bxinj blen dii Adánna', ka'kzan yiban beena' nak Crístona' txen. ²³ Per to to ben' yibane' ladj ben' wetka' kat' illin llana' nllia Chioza' bia' yibangake'. Zigaate Crístona' bibane' ladj ben' wetka', na' kat' yiyed Crístona', lekzka' yiban yog' ben'ka' nak lall' nee. ²⁴ Na' te che yell-lioni kat'ka' wlliyi' Crístona' yog'loł yel' wak na' yel' wñabia' yoblə, na' yiyo'e yel' wñabia' che'na' Xacho Chioza'. ²⁵ La' Crístonan' chiyal' inabi'e axt ki yiyoll yido wzoe' xni'ena' yog' ben'ka' chakzi' chakzbani le' na' yog' dii xiw'ka'. ²⁶ Na' yiyollin, wlliyayee yel' wita'. ²⁷ Cho'a xtil' Chioza' nan Chioza' bzoe' xni'a Crístona' yog'lołte dii de. Na' daa nan yog'lołte zoa xni'a Crístona', aga len Chiozan' zoe' xni'ena', la' len' bzoe' xni'a Crístona' yog'lołte dii de. ²⁸ Na' kat'ka' yog'lołte dii de ba zoan xni'a Crístona', na'ch kwín Crístona', beena' nak Xiin Chioza', wzexj yichje' lao Chioza', beena' bzoa yog'te dii de xni'ena'. Na'ch gakbia' nan Chioza' nake' liizelozi ben' zakii lao yog'lołte dii de.

²⁹ Na' chiznia' sto, ¿bera zejín daa chchoa bal' ben' nisa' lwaas ben' wetka'? Shi chakgakile' bi yiban ben' wetka', ¿berache chchoazgake' nisa' lwaagake'?

³⁰ Na' shel'ka' bi yiban ben' wetka' ¿berache zoaznto' dii nxoll gak dii gak chento' do lla do yel? ³¹ Dii li, le' ben' bish' na' le' ben' zan', yog' lla zoa' dii nxoll guet'. Na' lekzka' dii licha le' chiba chizakid' chele daa ba nonlilall'le Xancho Jesucrístonan'. ³² Yell Éfesona' wdil-len' ben'ka' nak ka ba zñia nllib, ¿beratgui gon' gan wdil-lengakee shel'ka' bi yiban ben' wetka'? Gonchokljacho ka dillaa de daa na: "Yeej gaotezcho la' wetcho wxe willj."

³³ Bi we'le latj no siye' le'. La' dill' de, nan: "Shi goncho txen beñ' malka' na' solo goncho ka chongake'." ³⁴ Li yiyeeni kwasloj na' bich gonle dii mala', la' ba-le ni bi nombia'le Chioza'. Nia' le' ka' kwenche yido'latile.

³⁵ Wnalja ba-le: "¿Nakra gak yiban beñ' wetka'? Na' ¿Nakra yiyak kwerp che'ka'?" ³⁶ Shi ka' nale, nakle ka beñ' bi nteyi. Kat' chazcho biñna', bi chila' yagdo'na' shi bi chbiayi' biñna'. ³⁷ Kat' chazcho, aga yagdo'nan' chazcho, san bin cheyinnan' chazcho, na' chila' yagdo'na'. Na' kan' chak che bitteza dii chazcho, shi no trigo wa bichla. ³⁸ Na' Chioza' chgwee xnez xlatjin chakan ka cheenile', na' to to bin chak xyaguinna' kon ka chiya'gak che to ton. ³⁹ Aga toz ka nak kwerpka'. Nlla'lə nak kwerp che benecha' len che bayix'ka'. Na' nlla'lə nak che baka' chzo xan yabana' na' che belka' lle' loo nisa'. ⁴⁰ Lekzka' nak cheyi diika' lle' xan yabana' na' diika' chle'icho lo yell-lioni. Nlla'lə yel' xochi cheyi diika' chle'icho xan yabana' len yel' xochi cheyi diiki chle'icho lo yell-lioni. ⁴¹ Nlla'lə yel' chey cheeni' che wbillā' len che beo'do'na' na' len che beljka'. Na' ladj beljdo'ka' nlla'lə nak yel' chey cheeni' che to togakan. ⁴² Na' ka'kzan gak che beñ'ka' yiban ladj beñ' wetka'. Kwerpa' daa chgash' loo bana' nakan dii gooll' iteb, san kwerp daa yiyas kat' yibancho ladj beñ' wetka' bi nakan dii gooll' iteb. ⁴³ Kwerpa' daa chgash' loo bana' nakan dii bichbi zakii, san daa yiyas ladj beñ' wetka' gakan to dii zakii nleb. Kwerpa' daa chgash' loo bana' nak blan'zan, san daa yiyas ladj beñ' wetka' gakchechan. ⁴⁴ Kwerpa' daa chgash' loo bana' nakan de beli chenzə dii chon llin yell-lioni, san kwerp daa yiyas ladj beñ' wetka' gakan to dii kob daa gon Chioza'. Na' daa nezicho kwerp chechoni nakan de beli chenzə, lekzka' chiya' inezicho wat' to kwerp kob checho daa gon Chioza'.

⁴⁵ Cho'a Xtill' Chioza' nan: "Adánna', beena' gok beñ' nech, goke' to beñ' yaa beñ' ban." Na' lekzka' Cristona' goke' beñ' yell-lío, per le' chone' yel' mban zejli kani. ⁴⁶ Zigaate chbanlencho kwerp de beli chenni, na'techlan ibanlencho dii koba' daa gon Chioza'. ⁴⁷ Beñ' necha' ben Chioza' de bishte yo, goke' beñ' yell-lío. Na' beñ' wchopina', beena' nak Xancho, len' wzee yabana'. ⁴⁸ Kwerp chechona' nakan ka kwerp che beñ' necha' bxe bsil Chioza' de bishte yona'. Na' ka nak kwerp che Cristona', beena' zoa yabana' naa, ka'kzan yiyak kwerp chechona' kwenche lljazoacho yabana'. ⁴⁹ Naa nakcho ka beena' ben Chioza' de bishte yo, na' wllin lla yiyakcho ka Cristona', beena' zoa yabana'.

⁵⁰ Na' le' beñ' bish' na' le' beñ' zan', cheenid' inia' le': Aga wak yillinlencho kwerp de beli chenni gana' zoa Chioza' chñabi'e. Na' kwerpi dga gooll' iteb bi gak gonan txen kwerp daa bi gooll' iteb. ⁵¹ Ni inia' le' to dii kono wnezi: aga yog'cho guetcho, per yog'cho yiyakcho nlla'lə. ⁵² Tokonganzi, to ka chshod' chxa'z jalaochoki, kat' kwell trompet che Chioza', yiyakcho nlla'lə. La' ka kwell trompeta', beñ' wetka' yibangake' kon to kwerp dii bi gooll' iteb. Na' cho' ni mbancho, lekzka' yilla' kwerp chechoki. ⁵³ La' kwerp chechoni dga gooll' iteb, yiyakan to dii bi gooll' iteb. Na' beli chen chechoni dga ile'i yel' wita', yiyakan to dii bichga guet. ⁵⁴ Kat'ka' kwerp chechoni dga gooll' iteb ba biyakan to dii bi gooll' iteb, na' beli chen chechoni dga ile'i yel' wita' ba biyakan to dii bichga guet, na' gak ka na Cho'a Xtill' Chioza' daa na: "Xanchona' ba bene' gan bsol bnite' yel' wita' toshiizi." ⁵⁵ Na' lekzka' nan: "Yel' wit, li' chsi chchogo' yel' mban che beñ', ¿gan yel' wak cho'na' naa?" ⁵⁶ Daa bi choncho diika' bliia Chioza' bia' goncho chli'n nakcho beñ' saaxya, na' daa nakcho beñ' saaxya, yel'

wita' napan yel' wak kwenche wsol wnitan cho'. ⁵⁷ Per choxken Chioza' bselee Xancho Jesucristona' ni checho kwenche bi saki yel' wita' si' ikaan cho' zejli kani.

⁵⁸ Daan, le' ben' bish'dawaa na' le' ben' zandawaa, li soachech lo xnez Chioza' toshiizi. Na' zizikli li gon xshin Xancho Jesucristona', la' nezkiye xshine'na' aga nakan to llin dii chondadzle.

16

¹ Na' ka nak mech daa wtope daa we'le ben'ka' nak lall' na' Chioza', li gon ka ben' mandad gon ben'ka' chdop chllag choe'la'ogake' Cristona' to to yell daa llia gana' mbani Galáciana'. ² Yog' lla nech che xmanka', to tole chiyal' kwejle lat' wej daa benle gan lo xmanna' na' kooshao'len kwenche bibi wtope kat' yid'. ³ Na' kat' yid' gana' zoale, wselaa ben'ka' kwejle ljwa'gake' Jerusalenna' mecha' daa btope, na' wgox'gakee yish daa wzej' kwenche ben' Jerusalénka' wlebgake' legake'. ⁴ Na' shi chonan byen shaa, na' sha'len' legake'.

⁵ Chonan byen tia' gana' mbani Macedóniana', na' ka tia', yidwia' le'. ⁶ Na' waklja yigaanlen' le' shllol wa soalen' le' axt ka yiyollch te dii zaga'. Na' kat' yigwaa nez yiyaa gan yoblə wak gakenle nad' gonle daa iyallj ichinid'. ⁷ Aga shllollzan cheenid' yidwia' le', san non lez yigaanlen' le' ssha, shi Xancho Chioza' wi'e latj. ⁸ Na' naa cheenid' yigaana' yell Éfesoni axt ka gal' lni Pentecostéza', ⁹ la' ben' zan lle' ni, ben' cheeni wzenag xtill' Jesucristona', la'kzi ben' zan chllaagake' daa choe'len' ben' xtilleena'.

¹⁰ Na' shi ba za' Timotewa' gana' zoale, li gonile wen, la' lekzka' lene' chone' xshin Xancho Jesucristona' ka chon' nad'. ¹¹ Na' ni tole bi gonilene' nakzi, san li gaklene' yigwee neza' mbalaz kwenche yidwie' nad', la' chbeztia'ne' kon ben' bish'choka' sto.

¹² Na' ka nak ben' bish'cho Apólozi, le got'yoidee yidlene' ben' bish'choki yidwiagake' le', per bi goonile' yide' naa, per widkze' kat' gat' latj che'na'.

¹³ Li se kwas na' li soachech gonlilall'chle Cristona'. Li gakcha lo xneze'na' na' bi illeble. ¹⁴ Na' bitteza' dii gonle, li gonan lega ben' chaki ljwellin.

¹⁵ Na' le' ben' bish' na' le' ben' zan', nezile ben'ka' lle' lill Estéfanazi gokgake' ben' nech ben' ben'lilall'gake' Cristona' gana' mbani Acáyana', na' zoatekzgabe' chli' chsedgakile' ben'ka' nak lall' na' Chioza'. ¹⁶ Chat'yoid' le', li wzenaggach che ben'ka' chon ka legake', na' li wzenag che yog' ben'ka' chaklen chongake' xshin Chioza'. ¹⁷ Le chibaid' daa ba bid Estéfanazi len Fortunátoni na' Acaíconi gani zoa', la' daa zoalengake' nad' ni, bich chakyeshid' daa bin' gak yidwia' le'. ¹⁸ Ba biyongake' nad' to yel' chxenlall' ka daa chongake' le'. Ka ben'ki na' ka ben'ka' chon ka legake', chidol'gake' gaple legake' balaan.

¹⁹ Ben'ki chdop chllag choe'la'ogake' Cristona' to to yell gani mbani Ásiani chwapgake' le' chiox. Na' Aquílani len Priscílani, len ben'ka' chdop chllag lille'ka' chwapgake' le' chiox do yichj do lall'gake' daa nakle Xancho Cristona' txen. ²⁰ Na' yog' ben' bish'choka' lle' ni chwapgake' le' chiox. Na' li wwap ljwell-le chiox lega ben' chaki ljwellin daa nakle lall' na' Chioza'.

²¹ Nad', Pablo, kwinq' chzej'* gani chwap' le' chiox.

* **16:21** Kwinq' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

22 Nottezə beŋ' bi chakile' X̄ancho Jesucristona', wsak'zi'shga Chioza'ne'. ¡Bidagach X̄an'!

23 X̄ancho Jesucristona' soalenshgue' le' na' gaklenshgue' le'. 24 Le chakid' yog'le daa nakcho Jesucristona' txen.

Kart wchopi daa bzej Páblona' na' bseleen lao ben'ka' nonlilall' Jesucrístona' yell Coríntona'

¹ Nad' Pablo nak' postl che Jesucrístona' kon ka chaklall' Chioza', na' len ben' bish'cho Timotewi chwapnto' le' chiox, le' chdop chllagle choe'la'ole Chioza' yell Coríntona'. Na' lekzka' chwapnto' chiox yog'loł bish' l'jwellchoka' lle' gana' mbani Acáyana', ben'ka' nak lall' na' Chioza'.
² Na' chñabinto' Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la'ocho Chioza', Xa Xancho Jesucrístona', la' len' Xachona', beena' chiyesh'lallile' cho' na' chiyonxenlallee cho' lao bittezə dii chak checho. ⁴ Chiyonxenlallee cho' lao yog'loł diika' chzak'zi'cho kwenche ka chone' checho, ka'kzan goncho yiyonxenlall'cho ben' yoblə kat' chzak'zi'gake'. ⁵ Daa lennto' chzak'zi'nto' ka wxak'zi' Cristona', Chioza' chtipche' lall'nto' daa nonnto' Cristona' txen. ⁶ Na' shi neto' chzak'zi'nto', chak chento' ka' kwenche gondiplall'chle na' yilale bi kwiayi'le. Na' shi Chioza' chtipe' lall'nto', chone' ka' kwenche lekzka' le' gondiplall'le na' so sakile' ka yel' zak'zi'ki chen chle'into'. ⁷ Nonyen'nto' lez bi gakchoplall'le lao diika' chen chle'ile, la' nezinto' daa lenle chtil'-le yel' zak'zi'ka', lekzka' lenle wtip Chioza' lall'le.

⁸ Le' ben' bish' na' le' ben' zan', cheeninto' inezile' ka'k'tek dii lalljka' btilnto' gana' mbani Ásiana'. Gokan to dii lallj wal dii bich nan so sakinto', na' bich bennto' lez yel' mbanna'. ⁹ Goktezkinto' ni bllin lla guetnto' naa. Gok chento' ka' kwenche gokbe'into' bi gak wxenilall' kwintto', san chiyal' wxenilall'nto' Chioza', beena' chisban ben' wetka'. ¹⁰ Na' Chioza' bisle' neto' na' wislachkze' neto' lao dii nxollka' nsa' yel' wit. Na' nxenilall'nto'ne' toshiizi wislachkze' neto' ¹¹ shi gaklenle inabilene' gaklene' neto'. Na' shi ben' zan inabe' chento', lekzka' ben' zan we'gake' Chioza' yel' choxken kat' ba goklene' neto'.

¹² De to dii chakyiblennto': daa nezyen'into' do yichj do lallnto' nsa' chento' wen ladj ben' yell-lioni, ka chazlall' Chioza', na' chonnto' to dii byen chonchnto' wen ladjlena'. Na' aga yel' sin' che ben' yell-lionin chaklenan neto' chonnto' ka', san Chiozan' chaklene' neto'. ¹³⁻¹⁴ Diiki chzejnto' le' nakan dii shajniile ka wlablen. La'kzi naa bin' shajni'yen'ile biče nsa' chento' ka', chbez' illin lla shajniilen kwasloł, kwenche kat'ka' yila' Xancho Jesús'a, yibaile' daa nonle neto' txen, ka chibainto' nonto' le' txen.

¹⁵ Daa nxenlallaa wyajniile dga na' wleble nad', goklallaa tegaxj' yidwia' le', la' gokid' le' yiba yizakile yidwia' le' chop shii. ¹⁶ Gokid' tia' wwia' le' ka shaa Macedóniana', na' yidia' wwia' le' sto shii ka zizaa. Na' zak goklenle nad' kwenche yigwaa nez yiyaa Judeana', shel' gokan. ¹⁷ Bi gakile aga do yichj do lallaan wnia' yidwia' le'. ¿Anti chakile chon' ka chon notteə ben' yell-lioki chongake' to “wak” to “bi gakə”? ¹⁸ Chioza' nez nle'ile' biga chonnto' to “wak” to “bi gakə” laolena'. ¹⁹ Nad' Pablo, len Timotewi na' Silvónoni be'nto' ladjlena' cho'a xtill' Cristo Jesús'a, beena' nak Xiñ Chioza'. Na' Jesucrístona' ba bli'e toshiizi chon Chioza' kon ka ba wne' gone'. ²⁰ Na' ni che Cristona' chak yog'loł dii chcheb Chioza', na' nacho “kan' nakan” kwenche chgocho Chioza' balaan. ²¹ Na'

Chioza'kzan chone' kwenche soatip soashoshcho gonlilall'cho Crístona', ka chone' chento' na' ka chone' chele. Na' wleje' cho' kwenche nakcho lall' nee, ²² na' Espíritu Santo che'na' nake' ka to sey daa ba ngweene' loo yichjall'do' chona' kwenche chakliyicho ba nakcho xiine', na' kwenche nezicho wllin lla gone' yog' dii wenna' daa ba bchebe' gone'.

²³ Chioza' nezile' bin' yid' Coríntona' yidwia' le' daa chap' yel' chxenlall' chele, na' bi cheenid' wsheshlen' le'. ²⁴ Aga cheeninto' gonnto' byen kon daa inaznton' gonle daa nakle Crístona' txen, la' ba zoachehckzle nonlilall'lene'. San cheenlinto' gaklennto' le' kwenche gapchle yel' chiba chizakina'.

2

¹ Daan, bhogllalaa bi bidwia' le' kwenche bi yidzoaz' le' nyesh' sto shii. ² ¿Nora gon ka yiba yizakid' shi ba bidyenyesh'zid' le'? ³ Na' bzejchokla le' daa bi goklallid' yid' na' gonyeshile nad', la' cheenlid' gonle ka yiba yizakid'. Na' nxenlallaa lenle yiba yizaklenile nad'. ⁴ Bzej' le' daa wzechga' wneyi nleb na' gokyesh'chgaid' axt wchellchga'. Na' aga bzeja'n kwenche gonyeshid' le' san kwenche inezile le chakid' len'.

⁵ Na' beena' benyeshile' nad', aga toz nadaan benile' ka', san lenkzlen benyeshile' lat'. Nia' "lat'", kwenche bi inia' zi'tegala ben beena' checho. ⁶ Yel' zak'zi'na' daa ba benle che' ba gokkza to ka't'. ⁷ Na' naa chiyal' yizi'xenle che' na' gaklenlene' kwenche ki gakshejlallee lo yel' chakyeshii che'na'. ⁸ Daan, chat'yoid' le', li wli' ni chakkzilene'. ⁹ Ba bzejkz' le' kana' che ka nak dga kwenche wli'shkilaole shi leile gonle yog'te diika' nia' le'. ¹⁰ Na' beena' yizi'xenle che', lekzka' nad' wizi'xenkz' che'. Na' shi de dii yiyakxen che', Crístona' nezile' wizi'xenkz' che beena' ni chele, ¹¹ kwenche bi we'cho cho'a xbayi Satanáza'. La' nezczicho ka nak yel' wxiye' cheyinna'.

¹² Ka billin' yell Troaza' kwenche wi'a dill' wen dill' kob che Crístona', got'chga latj cha' kwenche gon' llin che Xanchona', shel'ka'. ¹³ Per daa bi billag' ben' bish'cho Títona', na'ch gokshejlall'chga'. Daan, bilaa ben'ka' dill' na' biyaa Macedóniana'.

¹⁴ Choχken Chioza' chone' kwenche toshiizi chonnto' gan lao diika' chlīs chta dii xiwaa daa naknto' Crístona' toz. Na' ngoonto' nez choe'nto' xtilleena' kwenche doxen zbii zkaan yell-lioni illiljan, ka chlilj shii xla' to dii chla' zix sia, na' gombia' ben' le'. ¹⁵ Ka bibayi Chioza' shii xla' llen yala' daa chla' zix sia, ka'kzan chibaile' daa nzoa Crístona' neto' choe'nto' xtilleena' ladj ben'ka' yila na' ladj ben'ka' kwiayi'. ¹⁶ Ben'ka' kwiayi', bi chibagakile' dillii choe'nto' daa chla'gakile'n zyel' wit. Na' ben'ka' yila, chibagakile'n daa chla'gakile'n zix sia daa nsa'n yel' mban chegake'. ¿Notgui gak gone' dga? ¹⁷ Ben' zan lliallallee yibeje' cho'a xtill' Chioza' mech. San neto' aga kan' chonnto'. Nez nle'i Chioza' do yichj do lall'nto' choe'nto' xtilleena' lega ben' bselee, daa naknto' Crístona' toz.

3

¹ Ka choe'lennto' le' dill'ki, ¿achakile ba wizzolonto' chshalj chshon che kwinnton'? ¿Awa chakile chiyal' gonnto' ka chon bal ben', gonnto' yish, wa inabinto'n le', gana' cho'en dill' nan chonnto' wen? ² Le'kzan nakle ka yish daa cho'en dill' chonnto' wen, la' daa nonlilall'le Crístona' chakbe'i yog' ben' choe'nto' dill' li. Na' toshiizi yoole loo yichjall'do'nto'ki. ³ Na' daa ile'i ben' ba bikob Crístona' yichjall'do'lena' daa be'lennto' le' cho'a

xtilleena', nakle ka to yish dii bzej kwinq Crístona' nan chonnto' wen. Na' bi nakan to dii nyoj lee yish wa dii nyoj lee yaj taa, san daa ba bsel' Crístona' Espíritu che Chios yaa Chios banna' loo yichjlall'do'lena' zejinq bzeje'n lee lall'do'lena'.

⁴ Daa chaklen Crístona' neto', chiyaxjid' nia' chonnto' xshine'na' ka chazlall' Chioza'. ⁵ Aga daa le napnto' yel' sin'nan' chonnto' diiki, san Chiozan' chaklene' neto' chonnto'n. ⁶ Chioza' ba bli' bsdile' neto' kwenche gak we'nto' dill' che dii koba' daa ba bchebe' gone' checho. Na' dga bi nakan ka ley che dii Moiséza' daa chlliyai'n ben', san dga nakan che Espíritu che Chioza', na' len' cho'e yel' mban che ben'.

⁷ Ka nakleya' be' Chioza' dii Moiséza', daa byoj lee yaj taana', nchogbia'n gat' yel' wit checho, gokan to dii zakii nleeb na' bsa'n yel' chey cheeni' xen ax't ni bi gok wwia ben' Israelka' cho'alao dii Moiséza' daa le chey cheeni'n la'kzi gokan dii yinit. Na' shi leya' daa nchogbi'a gat' yel' wit checho gokan to dii zakii nleeb, ⁸ zalechlə nak yel' zakii che dii koba' daa bxe Espírituna'? ⁹ Shi leya' daa nchogbi'a guetcho gokan to dii zakii nleeb, na' daa chon Chioza' checho chizi'xene' xtol'choka', naktechan dii zakii nleebch. ¹⁰ Ka nak yel' zakii che leya', bi bllinan ka nak yel' zak' xen inleeb cheyi dga ba bxie' sto. ¹¹ Na' shi leya' daa ben llin shlollz gokan to dii zakii, dii zak'techi nak dga gon llin toshiizi.

¹² Daa ba de dga nonnto' lez na'chan choe'nto' dill' kon ka nakan. ¹³ Na' bi chonnto' ka ben dii Moiséza' kana' bkwash' cho'alawe'na' kon to lech' kwenche ben' Israelka' bi ile'gakile' ka chinit yel' chey cheeni'na' cho'alawe'na'. ¹⁴ Na' yel' chajni' che'ka' bi benkan llin, la' ax't naanlla kat' chlabgake' leya' bi chajni'kzgakile'n na' nakan ka to dii ngash'. San ben'ka' gonlilall'gake' Crístona', legaken' shajni'gakile'n, la' len' wsalje' yichjlalldoe'ka'. ¹⁵ Ax't naa, kat' chlabgake' daa bzej dii Moiséza', de to dii chsej chllonan shajni'gakile'n. ¹⁶ Per kat' to ben' yiyaj yilenile' na' gonlilallee Xancho Crístona', na' yikwas daa chsej chllonan shajni-ile'n. ¹⁷ La' Xanchona', lekzen' Espírituna', na' beena' zolen Espíritu che Xanchona'ne', bich bi ntakw nchejan le'. ¹⁸ Daan, yog'lolcho cho' bich bi de wsej wllonan gombia'chone', na' ba nakcho ka to wan gana' chli'lao balaan che Xanchona'. Na' Espíritu che'na' zejch chiyonshawe' cho' kwenche yiyakcho ka Xanchona'.

4

¹ Daa ba biyesh'lallii Chioza' neto', ba bzo'e' neto' chonnto' xshine'na', na' bi chidinjinto'. ² Neto', ni to dii nak yel' zto' bi chonnto', ka diika' chon ben' do ngash'za. Na' bi chziye'nto', ni bi chshok chlewnto' cho'a xtill' Chioza', san choe'nto' dill' li che'na' kon ka nakan. Na' yog' ben' wzenague'n, gakbe'i loo yichjlall'do'ena' ka nakan, na' lekzka' Chioza' nezile' ka chonnto'. ³ Per ben'ka' kwiayi', bi chajni'gakile' dill' wen che Crístona' choe'nto', daa ngashaan lawe'ka'. ⁴ La' dii xiwaa daa chnabia' yell-lioni, ba bchol bnitin yichjlall'do'eka' kwenche bi sho'n beeni' che dill' wen dill' kob che Crístona', beena' bli' ka nakyen' Chioza'. ⁵ Aga xtill'nton' choe'nto', san choe'nto' dill' che Jesucristona', nanto' len' nake' Xancho. Na' daa chakinto' Crístona', chonnto' bittez dii gak gonnto' kwenche gaklennto' le'. ⁶ La' Chioza', beena' wna: "Wzeeni' beeni'na' lo yel chol'a", lekzka' ba wlo'e beeni' che'na' loo yichjlall'do'nto'na' kwenche gombia'nto' Jesucristona', na' kan' gakbe'into' ka nak yel' zakii che Chioza'.

⁷ Na' beeni' che dill' wen che Crístona' nakan to dii zakii inleeb. Na' ba nzoa Chioza'n loo lall'do'nto'ni, neto' naknto' ben' bibi zakii, kwenche ka we'nto' xtilleena', gakbe'i ben' yel' wak xenna' nsa'n nakan che Chios, aga nakan chento'. ⁸ La'kzi chiya dii chak chento', bi nakgakan dii bi yichej yilalennto'. La'kzi de dii nzen neto' wneyi, bi chakshejlall'nto'. ⁹ La'kzi chino ben' neto', aga chchoonlall' Chioza' neto'. La'kzi chchix chlolgake' neto', bin' wlliyi'gake' neto'. ¹⁰ Gattezə chajnto', chsak'zi'gake' neto' na' cheengakile' witgake' neto' ka betgake' Jesúsza'. Chak chento' ka' kwenche nakbia' Jesúsza' zoe' chaklene' neto'. ¹¹ La' shlak mbannto', toshiizi zelennto' yel' wit daa naknto' Jesúsza' txen. Chak chento' ka' kwenche nakbia' zoa Jesucrístona' chaklene' neto' lao diika' chllaglo beli chen chento'ni dga guet. ¹² Daa choe'nto' cho'a xtill' Crístona' zelennto' yel' wit, kwenche le' gat' yel' mban chele.

¹³ Cho'a Xtill' Chioza' nan: "Daa benlilalaa Chioza', na'chan bi'a dill'." Na' kakzan neto', daa chonlilall'nto'ne'n, na'chan choe'nto' cho'a xtilleena'. ¹⁴ Na' nezicho Chioza', beena' bisbane' Xancho Jesúsza' ladj ben' wetka', lekzen' yisbane' cho' ka bisbane' le'. Na' ka neto' ka le', yichi'e cho' gana' zoe'. ¹⁵ Yel' zi' dga chllaglonto' naa, chllaglonto'n kwenche gak wen chele. Na' ka zej chanch ben' gombia' dill' wen che Crístona', lekzka' ben' zanch wi'e Chioza' yel' choxken daa nake' ben' wen, na' sho'e balaan xen.

¹⁶ Daan bi chidinjinto'. La'kzi beli chen chento'ni zej chde cheyin, yichjlall'do'nto'ni chikob Chioza'n lla kon lla. ¹⁷ Diiki chtilnto' naa, nakan dii te toldezə, na' bibi chaktekinto'. La' nezinto' daa chak chento' ki, Chioza' gone' to dii wen inleeb chento' dii bi te cheyin. ¹⁸ Aga zento' wneyi che diiki chle'icho yell-lioni, san diika' bi nla'n zento' wneyi. La' yog'te diiki chle'icho yell-lioni, de toldezə che ka diika', na' diika' bi chle'icho naa, nakan dii bi te cheyin.

5

¹ Kwerp chechoni nakan ka to yoo dii te cheyin. Na' nezicho shi ba wlliyai'n, Chioza' yiyone' sto dii kob dii bi te cheyin yabana'. Na' aga nakan dii beni ni'a na' ben'. ² Chibanchgaicho naa zoacho yell-lioni, na' ba cheenchgaicho yobzə lljazoalencho Chioza' yabana' gana' gone' sto kwerp kob checho. ³ Ka chak che beena' chishaa xe'na' daa ba biyi na' chiyakwe' to dii kob, kakzan gak checho daa yishaa Chioza' kwerp chechoni dga kwiayi'. ⁴ Shlak ni zoacho lo kwerpi, chibanicho na' chakyeshicho. Aga inacho chibachgaicho guetchon, san daa cheenicho yobzə ile'icho kwerp kob chechona' daa bi te cheyin na' ibanlenchon zejli kani. ⁵ Na' kwin Chioza' ba none' checho ile'icho dga, na' ba bselee Espíritu che'na' zoe' loo yichjlall'do'chona' kwenche chakliyicho gone' yog' daa ba bchebe'.

⁶ Na' daa nezicho dga, toshiizi nxenilall'cho Chioza'. Na' nezicho kwerpi mbanlencho, bi yillinlenchon gana' zoa Chioza'. ⁷ Chajle'cho dga, la'kzi bin' ile'ichon. ⁸ Na' cheenicho yobzə yiza'cho yell-lioni na' yigaan kwerp chechoni, la' nxenlall'cho kat' yiza'cho ni, na' lljazoalencho Xanchona'. ⁹ Na' daan, choncho to dii byen choncho ka chazlall' Chioza' naa mbancho wa la'kzi ba witcho. ¹⁰ La' chonan byen yog'lo'cho lljazecho lao Crístona' gana' wchogloe' checho, kwenche to tocho ikaacho daa chido'cho kon ka bencho shlak wbancho, shi bencho wen wa bencho mal.

¹¹ Na' daa nezinto' yog'cho techo lao Xanchona', na'chan chonnto' to dii byen choe'lennto' ben' xtilleena' kwenche gonlilall'gake'ne'. Chioza'

nezile' do yichj do lall'nto' chonnto' xshine'na', na' non' lez nezki yichjlall'do'leka' ka chonnto'. ¹² Aga cheeninto' chibzə kwinnto' laole-nan', san nia' le' ka' kwenche yibaile ka chonnto' na' gak yilliile xtill' beñ'ka' chonz ka le chontegalə na' nagake' legaken' zeelo chongake' dii wenna' per bi chongake'n do yichj do lall'gake'. ¹³ Shi ba_l-le chakile chaktonnto'n, Chioza' nezile' xshine'nan' chonnto'. Na' shi chakile aga chaktonnto'n, banez chekzle llinna' chonnto'. ¹⁴ Daa nezinto' le chaki Crístona' cho', na'chan chonnto' to dii byen choe'nto' xtilleena'. Na' chajle'nto' daa wite' ni checho, zejin yog'cho witcho. ¹⁵ Wite' ni che yog'lolcho kwenche bich goncho kon daa nazan checho, san goncho ka chazlall' beena' wit na' bibane' ni checho. ¹⁶ Ni cheyi daan, bich choninto' nottez beñ' nakzi, shi zakee wa bibi zakee. La' kana' gokinto' bibi zakii Crístona', na' naa ba nezinto' bi nakan ka'. ¹⁷ Beena' ba nake' Crístona' txen, ba bikob Chioza' yel' mban che'na'. Ba wchoonlallee yel' mban gol che'na', na' ba zoe' to lo yel' mban kob.

¹⁸ Yog'lolte diiki nakan che Chioza', beena' ba ben ka bizoalenchone' wen daa bselee Crístona' wite' ni checho. Na' bene' lall' nanto' we'lennto' beñ' dill' nak gongake' yizoalengake' Chioza' wen. ¹⁹ Kwin Chioza' bene' ka cho' beñ' yell-lio chizoalenchone' wen daa bselee Crístona' wite' kwenche binitloe' saaxya chechoka'. Na' ba bene' lall' na'nto' we'lennto' beñ' cho'a xtilleena' kwenche inezgakile' nak gongake' yizoalengake'ne' wen. ²⁰ Daa bzoa Crístona' neto' choe'lennto' le' xtilleena', li gaktezi kwinkz Chiozan' chat'yoile' le' daa nanto' le': "Li yizoalen Chioza' wen." ²¹ Crístona' ni to dii mal bi bene'. Per ni checho chon', Chioza' benile'ne' ka beñ' saaxya, kwenche daa gonlilall'cho Crístona' yiyakcho beñ' li beñ' shao' lawe'na'.

6

¹ Neto' chonnto' xshin Chioza', chat'yointo' le' gonle ka chiyoollallee daa ba bene' to dii wen chele. ² La' Cho'a Xtill' Chioza' nan: Ka byalljilo' wzenag' cho', nad' bzenag'. Ka byalljilo' yisla' li' na' goklen' li'. Na' nia' le', naan' ba bllin lla bllin gor gaken Chioza' le'. Naan' nakan llana' yisle' le'.

³ Na' neto' bi chonnto' bittez dii gon ka ine beñ' zban che xshin Chioza' dga chonnto'. ⁴ San toshiizi chonnto' to dii byen chonnto' xshin Chioza' ka chiyali. Daan, chonnto' banez laa lo yel' zi', laa chyallj chchininto', laa de dii lallj, ⁵ laa chit chyingake' neto', laa chyixjgake' neto' lillya, laa lliadia' beñ' neto', laa chonnto' llin dii nak zii zshab, laa tento' bishgal zi' bishgal ya', laa chbil chdonnto'. ⁶ Na' lekzka' chli'nto' chonnto' xshin Chioza' ka chiyali daa zoanto' do yichj do lall'nto', daa ba nezinto' daa nak dii li, daa napnto' yel' chxenlall' che beñ' na' chonnto' wen chegake', daa zoalen Espíritu Sántona' neto', daa chakinto' beñ' do lall'nto', ⁷ daa choe'nto' cho'a xtill' Chioza' daa nak dii li, na' daa zoalen yel' wak che Chioza' neto'. Na' dii li dii shao'ka' chonnto' nakgakan ka dii chñiyainto' kwenche chdil-lennto' dii mala'. ⁸ Zoa beñ' chle'shi'gakile' neto', na' zoate beñ' chle'zbangakile' neto'. Zoa beñ' chnegake' wen chento', na' zoate beñ' chñit chdegake' neto'. Zoa beñ' chongakile' neto' ka to beñ' wxiye', la'kzi dill' lin choe'nto'. ⁹ Zoa beñ' chongake' na bi nambia' neto', la'kzi nambia'kzgabe' neto'. La'kzi chtilnto' yel' wita', ni mbankznto'. Na' la'kzi chit chyingake' neto', bin' gongake' gan guetnto'. ¹⁰ La'kzi de dii zan dii

cheenin gonyeshiin neto', toshiizi zoanto' mbalaz. La'kzi naknto' beṇ' yesh', beṇ' zan chonnto' ka beṇ' wni'a daa choe'lennto' legake' cho'a xtill' Chioza'. La'kzi bibi napnto' ni, nezinto' dii xench nak chento'na' de.

¹¹ Le' beṇ' bish' na' le' beṇ' zan', le' lle'le yell Coríntona', ba be'lento' le' dill' kon ka nakan na' ba bli'nto' chakinto' le' do yichj do lall'nto'. ¹² Neto' chli'nto' chakinto' le' do yichj do lall'nto', per le', bi chli'le shi chakile neto'. ¹³ Chat'yoid' le', le' nakle ka xiin cha', gonle ka chon neto' na' li gaki neto' do yichj do lall'le.

¹⁴ Bi gonle txen beṇ'ka' bi nonlilall' Crístona'. La' aga widili daa nak dii li dii shao' kon dii mala', na' aga wdili beeni'na' kon daa nak yel chol. ¹⁵ La' ba nezkzile bi chidili Crístona' dii xiwaa. Na' lekzka' beena' ba chonlilallee Crístona' bi chidilile' beena' bi chonlilalleene'. ¹⁶ Na' bi gak soa daa nak lwaa lsak', diika' choe'la'o beṇ', loo yoodo' che Chioza'. La' cho' nakcho ka yoodo' che Chios yaa Chios banna'. Ka wna Chioza' che beṇ' Israelka': Soa' ladje'ka', na' nad' gak Chios chegake' na' legake' gaggake' yell cha'.

¹⁷ Na' daan goll Chioza' legake':

Li yichej ladj beṇ'ka', bi gonle legake' txen.

Bi gox'le daa ba wnia' bi nxi nyech.

Na' ka' wleb' le',

¹⁸ na' gak' Xale,

na' le' gakte xiin cha'.

Kan' na Xancho Chioza', beena' zeelo nap yel' wak choo yel' wak xen.

7

¹ Kan' nak daa ba bcheb Chioza' checho, le' beṇ' bish'dawaa na' le' beṇ' zandawaa. Daan, chiyal' goncho to dii byen gakcho beṇ' nxi nyech lawe'na' kwenche bibi dii mal ta' ichen kwerp chechoni na' yichjlall'do'choni. Na' daa chall chllebcho Chioza' goncho ka dii le gakcho dowalj ka cheenile'.

² Li gaki neto' do lall'le. La' ni to kono biṇ' goninto', na' ni to konon' wsak'zi'nto', na' ni to konon' siye'nto'. ³ Aga chsheshlen' len' nia' le' ka'. Ba wnia'kz' ka chakchgaid' le' axt ni guetid'. ⁴ Nxenlallaa chonle wen, na' cho'a dill' chele ka wen ba chonle. Ladj dii zi' dii ya'ka' ni chtiplallaa na' le chiba chizakid'.

⁵ Kon ka bla'nto' gani mbani Macedóniani, bibi yel' wixi'lall' chento' got'. Doxenzā chdiḷ chllagnto' dii zed, chakdiḷ-len beṇ' neto', na' za' dii chwall chsheban neto'. ⁶ Per Chioza', beena' chiyonxenlall' beṇ'ka' zoa nyesh', biyonxenlallee neto' ka bla' Títona'. ⁷ Aga to daa bla'ze'n, san daa choe'yenee xtill'le ba chonle wen. Na' be'lene' neto' dill' ka zelall'le ile'ile neto' na' ka chakyeshile daa zele wneyi cha'. Na' daa benid' dga zizikli chibaid'.

⁸ La'kzi yisha' bseḷaa benyeshiin le', bibi chaktekid'. La'kzi gokyeshid' ka bwia' benyeshiin le' shloll, ⁹ naa chibaid', aga daa gokyeshile, san daa goklenan le' biyaj bilenile ka cheeni Chioza'. Na' aga bi gok chele ni che daa bzej' le'. ¹⁰ Chioza' chone' ka gakyeshicho kwenche yiyaj yilenicho na' gat' yel' mban checho zejli kaní, na' bich chakyeshicho daa gok checho ka'. Per yel' chakyeshii daa nsa' dii mala' loncho chlliayi'n cho'. ¹¹ Yel' chakyeshiina' daa be' Chioza' latj got' ladjlana' benan ka gokbalile' daa ben beena', na' wda'le nad'. Benan ka bllaale na' wyoosheble, na'tech wzelall'le yidwiach' le', na' bsak'zi'le beena' wdap

do¹aa. Na' yog' diiki chli'n bi nonle txen dii mala' bene'. ¹² Na' ka bzej' le', aga bzej' ni che beena' ben dii mala', ni aga ni che beena' benile' zi'bia', san bena'n kwenche Chioza' gaklene' le' gakbe'ile dii likzan zele wneyi chento'. ¹³ Diiki chaklenen neto' chiyakshao'lall'nto'.

Na' zizikchli bibainto' ka ble'into zoa Títona' mbalaz daa btiple lallee. ¹⁴ Ba be'len' Títona' dill' chele, goshee le chibaid' ka chonle, na' bi chido'id' daa goshee ka'. Na' ka dill' daa be'lennto' le' nakan dii li, lekzka' gokbe'i Títona' xtill'lana' daa bi'a lawe'na' nakan kon ka goshee. ¹⁵ Na' zizikchli chakile' le' kat' chjadinile' ka bleblene' na' bzenagle che' lega ben' chiyal' gall illeble. ¹⁶ Chiba chizakid' daa ba nxenlallaa dii likzə chzenagle.

8

¹ Na' naa, le' ben' bish' na' le' ben' zan', cheeninto' inanto' le' ka mba ba ben Chioza' goklene' ben'ka' chdop chllag choe'la'ogake' Crístona' gani mbani Macedóniani. ² La'kzi biya dii ba gok chegake', mbalaz inlebe zoagake'. Na' la'kzi chak yel' zi' yel' yesh' chegake', do yichj do lall'gake' bzangakile' bi de chegake' kwenche gaklengake' ben' yobla. ³ Nad' nezyen'id' do yichj do lall'gake' be'gake' mecha' bzangakile', na' bengake' axt ga zeelo gogkake'. ⁴ Na' legake' got'yochgagakile' neto' kwenche we'nto' latj lengake' gaklengake' bish' ljwellchoka' nak lall' na' Chioza'. ⁵ Bentechgake' aga ka to daa nonnto' lez gongake'. Zigaate ben kwingake' lall' na' Xancho Crístona' kwenche gongake' ka cheenile', na'tech bzenaggake' chento' daa nezkakile' nan kan' cheeni Chioza' gongake'. ⁶ Ni cheyinnan' ba got'yointo' Títona' kwenche yisyolle' wtope' daa chzanile we'le ben'ka' chyallj chchini. ⁷ Na' ka mbejlaole chonle yog' dii nak wen: daa nonlilall'chgale Crístona', daa chak we'le dill' mbalaz, daa le chajniile, daa cheenchgaile gonle dii wenna', na' daa le chakile' neto', lekzka' li gon byen kwejlaole gaklenle ben' we'le daa chzanile.

⁸ Aga chontek' byen gonle ka nia', san daa cheenzid' inezile ka chibachgayi ben' bish'choka' gaklengake' ben', na' kan' cheenid' gonle, kwenche wli'le shi lekzilen chaki ljwell-le do yichj do lall'le. ⁹ Ba nezkzile dii wenna' ben Xancho Jesucristona'. La'kzi nake' ben' choo ben' xen, ben kwine' ka ben' bibi zakii kwenche gak wen chele.

¹⁰ Daa godwizi wzolole btople mech kwenche gaklenle ben'. Na' aga no got'yoi le' btoplen, san benlen do yichj do lall'le. Na' naa inia' ka nak daa gonle: ¹¹ li yisyoll daa wzolole chonle dii nech do yichj do lall'le. Ka bibaile kana' wzolole, ka'kzə li yibayi yisyoll-len. Li we' ka to daa gak we'le. ¹² La' shi izanilen do yichj do lall'le, na' ixin' lao Chioza', la'kzi lat'zan. Chioza' bi chnabe' dii bi napcho.

¹³ Aga ni che nia' le' gaklenle ben' na' le'lə yigaan yesh'le, san gat' dii iyalljile ganga. ¹⁴ Naa le' nape daa chyalljgakile'. Na' shi wxe willj ba napgake' bi dii iyalljile, na' yiyaklengake' le'. Na' bibi iyalljile ganga. ¹⁵ Na' gak ka na Cho'a Xtill' Chioza': "Beena' bitop dii zan, aga bi bichoonan, na' beena' bitop lat'zan, aga bi byalljile."

¹⁶ Cho^xken Chioza' bzie' Títona' wneyi ka wneyi daa zia' chele. ¹⁷ Na' le' bibaile' bchebe' yidwie' le', daa lekzka' chaklallee ile'ile' le'.

¹⁸ Na' chsel'lennto'ne' sto ben' bish'cho, ben' le' wen zeyi che' lao yog'lol ben'ka' nonlilall' Crístona' to to gana' chdop chllaggake', daa le' cho'e' dill' wen dill' kob che Crístona'. ¹⁹ Na' aga daazə, san lekzka' ben'ka' chdop chllag choe'la'ogake' Crístona' ni, wlejgake'ne' sa'lene' neto' lljasannto'

mecha' bdop. Na' chonnto' dga kwenche sho'ch Chioza' balaan na' kwenche wli'n nan cheeninto' gakennto' ben'. ²⁰ Bi cheeninto' bi gon inaz ben' chento' ni che mech xenni ngoo lo nanto'. ²¹ Na' chonnto' to dii byen gonnto'n ka chiyali, aga toz lao Xancho Chioza' san lenkz lao ben'.

²² Lekzka' chsel'lennto' legake' sto ben' bish'cho, beena' zan shii ba ble'into' chone' wen, na' naa cheenchlile' gaklene' daa nxenlallee gonle ka cheeni Chioza'. ²³ Na' ka nak Titona', nake' nad' txen chone' xshin Chioza' ladjlena'. Na' ben' bish'choka' zi chop wlej ben'ka' chdop chllag choe'la'ogake' Cristona' ni, chongake' ka choo Cristona' balaan. ²⁴ Kwenche inezi ben'ka' nonlilall' Cristona' gan yoblə, li wliyi ben'ki chselaa nan dii li ba chakile ben', na' li wli' chonle wen kon ka choe'nto' xtill'le.

9

¹ Bich chonan byen wzej' le' inia' chiyal' gakenle ben' bish'choka' nak lall' na' Chioza'. ² La' ba nezd' ka cheenile gakenle ben', na' ba bi'a xtill'le lao ben' Macedóniaki, chepgakee godwizteyi le' lle'le Acáyana' cheenile gakenle. Na' ka wnezi ben' Macedóniaki ka cheenile gonle, zangake' ba chaklall'gake' gaklengake'. ³ La'kzi nakan ka', chselaa ben' bish'choki kwenche inezgakile' nan choe'nto' dill' li daa che'nto'gake' nan chonle wen. Nia' le' ka' kwenche gonchle ka dii le wtoplen. ⁴ La' shi za'len no ben' Macedonia nad' ka yidwia' le', na' ile'gakile' bi chonle ka dillaa choe'nto' chele, na' gakan yel' zto' chento' daa nxenlall'nto' chonle wen. Na' le' si'techlale yel' zto'. ⁵ Ni cheyinnan' chakid' chonan byen wselaa ben' bish'choki yidwiagake' le' zigaate, kwenche gaklengake' le' yiyoll wtople daa ba bcheble. Na' kat' yid', ba xoashawan lega dii chzanile, na' aga inacho do ki do lall'len choe'len.

⁶ Li lljadini cheyi dga: Beena' gaz lat'zə, lat'chokzə yizi' yilape'; na' beena' gaz dii xen, lekzka' dii xen yizi' yilape'. ⁷ To tole we'le ka to daa chzanile. Bi gonlen do ki do lall'le, la' aga no chon byen we'len. La' Chioza' chakchgaile' beena' chibayi we'n do yichj do lallee. ⁸ Chioza' wak gone' ka gakchga wen chele kwenche toshiizi gat'ch yog'lol dii chyallj chchinile na' gakteyin gakenle yog'lol ben' bibi de che'. ⁹ Cho'a Xtill' Chioza' nan:

Cho'e ben' yesh'do'ka' daa chyallj chchingakile',

na' dii wenna' daa chone' biga llia te cheyin.

¹⁰ Chioza', beena' chon bi dii chaz chbekcho na' dii cheej chaocho, lekze'n gone' bittezə dii chyalljile, na' gone' ka shesh shanch bi de chele kwenche gonchle dii wenna'. ¹¹ Na' ka', gapchle dii xench kwenche gak we'chle dii xench gakenle ben'. Na' kat' ljasannto' mecha' daa ba btope lao ben'ka' chyalljin, na' we'gake' Chioza' yel' choxken. ¹² Ka nak mecha' daa we'le ben'ka' nak lall' na' Chioza', aga to gakenzan legaken', san lekzka' gonan ka we'chagake' Chioza' yel' choxken. ¹³ Na' ka ikaagake'n, we'la'ogake' Chioza' daa chonle ka na dill' wen dill' kob che Cristona' daa ba chajle'le. Na' lekzka' we'la'ogake' Chioza' daa btope mech xen be'len legake' na' nochlə ben' yoblə. ¹⁴ Na' daa chwiagake' chaklenchga Chioza' le', na' inabgakile'ne' gakenche' le'. ¹⁵ Choxken Chioza', daa ba bene' to dii wen inlleb checho. Bichkə bi dill' chillə we'cho ka to ba bene' checho.

10

¹ Nad' Pablo, chat'yoid' le', na' choe'len' le' dill' goll-lall' ka be' Crístona' dill' daa nape' yel' chxenlall', la'kzi nagake' cha' bi chiyaxjid' wsheshlen' le' kat' zoa' ladjlena', na' galjə zoa' zit' chiyaxjid' chnia' le' zi'bia' lee yishka' chzej'. ² Na' chat'yoid' le', li gongach wen kwenche kat' yidwia' le' bi lenle wsheshlen' ka wsheshlen' ben'ka' naz chon' lega ben' yell-lío. ³ La'kzi naknto' ben' de beli chen, bi chdilnto' ka chdil ben' yell-lioki. ⁴ Neto', kat' chdil-lennto' dii mala' bi chchinnto' yesya ka daa chchin ben' yell-lioki, san daa chchinnto' nsa'n yel' wak che Chioza' kwenche chlliyai'nto' yel' wak che dii xiwaa. ⁵ Na' chlliyai'nto' daa yoo loo yichjall'do' ben' daa chsej chllonan gombia'gake' Chioza'. Na' chonnto' kwenche wzexj yichjgake' wzenaggake' che Crístona'. ⁶ Na' kat' ba nakbia' chzenagle kwaslo, na' wwianto' nak gonnto' che beena' bi chzenagkz.

⁷ Li wwia ka chonnto'. Na' shi chakile nonle Crístona' txen, chiyal' gakbe'ile lekzka' neto' naknto'ne' txen. ⁸ Aga chido'id' chshalj chshon' daa nia' kwin Crístona' bene' lall' na'nto' we'nto' xtilleena' kwenche gaklennto' le' gakle wal, aga kwenche wlliyai'nto' len'. ⁹ Bi cheenid' gakzile chzej' yishki kwenche wsheb' le'. ¹⁰ Zoa ben' ne' yishka' chzej' le' le znia chnen, per kat' zoalen' le' ni bi nak' ka ben' illeble, na' ni dill' bi chak wi'a. ¹¹ Na' ben'ka' naz ka', chiyal' inezgakile' kon ka chzejnto' naa zoanto' zit', ka'kzə gonnto' kat' soanto' ladjlena'.

¹² Bi cheeninto' gaklebinto' ben'ka' chyibz kwingake'. Daa chakgakile' le wen chongake' na' daa chsaklebi ljwelle' nochgake' chonch, chli'gake' bi ntegakile'. ¹³ Neto', aga wshalj wshonnto' che to dii bin' gonnto'. San cheyi daa ben Chioza' lall' na'nto' gonnto'n choe'nto' dill', na' le' bselee neto' lall-lena'. ¹⁴ Neto' bidye'lennto' le' dill' wen dill' kob che Crístona' dii nech, na' bi chixoa chento' inanto': "ki bennto'". ¹⁵ Bi chshalj chshonlenznto' xshin ben' yoblə, san nonnto' lez gonlilall'chle Crístona' kwenche gonchnto' xshin Chioza' daa nak lall' na'nto' gonnto' gana' zoale. ¹⁶ Lekzka' nonnto' lez we'nto' dill' wen dill' kob che Crístona' kon ga bin' illin xtilleena', kwenche bi wshalj wshonlenznto' xshin ben' yoblə.

¹⁷ Beena' chshalj chshon kat' bin chone', che Chiozan' chiyal' wshalj wshone'. ¹⁸ Beena' chshalj chshon che kwine', bibi zakee, san beena' ina Chioza' le wen chone', beenan' zak'.

11

¹ La'kzi chakile biz dill' diika' cho'a, li wzenagan. ² Dga chaktek cha' chele za'n che Chioza'. Nad' ba non' le' lo na' Crístona', ka chak che to ben' zoa to nool wew' che', bi' napshii kwim', na' chone'b' lo na' beena' gak ben' cheb'. Na' kan' cheenid' gakle lao Crístona', ka to nool wew', bi' napshii kwinin. ³ Per chxollid' gak chele ka gok che dii Évana' kana' wxiye' belə' le' daa bzenague' cheb. Na' chakid' shi ka' gonzle wzenagle bi dill' wxiye' dii gonllejin le', na' bich gonlilall'le Crístona' do yichj do lall'le. ⁴ Shi chla' ben' choe'lene' le' dill' nlla'lə aga ka daa ba bsedinto' le' che Jesúsza', wa chsedtegakile' le' nlla'lə che Espíritu che Chioza', beena' zoa loo yichjall'do'chona', wa che dill' wen dill' kob che Crístona' daa wyajle'le dii nech, na' chajle'tezle chegake'. ⁵ La'kzi chakile chajni'chi ben'ka' nale nakgake' postl chele aga ka nad', nad' nezid' bi nakan ka'. ⁶ Leljaile bi chakyaena wi'a dill', per chajni'chid' aga ka legake'. Na' dgan ba bliinto' le' toshiizi lao yog'lolte dii chonnto'.

⁷ ¿Achakile malan ben' bentez' ka ben' bibi zakii na' aga bi laxj' wñabid' le' kana' be'len' le' dill' wen dill' kob che Chioza'? Goktgui gakle ben' zakii lawe'na'. ⁸ Bex'shaz' mecha' daa ben' ben'ka' chdop chllag choe'la'ogake' Crístona' yell yoblə kwenche bibi byalljid' shlak bli' bsedid' le'. ⁹ Na' kana' wzoa' ladjlena' na' byallj bchinid', ni tole bi benid' zed. Ben' bish'choka' lle' yell Macedóniana' bidwa'gake' daa byalljid'. Na' ka' bibi zed benid' le', na' biga gonkzid' le' zed. ¹⁰ Dill' li che Crístonan' cho'a, na' nia' ni to ben' lle' gana' mbani Acáyana' bi wsej wllone' wshalj wshon' ka to dga chon'. ¹¹ ¿Añezile bi che nia' ka'? ¿Achakile bi chakid' len'? Chioza' ñezile' le chakid' le'.

¹² Per gonchkz' ka chon' kwenche bi wi'a latj che ben'ka' cheeni wshalj wshongake' inazgake' chongake' ka chonnto'. ¹³ Ben'ki bi nakgake' dowalj postl, na' chdagake' chziye'gake', nazgake' nakgake' postl che Crístona'. ¹⁴ Na' daa chongake' ka' bi nakan ka dii yibanicho, la' ñezicho dii xiwaa chonz kwinin ka anjl che Chios. ¹⁵ Daan, bi nakan ka dii yibanicho ben'ka' chon xshininna' nagake' chsedgakile' ben' nakan gongake' yiyakgake' ben' wen lao Chioza'. Na' daa chongake' ka', len wlliayi'n legake'.

¹⁶ Sto shii nia' le', bi gakile bizə dillaan choe'len' le'. Wa shi ka' chakile, li gakhazi ka', per li we' latj wi'a dill' kwenche wshalj wshonlataa. ¹⁷ Na' daa chshalj chshon' che kwin', chon' ka ben' bi nteyi, la' aga kan' cheeni Xanchona'. ¹⁸ Daa le chshalj chshon ben' zan shi no nakgake', lekzka' nad' wshalj wshon' non nak'. ¹⁹ Le' nale nakle ben' sin' na' chibazile chleble ben'ka' bizə chon chna lat' wej. ²⁰ Chonzle banez shi bi chgongake' le' gonle, shi chzi' chkaagake' bi de chele, shi kon daa nazan chegake' chongakile' le', wa shi chgap' chball'gake' xag'lena'. ²¹ ¿Achakile bi chiyaxjid' gon' ka chon ben'kin? Ñezganz bi gaklebid' legake' gon' ka'.

Lete shi legake' chiyaxjgakile' chshalj chshongake', lekzka' nad' wiyaxjid' wshalj wshon', ka chon to ben' bi nteyi. ²² Shi nagake' nakgake' ben' hebreo, lekzka' ben' hebreo nad'. Shi nagake' nakgake' ben' Israel, lekzka' ben' Israel nad'. Shi nagake' nakgake' xiin dia che dii Abrahama', lekzka' xiin dia che' nad'. ²³ Shi nagake' chongake' xshin Crístona', nad' nia' chontechla'n ka legake'. (Daa nia' ka' chon' ka ben' bi nteyi.) Nad' choe'l-lall'ch' chon' xshin Crístona' aga ka legake'. Lech ba wyaa lillya ka legake', ba bet wdinch ben' nad' aga ka legake', na' dii zan shii ba bila' lo yel' wita'. ²⁴ Gay' shii ba bet wdini ben' Israelka' nad' yid sota' twaljichoa wej, ²⁵ shon shii bet wdingakile' nad' yaga', na' zi shlin blligake' nad' yaja'. Lekzka' shonə shii ka yo'a loo barkwa' wche'lenan nad' yel, na' zi shlla shyel bgaana' lo niso'da'. ²⁶ Shlak chda' ngwaa nez dii zan dii ba ben ble'id'. Ba wzoa' dii nxoll wa' no yao nad', no che ben' wban, no che ben' wlall cha'ka', no che ben' bi nak ben' Israel. Ba wzoa' dii nxoll ka wdia' yell xenka', na' ka wdia' lyix', na' ka wdia' lo niso'da'. Na' lekzka' ba wzoa' dii nxoll che ben' wxiye'ka' nazgake' ba chajle'gake' che Crístona'. ²⁷ Ba benchga' llinna' ax̄t ba chjxakchga'id', zan shii ba wlej' bishgal, ba wbił wdonchga' na' ben banez bi weej wdaw', ba bllagloa' no dii zag na' byallj xalaana'.

²⁸ Na' ka chllagloa' yog'loł diiki, ka'kzan chllagloa' daa zia' wñeyi lla kon lla che yog' ben'ka' nonlilall' Crístona' to to yell. ²⁹ La' kat' to ben' bich chone' ka dii le, kon chakid' nad'kzan chak cha' ka'; wa shi ga zoa ben' biz che' chone' na' chchixē' ben' yoblə lo xñez Chioza', na' chllaa yichj'. ³⁰ Shi de dii chonzan ka wshalj wshon', we'tochl' dill' cheyi daa chli'n bibi gak

gon' tobia'loz'. ³¹ Chios, beena' nak Xa Xancho Jesús'a, beena' chgooho balaan toshiizi, nezile' cho'a dill' li. ³² Na' ka wzoa' yell Damáscona', beena' nzoa rey Arétaza' ngoo lall' nee yella' bzoe' ben' wdapgake' cho'a yella' kwenche nan gox'gake' nad'. ³³ Na' ben'ka' zoa gana' bllin', bigoogake' nad' to loo lloom, bil'etjgake' nad' to cho'a ventan dii zoa lee zee daa nechj yella', na' bi be'x'gake' nad'.

12

¹ Chonkzan byen wshalj wshon' la'kzi bibi gon' gan. Na' we'toch' dill' cheyi daa ble'do'id' na' cheyi daa bli'yi Xanchona' nad' daa konon' yen ile'kzi. ² Nombi'a to ben' * nake' Crístona' txen. Ba gok shda' yiz Crístona' bchi'ene' yabana' axt gana' lliate Chioza'. Bi nezid' shi wyaje' do beli chen che'na', wa shi to bishbe che'na'zan wyaj. Toz Chioza' nezile' ³ shi wyaje' do beli chen che'na' wa shi to bishbe che'na'zan wyaj, per nezid' ⁴ bche Chioza'ne' yabana' gana' nak mbalaz inleeb. Na' benile' dill' dii konon' yenkzi, dii bi de lsens no wshaljan. ⁵ Che beena' gok cheyin kan' wshalj wshon', san ka nak nad', aga bi de wshalj wshon' lete wak wshalj wshon' cheyi diika' chli'n bibi gag gon' tobia'loz'. ⁶ Shel' cheenid' wshalj wshon', aga inacho chon' ka ben' bi nteyin, la' dill' lin cho'a. Per bi gon' ka', kwenche kono ile'i nad' ben' le zakii daa ba ble'id' diika'. La' diika' chon' na' dill'ka' cho'a, lekzgakannan' wli'gakan nakan nak'.

⁷ Kwenche bi gag ben' choo ben' xen lao yel' mba yel' shao' inleebka' ba bli'yi Crístona' nad', bi'e latj bla' to dii chzak'zi' nad', to dii bsel' Satanáza' daa chzoazi'yaan nad', na' chak' ka ben' chad' chbibe' yesh'. ⁸ Dga chak cha', shon lin ba wñabid' Xanchona' yikwase'n. ⁹ Na' wne' nad': "Chakla cho' zoalenz' li' na' gaklen' li'. Daazan chyalljilo'. La' yel' wak cha'na' chli'ch lawin kat' de daa chli'n bibi gag gon' tobia'lozo'." Daan, chibachid' wi'a dill' cheyi diika' chli'n bibi gag gon' tobia'loz', kwenche yel' wak che Crístona' soalenchan nad'. ¹⁰ Na' daa chakid' Crístona', chibaid' kat' za' daa chli'n bibi chak gon' tobia'loz', kat' choni ben' nad' zban, kat' chyallj chchinid', kat' chsak'zi' ben' nad', na' kat' de to dii lallj cha'. La' kat' za' daa chli'n bibi chak gon' tobia'loz', kana'lan chakbe'id' zoalench yel' wak che Crístona' nad'.

¹¹ Ba ben' ka ben' bi nteyi daa chshalj chshon' che kwini' ni chele, la' le'lan nan we'le dill' nan chon' wen. La'kzi bibi zakaa, aga chonch ben'ka' nale nak postl' chele ka nad', ben'ka' nale chajni'chgayi. ¹² Daa wzoatezi wzoa' ben' daa yoo lo na' gon' lao yog' diika' btil' na' daa ben' yel' wakka' ladjlana', chli'n nak' dowalj postl'. ¹³ Bi gakile' benid' le' nakzi aga ka ben'ka' nonlilall' Crístona' yell yoblə daa bi benid' le' zed bibi wkaa chele. Bi nakan ka'. Na' li si'xen cha' shi bi ben' wen ben' ka'.

¹⁴ Ba chon' wñeyi yidwia' le' de wyon shii, na' lekzka' bi cheenid' gonid' le' zed. La' aga chzelallaa bi de chele, san len' chzelallaa yidwia'. Ka chak che ben' nape' bi'do', aga legakban' wweej wwaogakb' legake', san xaxna'b'kan' segake' wñeyi wweej wwaogake' legakb'. Kan' chak cha' chele. ¹⁵ Do yichj do lallaa izanid' bi de cha', axt yel' mban cha'ni izanid', kwenche gak wen chele. La'kzi nad' axt ga zeelo gakid' le', widezile zizikchli gonile nad' kazli.

¹⁶ Nezkzile aga bi zed benid' le', per bal'le chakile' biyiljall'zan' kwenche wxiyaa le'. ¹⁷ Wa li inashki shi no ben'ka' ba bselaa ba wxi'

* **12:2** Nombi'a to ben': daa nan ki, Páblona' cho'e dill' che kwine', la' kwinkzen' bche' Crístona' yabana'.

wkaagake' bi de chele. ¹⁸ Gosh' Títóna' yidwie' le', na' bse|'lenee sto ben' nakcho txen. Li inashkilja shi bi wxi' wkaa Títóna' chele. Nezile bi nakan ka'. La' toz ka nsa' chento' na' toz ka cheeninto' gakennto' le'.

¹⁹ Shi chakile' choe'nto' dill'ki kwenche bibi sa'lall'le chento', aga kan' nakan. Choe'nto' dill' lao Chioza' daa naknto' Crístóna' txen. Le' ben' bish'dawaa na' le' ben' zandawaa, yog'lo| diiki chonnto' nakan dii gaken le' kwenche gakchale lo xnez Chioza'. ²⁰ Chxollid' kat' yidwia' le' bi chonle ka cheenid' gonle. Na' le', aga wyazlall'le ka gon' chele ka yid' gana' zoale shi naa. Chxollid' shi ka yid' ba chdil chsheshlenz ljwell-le, ba chakxe'zi ljwell-le, ba chllaaz ljwell-le, ba chonz che chezle, bizə ba chon chnaz che ljwell-le, ba chchitjzle dill' che ljwell-le, ba chep cha'lall'zle, na' bichkzə nkaani'a xnezi daa chonle. ²¹ Lekzka' chxollid' shi kat' yidwia' le' sto shii, si'a yel' zto' lao Chios cha'na' ni chele, na' kwel' ni chele. La' zantele chonle dii mala', na' bin' yiyaj yilenile diika' ba benlenle beli chen chelena' kon ka nazan chele.

13

¹ Dga gak shon shii yidwia' le'. Naach yidyen' ka na cho'a xtil' Chioza': Shi zoa ben' chawe' xya che to ben', na' bibi gak gone' shi bi zoa chop shon ben' inagake' kan' nakan. ² Kana' bidwia' le' de wchop shiyi, gosh' ben'ka' chongake' dii mala' bich wwialoz' chegake'. Na' naa zoa' zit', ba nia' le' ka' sto shii, bich si'xen' kat' yid' dii yoblə. ³ Gon' ka' ni cheyi daa cheenile ile'ile shi lekzidaan cho'a dill' kon ka cheeni Crístóna'. La' Crístóna' bi nake' ka ben' bibi gak gon ladjlena', san nape' yel' wak kwenche yigwee shli lall'le. ⁴ Dii likzə Crístóna' blexj yichje' wdee lee yag cruza' ka ben' bi nap yel' wak, per naa zoalene' yel' wak che Chioza'. Na' lekzka' neto' lennto' Crístóna' naknto' ka ben' bi nap yel' wak, per daa naknto'ne' txen lekzka' zoalennto' yel' wak che Chioza' kwenche gonnto' xshine'na' ladjlena'.

⁵ Li yiya yiyilj kwinle shi dii li ba nonlilall'le Jesucrístóna'. Na' li gakbe'yenii shi zoalenkze' le', wa shi bi nonlilall'kzlene'. ⁶ Na' nonto' lez gakbe'ile zoalenkze' neto'. ⁷ Chnabinto' Chioza' gaklene' le' bibi dii mal gonle. Aga chnabinto'ne' dga kwenchezə wli' wzez chento' le wen bennto' xshine'na' ladjlena', san cheeninto' gonle dii wenna' daa chiyal' gonle la'kzi ina ben' bi chak gonnto' xshin Chioza'. ⁸ Bi gak bi inanto' cheyi daa nak dii li, san zeelo chaklennto' kwenche wli'chlawin. ⁹ Chibainto' shi le' nakchale na' bi chonan byen wchinnto' yel' wnabia'na' nak lall' na'nto', la'kzi zoa ben' chle'ile' neto' ka ben' bi nap yel' wnabia'. Na' inabchinto' Chioza' gaklene' le' gakte doxen ka cheenile'. ¹⁰ Chzej' le' naa kwenche kat' yid' bi inetek' le' znia. La' Xanchona' nonə' nad' yel' wnabia' kwenche gaken' le' gakchale lo xnez Chioza', aga bene'n kwenche wliayaa le'.

¹¹ Dga zeelo nia' le', le' ben' bish' na' le' ben' zan', lliallalaa soale mbalaz na' we'l-lall'le gakte doxen ka cheeni Chioza'. Li wtip lall'le, li gak toz na' soalen ljwell-le mbalaz. Na' Chioza', beena' chakile' cho' na' chzoe' cho' mbalaz, soalene' le'. ¹² Na' li wwap ljwell-le chiox lega ben' chaki ljwellin daa nakle lall' na' Chioza'. ¹³ Na' yog'lo| ben'ki ba bixi biyech lao Chioza' chwapgabe' le' chiox.

¹⁴ Xancho Jesucrístóna' gaklenshgue' le', na' yel' chaki che Chioza' soalan le', na' Espíritu Santo che'na' gone' ka gakbe'ile zoalene' le'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' gana' mbani Galáciana'

¹ Nad' Pablo, nak' postl che Jesucrístona', na' aga no ben' yell-lío wleje' nad' na' bselee nad' wi'a xtilleena', san kwin Jesucrístona' na' Xacho Chioza', beena' bisbane'ne' ladj ben' wetka', bsel'gake' nad'. ² Nad' na' yog' bish' ljwellchoki chwapnto' le' chiox, ka le nonlilall'le Crístona' to to yellka' lle' gana' mbani Galáciana'. ³ Chñabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz. ⁴ Jesucrístona' bzani kwine' wite' ni checho daa nakcho ben' saaxya, kwenche bisle' cho' lao dii mala' de yell-lioni, kon ka goklall' Xacho Chioza' gone', ⁵ beena' chido! sho' balaan zejli kani. Kan' nakan.

⁶ Le chibanid' chele daa ba bilaala'odozle Chioza', beena' gox wñab le' na' bliile' le' ye! chiyesh'lalli che'na' daa bselee Crístona' wite' ni checho, na' ba zjanozle to dii yoblə daa bi nak dill' wen dill' kob che'. ⁷ Aga inacho de sto dill' wen dill' kob yoblan, san zoaz ba! ben' cheengakile' gonllej gongangakile' len', na' chsha'zgake' dill' wen dill' kob che Crístona'. ⁸ Shi ga za' ben' yishee dill' wen dill' kob che Crístona' daa ba wdixje'into' le', Chioza' wsak'zi'shgue' zejli kani nottezə beena' gon ka', laa neto' wa no anjl ben' za' yabana'. ⁹ Ba wñiakzə' le' ka', na' naa chiznia'n sto shii: shi no chsha' dill' wen dill' kob che Crístona' daa ba wdixje'into' le', Chioza' wsak'zi'shgue'ne' zejli kani.

¹⁰ Aga cheenid' ile'shii ben' nad' daa nia' ka', san cheenid' gon' daa chazlall' Chioza'. Shi cheenid' gon' ka chazlall' ben', aga wen llin che Crístona'chan nak'.

¹¹ Cheenid' inezile dga, le' ben' bish' na' le' ben' zan', dill' wen dill' kob che Crístona' daa wdixje'id' le' bi nakan dii wdiljlall' ben' yell-lioni. ¹² Ni to ben' yell-lío bi bli' bsdile'n nad', san kwin Jesucrístona' bli' bsdile'n nad'.

¹³ Ba benzkile' ka bsa' cha' kana' ni noa' ley chento'na', neto' ben' Israel. Na' bsak'zi'a ben'ka' nak lall' na' Chioza' daa nonlilall'gake' Crístona', goklallaa yisłengakee. ¹⁴ Kana' ni noa' ley chento'na', wlejlaw' ladj ben'ka' nak ljwell' daa ben' to dii byen wnoa' yog' diika' bkwaanlen dii xozxto'nto'ka' neto'. ¹⁵ Per Chioza', kana' zi' galjtia', ba ngwee xnez xlatjin yiyesh'lallile' nad', na' wleje' nad' kwenche gon' xshine'na'. Na' ka bllin llana' nllie' bia', ¹⁶ bene' ka bembia' Xiine'na' kwenche lli'a xtilleena' lao ben'ka' bi nak ben' Israel. Na' ka gox wñab Chioza' nad', ni tlish' ben' yell-lío bi wñabid' wzajniile' nad' daa chiyal' gon'. ¹⁷ Ni bi biyaa Jerusalénna' lljawia' ben'ka' wlej Crístona' nakgake' postl che' kana' zi' kweje' nad'. San lii wyaatia' gana' mbani Arábiana', na'tech biyaa Damáscona' sto shii.

¹⁸ Na' ka wde shon yiz, biyaa Jerusalénna' kwenche bembia' Pédrona', na' bigaanlenee shda' wbill. ¹⁹ Lekzka' ble'id' Jacóbona', beena' nak ben' bish' Xanchona', na' kochno postl yoblə ble'id'. ²⁰ Chioza' nezile' dga chzej' le' bi nakan de wxiye'.

²¹ Na'tech wyaa gana' mbani Síriana' na'ch Cilíciana'. ²² Per ben'ka' nonlilall' Crístona' Judéana' bin' gombia'gake' nad'. ²³ Zeelo ba bengakile' nagake': "Beena' bsak'zi'e cho' kana', ba chde' choe' dill' wen dill' kob che

Crístona' daa goklallee yisol yinite' kana.' 24 Na' be'la'ogake' Chioza' daa ba chyixji'a xtilil' Crístona'.

2

1 Wde shda' yiz biyaa Jerusalénna' sto shii, na' wza'len Bernabéna' nad' na' lekzka' bchi'a Títona', 2 la' Chioza' bene' ka wnezid' nan chiyal' sha'. Na' jashaljlen' ben'ka' chnabia' lao ben'ka' nonlilall' Crístona', na' to nad' to legake' bzajniid'gake' ka nak dill' wen dill' kob che Crístona' daa choe'len' ben'ka' bi nak ben' Israel. La' goklallaa inezgakile' bin chli' chsedid' kwenche bi inagake' daa ba ben' na' daa ni chon' nakan dii bibi zakii. 3 Na' ni Títona', beena' zyaalen', naktie' ben' griego, bi bengage' byen sho'e sen daa le circuncisión, 4 la'kzi wzoa ben' aga do lall'gake' lengake' neto' nxenilall'nto' Cristo Jesúsza' san bidwia bidyizgake' shi ni chonnto' ka na ley daa bzej dii Moiséza'. La' goklall'gake' toshiizi idakw ichejnto' gonnto' doxen ka na leya'. 5 Na' neto', biga bennto' ka goklall'gake', daa cheeninto' inezile bich chonan byen gonle daa na leya', san chiyal' gonle daa na dill' wen dill' kob che Crístona' daa nak dii li.

6 Ka nak ben'ka' chnabia' lao ben'ka' nonlilall' Crístona' yell Jerusalénna', la'kzi nakgake' ben' mbejlawin bitek zia' wneyi shi no nakgake', la' yog'cho toz ka zak'cho lao Chioza'. Bi wnagake' chonan byen yishaa diika' chli' chsedid' che Crístona'. 7 San gokbe'gakile' Chioza' ba bene' lall' na' wi'a dill' wen dill' kob che Crístona' lao ben'ka' bi nak ben' Israel, ka bene' che Pédróna' bene' lall' nee chixje'ile'n ben' Israelka'. 8 La' Chioza', beena' wleje' Pédróna' kwenche nake' postl che' na' chixje'ile' cho'a xtilleena' ben' Israelka', lekzen' wleje' nad' nak' postl che' kwenche chixje'id' cho'a xtilleena' ben'ka' bi nak ben' Israel.

9 Jacóbona', Pédróna', na'ch Juanna', ben'kin mbejlaogake' lao ben'ka' nonlilall' Crístona', ka gokbe'gakile' chaklen Chioza' nad' kwenche chon' xshine'na', na' bli'gake'n chongake' nad' na' Bernabéna' txen daa be'gake' na'nto'ka'. La' gokgakile' wenan gonnto' xshin Chioza' lao ben'ka' bi nak ben' Israel shlak chli' chsedgakile' ben' Israelka'. 10 Toz dii wnagake' neto' nan chiyal' yiyesh'lallinto' ben' yesh'ka', na' leyen'kzannan' ba yookzə yichj' gon' do yichj' do lallaa.

11 Na' ka bid Pédróna' Antioquíana', bsheshlenee, la' daa bene' bi nakan wen. 12 Dii nech weej wdaolene' ben'ka' bi nak ben' Israel, per ka bid ben'ka' bsel' Jacóbona', bsane' bich weej wdaolene' legake' daa bllibe' ben'ka' na chiyal' sho'cho sen daa le circuncisión na' goncho doxen ka na leya'. 13 Na' ben' Israelka' lle' na', ben'ka' ba nonlilall' Crístona' goklebgakile' Pédróna' bich weej wdaolengake' ben'ka' bi nak ben' Israel. Na' ax'tlenzə Bernabéna' goklebile' legake'. 14 Na' ka gokbe'id' bi chongake' ka na dill' wen dill' kob che Crístona', na' gosh' Pédróna' lao yog' ben'ka' lle' na': "Len naktio' ben' Israel, na' ba wlej yichjo' ley chechona' na' ba wzolozo' chono' txen ben'ka' bi nak ben' Israel. ¿Biche cheenzilo' gono' byen gon ben'ki daa yoolocho choncho, cho' nakcho ben' Israel?"

15 Cho' nakcho ben' Israel ka goljtecho chakicho bi nakcho ben' saaxya ka ben' yellka' sto, 16 per nezicho ni tlish' ben' bi nake' ben' li ben' shao' lao Chioza' daa chone' yog' daa na ley che'na'. San beena' gonlilallee Jesucristonan' yiyake' ben' li ben' shao' lawe'na'. Na' lekzka' cho' ba benlilall'cho Jesucristona' kwenche yiyakcho ben' li ben' shao' lao Chioza',

na' aga daa goncho daa na leyan'. La' aga no yiyak ben' li ben' shao' lao Chioza' daa chone' daa na leya'.

¹⁷ Daa cheenicho gakcho ben' li ben' shao' lao Chioza' daa wit Crístona' ni checho, chakbe'icho lenkzcho cho' ben' Israelan nakcho ben' saaxya. Na' daa chakbe'icho nakcho ben' saaxya, ¿azejin Crístona' none' cho' ben' saaxya? ¿Bi nakan ka! ¹⁸ Shi ba wlej yichj' leya', na' sto shii yiyonza'n lez yiyonan nad' ben' wen, na' gap' dol' lao Chioza'. ¹⁹ Nad' nak' ka ben' ba wit lao leya' daa bich chon' ka nan, kwenche gak soa' gon' ka cheeni Chioza'. ²⁰ Nad' nak' ka ben' witlen Crístona' txen kana' wite' lee yag cruza'. Daan, bich chon' daa nazan cha' san Crístona' zoe' lo yel' mban cha'ni. Na' daa chonlilallaane', shlak mban' chon' daa cheeni Xiin Chioza', beena' gokile' nad' na' bzani kwine' wite' ni cha'. ²¹ Bi chzoa' ka'lə yel' chiyesh'lalli che Chioza' daa bselee Crístona'. La' shel' leya' bizoyin biyanon cho' ben' li ben' shao', bi benan byen wit Crístona' lee yag cruza', shel'ka'.

3

¹ Le' ben' Galacia, ben' bi chajni, ¿no wxiye'z le'? Kwasloj bli' bsedinto' le' nanto' Crístona' wxak'zi'e lee yag cruza' ni checho. ² Toz dii cheenid' inabid' le': ¿Ani che daa chonle daa na leyan' bidsoa' Espíritu che Chioza' loo yichjlall'do'lena'? ¿Anti daa wyajle'le che xtill' Crístona' daa bli' bsedid' len', lla? ³ ¿Ni lat' bi chajniile! Espíritu che Chioza' wyo'e loo yichjlall'do'lena' ka wzolo chonlilall'le Crístona'. Na' naa chakile yiyakle ben' li ben' shao' daa chonle ka na leya'. ⁴ ¿Ana' bibi zjanayin yog' yel' zak'zi'ka' ba ben ble'ile daa benlilall'le Crístona'? Non' lez bi gakan ka'z. ⁵ Chioza' bzoe' Espíritu che'na' loo yichjlall'do'lena' na' bliile' le' yel' wak che'na', aga ni che daa chonle ka na leyan', san daa wyajle'le xtill' Crístonan'.

⁶ Ka ben dii Abrahama', wyajli'e che Chioza', na' daa wyajli'e, Chioza' wne' goke' ben' li ben' shao' lawe'na'. ⁷ Chiyal' inezile dga: ben'ka' chajle' che Chioza', legaken' nakgake' dowalj xiin dia che dii Abrahama'. ⁸ Cho'a Xtill' Chioza' nan bliie' bia' che ben'ka' bi nak ben' Israel lengake' yiyakgake' ben' li ben' shao' lawe'na' shi gonlilall'gake'ne'. Na' bi'e dill' wen dill' koba' kana' golle' dii Abrahama': "Ni cho' li' gak wen che yog' ben' lle' zbii zkaan yell-lioni." ⁹ Na' Chioza' chonleeye' ben'ka' chonlilall' le', ka bene' che dii Abrahama' daa benlilallee le'.

¹⁰ Ben'ka' non lez gakgake' ben' wen daa chongake' daa na leya', ba mbiayi'gake'. La' Cho'a Xtill' Chioza' nan: "Ba nakten kwiayi' beena' bi saki gone' yog'olte daa nllia leya' bia'." ¹¹ Na' nakbia'cha aga no nak ben' li ben' shao' lao Chioza' daa chone' daa na leya'. Cho'a Xtill' Chioza' nan: "Beena' nak ben' li ben' shao' daa nonlilallee nad', beenan' ibane'." ¹² Na' aga na leya' chiyal' gonlilall'cho Chioza', san nan: "Nottezə ben' chon doxen ka na leya' si'e banez yel' mban che'na'."

¹³ Crístona' wxak'zi'e lee yag cruza' ka to ben' mal ni checho kwenche bi kwiayi'cho daa bi choncho daa na leya'. La' Cho'a Xtill' Chioza' nan: "Ba mbiayi' beena' wwal'gake' to lo yag." ¹⁴ Gok ka' kwenche ka le' bi nakle ben' Israel lenle gonlilall'lene', na' Chioza' gone' wen chele ka bchebe' gone' che dii Abrahama'. Na' shi gonlilall'cho Cristo Jesús'a, Espíritu che Chioza' soalene' cho', kon ka bchebe' gone' checho.

¹⁵ Le' ben' bish' na' le' ben' zan', cheenid' wshaljen' le' ka choncho cho' ben' yell-lío: Kat' to ben' gone' to yish dii zakii na' ba nakchan, aga no gak

ina bibi zakaan ni bich gak wzanche' cho'a dill'ka' le'inna'. ¹⁶ Na' kan' nak daa bcheb Chioza' gone' che dii Abrahama' len xiin dia che'na'. Cho'a Xtill' Chioza' bi nan: “xiin dia che'ka”, san nan: “xiin dia che'na”. Bi choe'n dill' che ben'ka' shesh shan lo dia che'na', san che toz Crístona', beena' golj lo dia che'nan' cho'en dill'. ¹⁷ Dga nia' naa zejín Chioza' bi bzoe' ka'lə daa bchebe' gone' che dii Abrahama' ka bi'e dii Moiséza' ley che'na' wde tap guioa shichoa yiz. La'kzi Chioza' bi'e leya', bi wlej yichje' daa bchebe' gone' che dii Abrahama'. ¹⁸ Na' shi chonan byen goncho daa na leya' goktgui ikaacho daa bcheb Chioza' gone', bich nakan daa bchebe' gone' cho' ka'zə, shi naa. Per Chioza' bchebe' wi'en dii Abrahama' ka'zə.

¹⁹ Shi ka' nakan, ¿berache be' Chioza' leya'? Bi'e leya' kwenche gakbe'i ben' bi chongake' ka cheenile'. Na' bllie' bia' gonan llin shlak bin' yid Crístona', beena' bcheb Chioza' galjə lo dia che dii Abrahama'. Chioza' bchine' anjlka' be'gake' ley che'na' dii Moiséza', na' bchine' dii Moiséza' bzajniile' ben'ka' ka nan. ²⁰ Na' Chioza' bi byalljile' ben' yoblə wzajniile' dii Abrahama' daa bchebe' gone' che', san kwinkze' bzajniile'ne'.

²¹ ¿Achakile Chioza' bititjile' xtilleena' daa bchebe' gone' che dii Abrahama' ka bi'e ley che'na'? Bi nakan ka'. La' shel' leya' gak gonan yel' mban checho, ba biyakcho ben' li ben' shao' daa choncho ka nan, shel'ka'. ²² Cho'a Xtill' Chioza' nan yog'lol' ben' ndakw nchejgake' lao saaxyana', na' ben'ka' gonlilall' Jesucrístona' gaki chegake' daa ba bcheb Chioza'.

²³ Kana' zi' yid beena' gonlilall'cho, na' ntakw nchej leya' neto' ben' Israel, axt ki Chioza' bliile' neto' Crístonan' yisle' ben'ka' gonlilall'gake'ne'. ²⁴ Na' leya' goklenan neto', gokan ka to ben' nak lall' nee chap chwie' xiin ben', axt ki bid Crístona' benlilall'nto'ne' na' biyaknto' ben' li ben' shao' lao Chioza'. ²⁵ Na' naa daa ba bla' beena' nonlilall'cho, bich chnabia' leya' neto'.

²⁶ Daa ba nonlilall'le Cristo Jesús'a', ba nakle xiin Chioza'. ²⁷ Yog'lol'-le, le' ba wchoale nisa' daa nonlilall'le Crístona', ba billa'le na' ba nsa' chele ka nsa' che' daa naklene' toz. ²⁸ Na' cho' nakcho Crístona' txen, laa ben' Israel, laa ben' bi nak ben' Israel, laa ben' ndoo lla yel chone' xshin ben', laa ben' chon xshinkze', laa noolə, laa ben' byo, ba nakcho toz. ²⁹ Na' shi nakcho lall' na' Crístona', dii licha nakcho xiin dia che dii Abrahama', na' lencho chidol'cho daa bcheb Chioza' gone' che'.

4

¹ Kin cheenid' inia' le': bi'na' gak lall' na'b' daa de che xabaa, shlak ni nesh'b' toz ka zaklebib' wen llinka' nap xabaa, la'kzi leban' gaki cheb' yog'lol'te dii de che'. ² Na' nzoa xabaa ben' chap chwiagake' leb' na' chgoogake' xnezi yog'te dii gom' axt ki illinch llana' bllia xabaa bia' bich soab' xni'a ben'ka'. ³ Ka'kzan gok checho kana' bin' shajniicho, na' wnocho diika' na ben' yell-lioki chonan byen goncho. ⁴ Na' ka bllin lla, Chioza' bselee Xiine'na', wxan to nool le', na' wzoe' xni'a ley che dii Moiséza' ⁵ kwenche yisle' nottezə ben' zoa xni'a leya' na' yiyake' xiin Chioza'. ⁶ Na' daa ba nakcho xiine', bselee Espíritu che Xiine' Jesucrístona' loo yichjlall'do'choni, na' Espírituna' chone' kwenche che'cho Chioza': “Xadawaa.” ⁷ Na' naa, bich nakle ka ben' ndoo lla yel chone' xshin ben', san ba nakle xiin Chioza'. Na' daa ba nakle xiine', ba nonle lez ikaale daa chidol' ben'ka' nak xiine'.

⁸ Kana' bin' gombia'le Chioza', na' wzoale xni'a diika' benlilall'le, diika' bi nak dowalj chios. ⁹ Per naa ba nombia'le Chioza', wa wench inacho ba nombia' Chioza' le', ¿berache sto shii wzoazle xtillii diika' na ben' yell-lioki

chonan byen gonle, diika' bibi zakii? ¿Acheenile yizoale xñi'a diika' sto shiin? ¹⁰ Na' lenzle chaple balaan llaka', beo'ka', na' kat' chibii lla yelka', na'ch yizka', diika' chakile nakgakan dii llialo. ¹¹ Le chxollid' shi gakdadz xshin Chioza' daa ba ben' ladjlena'.

¹² Le' ben' bish'dawaa na' le' ben' zandawaa, chat'yoid' le' gonle ka chon', la' nad' ba ben' kwin' ka le' bi nole leya' na' bich zoa' xñi'ayinna'. Aga chllaan nia' le' ka', la' bigan' bi gonile nad'. ¹³ Le'kzə nezele ni che to yillwe' dii bex' nad' bgaan' lall-lena', na' kan' gok be'len' le' dill' wen dill' kob che Crístona' dii nech. ¹⁴ Na' bi benile nad' nakzi ni bi bzoale nad' ka'lə ni che yillwe'na' gok', la'kzi gokan to dii zed chele. San bleble nad' ka to anj che Chioza' wa ka kwin Cristo Jesús'a'. ¹⁵ ¿Garan yel' chiba chizaki chelena' naple kana' wzoalen' le'? Nezele' shel' wx'e'ile kweje jalaolena' gonlen nad' kana'. ¹⁶ Na' naa, ¿achllaale nad' daa ba wnia' le' dill' liki?

¹⁷ Ben'ka' bidli' bidsedi le', aga do lall'gaken' bli' bsedgakile' le'. San daa cheenzgakile' yilaale neton' na' gonle legake' txen. ¹⁸ Nakzkan wen toshiizi soa ben' wli' wsedile' le' kon shi gongake'n do yichid to lallgake', kwenche aga to kat' yidwiaz' le' wli' wsedid' le'. ¹⁹ Le' xiinjawaa, sto shii chak cha' ka chak che noola' chllagloe' sane' bi'do' che'na' daa chi' yichjlikz' gake ka chazlall' Crístona'. ²⁰ Shel' wx'e'id' naate soalen' le' we'len' le' dill' goll-lall', la' bi chajniid' biche chonzle ka'.

²¹ Ka le' cheenile gonle daa na leya', li inashki nad': ¿abin' yenile ka na leya'? ²² Cho'en dill' wzoa chop xiin dii Abrahama': tob' gok xiin noola' wxi'gake' bene' llin che'ka', na' stob' gok xiin beena' gok nool che' dowalj, beena' biga gok wen llin che ben'. ²³ Xiin nool wen llin che'ka' wzoab' daa wzoalen ljwellgake'. San noola', beena' biga gok wen llin che ben', wzoa xiine' daa bcheb Chioza' wi'e to bi' chegake'. ²⁴ Daa gok che noolka' chop, chzajniin cho' che chop daa be' Chioza' ben' Israelka'. Dii Agara' zaklebile' leya' daa be' Chioza' lo yaa Sinaína'. Na' len' goke' xña' beena' wdoo lla yel bene' xshin ben'. ²⁵ Na' zaklebile' yaa Sinaína' daa zoa Arábiana', na' nake' ka yell Jerusalénna' daa zoa naa. La' yog' ben'ka' chesh chalj yella' nakgake' ka ben' ndoo lla yel chone' xshin ben' daa zoagake' chongake' daa na leya'. ²⁶ San cho' ljzaocho Jerusalénna' daa zoa yabana' gana' zoa Chioza', bi nakcho ka ben' ndoo lla yel chone' xshin ben', la' bi zoacho xñi'a leya'. ²⁷ La' Cho'a Xtill' Chioza' nan:

Li' nool will, ben' kono xiinin zoa, biba bizaki.

Li' bin' tio' lo yel' zak'zi' che yel' san bi'do', besyaa yel' chiba chizaki cho'na'.

La' noola', beena' wchoonlall' ben' che'na'ne', soach xiine' aga ka beena' zoalen ben' che'na'.

²⁸ Na' le' ben' bish'dawaa na' le' ben' zandawaa, nakle ka dii Isaaca', beena' bcheb Chioza' wi'e dii Abrahama'. ²⁹ Na' ka gok kana', bi'na' golj daa wzoalen ljwellgake', biya dii benib' bi'na' golj kon yel' wak che Espíritu che Chioza', kakzan chak naa. ³⁰ Na' Cho'a Xtill' Chioza' nan: "Bilag noola' chon xshino'na' len xiine'na'. La' bi lem' ikaab' daa chidol' xiin beena' biga gok wen llin che ben'." ³¹ Na' naa, le' ben' bish'dawaa na' le' ben' zandawaa, aga nakchcho ka xiin beena' wdoo lla yel bene' xshin ben', san nakcho ka xiin beena' biga gok wen llin che ben'.

5

¹ Crístona' ba bisell bilee cho'. Na' chiyal' soachehle kwenche bich soale xñi'a daa wtakw wchejan le' dii yobla.

² Nad' Pablo chnabid' le' wzenagle dga nia' le'. Shi le' we'le latj koogake' le' sen daa le circuncisión, bibi zjanayin nale nonlilall'le Crístona', shi naa. ³ Sto shii nia' le', notteə ben' li ben' wi'e latj koogake'ne' sen daa le circuncisión chonan byen gone' yog'loj daa na leya'. ⁴ Le' chonle ka na leya' daa chakile yiyonan le' ben' li ben' shao', Crístonan' ba bilala'ole daa chakile ka', na' ba bzoale ka'la yel' goklenna' ben Chioza' chele. ⁵ San neto', daa zoalen Espíritu che Chioza' neto', nonnto' lez yiyaknto' ben' li ben' shao' lawe'na' daa nonlilall'nto' Crístona'. ⁶ Na' shi nonlilall'cho Cristo Jesús'a, aga bi zakii lawe'na' sho'cho sen daa le circuncisión wa bi sho'chon. Daa zakii lawe'na' gonlilall'chone' na' gakicho ben'.

⁷ Zejkzle wen lo nez lina' daa ba yoole, shel'ka'. ¿No benllej benganzi le' kwenche bich chzenagle dill' lina'? ⁸ Aga nak dga che Chios, beena' gox wñab le'. ⁹ Dezə dill' nan "lat'zə levadúrana' chisgolan doxen kwa che yetxtila'". ¹⁰ Nxenilallaa Xanchona' gaklene' le' kwenche bi shajle'le che daa bi nak dill' li. Na' Chioza' wsak'zi'e notteə beena' gonllej gonganile' le'.

¹¹ Ka nak nad', le' ben' bish'dawaa na' le' ben' zandawaa, shel' ni nia' chiyal' sho' ben' sen daa le circuncisión, aga wsak'zi' ben' Israelka' nad', shel'ka'. La' shel' ni chon' byen gongake'n, bi gakzbangakile' xtill' Crístona' daa nia' wite' lee yag cruza' ni checho kwenche gakcho ben' wen lao Chioza', shel'ka'. ¹² Ka nak ben'ka' chdazə chongake' byen sho' ben' sen daa le circuncisión, iwentelə shel' wchogtega kwingake' doloite gana' chgwee senna'!

¹³ Le' ben' bish'dawaa na' le' ben' zandawaa, Chioza' gox wñabe' le' kwenche yiyell yila'le lao dii mala'. Na' aga ni che biyell bila'le na' gonzle kon daa nazə beli chen chelena'. San li gaklen ljwell-le na' li gaki ljwell-le ganga. ¹⁴ La' doxen daa na leyan' choncho shi choncho daa bliia Chioza' bia' daa na: "Chiyal' gakilo' bish' ljwello'na' ka chaki kwino'." ¹⁵ Li wsak' bi til' wsheshle kwenche ki wzoazi'yaa ljwell-le na' wlliayi' ljwell-le.

¹⁶ Ki nia' le' naa: li gon ka cheeni Espíritu che Chioza', na' bich gonle daa na beli chen chelena'. ¹⁷ La' daa chzelall' beli chenna' bi nllaguin Espíritu che Chioza', na' daa cheeni Espíritu che Chioza' bi nllaguin daa chzelall' beli chenna'. Na' ni to diiki bi nllagui ljwellin, na' daan bi choe'gakan latj gonle daa chaklall'le. ¹⁸ Per shi chzenagcho daa na Espíritu che Chioza', bich zoacho xni'a leya'.

¹⁹ Nakbia'cha diikin chon ben'ka' chzenaggake' daa che' beli chen che'ka': chdalengake' xiin xool ben' wa xiin xyo ben', chongake' daa nak dii zban, chibagakile' gongake' yog' daa na beli chen che'ka', ²⁰ choe'la'ogake' yaj yag, chlangake' yel' willa'na', chakzbangakile' ben', chakdil'-lengake' ben', chakxe'gakile' ben', chllaa chlogkake', chibagakile' to lezgake' gak wen chegake', chibagakile' kwegkake' dil' chix na' gonte cheləgake'. ²¹ Nakgake' ben' xe', nakgake' wen xya, nakgake' ben' weezo, chajgake' ga chal' lni na' chzoll chnitgakile' na' chjeej chjtaogake' ka nla' ka nte, na' chongake' bichlə dii bi yejni'a. Na' nia' le' sto shii, ka dillaa ba be'len' le', ben'ka' chon ka' aga wak yillingake' gana' chñabia' Chioza'.

²² San ben'ka' chzenaggake' daa na Espíritu che Chioza' chakgakile' bish' ljwellgake', chiba chizak'gakile', zoagake' mbalaz, napgake' yel' chxenlall', chle'shi'gakile' ben', chongake' wen che ben', chongake' daa chchebgake', ²³ nakgake' ben' gaxjlall', na' chñabia' kwingake'. Na' ben'ka' chon diiki aga bi ley de dii inan bi chongake' wen. ²⁴ Na' ben'ka' ba nak

lall' na' Cristo Jesús'a' bich choe'gake' latj in'abia' beli chenna' legake' daa nakgake' ka beñ' ba wit lawi daa chzelall' beli chen che'ka'. ²⁵ Shi ba yoo Espíritu che Chioza' loo yichjlall'do'chona', chiyał' we'cho latj in'abi'e cho'.

²⁶ Bi chiyał' gakcho beñ' cha'sib, ni bi chiyał' wshagdılzə ljwellcho, ni bi gaxe'i ljwellcho.

6

¹ Le' beñ' bish'dawaa na' le' beñ' zandawaa, shi inezile to beena' nakle txen chone' dii mala', ka le' chzenagle che Espíritu che Chioza' chiyał' gaklenlene' kwenche yigooshlilallee, na' bi gonilene' zi'bia'. Na' li se wneyi che kwinle kwenche ki lenle yixople lao dii mala'. ² Li gaklen ljwell-le bittezə dii chak chele, la' kan' cheeni Críston'a' gonle.

³ Shi zoa beñ' chon kwine' beñ' choo beñ' xen, chziye'z kwinen'. ⁴ To tole chiyał' yiya yiyilje nak nsa' chele. Na' shi ba chizoile chonle dii wenna', li yiba yizaki, na' bi inazle chonchle ka beñ' yoblə. ⁵ La' to tocho chiyał' sho' yichjcho goncho daa naki checho.

⁶ Beñ'ka' chzenag cho'a xtill' Chioza' chiyał' we'gake' bi de chegake' beena' chli' chsedi legake'.

⁷ Bi gatzile wak siye'le Chioza'. Daa gaz kwekle lekzannan' yizi' yilaple. ⁸ Beena' choe' cho'a xbayi beli chenna', kwiayee daa chzenague' cheyin. San beena' chon ka cheeni Espíritu che Chioza', yizi'e banez yeł' mban zejli kan' daa chzenague' che'. ⁹ Bi chiyał' lljxakicho goncho dii wenna', la' wllin lla yizi'chon banez kon shi bi yidinjicho. ¹⁰ Na' daan, kat' de xlatjin, chiyał' gonicho wen yog' beñ', na' lliarote beñ'ka' nakcho toz nonlilall'cho Críston'a'.

¹¹ Kwin' chisyoll' chzej' yishi.* Li wwiakachi ka nak letr yeł' cha'ki. ¹² Beñ'ka' chonzə byen sho'le señ' daa le circuncisión, chongake'n kwenchzə kono bi ina chegake', na' kono wsak'zi' legake' daa choe'gake' xtill' Críston'a', beena' wit lee yag cruza'. ¹³ La' ni beñ'ka' yoo señna' bi chizogakile' gongake' doxen ka na leya'. San cheenzgakile' sho'le señna' kwenche wshalj wshongake' ba bengake' gan yoolen. ¹⁴ Ka nak nad', biga cheenid' wshalj wshon' che kwin', san wshalj wshon' che daa ben Xancho Jesucríston'a'. La' daa wite' lee yag cruza' bich bi wneyi zia' shi bi ina beñ' cha', na' ka'kzə beñ' yell-lioka' bich ndegake' nad' kwent. ¹⁵ Bibi zjanayin sho'cho señna' wa bi sho'chon, san daa ba bikob Chioza' yichjlall'do'chonon', lennan' zakii. ¹⁶ Yiyesh'lall'shgayi Chioza' yog'lol beñ'ka' chon ka ba wnia', na' gone' ka soagake' mbalaz, la' legaken' nakgake' dowalj beñ' Israel, beñ'ka' nak yell che'.

¹⁷ Na' naa, bich cheenid' no kwekw nad' dii zed, la' kwerp cha'ni nsa'n yill che yog' diika' ba wxak'zi'a daa chon xshin Xancho Jesús'a'.

¹⁸ Le' beñ' bish'dawaa na' le' beñ' zandawaa, Xancho Jesucríston'a' soalenshgue' yog'loltele na' gaklenshgue' le'. Kan' gakan.

* **6:11** Kwin' chisyoll' chzej' yishi: Páblona' bchine' beñ' bzeje' dillaa bi'e, per kwine' bzeje' to chop cho'a dill' gana' chiyoll' yisha' kwenche gokbe'gakile' len' bselejen.

Kart daa bzej Páblona' na' bseleen lao ben'ka' nonlilall' Jesucrístona' yell Éfesona'

¹ Nad' Pablo nak' postl che Jesucrístona' kon ka chaklall' Chioza'. Chwap' le' chiox, le' lle'le yell Éfesona', na' nakle lall' na' Chioza' daa nakle Cristo Jesús'a toz, beena' chonlilall'le. ² Chnabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la' ocho beena' nak Chios che Xancho Jesucrístona', beena' nak Xe'. La' ba benleeye' cho' na' ba naki checho yog' dii wenna' de yabana', daa nakcho Crístona' toz. ⁴ Chioza' wleje' cho' gakcho Crístona' toz kana' zi' xe silte yell-lioni kwenche gakcho ben' nxi nyech na' bibi xtol'cho gat' lawe'na'. Daa le chakile' cho', ⁵ wlo'e xnezin kana' zi' xe silte yell-lioni gakcho xiine' kon ka wyazlallee gone' checho, daan bselee Jesucrístona' ni checho. ⁶ Na' daan, toshiizi we'la' ocho Chioza' daa bene' to dii wen inleeb checho daa ba nakcho Xiine'na' toz, beena' le chakile'. ⁷ Ba nakchone' toz daa wdixje' xtol'choka' kana' blalj xchene'na' ni checho kwenche Chioza' bizi'xene' saaxya chechoka' daa naklikze' ben' wen inleeb. ⁸ Na' dii xen wal chaklen Chioza' cho' daa none' cho' yel' sin'na' len yel' chajniina'. ⁹ Na' ba bliile' cho' daa goklallee gone' daa kono wnezi kani'yi, daa bliie' bia' gon Crístona'. ¹⁰ Na' bliie' bia' illin lla gak ka wyazlallee na'ch yiyone' toz yog'lol dii bxe bsile', ka diika' lle' yabana' na' ka diika' lle' lo yell-lioni, kwenche Crístona' inabi'e lao yog'lolan.

¹¹ Chios, beena' chon yog'lol daa chaklallee kon ka chgwee xnezin gak, wleje' cho' kana' zi' soatecho kwenche gaki checho dii wenna' wi'e ben'ka' nak Crístona' toz. ¹² Na' goklallee zigaate neto' naknto' ben' Israel wxenilall'nto' Crístona' kwenche shajlawee daa nake' ben' choo ben' xen. ¹³ Na' lekzka' le', wyajle'le che Crístona' na' bénlene' txen ka benile dill' wen dill' kob che'na' daa nak dii licha daa choe' dill' yisle' cho' kwenche bi kwiayi'cho. Na' ka wyajle'le, Chioza' bli'e ba nakle lall' nee daa bzoe' Espíritu Sánto che'na' loo yichjlall'do'lena' kon ka bchebe' gone'. Na' daa bene' ka', wak inacho wlo'e le' to sen daa chli'n nakle lall' nee. ¹⁴ Na' daa zoa Espíritu che'na' loo yichjlall'do'chona', nezicho gak lo na'cho yog' diika' nchebe' gone' cho' kat' illin lla yizi' yikee cho' nakcho lall' nee, kwenche koochone' balaan daa nake' ben' choo ben' xen.

¹⁵ Na' daan, ka wnezid' nonlilall'le Xancho Jesús'a na' le chakile' yog' ben'ka' nak lall' na' Chioza', ¹⁶ bi chsanlallaa wi'a Chioza' yel' choxken ni chele na' chnab' gaklene' le' kat' choe'lwillee. ¹⁷ Choe'lwil' Chios che Xancho Jesucrístona', beena' nak Xacho, beena' liizelozí chidolee sho'e balaan xen, chnabidee gon Espíritu che'na' le' yel' sin' che'na' na' wzajniile' le' kwenche gombia'chlene'. ¹⁸ Na' chnabidee wzoe' beeni' che'na' loo yichjlall'do'lena' kwenche inezile bin nonle lez daa ba gox wnabe' le', na' ka mbalaz inleeb nak daa wi'e ben'ka' ba nak lall' nee, ¹⁹ na' kwenche gakbe'ile ka nak yel' wak choo yel' xen che'na' daa bi chiyoll chido daa chaklenan cho' nonlilall'chone'. Lennan' yel' wak choo yel' wak xen ²⁰ daa bli'e kana' bisbane' Crístona' ladj ben' wetka' na' wlekwe'ne' shlaa de shli che'na' yabana', ²¹ gana' nzoe'ne' chnabia'che' aga ka yog'lol anjlka' na' dii xiw'ka' nap yel' wak na' yel' wnabia'. Na' zeyi che' kochno zoa, ni kochno

soa, beṅ' gach beṅ' zak'chi ka le'. ²² Na' bzoe' xṅi'a Crístona' yog'loṭe dii de, na' nzoe'ne' chṅabi'e lao yog'loṭcho cho' nakchone' toz, ka chon yichjchona' chṅabi'an doxen kwerp chechona'. ²³ La' cho' nakchone' toz, zaklebicho kwerp che'na'. Na' toshiizi zoalene' cho' na' chṅabi'e cho', la' len' chṅabi'e yog'loṭe dii de doxen yell-lioni na' yabana'.

2

¹ Kana' bin' gonlilall'le Crístona', gokle ka beṅ' net lao Chioza' daa wzoale bxinj bṅenle. ² Na' wdale benle kon ka nazan chele, ka chon nottezə beṅ' yell-lío, beṅ' bi nombi'e Chioza'. Na' bzenagle cheyi daa chṅabia' dii xiw'ka' ze lo llazə, daa chṅabia' yichjlall'do' beṅ'ka' bi chzenag che Chioza'. ³ Ka'kzan ben yog'loṭcho kana', bencho kon daa nazan checho, be'cho cho'a xbayi beli chen chechoni na' yog'loṭ diika' wza'lall' loo yichjlall'do'choni. Na' daa bencho ka', chidol'cho yel' zak'zi' che Chioza' kon ka chidol' gach che beṅ'ka' bi chzenag che'. ⁴ Per daa nak Chioza' beṅ' lall'do' xen inleeb na' le chakile' cho', ⁵ bene' yel' mban checho zejli kani ka benlilall'cho Crístona', beena' biban ladj beṅ' wetka', la'kzi gokcho ka beṅ' net daa choncho saaxyaka'. Na' daa nak Chioza' beṅ' wen inleeban, bisle' cho' kwenche bi kwiayi'cho. ⁶ Na' daa nakcho Cristo Jesús'a toz, ka bisban Chioza'ne' ladj beṅ' wetka', lenkzchon bisbane' daa bene' cho' to yel' mban kob. Na' ba nakten lljanabia'lenchone' yabana'. ⁷ Chioza' bene' ka' kwenche llaka' zi' za' wli'lawin nake' beṅ' wen inleeb daa bene' to yel' goklen xen checho daa bselee Crístona' ni checho. ⁸ La' yel' beṅ' wen che'nan' bisle' cho' kwenche bi kwiayi'cho daa ba nonlilall'cho Crístona'. Aga inacho daa nakcho beṅ' wenan bisle' cho', san nakan to goklen daa bene' checho ka'zə. ⁹ Na' bi gach gachcho cha'sib, la' aga daa choncho dii wennan' bisle' cho'. ¹⁰ La' Chioza' bikobe' yel' mban chechona' ka bene' cho' lall' na' Crístona' kwenche soacho goncho dii wenna' ba wlo'e xṅezin goncho.

¹¹ Ka le' bi nakle beṅ' Israel, beṅ' Israelka' nsi'gake' le' Beṅ' bi yoo seṅ daa le circuncisión, na' legake' nsi' kwingake' Beṅ' yoo seṅ daa le circuncisión. Li lljadini ka gokle kana'. ¹² La' kana' bin' gombia'le Crístona', gokle ka beṅ' zit' laonto'na', neto' wlej Chioza' kwenche naknto' yell che', na' Chioza' aga bchebe' gaklene' le' ka bchebe' gaklene' neto' beṅ' Israel. Na' wzoale yell-lioni bi bembia'le Chioza' ni bi benle lez gach wen chele. ¹³ Kana', gokle ka beṅ' zit' laonto'na'. San naa, ba nakcho toz daa nonlilall'le Cristo Jesús'a, beena' blalj xchene'na' wite' ni checho. ¹⁴ Crístona' bene' ka bizoalen ljwellcho wen. Kana', bi ble'shii ljwellcho, san naa, ba biyone' cho' toz daa bsol bnite' daa benan ka bwiyi ljwellcho. ¹⁵ Daa bzani kwín Crístona' wite' ni checho, bchogue' daa wna ley chento'na' chiyal' gonnto'. Bene' ka' kwenche neto' beṅ' Israel na' le' bi nakle beṅ' wlall' chento' biyakcho toz lawe'na'. Na' ba bizoe' cho' wen. ¹⁶ Na' daa wite' ni checho lee yag cruza', bizoe' cho' wen kon Chioza', ka le' na' ka neto', na' biyakcho toz na' bich chakzbani ljwellcho.

¹⁷ Crístona' bidtixji'e dill' wen dill' koba' daa na yog'cho wak soalencho Chioza' wen, ka le' nakle beṅ' zit' na' ka neto' naknto' beṅ' yell che'. ¹⁸ La' daa nonlilall'cho Crístona', ka le' na' ka neto', wak ibig'cho lao Xacho Chioza' daa ba bene' cho' Espiritu che'na'. ¹⁹ Na' le' bi nakle beṅ' Israel bich nakle ka beṅ' zit', san ba lenle beṅ'ka' nak yell che Chioza', na' Chioza' ba none' le' ka beṅ' loo yoo. ²⁰ Le' nakle ka to yoo, na' neto' postl

na' ben'ka' chyixjee daa che' Chioza' legake' naknto' ka len yooná, na' kwín Jesucristona' nake' ben' llialaote ka yaja' daa mbejláwi, yaja' daa ba nchejcha yooná'. ²¹ Na' Jesucristona' chone' kwenche yog'cho cho' nakchone' txen gáckho toz na' gáckho ka to yoodo' gána' zoa Chioza'. ²² Na' lekzka' Jesucristona' chone' kwenche yog'cho, ka neto' na' ka le', gáckho ka to yoo gána' zoa Chioza' daa zóalen Espírítu che'na' cho'.

3

¹ Nad' Pablo dia' lillyani daa chyixje'id' le' xtill' Crístona', le' bi nakle ben' Israel. ² Ba nezkzile' dii wenna' ben Chioza' daa bene' lall' na' wi'a xtilleena' laolena'. ³ Ba bzajniile' nad' daa kono wnezi, kon ka ba bzej' le' to chop cho'a. ⁴ Na' kat' wlable yishi, gáckbe'ile ba bzajniile' nad' daa kono wnezi che Crístona'. ⁵ Diaka' ba wde bi wnezgáckile' dga ba bzajnií Espírítu che'na' neto' postl che' len ben'ka' wdixjee daa goll Chioza' legake'. ⁶ Na' dga kono wnezi nan: yog'cho cho' chajle'cho dill' wen dill' kob che Cristo Jesúsá, ka le' bi nakle ben' Israel na' ka neto' ben' Israel, nakcho toz na' txen ikaacho dii wenna' bcheb Chioza' gone' checho.

⁷ Yel' ben' wen che Chiozan' wleje' nad' na' bzoe' nad' gon xshine'na', na' chaklentie' nad' kon yel' wak che'na' kwenche choe'len' ben' dill' wen dill' kob che Crístona'. ⁸ Nad' chakid' shlas aga no nak' lao yog' ben' nak lall' na' Chioza'. Per la'kzi aga bi zakaa, Chioza' wleje' nad' kwenche we'len' ben'ka' bi nak ben' Israel dill' wen dill' kob che Crístona' daa le zak'chga na' bich bi de dii wsaklebichon. ⁹ Chioza', beena' bxe bsil yog'loté dii de, kani'yi wlo'e xnezin gone' to dii gone', na' ni to kono golle' ka nak daa gone'. Na' naa ba bene'n lall' na' wzajniida'n ben' ¹⁰ kwenche ni checho, cho' nakcho toz nonjilall'cho Crístona', gáckbe'i anjlka' lle' yabana' na' dii xiw'ka' doxen ka nak yel' sin' che Chioza'. ¹¹ Na' daa bselee Xancho Cristo Jesúsá, ba bene' ka wlo'e xnezin gone' kana' zi' wxé wsiltie' yell-lioni. ¹² Na' daa nonjilall'cho Crístona' na' nakchone' txen, de latj checho we'llwillcho Xacho Chioza' na' nezicho wzenague' checho. ¹³ Na' nia' le', li gon goklen bi yidinjile ni che dga chllagloa' daa be'len' le' xtill' Crístona', san li yibayi daa chzak'zi'a ni chele.

¹⁴ Daan, chchek' xib' choe'llwill' Xacho Chioza', beena' nak Xa Xancho Jesucristona', ¹⁵ beena' ben kwenche yog'cho cho' nakcho xiine' nakcho toz, ka ben' lle' yell-lioni ka ben' lle' yabana'. ¹⁶ Na' daa nape' doxen yel' waka', chnabidee kwenche Espírítu che'na', beena' yoo loo yichjlall'do'léna', gone' ka gáckchachle ¹⁷ na' soachle gonjilall'le Crístona' kwenche toshiizi soalene' le', na' yel' chakina' wde loyin lo yel' mban chelena' kwenche soatezi soale gáckilene' na' gáckilwell-le, ¹⁸ na' gáckbe'ile, le' na' yog' ben'ka' nak lall' na' Crístona', ka cháckhgaile' cho', na' biga yiyoll yido yel' cháck che'na'. ¹⁹ Cheenid' gombia'le yel' cháck che'na' daa nak liizelozí dii xen inlleb, daa kono illin shajnií kwaslól, kwenche yiyoll yido gáckle doxen ka cheeni Chioza'.

²⁰ Chioza' chidolee sho'e balaan daa chak chone' dii xench aga ka daa chnabichone' wa daa cháckicho gone' checho ni che yel' wak che'na' daa zóalen cho'. ²¹ Cho' nonjilall'cho Cristo Jesúsá' chiyal' koocho Chioza' balaan toshiizi na' zejli kani ni cheyi daa bselee Crístona' ni checho. Kan' nakan.

4

¹ Nad' dia' lillyani daa chyixji'a xtill' Xancho Jesucristona'. Na' chat'yoid' le' soale gonle wen kon ka chiyal' goncho cho' ba gox wñab Chioza'. ² Li gak beñ' gaxjlall', li ile'shii beñ', li gap yel' chxenlall' chele ganga na' li gaki ljwell-le. ³ Espíritu Sántona' bene' ka yog'cho biyakcho toz, na' li gon byen soalen ljwell-le wen kwenche toshiizi gakcho toz. ⁴ Yog'cho, cho' nonlilall'cho Crístona', zaklebicho to kwerp daa nakcho toz; na' toz Espíritu yoo loo yichjlall'do'chona'; na' toz ka noncho lez gon Chioza' checho daa ba gox wñabe' cho'. ⁵ Tozə beena' nak Xancho, na' toze'n nonlilall'cho, na' toz ka zeji daa chchoacho nisa'. ⁶ Tozə Chioza' zoa, beena' nak Xa yog'lolcho. Na' len' chñabi'e lao yog'lolcho; na' chchine' yog'cho kwenche chak daa cheenile' gak, na' zoalene' yog'cho.

⁷ Per to tocho non Crístona' dii gak goncho kon ka goklallee. ⁸ Daan, cho'a xtill' Chioza' nan:

Ka biyepe' yabana', zinchi'e pres che'ka',
na' bi'e dii wen che'na' beñ' yell-lioki.

⁹ Na' ka nak daa nan “biyepe’”, zejin zigaate betje' bide' yell-lioni. ¹⁰ Na' beena' bid yell-lioni, lekzen' biyepe' yabana' gana' zoe' chñabi'e lao yog'lolte dii de. ¹¹ Na' len' bzoe' beñ' nak postl che', na' beñ' chyixjee daa chi'ene', na' beñ' chyixjee dill' wen dill' kob che'na', na' beñ' chap chwie' beñ'ka' ba nonlilall' le', na' beñ' chli' chsedi cho'a xtilleena', ¹² kwenche beñ'ka' nak lall' nee gak gongake' xshine'na', na' yiyoll yido gakcha yog' beñ'ka' nak Crístona' txen, ¹³ axt ki yog'cho gakcho toz gonlilall'cho Xiin Chioza' na' gombia'chchone'. Na' gakyen'cho ka chiyal' gakcho, na' yiyoll yido gakcho dowalj beñ' wen doxen ka nak Crístona'. ¹⁴ Na' bich gatzcho ka bi'do' na' shajle'tezcho bittezə daa chyiljlall' beñ', na' ni bi gak gon beñ' wxiye'ka' gan siye'gake' cho' kwenche shajle'cho daa bi nak dii li. ¹⁵ San shajlencho dill' li che Chioza' na' gapcho yel' chaki che'na', na' ka' zej gajlcho beñ' wen ka nak Crístona', beena' chñabi'e cho', ka chon yichjchoni chñabia'n kwerp chechoni. ¹⁶ Ka nak kwerp chechoni, tkwen tkwen wejan nox' ljwellin na' chaklen ljwellin bittezə llin gonan. Ka'kzan cho' nakcho Crístona' txen nakcho ka toz kwerp kwenche to tocho goncho daa non'e' cho', na' yog'cho zejch chakchacho na' zejch chakchi ljwellcho.

¹⁷ Nia' le' dga kon yel' wñabia' che Xancho Crístona': bich soale gonle ka chon beñ'ka' bi chonlilall'gake' Chioza', beñ'ka' kon chyiljlall'gake' daa bibi zakii, ¹⁸ na' nchol nñiti yichjlall'do'eka' na' bi ntegakile', na' bi napgake' yel' mban daa non Chioza' cho', ni bi nombia'gake' daa nak che Chioza', daa nakgake' beñ' lall'do' wal. ¹⁹ Bichkzə bi yel' zto' nombia'gake', na' biga chjshyagakile' chongake' yog' diika' nak zban. ²⁰ San le', nezile aga kan' cheeni Crístona' goncho, ²¹ shi dii likzə ba benile xtill' Jesús'a' na' ba nzedile soale gonle ka cheenile' kon ka nak dii li che'na'. ²² Na' chiyal' wsanle bich gonle dii malka' benle, na' kwej yichjle yel' mban gol chelena', la' daa wxiye' beli chenna' len', bxinj bñenan le'. ²³ Chiyal' yikob yichjlall'do'leka' na' bich bi dii mal sa'lall'le. ²⁴ Na' chiyal' yikob yel' mban chelena' kwenche yiyakle dowalj beñ' li beñ' shao' lega beñ' nak xiin Chios.

²⁵ Daan, bich chiyal' siye'le, san to tole chiyal' we'len ljwell-le dill' li, la' yog'cho ba nakcho toz, ka kwerp chechona' nakan toz, la'kzi zan diika' ndil nllagan.

²⁶ Kat' illaale, bi wxinj wlenle ni bi koolall'zle, ²⁷ kwenche bi we'le latj che dii xiwaa.

²⁸ Na' beena' chzi' chban, bich gone' ka', san wchine' ni'a neena' gone' llin kwenche gape' dii wi'e ben'ka' bibi de cheyin.

²⁹ Na' bi chiyal' we'le dill' zban, san chiyal' we'le dill' wen dill' shao' dii gonan ka soatip soashoshch ben'ka' chzenag bin nale na' gaklenan legake'. ³⁰ Na' bi gonle ka soayesh' Espiritu Santo che Chioza', beena' ba nzoe' loo yichjlall'do'chona' kwenche chakbe'icho ba nakcho lall' na' Chioza' shlak illin lla yikee cho', cho' ba biya'o bizi'e.

³¹ Chiyal' kwej yichjle yog'lol dii malki: bich koolall'le, bich illaa ilokle, bi koole ben' bel' ban, bibi gon inale che ben' na' ni sto dii malka' bich gonle. ³² Li gak ben' wen ben' shao' na' ben' chiyesh'lalli bish' ljwellin. Chiyal' yizi'xen che ljwell-le, ka ben Chioza' bizi'xene' chele daa nonlilall'le Crístona'.

5

¹ Daa ba nakle xiin Chios na' chakile' le', li wsed gonle wen ka chone'. ² Chiyal' soale gakile ben', ka chaki Crístona' cho'. Daa chakile' cho', bzani kwine' wite' ni checho, na' bibayi Chioza' daa bene' ka', ka bibaile' shii xla' bayix'do'ka' bzeygake' lawe'na' kana'.

³ Bi chiyal' selall'le inelen ljwell-le wa gonle bichlæ dii zban, ni bi selall'le gat' kwe'ile dii xen wal. Ni to diiki bi chiyal' gak ladjlena' daa ba nakle lall' na' Chioza'. ⁴ Bi we'le dill' zban, ni dill' dii bi zakii ni dill' dii bi yejni'alallii, la' aga dill' ka diikin chiyal' we'le, san chiyal' we'le Chioza' yel' choxken. ⁵ La' ba nezczile ni to ben' chnelen ljwellin, wa ben' chon bichlæ dii zban, wa ben' chzelall' gat' kwe'ile' dii xen, bi yilline' yabana' gana' chnabia' Crístona' len Chioza'. Beena' chzelallii gat' kwe'ile' dii xen, toz ka chone' ka beena' choe'la'o daa nak yaj yag. ⁶ Bi we'le latj no siye' le' we'lenze' le' dill' dii bi zakii, la' ben'ka' chon chiya dii malki, ile'gakile' yel' zak'zi' xen che Chioza' daa bi chzenaggake' che'. ⁷ Daan, bi chiyal' lenle ben'ka' chon ka'.

⁸ Kanan', nchol' nniti yichjlall'do'lena', san naa daa ba nakle Xancho Jesucrístona' txen, ba yoo beeni' che'na' loo yichjlall'do'lena', na' chiyal' soale gonle lega ben' ba yoo beeni' che'na'. ⁹ La' beeni' che'na' chaklenan cho' gakcho ben' wen, na' ben' li ben' shao', na' ben' choe' dill' li. ¹⁰ Li se wneyi kwenche inezile bi daa chazlalli Xanchona' gonle. ¹¹ Bi gonle txen diika' chon ben'ka' nchol' nniti yichjlall'do'eka', la' bibi zakii daa chongake', san li gon ka yiyakbe'gakile' bi chongake' wen. ¹² La' axt chiyii chido'icho we'cho dill' cheyi diika' chongake' do ngash'zæ. ¹³ Per yog'lol diika' choncho, chli'laogakin lo beeni' che Chioza' nak nakgakan. ¹⁴ La' beeni' che'na' chili'n lao yog'te diika' choncho. Daakzan ne':

Li yiban, le' nakle ka ben' ches;

na' li yiyas ladj ben' wetka'.

Na' Crístona' kwee beeni' che'na' loo yichjlall'do'lena'.

¹⁵ Na' li se wneyi wsa' chele wen, na' bi gonzle ka ben' bi nteyi, san li gako ka ben' sin'. ¹⁶ Li gon ka dii le gonle dii wenna' kat' de xlatjin, la' llaki zoacho le ba chi'chga dii mala'. ¹⁷ Daan, bi chiyal' gonle ka ben' bi nteyi, san chiyal' shajniile daa cheeni Xancho Jesucrístona' goncho. ¹⁸ Bi soll' nitile, la' beena' chzoll' chniti chone' chiya dii bi yejni'alallii. San li we' latj soa Espiritu Sántona' inabi'e loo yichjlall'do'lena'. ¹⁹ Chiyal' we'len

lijwell-le dill' che sálmoka', na' goł-le dii koon Xanchona' balaan na' bichlê dii ina Espiritu che Chioza' goł-le. Na' li goł ine we'la'ole Xancho Crístoná' do yichj do lall'le. ²⁰ Na' daa nakcho Xancho Jesucrístoná' txen, toshiizi chiyał' we'le Xacho Chioza' yel' choxken daa chaklene' cho' lao yog'lołte.

²¹ Chiyał' wzexj yichjle wzenag che lijwell-le, daa chaple Crístoná' balaan.

²² Na' ka le' noolə zoa beñ' chele, chiyał' wzexj yichjle wzenagle chegake', ka chonle chzenagle che Xancho Crístoná'. ²³ La' beñ' byonan' chñabi'e nool che'na', ka chon Crístoná' chñabi'e cho' nonlilall'chone', cho' ba bisle' kwenche bi kwiayi'cho. Chñabi'e cho', cho' zaklebicho kwerp che'na', ka chon yichjchoni chñabi'an kwerp chechoni. ²⁴ Na' ka cho' nonlilall'cho Crístoná' na' chzexj yichjcho lawe'na', ka'kzan chiyał' gon noolka' wzexj yichje'ka' lao yog'loł daa ina beñ' che'ka'.

²⁵ Na' ka le' beñ' byo zoa nool chele, li gaki nool cheleka', ka chon Crístoná' chakile' cho' nonlilall'chone' na' bzani kwine' wite' ni checho ²⁶ kwenche biyakcho beñ' nxi nyech lawe'na'. Bixis biy-ibe' yichjlall'do'chona' ka wyajle'cho xtilleena' ²⁷ kwenche yibaile' cho' nakcho lall' nee kat' yillincho lawe'na' na' bibi nda' nchen yichjlall'do'chona', san gakcho beñ' nxi nyech, beñ' bibi xtoliin de. ²⁸ Na' ka'kzə le' beñ' byo, le' zoa nool chele, chiyał' gapshiile nool cheleka' ka chapshii kwinle. Beena' chakile' nool che'na', kwinkzen' chakile'. ²⁹ Biga zoa beñ' chwile' kwerp che'na', san chweej chwawe'n na' chapshi'en, ka chon Crístoná' chapshi'e cho' nakchone' txen, ³⁰ la' to tocho nakcho ka tkwen wej kwerp che'na'. ³¹ “Daan, wlaa beñ' byona' xaxneena' kat' ikaa che', na' soalene' xoolə'na' gagake' toz.” ³² Dill'ki ba wnia' chzajniin le' to dii zak'chgayi daa biñ' inezile', la' chzajniin cho' ka chon Crístoná' daa chakile' cho' ba nakchone' toz. ³³ Na' ka le' beñ' byo, to tole chiyał' gakile' nool cheleka' ka chaki kwinle. Na' le' noolə, chiyał' gapple balaan beñ' cheleka'.

6

¹ Na' le' bi'do', li wzenag che xaxna'leka' lega bi' chzenag che Xancho Crístoná', la' kan' chiyał' gonle. ² Dga bllia Chioza' bia' goncho gokan dii nech daa nsa' to dii bchebe' gone' checho shi goncho ka ne', na' nan: “Li gap balaan xaxna'leka', ³ kwenche gak wen chele na' ibanle ssha lo yell-lioni.”

⁴ Na' le' zoa xiinle, bi gonle ka gakshejlall'b', san li yisgolgakb' xochi na' li wzajni'gakib' kwenche wzenaggakb' che Xancho Crístoná'.

⁵ Na' le' ndoo lla yel-le chonle xshin beñ', li gon daa na beñ'ka' nak xanle yell-lioni. Li gagake' balaan, li illebgake' na' li gon xshine'ka' do yichj do lall'le. Li gaktezi che Crístoná'kzan chzenagle.

⁶ Aga kat' chwiazə xanlena' yilał yizodile' kwenche ile'shi'gakile' le', san li gonan do yichj do lall'le lega beñ' nak wen llin che Crístoná', la' kan' cheeni Chioza' goncho. ⁷ Chiyał' gonle llinna' do yichj do lall'le, na' li gaktezi xshin Crístonan' chonle, aga che beñ' yell-lion. ⁸ La' nezkzile nottezə nakcho, laa beñ' ndoo lla yele' chone' xshin beñ' wa beñ' chon xshinke', Xanchona' gone' ka yizi'cho banez che dii wenna' ba bencho.

⁹ Na' le' nzi'le beñ'ka' chon xshinlena', lekzka' li gonigake' wen. Bi wwall wsheble legake', la' nezkzile, ka le' na' ka legake', yabana' zoa to beñ' nak Xanle, na' le' aga nakzi beñ' chakile'.

¹⁰ Na' lekzka' nia' le' ben' bish'dawaa na' le' ben' zandawaa, li gak wal kon ye! wak choo ye! wak xen che Xanchona'. ¹¹ Li wchin yog' diika' non Chioza' gaklenan cho' kwenche gakchale na' so sakile gonle gan dii xiwaa kat' za'lenan ye! wxiye' cheyinna'. ¹² La' aga ben' de beli chenzan chdil-lencho, san chdil-lencho dii xiw'ka' bi chle'icho, diika' ze lo llazə na' napgakan ye! wak na' ye! wñabia', diika' chñabia' lo yell-lioni gani dechga dii mala'. ¹³ Na' daan, li goni chele yog' daa non Chioza' gaklenan le' kwenche so sakile dii mala' lla'na' wtil-len, na' ka yiyoll wtil-len ni zechechkzle. ¹⁴ Li soachech na' li we' daa nak dill' li, la' lënnan' gaklenan le' gonan ka bachleena' daa chchel leelena'. Na' li soa li gon daa nak dii lïcha, la' lënnan' gaklenan le' gonan ka daa chbin soldadka' chkweejan lcho'eka'. ¹⁵ Na' li se kwas we'lenle ben' xtill' Crïstona' daa wzoan legake' mbalaz, ka chon to soldad ze' kwase' nlej xe'le'na' kwenche shaje' lo wdila'. ¹⁶ Na' daa lliälote lawi diiki, li soachech gonlilall'le Chioza' kwenche gaklenan le' na' wsol wñitan yog'lol de wxiye' che dii xiwaa, na' gonan llin ka daa nox' soldada' chkweejan le' kwenche bi chchele' daa chzal' beena' chdil-lene'. ¹⁷ Na' li wzoa yichjle daa bisla Chioza' le' lao dii mala', na' gonan llin ka lap' ya che soldadka' daa chkweej yichje'ka'. Na' Cho'a Xtill' Chioza' gakan ka to yesya daa chon Espïritu Sántona' le' kwenche til-lenle dii mala'. ¹⁸ Toshiizi li we'lwil Chioza', na' inabilene' kon ka chzajni Espïritu che'na' le'. Na' toshiizi li se wneyi, na' bi lljxakile inabilene' che yog' ben'ka' ba nak lall' nee. ¹⁹ Na' lekzka' li inabi Chioza' kwenche wxoe' cho'a lollaani dill'ka' we'len' ben', na' bi illeb' wzajniid' ben' ka nak dill' wen dill' kob che Crïstona' daa kono wyajni kani'yi. ²⁰ La' Chioza' nselee nad' lo laze' kwenche we'len' ben' cho'a xtilleena', na' ni cheyinnan' dia' lillyani. Li inabi Chioza' gaklene' nad' kwenche bi gall illeb' wi'a cho'a xtilleena'.

²¹ Tiquiconi, ben' bish'choni le chakid', nake' to ben' toshiizi chaklene' lo xshin Chioza', na' yidzajniile' le' yog'lol ka chak cha' na' daa chon'. ²² Chselaaane' yide' laolena' kwenche inezile ka chak chento', na' kwenche wti'pe' lall'le.

²³ Le' ben' bish' na' le' ben' zan', chñabid' Xacho Chioza' na' Xancho Jesucristona' gongake' ka soale mbalaz, na' gonlilall'chle legake', na' gaki ljwell-le. ²⁴ Chioza' gaklenshgue' yog'lol-le, le' zoale chakchgaile' Xancho Jesucristona'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Filípoza'

¹ Nad' Pablo na'ch Timotewi naknto' wen llin che Jesucrístona', chwapnto' chiox yog'le, le' lle'le yell Filípoza', le' nakle lall' na' Chioza' daa nonlilall'le Cristo Jesúza'. Na' lekzka' chwapnto' chiox ben'ka' chgoo xnezi xshin Chioza' ladjlena' na' ben'ka' chaklen legake'. ² Chios, beena' nak Xacho len Xancho Jesucrístona' gaklenshgagake' le' na' wzoagake' le' mbalaz.

³ Ka ka chjadinid' le' cho'a Chios cha'na' yel' choxken. ⁴ Na' toshiizi choe'lwillee kon yel' xaba kat' chñabidee gaklene' yog'le, ⁵ daa lenle chonle nad' txen, dezd ka wyajle'le ax̄t naa, kwenche ides dill' wen dill' kob che Jesucrístona'. ⁶ Nezyen'id' Chios, beena' wzolo chone' to dii wen loo yichjlall'do'lena', gone' kwenche yiyoll yido yiyakle ka chazlallee kat' illin lla yila' Jesucrístona'. ⁷ Na' chiyał'kz yibaid' ka chjadinid' le', la' toshiizi yoole loo yichjlall'dawaani. Na' la'kzi dia' lillyani wa choe'len' ben' dill' wen dill' kob che Jesucrístona' kwenche gakbe'gakile' nakan dill' li na' shajle'gake' cheyin, nezid' toshiizi chaklenle nad' lo linna' daa ben Chioza' lall' na' gon' yel' ben' wen che'na'. ⁸ Chioza' nez nle'ile' ka chakid' yog'le kon ka chaki Cristo Jesúza' le'. ⁹ Kat' choe'lwill' Chioza', chñabidee zizikli yisgolche' yel' chaki chelena', na' gonche' le' yel' sin'na' len yel' chajniina' ¹⁰ kwenche gakbe'ile daa nakch wen na' ka' soale do yichj do lall'le na' bibi dol' gaple kat' yiyed Crístona'. ¹¹ Na' Jesucrístona' gaklene' le' gonle lega ben' li ben' shao' kwenche sho' Chioza' balaan na' we'la'o ben' le'.

¹² Le' ben' bish' na' le' ben' zan', cheenid' inezile diiki ba gok cha' goklenlan kwenche bdesch dill' wen dill' kob che Jesucrístona', na' bi bizogakin wsej wllongakan. ¹³ La' naa yog'lol soldadka' lle' ni na' nochlā ben' yoblē lle' do ni nezgakile' dia' lillyani daa chonlilalaaa Crístona'. ¹⁴ Na' daa dia' lillyani, zan ben' bish'choka' ba wloolall'gake' chongake' lall'chog choe'gake' xtill' Chioza' na' bi chllebgake'.

¹⁵ Dii li balgake' choe'gake' xtill' Crístona' daa chakxe'zgakile' nad' na' daa cheenzgakile' gonchgake' ka nad'. Per zoakz ben' chone'n do yichj do lallee. ¹⁶ Ben'kin chongake'n daa chakgakile' nad' na' daa nezgakile' Chioza' ba nzoe' nad' kwenche wi'a dill' wen dill' kob che Jesucrístona'. ¹⁷ Na' ben'ka' zi shkwen choe'gake' xtill' Crístona' daa cheenzgakile' gonchgake' ka nad', na' aga chongake'n do lall'gake'. Na' chakzgakile' daa chongake' ka' gakyeshid' daa nej' lillyani. ¹⁸ Per aga bi chon daa cha' shi do lall'gaken' chongake'n wa aga do lall'gaken'; kon daa choe'lgake' xtill' Crístona', daalan chibaid'.

Na' zizikli yibachid' ¹⁹ daa nezid' wichej' wen lao yog' diiki chak cha' daa chñable cha' lao Chioza' na' daa chaklen Espíritu che Jesucrístona' nad'. ²⁰ Na' toshiizi non' lez Chioza' gaklene' nad' kwenche bi sia' yel' zto', san naa na' toshiizi gon' kwenche sho' Crístona' balaan, laa ibanch' wa laa guet'. ²¹ La' shi ibanch', gonchzk' daa cheeni Crístona'; na' shi guet', de to banez cha'. ²² Shi dech yel' mban cha', gonchzk' xshin Crístona' kwenche ben' zanch gombia'gake'ne'. Na' bi nezid' non nakch wen. ²³ Chonan lallj inia' non nakch wen: to cheenid' guet' kwenche

lljazoalen' Crístona', na' naktechlan wen. ²⁴Per chonchan byen ibanch' ni çhele. ²⁵Chakid' nakchan wen ibanch' kwençhe gакlench' le' gакchachle gonlilall'le Crístona' na' yiba yizакchile daa nonlilall'lene'. ²⁶Na' kat' ile'ile nad' ladjlena' sto shii, le yiba yizакile we'la'ole Cristo Jesúza'.

²⁷Naktez gак, li se wneyi wsa'to çhele wen lega ben' çhajle' che dill' wen dill' kob che Crístona' kwençhe laa yidwia' le' wa laa yenzid' xtill'le, inezid' ni zoaçheçhle nxenilall'le Crístona' na' nakle toz chonle ga zeelo çhakle kwençhe shajle' ben' dill' wen dill' kob che'na', ²⁸na' bi gall illebzle ben'ka' çakzi' çakzbani le'. Na' daa gonle ka', wli'n kwiayi'çhokzgaken', na' le' yilale, la' Chioza' bi wi'e latj kwiayi'le. ²⁹La' Chioza' goklene' le' kwençhe benlilall'le Crístona', na' lekzka' çhaklene' le' lo yel' zak'zi'ka' çen çhe'ile daa nonlilall'lene'. ³⁰Ba çhsak'zi'gake' le' ka ble'ile bsak'zi'gake' nad' daa chyixji'a xtill' Crístona', na' nezkzile ka'kzə ni çhak çha'.

2

¹Daa nakle Crístona' toz, yel' goklen che'na' çhtipan lall'le, na' yel' çhaki che'na' çhonan ka soale mbalaz, na' Espíritu che'na' zoalenkze' le', na' lall'do'lena' nakan lall'do' yesh'. ²Daan, li gак toz, li gакi ljwell-le ganga, na' toz ka dii sele wneyi, na' toz ka dii selall'le, kwençhe yiba yizакchid' ni çhele. ³Bibi sele wneyi che tozle wa kwençhe gon kwinle ben' choo ben' xen, san li gonan kon yel' gaxjlall', li goni ben' ka ben' zak'chi ka le'. ⁴Ni tole bi çhiyal' çhiljzle dii nak to banez çhezle, san lekzka' li gon ka si' ben' yoblə banez.

⁵Li se wneyi gonle ka ben Crístona'.

⁶La'kzi nake' Chios, bzani'le' yel' wñabia' che'na' na' balaan che'na' daa naplene' Xe' Chioza', ⁷na' bzoe' ka'lə daa naki che', na' ben kwine' ka to ben' bi zakii, na' golje' goke' to ben' de beli çen.

⁸Na' ka ba nake' ben' yell-lío, blej yichje' bene' kon ka wna Chioza' axt bi'e latj betgake'ne' lee yag cruza'.

⁹Daan, Chioza' wlo'ene' to balaan xen inleeb daa liizelozi zak'chi, na' bzoe'ne' nake' xan yog'lołte dii de,

¹⁰kwençhe yog' ben' lle' yabana', na' lo yell-lioni, na' xan yell-lioni kat' yengakile' le Jesúza' wçhek' xibe'ka' lawe'na'.

¹¹Na' yog'loł ben' we'gake' dill' nan Jesucrístona' nake' Xancho na' daa gongake' ka' sho' Xacho Chioza' balaan.

¹²Daan, le' ben' bish'dawaa na' le' ben' zandawaa, kon ka ba benkzle toshiizi bzoale dill' kana' wzoalen' le', li we'l-lall'ch gакchle ben' wizoa dill' naa bich zoa' ladjlena'. Li gall illeb Chioza', beena' bisla le', na' li gon ka dii le gonle daa cheenile'. ¹³La' Chioza'kzan chone' kwençhe çhalj loo yichjlall'do'lena' gonle dii wenna' daa çhaklallee gonle, na' lekzka' çhaklene' le' kwençhe çhonlen.

¹⁴Na' yog'loł daa gonle, li gonan do yichj do lall'le, na' bi gакlleshile ni bi gакguedzle, ¹⁵kwençhe ben' malka' lle' yell-lioni, ben'ka' nxinj yichjlall'do'eka', gакbe'gакile' bibi dii mal çhonle, na' kono bi gак ina çhele. Na' gaktole ben' bibi dol' çheyin de, lega ben' nak dowalj xiinj Chios. Na' gакle to beeni' lawe'ka', ka beljdo'ka' çhey cheeni', ¹⁶daa çzoaçheçhle çhenagle che cho'a xtill' Chioza' daa nsa' yel' mban. Na' shi ka' gonle, kat'ka' yila' Crístona' de dii gonan ka yibaid' daa bi bendadz'

xshin Chioza' ladjlena'. ¹⁷ Daa chzani kwinle sak'zi'le kwenche gonle daa cheeni Chioza' naa nonlilall'le Crístona', zaklebin daa chzani ben' choe' Chioza' kwenche choe'laweene'. Na' daa chzanid' kwin' witgake' nad' daa chon' xshin Crístona', zaklebin ka daa chlalgake' lao daa chzani ben' choe' Chioza'. Na' la'kzi axt witgake' nad', chiba chizakid' na' cheenid' yiba yizaklenile nad'. ¹⁸ Li yiba yizakleni nad', na' li soa mbalaz ka zoa'.

¹⁹ Non' lez Xancho Jesúza' wi'e latj yobzə wselaa Timotewa' gana' zoale, kwenche yibaid' ka yiyede' ine' chak wen chele. ²⁰ Kochno zoa sto cha' ka le', la' tochga len' zelene' nad' wneyi do yichj do lallee gak wen chele. ²¹ La' ben'ki sto zoalen nad', che kwinzgake' zegake' wneyi na' bi zegake' wneyi daa cheeni Jesucristona'. ²² Per ba nezkiye ka wen nsa' che Timotewa' na' ka ba goklene' nad' ba be'nto' dill' wen dill' kob che Crístona'. Ba goklene' nad' ka ben' chaklen xayin. ²³ Daan, kat' ba nezid' nakan gak cha', lii wsel'tia'ne' gana' zoale. ²⁴ Na' nxenlallaa Xanchona' lekzka' yob yidwia' le' kwinkz'.

²⁵ Na' naa chakid' chonan byen yiselaa ben' bish'cho Epafrodítoni, beeni nonlene' nad' txen chdil-lennto' dii mala' daa chonnto' xshin Chioza', beeni bsel'le kwenche gaklene' nad' lao dii chyallj chchinid'. ²⁶ Cheenchgaile' ile'ile' le', na' le chakyeshile' daa wnezile we'ile'. ²⁷ Na' dii licha zi lat'zə ki wite', per Chioza' biyesh'lallile'ne' biyakile'. Na' aga tozen' biyesh'lallile', san lenan' kwenche bi gakyesh'chid'. ²⁸ Daan chiselaane' laolena' dopiyenzə kwenche yibaile' daa yile'ilene' sto shii, na' nad' bich gakyesh'tekid' chele. ²⁹ Li yilebgache' kon yel' chiba chizaki daa nake' cho' txen nonlilall'cho Xanchona'. Na' li gap balaan yog'lol' ben'ka' chon ka chone'. ³⁰ La' zi lat'zə ki wite' daa chone' xshin Crístona'. Bzoe' dii nxoll yel' mban che'na' goktgui bidyaklene' nad' bidylene' diika' bi gok gonle.

3

¹ Na' naa, le' ben' bish'dawaa na' le' ben' zandawaa, li yiba yizaki daa ba nonlilall'le Xanchona'. Nad' bi chak zedid' wzej' le' dii yoblə diika' ba wniakz' le' daa nezid' waklenan le'. ² Li wsak' bi wzenagle che ben' malaka', ben'ka' nazə chonan byen wchogtekzə kwerp chechona' sho'cho sen daa le circuncisión. ³ La' cho'yen'lan nakcho dowalj ben'ka' yoo sen, cho' choe'la'ocho Chioza' daa yoo Espíritu che'na' loo yichjlall'do'chona' na' chiba chizakicho daa nakcho Cristo Jesúza' txen. Na' bi noncho lez daa goni kwerp chechoni gaklenan gakocho ben' wen lao Chioza'. ⁴ Nia' ka' la'kzi de dii zan dii gak wxenilallaa che kwin' daa gonan ka ile'shii Chioza' nad'. Shi no chakzi de dii gak wxenilallee che kwine' daa gonan ka ile'shii Chioza'ne', ¿alechlin nad'? ⁵ Ka gokid' xon' lla, wloogake' kwerp cha'ni sen daa le circuncisión. Nak' ben' Israel, na' golj' lo dia che dii Benjamínna', na' nak' dowalj ben' hebreo ka xaxna'ka', na' bsedyenaa ley chento'na' na' bzenag' cheyin, na' benlen' fariseoka' txen. ⁶ Daa le wzechga' wneyi ley che Chioza', axt gokid' chon' ka cheeni Chioza' daa bchi' bsakaa ben'ka' chonlilall'gake' Jesúza'. Na' ben' kon ka na leya', na' aga no gok ina bi ben' ka nan. ⁷ Kana'n gokid' le zak'chgayi yog' diika', per naa, daa ba nonlilallaa Crístona', chakbe'id' bibi zak'gakan. ⁸ Na' dii li nezid' bibi de dii zak'chi ka daa ba nombia' Cristo Jesúza', beena' nak Xan'. Na' daa le chakidee, bich nxenilallaa yog' diika' gokid' le zak'chga, san ba nongaka'n ka beb kwenche gombia'ch' Crístona' ⁹ na' gakee txen. Aga daa chon' daa na leyan' nak' ben' li ben' shao' lao Chioza', san daa nonlilallaa Crístonan', la' ben'ka' chonlilall'gake' Crístona', Chioza' chiyone' legake' ben'

li ben' shao'. ¹⁰ Cheenid' gombia' Crístona' na' yel' wak che'na' ka daa bli'e kana' bibane' ladj ben' wetka', na' cheenid' izanid' kwín' gak cha' ka gok che' daa wdie' yel' zak'zi'ka' na' wite'. ¹¹ Na' ka', non' lez idolaa yisban Chioza' nad' ladj ben' wetka'.

¹² Bi nia' ba nombi'ane' kwasol' wa ba chon' kwasol' ka chazlallee. Per ni chon' ka dii le kwenche gak gona'n, la' ni che lennan' gox wñab Cristo Jesús'a' nad'. ¹³ Le' ben' bish' na' le' ben' zan', bi nia' ba chon' kwasol' ka chazlallee. Per de to dii chon', bich zia' wñeyi che diika' ba wde, san chon' to dii byen kwenche idolid' dii wenna' zi' za'. ¹⁴ Ni chon' ka dii le kwenche yillin' gana' ikaa daa gon Chioza' nad'. La' ni cheyinnan' gox wñabe' nad' kwenche nak' Crístona' txen.

¹⁵ Na' kan' chiya' secho wñeyi yog'lolcho, cho' ba nakchacho chonlilall'chone'. Na' shi bi zelen wñeyi Chioza'kzə wzajniile'n le'. ¹⁶ Na' daa lliarote chiya' soatezi soacho goncho kon ka ba bzajni Chioza' cho'.

¹⁷ Le' ben' bish' na' le' ben' zan', li wsa'to chele ka nsa' cha', na' ka nsa' che ben'ka' chon kon ka ba bliinto' le' gonle. ¹⁸ Zan shii ba wnia' le', na' naa ax̄t chakyeshid' nia' le' dga sto shii, zan ben' chongake' ka bibi zakii daa wit Crístona' lee yag cruza' daa bi nsa' chegake' wen. ¹⁹ Wllin lla kwiayi' ben'ki daa choe'la'ogake' toz daa chñab beli chen che'ka', na' chep cha'lall'lgake' cheyi daa chongake' lwaayi dii nan yido'gakile'. Kon lillinzi daa de yell-lioni zegake' wñeyi. ²⁰ San cho', yabanan' nak lallcho. Na' nan' ziza' Xancho Jesucrístona', beena' chbezcho yisle' cho' kwenche bi kwiayi'cho. ²¹ Len' yishee kwerp chechoki, diiki gooll' iteb, kwenche yiyakan ka kwerp che'na' daa le zakii. Na' gone'n kon yel' wak che'na' daa chñabia'lene' lao yog'lolte dii de.

4

¹ Le' ben' bish'dawaa na' le' ben' zandawaa, le chakid' le', na' chze-lall'chgaid' ile'id' le', na' chiba chizakid' daa nonlilall'le Crístona', na' ni chele le' de to dii yizi'a banez. Li soachech gonlilall'le Xanchona'.

² Chat'yoid' Evódiana' len Síntiquena' yizoagake' wen daa nakgake' Xanchona' txen. ³ Na' li' nako' nad' txen do yichj do lalloo choncho xshin Chioza', chat'yoid' li', gaklengacho' ben' zanchoki. La' le ba bllaglogaken' goklengake' nad' be'nto' dill' wen dill' kob che Jesucrístona', len Cleméntena' na' ben'ka' sto benlench nad' xshin Chioza'. Ba da' lie'ka' lee libr che Chioza' gana' da' le ben'ka' napgake' yel' mban zejli kañi.

⁴ Li yiba yizaki toshiizi daa nakle Xancho Crístona' txen. Na' sto shii nia' le': ñi yiba yizaki! ⁵ Li wsa' chele xochi kwenche yog' ben' gakbe'gakile' nakle ben' wen. Ba zoa gao yiyed Xanchona'.

⁶ Bi kwekzə yichjle bittez dii chak chele, san li we'llwill Chioza' na' li gonan lall' nee, na' li wi'e yel' choxken. ⁷ Na' gone' ka soale mbalaz ax̄t kono shajniikzi biçhe zoale ka'. Na' yel' zoa mbalaza' wsol wñitan dii zeda' de loo yichjlall'do'leka' daa nakle Cristo Jesús'a' txen.

⁸ Na' le' ben' bish' na' le' ben' zan', daa zeelote naa, li se wñeyi cheyi daa nak dii li, che yog'lolte dii chidol' gapcho balaan, che yog'lol daa nak dii li dii shao', che yog'lol dii bibi dii mal nsa'n, che yog' dii wenka' chon ka yibaicho, na' che yog'lol dii zeyi cheyin nakan wen. Li se wñeyi che yog'lol diiki nak wen, diiki chidol' we'cho xtiliin.

⁹ Li gon daa ba bli' bsedid' le' na' daa benile wnia', na' daa ble'ile chon'. Lennan' li gon, na' Chios, beena' chon ka soacho mbalaz, soalene' le'.

¹⁰ Chiba chizakchgaid' lao Xancho Jesucristona' daa bachga chizele wneyi cha' dii yoblə. Bi nia' ba goł-lall'le nad', san bi got' xlatjinnan' gaklentole nad'. ¹¹ Aga daa chyallj chchinida'n nia' ka', la' ba nzedid' gon' banez ka'k' dii de cha'. ¹² Ba nezid' bi daa ne' soe' lo yel' yesh', na' lekzka' ba nezid' bi daa ne' soe' lo yel' wnia'. Ba nzedid' gon' banez bittez dii chak cha', shi nelj nlla'id' wa shi chbił chdon', shi dechga daa chyallj chchinid' wa shi shlas bibi dekzə. ¹³ Chzoid' yog'lołte dii chtil' daa chaklen Crístona' nad'. ¹⁴ Per le wen benle daa goklenle nad' lo dii lalljki chtil'.

¹⁵ Na' nezkzile kana' bizaa Macedóniana' na' wzoloa' cho'a dill' wen dill' kob che Crístona', totgui le' lle'le Filipinoza' benle daa byalljid' kwenche ji'a cho'a xtill' Chioza'. La' ni to ben'ka' ba nonłilall' Crístona' yellka' sto bi goklengake' nad'. ¹⁶ Na' kana' wzoa' yell Tesalóncana', zan shii bsel'le dii byalljid'. ¹⁷ Aga inacho chyilj' bi gonle nad', san cheenlid' gat'ch yel' shao' chele yabana'. ¹⁸ Epafrodítone ba bene' nad' daa bsel'lenlene', na' naa ba nap' yog'te daa chyalljid' axt ba chichoonlan. Na' chibayi Chioza' daa bsel'len, ka chibaile' diika' chzani ben' choe'gake'ne', diika' chla'ile' zix sia kat' chzeygake'n lawe'na'. ¹⁹ Chios cha'na', beena' nap' yog'lołte dii wen dii shao'ka', gone' le' yog'loł daa chyalljile daa nakle Cristo Jesúza' txen. ²⁰ Toshiizi chiyał' koocho Xacho Chioza' balaan. Kan' nakan.

²¹ Li wwapsha chiox yog'loł ben'ka' nak lall' na' Chioza' daa nongake' Cristo Jesúza' txen. Na' lekzka' ben' bish'choki zoalen nad' ni, chwapgake' le' chiox. ²² Na' yog'lołte ben'ka' nak lall' na' Chioza' ni chwapgake' le' chiox, na' ben'ka' chon xshin ben' wñabia' Césara', leyen'gake' chwapgake' le' chiox.

²³ Xancho Jesucristona' soalenshgue' le' na' gaklene' yog'lołtele. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Colósaza'

¹ Nad' Pablo nak' postl che Jesucrístona' kon ka goklall' Chioza'. Na' len ben' bish'cho Timotewi ² chwapnto' le' chiox, ka le nakle lall' na' Chioza', le' zoale yell Colósaza', na' nakle bish' ljwellnto' daa nonlilall' le Crístona' do yichj do lall'le. Xacho Chioza' len Xancho Jesucristona' gaklenshgagake' le' na' wzoagake' le' mbalaz.

³ Toshiizi ka chñabnto' chele, choe'nto' Chioza' yel' choxken, beena' nak Xa Xancho Jesucrístona'. ⁴ La' ba beninto' dill' ba nonlilall' le Cristo Jesús'a' na' ba chakile yog'lol ben'ka' nak lall' na' Chioza'. ⁵ Ba nsa' chele ka' daa nonle lez lljazoale yabana' gana' zoa Chioza'. Na' wzolo benlen lez ka wzolo bzenagle dill' wen dill' kob che Crístona' daa nak dill' li che Chioza'. ⁶ Na' dill' wen dill' kobi daa ba bzenagle ba bliljan doxen yell-lioni na' ba chon xshinin loo yichjlall'do' ben', kon ka benan loo yichjlall'do'lena' ka benilen na' wyajniile nan dii li Chioza' chakile' cho'. ⁷ Dgan blii Epáfraz'a' le', beena' chonlene' neto' xshin Crístona' na' le chakinto'ne', na' zoatezi zoe' chone' xshin Crístona' ladjlena'. ⁸ Na' Epáfraz'a' wne' neto' ka ba chaki ljwell-le daa zoa Espíritu che Chioza' loo yichjlall'do'leka'.

⁹ Na' daan, ka wñezinto' ka ba chonle, toshiizi chñabnto' Chioza' gakenche' le'. Na' chñabnto'ne' gone' le' do ka nak yel' sin' che'na' na' yel' chajni che'na' kwenche shajniile kwaslol daa chaklallee gonle, ¹⁰ na' gak wsa' chele lega ben' nonlilall' Xanchona', na' toshiizi gonle daa chazlallee, na' gak gonle yog'lolte daa nak wen, na' zejch gombia'chle Chioza', ¹¹ na' gakchachle kon yel' wak che'na' daa zeelo nak yel' wak choo yel' wak xen kwenche ka' gaple yel' chxenlall' na' so sakile lao bitteza dii chak chele, na' yibaile ¹² we'tezi we'le Xacho Chioza' yel' choxken. La' len' bene' kwenche lljazoalenle yog' ben'ka' nak lall' nee yabana' gana' chñabi'e, gana' de beeni' che'na'. ¹³ Chioza' bibeje' cho' lo yel chola' gana' chñabia' dii xiwaa na' ba bizoe' cho' lo na' Xiine'na', beena' le chakile', kwenche inabi'e cho'. ¹⁴ La' len' bisle' cho' lao yel' zak'zi'na' chidol'cho daa blalj xchene'na' wite' ni checho kwenche biyakxen saaxya chechoka'.

¹⁵ Crístona' bli'e ka nak Xe Chioza', beena' kono chle'i, na' Crístona' ba chñabia'kze' kana' zi' xe silte yog'lol dii de. ¹⁶ La' len' bxe bsile' yog'lolte dii de: diika' de yabana' na' diika' de yell-lioni. Bene' dii chle'icho na' bentie' dii bi chle'icho, ka no anjlka' na' len anjlka' biyak dii xiw' diika' chñabia' lo yell-lioni. Bene' yog'lolte dii de, na' bene'n kwenche sho'e balaan. ¹⁷ Ba zoakz Crístona' kana' zi' xe sil yog'lolte dii de, na' le' chone' ka chongakan daa blilie' bia' gongakan. ¹⁸ Na' len' chñabi'e cho' nakcho lall' nee, daa nakchone' txen. Len' bxie' yel' mban daa nak zejli kani daa nake' ben' nech ben' biban toshiizi ladj ben' wet'ka'. Daan, nake' liizelozi ben' choo ben' xen na' chñabi'e lao yog'lolte dii de. ¹⁹ La' Chioza' wyazlallee gap Crístona' doxen yel' wñabia', yel' wak na' yog' ka diika' nape', ²⁰ na' bene' ka yog'lolte dii bxe bsile' yabana' len yell-lioni bizoalengakan le' wen daa wit Crístona', blalj xchene'na' lee yag cruza'.

²¹ Na' le', kanan nlaala'ole Chioza' ni che dii malka' chonle na' gokzi' gokzbanilene'. ²² San naa, ba bene' kwenche bizoalenlene' wen daa bselee Crístona' wite' lee yag cruza' kwenche gake ben' nxi nyech, ben'

bibi nda' nchen na' beṇ' bibi xtoḷiin de lawe'na'. ²³ Per chonan byen toshiizi soachechle gonḷilall'le Crístona', beena' ba wyajle'le che', na' bi gakchoplall'le cheyi daa benle lez gaki chele ka bzenagle dill' wen dill' kob che'na'. Na' dga ba benile, ba choe'gake'n dill' doxen yell-lioni, na' nad' Pablo, chaklen' cho'an dill'.

²⁴ Na' naa chiba chizakid' daa chllagloa' yog' yeḷ' zak'zi'ki ni chele. La' daa chak cha' ki, chen chle'id' ka yeḷ' zak'zi'ka' ben ble'i Crístona' ni checho, cho' ba nonḷilall'chone' na' zaklebicho ka kwerp che'na'. ²⁵ Chioza' bzoe' nad' gak lo na' gaklen' le' ba chonḷilall'lene' na' wliid' le' kwasḷol cho'a xtilleena'. ²⁶ Kani'teyi kono wnezi daa wlo'e xnezin gone', per naa ba bliile'n ben'ka' nak lall' nee. ²⁷ Chioza' chaklallee inezi ben'ka' nak lall' nee dga kono wnezi kana', na' nakan to dii zakii nḷleb nan Crístona' zoalene' le' bi nakle ben' Israel, le' chonḷilall'lene', na' nonle lez lljazoalenle Chioza' gana' de balaan xen che'na'.

²⁸ Neto' chyixje'into' beṇ' xtilḷ' Crístona', na' chat'yointo' yog' beṇ' wzenaggake'n. Na' chḷinnto' do ka nak yeḷ' sin'na' daa ba ngwee neto' ka chli' chsedinto' legake' kwenche yog' beṇ'ka' gak Crístona' txen yiyakgake' kwasḷol ka cheeni Chioza'. ²⁹ Daan, choe'l-lallaa chyixji'a cho'a xtilleena' kon ga zeelo chizoid', na' Crístona' chaklene' nad' kon yeḷ' wak che'na'.

2

¹ Cheenid' inezile' dii xen dii chen chle'id' ni chele na' ni che beṇ' bish'choka' le' Laodiceana', na' ni che yog'ḷol beṇ' bish'choka' biṇ' gombia' nad', ² kwenche yog'le wtip' lall'le na' gake toz gaki ljwell-le, na' shajniile kwasḷol daa wloo Chioza' xnezin daa kono wnezi kani'yi. Na' lannan' daa bidyen Crístona', ³ beena' blii cho' doxen ka nak yeḷ' sin' na' yeḷ' chajni che Chioza', diika' nak dii zakii nḷleb. ⁴ Nia' le' ka' kwenche kono siye' le' we'lenze' le' dill' xochi na' gakile nakan dill' li. ⁵ La'kzi bi zoalen' le', chi' yichjzk' le' na' chiba chizakid' daa nezi' nsa' chele wen na' zoachechle chonḷilall'le Crístona'.

⁶ Na' daa ba nonle Jesucrístona' Xanle, chiyaḷ' wsa' chele lega beṇ' ba nake'ne' txen. ⁷ Ka zoachech to yag dii ba nde loinna' zitj, ka'kzan le', li soachech gonḷilall'le Crístona', kon ka ba bli' bsedinto' le', na' toshiizi li we' Chioza' yeḷ' choxken.

⁸ Li wsak', bi we'zle latj no siye' le' kon yeḷ' sin' daa chaljlall' beṇ' yell-lioni daa bibi zakii. La' aga xtilḷ' Crístonan' chli' chsedgakile' san che diika' chnabia' lo yell-lionin.

⁹ Crístona', beena' golje' goke' beṇ' de beli chen, nape' doxen yeḷ' wṇabia', yeḷ' wak na' yog' ka diika' nap Chioza'. ¹⁰ Na' le', daa nakle Crístona' txen, yeḷ' wak che'na' ba chonan llin lo yeḷ' mban chelena', la' Crístona' napche' yeḷ' wṇabia' na' yeḷ' wak aga ka yog' anjlka' wa dii xiw'ka' chnabia'. ¹¹ Na' lekzka' daa naklene' txen wak inacho yoo to seṇ loo yichjlall'do'lena' daa chli'n nakle lall' na' Chioza', per bi nakan ka seṇna' daa chgoo beṇ' kwerp che'ka' daa le circuncisión, san seṇna' chgoo Crístona' nakan daa chikobe' yichjlall'do'chona' kwenche dii mala' daa chzelalii beli chenna' bich inabia'n cho'. ¹² Ka wchoale nisa' wak inacho witlenle Crístona', na' bgash'lenlene' ka bgashee, na' lekzka' bibanle ka bibane' ladj beṇ' wetka' daa wyajle'le Chioza' bisbane' Crístona' kon yeḷ' wak che'na'. ¹³ Na' le', gokle ka beṇ' net lao Chioza' ni che saaxya cheleka' daa biṇ' choonlall'le daa cheeni beli chen chelena'. San naa, Chioza'

ba bene' to yel' mban kob chele daa nakle Crístoná' txen, na' bizi'xene' yog' saaxya cheleka'. ¹⁴ Chioza' bikwase' daa wdao xya checho, na' bsol bnite'n kana' wda' Jesucrístoná' lee yag cruza'. ¹⁵ Na' bikwase' yel' wak che dii xiw'ka', diika' chñabia' beñ' yell-lioki, kana' wit Crístoná' lee yag cruza'. Na' daa bli'e bene' legakan gan, bsi'e legakan yel' zto' lao lkwe' ben'.

¹⁶ Daan, bi wzenagle che beñ'ka' nagake' bi gak yeej gaole bittez yel' wao, wa nagake' chonan byen gonle lnika', na' koole balaan llana' chize beo' cheena', na' gombaanle lla sabdka'. ¹⁷ Yog'lol diiki nakan daa wzajniin cho' lat' che daa zi' gon Chioza' na' benan llin kana' zi' wselee Crístoná', na' naa daa bide' bich chongakan llin. ¹⁸ Bi we'le latj no siye' le' kwenche bi wnitle daa ba nonle lez ikaale. Bi wzenagle che beñ'ka' chonzə ka le chzexj yichjin lao Chioza', na' choe'la'ogake' anjlka', na' nazgake' chle'dogakile' na' chep cha'lall'lengake' daa chyiljlall'zgake'. ¹⁹ Beñ'ka' chon ka' bi nakgake' Crístoná' txen, beena' zaklebi yichjchona' daa chñabi'e cho' nonlilall'chone'. Na' cho' nakchone' txen, chakchacho ka cheeni Chioza', ka chak che tkwen wej kwerp chechoni ndil nllagan bechj bnia'ka' nox' ljwellin kwenche ka' chgolgakan txen.

²⁰ Daa ba nakcho Crístoná' txen daa wite' lee yag cruza', wak inacho ba netcho lao diika' chyiljlall' beñ' yell-lioni na' bich chiyal' inabia'n cho'. Na' gberache ni chonzle txen diika' chyiljlall' beñ' yell-lioni, ²¹ kachaka' daa nagake': "Bi wchino' dga, bi gawo' dga, na' bi goxoo dga"? ²² Yog'lol diiki chwal' beñ' yell-lioni nakchozgakan dii chibill chido na' dii chde cheyin ka zej chchinchogakan. ²³ Dii li, diika' nagake' chontekzgakana ka dii le zakii, la' kat' chongake'n chontekzgakana ka beñ' le chapshii daa nak che Chios, na' ka beñ' le chzexj yichjin lao Chioza', na' ka beñ' le chdezi' beli chen cheyin, per yog' diika' chongake' bi gak yikwasgakan daa chibayi beli chenna'.

3

¹ Daa ba nakle txen Crístoná' na' nakle ka beñ' bibanlene' txen ka bibane' ladj beñ' wetka', chiyal' kwe' yichjle cheyi daa nak che yabana', gana' lliá Crístoná' shlaa de shli che Chioza'. ² Li se wneyi daa nak che yabana', na' bich kooz yichjle daa nak che yell-lioni. ³ La' ba nakle ka beñ' ba wit daa nakle Crístoná' txen, na' yel' mban chelena' ba nakan toz kon Crístoná' lao Chioza'. ⁴ Na' ka yiyed Crístoná', beena' none' le' yel' mban daa nak zejli kani, lekzka' sho'lenlene' balaan xen daa chidolee.

⁵ Daan, chiyal' kwey yichjle yog'lol dii mala' daa chiba chizaki beli chen chelena': bi inelenzle xiin xool beñ' wa xiin xyo beñ', bi gonle bichlə dii zban, bich we'le cho'a xbayi beli chen chelena', bich sa'lall'zle gonle dii mala', ni bi selall'le bi gat' kwe' chele. La' beena' chzelall' gat' kwe'ile' dii xen, toz kan chonlene' beena' choe'la'o daa nak yaj yag. ⁶ Chioza' wsak'zi'e beñ'ka' chon diika' daa bi chzenaggake' che'. ⁷ Na' le', lekzka' benle diika' kana' bin' wzenagle che Chioza'. ⁸ Per naa, chiyal' kwey yichjle yog'lol diiki: yel' chllaa chlok, yel' wen dii mal, yel' chyilj chzan xtill' beñ', na' yel' chbell chne ka nla' ka nte. ⁹ Bich siye' ljwell-le, la' ba wlej yichjle yel' mban gol chelena' na' bich gonle dii malka' benle kana'. ¹⁰ Ba biyakle beñ' kob, na' Chios, beena' bxe bsil le', chone' ka gombia'chlene' na' gakhle dowalj ka cheenile'. ¹¹ Aga bi zakii shi nakcho beñ' Israel wa shi bi nakcho, shi yoocho señ daa le circuncióñ wa shi bi yoochon, shi nakcho beñ' nsed wa beñ' bi nsed, shi nakcho beñ' ndoo

lla yel chone' xshin ben' wa nakcho ben' chon xshinkzin. Daa llihaloten, gakcho Crístona' txen, la' nottezə nakcho lekzen' zoalene' cho'.

¹² Chioza' le chakile' le' na' ba wleje' le' kwenche gakle lall' nee. Na' daan, chiyal' yiyesh'lallile ben' na' gonile legake' wen, na' bi gakle ben' cha'sib, san gakle ben' gaxjlall', na' gaple yel' chxenlall'. ¹³ Chiyal' gonle banez ljwell-le, na' chiyal' si'xen che ljwell-le shi no bi chon chele. Ka ben Crístona' wxi'xene' chele, lekzka' le' chiyal' si'xenle che ben'. ¹⁴ Na' daa llihalote chiyal' gaki ljwell-le, la' shi chaki ljwell-le, lennan' gonan ka gonle yog' diiki. ¹⁵ Li we' latj inabia' yel' mbalaz che Crístona' loo yichjlall'do'lena', la' kwenche soalen ljwell-le mbalazan ba gox wñabe' le' gakle toz. Na' tlizi chiyal' we'lene' yel' choxken.

¹⁶ Li kooshao' do ka nakxtill' Crístona' loo yichjlall'do'lena'. Li wli' wsemi ljwell-le na' li wtip lall' ljwell-le, li wchin do ka nak yel' sin'na' daa ba bene' le'. Li gol' no salmo, no himno, na' bichlə daa na Espiritu che Chioza' gol-le, na' li we' Chioza' yel' choxken ka gol-le. ¹⁷ Na' yog'lol' daa gonle wa daa inale, chiyal' gonlen lega ben' nak Xancho Jesúza' txen na' we'le Xacho Chioza' yel' choxken daa ba nonlilall'le Jesucrístona'.

¹⁸ Le' noolə, li wzenag che ben' chelena', la' kan' chiyal' gonle daa ba nxenilall'le Xanchona'. ¹⁹ Na' le' ben' byo, li gaki xool-lena' na' bi gonile legake' zid' zña. ²⁰ Na' le' bi'do', li wzenag yog'lol' daa na xaxña'leka', la' kan' chazlall' Xanchona'. ²¹ Na' le' chisgol chischoole, bi wsheshlenle xiinleka' kontele, kwenche bi gakyesh'gakib'. ²² Na' le' ndoo lla yel-le chonle xshin ben', li wzoa dill', li gon yog'lol' daa na ben'ka' nak xanle lo yell-lioni. Aga kat'ka' chwiazgake' gonle ka chilali kwenche ile'shi'gakile' le', san do yichj do lall'le li gonan daa ba chall chlleble Xancho Crístona'. ²³ Yog'lol' daa gonle, li gonan do yichj do lall'le na' li gaktezi xshin Xancho Crístonan' chonle na' aga che ben' yell-lion. ²⁴ La' nezkzile Xancho Crístona', beena' nak dowalj Xanle, gone' ka yizi'le banez che dii wenna' chonle. ²⁵ San beena' chon mal, lekze' ikee laxji dii mala' chone', nottezə nake'.

4

¹ Le' nzi'le ben'ka' chon xshinlena', li gongakile' wen. Li lljadini lekzka' le' zoa to Xanle yabana'.

² Li we'l-lall' we'llwill-le Chioza', na' li se kwas we'llwill-lene' na' we'lene' yel' choxken. ³ Na' kat' we'llwill-lene', inabgachile'ne' gaklene' neto' kwenche wsaljche' xneznto' llje'chnto' xtill' Crístona' daa kono wnezi kana', la' ni cheyinnan' dia' lillyani. ⁴ Li inabi Chioza' gaklene' nad' kwenche gak wi'a dill' kwaslol', ka chiyal' wi'an.

⁵ Li wsak' li gon wen ladj ben'ka' bi nombia' Crístona', la' naayen'nan de latj wli'le non nakle txen. ⁶ Dill'ka' choe'le chiyal' gakan sia mbalaz toshiizi, na' lekzka' gak yilliile xochi xtill' ben' kat' no bi inabi le'.

⁷ Ben' bish'cho Tíquiconi, beeni le chakicho, we'lene' le' dill' ka nak yog'lol' diika' chak cha'. Len' do yichj do lallee chonlene' nad' xshin Xancho Crístona'. ⁸ Daan, chselaaane' laolena' kwenche wi'e dill' nakan chak chento' na' wtipe' lall'le. ⁹ Na' lekzka' ben' wllal' chele Onésimoni ziza'lene'ne', beeni le chakinto' na' nake' dowalj bish' ljwellcho. Legake' we'gake' dill' che yog'lol' daa chak cha' ni.

¹⁰ Aristarconi, beeni nak' txen dento' lillyani, chwape' le' chiox; na' lekzka' Márcona', ben' bish' Bernabéna'. Ba wniakz' le' shi yidwia Márcona' le', li gonshaile' wen. ¹¹ Ka'kzə Jesúzi, beeni che'gake' Justo, chwape'

le' chiox. Ladj yog' ben' Israelka' nonlilall' Crístona', ben'kichgan chaklengake' nad' chonnto' xshin Chioza', na' le ba btipgake' lallaa. ¹² Ben' wllall chele, Epáfrazi, lezkza' chwape' le' chiox. Nake' to ben' chon xshin Crístona', na' toshiizi choe'lwille' Chioza' ni chele kwenche gakchale lo xneze'na', na' soachechle we'l-lall'le gonle ka cheeni Chioza'. ¹³ Nezid' ka wneyi nllab zie' chele na' che ben'ka' lle' yell Laodicéana' na' yell Hierápoliza'. ¹⁴ Lúcazi, beeni chon rmech, beeni le chakid', chwape' le' chiox, na' lezkza' Démazi.

¹⁵ Li wwap chiox bish' ljwellchoka' lle' yell Laodicéana', na' lezkza' Nínfana' na' ben'ka' chdop chllag lille'na' choe'la'ogake' Crístona'. ¹⁶ Ka yiyoll wlable yishi bzej', li wselaan lao ben'ka' nonlilall' Crístona' yell Laodicéana' kwenche lezkza' lengake' wlabgake'n, na' legake' gongake' le' yisha' daa bselaa lawe'ka' kwenche wlablen. ¹⁷ Li ye' Arquípona' gone' to dii byen gone' kwaslo daa ba non Chioza' lall' nee gone'.

¹⁸ Nad', Pablo, kwin' chzej'* gani chwap' le' chiox. Li lljadini lillyan dia'. Chioza' gaklenshgue' le'.

* **4:18** Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao ben'ka' nonlilall' Jesucrístona' yell Tesalónicana'

¹ Nad' Pablo na' Silvánoni len Timotewi chwapnto' le' chiox, le' chdop chillagle choe'la'ole Jesucrístona' Tesalónicana', le' nakle lall' na' Xacho Chioza' len Xancho Jesucrístona'. Chnabinto' legake' gonshgagake' ka gak wen chele, na' wzoagake' le' mbalaz.

² Toshiizi choe'nto' Chioza' yel' choxken che yog'loj-le kat' choe'lwillnto'ne'. ³ Toshiizi ka choe'lwillnto' Chioza', beena' nak Xacho, chjadininto' ka choe'l-lall'le chonle dii wenna' daa nonlilall'lene' na' chakile'ne', na' daa zoachechle nonle lez Xancho Jesucrístona'. ⁴ Na' le' ben' bish' na' le' ben' zan', le' nakle ben' chaki Chioza', nezinto' ba wleje' le'. ⁵ La' ka be'lennto' le' dill' wen dill' kob che Jesucrístona', aga de cho'a dill'zan be'lennto'n le', san kon yel' wak che Chioza' na' che Espíritu Sánto che'nan' be'nto' dill' do yichj do lall'nto'. Na' nezkzile ka wen bsa' chento' ladjlena' kwenche goklennto' le'.

⁶ Na' le' bsdle chonle ka neto' na' ka ben Xancho Jesucrístona', la' Espíritu Sántonan' bene' ka bibaile bleble Cho'a xtille Chioza' la'kzi dii zan yel' zak'zi'ka' ben ble'ile. ⁷ Na' daa bizo bizakile yel' zak'zi'ka', bliile ben'ka' nonlilall' Crístona' yellka' mbani Macedóniana' na' Acáyana' ka chiyal' gongake'. ⁸ Na' daa benle ka', Cho'a xtille Chioza' ba wislesan aga to Macedóniana'zə, ni aga to Acáyana'zə, san doxente. Na' lekzka' ba bengakile ka nonlilall'le Crístona', na' bi chonan byen we'nto dill' chele. ⁹ La' kwingake' choe'gake' dill' ka wen benle bleble neto', na' bsanle bich be'la'ole lwaa lsak' diika' bi nak chios kwenche benlilall'le beena' nak dowalj Chios yaa Chios ban, ¹⁰ na' chbezle yiyetj Xiine' Jesúza' yabana', beena' bisbane' ladj ben' wetka'. Na' Jesúza' yisle' cho' lao yel' zak'zi'na' ziza' daa we' Chioza' ben'ka' bi bzenag che'.

2

¹ Le' ben' bish' na' le' ben' zan', nezkzile daa bidwianto' le' bi bid-dadznto'. ² Na' lekzka' nezile le wxak'zi'nto' yell Filípoza' na' biya dii wnagake' neto', per Chioza' goklene' neto' na' bi bblebnto' wdixje'into' le' dill' wen dill' kob che Jesucrístona' la'kzi biya dii btilnto'. ³ Na' ka wdixje'into'n le', do yichj do lall'nto' be'lennto' le' daa nak dill' li, na' kono wxiye'nto'. ⁴ La' Chioza' wleje' neto' na' bzoe' neto' we'nto' dill' wen dill' kob che'na'. Na' aga chonnto'n kwenche chazlall' beñaan, san kwenche chazlall' Chiozan', beena' nombia' yichjlall'do'nto'ni. ⁵ Nezkzile, na' Chioza' nez nle'ile, ni shlin bigan' we'la'o we' dill'nto' le' daa chzelall'nto' bi de chele. ⁶ Bi cheeninto' no koo neto' balaan, ni le' ni ben' yoblə. Daa naknto' postl che Crístona', zak' wnabinto' le' gonle daa chyalj chchininto' shel'ka', per bibi wnanto' le'. ⁷ San kana' wzoalennto' le' bennto' chele ka chon to noolə chap chwie' bi'do' che'ka' xochi. ⁸ Na' daa le chakinto' le', aga to daa be'lenznto' le' dill' wen dill' kob che Crístonan' bibainto', san lekzka' bennto' axt ga zeelo bizointo' goklennto' le'. La' le chakinto' le'. ⁹ Le' ben' bish' na' le' ben' zan', chjadinkzile ka bdezi' kwinto' shlak

wzoalennto' le' kana' be'lennto' le' dill' wen dill' kob che Crístona'. Ka tella ka wal bennto' llinna' kwenche ni tole bi beninto' zed.

¹⁰ Chioza' nez nle'ile', na' lekzka' le' nonlilall'le Crístona', nezile do yichj do lall'nto' wzoanto' ladjlena', na' bennto' daa nak shli na' bsa' chento' wen kwenche kono biz gon ine chento'. ¹¹ Lekzka' nezile beninto' to tole ka choni to ben' xiine'ka' ¹² daa btipnto' lall'le, na' bennto' le' yel' chxenlall', na' ba be'lennto' le' dill' ka chiya' wsa' chele, le' nonlilall'le Chioza', beena' gox le' kwenche inabi'e le' na' lljazoalenlene' gana' ile'ile ka nak balaan xen che'na'.

¹³ Na' lekzka' toshiizi choe'nto' Chioza' yel' choxken daa bleble cho'a xtilleena' be'lennto' le', la' gokbe'ile' nakan cho'a xtil' Chioza' na' aga cho'a xtil' ben' yell-lionizan. Na' dii li nakan cho'a xtil' Chioza' daa chisha'n yichjlall'do'chona', cho' chonlilall'chone'. ¹⁴ Na' le' ben' bish' na' le' ben' zan', kana' bsak'zi' ben' wllal' cheleka' le', gok chele ka gok che ben' Judeaka', ben'ka' chdop chllag choe'la'ogake' Crístona', la' ben' wllal' che'ka', ben' Israelka', bsak'zi'gake' legake' daa nonlilall'gake' Crístona'. ¹⁵ Lekzgaken' betgake' Xancho Jesúza' na' betgake' dii ben'ka' wdixjee daa goll Chioza' legake' kani'yi, na' lekzka' blaggake' neto'. Bi chongake' ka chazlall' Chioza' na' chle'zbangakile' yog'lol' ben', ¹⁶ la' chsej chllongake' chixje'into' ben'ka' bi nak ben' Israel cho'a xtil' Chioza' kwenche yilagake' na' bi kwiaiy'gake'. Na' daa chongake' ka', chzanchgake' saaxya che'ka', na' daan, ba nakten ile'gakile' yel' zak'zi' wala' we' Chioza'.

¹⁷ Le' ben' bish' na' le' ben' zan', kana' bi wzoalennto' le' shloll, la'kzi bi ble'into' le', toshiizi jadininto' le' na' le' goklall'nto' yidwianto' le'. ¹⁸ Dii li goklall'nto' yidwianto' le', na' nad'yen' zan' shii goklallaa yidwia' le', per Satanáza' bsej blonan yid'. ¹⁹ Daa chonlilall'le Xancho Jesúza' na' zoale chonle wen daa be'lento' le' xtilleena', nonnto' lez gonle ka yibainto' lawe'na' kat' yiyede'. ²⁰ Dii li, chibainto' ka chonle na' zoanto' mbalaz ni chele.

3

¹ Na' ka bich bi rson chele de, bi wzoanto' wen na' be'nto' dill' yigaannto' to neto'za Aténaza' ² na' bsel'nto' ben' bish'cho Timotewa', beena' chonlene' neto' xshin Chioza' daa chyixje'nto' dill' wen dill' kob che Crístona'. Bsel'nto'ne' kwenche yidtype' lall'le na' gone' ka soachechle gonlilall'le Crístona', ³ kwenche ni tole bi gakklejile ni che yel' zak'zi'ka' chen chle'ile. La' nezkzile kan' llia bia' gak checho. ⁴ Na' kana' ni zoalennto' le', bsi'ninto' le' nan wle'icho yel' zak'zi'ka', na' nezile ba gok ka wnanto' le'. ⁵ Na' daa le' gokshejlallaa ni chele, bselaa Timotewa' kwenche inezid' shi ni nonlilall'kzle Jesucrístona', la' gokid' dii xiwaa gonan ka gonchoplall'le na' gakdadz xshin Chioza' daa bennto' ladjlena'.

⁶ Per naa ba bila' Timotewi gani zoanto' na' cho'e dill' ni nonlilall'kzle Jesucrístona' na' chaki ljwell-le. Lekzka' cho'e dill' toshiizi chjadinile neto' daa le' chakile neto', na' le' cheenile ile'ile neto'. Na' ka'kz neto', le' cheeninto' ile'into' le'. ⁷ Daan, le' ben' bish' na' le' ben' zan', la'kzi chiya dii chen chle'into', axt bixenlall'nto' ka wnezinto' ni zoachechle nonlilall'le Crístona'. ⁸ Daa ba nezinto' ni zoachechle chonlilall'le Xanchona', axt biyakshao'lall'nto'. ⁹ Na' bichkz bi dill' chillelinto' kwenche we'nto' Chioza' yel' choxken che yel' xabana' daa napnto' ni chele. ¹⁰ Ka tella ka wal chnabinto' Chioza' wi'e latj yidwianto' le' dii yoblə kwenche yiyoll yido wzajniinto' le' daa ni chyalljile shajniile kwenche gonlilall'chlene'.

¹¹ Na' chñabid' Xacho Chioza' na' Xancho Jesúza' gaklengake' neto' kwenche bibi wsej wllonan yidwianto' le'. ¹² Na' Xanchona' gonshgue' ka zizikli gakchi ljwell-le na' gakile yog'loł ben', ka chakinto' le'. ¹³ Na' gonshgue' ka gakchach yichjlall'do'lena' kwenche gake ben' nxi nyech na' bibi xtol'le gat' lao Chioza', beena' nak Xacho, kat'ka' Xancho Jesucristona' ziza'lene' ben'ka' nak lall' nee.

4

¹ Le' ben' bish' na' le' ben' zan', kon yel' wñabia' che Xancho Jesucristona', chat'yointo' le' soatezi soale gonchle ka chazlall' Chioza', kon ka bsedinto' le' gonle na' kon ka ba chonkzle.

² Ba ñezkzile diika' wnanto' le' gonle, na' nakgakan diika' bllia Xancho Jesúza' bia' goncho. ³ Chioza' cheenile' soale gonle daa chazlallee. Na' bi inelenzle xiin xool ben', ⁴ san to tole chiyał' gaple balaan xool-lena' lega ben' nak lall' na' Chioza', ⁵ na' bi' we'zle cho'a xbayi beli chen chelena', ka chon ben'ka' bin' gombia'gake' Chioza'. ⁶ Na' ni tole bi gonle'ile xool ljwell-le la' ba bsi'nkzinto' le' Xanchona' wsak'zi'e yog' ben'ka' chon ka'. ⁷ Chioza' aga gox wñabe' cho' kwenche goncho dii zbanki, san gox wñabe' cho' kwenche gakcho ben' nxi nyech. ⁸ Daan, beena' bi chzenague' diiki chli' chsedinto' aga chento'n bi chzenague', san che Chiozan', beena' beñe' le' Espíritu Santo' che'na'.

⁹ Na' ka nak cheyi daa chaki ljwellcho, bi chonan byen wzajni' chinto'n le', la' kwin Chioza' ba bsdile' le' gaki ljwell-le. ¹⁰ Na' chakile yog'loł ben'ka' nonlilall' Cristona', ben'ka' zoa doxente Macedóniana'. Na' chat'yointo' le' ben' bish' na' le' ben' zan', zizikchli gakchi ljwell-le. ¹¹ Li gon to dii byen soalen ljwell-le wen, na' li se wñeyi che loo yoo lill-lena', na' li gon llin kon ni'a na'leka' ka ba wnakznto' le' ¹² kwenche ben'ka' bi nonlilall' Cristona' inagake' le wen nsa' chele, na' lekzka' bibi zed ljenle lill ben'.

¹³ Na' le' ben' bish' na' le' ben' zan', cheeninto' inezile nak gak che ben'ka' ba wit kwenche bi gakyeshile ka chakyeshii ben'ka' bi nongake' lez lljazoalengake' Chioza'. ¹⁴ Daa chajle'cho wit Jesúza' na' bibane' ladj ben' wetka', lekzka' chajle'cho Chioza' yisbane' ben'ka' nonlilall'gake'ne' ka witagake'.

¹⁵ Na' daan, nanto' le' kon ka wna Xancho Jesúza': Cho' ni mbancho kat' zizee, aga chon' yibialocho lao ben'ka' ba wit. ¹⁶ La' kwin Xancho Jesúza' zizee yabana', na' inie' zillj gone' mandad yiban ben' wetka', na' anjla' chñabia' inie' na' yenicho kwell trompet che Chioza', na' ben'ka' benlilall' Cristona' yibangake' nech. ¹⁷ Na'tech, ka cho' ni mbancho, yigoyo Chioza' cho' yiyakchogake' txen ladj bejka' kwenche ljjatılcho Xanchona', na' soalenchone' zejli kañi. ¹⁸ Na' daan, li wtip lall' ljwell-le kon dill'ki.

5

¹ Na' le' ben' bish' na' le' ben' zan', bi chyalljin wzejnto' le' inanto' bi lla bi goran' gak diiki. ² La' ba ñezkzile kwasloł llana' ziza' Xanchona' tokonganzi zizee, ka chon to wban kat' lljlane' wal chel. ³ Kat'ka' ben' yell-liona' ine': "Asi ñaa zoachgacho mbalaz. Bikzbi chak checho", kana'lan tokonganzi kwiayi'gake' na' aga wilalat'gake'. Gak chegake' ka chak che noola' tokonganza' chzolo chaz bes che'na' kat' sane'. ⁴ San le' ben' bish' na' le' ben' zan', ba ñezile diiki kwenche ki sha chel-lə chon llana' zizee tokonganza'. ⁵ Yog'le ba nombia'le Chioza' ba chdale lo beeni'

che'na', na' bich chdale lo yel choḷa' daa chzaklebi dii mala'. ⁶ Daan, li se kwas na' li gakto beṅ' nyeen nyeeniya na' bi gonle ka chon beṅ'ka' bi nombia'gake' Chioza'. ⁷ Beṅ'ka' chda lo yel choḷa' bi nombia'gake' Chioza', nakgake' ka beṅ' ches wa ka beṅ' chzoll chniti na' bi chakbe'gakile' bin chak. ⁸ Per cho', lo beeni'nan' chdacho. Daan, chiyaḷ' gakcho beṅ' nyeen nyeeniya, na' gonḷilall'chcho Chioza', na' gakicho yog'ḷol beṅ' na' goncho lez lljazoalencho Chioza'. Shi goncho yog' diika', na' gakcho ka to soldad beena' nyaz diika' chkweejan le' lo wdila'. ⁹ La' aga gox wṅab Chioza' cho' kwenche techo lo yel' zak'zi'na' zizan', san gox wṅabe' cho' kwenche gat' yel' mban checho zejli kaṅi daa wit Xancho Jesucristona'. ¹⁰ Wite' ni checho kwenche la'kzi shi ni mbancho wa shi ba witcho, lljazoalenchone'. ¹¹ Na' daan, li wtip lall' ljwell-le na' li gaklen ljwell-le soachechhle wzenagle che Chioza' kon ka ba chonkzle.

¹² Le' beṅ' bish' na' le' beṅ' zan', chṅabinto' le' gaple balaan beṅ'ka' chilali chongake' xshin Xanchona' ladjlena', beṅ'ka' ngoo lall' na' le' na' chli chsedgakile' le' nakan chiyaḷ' gonle. ¹³ Li gapgake' balaan na' li gaki legake' ni che llinna' daa chongake'. Na' li soalen ljwell-le mbalaz.

¹⁴ Lekzka' chat'yointo' le' beṅ' bish' na' le' beṅ' zan', li we'lensha beṅ' liaka' dill' kwenche gongake' llin. Na' li wtipsha lall' beṅ'ka' chidinji, na' li gaklen beṅ'ka' biṅ' gakcha lo xnez Chioza', na' li gap yel' chxenlall' che yog'ḷol beṅ'.

¹⁵ Wsak'gale ni tole bi yizi'zle wzon che beṅ' shi bi gone' chele, san li gon ka dii le gonle dii wenna', aga to ladjle na'zə, san kon yog'ḷolte beṅ'.

¹⁶ Toshiizi li yibayi. ¹⁷ Li soatezi soa we'lwill-le Chioza'. ¹⁸ Li we' Chioza' yel' choḅken lao bittezə dii chak, la' kan' cheenile' goncho cho' nonḷilall'cho Cristo Jesús'a'.

¹⁹ Bi wsej wllonle daa cheeni Espíritu Sántona' gone'. ²⁰ Bi gonzile nakzi xtill' beena' ina: "Ki ba wna Chioza' nad'." ²¹ San li wsedyen'an shi dii li nakan daa goll Chioza' le' na' li ikaa dii wenna'. ²² Bi gonle txen bittez dii mal.

²³ Na' Chioza'kzə, beena' chzoe' cho' mbalaz, gone' ka yiyoll yido gakle ka chazlallee. Na' gap wwie' do ka nakle kwenche bibi dol' nable kat' ziza' Xancho Jesucristona'. ²⁴ Chioza', beena' gox wṅabe' le', toshiizi chone' daa ba wne' gone', na' len' gone' dga.

²⁵ Na' le' beṅ' bish' na' le' beṅ' zan', li inabshayi Chioza' gaklene' neto'.

²⁶ Li wwapgach chiox yog'ḷol beṅ' bish'choka' na' beṅ' zanchoka' lega beṅ' chaki ljwellin daa nakle lall' na' Chioza'.

²⁷ Na' nia' le' kon yel' wṅabia' che Xanchona' wlabshale dga lao yog'ḷol beṅ' bish'choka' na' beṅ' zanchoka'.

²⁸ Xancho Jesucristona' gaklensgue' le'.

Kart wchopi daa bzej Páblona' na' bseleen lao ben'ka' nonlilall' Jesucrístona' yell Tesalónicana'

¹ Nad' Pablo, na' Silvánoni len Timotewi chwapnto' le' chiox, ka le' chdop chllagle choe'la'ole Xacho Chioza' na' Xancho Jesucrístona' Tesalónicana'. ² Na' chñabinto' legake' gonshgagake' ka gak wen chele na' wzoagake' le' mbalaz.

³ Dii licha toshiizi chiyal' we'nto' Chioza' yel' choxken ni chele, le' ben' bish' na' le' ben' zan', daa zejch chonlilall'le Jesucrístona' na' daa to tole zejch chakile ben'. ⁴ Daan, choe'nto' xtill'le lao ben'ka' nonlilall' Crístona' to to gana' chdop chllaggake' choe'la'ogake' Chioza' ka nak daa zoachechle toshiizi nonlilall'le Crístona' la'kzi chen chle'ile yel' zak'zi'ka'. ⁵ Na' yog'lol dga chli'n ka wen ben Chioza' wleje' le' gagle lall' nee, na' chli'n dii li nakle ben' chidol' lljazoa gana' chñabi'e, la' ni cheyinnan' chzak'zi'le.

⁶ Na' Chioza', beena' chchoglo che ben' ka chiyal', wsak'zi'e ben'ka' chsak'zi'gake' le'. ⁷ Na' le' chzak'zi'le naa, Chioza' gone' ka soale mbalaz, na' ka'kz gone' chento' kat'ka' ziza' Xancho Jesúza' yabana' ladj bel' yi'na' kon anjl che'ka', ben'ka' nap yel' wak xen, ⁸ kwenche wsak'zi'e ben'ka' bi bembia'gake' Chioza' ni bi bzenaggake' dill' wen dill' kob che Xancho Jesúza'. ⁹ Ben'kin sakzi'gake' zejli kani na' bi yillingake' gana' chñabia' Xanchona' kon yel' wak choo yel' wak xen che'na'. ¹⁰ Ka' gak chegake' kat' yila' Xancho Jesucrístona' kwenche ben'ka' nak lall' nee koogake'ne' balaan na' yibachgayi yog' ben'ka' wyajle' che', na' lenle, daa wyajle'le xtilleena' be'lento' le'.

¹¹ Daan, toshiizi chñabnto' chele kwenche Chioza' ile'shiile' le' lega ben' gox wñabe', na' gaklene' le' kon yel' wak che'na' kwenche yiyoll gonle yog' dii wenna' ba yoo yichjle na' bichlæ dii wenka' cheenile' gonle daa nonlilall'lene' ¹² kwenche Xancho Jesúza' sho'e balaan ni che daa chonle, na' lekzka' kwee le' balaan. Na' Chios chechona' na' Xancho Jesucrístona' gaklengake' le' gak ka'.

2

¹ Na' naa, le' ben' bish' na' le' ben' zan', ka nak daa ziza' Xancho Jesucrístona' na' daa yidi'a yillagcho yiyakchone' txen, chñabinto' le' ² bi gakklejile ni bi illeble kat' yenile inagake' ba bila'læ Xanchona'. Axt inatelzgage': "Ki ba wna Chioza'", wa inazgake': "Ki wna Páblona'", wa, "Ki bene'n yish nan ba bila'læ Xanchona'." ³ Bi we'le latj no siye'zæ le' ka nak diiki. La' aga wiyedzie' shi ben'ka' chwiyi Chioza' bin' yizoshyi'gake'ne', na' shi bin' ichej beena' nak ben' mal wal,* beena' ba nakten kwiaayee. ⁴ Beenin gon kwine' liizelozi ben' choo ben' xen na' wsej wllone' we'la'o ben' Chioza' wa bittezæ dii nonlilall'gake'. Na' lljchi'e loo yoodo' che Chioza' gon kwine' ka Chios.

⁵ ¿Abi chjadinile bshaljlen' le' cheyi dga kana' zoalen' le'? ⁶ Naa ba nezile non ni nkwez beeni kwenche bi yobile' wli'lawe'. ⁷ Do ngash'zæ

* **2:3** Beena' nak ben' mal wal: xtila' nagake' el hombre de pecado wa el hombre malvado. Bwia 1 Jn. 2:18.

ba wzolokzə chak dii mala' daa ba yoo xnezin gakə. Stozə chyallj ikwas beena' ni nzague'n kwenche wli'lawin. ⁸ Na'ch wli'lao ben' mal wala', na' wit Xancho Jesús'a'ne' kon bishbe che'na' na' wlliaeyene' ka ziza'lene' yel' chey cheeni' che'na'. ⁹ Ka nak ben' mal wala', dii xiwaan gaklanan le' gone' biya yel' wak diika' gon ka yibani ben' kwenche siyee legake'. ¹⁰ Na' wchine' yog' de wxiye' kwenche siyee ben'ka' ba nakan kwiayi' daa bi goklall'gake' wlebgake' daa nak dii li kwenche yilagake'. ¹¹ Daan, Chioza'kzə cho'e latj shajle'gake' che de wxiye'ka', ¹² kwenche kwiayi' yog'lolte ben'ka' bi wyajle'gake' che daa nak dii li, san bibachgakile' daa nak dii mal.

¹³ Na' neto' naa, toshiizi chiyal' we'nto' Chioza' yel' choxken ni chele, le' ben' bish' na' le' ben' zan', ben' chaki Chioza'. La' dii nechte Chioza' wleje' le' kwenche yilale bi kwiayi'le daa ba bixis biyib Espíritu Santo che'na' le' na' daa chajle'le dill' li che'na'. ¹⁴ Ni cheyi dgan, gox wñab Chioza' le' ka be'lennto' le' dill' wen dill' kob che'na', kwenche idol'le sho'lenle Xancho Jesucristona' balaan.

¹⁵ Na' le' ben' bish' na' le' ben' zan', li soachech na' li kooshao' diika' bli' bsedinto' le' ka be'lennto' le' dill' na' ka bzejnto' le'. ¹⁶ Na' kwin Xancho Jesucristona' na' Xacho Chioza', beena' ba gokile' cho' na' lo yel' ben' wen che'na' ba bene' cho' yel' chxenlall' zejli kani na' to dii wen dii shao' dii goncho lez, ¹⁷ wtipshgagake' lall'le na' wzoachechgake' le' kwenche toshiizi gonle wen na' we'le dill' wen dill' shao'.

3

¹ Dii zeelo nanto' le', ben' bish' na' le', ben' zan', li inabshayi Xanchona' chento' kwenche cho'a xtilleena' choe'lennto' ben' illiljan tolbe'zə na' wlebgake'n lega dii zakii, kon ka benle le', ² na' kwenche yisle' neto' lo ni'a na' ben' malka', ben'ka' chon dii bi yejni'alallii. La' aga yog' ben' chajle'gake' che Xanchona'. ³ Per nezicho Xanchona' chone' ka ne', na' gone' ka soachechchle na' gap wwie' le' lao dii mala'. ⁴ Na' nxenlall'nto' Xanchona' chaklene' le' chonle ka ba wnanto', na' toshiizi gonlen. ⁵ Na' Xanchona' gaklene' le' gakile' ben', ka chon Chioza' chakile' cho', na' so sakile gapele yel' chxenlall' lao yog' daa yen ile'ile ka ben Cristona'.

⁶ Le' ben' bish' na' le' ben' zan', kon yel' wñabia' che Xancho Jesucristona' nanto' le' bi gonle txen nottezə ben' bish'choka' chdaliazə, la' aga kan' bsedinto' le'. ⁷ La' nezczile ka chonnto', na' kan' chiyal' gonle. Neto' biga wzoaznto' ka ben' lia ladjlena'. ⁸ Ni biga wdaoaznto' yel' wao che ben' na' bi wdixjnto'n, san ka tella ka wal bilal' bizodinto' bennto' linna' kwenche ni tole bi beninto' zed. ⁹ Na' dii licha, zak'kzə wñabnto' yel' goklen chelena', shel'ka', per bennto' llin kwenche ble'ile, na' kan' gonle. ¹⁰ Kana' zoalennto' le' wnanto': "Beena' bi cheenile' gone' llin, lekzka' bi gawe'." ¹¹ Na' ba beninto' bal-le kon chdale to ni to na', ni bi chonle llin, na' chlalltezi chele ga bi chiyal'. ¹² Na' ben'ki chon ka', chñabinto' legake' kon yel' wñabia' che Xancho Jesucristona' bich tazgake' ka'z, san gongake' llin kwenche yeej gaogake'.

¹³ Na' le' naa ben' bish', na' le' ben' zan', bi lljxakile gonle dii wenna'. ¹⁴ Shi no bi chzoa dill' ka nanto' lee yishi, li wwia no beena' na' bi gonlene' txen kwenche yido'ile'. ¹⁵ Bi nia' gakzbanilene', san wzajniile'ne' ka ben' bish'le.

¹⁶ Na' kwin Xanchona', beena' chzoa cho' mbalaz, gone' ka soale mbalaz toshiizi bittezə dii chak chele. Xanchona' soalenshgue' yog'loltele.

¹⁷ Nad' Pablo, kwin' chzej^{*} to chop cho'a lee yishi chwap' le' chiox, kan' chzej' lee yog' yishka' chselaa laolena' kwenche inezile nad'kzan chselaan.
¹⁸ Xancho Jesucristona' gaklenshgue' yog'loltele.

* **3:17** Kwin' chzej': Páblona' bchine' beñ' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao Timotewa'

¹ Nad' Pablo, nak' postl che Jesucristona' kwenche wi'a xtilleena', la' Chioza', beena' bisla cho' kwenche bi kwiaiyi'cho, len Cristo Jesúsza', beena' noncho lez gone' wen checho, bzoagake' nad'. ² Chzej' li', Timoteo, nako' ka dowalj bi' cha' daa nakcho txen chonlilall'cho Jesucristona'. Xacho Chioza' len Xancho Cristo Jesúsza' gaklenshgagake' li', na' yiyesh'lall'gakile' li', na' gongake' ka so' mbalaz.

³ Kana' ba zoa shaa Macedóniana', wñabid' li' yigaano' Éfesona' kwenche yoo ben'ka' chli' chsedi daa bi nak dii li' bi gongake' ka', ⁴ na' bi segake' wneyi che dill' golka' wdiljall' ben' na' che diika' ben dii xozxtoe'ka' daa bi chiyoll chido. La' dill'ka' chonan ka chakgued ben' na' bi chaklenen gombia'gake' daa cheeni Chioza' goncho daa nonlilall'chone'.

⁵ Ye'gako'ne' ka' kwenche gagake' yel' chaki ka daa chalj loo yichjlall'do' beena' ba bixi biyech na' bibi de chao chdian le' daa nezile' chone' ka chazlall' Chioza' na' nonlilalleene' do lallee. ⁶ Balgake' lwaas segake' wneyi cheyi diiki, ba lenzgake' choe'gake' dill' cheyi diika' bi zakii. ⁷ Cheenzgakile' gagake' ben' wli' wsedi ley che Chioza', per ni lekgake' bi chajni'gakile' daa chli' chsedgakile' la'kzi nazgake' kayen'nan nakan.

⁸ Nezicho ley che Chioza' nakan wen, shi wchinchon ka chiyali. ⁹ La' nezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chlleb Chioza', ben' saaxyaka', ben'ka' chiyit xaxna'yin, yog' ben'ka' nak wen xya, ¹⁰ ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' ax̄t chzoagake' Chioza' de taschiw kat' chziye'gake', na' nottez ben' bi chone' daa na cho'a xtil' Chioza' ¹¹ kon ka chzajni dill' wen dill' kob che'na' daa nak dii zakii nleeb. Na' Chioza', beena' chido! we'la'ocho, ba bene'n lall' na' wi'an dill'.

¹² Cho'a Xancho Cristo Jesúsza' yel' choxken chone' nad' wal, na' nxenlallee nad' wak gon xshine'na', na' bzoe' nad' gona'n. ¹³ La'kzi biya dii ben wñia' che', na' bchi' bsakaa ben'ka' benlilall'gake'ne' na' bshagdil' legake', Chioza' biyesh'lallile' nad' daa bi wñezid' bin chon' kana' bin' shajli'a che Jesúsza'. ¹⁴ Na' dii xen goklene' nad', bene' ka chonlilall'chee na' bene' nad' yel' chakina' daa nak' txen Cristo Jesúsza'.

¹⁵ Dillii nakan dii wñenlall'cho, na' yog'lol ben' chiyal' shajli'en: Cristo Jesúsza' bide' yell-lioni kwenche yisle' ben' saaxyaka', na' nad'yen' goklikz' ben' saaxya wal. ¹⁶ Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gagake' yel' mban zejli kan. ¹⁷ Toshiizi shajla'oshga beena' chñabia' zejli kan, beena' biga llia te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gakashgan.

¹⁸ Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wñagake' cho' gaklanan li' gono' ga zeelo yizoilo' gono' xshin Chioza' daa nak lall' no'. ¹⁹ Toshiizi so' gonlilalloo Jesucristona' na' thizi gono' wen kwenche bibi gao idian li' daa nezilo' chono' ka chazlallee. La' bal' ben' dii shao'tekzə chongake' daa

bi chiyal' gongake' na' bich chonlilall'gake'ne'. ²⁰ Ka gok che Himenewa' len Alejándrona', na' wñabid' Chioza' gakgake' lall' na' Satanáza' kwenche wsedgake' bich bi gon inazgake' che Chioza'.

2

¹ Naa nia' li' daa lliate gonle: chiyal' we'lwill-le Chioza' na' inabilene' daa chyallj chchinile na' daa chyallj chchini ben' yoblə, na' gat'yoile'ne' gaklene' yog'lolte ben', na' we'lene' yel' choxken ka nak daa chone' che yog'lol ben' yell-lioni. ² Chiyal' inabicho Chioza' gaklene' ben' wñabia'ka' na' yog'lolte ben' nak joschis, kwenche soacho mbalaz na' kono wsej wllon we'la'ocho Chioza' na' goncho daa cheenile'. ³ La' dgan nakan wen na' chazlalli Chiozan', beena' bisla cho' kwenche bi kwiayi'cho, ⁴ na' cheenile' yog'lolte ben' yell-lioki yilagake' na' gombia'gake' daa nak dii li. ⁵ La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesús'a', ⁶ beena' bzani kwine' wite' kwenche wdixje' xtol' yog'lol ben' yell-lioni. Na' dga gokə, gokan llana' bllia Chioza' bia', na' bli'e cheenile' yisle' cho'. ⁷ Na' kwenche inezi yog' ben' dga, bzoe' nad' nak' postl che' na' bene' lall' na' chyixji'a' xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li che'na'. Na' dga cho'a dill' nakan dii li, na' bi chziyaa.

⁸ Cheenid' yog'lol ben' byoka' we'lwillgake' Chioza' gattezə zoagake', na' chiyal' gakgake' ben' lall'do' nxi nyech, ben' bi yoo daa nak yel' chllaa yel' chlok na' yel' wishagdil kat' wliis neeka' lawe'na' we'lwillgake'ne'. ⁹ Na' ka nak noolka', chiyal' wsak'gake' gakw xagake', na' bi tezgake' lawin yiyiljall'gake' naklə yipaa yichje'ka', ni bi wchingake' no or wa lech' zakii inleeb. ¹⁰ San gonlagake' to dii byen seyi chegake' chongake' wen lega ben' choe'la'o Chios. ¹¹ Chiyal' kwe' noolka' llizə wzenaggake' che ben'ka' chli' chsedi cho'a xtil' Chioza' na' wzoagake' xtilleeka'. ¹² Bi cho'a latj wli' wsedzi noolka' ben' byoka', ni bi inabia'zgake' legake', san chiyal' kwe'gake' llizə wzenaggake'. ¹³ La' Chioza' bene' zigaate Adánna', na'techlə bene' Évana'. ¹⁴ Na' aga Adánnan' wxiye' dii xiwaa, san noolan' wxiye'n na' bxope' lao saaxyana'. ¹⁵ Na' noolka' chzoa xiin, bi tegake' lao yel' zi'na' shi toshiizi nxenilall'gake' Chioza', na' segake' wñeyi gakgakile' ben', na' soagake' gongake' ka cheeni Chioza' lega ben' nyeen nyeenyi.

3

¹ Dillii nakan dii wxenlall'cho: shi no cheeni koo lall' nee gap wwie' ben'ka' nonlilall' Crístona' na' wli' wsedile' legake', llin wen inleeban lliallalee gone'. ² To ben' ngoo loo nee chli' chsedile' ben', chiyal' gake' ben' zoa do yichj do lallee, ben' bibi cho'a xtille de. Chiyal' soa toz xoolə, na' gake' ben' nsa' cheyin wen, na' gake' ben' nyeen nyeenyi, na' ben' chidolee gap ben' le' balaan. Na' chiyal' yiyeshile ben' wi'e ga yigaane', na' gakte wli' wsedile' ben'. ³ Bi chiyal' gake' ben' weezo, ni bi gake' ben' wishagdil, ni bi selall'chgaile' mech, san gake' ben' wen, ben' gaxjlall'. ⁴ Chiyal' gak kwee xnez xlatji dii chak loo yoo lille', na' gone' byen wzenag xiine'ka' che' na' soagakb' gongakb' daa nak wen. ⁵ La' shi to ben' bi chak kwee xnez xlatji dii chak loo yoo lille', ¿nakra gone' kwee xnezi che ben'ka' nxenilall' Chioza'? ⁶ To ben' shinzə wzolo chonlilallee Crístona' bi chiyal' gak lall' nee gap wwie' ben'ka' nonlilall' Crístona', kwenche ki gakze' ben' chep cha'lall' na' wchoglo Chioza' che' ka ba nchogloe' che

dii xiwaa. ⁷ Lekzka' chiyał' seyi che' chone' wen lao ben'ka' bi nonlilall' Crístona' kwenche kono biz gon ina che' na' gonzə dii xiwaa gan wchixan le'.

⁸ Lekzka' ben'ka' gak lo na'gake' gaklengake' wwiagake' bin chyallj chchini ben'ka' nakgake' txen nonlill'gake' Crístona', chiyał' gake' ben' chidol' gap ben' legake' balaan, ben' chda do lallee, na' bi sollgakile', ni bi gake' ben' wzelall'. ⁹ Chiyał' soachehgake' shajle'gake' dii li daa ba bzajni Chioza' cho' daa kono wnezi kana'. Na' chiyał' soagake' do yichj do lall'gake' na' bibi de gao idian yichjlall'do'eka' daa nezgakile' chongake' ka cheeni Chioza'. ¹⁰ Na' lekzka' kat' kwejle ben'ki, chiyał' wwiayen'le nak nsa' chegake'. Na' shi bibi de dii chao xya chegake', wak gak lo na'gake' wwiagake' bin chyallj chchini ben'ka' nakgake' txen nonlill'gake' Crístona'. ¹¹ Na' noolka' lekzka' chiyał' gake' ben' chidol' gap ben' legake' balaan, na' bi gake' ben' wichitj dill', san gake' ben' nsa' cheyin wen, na' gake' ben' gak wxenlall'cho toshiizi gongake' wen. ¹² To ben' gak lo nee wwie' bin chyallj chchini ben'ka' nake' txen nonlill'gake' Crístona' chiyał' soa toz xoole', na' chiyał' gap wwie' xiine'ka' kwenche gongakb' wen, na' kwe' xnez xlatji dii chak loo yoo lille'. ¹³ Ben'ka' chak chgoogake' xnezi che diika' chyallj chchini ben'ka' nakgake' txen nonlill'gake' Crístona' chidol'gake' to balaan, na' soachgake' mbalaz daa nonlilall'gake' Cristo Jesús'a'.

¹⁴ La'kzi ba non' lez yobzə yidwia' li', chzej' dga ¹⁵ kwenche shi bi chyobzid' yid', na' ba nezilo' nakan chiyał' soa ben'ka' nak xiin Chioza', la' cho' chdop chllagcho choe'la'ochone' nakcho xiin Chios yaa Chios banna'. Na' nak lo na'cho goncho ka gombia' ben' dill' li che'na'. ¹⁶ Dii li dga chzajniin cho' che Crístona' daa kono wnezi nakan dii zakii nllab, na' nan:

Bide' golje' ka cho' ben' yell-lio,
na' Espiritu che Chioza' bli'e nan nake' ben' li ben' shao'.
Na' ble'i anjka' le',
na' wda ben' be'gake' cho'a xtilleena' lao ben' yell-lioki,
na' benlilall'gake'ne'.

Na' biyepe' yabana' gana' yo'e to balaan xen.

4

¹ Espiritu che Chioza' cho'e dill' kwasloł, ne' kat' ba zoa te che yell-lioni, bal ben'ka' ba nonlilall'gake' Crístona' bich gonlilall'gake'ne', na' wzenaggake' che dii xiw'ka' na' diika' chli' chsedi ben' chegakin. ² Na' wzenaggake' che ben' wxiye'ka', ben'ka' bichbi chao chdian legake' daa ba nłantekzgake' yeł' wxiye'na'. ³ Na' chllongake' wshagna' ben', na' chllontegake' yeej gaogake' bal yeł' wao la'kzi Chioza' wlo'e yeł' waoka' kwenche cho' nonli'lall'chone' na' nombia'cho dill' li che'na' gaochon na' we'chone' yeł' choxken. ⁴ La' yog'loł daa bxe bsil Chioza' nakan wen, na' bibi de dii inacho bi gak gaochon kon shi we'chone' yeł' choxken kat' yeej gaochon. ⁵ La' daa chajle'cho cho'a xtill' Chioza' na' daa choe'łwillchone', chonleeye' yeł' wao chechona'.

⁶ Shi dga wli' wsedilo' bish' ljjwellchoka', na' gako' to wen llin wen che Jesucristona', na' tolla' ba nono' cho'a xtill' Chioza' loo yichjlall'do'na' len dii wenna' daa bsedo' na' zej chono'n. ⁷ Na' bi wzenago' bizə dill' gol dii chsees' ben', diika' wdiljlall'gake' daa bi nak ka dii shajle'cho, san bsed gonon' ka cheeni Chioza'. ⁸ Nezi cho kat' chchitj ni'a na'choki

chaklenen kwerp chechoni. Per daa choncho ka cheeni Chioza', dii xentechalə chaklenen cho' naa zoacho yell-lioni na' lekzka' kat' illin lla lljazoalenchone'. ⁹ Dillii nakan dii wxenlall'cho, na' yog' ben' chiyal' shajli'en. ¹⁰ Na' ni cheyinnan' chonnto' to dii byen chilalinto' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'lol ben', na' ben'ka' chonlilall'yen' len' yisle'.

¹¹ Diikin chiyal' yoo ben' gongake' na' wli' wsedilo' legake'. ¹² Bi weezo' latj no ile'zi li' nakzi daa nako' bi' wew', san ben wen lao ben'ka' nonli'lall' Crístona', ka de cho'a dill', na' yel' nsa' cheyin wen, na' yel' chaki ben', na' yel' nonlilallii Crístona', ni bibi dii mal sa'laloo, kwenche lengake' gongake' ka'. ¹³ Shlak yid', ben ka dii le blab Cho'a Xtill' Chioza' lao ben'ka' chdop chllag, bli' bsedgakile', na' btip lall'gake'. ¹⁴ Bi guetlalloo daa ben Chioza' lall' no' kana' ben'ka' ngoo lall' na'gake' ben'ka' nonlilall' Crístona' bxoā neeka' yichjo'na' bengake' li' lall' na' Chioza', na' bchej beena' wdixjee nan Chioza' ba wleje' li' gono' xshine'na'.

¹⁵ Ben to dii byen ben diiki wloo Chioza' lo no' gono', na' benyenaan kwaslol kwenche gakbe'i yog'lol ben' ba zejch chono' wen. ¹⁶ Wze wneyi che kwino' na' cheyi daa chli' chsedilo' ben', na' toshiizi wno'n. Na' shi gono' ka nan, na' yisla kwino' len ben'ka' chzenaggake' daa chli' chsedilo'.

5

¹ Bi inezo' zibia' ben' golka', san be'lengake' dill' xochi ka ben' chshaljlen xayin. Na' goni ben' bishoo ben' xkwid'ka'. ² Na' goni xnoo noolka' ba ngolch ka li', na' goni ben' zano' nool xkwid'ka', na' bibi dii mal sa'laloo.

³ Goklen nool wizebka', ben'ka' kono zoa chegake'. ⁴ Per shi zoa xiin xsoagake', chonan byen inezgakib' chiyal' gap wwiagakb' le', la' len' bisgole' legakb'. La' kan' chazlall' Chioza' goncho. ⁵ Nool wizeba', beena' kono zoakz cheyin, beena' bgaan tlish' tyaj, chxenilallee Chioza' na' ka tella ka wal choe'lwille'ne' na' chat'yoile'ne' gaklene'ne'. ⁶ Per nool wizeba', beena' choe' cho'a xbayi beli chen che'na', nake' ka ben' net lao Chioza' la'kzi mbane'. ⁷ Bzajni'gakile' dga kwenche bibi gon inaz ben' chegake'. ⁸ La' beena' bibi wneyi ze che no dialla che' na' che ben'ka' nakyenee txen loo yoo lille'na', ba wlej yichje' daa nak che Chios, shi ka' chone', na' ba nxinjtechlə yichjlall'do'ena' aga ka beena' bin' shajle' che Chioza'.

⁹ Lee yisha' gana' da' le nool wizebka' chiyal' ta' le ben'ka' ba wdeli guiyon yiz, ben'ka' ben banez kochno bikaagake'. ¹⁰ Chiyal' seyi chegake' chongake' wen: daa gok bisgol xiine'ka', daa chiyesh'lall'gakile' ben' choe'gake' ga yigaangake', daa chongake' bittez dii gaklenen ben'ka' nonlilall' Chioza', axt chyibgake' ni'eka', na' daa chaklengake' ben'ka' chzak'zi', na' daa chongake' ka dii le chongake' yog' daa nak wen.

¹¹ Na' bi wdoō le nool wizebka' lee yisha' shi bin' gaggakile' guiyon yiz. La' zoa kat' we'gake' cho'a xbayi beli chen che'ka' na' yikaa chegake' na' bich gongake' kwaslol xshin Crístona', ¹² na' gapgake' dol' lao Chioza' daa bi saggakile' gongake' ka ba bchebgake'. ¹³ Na' leyi chiyakgake' noolə lia na' chdagake' to to yoo. Na' aga toz daa, san lekzka' chchitjgake' dill', na' chjalaalli chegake' dii chak che ben' yoblə, na' choe'gake' dill' dii bi chiyal' we'gake'. ¹⁴ Daan nool wizebka' ni zoa xlatjin, cheenid' yikaa chegake' na' yizoa xiingake', na' koogake' xnezi dii chak loo yoo lillgake', kwenche bi

wxa'gake' cho'alao ben'ka' bi chonlilall' Chioza'. ¹⁵ La' bal' nool wizebka' ba bichejgake' lo xnez Chioza' na' ba zjanogake' Satanáza'lə.

¹⁶ Shi to ben' nonlilall' Chioza' zoa to dialla che' nool wizeb, chiyał' gaklene'ne' kwenche bi gake' to dii zii dii zshab che ben'ka' nonlilall' Crístona', na' gak we'gake' daa chyalj chchini nool wizebka' kono zoa chegake'.

¹⁷ Ka nak ben'ka' ngoo lall' na'gake' ben'ka' nonlilall' Crístona', na' chak chgoogake' xnezin wen, chidol'gake' balaan xen. Na' ben'ka' noni xshingake' choe'gake' cho'a xtill' Chioza' na' chli' chsedgakile', balaan xentechlə chidol'gake'. ¹⁸ La' Cho'a Xtill' Chioza' nan: "Ka nak goona' bana' chilalı chlej chshoshjb trígona' kwenche ichej xayinna', bi wllinle yixja' cho'aba' kwenche gak koyob to chop cho'a." Na' lekzka' nan: "Beena' chon llinna' chidolee ikaa laxje'."

¹⁹ Shi no chao xya che to ben' ngoo lall' na' ben'ka' nonlilall' Crístona', bi wzenago'n shi bi zoa chop shon ben' yizi' cho'agake'n. ²⁰ Na' shi ga zoa ben'ka' bi chsankzgake' dii mala', chiyał' wsheshleno' legake' kat' ndop nllagle kwenche yog'lol ben'ka' nakle txen illebgake' na' bi gongake' ka'. ²¹ Chat'yoid' li' lao Chioza', na' lao Jesucrístona' na' lao anjl che'ka', toshiizi gono' diiki ba wnia'. Na' toz ka gonilo' yog'lol ben', aga balze' gakilo'. ²² Bi wxoazə noona' yichj beena' cheeni gon xshin Chioza' shi bi nezilo' nak nsa' che', kwenche ki gako'ne' txen shi chone' dii mala'. Wdaphsii kwino' kwenche ki ta' icheno' dii mala'.

²³ Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

²⁴ Bal' dii malka' chon ben' chli'lawin ka zi' gaolə ben' xya chegake'. Na' zi balan, zi' chila' chinezli beñaan. ²⁵ Na' ka'kzə, dii wenna' daa chon ben' nla'xejgakan, na' la'kzi de dii wenna' daa ngash', wllin lla wli'lawin.

6

¹ Yog'lol ben'ka' ndoo lla yel chongake' xshin ben' na' ba chonlilall'gake' Crístona', chiyał' sho' yichjgake' gaggake' xane'ka' balaan kwenche bibi gon inaz ben' che Chioza' na' cheyi daa chli' chsedicho. ² Na' shi xane'ka' nonlill'gake' Crístona', la'kzi ba nakgake' ben' bish'gake' daa chonlilall'gake' Crístona', chiyał'kz gaggake' legake' balaan, na' chiyał' gonchlagake' xshine'ka' do yichj do lall'gake' daa chakgakile' legake' na' nezgakile' ben'ka' si' banez xshine'ka' nakgake' ben' nonlilall' Crístona'. Dgan chiyał' wli' wsedilo' legake' na' ye'gako'ne' gongake'n.

³ Shi no chli' chsedi dii nak nlla'lə na' bi chidilin daa bli' bsemi Xancho Jesucrístona', na' bi chidiltein daa chsedi cho' goncho ka cheeni Chioza', ⁴ beena' chon ka' nake' ben' chep cha'lall', ben' bibi nezi. Na' daa le chibaile' gakkil-lene' ben', chxie' daa nak yel' xe', yel' wishagdil, yel' chbell chne che ben', na' yel' chza'lall' mal che ben'. ⁵ Na' biga yiyoll yido gakkil-lene' ben' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi che Chioza' gatile' mech xen. ⁶ Dii li, le mbalaz soacho shi goncho ka cheeni Chioza' na' goncho banez ka'k' to dii de checho. ⁷ La' to ka cha'zchon goljcho yell-lioni, na' to ka cha'zchon yiza'cho. ⁸ Shi de dii cheej chaocho na' de xalaancho, chiyał' goncho banez. ⁹ Na' ben'ka' cheeni gak ben' wni'a, chxopgake' lawi daa nak yel' wzelall' na' llialall'gake' biya dii bi yejni'alallii daa chxinj chlenan legake', na' chtakw chchejan legake' na' chbiayi'lengake'n.

¹⁰ Lo yel' wzelall' mecha' chalj chxe biya dii bi yejni'alallii. Baḷ ben', yel' wzelall' che'ka', ba bilaagake' lo xnez Chioza' na' ba chile'gakile' zan yel' zi'.

¹¹ Per li' chono' xshin Chioza', biga gono' ka chon ben'ka', san ben daa nak dii licha, ben ka cheeni Chioza', wzoatezi wzoa benlilallee, wdap yel' chaki, gok wal lao yog'lol dii idil illago', na' gok ben' gaxjlall'. ¹² Btiplalloo na' ben to dii byen gono' daa cheeni Chioza', beena' nonlilaloo. Na' be'l-lall' beni cho' daa nak yel' mban zejli kani. La' ni cheyinnan' gox wṇab Chioza' li' na' bi'o dill' lao ben' zan nan nonlilaloo Cristona'. ¹³ Na' naa, lao Chioza', beena' choe' yel' mban che yog'te dii de yell-lioni, na' lao Jesucristona', beena' be' dill' kon ka nakan lao Poncio Pilátona', chon' byen ¹⁴ wzo' dill' dga nia' li', na' seyi cho' chono' wen na' bibi dii mal ta' icheno' axt ni ka yila' Xancho Jesucristona'. ¹⁵ La' wllin lla yiyede' ka bllia Chioza' bia', Chios, beena' chidol' we'la'ocho, beena' zeelo chṇabia'. Zeelo len' nake' Xan yog'lol ben', na' chṇabi'e lao yog'lol ben'. ¹⁶ Toze' len' biga llia te che', na' zoe' lo beeni' xen wala' daa kono chzoi wwia. Ni tlish' benech bin' ile'ile'ne' ni bi gak ile'gakile'ne'. Len' chidolee sho'e balaan zejli kani na' biga llia te yel' wṇabia' che'na'. Kan' nakan.

¹⁷ Ben'ka' chle'i yel' wni'ana' yell-lioni, gollgake' bi gaggake' ben' cha'siba, ni bi gongake' lez yel' wni'a che'ka'. La' yel' wni'ana' bi nakan lez. San chiyaḷ gongake' lez Chios yaa Chios banna'. Len' chone' zoayaa zoallin yog'lol daa chyalj chṇchinicho kwenche si'chon banez. ¹⁸ Gollgake' gongake' wen, na' koo yichjgake' wzanchgake' dii wenka' chongake', na' segake' wṇeyi izangakile' we'gake' ben' dii de chegake'. ¹⁹ Na' daa gongake' ka', na'chan saki gongake' lez daa zi' za', na' idol'gakile' yel' mban daa nak dowalj.

²⁰ Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' ben'ka' chonzə ka nap yel' sin'. ²¹ Baḷ ben' ba wyajle'gake' cho'a xtilleeka' na' ba bilaagake' lo xnez Chioza'.

Chioza' gaklenshgue' le' na' gone' ka gak wen chele.

Kart wchopi daa bzej Páblona' na' bseleen lao Timotewa'

¹ Nad' Pablo nak' postl che Jesucrístona' kon ka chaklall' Chioza', kwenche wi'a dill' nan ba bchebe' wi'e yel' mban zejli kaní che nottezə ben'ka' nak Crístona' t xen. ² Chzej' li', Timoteo, nako' ka dowalj bi' cha'. Xacho Chioza' na' Xancho Jesucrístona' gaklenshgagake' li', na' yiyesh'lall'gakile' li', na' gongake' ka so' mbalaz.

³ Tlizi choe'lwill' Chioza', beena' chonlilallaa do yichj do lallaa, ka ben dii ben' gol cha'ka'. Ka tella ka wal chnab' gaklene' li' na' cho'ane' yel' choxken ni cho'. ⁴ Chjadinid' ka wchello' kana' zeelo bshaljcho, na' cheenid' ile'id' li' kwenche yiba yizakid'. ⁵ Chjadinid' ka nonlilalloo Chioza' do yichj do lalloo, ka ben xna'golo' Lóidana' na' xnoo, Eunícena'. Na' nezyenid' lekzka' li' nonlilalloone' do yichj do lalloo.

⁶ Na' daan, chisa'lalloo chiyal' we'l-lall'cho gono' xshin Chioza' kon ka nak yel' waka' daa bene' lall' no' kana' bxo'a' na'na' yichjo'na'. ⁷ La' Chioza' bene' cho' Espíritu che'na', na' Espíritu che'na' chaklene' cho' kwenche bi gall illebcho, na' chone' cho' yel' wak len yel' chaki, na' chaklene' cho' gakcho ben' nyeen nyeeni. ⁸ Daan, bi yiyi yido'ilo' wi'o cho'a xtill' Xanchona', ni bi yido'ilo' ni cha' daa dia' lillyani daa chon' xshin Chioza'. San chiyal' gono' nad' t xen illaglocho yel' zak'zi'ka' ni che cho'a xtill' Crístona', la' Chioza' chaklene' cho' len yel' wak che'na'. ⁹ Chioza' bisle' cho' na' gox wñabe' cho' kwenche gakcho lall' nee, aga yel' chon wen chechonan', san kon ka goklallile' gone'n daa nake' ben' wen. Na' daa biyesh'lallile' cho' wlo'e xnezin wselee Jesucrístona' kana' zi' wxē wsiltie' yell-lioni. ¹⁰ Na' naa, ba bli'lawi yel' chiyesh'lallii che'na' daa bid Jesucrístona', beena' bisla cho', na' bliayee yel' wak che yel' wita', na' dill' wen dill' kob che'na' chzajniin cho' nan de to yel' mban daa bi te cheyin.

¹¹ Chioza' bzoe' nad' nak' postl na' bene' lall' na' chyixji'a dill' wen dill' kobi na' chli' chsedida'n ben'. ¹² Na' ni cheyinnan' chzak'zi'a lao dga chak cha' naa. Per bi chiyi chido'id', la' nezid' ka nak beena' ba nxenilallaa. Na' nezid' nape' yel' wak gapshi'e dill' li' che'na' daa bene' lall' na', kwenche toshiizi gakan dowalj axt kat' illin lla te che yell-lioni.

¹³ Dill' lika' ba bli' bsedid' li', bli' bsemi'n ben' kon ka nakan. Na' daa ba nako' t xen Cristo Jesús'a, soachecho' gonlilalloone' na' gakteilo' ben'. ¹⁴ Espíritu Sántona', beena' zoa loo yichjlall' do'chona', gaklene' li' kwenche toshiizi wli' wsedilo' ben' dill' lina' daa ba bsemi'd' li' na' bi wi'o latj shi ga za'zə ben' cheenile' yisheen.

¹⁵ Nezkzilo' yog' ben' Ásiaka' wchoonlall'gake' nad', na' lentes Figélon'a' na'ch Hermógeneza'. ¹⁶ Chnabid' Chioza' yiyesh'lallile' Onesíforona' len xiin xoole'na', la' zan shii bidtipe' lallaa na' bi bido'ile' bidwie' nad' loo lillyani. ¹⁷ To ka bidze' Rómani, lii biyiljdotie' nad' axt ki billelile' nad'. ¹⁸ Chnabid' Xanchona' yiyesh'lallile'ne' kat' illin llana' wchogloe' che ben'. Nezkzilo' dii xen goklene' cho' Éfesona'.

2

¹ Na' li, naa, xiindawaa, gok wal daa chaklen Cristo Jesús'a li'. ² Daa ba benilo' bli' bsedid' beñ', bzajniin beñ'ka' n̄xenlalloo, beñ'ka' nezteilo' wak wli' wsedgakile'n beñ' yoblə kon ka nakan.

³ Wzoachech btil' yel' zak'zi'ka' chllaglo' lega beñ' chon xshin Cristo Jesús'a, ka chon' nad'. ⁴ Ni to beñ' zeje' lo wdila' aga dii yoblə zeze' wñeyi, san chiyal' kwej yichje' yog'lołte kwenche gone' daa yiyoollalii beena' wleje' le' gake' soldad. ⁵ Lekzka' beena' chxonj, bibi gone' gan shi bi chzoe' dill' gone' yog'lołte daa lia bia' gone'. ⁶ Na' beena' cheeni yizi' yilape' chiyal' wwa'gaxje' llin cheyin. ⁷ Wze wñeyi dga nia' li', na' Xanchona' wzajni'chile'n li' kwasloł.

⁸ Jadini Jesucristona', beena' biban ladj beñ' wetka', beena' nak xiin dia che dii Davina', kon ka na dill' wen dill' kob che'na' daa chli' chsedid'. ⁹ Na' ni cheyinnan' chzak'zi'a, ax̄t ba wdix̄gake' nad' lillyani ka to beñ' wen dii mal. Per aga len cho'a xtilleenan' nej lillyani, san zejchlə chliljan. ¹⁰ Daan chzo chzakid' yog' yel' zak'zi' dii chak cha', kwenche beñ'ka' ba wlej Chioza' gakgake' lall' nee gonlilal'gake' Jesucristona' na' yilgake' kwenche bi kwiaiy'gake', na' lljazoalengake'ne' zejli kañi.

¹¹ Dillii nakan dii w̄xenlall'cho:

Shi ba witlencho Críston'a, lekzka' wbanlenchone'.

¹² Na' shi so sakicho lao bittezə yel' zi' yen ile'icho daa nakchone' txen, lekzka' inabia'lenchone'.

Shi cho' bi w̄chebcho nakchone' txen, ka'kzə le' ine' bi nake' cho' txen.

¹³ La'kzi cho' bi choncho daa ch̄chebcho, le' chone' ka ba b̄chebe', la' toshiizi chone' kon ka ch̄chebe' gone'.

¹⁴ Bi guetlalloo yisoo dga lall' beñ'ka' chli' chsedilo'. Na' kon yel' wñabia' che Chioza' daa ba beñ' li' bsi'ngakile' bi chiyal' gakguedlenzə ljwell-gake' ni cheyi diika' bibi zakii. La' bi chaklenan beñ', san chlliaiyi'lan beñ'ka' chzenagan. ¹⁵ Ben to dii byen gono' ka chazlall' Chioza' kwenche bibi wsi'n li' yel' zto' lo xshine'na', na' bli' bsemi dill' li che'na' kon ka nakan. ¹⁶ Bi wzenago' dill'ka' bi yejni'alallii na' bite bi zakgakan, la' beñ'ka' choe' dill' ka diika' zizikli chongake' daa bi choollall' Chioza'. ¹⁷ La' daa chli' chsedgakile' nakan ka to yillwe' dii nak lech na' chlliaiyi'n beñ'. Ka' ben Himenewa' len Filétona', ¹⁸ bi laala'ogake' dill' li che Chioza' na' nazgake' ba bisbanle' beñ' wetka'. Na' chonllejgake' beñ'ka' ba nonlilal'gake' Críston'a'. ¹⁹ San dill' li che Chioza' nakan ka to len yoo dii zoachech. Na' dill' li che'na' nan ki: "Xanchona' nombi'e beñ'ka' nak lall' nee." Na' lekzka' nan: "Nottezə beena' na nake' Críston'a' txen, chiyal' yikwase' lawi dii mala'."

²⁰ To loo yoo lill beñ' wni'a aga chchine' shgal' dii nak de or wa de plat, san n̄chix̄gakan de yag len de yo. Balan naki gana' chchine'n, na' balan chonan llin gattez. ²¹ Ka'kzan beena' chon daa chazlall' Chioza', saklebile' diika' nak de or wa de plat, na' zakee w̄chin Chioza'ne' gone' dii zan dii wen.

²² Bi gono' txen ni to dii malka' cheeni beli chenna' kat' zoan lo yel' wewaa. Na' ben to dii byen gako' beñ' li beñ' shao', na' gonlilalloo Críston'a', na' gakilo' beñ', na' soaleno' bish' ljwello'ka' mbalaz, ka chon yog' beñ'ka' nxi nyech yichjlalldoe'ka', beñ'ka' choe'lwilgake' Xanchona'. ²³ Bi wzenago' dill'ka' biz chon chna, dill'ka' bibi zak', la' ba nezkzilo' ch̄xegakan wdil. ²⁴ To beñ' n̄lane' chone' xshin Xanchona' bi chiyal' wshagdile' beñ', san chiyal' gonile' yog'loł beñ' wen. Na' chonan byen

gak wli' wsedile' ben', na' chiyal' gape' yel' chxenlall'. ²⁵ Na' chiyal' we'lene' dill' xochi ben'ka' chzoshi' daa nak dill' li' daa chli' chsedile', na' gone' lez shicholə Chioza' gaklene' legake' kwenche yiyaj yilengakile' na' gombia'gake' daa nak dii li, ²⁶ na' yiyeen yiyeenigakile' na' yilagake' lo ni'a na' dii xiwaa daa ntakw nchejan legake' daa chongake' ka cheenin.

3

¹ Lekzka' chiyal' inezilo' dga: kat' ba zoa te che yell-lioni, dii zan dii nxoll gat'. ² La' ben' zan che to kwinzgake' segake' wneyi, na' lillinzi selall'gake' gat' kwe'gakile' mech, na' gakgake' ben' llalj na' ben' chep cha'lall'. Biz gon inagake' che Chioza', na' bi wzoagake' xtill' xaxneeka', ni bi we'gake' yel' choxken ben' gaklen legake', na' ni bi yoo yichjgake' gongake' ka cheeni Chioza'. ³ Na' bi yiyesh'lall'gakile' ben', ni bi si'xen che bish' ljwellgake', na' le chilj sangake' dill' che ben'. Na' bi sakgakile' inabia' kwingake', na' le yibagakile' wchi' wsak'gake' ben', na' gakzbangakile' yog'lolte daa nak wen. ⁴ Gakgake' ben' chop cho'a dill', na' ben' bibi nalli, na' gon kwingake' ben' choo ben' xen. Na' le yibachgakile' gongake' kon ka chzelall'gake' latjin dii nan gongake' ka cheeni Chioza'. ⁵ La'kzi gongzake' ka ben' le nxenilall' Chios, na' to kwinzgake' wli' wze chegake' nan bin' we'gake' latj wshaa Chioza' yichjlall'do'eka'.

Na' li' naa, bi chiyal' gono' ni to ben'ki txen. ⁶ La' kan' nak ben' wxiye'ka' chda to to yoo, na' chziye'gake' noolka' bi nteyi, ben'ka' lall' lao saaxyana' na' chongake' biya dii mal. ⁷ Noolki tlizi chzenaggake' daa chli' chsedi nottezə ben' legake' na' biga llia chombia'gake' daa nak dii li. ⁸ Ka ben ben'ka' le Janes na'ch Jambres, wzoshi'gake' dii Moiséza', kan' chon ben'ki chsej chllongake' cheyi daa nak dii li daa nxinj nlen yichjlall'do'eka'. Na' bi nde ben'ki kwent lao Chioza' la'kzi nazgake' nonlilall'gake'ne'. ⁹ Na' aga wgol daa chongake', la' yog' ben' gakbe'i nakgake' ben' bi yejni'alallii, ka gok che ben'ka' chop, ben'ka' wzoshi' dii Moiséza'.

¹⁰ Na' li' naa lla, ba nezkzilo' ka nak daa chli' chsedid', ka nsa' cha', ka nak daa lliallalaa gon', ka nonlilalaa Chioza', na' ka nak yel' chxenlallaa na' yel' chakina' nap', na' ka chtip lalaa kwenche chzo chzakid' yel' zak'zi'ki chtil'. ¹¹ Na' nezilo' ka nak yel' zak'zi'ka' diika' ba bllagloa', ka diika' btil' Antioquiana', na' Icóniona', na'ch Lístrana'. La'kzi dii zan dii ba bllagloa', Xanchona' ba bisle' nad' lao yog'lolten. ¹² Dii li, yog'lol ben'ka' cheengakile' gongake' ka cheeni Chioza' daa nakgake' txen Cristo Jesúsza', wsak'zi' ben' legake'. ¹³ Na' ben' wen dii malka' len ben' wxiye'ka', zizikli gongake' mal, na' gaklelagakile' siye'chgake' ben' na' axt kwingake' ba chiyajle'gake' che yel' wxiye' che'ka'.

¹⁴ Na' li' naa, wzoachech lawi daa ba nsedo' na' ba wyajli'o. La' nom-bia'kzo' ben'ka' bli' bsedi li'. ¹⁵ Jadini kana' naktio' bi'do' nombi'o Cho'a Xtill' Chioza', na' lennan' gonan li' yel' sin'na' daa chsedin li' gonlilalloo Cristo Jesúsza' kwenche yilo' na' bi kwiaayoo. ¹⁶ Kwin Chioza' bzajniile' dii ben'ka' bzej doxen Cho'a Xtilleena', na' zakaan wli' wsedin ben', wsheshlenan ben' bi chon wen, yigoon shli lall' ben' naklleji, na' wzajniin ben' kwenche gake' ben' li ben' shao', ¹⁷ kwenche beena' chon ka cheeni Chioza' zizikli gachache' na' gak gone' yog' diika' nak wen.

4

¹ Lao Chioza' na' lao Cristo Jesús'a, beena' yiyede' inabi'e na' wchogloe' che to to ben', ka ben' ni mban na' ka ben' ba wit, chon dga lo no': ² Be' len ben' Cho'a Xtill' Chioza', na' toshiizi benan kat' de xlatjin gono'n, laa cheengakile' wzenaggake'n laa bi cheengakile'. Ben ka yiyakbe'i ben' nan ba bxinj blene', bsheshlen beena' bi zej shli, na' btip lall'gake' gongake' wen, na' wdap yel' chxenlall' chegake' na' bli' bsedi legake'. ³ La' wllin lla kat' ben' yell-lioki bich gaklall'gake' wzenaggake' daa nak dii licha. Na' daa cheengakile' gongake' kon ka nan yichjlall'do'eka', yiyiljgake' wde wdeli ben'ka' chli' chsedi daa chiyooll'gake' wzenaggake'. ⁴ Na' yilaala'ogake' daa nak dii li na' wzenaggake' bizə dill' gol. ⁵ Per li', gokto lega ben' nyeen nyeeniya lao yog'lolte dii chak, na' so sakilo' wtiloo yel' zak'zi'ka'. Ben ka dii le be' dill' wen dill' kob che Crístona', na' ben xshin Chioza' daa ba nak lall' no'.

⁶ La' ba zoa witgake' nad' daa chon' xshin Crístona', na' ba zoa gaoshosh lljazoalenee. ⁷ Ba ben' ga zeelo bizoid', na' ba biyoll ben' daa ben Chioza' lo na' gon', na' toshiizi wzoachech' ben' lillaane'. ⁸ Na' naa ba chbez' llana' ikaa daa chidolaa daa ba ben' dii wenna'. Na' Xanchona', beena' chchoglo che ben' kon ka nakan, gone'n nad', na' aga toz nad', san len yog' ben'ka' do yichj do lall'gake' nongake' lez llana' yiyede' sto shii.

⁹ Ben to dii byen lii yidwiatezo' nad', ¹⁰ la' Démaza', daa ngoo yichje' daa de yell-lioni, ba wchoonlallee nad' na' ba ziyaje' Tesalónciana'. Na' Crescéntena' zeje' zji'e cho'a xtill' Chioza' Galáciana', na' Títona' zeje' Dalmáciana'. ¹¹ Tochga Lúcazi zoalene' nad'. Jadilj Márcona' na' dalene' ni kwenche gaklene' nad' lo xshin Crístona'. ¹² Ba bselaa Tíquiconá' Éfesona'. ¹³ Kat'ka' tio' Tróaza' ikaasho' xachela' chdob' daa bkwaan' lill Cárpona'; na' lezkza' bex' librka', na' dii llialote goxoo libr de yidka'.

¹⁴ Alejandro, ben' wichekw yana, le michian bene' cha', na' Xanchona' wi'ene' daa chidolee. ¹⁵ Lekzka' li', wsako' ki gone' cho' ka', la' le chakzban-ile' daa chli' chsedicho.

¹⁶ Dii nech ka bdegake' nad' lao ben'ka' chnabia' ni, ni to ben' bish'choka' bi goklengake' nad'; yog'zgake' wchoonlall'gake' nad'. Chnabid' Chioza' si'xene' chegake'. ¹⁷ Per Xanchona' goklene' nad' gok' wal kwenche bia' cho'a xtilleena' lao ben'ka' bin' gonlilall'gake'ne', na' bisle' nad' lao yel' wita'. ¹⁸ Na' Xanchona' yisle' nad' lao yog'lol dii mal, na' lljazoalenee yabana' gana' chnabi'e. Len' chidolee sho'e balaan' zejli kan. Kan' nakan.

¹⁹ Bwapsha nad' chiox Priscana' len Aquílana', na' yog' ben' lle' loo yoo lill Onesiforona'. ²⁰ Erástona' bigaane' Coríntona', na' bkwaana' Trófímona' Milétona' daa bi shawee. ²¹ Btalalloo yido' ka zi' yizolo' dii zaga'. Eubúloni, Pudénteni, Línoni, Cláudiani, na' yog'lol ben'ki nakcho txen nonlilall'cho Jesucrístona', chwappgake' li' chiox.

²² Xancho Jesucrístona' soalenshgue' li'. Na' gone' ka gak wen che yog'le.

Kart daa bzej Páblona' na' bseleēn lao Títona'

¹ Nad' Pablo chzej' li', nak' wen llin che Chioza' na' nak' postl che Jesucristona', na' bseleē nad' kwenche gaklen' beñ'ka' ba wlej Chioza' gonlilall'gake'ne' na' gombia'gake' daa nak dii li daa chzajniin cho' goncho ka cheenile'. ² Na' zoacho noncho lez to yel' mban zejli kañi. Kana' zi' wxē wsiltie' yell-lioni, Chios, beena' biga chziye', bchebe' gone'n cho'. ³ Na' naa ba bllin lla, Chioza', beena' chisla cho' kwenche bi kwiaiyi'cho, chzenile' yog' beñ' cho'a xtilleena' daa bene' lall' na' chyixji'a, kon ka wne' gon'. ⁴ Chzej' li', Tito, nako' ka dowalj xiin' daa nakcho toz chonlilall'cho Jesucristona'. Xacho Chioza' na' Jesucristona', beena' bisla cho' lao saaxya chechoka' kwenche bi kwiaiyi'cho, gaklenshgagake' li' na' gongake' ka so' mbalaz.

⁵ Bkwaana' li' Crétana' kwenche wzeelo' koo xnezi daa bi biyolicho, na'ch kwejo' beñ' koo lo na'gake' beñ'ka' nakgake' txen nonlilall'gake' Crístona' to to yell, kon ka ba wnia' li' gono'. ⁶ Beena' gak lall' nee beñ'ka' nonlilall' Crístona' chiyal' wsa' che' wen kwenche bibi de ina beñ' che', na' gake' beñ' zoa toz xoolin, na' gonlilall' xiine'ka' Crístona', na' bi gakgakb' bi' mal ni bi' widenag kwenche bi wxa'gakb' cho'aloa beñ'. ⁷ Daa ngoo lall' nee xshin Chioza', chiyal' gake' dowalj beñ' wen, beñ' bibi de ina beñ' che', na' bi gake' beñ' chep cha'lall', ni bi gake' beñ' lok, ni weezo, ni wishagdil, ni beñ' wzelall'. ⁸ San chiyal' wi'e ga yigaan beñ', na' yibaile' gone' dii wen, na' gake' beñ' nyeeñ nyeeniyi, na' beñ' nxi nyech, na' beñ' chñabia' kwiniñ. ⁹ Chiyal' gonlene' xtil' Chioza' daa nak dii li daa ba nsede', kwenche wtipe' lall' beñ' yoblə daa wli' wsedile' legake' daa nak dii li, na' gone' ka shajle' beñ'ka' nagake' aga kan' nakan.

¹⁰ La' beñ' zan inleeb beñ' widenag zoa, beñ' bizə chon chna, na' beñ' chziye', na' zangake' nakgake' beñ' Israel, beñ'ka' na' yog'loŋte beñ' byoka' chonlilall'gake' Crístona' chiyal' sho'gake' señ daa le circuncisión. ¹¹ Beñ'kan' bi chiyal' we'cho latj wli' wsedgakile' beñ', la' daa chze-lall'gake' gongake' gan mechan' chdagake' to to yoo chli' chsedgakile' daa bi nak shli, na' chonllejgakile' do bxoonŋtegage'.

¹² To beñ' Creta, beñ' chñeyaa, wne' che beñ' wlall' che'ka': "Beñ' Cretaki nakgake' beñ' wxiye', beñ' mal ga zeelo, beñ' cheej chao ka nla' ka nte, na' beñ' lia." ¹³ Na' dii likzə ka nakannan'. Daan, bsheshlengake' ka chiyali kwenche shajni'gakile' daa nak dii li daa ba wyajle'gake', ¹⁴ na' bich wzenaggake' che dill' golka' daa wdiljlall' beñ' Israelka', ni bi wzenaggake' daa nazə beñ'ka' chzoa ka'lə daa nak dii li.

¹⁵ Beñ'ka' ba nxi nyech yichjlall'do'eka' lao Chioza', ni daa cheej chao-gake' ni daa chox'gake' bi chsej chllonan gak yichjlall'do'eka' dii nxi nyech. San beñ'ka' nxinj yichjlall'do'eka' na' bi chajle'gake' che Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' chxinj chlēngake'. ¹⁶ Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' beñ' mal ga wdelawin, na' nakgake' beñ' bi chzoa dill', na' biga gakkzə gongake' daa nak dii wen.

2

¹ Na' li' ŋaa, bli' bsemi beŋ' daa nak dii li. ² Bzajni beŋ' golka' gakgake' beŋ' nsa' cheyin wen, beŋ' chidoŋ' gap beŋ' legake' balaan, beŋ' nyeen nyeenyi, na' soachehgake' gonlilall'gake' Crístoná, na' gakgake' beŋ', na' so sakgake' bittez dii yen ile'gake'. ³ Lekzka' nool golka' chiyal' gall illeb'gake' Chioza', na' bi gakkake' beŋ' wíchtj dill', ni bi we'gake' latj gonza yel' weezona' legake' gan, san chiyal' gongake' wen kwenche ile'i beŋ' ka chiyal' gongake'. ⁴ Na' wli' wsedgake' nool xkwid'ka' gaki beŋ' che'ka' na' gaki xiŋe'ka', ⁵ na' gakgake' beŋ' nyeen nyeenyi, beŋ' bi nda' nchen dii mal, na' gap wwia loo yoo lillgake', gakgake' beŋ' chiyesh'lallii, na' wlexj yichjgake' lao beŋ' che'ka' kwenche kono inē zban che xtil' Chioza' ni chegake'.

⁶ Na' lekzka' goll bi' wew'ka' gakkakb' bi' nyeen nyeenyi. ⁷ Li'yen'an chiyal' wli'o chono' wen lao yog'loŋte daa chono'. Na' wsa' cho' bash bal kat' wli' wsedilo' beŋ' na' benan do yichj do lalloo, ⁸ na' wsako' wi'o dill' kwenche bibi de ina beŋ' cheyin. Na' yido'i beŋ'ka' chakzbani cho' daa bibi de gon inagake' checho.

⁹ Bzajni beŋ'ka' yoo xanin wlexj yichjgake' lao xane'ka', na' gongake' ka yiyoolall'gake', na' bi yillizgake' legake' dill'. ¹⁰ Na' bibi si' kwangake' che xane'ka', san soa do lall'gake' kwenche wli'gake' lao yog'loŋ daa chongake' nan le wen nak cho'a xtil' Chioza', beena' bisla cho' kwenche bi kwiai'cho.

¹¹ Chioza' ba bliile' yog'loŋ beŋ' yel' goklen che'na' kwenche yilagake' na' bi kwiai'gake'. ¹² Na' yel' goklenna' daa bene' checho chli' chsedin cho' kwej yichjcho daa bi nak wen na' diika' chzelall' beli chenna', na' soacho yell-lioni nyeen nyeenyicho, goncho ka chiyoolall' Chioza', na' gall illeb'chone', ¹³ shlak noncho lez illin lla choo lla xenna' yila' Jesucrístoná, beena' nak beŋ' choo beŋ' xen, na' nake' Chios checho na' bisle' cho. ¹⁴ Len' bzani yel' mban che'na' ni checho kwenche bisell bilēe cho' lao yog'loŋ dii mala', na' bixis biyibe' cho' kwenche gakcho lall' nee na' selall'cho goncho daa nak wen.

¹⁵ Dgan chiyal' wli' wsedilo' beŋ', na' wtipo' lall'gake' gongake' ka cheeni Chioza', na' wsheshleno' beŋ'ka' bi chon wen, na' benan lega beŋ' nzoa Chioza'. Na' kono chiyal' gonzi li' nakzi.

3

¹ Bisa'lall'gake' wlexj yichjgake' lao beŋ'ka' chnabia', na' gakgake' beŋ' wizoa dill', na' segake' wneyi gongake' daa nak wen. ² Bibi gon inazgake' che beŋ', san soalengake' beŋ' mbalaz na' gongakile' legake' wen, na' gakkake' beŋ' gaxjlall' lao yog'loŋ beŋ'.

³ Lekzka' cho', kana' gokcho beŋ' bi nteyi na' beŋ' bi bzoa dill', na' gosh' wlall'cho lao dii mala', na' btakw bchej biya diika' bibayi beli chen chechona' cho', na' gokcho beŋ' xe'. Gokzbani beŋ' cho' na' gokzbani ljwellcho ganga. ⁴ Na' Chioza', beena' bisla cho' kwenche bi kwiai'cho, bliile' cho' yel' beŋ' wen che'na' len yel' chaki che'na'. ⁵ Aga inacho daa bencho dii wannan' bisle' cho', san daa biyesh'lall'lile' cho'n. Na' bixis biyibe' yichjlall' do'chona' kwenche biyakcho beŋ' wen, na' Espíritu Santo che'na' bikobe' yel' mban chechona'. ⁶ Na' daa wit Jesucrístoná, beena' bisla cho', Chioza' bzoe' Espíritu Santo che'na' loo yichjlall' do'choki. ⁷ Na'

daa biyesh'lallile' cho', biyone' cho' ben' li ben' shao' kwenche goncho lez ikaacho yel' mbanna' nak zejli kani.

⁸ Dillii nakan dii w_xenlall'cho. Na' cheenid' gono' to dii byen wli' wsedilo'n ben'ka' chajle' che Chioza' kwenche segake' wneyi gongake' wen. Diikin nakgakan wen na' gakenan yog' ben'. ⁹ Bi g_{ak}guedlenzo' ben' ni che cho'a dill'ka' chyljlall'gake', ni daa nazgake' ben dii xoxztoe'ka' daa bi chiyoll chido, ni bi g_{ak}lebilol' ben'ka' chakguedz ni che leya' daa bzej dii Moiséza'. La' bi chaklengakan ben' na' bibi zak'gakan.

¹⁰ Na' shi no chgoo ben'ka' dill' kwenche g_{ak}gake' chopla, chiyal' we'leno'ne' dill' bich gone' ka', na' shi ba gollo'ne' ka' to chop shii na' bi chzenagkze', bkwaschokle' ka'la. ¹¹ La' nezicho to kwinzen' chlliayi' kwine' daa nxinj yichjlall'do'ena' na' chontie' dii mala'.

¹² Kat' wselaa Artémaza' wa Tíquiconá' gana' zo', ben to dii byen yidwio' nad' yell Nicópoliza', la' na' ba nchoglallaa lljsoa' shlak te beo'ka' chbe' dii zaga'. ¹³ Goklengach ga zeelo gako' Zénaza', beena' nsed ley che Rómána', na'ch Apóloza'. Be'gake' daa chyallj chchingakile' kwenche koochgake' nez na' bibi iyalljgakile'. ¹⁴ Na' lekzka' ben'ka' nakcho toz chiyal' sho'logake' gongake' daa nak wen na' g_{ak}lengake' ben' shi bi chyallj chchingakile' kwenche ka' wgongake' llin daa ba nsedgake'.

¹⁵ Yog'lol' ben'ki zoalen nad' ni chwapgake' li' chiox. Bwapgach chiox yog'lol' ben'ka' lle' na', ben'ka' chakgakile' cho' daa nakcho txen chonlilall'cho Crístona'. Chioza' g_{ak}lenshgue' yog'lol'-le. Ka' gakan.

Kart daa bzej Páblona' na' bseleen lao Filemónna'

¹ Nad' Pablo, dia' lillyani daa chyixji'a xtill' Cristo Jesúsza', chzej' li' Filemón. Na' len ben' bish'cho Timotewi chwapnto' li' chiox, daa le chakinto' li', na' daa nakcho txen choncho xshin Chioza'. ² Na' lekzka' chwapnto' chiox ben' zanchó Ápiana', na' ben' bish'cho Arquípona', beena' nakcho txen chdil-lencho dii mala' daa choncho xshin Chioza', na' ben'ka' chdop chllag lillo'na' choe'la'ole Crístona'. ³ Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi kat' choe'lwil' Chioza' chjadinid' li' na' cho'ane' yel' choxken ni cho', ⁵ la' ba neqid' ka nonlilalloo Xancho Jesucrístona' na' chakilo' yog' ben'ka' nak lall' na' Chioza'. ⁶ Chnabid' Chioza' gaklene' li' gono' ka dii le we'leno' ben' cho'a xtilleena' daa ba wyajli'o kwenche shajni'chilo' kwasloj ka nak dii wenka' naki checho daa nakcho Crístona' txen. ⁷ Ben' bish', chiba chizakid' daa chakilo' bish' ljwello'ka', na' dii xen chtipan lallaa, la' neqid' chtipo' lall' ben'ka' nak lall' na' Chioza'.

⁸ Na' daan, la'kzi nap' yel' wñabia'na' ben' Crístona', na' wak gon' byen inia' li' daa chiya' gono', shel'ka', ⁹ chakid' wenlan gat'yoid' li' gono' daa cheenid' daa chaki ljwellcho. Nad' Pablo ba nak' ben' gol na' dia' lillyani daa chyixji'a xtill' Cristo Jesúsza', ¹⁰ chnabid' li' to goklen che Onésimoni, beeni nak ka xiin' daa be'lenee xtill' Crístona' shlak dia' lillyani.

¹¹ Kana' wzoalene' li' bi bene' ka dii le gone' xshino'na', san naa wak gaklene' li' ka chaklene' nad'. ¹² Na' chise'laane' lawo'na', la'kzi le chakyeshii lall'dawaani yizee daa chakchgaidee. Na' li' naa, bilebshe', kon gakilo' nad'kzan' chilebo'. ¹³ Goklallaa wkwaana'ne' gaklene' nad' lo xlatjo' shlak dia' lillyani ni che dill' wen dill' kob che Crístona'. ¹⁴ Per bi goklallaa wkwaana'ne' shi bi wchebgaxjo', kwenche yel' goklen daa gono' cha' bi gonyaadiazo'n, san gono'n do yichj do lalloo. ¹⁵ Shi bizee lillo'na' shloll kwenche naa gake' lall' no' toshiizi. ¹⁶ Na' bich gake' to ben' ndoo lla yel chone' xshin ben' san gake' ben' bishoo, ben' gakilo'. Nad' le chakidee, na' li' chiya' gakchilo'ne' aga ka bish' ljwellzo', san ka dowalj ben' bishoo daa nakle toz nonlilall'le Xancho Jesucrístona'.

¹⁷ Na' shi nako' nad' txen lo xshin Crístona', bilebshe', kon gakilo' nad'kzan' chlebo'. ¹⁸ Na' shi bi bene' cho' wa shi bi chbaguee cho', na' wchixjo'n nad'. ¹⁹ Kwin nad', Pablo chzej' dga, na' nia' li': Nad' chixjaan. Na' bi nia' li' lekzka' chbagoo cha' daa ba napo' yel' mban zejli kani. ²⁰ Ben' bish', chnabid' li' yel' goklenni daa chakicho Xancho Jesucrístona'. Ben ka soa' mbalaz daa nakcho toz nxenilall'cho Crístona'.

²¹ Chzej' li' daa neqid' nako' ben' wizoa dill', na' neqid' axt dii xenchlo gono' aga ka daa chnabid' li'. ²² Na' lekzka' nia' li', beshao'sha gana' soa', la' daa choe'lwil'le Chioza' ni cha', non' lez yichej' ni na' wi'e latj yidwia' le'.

²³ Chwap Epáfrazi li' chiox, beeni nak' txen dento' lillyani ni che xtill' Cristo Jesúsza'. ²⁴ Na' lekzka' Márconi, Aristárconi, Démazi, na'ch Lúcazi, ben'ki chaklen nad' lo xshin Chioza', chwapgake' li' chiox.

²⁵ Xancho Jesucrístona' soalenshgue' le' na' gaklene' le'.

Kart daa bsel' to ben' lao ben' hebreoka', ben'ka' nonlilall' Jesucristona'

¹ Kani'yi zan shii Chioza' bchine' dii ben'ka' wdixjee daa golle' legake' na' aga toz ka bchine' to toe' kwenche be'lene' dii xozxto'choka' dill'. ² Na' naa ba zoa te che yell-lioni, Chioza' bselee Xiine'na' be'lene' cho' cho'a xtilleena', na' len' nzo'e' gak lall' nee yog'te dii de, na' lekzen' bene' yabana' len yell-lioni, diika' blia Chioza' bia' gak.

³ Len' chli'e ka ben' choo ben' xen inleeb nak Chioza', na' chli'e ka nakyen' Xe' Chioza'. Na' len' chone' kwenche yabana' len yell-lioni na' yog'lol' diika' lle' lla' lawinka' chongakan kon ka blie' bia' gongakan daa nape' yel' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyep'e' yabana' gana' chi'e shlaa de shli che Xe' Chioza', beena' nak ben' choo ben' xen, na' chnabia'lene'ne'.

⁴ Na' daa bene' dga, bli'e nake' ben' zak'chi aga ka anjlka', na' lekzka' daa goll Chioza'ne' "Xiin'", nakbia' nake' ben' zak'chi aga ka legake'. ⁵ La' Chioza' biga golle' ni to anjlka' ka dga golle' Xiine'na':

Li' nako' Xiin',

na' naa daa solo inabi'o inezi ben' nadaan nak' Xo'.

Na' ni to anjlka' bi' golle':

Nad' gak' Xo',

na' li' gako' Xiin'.

⁶ Na' lekzka' ka bsel' Chioza' Xiine'na', beena' nak tlish' tyaj, lo yell-lioni, wne':

We'la'oshga yog'lol' anjl cha'ka' le'.

⁷ Na' Cho'a Xtill' Chioza' cho'en dill' che anjlka', nan:

Chone' anjl che'ka' ben'ka' chon xshine'na',

ka be' na' ka bel' yi'.

⁸ San che Xiin' Chioza' nan:

Li' nako' Chios na' inabi'o zejli kani.

Na' yel' wñabia' cho'na' nakan dii zej shli.

⁹ Chibailo' yel' li' yel' shawaa na' chwiilo' daa nak mal.

Daan Chioza', beena' nak Chios cho', ba bzoe' li' kwenche inabi'o,

na' ba bene' ka soacho' mbalaztech aga ka ben'ka' nako' txen.

¹⁰ Na' lekzka' nan:

Lin' nako' Chios, na' lin' bxe bsilo' yell-lioni ka wzolon,

na' li'kzan bxe bsilo' yabana'.

¹¹ Yog' diika' te chegakin, san li' zoakzo' zejli kani.

Na' yog' diika' yiyigakan ka chiyi to xalaan ben'.

¹² Na' yikwasgako'n,

na' yikobgako'n ka to ben' chikob xalaane'.

San li', toz ka zo' zejli kani;

biga lla te cho'.

¹³ Ni shlin bin' ye' Chioza' ni to anjl che'ka':

Wche' kwit' de shli ni, shlak wzoa' xni'ona' ben'ka' chakzbani li'.

¹⁴ San yog' anjlka' nakgake' wen llin che Chioza', na' chselee legake' chaklengake' cho' nakcho ben' yisle' kwenche bi kwiai'cho.

2

¹ Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi laacho lo xneze'na'. ² La' diika' bllia Chioza' bia' goncho, diika' wdixjee anjlka', gogkakan to dii zakii, na' yog' ben'ka' wdishjgake' cho'a xtilleena' na' bi bzenaggake'n wxak'zi'gake' kon ka chiyal' gak chegake'. ³ Alechlə naa aga wilacho lao yel' zak'zi'na' shi gonicho nakzi daa nak to dii zakii nllēb daa ba ben Chioza' checho kwenche yisle' cho' na' bi kwiayi'cho? Zigaate Xancho Jesúza' wdixji'e daa yisle' cho', na'tech ben'ka' bzenag che' bizchopgake' dillaa bi'e. ⁴ Na' lekzka' Chioza' bli'e nan nakan dii li daa bene' ka ben ben'ka' dii zan yel' wak na' dii chon ka chibanicho, na' bselee Espíritu Santo che'na' bene' wde wdeli dii gak gon to tocho kon ka chaklall' Chioza'.

⁵ Aga bllia Chioza' bia' inabia' anjlka' lo yell-lío koba' daa ba ngwee xnezin gone', dga cho'a dill' cheyin naa. ⁶ San nakan ka wna to ben' bzej Cho'a Xtill' Chioza' kani'yi daa na:

¿Nora naknto', neto' ben' yell-lío, chi' yichjzo' neto',
na' zezo' wneyi che neto' naknto' xiin benech?

⁷ Zi lat'zə ki beno' neto' ka anjl cho'ka',
na' nono' neto' to balaan xen wal.

Na' bzo' neto' inabia'nto' lao yog'te diika' beno'.

⁸ Na' beno' yog'lolten lall' na'nto'.

Na' daa bene' lall' na' ben' yell-lioni yog'lol dii de, zejín aga bi de dii bi gak lall' na'cho, la'kzi naa bin' ile'icho gak yog'lol dii de lall' na'cho.

⁹ Per nezicho Jesúza' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke' benech kwenche wxak'zi'e na' wite' ni checho. La' daa nak Chioza' ben' wenan, bzanile'ne' ble'ile' yel' wita' lo laz yog'lol ben'.

¹⁰ Dii li, Chioza', beena' bxe bsil yog'lolte dii de na' nakgakan che', cheenile' ben' be ben' zil gagkake' xiine' kwenche yichi'e legake' gana' de balaan xen che'na'. Daan, benan byen bzanile' Jesúza' wxak'zi'e na' wite' kwenche bisle' cho'. Na' ka', biyoll bido bene' yog'lol daa nllia Chioza' bia' gone'. ¹¹ Jesúza', beena' ba bixis biyibe' cho', na' cho' ba bixi biyechcho, toz Xachon nak. Daan, bi chiyiyi Jesucristona' ine' nakcho bish' ljjwelle'.

¹² Na' chi'e Chioza':

Wi'a dill' cho' lao bish' ljjwell'ka',

na' gol inia' li' ladj ben'ka' chdop chllag choe'la'ogake' li'.

¹³ Na' wizne':

Nad' wxenilallaa Chioza'.

Na' sto shii chi'e:

Ni zoalen' ben'ki nak xiin Chioza', ben'ki bene' lall' na'.

¹⁴ Na' daa nak xiine'ka' ben' de beli chen, lekzka' Jesúza' golje' goke' ben' de beli chen kwenche wite' ni checho. Na' ka wite', bsol bnite' yel' wñabia' che dii xiwaa daa gok lall' na'yin wlliyai'n ben'. ¹⁵ Na' bisle' cho' ben' yell-lío, cho' nakcho ka ben' ndoo lao yel' wita' shlak mbancho daa chllēbcho guetcho. ¹⁶ La' dii li, aga bid Jesúza' kwenche gaklene' anjlkan', san kwenche gaklene' xiin dia che dii Abrahaman'. ¹⁷ Daan, benan byen goke' ben' de beli chen doxen ka nakcho, cho' bish' ljjwelle', kwenche yiyesh'lallile' cho' na' soe' gone' ka ben Chioza' lo nee gone' daa nake' bxo'z choo bxo'z xen checho. Na' bzani kwine' wite' kwenche bizi'xen Chioza' saaxya chechoka'. ¹⁸ Na' daa bizo bizakile' btile' daa nan

kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

3

¹ Na' naa, le' ben' bish' na' le' ben' zan', le' ba nxi nyech yichjlall'do'lena' na' ba gox wᵛab Chioza' le' kwenḅche nakle lall' nee, li se wᵛeyi ka nak daa ben Cristo Jesúsza', beena' choe'cho dill' nonḷilall'chone'. Nake' beena' bsel' Chioza' na' naktie' bᵛoz choo bᵛoz xen ḅchecho. ² Len' bene' yog'lol' daa goll Chioza'ne', kon ka ben dii Moiséza' ladj ben'ka' nak yell ḅche Chioza'. ³ Na' chidoḷ'ch Jesúsza' balaan xench aga ka dii Moiséza', ka chak ḅche to ben' chone' to yoo chooche' balaan xench aga ka yoon'a' daa bene'. ⁴ Yog'z yoo zoa ben' bene'n, per Chioza' nake' beena' ben yog'lol'te dii de. ⁵ Dii Moiséza', beena' gok wen llin ḅche Chioza', bene' yog'lol' diika' golle' gone' ladj ben'ka' nak yell ḅche Chioza'. Na' diika' bene' chaklanan kwenḅche shajniicho diika' zi' we' Chioza' dill' ḅheyin. ⁶ Per Críston'a', beena' nak Xiᵛ Chioza', lekzka' bene' yog'lol' diika' golle'ne', na' ngoo lall' nee ben'ka' nak lall' na' Chioza'. Na' chon', nakcho lall' na' Chioza' shi soaḅheḅcho gonḷilall'chone' na' yibaicho daa noncho lez ljazoalenchone'.

⁷ Daan, Espíritu Sánton'a' wne':

Shi chenile daa na Chioza' naanlla,

⁸ bi gake ben' lall'do' wal ka gok dii ᵛozxto'leka' na' bshaagake' Chioza' daa bi wyajle'gake' gone' ka bḅebe' kana' wdagake' gana' bibi chashj chḷeb.

⁹ Na' wna Chioza': Kana' dii ᵛozxto'leka' gokgake' ben' widenag daa bi wyajlegake' gon' daa bḅeb' gon' ḅhegake', la'kzi choa yiz ble'gakile' diika' ben' ḅhegake'.

¹⁰ Daan, bllaa legake',

na' wnia': "Toshiizi chongake' kon ka nazan ḅhegake', na' bi chzenaggake' cha'."

¹¹ Daan, lo yel' chllaa cha'na' bḅeb', wnia':

Nezgan' wi'a latj gaki ḅhegake' yel' wixi'lall' cha'na'.

¹² Le' ben' bish' na' le' ben' zan', li wsak' kwenḅche ni tole bi xᵛinj yichjlall'do'lena' na' gonan ka bich shajle'le na' yilaala'ole Chios yaa Chios banna'. ¹³ San li wtip lall' ljwell-le yog' lla shlak naa ni de latj wzenagle ḅche Chioza', kwenḅche bi siye' dii mala' le' na' yiyonan le' lall'do' wal. ¹⁴ Nakkzcho Críston'a' txen shi shnon mbancho soaḅheḅcho wxenilall'chone' kon ka wzoacho kana' zi' bᵛenilall'chone'.

¹⁵ Kon ka na Cho'a Xtil' Chioza':

Shi chenile daa na Chioza' naanlla,

bi gake lall'do' wal ka gok dii ᵛozxto'leka' kana' wdagake' gana' bibi chashj chḷeb, kana' biyeḅj bibiitezgake' Chioza'.

¹⁶ ¿Nora ben'ka' beni daa goll Chioza' na' biyeḅj bibiitezgake'ne', lla? Yog' ben'ka' bibej dii Moiséza' Egíptonan' ben ka'. ¹⁷ Na' ¿nora ben'ka' bllaa Chioza' choa yiz, lla? Ben'ka' bᵛinj bḷenan, ben'ka' wit gana' bibi chashj chḷeb. ¹⁸ Na' ¿nora ben'ka' wna Chioza' ḅhegake' bat ljazi'lall'gake' lo yell-liona' bḅebe' wi'e legake', lla? Legaken' ben'ka' gok ben' widenag lawe'na'. ¹⁹ Na' nezicho bi gok yillingake' gana' yizi'lall'gake' daa bi wyajle'gake' ḅhe'.

4

¹ Daan, shlak ni de latj idolicho yel' wixi'lallaa daa ba bḅeb' Chioza' gone' cho', chiyal' goncho byen kwenḅche idol' illonichon na' ni tocho bi

igaanzcho ka'z. ²La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin. ³San cho' ba wyajle'cho cheyin ba naktan gon Chioza' cho' yel' wixi'lallaa daa bllonile' ben'ka' kana' wne':

Daa bllaa legake' na' wnia':

nezganz wi'a latj gaki chegake' yel' wixi'lall' cha'na'.

Per ka nak Chioza', wzoloe' chizi'lallee ka biyoll bxe bsile' yell-lioni. ⁴La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lol' daa bene', na' bizi'lallee.

⁵Na' lekzka' cho'en dill' kana' wne':

Nezganz wi'a latj gaki chegake' yel' wixi'lall' cha'na'.

⁶Per ni de latj gat' to yel' wixi'lall' che zi bal ben' cheeni, la' ben'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'. ⁷Daan, bllia Chioza' bia' che sto lla, na' wde zan yiz wnie' dii Davina' kwenche wi'e dill' che llani naa, na' wne':

Shi chenile daa na Chioza' naanlla,
bi gakte lall'do' wal.

⁸Shel' dii Josu'ena' bene' ka yizi'lall' dii xozxto'choka' ka bcheb Chioza' gone' chegake', aga bllia Chioza' bia' sto lla yoblə gat' yel' wixi'lall', shel'ka'. ⁹Daan, nezicho ni de latj idol' ben'ka' nak lall' na' Chioza' yel' wixi'lall' che'na'. ¹⁰La' beena' ba bdoji yel' wixi'lallaa daa bcheb Chioza', ba chizi'lallee ka bizi'lall' Chioza' kana' biyoll bxe bsile' yog'lol' dii de.

¹¹Na' cho' chiyal' goncho byen idolicho yel' wixi'lallaa daa bcheb Chioza' kwenche ni tocho bi gakcho ben' widenag ka gok ben'ka' kani'yi.

¹²Na' cho'a xtil' Chioza' nsa'n yel' mban na' yel' wak, na' nakan ka to dii chhogch aga ka to spad dii nlatit chop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal. ¹³Ni to diika' bxe bsil Chioza' bi ngashaan lawe'na'. Yog'lolte nez nle'i beena' yizi'e cho' kwent.

¹⁴Jesús, Xiin Chioza', beena' billin yabana', nake' bxyz choo bxyz xen checho, na' daan chiyal' soachechcho gonlilall'cho beena' choe'cho xtiliinna'. ¹⁵Na' bxyz choo bxyz xen chechona' chiyesh'lallile' cho' daa nakcho ben' yell-lioz, la' lekzka' btile' daa nan kooyelaan le' wxinj wlene' ka chak checho, per le', wzo wzakile' bi bxinj blene'. ¹⁶Daan, do lall'cho chiyal' ibig'cho xni'a Chioza', beena' chnabia' na' nake' ben' chiyesh'lalli, kwenche yizi'xene' checho na' gaklene' cho' kat' bittezə dii chak checho.

5

¹Chioza' chbeje' yog' bxyz choo bxyz xenka' ladj ben' Israelka', na' chzoe'ne' kwenche inabe' gaklene' ben' wlall' che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxya che'ka'. ²Na' beena' nak bxyz choo bxyz xen nape' yel' chxenlall' che ben'ka' chxinj chlen daa bi ntegakile', la' lekzka' zoe' dii nxoll wxinj wlene' daa nake' ben' de beli chen. ³Daan, chonan byen chite' bayix'ka' kwenche yizi'xen Chioza' saaxya che'na', na' ka'kz chone' che ben' wlall' che'ka'.

⁴Na' kono chzoa kwiniin gake' bxyz choo bxyz xen tobialoze', san Chiozan' chbeje' beena' gak bxyz choo bxyz xen che', ka bene' che dii Aarónna'. ⁵Na' lekzka' Crístona', aga tobialozen' ben' kwine' bxyz choo

b̄xoz xen, san Chiozan' wlo'ene' balaan̄ daa bzoe'ne' nake' b̄xoz choo b̄xoz xen. Na' kwine' golle'ne':

Li' nako' Xiin',

na' naa daa solo inabi'o inezi ben' nad' nak' X̄o'.

⁶ Na' lekzka' Cho'a Xtill' Chioza' nan:

Li' nako' b̄xoz zejli kan̄i,

ka b̄xoz Melquisedeca'.

⁷ Na' Crístona', shlak wbane' yell-lioni, wchelle' na' wnie' zilljə, wñabile' Chioza', beena' nap yel' wak kwenche yisle'ne' lao yel' wita', na' daa goke' ben' wizoa dill', Chioza' bzenague' che'. ⁸ Na' la'kzi goke' Xiin' Chios, diika' bllagloe' benan ka wyañiile' daa nak yel' wizoa dill'. ⁹ Na' ka', biyoll bido goke' ka chiyal' gake' kwenche wi'e yel' mban daa bi te cheyin ben'ka' chzoa xtilleena'. ¹⁰ Na' Chioza' bzoe'ne' goke' b̄xoz choo b̄xoz xen ka gok Melquisedeca'.

¹¹ Dii zanch de dii we'len' le' dill' che diiki ba wnia', per chonan lallj wzajniida'n le' daa bi chonle ka dii le. ¹² Naa ba gok ssha nombia'le cho'a xtill' Chioza', len' ba chiyal' wli' wsedilen ben' yoblə, shel'ka'. Per le'lə ni chyalljzile no wzajni'chi le' diika' bi chontek lallj shajniile che cho'a xtill' Chioza' daa ba bsedle. Ni chonzle ka bi'do' ni chall' na' bin' gak gaob' yel' wao. ¹³ Na' nottezə ben' bin' shajniile' bi daa nak wen na' bi daa nak mal nake' ka bi'do' ni chall'. ¹⁴ San ben'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka ben' ba cheej chao yel' wao, aga ka bi'do'na' ni chall'.

6

¹ Daan, chiyal' goncho ka dii le gakchachcho lo xnez Crístona', na' bi yiyechj yibiilenzcho diika' ba nezkzicho: ka daa chiyaj chilenicho dii malka' bencho daa nsa' yel' wit, daa gonlilall'cho Chioza', ² daa chchoa ben' nis, daa chxoa na'choka' yichj ben' kat' chñabcho gaklen Chioza'ne', daa yiban ben' ladj ben' wetka', na' daa wchoglo Chioza' che ben' ga ido! to toe' zejli kan̄i. ³ Chioza' gaklene' cho' kwenche goncho ka dii le gakchacho.

⁴ Ben'ka' ba yoo beeni' che Chioza' loo yichjlall'do'eka', na' ba bnix blligake' dii wenna' cho'e ben'ka' nak lall' nee, na' zoalen Espiritu Sántona' legake', ⁵ na' ba bnix blligake' dill' wen che Chioza' na' yel' wak che'na' daa yiyoll yido ile'icho kat' illin llana', ⁶ shi yilaala'ogake' lo xnez Chioza', bich inan yiyaj yilengakile' sto shii. La' lengake' ba chongake' ka ben ben'ka' betgake' Xiin' Chioza' lee yag cruza' na' chsi'gake'ne' yel' zto' ladj lkwe' ben'. ⁷ Benecha' zaklebile' to yell-lio dii chiyaalli kat' cheejan nis yeja' daa chxop zekizezi lawinna'. Shi nakan yell-lio wen, beena' chaz chaan yitope' daa yeej gawe' lawinna', na' Chioza' gone' ka gashj ilebchan dii wenka'. ⁸ San shi chashj chlebzán no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wti'e'n.

⁹ Na' le' ben' bish'dawaa na' le' ben' zandawaa, la'kzi ba wnia' ka', nezid' kwaslöl gonle wen lega ben' ba bisla Chioza'. ¹⁰ Na' Chioza' nake' ben' li ben' shao', na' bi gal-lallee dii wenka' ba benle na' daa ba bli'le chakilene' daa goklenle ben'ka' naklenle lall' nee, kon ka ni chonle naa. ¹¹ Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez. ¹² Bi gakle ben' lia, san li gonto ka ba chon ben'ka' zoatezi zoagake' chonlilall'gake' Chioza' na' chzi'gake' banez daa bchebe' wi'e legake'.

13 Ka b̄heb Chioza' gone' wen che dii Abrahama', bzoa kwine' de taschiw gone' ka b̄hebe', la' koch no zoa ben' zak'chi ka le' wzoe' de taschiw. 14 Na' golle': "Dii li gonleey' li' na' gon' ka shesh shan xiin dia cho'ka'." 15 Na' dii Abrahama' wdape' yel' chxenlall' wleze' axt ki blin la gok ka b̄heb Chioza' gone' che'. 16 Kat'ka' ben' yell-lioki ch̄heb̄gake' to dii gongake', chzoagake' to ben' zak'chi ka legake' kwenche chakbal daa ch̄heb̄gake', na' len chonan ka shajle' ben' ch̄egake'. 17 Na' ka'kzə Chioza', goklallee in̄ezi ben'ka' ikaa dii wenna' zi' gone' nan aga wde daa b̄hebe', san dii li, gonkze' ka wne'. Daan, bzoa kwine' de taschiw. 18 Na' ka nak daa b̄hebe' gone' len daa bzoa kwine' de taschiw zejin aga wishee daa wne' gone', ni bi chziyee. Na' daa nezicho dga, chtipan lall'cho, cho' ba wbig'cho lawe'na' na' ba n̄xenilall'cho gone' ka ba b̄hebe'. 19 Ka chak che barkwa' ch̄chinan to dii chbekwan daa tozga, kan' chon daa ba noncho lez Crístona', chaklenan cho' chajle' chacho na' bi gak ch̄oplall'cho. Loo lill x̄latj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho 20 gana' ba wyoo Jesúsza' na' ch̄nabe' checho, cho' zi' yillincho na'. Na' nake' b̄xoz choo b̄xoz xen checho zejli kan̄i ka b̄xoz Melquisedeca'.

7

1 Melquisedeca' goke' ben' w̄n̄abia' che yella' le Salem na' goke' b̄xoz che Chioza', beena' liizelozi nak ben' choo ben' xen. Na' ka ziza' dii Abrahama' lo wdila' gana' bene' gan ben' w̄n̄abia'ka', jatil Melquisedeca' le' na' w̄n̄abe' ka gak wen che'. 2 Na' dii Abrahama' bene' shi kwen yog' diika' bikee che ben' w̄n̄abia'ka' lo wdila' na' wleje' tkwenan* bi'en Melquisedeca'. Na' Melquisedec zejin Ben' w̄n̄abia' ben' chon daa nak sh̄lich̄a. Na' lekzka' nake' ben' w̄n̄abia' che yell Salema', na' zejin ben' w̄n̄abia', beena' chon ka soalen ljwellin mbalaz. 3 Kono nezi no gok x̄ax̄nee ni no gok dii x̄ozxto'e, ni kono nezi bat golje' na' bat wite'. Daan nake' b̄xoz zejli kan̄i ka nak Xiin Chioza'.

4 Li wwia ka ben' zakii nleb gok Melquisedeca', la' kw̄in dii x̄ozxto'cho Abrahama' bi'ene' tkwen che de shi kwen che yog' diika' bikee che ben'ka' bene' gan lo wdila'. 5 Ley che dii Moiséza' nan ben'ka' nak xiin dia che dii Levína', ben'ka' nak b̄xoz, chiyal' ikaagake' tkwen che de shi kwen che yog' daa chon to to ben' wlall' che'ka' gan, ben'ka' nak bish' ljwellgake', la'kzi lengake' nakgake' xiin dia che dii Abrahama'. 6 Per Melquisedeca', la'kzi bi goke' dia che dii Levína', dii Abrahama' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' w̄n̄abe' gak wen che dii Abrahama', beena' b̄heb̄ Chioza' shesh shan xiin dia che'na' na' gaki che' yell-liona' gana' wzoe'. 7 Na' nezicho kwas̄l̄ol beena' ch̄n̄abe' ka gak wen che ben', nakche' ben' zak'chi aga ka beena' ch̄n̄ab gak wen che'. 8 Na' ka nak b̄xozka' chkaa tkwen che de shi kwen che yog' diika' chat' chbe' che ben' wlall' che'ka', nakgake' ben' chet. San che b̄xoz Melquisedeca', Cho'a Xtil' Chioza' cho'en dill' mbane' toshiizi. 9 Na' b̄xozka', ben'ka' chkaagake' tkwen che de shi kwen che yog' diika' chon ben' wlall' che'ka' gan, nakgake' xiin dia che dii Levína', na' wak in̄acho lenkzgaken' be'gake' Melquisedeca' daa be' dii Abrahama' le', 10 la' kana' jatil Melquisedeca' dii Abrahama', ba nakkzan galj dii Levína' na' gake' xiin dia che dii Abrahama'.

* 7:2 Bene' shi kwen yog' diika'...na' wleje' tkwenan: Literalmente la décima parte.

¹¹ Chioza' wleje' dii Aarónna', beena' nak xiin dia che dii Levína', gake' b̄xoz kana' bi'e dii xozxto'choka' ley che'na'. Per b̄xozka' wzoa lo dia che dii Aarónna' bi gok yiyongake' cho' ben' li ben' shao' lao Chioza'. Daan, benan byen soa sto b̄xoz yobl̄a, beena' gak ka b̄xoz Melquisedeca'. ¹² Na' kwenche to ben' bi nak xiin dia che dii Levína' gake' b̄xoz, lekzka' chonan byen yilla' leya'. ¹³ La' b̄xoz chechona', beena' choe' Cho'a Xtill' Chioza' xtillee, aga golje' lo dia che dii Levína', san golje' lo dia che dii Judána', beena' konon b̄xoz ichej lo dia che'na'. ¹⁴ Nezteicho kwas̄ol̄o Xancho Jesúza' golje' lo dia che dii Judána', na' Moiséza' bi bzetje' dia che Judána' ka bi'e dill' no xiin dia cheyin gak b̄xoz.

¹⁵ Wyajni'chicho dga ba wnia' shi ichej to b̄xoz kob, beena' gak ka b̄xoz Melquisedeca', ¹⁶ to ben' bi nake' b̄xoz daa goljze' lo dia che dii Levína' kon ka wna leya', san nake' b̄xoz daa bibi de dii gak wlliyai'n yel' mban che'na'. ¹⁷ La' ki wna Chioza' che':

Li' nako' b̄xoz zejli kañi,
ka b̄xoz Melquisedeca'.

¹⁸ Na' daa golle' ka', zejín ba wde che leya' daa bi gok gaklenan ben'. ¹⁹ La' leya' bi gok yiyonan cho' ben' li ben' shao' lao Chioza', na' bich chiyal' goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

²⁰ Na' Chioza' bzoa kwine' de taschiw ka bchebe' gone' ka'. Ka wleje' ben'ka' nak xiin dia che dii Levína' gaggake' b̄xoz bi bzoa kwine' de taschiw gaggake' b̄xoz toshiizi. ²¹ Per ka nak Xancho Jesúza', Chioza' bzoa kwine' de taschiw ka bchebe' wzoe'ne' gake' b̄xoz, la' cho'a xtilleena' cho'en dill' chi'ene':

Nad' Chios ba bzoa' kwín' de taschiw na' aga wiyajid' cheyi dga nia':

“Li' nako' b̄xoz zejli kañi,
ka b̄xoz Melquisedeca'.”

²² Na' daa bzoa' Jesúza' nake' b̄xoz zejli kañi, nxenlall'cho gon Chioza' checho sto dii wentech aga ka daa bchebe' gone' dii nech. ²³ Ben' zan ba gok b̄xoz choo b̄xoz xen, la' daa chetgake' benan byen yizoa lwaagake'.

²⁴ San ka nak Jesúza', daa mbane' zejli kañi, nake' b̄xoz choo b̄xoz xen toshiizi. ²⁵ Daan, wak yisle' cho' toshiizi, la' daa nonlilall'chone' wak ibig'cho lao Chioza', la' len' zoe' toshiizi chñabe' gaklen Chioza' cho'.

²⁶ Na' Jesúza', leyen'en' beena' chyalljicho gake' b̄xoz choo b̄xoz xen checho. Nake' ben' nxi nyech, ben' bibi saaxya bene', ben' bi nda' nchene' ni to dii mal, ben' bi wlall' lao dii mala' chon ben' saaxyaka', na' biyepé' jazoe' yabana' gana' chgoogake'ne' balaan. ²⁷ Na' bi chone' ka ben b̄xoz choo b̄xoz xenka', ben'ka' benan byen betgake' bayix'ka' yog' lla na' bzeygake'b lao Chioza' kwenche zigaate legake' chiyakxen saaxya daa chongake', na' lekzka' betgake' bayix'ka' kwenche chiyakxen saaxya che ben' wlall' che'ka'. San Jesúza', shlin shlaxjzan bzani kwine' wite' ni che saaxya chechoka', na' daa bene' shlinz chonan llin zejli kañi. ²⁸ Ley che dii Moiséza' bzoan ben' goke' b̄xoz choo b̄xoz xen la'kzi bi gogake' dowalj ben' wen. Per ka ba gok ssha chon b̄xozka' llin, Chioza' wne' wzoe' Xiine'na', beena' toshiizi nak dowalj ben' wen, gake' b̄xoz choo b̄xoz xen, na' bzoa kwine' de taschiw gak ka wne'.

8

¹ Dga nak dii llialach lao diiki cho'a dill' cheyin: b̄xoz choo b̄xoz xen chechona' zoe' zejli kañi na' ba chi'e shlaa de shli che Chioza' yabana'

gana' chnabi'e. ² Na' nake' b̄xoz yabana' gana' non Xancho Chioza' dowalj lill xlatje', na' aga nakan dii ben ben' yell-lioni. ³ Yog' b̄xoz choo b̄xoz xenka' chzoa Chioza' legake' kwenche chjwa'gake' lawe'na' yog' daa chzani ben' wi'ene', na' chitgake' bayix'ka' lawe'na'. Daan, lekzka' benan byen b̄xoz choo b̄xoz xen chechona' bzanile' daa bi'e Chioza'. ⁴ Shel' zoe' yell-lioni aga nake' b̄xoz, shel'ka', la' zoakz b̄xozka' choe'gake' Chioza' diika' nllia leya' bia' we'gake'. ⁵ Diika' chon b̄xozka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajniile'ne', chi'ene': "Ben byen gonle yog'te diika' kon ka ba bzajniid' li' lo yaana'." ⁶ Daa chon b̄xoz choo b̄xoz xen chechona' naa zak'chin aga ka daa chon b̄xozka' sto. Na' daa ba bizoe' cho' wen kon Chioza', Chioza' ba bchebe' gone' to dii zak'chi checho aga ka daa bchebe' lao dii xozxto'choka'.

⁷ Shel' daa bcheb Chioza' dii nech gone' che dii xozxto'choka' benan ka yiyakgake' ben' li ben' shao', bi benan byen bchebe' gone' sto dii yoblə, shel'ka'. ⁸ Per Chioza' ble'ile' bi ben ben'ka' ka bllie' bia', na' bene' ka wna dii beena' wdixjee xtilleena':

Xancho Chioza' ne': Wllin lla
kat' wcheb' sto dii kob dii gaklenan le',
le' zoale Israela' na' le' zoale Judána'.

⁹ Na' aga gakan ka daa bcheb' gon' che dii xozxto'leka'
llana' bibej' legake' Egíptona'.

La' legake' bi bengake' daa bchebgake' gongake',
na' daan wchoonlall'gakee, na Xancho Chioza'.

¹⁰ Na' naa de sto dii wcheb' gon' kat' illin llana' kwenche gaklen' ben'
Israelka'.

Gon' ka kwe' yichjgake' diika' ba bllia' bia' gongake',
na' gon' ka kooshao'gake'n loo yichjlall'do'eka'.
Na' nad' gak' Chios chegake',
na' legake' gakgake' yell cha'.

¹¹ Na' bich gonan byen no wli' wsedi bish' ljwellin,
ni bich gonan byen no wli' wsedi ben' dialla cheyin, ye'ze'ne':
"Chiyal' gombi'o Xancho Chioza'",

la' yog'z ben' gombi'e nad', ka bi'do' ka ben' gol.

¹² "Nad' yizi'xen' xtoleeka',
na' bich lljadinid' saaxya che'ka'."

¹³ Na' daa wna Chioza' gone' to dii kob dii gaklenan legake', zejin daa bchebe' gone' kani'yi ba nakan dii wde cheyin. Na' daa ba nakan dii gol dii ba wde cheyin ba zoa yinitlon.

9

¹ Kana' bcheb Chioza' dii nech gaklene' ben' Israelka', bllie' bia' ka chiyal' we'la'ogake'ne', na' lekzka' bllie' bia' gongake' to lill xlatje' ga we'la'ogake'ne' lo yell-lioni. ² Na' ki nak lill xlatj Chioza' daa bengake': bengake' lo'inna' choplə, na' latj necha' bsi'gake'n Latj che Chios, na' bzoagake' to candeler na' to mes gana' bkwa'gake' yetxtilka' lao Chioza'. ³ Na' lechaa daa bzegake' loo lill xlatj Chioza' kwenche bengake'n choplə bkwashaan latja' sto daa bsi'gake' Latj Ga Zoa Chios, ⁴ gana' bzoagake' to diido' nongake' ka mes de or gana' bzeygake' yala', na' sto yiin dii nwazjgake' or ka loolə ka koll'lin, na' bsi'gake'n yiin daa yoo daa chonli daa bcheb Chioza'. Na' lo'inna' wyooshao' to xwag de or daa yoo yel'

wawa' be' Chioza' legake' daa le maná, na' lekzka' loo yiina' wyoo bar che dii Aarónna' daa bigaa, na' yaj taaka' gana' nyoj daa nllia Chioza' bia' gongake'. ⁵ Na' koll' yiina' bzoagake' lwaa lsak' anjlka' le kerubin kwenche chli'n zoa Chioza' na', beena' yoo balaan xen. Na' xil anjlka' zen chxolgakan kolliinna' gana' chxit' bxoza' xchen bayix'ka' kwenche chizi'xen Chioza' saaxyá che'ka'. Per aga diikiyen'an cheenid' wsees'chid' le' naa.

⁶ Na' ka ba nzoagake' yog' diika', na'ch bxoza' wzolo choogake' lle' zil loo latj necha' kwenche chongake' ka bllia Chioza' bia' gongake' kat' we'la'ogake'ne'. ⁷ Per latj wchopina' tohga bxo'z choo bxo'z xenna' de lsens sho'e shlin non twiz. Na' kat' cho'e, chonan byen lljwee xchen bayix'ka' daa wxitee loo latja' kwenche yizi'xen Chioza' xtoleena' na' xtol' ben' wlall che'ka' daa bi chakbe'gakile' chongake'. ⁸ Na' Espíritu Sántona' chzajniile' cho' daa chon bxoza' ka' zejín shlak ni chon lill xlatj Chioza' llin daa bengake' yell-lioni, biñ' gat' lsens sho'cho Latja' Gana' Zoa Chioza'. ⁹ Na' yog' diiki chzajniin cho' zoacho naa nan la'kzi be'gake' diika' bzangakile' lao Chioza' na' betgake' bayix'ka' na' bzeygake'b lawe'na' kwenche be'la'ogake'ne', diika' bengake' bi bizogakin yixis yiyibgakan yichjlall'do'eka' kwenche gongake' lez ba bizi'xen Chioza' xtoleeka' toshi-izi. ¹⁰ Diiki zeelo bengakan llin che to beli chen che'ka'chga: ka che no dii bi gag yeej gaogake' wa ka che daa chiya' gongake' kwenche yixis yiyib kwingake'. Na' yog' diiki bengake' benan llin shlak biñ' gon llin dii koba' bcheb Chioza' gone'.

¹¹ Per naa ba bid Crístona', beena' nak bxo'z choo bxo'z xen checho, na' nsee dii wenka' chbezcho gak. Na' lill xlatj Chioza' gana' billin Crístona' nakan dii zak'chi na' dowalj daa aga no ben' yell-lío bxe bsile'n, la' bi nakan che yell-lioni. ¹² Na' Crístona', aga bexee no xchen shib wa no xchen goon ka wyo'e Latja' gana' zoa Chioza', san daa wlalj xchene'nan' wyo'e shlin shla'xjz, na' che toshiizin wdixje' xtol'choka'. ¹³ Bxoza' bchine' xchen goon na' xchen shib, na' de che bakdo'na' chzeygake', na' bxiteen ben'ka' bi nxi nyech lao Chioza', la' kan' na leya' chiya' gak kwenche bixi biyech kwerp che'ka' lao Chioza'. ¹⁴ Na' shi kan' nakan, zalechlə xchen Crístona', beena' ni to dii mal bi nda' nchene', nsa'chan ye'l' wak? Espíritu Sántona', beena' zoa zejli kaní, goklene'ne' kwenche ben kwine' lall' na' Chioza' na' wlalj xchene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', inezicho ba biyakxen xtol'choka' na' gak goncho daa cheeni Chioza', beena' nak ben' yaa ben' ban.

¹⁵ Daan, Crístona' bxie' dii koba' daa bcheb Chioza' gone' checho, cho' gox wñabe'. La' daa bi'e ye'l' mban che'na' wite' ni checho, wdixje' saaxyaka' bencho shlak ben leya' llin, kwenche gak ikaacho daa bcheb Chioza' gone' checho zejli kaní. ¹⁶ Shi to ben' ba bene' lishi daa yik-waanlene' to ben', aga wak ikaa beena' diika' chwal' yisha' shi biñ' guet beena' chikwaanán. ¹⁷ La' yisha' daa bene' solo gonan llin kat' ba wite', na' bibi zakiin shlak ni mbane'. ¹⁸ Daan, ka bxe Chioza' dii necha' bchebe' gone', bene' byen betgake' bayix'ka' blalj xchemka'. ¹⁹ La' biyoll bzajni dii Moiséza' dii xoxzto'choka' yog' diika' nllia leya' bia', na'ch bexee lat' xa xil' dii mben dii xna na' txis daa le hisopo na' bleeje'n loo chen che shibka' na' che goonka' betgake' na' zi lat' nis, na' bxiteen lee libra' gana' nyoj leya', na' lekzka' bxiteen yog'lol' ben'ka' lle' na'. ²⁰ Na' golle' legake':

“Chennin chonan ka chakli daa n̄heb Chioza' gone' checho na' lekzka' zejın chiyal' goncho yog' daa nllie' bia' goncho.” ²¹ Na' lekzka' b̄xit' dii Moiséza' chenna' lill xlatj Chioza' daa bengake' de lech' na' yog' diika' b̄chingake' lo'inna' ka be'la'ogake'ne'. ²² Leya' bllian bia' nan de dii zan daa chiyal' wxit'gake' x̄chen bayix'ka' kwenche yixi yiechgakan lao Chioza'; na' kon yiyakxen cheyin shi bi lalj chenna'.

²³ Benan byen wlalx x̄chen bayix'ka' kwenche bixi biyech diika' ben llin lill xlatj Chioza' yell-lioni, diika' nak ka b̄xen che diika' de yabana'. Per diika' de yabana', byalljin lalj to chen dii zak'chi aga ka x̄chen bayix'ka'. ²⁴ La' Crístona' aga wyo'e loo lill xlatj Chioza' daa ben ben' yell-lioni daa bi nakan dowalj ka daa de yabana', san yabanan' wyo'e kwenche chnabile' Chioza' yizi'xene' checho. ²⁵ Na' aga zekizezin wyo'e be' kwine' blalj x̄chene'na', ka ben b̄xoz choo b̄xoz xenna' ze twiz wej wyo'e gana' le Latj Ga Zoa Chios kwenche b̄xitee x̄chen bayix'ka'. ²⁶ Shel' byalljin gone' ka chon b̄xozka', ba be' kwine' wite' zan shii, shel'ka', wzolozan ka wxe wzil yell-lioni. Per aga kan' nakan. San naa llaki zeelo, shlin shlaxjzan bzani kwine' wite' ni checho kwenche bsol b̄nite' saaxya chechoka'. ²⁷ Na' kon ka llia bia' gak che to to ben' yell-lioni guete' shlinz, na'tech wchoglo Chioza' nak gak che to toe', ²⁸ ka'kzə Crístona' be' kwine' wite' shlinzə kwenche bsol b̄nite' xtol' ben' yell-lioki. Na' ka yiyede' de wchop shiyi, aga yiyede' kwenche wsol w̄nite' xtol' benaan, san yidixi'e ben'ka' chbezgake'nen'.

10

¹ Ley che dii Moiséza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonan ben' li ben' shao' ben'ka' yog' yiz chitgake' bayix'ka' chzangakile' we'gake' Chioza' ka nllian bia' gongake'. ² Shel' daa chitgake' bayix'ka' gok bixis biyiban saaxya che'ka', aga wyooch yichjgake' nan nakgake' ben' saaxya na' bich betgake' bayix'ka', shel'ka'. ³ Per daa betgake' bayix'ka' lao Chioza' ze twiz wej bisa'lan lall'gake' saaxya che'ka', ⁴ la' x̄chen goonka' na' x̄chen shibka' bi gak yisol yinitan saaxyaka'.

⁵ Daan, ka bid Crístona' yell-lioni, golle' Chioza': Aga cheenchilo' no wit bayix' lawo'na' wa izangakile' bichlə dii gongake' li',

san ba beno' nad' ben' de beli chen kwenche izanid' kwın' lo lazgakin.

⁶ Bi chibailo' no wit bayix'ka' wa wzeygake'b lawo'na' kwenche wsol w̄nito' saaxya che'ka'.

⁷ Na'ch wnia' li': “Ka choe' libr cho'na' xtillaa, Chios cha', ni zoa' kwenche gon' daa cheenilo'.”

⁸ Na' zigaate wne': “Aga cheenchilo' no wit bayix' na' wzeygake'b lawo'na' wa gongake' bichlə dii gongake' li' kwenche yizi'xeno' xtoleeka'”, la'kzi nakgakan daa nllia leya' bia' gongake'. ⁹ Na'tech chi'ene': “Chios cha', ni zoa' kwenche gon' daa cheenilo'.” Na' daa golle' ka' zejın bzoe' ka'lə dii gola' ben b̄xozka' na' b̄xie' to dii kob lwaayi daa bzoe' ka'lə. ¹⁰ Na' daa ben Jesucristona' ka cheeni Chioza', be' kwerp che'na' na' wite' shlin shlaxj ni checho, kwenche bixi biyech yichjlall'do'chona' lao Chioza'.

¹¹ B̄xozka' chilalgakile' choe'la'ogake' Chioza' yog' lla, na' zekizezi chitgake' bayix'ka' lawe'na', la'kzi biga gak yisol yinıtakan saaxya che'ka'.

¹² San Crístona' bzani kwine' wite' shlin shlaxj kwenche bsol b̄nite'

xtol'choka'. Na' ka bibane', jachi'e shlaa de shli che Chioza' gana' chn'abia'lene'ne'. ¹³ Na' na' zoe' chbeze' shlak wzoa Chioza' ben'ka' chwiyi le' xni'ena'. ¹⁴ Na' daa bzani kwine' wite', biyone' ben'ka' bene' lall' na' Chioza' ben' li ben' shao' zejli kañi. ¹⁵ Na' lekzka' Espiritu Sántona' bi'e dill' cheyi dga, kana' wne':

¹⁶ Ki nak daa chcheb' gon' chegake' kat' illin llana', na Xancho Chioza': Gon' ka kooshao'gake' loo yichjlall'do'eka' diika' nllia' bia' gongake', na' gon' ka kwe' yichjgake'n.

¹⁷ Na' wnache':

Bichga lljadinid' saaxya che'ka' ni xtoleeka'.

¹⁸ Na' shi Chioza' ba bizi'xene' xtol' ben', aga chyaljch witgake' bayix'ka' kwenche yiyakxenan.

¹⁹ Le' ben' bish' na' le' ben' zan', daa ba wit Jesucrístona' na' blalj xchene'na' ni checho, wak sho'cho do lall'cho Latja' Gana' Zoa Chioza'. ²⁰ Daa bi'e kwerp che'na', bsalje' to nez kob dii lljwa'n cho' gana' de yel' mban zejli kañi. La' kwerp che'na' zaklebin lechaa daa ze loo lill xlatj Chioza' daa bchez' ka wite', na' zejín byalj latja' gana' zoa Chioza' kwenche gak sho'cho. ²¹ Na' Jesucrístona', beena' nak liizelozi bxo'z choo bxo'z xen, nake' bxo'z checho, cho' nakcho lall' na' Chioza'. ²² Daan, chiyal' ibig'cho lao Chioza' do yichj do lall'cho, na' wxenilall'cho wlebe' cho', la' nezicho ba nxi nyech yichjlall'do'chona' daa ba bsol bnite' xtol'choka', na' ba bixi biyechi kwerp chechoki nis xtila'. ²³ Chiyal' soachechcho goncho lez lljazoalencho Chioza', kon ka choe'cho dill', la' nezicho chone' ka nchebe'. ²⁴ Na' chiyal' yiyijlall'cho nakla' ka goncho gaklen ljwellcho kwenche to tocho gakchi ljwellcho na' gonchcho dii wen. ²⁵ Bi chiyal' kwe' yichjcho daa chdop chllagcho choe'la'ocho Chioza' ka chonz bal' ben', san chiyal' wtip lall' ljwellcho, ¿alechli naa daa chakbe'icho ba zoa yiyed Xanchona'?

²⁶ Na' shi ni chonchcho dii mala' daa nezicho bi chiyal' goncho kat' ba nombia'cho dill' li che Chioza', bich bi de we'cho Chioza' kwenche yizi'xene' xtol'choka'. ²⁷ Lechoza' kwezcho do chall chllebzcho wchoglo Chioza' checho llana' wzalee ben'ka' chakzbangakile'ne' lo yi'na' chal'nin daa wlliyai' legake'. ²⁸ Kat' to ben' bi chzenague' che ley che dii Moiséza', shi zoa chop shon' ben' ble'gakile' daa bene', na' chchoglo guete' na' kono gak yiyesh'lallii le'. ²⁹ ¿Alechlin ki gak yel' zak'zi'na' idol' beena' chonile' nakzi Xiin Chioza' na' xchene'na' daa blalje', na' chnie' zban che Espiritu Sántona' beena' chiyesh'lallii cho'? La' xchene'nan' bixis biyiban yichjlall'do'chona', na' ka blalje'n bxie' dii koba' daa bcheb Chioza' gone' checho. ³⁰ Na' nezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiyal' gak che'." Na' lekzka' wne': "Nad' Xanle wchogloa' chele, le' nakle yell cha'." ³¹ ¡Nyesh'laz wal inlleb gak che beena' wchoglo Chios yaa Chios banna' che' sak'zi'e!

³² Li lljadini ka nak dii lalljka' ble'ile ka bleble beeni' che Chioza' loo yichjlall'do'lena', na' bizo bizakile' yel' zak'zi'ka' bdi' bllagle. ³³ Bal'-le biya dii ben' wna' ben' le' na' biya dii bchi' bsak'gake' le' lao lkwe' ben'. Na' zi bal'-le goklenle ben'ka' biya dii gok chegake'. ³⁴ Na' biyeshile' ben'ka' got' lillyana', na' wzoale mbalaz la'kzi bikaa ben' bi dii de chele, daa nezile de to dii wench chele yabana' daa bi te cheyin. ³⁵ Daan, bi kwe' yichjle daa nxenilall'le Chioza', la' to banez choo banez xen si'le cheyin. ³⁶ Chiyal' so

sakile diika' chen chle'ile kwenche yiyoll yido gonle ka cheeni Chioza' na' gaki chele daa nchebe' gone'. ³⁷ La' Cho'a Xtill' Chioza' nan: Ba zoa gaoshosh yiyed beena' chiyal' yiyed, na' aga wllachile'.

³⁸ Na' beena' nak ben' li ben' shao' daa nonlilallee nad' ibane' zejli kani. Na' shi bich gonlilallee nad', bich ile'shiidee.

³⁹ Per cho', aga nakcho ka ben'ka' kwiayi' daa chibiigake' bich chonlilall'gake'ne', san cho' zoacho nonlilall'chone' yilacho bi kwiayi'cho.

11

¹ Daa nonlilall'cho Chioza', lennan' chonan kwenche chakliyicho daa noncho lez na' chajle'chacho cheyi daa bin' ile'icho. ² Daa benlilall' dii xoxxt'o'choka' Chiozan', ble'shiile' legake'.

³ Na' daa nonlilall'cho Chioza', nezicho len' bxe bsile' yabana' len yell-lioni na' ka bene'n aga bi bchine', san kon ka wnie' wxw wzil yog' diika' chle'icho.

⁴ Daa benlilall' dii Abela' Chiozan', bi'ene' to dii zak'chi aga ka daa be' dii Cainna'. Na' daa benlilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benlilallee Chioza' ni chzajniin cho' ka chiyal' goncho.

⁵ Na' daa benlilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'. ⁶ Na' shi bi gonlilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiyal' shajli'e che' nan zoakze' na' chone' wen che ben'ka' chiylil le'.

⁷ Daa benlilall' dii Noéna' Chiozan', wyajli'e ka bsi'nile'ne' che yejsiwaa daa zi' za' gak daa konon' yen ile'i. Na' daa bllebe' Chiozan', bzenague' che' na' bene' barkwa' gana' wyoo do bxooone' kwenche bilagake'. Na' daa benlilallee Chioza' na' bzoe' xtilleena', bli'n ben'ka' wlliyai' yell-lioni gokgake' ben' mal. Na' Chioza' ble'ile'ne' ben' li ben' shao' daa benlilalleene'.

⁸ Na' ka'kzə dii Abraham'a', daa benlilallee Chiozan', bzenague' ka goxe' le' na' golle'ne' shaje' lljsoe' to latj dii bchebe' wi'ene' gakin che'. Na' wzee lalle'na' zeje' la'kzi bi wnezile' gan illine'. ⁹ Na' daa benlilallee Chiozan', jsoe' ka ben' zit' lo yell-liona' bcheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki chegake' daa bcheb Chioza' lao dii Abraham'a'. ¹⁰ Na' dii Abraham'a' jsoe' na', la' nezile' wllin lla lljzoalene' Chioza' to latj wen daa ben kwin Chioza', daa bi te cheyin.

¹¹ Na' lekzka' daa benlilallee Chiozan', wyajli'e gon Chioza' ka soa xiine' la'kzi ba nake' ben' gol na' nakte dii xooole' Sárana' nool will. ¹² Ka' gok wzoa ben' zan inleeb xiin dia che', ka beljka' llia xan yabana' na' ka yoxa' chi' cho'a nisdona' daa kono ibabi, la'kzi ba nake' ben' gol ka wzoa xiine'na'.

¹³ Yog' ben'ki ni nonlilall'gake' Chioza' ka witgake' la'kzi lo yell-lioni bi wxi' wkaagake' diika' bcheb Chioza' wi'e legake'. Per wnezgakile' wllin lla gak ka wne', na' bibagakile' daa zi' gak. Na' wngake' nakgake' ka ben' zit', ben' za' xtit shlollz lo yell-lioni. ¹⁴ Na' daa wngake' ka', zej'in ni chbezgake' gana' gak dowalj lallgake'. ¹⁵ La' shel' gokgakile' yella' gana' wza'gake' nakan dowalj lallgake', zak biyajgake' na' dii yoblə shel'ka'.

16 San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios chegake', na' ba nonshawee gana' lljazoagake'.

17 Na' dii Abrahama', beena' bcheb Chioza' gak xiin dia che'na' ben' zan, daa benlilalleen' bzenague' che' kana' golle'ne' izani xiine'na', bi'na' nak tlish' tyaj, wite'b lao Chioza' kwenche gakbia' shi dii li nxenilalleene',
18 la'kzi ba goll Chioza'ne': "Xiin dia cho'ka' galjgake' lo xiin dia che dii Isaaca'." 19 Na' daa wyajle' dii Abrahama' nap Chioza' yel' wak yisbane' ben' wetka', wak inacho Chioza' bisbane' xiine'na' ladj ben' wetka' daa biz bi'e latj wite'b'.

20 Na' lekzka' dii Isaaca', daa benlilallee Chiozan', wnable'ne' gone' ka gak wen che xiine' Jacoba' na' Esaúna' llaka' zi' za'. 21 Na' lekzka' dii Jacoba', daa benlilallee Chiozan', ka ba zoa guete' wnable'ne' gone' ka gak wen che chopte xiin dii Joséna', na' de nchish'zi yag bar che'na' be'lawee Chioza'.
22 Na' lekzka' dii Joséna', daa benlilallee Chiozan', kana' ba zoa guete', bi'e dill' wllin lla yichej ben' Israelka' Egíptona', na' golle' legake' yisa'gake' llit wet che'na' kat' yilleshgake'.

23 Na' lekzka' daa benlilall' dii xaxna' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllebgake' daa bchoglo faraónna' guet bdo'ka'. 24 Na' lekzka' daa benlilall' dii Moiséza' Chiozan', ka bgole' bi goonile' ina ben' nake' xiin bi' nool che faraónna'.
25 Wyazlall'che' biya dii sak'zi'lene' ben' wlall che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'.
26 Gokbe'ile' zak'chi kwell ine ben' che' ni che Cristona', aga ka daa si'e banez che yel' wni'ana' de Egíptona', daa bzoa yichje' dii wenna' we' Chioza'ne'. 27 Daa benlilall' dii Moiséza' Chiozan', bizee Egíptona' na' bi bllebe' illaa faraónna' le', san goke' wal daa wnezile' Chioza', beena' kono chle'i, wzoalene' le'.

28 Na' daa benlilallee Chiozan', bene' lni Paskwa'. Na' golle' ben' wlall che'ka' witgake' twej xil'do' na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'.
29 Na' daa benlilall' ben' Israelka' Chiozan', gok bidegake' loo nido'na' le Nido' Xna, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' yel.

30 Lekzka' daa benlilall'gake' Chiozan', bene' ka billee zeeka' nechj yell Jericóna' ka biyoll wyechjgake'n gall lla. 31 Na' lekzka' nool wdana' wle Rahab, daa benlilallee Chiozan', blebe' ben' Israelka' lille'na' ka bllingake' jawia jayigake' lalle'na' na' bi wlliyi'lene' ben' Jericóka' ben'ka' bi bzenag che Chioza'.

32 Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefténa', dii Davina', dii Samuela' na' dii ben'ka' wdixjee daa goll Chioza' legake'. 33 Daa benlilall'gake' Chiozan', wkaagake' yell-lío che ben'ka' wdil-lengake', na' wñabia'gake' xochi ka wyazlall' Chioza', na' goki chegake' daa bcheb Chioza' wi'e legake'. Na' Chioza' bisle' balgake' lao bell zniaka', 34 na' zi bale' bene' kwenche bi bzey yi' wala' legake', na' zi bale' bilagake' bi witgakile' spada'. Na' bal ben' blan'ka', ben Chioza' legake' ben' wal, na' ka wdil-lengake' soldadka' nak ben' zit', bengake' legake' gan. 35 Na' Chioza' goklene' bal noolka', bisbane' no xiin che'ka' ba wit.

Na' zi bał ben' biya dii bchi' bsak' ben' legake' axt ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gak wen chegake' kat' yisban Chioza' legake'. ³⁶ Na' zi balgake' btitjgakile' na' bet wdingake' legake', na' bchejgake' legake' gdenna' na' wdixjgake' legake' lillyana'. ³⁷ Na' zi balgake' betgakile' yaj, na' zi balgake' wlejgake' chopla kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchingake' no xa xil'ka' no xa shibka' lwaa xagake', na' gokgake' ben' yesh'do' na' dii zan dii ben ble'gakile' daa bchi' bsak' ben' legake'. ³⁸ Wdagake' latja' gana' bibi chashj chleb na' do yaa yaoka', na' bigaangake' do xan blejka'zə na' no loo yech. Na' ben'ka' kana', ni lat' bi nan chidoł'gake' soa ben' wenka' ladje'ka', shel'ka'. ³⁹ Na' la'kzi Chioza' wyazlallee ka benlilall'gake'ne', ni togake' shlak wzoagake' yell-lioni bi ble'gakile' gak daa bchebe' gone' chegake'. ⁴⁰ La' wlo'e xnezin kwenche aga to lezgake' yizi'gake' banez ka nak daa bchebe' gone', san cheenile' lencho yizi'cho banez che to dii zak'chi kwenche yog'cho yiyakcho kwasłol' ka cheenile'.

12

¹ Na' daa nezicho ben' zan ben'ka' wzoachech'gake' benlilall'gake' Chioza', lekzka' cho' chiyal' kwej yichjcho yog' dii chllonan goncho ka cheeni Chioza' na' kwej yichjcho saaxyana' daa chombegui cho', na' soachech'cho gonchcho ka dii le koochcho nez lo xneze'na' ka to ben' chxonj na' chgooyibe' kwenche gone' gan. ² Chiyal' soacho wwiacho ka ben Jesúza', beena' chon ka chonlilall'cho Chioza', na' lekze' gaklene' cho' kwenche yiyoll yido gonlilall'chone' kwasłol. La' le' bizo bizakile' ka betgake'ne' lee yag cruza', na' bi bene' kwent che yel' zto'na' wxi'e daa nezile' ka yiyoll ile'ile' yel' zak'zi'na', yiba yizakile'. Na' naa chi'e gana' chnabia' Chioza' shlaa de shli che'na'.

³ Chiyal' koo yichjcho ka bizo bizakile' biya daa beni ben' malka' le' kwenche bi lljxakicho ni bi wshe'lall'cho gonlilall'chone'. ⁴ Na' ka nakle le', aga bin' xchenle wlaljle ni cheyi daa chdil-lenle dii mala'. ⁵ Ba goł-lall'le daa wna Chioza' cho' daa nakcho xiine', ka wne':

Xiindawaa, bi gonilo' nakzi yel' zak'zi'na' chselaa kwenche wzajniid' li', na' bi yidin'jilo' kat' chon' ka yiyakbe'ilo' daa chono'.

⁶ La' nad' Chios, chigwaa shli lall' ben'ka' chakid', na' chsak'zi'a ben'ka' nak xiin'.

⁷ Chtil-le yel' zak'zi'ka' kwenche yigooshlilall'le, la' Chioza' chonile' le' ka' daa nakle xiine'. La' aga ga zoa to bi'do' bi chsak'zi' xabaa leb' kwenche yigooshlilall'b'.

⁸ Na' shi Chioza' bibi gonile' le' kwenche yigooshlilall'le, ka chone' che yog' xiine'ka', zejnin nakle ka ben' bi wyoo xayin. ⁹ Kana' nakcho bi'do', xachoka', ben'ka' bisgol cho', bsak'zi'gake' cho' na' wdapchogake' balaan. Na' lliatotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kanj.

¹⁰ Na' xachoka', shlak bisgolgake' cho' bsak'zi'gake' cho' kon ka gokgakile' nakan wen. Per Chioza' chsak'zi'e cho' kwenche gaklene' cho' gakcho ben' li ben' shao' ka nake' le'. ¹¹ Aga no chibayi kat' chllagloe' yel' zak'zi'na', san le chakyeshile'. Per beena' yiyakbe'i cheyi daa chllagloe' na' yigooshlilallee, yisa' che wen na' soe' mbalaz.

¹² Li gondiplall', na' li gon ka dii le gonlilall'le Chioza'. ¹³ Li gon ka cheeni Chioza' kwenche beena' ba chshe'lall' ile'ile' ka chonle na' yiyondioplallee na' bi kwej yichje' Chioza'.

¹⁴ Li gon byen soalenle yog'te ben' mbalaz, na' li wsa'to chele lega ben' nxi nyech lao Chioza', la' kono yillin lawe'na' shi bi nxi nyech yichjlall'do'ena'. ¹⁵ Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' ben' wen che'na', na' kwenche bi galj xe loo yichjlall'do'leka' dii mala' daa wxinj wlenan ben' zan. ¹⁶ Na' ni tole bi talenle no xiin xool ben'. Na' bi gonile nakzi daa nak che Chioza', ka ben dii Esaúna'. Tyeenz yel' wawa' bsha'ile' daa nan gaki che' daa nake' ben' nech. ¹⁷ Na' nezczile ka wde, goklallee inab xe'na' gak wen che' daa nake' ben' nech, na' bich gokan. La'kzi le wchelle' wnable'n xe'na', bich bi gok gongake'.

¹⁸ Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'ninan, ax't wche' chola'n, na' wzen to be' wal, ¹⁹ na' bengakile' wchell trompeta' na' wne Chioza' legake'. Na' ka bengakile' shi'ena' got'yogakile'ne' bich inie' legake', ²⁰ daa le blleb'gake' daa goll Chioza': "Nottez yidlej lo yaani chiyal' wítile'ne' yaja', laa ben' laa bayix'." ²¹ Daa ben ble'gakile' le bsheban legake', ax't kwín Moiséza' wne': "Ax't chxiztit' daa le chllebchga'."

²² San le' ba wbig'le gana' zoa Chios, ben' yaa ben' banna', gana' le yaa Sión na' Jerusalén daa zoa yabana', gana' lle' lla' ben' zan inleeb anjl che'ka', ²³ gana' ndop nllag ben'ka' nak xiin' Chioza', ben'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'lol' ben'. Na' ba nakcho txen ben' li ben' shao'ka' ba wit, ben'ka' ba biyon Chioza' dowalj ben' li ben' shao'. ²⁴ Lekzka' ba wbig'le lao Jesúza', beena' be' yel' mban che'na' kwenche bxie' dii koba' daa ncheb Chioza' gone' checho. Na' xchene'na' daa blalje' ni checho chaklenlan cho', aga chonan ka xchen dii Abela' daa wdao xya che dii ben' bisheena'.

²⁵ Li wsak' kwenche bi gakle widenag lao Chioza', beena' chne cho'. La' shi ben' Israelka' bi bilagake' lo yel' zak'zi'na' daa bi bzenaggake' daa goll Chioza' legake' lo yell-lioni, zalechlə cho', aga wilacho lo yel' zak'zi'na' shi yizechj koll'cho beena' zoa yabana' na' bi wzenagcho xtilleena'? ²⁶ Ka wne Chioza' ben'ka' kani'yi, shi'ena' benan ka wxo' wnib yell-lioni, per naa ne': "Sto shii gon' ka xo' inib yell-lioni, na' aga toz yell-lioni, san lente yabana'." ²⁷ Na' daa ne' "sto shii gon' ka xo' iniban", zejin yinit yog' diika' bene', diika' te cheyin, na' yigaan diika' biga te cheyin. ²⁸ Na' yel' wñabia' daa gon Chioza' cho' gana' zoe', biga te cheyin. Daan, chiyal' we'chone' yel' choxken na' we'la'ochone' ka chazlallee na' gall illebcchone'. ²⁹ La' Chios chechona' nake' ka to yi' wal daa chzey chte.

13

¹ Li soatezi soa gaki ljwell-le ka chakile to ben' bish' goljle. ² Na' bi gal'lall'le wleble ben' loo yoo lill-le na' we'le legake' ga yigaangake', la' bal ben'ka' ben ka' blebgake' anjlka' lille'ka', la'kzi bi gokbe'gakile'.

³ Li lljadini gakenle ben'ka' de lillyana', na' li gaktezi lenkzlen chak chele ka'. Li gaken ben'ka' chiya dii chchi' chsak' ben' legake', na' li gaktezi lenkzlen chak chele ka'.

⁴ Dii wen inleeb daa ne' nkaa che', na' le' nshagna'le bi chiyal' talenle ben' yoblə, la' Chioza' wsak'zi'e nottez ben'ka' soalengake' nool bi nak nool chegake' wa ben' byo bi nak ben' chegake'.

⁵ Bi chiyal' selall'cho yel' wni'ana', san goncho banez ka'k' dii de checho, la' Chioza' ba wne': "Biga wsan' li' ni bi kwej yichj' li'." ⁶ Daan, wak inacho do yichj do lall'cho:

Xancho Chioza' zoe' chaklene' nad'.

Na' bi gall illeb' shi bi goni ben' nad'.

⁷ Na' li lljadini ka ben ben'ka' bli' bsemi le' cho'a xtil' Chioza'. Li wwia ka wzoa wlezwake' benlilall'gake' Crístona' toshiizi, na' li gonlilallee ka benlilall'gake'ne'.

⁸ Jesucrístona' biga chillée, lekzen' kani'yi, lekzen' naa na' lekzen' zejli kani. ⁹ Bi we'le latj no wli' wsemi le' dii yoblə dii chyljall' ben' dii gonan ka yilaale lo nez li che Chioza'. Wenchan wzoacheh yichjlall'do'choni lo yel' chaki che Chioza', aga ka daa sho'z yichjcho cheyi diika' na ben' bi chiyal' yeej gaocho. La' ben'ka' china' chinogake'n bi chaklenen legake'.

¹⁰ Daa ba wit Crístona' ni checho, ba chizi'cho to banez daa bi bizi' bxozka' bet bayix'ka' gana' wzoa lill xlatj Chioza' daa bengake' de lech'.

¹¹ Bxoz choo bxoz xenna' jwee xchen bayix'ka' Latja' Gana' Zoa Chioza' kwenche yizi'xene' xtoleeka', per bchejgake' latja' gana' wchengake' kwenche jazeygake' kwerp che bayix'ka'. ¹² Na' ka'kzan gok che Jesús'a, lekzka' wlewgake'ne' yella' ka betgake'ne'. Na' wlalj xchene'na' kwenche yisol yinite' saaxya che ben'ka' gonlilall'gake'ne'. ¹³ Na' cho' naa, chiyal' nocho Crístona' la'kzi le gakzbani ben' cho' ka gokzbangakile'ne'. ¹⁴ La' yell-lioni gani zoacho nakan dii te cheyin, per noncho lez yillincho gana' soacho zejli kani. ¹⁵ Daan, chiyal' we'la'ocho Chioza' toshiizi daa wit Crístona' ni checho, na' koochone' balaan kon cho'a loll'choni we'cho dill' len' nake' Xancho, la' lennan' nakan ka dii chzanicho we'chone'. ¹⁶ Bi gal-lall'cho goncho dii wenna' na' izanicho bi de checho we'chon ben' chyalj chchinile'n, la' lennan' chazlall' Chioza' na' daa choncho ka', len' choe'la'ocho.

¹⁷ Li wzenag che ben'ka' chli' chsemi le' na' li wlexj yichjle lawe'ka', la' legaken' chap chwiagake' le' daa yoo yichjgake' wllin lla yidegake' kwent lao Chioza' daa bengake'. Li wzenag daa nagake' kwenche yibagakile' gon xshine'ka' na' bi gaggakile'n to dii lallj. La' shi bi wzenagle che daa chli' chsedgake', bibi banez cheyin si'le.

¹⁸ Li inabi Chioza' gaklene' neto', la' nezyen'into' chonnto' ka cheenile', na' cheeninto' wsa' chento' wen lao yog'lolte. ¹⁹ Na' chat'yoid' le' inabile Chioza' ni cha' kwenche yob gak yid' sto shii gana' zoale.

²⁰ Chioza', beena' chzoe' cho' mbalaz, bisbane' ladj ben' wetka' Xancho Jesucrístona', beena' chap chwia cho' ka chon xan xilaa, beena' choe'la'ochga xil' che'ka'. Na' lekzen' beena' bxe daa bcheb Chioza' gone' checho zejli kani kana' blalj xchene'na' na' wite'. ²¹ Na' Chioza'kzə gonshgue' ka gak gonle dolo' dii wenna' ka cheenile' gonle, na' gonshgue' ka gaklen Jesucrístona' le' gake' ka chazlallee. ¡Sho'shgue' balaan zejli kani! Ka' gakan.

²² Chat'yoid' le' ben' bish' na' le' ben' zan', li koo yichjle diiki chnabid' le' gonle, diiki to chop cho'a ba bzej'. ²³ Na' cheenid' inezile ba bichej ben' bish'cho Timotewa' lillyana', na' shi ba wdaile' yide' ni, na' wchi'ane' yidwianto' le'.

²⁴ Li wwap chiox yog' ben'ka' chli' chsemi le' na' yog' ben'ka' nakle txen nakle lall' na' Chioza'. Na' ben' Itáliaki nakcho txen chwapgake' le' chiox.

²⁵ Chioza' gaklenshgue' yog'lol-le.

Kart daa bzej Santiágoná'

¹ Nad' Santiago,* nongake' nak' wen llin che Chioza' na' wen llin che Xancho Jesucristona', chwap' le' chiox, ka le' nakle ka shllin kwen xiin dia che dii Israela' daa nakle lall' na' Chioza' na' neslesle doxen yell-lioni.

² Le' ben' bish'dawaa na' le' ben' zandawaa, li yiba yizaki kat' ile'ile yiya yel' zak'zi'. ³ La' ba nezkzile kat' chzak'zi'cho daa nonlilal'cho Chioza', chaklenan cho' soatipchcho gonlilal'chone'. ⁴ Na' li gap yel' chxenlall' lao bittez daa gak chele kwenche yiyoll yido gakchale kon ka chazlall' Chioza'.

⁵ Shi nole chyalljile yel' sin'na', li inabin Chioza' na' gone'n. La' Chioza' cho'en nottez ben' chnabe'n, aga no chllonile'n. ⁶ Li inaban na' li gonyen' lez gone'n na' bi gakhoplall'le. La' beena' chonchoplall' nake' ka bli che nido'na' daa choa' be'na' to ni to na'la. ⁷ Beena' chakhoplall', bi gone' lez we' Xancho Chioza' daa chnabe', ⁸ la' chiya dii na yichjlall'do'ena' gone', na' shal' ki shal' ka'la chake' lao yog'lol daa chone'.

⁹ Ben' bish'chona', beena' nak ben' yesh'do', chiyal' yiba yizakile' daa nake' ben' zakii lao Chioza'. ¹⁰ Na' ben' bish'chona', beena' nak ben' wni'a, chiyal' yibaile' daa ba biyakbe'ile' aga no nake' lao Chioza'. La' ka chde che yejdo'ka' lliá lyixaa ka'kzan te che ben' wni'aka'. ¹¹ Kat' chla' wbilldo'na' na' chna'n zi'bia' na' chbill yag yeja', na' chllib yeja' llian na' yel' mba cheyinna' chbiayi'n. Ka'kzan ben' wni'ana', yiyol yinite' lao delgens che'na' chone'.

¹² Chakomba beena' chzo chzaki chtile' bittez dii mal. La' kat' ba wdie' lawinna', Chioza' wi'ene' yel' mban zejli kaní daa bchebe' wi'e ben'ka' chakgakile'ne'. ¹³ Nottez ben' kat' chza'lallee gone' dii malka', bi chiyal' ine': "Chioza' bzoe' dii mali lawa'ni". La' Chioza' aga bi dii mal chone' ni bibi dii mal chzoe' lao ben' kwenche gone'n. ¹⁴ San daa chzelall'cho goncho dii malan', lennan' chgooyelaan cho' kwenche ixopcho lawinna'. ¹⁵ Na' daa chzelall'cho dii mala', chxopcho lao saaxyana', na' saaxyana' daa choncho chliayi'n cho'.

¹⁶ Le' ben' bish'dawaa na' le' ben' zandawaa, bi siye'z kwinle. ¹⁷ Chioza', beena' zoa yabana' na' bxe bsile' yog' diika' chzeeni' xan yabana', len' chone' cho' yog'lol daa nak dii wen dii shao' na' toshiizi zoe' chone' wen na' biga chillee. ¹⁸ Len' wyazlallee gone' yel' mban checho zejli kaní daa wyajle'cho dill' li che'na', kwenche ladj yog' ben'ka' bxe bsile' gokcho ben' nech ben' biya'o bizi'e, na' zaklebicho diika' chizi' chilapgake' dii nech daa chzangakile' choe'gake' Chioza'.

¹⁹ Le' ben' bish'dawaa na' le' ben' zandawaa, li wzoa yichjle dga: yog'lol ben' chiyal' wsede' wzenague', na' wsakee bin ine', na' gape' to yel' chxenlall' bi illaa iloke'. ²⁰ La' yel' chllaa chloka' chllonan goncho ka cheeni Chioza'. ²¹ Daan, li choonlall' yog'lol dii zbanka' chonle na' yog'lol dii malka' chonle, na' li wlexj yichjle wzenagle cho'a xtill' Chioza' daa ba nezile. La' lennan' napan yel' wak yislan le' kwenche bi kwiayi'le.

²² Aga to wzenagzcho cho'a xtill' Chiozan', san chiyal' goncho ka nan. Na' shi bi goncho ka nan, chziye'zə kwinchon, shi naa. ²³ Beena' to chzenagz cho'a xtill' Chioza' na' bi chone' ka nan, chone' ka beena' chwia

* 1:1 Santiago Lekzen' Jacóbona'.

cho'alawe'na' lo wanna', ²⁴ na' ka chikwase' chiyoll chwia cho'alawe'na', li chal-lall'tie' nakan nake'. ²⁵ Beena' bi chal-lall' dii wenna' nllia Chioza' bia' gone' daa yisell yilaan le' lao dii mala', na' zie'n wneyi, na' toshiizi zoa'tip zoashoshe' chone' ka nan, beenan' zoa mbalaz.

²⁶ Shi no chakzi chone' ka cheeni Chioza', per bi chak gox' cho'a lolleena', chziye'z kwinen' na' bibi zakii daa ne' chone' ka cheeni Chioza'. ²⁷ Daa cheeni Xacho Chioza' goncho na' nxi'n lawe'na', len dga: yiyesh'lalicho bi' wizebdo'ka' na' nool wizebka' lao dii lalljka' chen chle'gakile', na' gap wwia kwincho bi goncho txen dii malka' de yell-lioni.

2

¹ Le' ben' bish' na' le' ben' zan', ka le' chonlilall'le Xancho Jesucristona', beena' yoo balaan xenna', aga nakzi ben' gakile. ² Shi gana' ndop nllagle yida to ben' nllin xbene'na' niy de or na' nakw xalaane' dii wen, na' lekzka' yida to ben' yesh'do' na' nakwe' xalaane' dii ba bida' bichollee, ³ na' chle'shi'chile beena' le' nak xalaaninna', na' che'lene': "Wche' latji gani nak wen", na' che'le ben' yesh'do'na': "Na'zə wze, li'", wa ba che'lene': "Lo yo na'tezə wche'", ⁴ zAaga nakzin ba chle'ile bal ben' daa chwia chyile nak nake', na' ba chza'lall'le chegake'?

⁵ Le' ben' bish'dawaa na' le' ben' zandawaa, li wzenag dga: Chioza' ba wleje' ben'do'ka' nak ben' yesh' yell-lioni kwenche do yichj do lall'gake' gonlilall'gake'ne' na' soalengake'ne' gana' chnabi'e, kon ka ba bchebe' gone' che ben'ka' chakgakile'ne'. ⁶ Na' le', chonzile legake' nakzi. zAaga ben' wnia'kan' chsak'zi'gake' le' na' chjtaogake' xya chele lao ben'ka' chnabia'? ⁷ zAaga legaken' chbell chnegake' mal che Xanchona', beena' nakcho lall' nee, beena' le' zakii?

⁸ Dii wen inleban chonle shi dii li chonle daa lliarote nllia Cho'a Xtill' Chioza' bia' gonle daa nan: "Goki bish' ljwello'na' ka chaki kwino'." ⁹ Per shi nakzi ben' gakile, chxinj chlenle, na' ba de xtol'le daa bi chonle ka na ley che Chioza'. ¹⁰ Shi to ben' zeje' chone' yog'te daa nllia ley che Chioza' bia', per shi ton bi gone', doxente leya' chawan xya nape' dol'. ¹¹ Chios, beena' wna: "Bi chiyal' ineleno' ben' yoblə", lekzka' wne': "Bi wito' ben'." Na' shi chito' ben', la'kzi bi chneleno' ben' yoblə, chyishjo' daa nllia ley che'na' bia'. ¹² Chiyal' wshaljle wen na' wsa' chele wen kon ka nllia leya' bia', lega ben' nezi wllin to lla leya' daa chisell chila' cho' lao dii mala', wchoglon checho. ¹³ Ben'ka' bi chiyesh'lallii ben', lekzka' Chioza' bi yiyesh'lallile' legake' llana' wchogloe' che ben'. San ben'ka' chiyesh'lallii ben', Chioza' yiyesh'lallile' legake'.

¹⁴ Le' ben' bish' na' le' ben' zan', bibi zjanayin inaz ben' nonlilallee Chioza' shi bi nla' dii wenna' chone'. zAwak to daa nonlilall'ze' yislan le' shi bi chone' wen? ¹⁵ Inatezcho to ben' byo wa to noolə, ben' nakcho txen nonlilall'cho Jesucristona', bibi xalaane' de na' chyalljte dii yeej gawe' ka naa ka wxə. ¹⁶ Na' tole ye'lene': "Soashgo' mbalaz, na' gat'shga xalaano' na' dii yeej gawo'", na' bi we'lene' daa chyalljile', bibi zejin ye'zlene' ka'. ¹⁷ Ka'kzan beena' nonlilallee Chioza', shi bi chone' daa nak wen, bibi zjanayin ne' nonlilalleene'.

¹⁸ Zoa ben' ine': "Li' no' nonlilalloo Chioza', na' nad' chon' daa nak wen. Aga wakbe'i ben' shi nonlilalloo Chioza' shi bi chono' daa nak wen. San nad', daa chon' daa nak wen chli'a nonlilallaa Chioza'." ¹⁹ Li' chajli'o toz Chiozan' zoa, na' wenkzan chono' chajli'o. Lekzka' dii xiw'ka' chajle'gakan na' le' chllebgakan. ²⁰ Bi gono' ka ben' bi nteyi. Chiyal' gakbe'ilo' shi bi

chono' daa nak wen, bibi zjanayin no' chajli'o che Chioza'. ²¹ Daa bzani dii xozxto'cho Abrahamama' xiine' Isaaca', bchi'eb' lo yaana' nan ljete'b' ka goll Chioza'ne' gone', na' wna Chioza' nak dii Abrahamama' ben' wen lawe'na'. ²² ¿Abi chakbe'ilo' daa benlilall' dii Abrahamama' Chiozan', bzani' xiine'na'? Na' daa bene' ka', bli'en nan dii licha nonlilallee Chioza'. ²³ Na' billinin daa nyoj lee Cho'a Xtill' Chioza' daa nan: "Abrahamama' wyajli'e che Chioza', na' Chioza' wne' nake' ben' li ben' shao' lawe'na'." Na' wnagake' che' goke' to ben' bllagui Chioza'.

²⁴ Na' chakbe'ile beena' chonlilallee Chioza' nake' ben' wen lawe'na' shi chone' ka cheenile', na' aga to daa inaze' nonlilalleene'. ²⁵ Ka'kzə gok che noolə wdana' wle Rahab. Chioza' wne' nake' ben' li ben' shao' daa bkwashee loo lille'na' ben'ka' jawia jayi lalle'na', na' bigwee legake' to nez yoblə ka bichejgake' lalle'na' kwenche kono bet legake'. ²⁶ Ka chak che to kwerp, shi bi yoon bishbe, netan, ka'kzan beena' to nonlilall'ze' Chioza' na' bi chone' ka cheenile', bibi zjanayin nonlilalleene'.

3

¹ Le' ben' bish' na' le' ben' zan', bi shanzle selall'le gakle ben' chli' chsedi, la' ba nezgzile' kat' yizi' Chioza' cho' kwent wsak'zi'che' neto' chli' chsedinto' ben' shi bi gonnto' ka cheenile'. ² Yog'lolcho chxinjcho. Na' beena' bi chxinje' de cho'a dill' nake' to ben' li ben' shao', na' lekzka' chak inabi'e doxen kwerp che'na'. ³ Kat' chgoocho dona' cho'a kabaya' kwenche gom ka cheenicho, chzakicho chgoochob neza' gana' cheenicho shajb. ⁴ Na' lekzka' li wwiakachi barkwka', la'kzi nakgakan dii xen wal na' chde be' wala' chlligaan diika', ben'ka' chsa' legakan chdagake' toz yagdo' xaninka' na' chajgakan gana' cheengakile'. ⁵ Ka'kzan chak che loll'choni. La'kzi nakan to diido'zə, dii zan dii chshalj chshonan. Nezicho toz bzeyi'do' wak wzeyan to yix' din' xen wal. ⁶ Na' loll'choni nakan ka to yi'. Na' nakan to dii lliashesh' chiya dii mal na' chxinj chlenan do ka nak benecha' shlak mbane' daa chzenague' che dii xiwaa. ⁷ Benecha' chak gonmaxe' yog'te bayix', ka ba ze xan yabana', ka ba chxob le'in, ka ba yoo loo niso'na'. Per la'kzi chnabi'e legakb, ⁸ bi chak inabi'e lolleena'. Nakan to dii mal dii bi cheeni no inabia' len, na' nakan ka yierb dii chitan ben'. ⁹ Chchincho loll'choni choe'la'ocho Xacho Chioza', beena' nak Xancho, na' lekzka' chchinchon chyishjcho bia' blag' che ben'ka' bxe bsile', ben'ka' bene' lwaa lsakee. ¹⁰ Cho'a loll'choni choe'la'olenchon Chioza' na' lekzka' len chyishjan bia' blag' che ben'. Le' ben' bish' na' le' ben' zan', bi chiyal' goncho ka'. ¹¹ To ga chal nis, aga wak galan nis dii gak yeejcho na' galten nis xzi'. ¹² Le' ben' bish'dawaa na' le' ben' zandawaa, nezile to yag yixwew aga wbian daa ne' aceituna, na' yag uvana' aga wak kwian yixwew. Na' ka'kzə gana' chal nis xzi'na' aga walan dii gak yeejcho.

¹³ Shi ladjlena' zoa ben' sin', ben' chajinii, chiyal' wli'en wsa' che' wen na' wlexj yichje' gone' kon ka na yel' sin'na' daa noe' Chioza' le'. ¹⁴ Na' shi we'le latj wxinj wlen yel' xe'na' yichjlall'do'lena', na' gonile ben' nakzi, bi chiyal' wshalj wshonle inale nable yel' sin' daa chon Chioza'. La' shi ka' chonle aga dill' lin choe'le. ¹⁵ Ka nak yel' sin'na' daa nale nable, bi nakan dii ben' Chioza', san nakan de yell-liozə dii chalj yichjlall'do'lena', na' naktan che dii xiwaa. ¹⁶ Gana' zoa ben'ka' chakxe'i ljwellgake' na' chakdilgake' nogaken' mbejlawi, nan' chxe wdil wishesh na' chiya dii mal. ¹⁷ Ben'ka' nap yel' sin' daa choe' Chioza', nakgake' ben' chon ka cheenile', na' bi nakgake' ben' wishagdil. Nakgake' ben' wen, ben' wizoa

dill', beṅ' chiyesh'lallii beṅ', na' aga nakzi beṅ' chakgakile', na' nakgake' beṅ' chda do lallii. ¹⁸ Beṅ'ka' chon to dii byen soalen ljjwellgake' mbalaz, na' lekzka' chongake' ka soalen ljjwell beṅ' yoblə mbalaz, si'gake' banex goni beṅ' legake' wen, na' soagake' mbalaz.

4

¹ ¿Biḅhe chakile de wdil wshesha' ladjlena' shi aga dii malka' lle' lla' loo yichjlall'do'lenan' chṅabia'gakan le'? ² Chzelall'le bi gat' chele na' bi chatilen. Shel' wxē'ile witle beṅ' na' ikaale bi de che', na' chakxe'ile' bi de che beṅ'. Na' daa bi chat' chbe'ile daa chzelall'le gat' chele, chdil chsheshlen ljjwell-le. Na' bibi chat' chbe'ile daa bi chṅabilen Chioza'. ³ Na' kat' chṅabilene'n, bi chone'n daa nezile' chṅablen kwenchez gonditjlen we'le cho'a xbayi beli chen chelena'. ⁴ Le' beṅ' bi yootli lallin. ¿Abi nezile daa nonle txen dii mala' de yell-lionin chonan ka chakzbanile Chioza'? Nottezə beṅ' cheenile' gone' txen dii mala' de yell-lioni chakzbanile' Chioza'. ⁵ Bi gakilo' nazə Cho'a Xtill' Chioza' daa nan: "Daa ba ngoo Chioza' Espiritu che'na' loo yichjlall'do'chonin lliallalee toze' le' wzenagcho che'." ⁶ Per dii xen chaklene' cho', na' Cho'a Xtilleena' nan: "Chioza' bi chle'shiile' beṅ'ka' chep cha'lall', per chaklene' beṅ'ka' nak beṅ' gaxjlall'." ⁷ Daan, li wlexj yichjle lao Chioza'. Na' li soaḅheḅ bi we'zle latj che dii xiwaa, na' yikwasan ka'lə. ⁸ Li wxenilall' Chioza' na' soalene' le'. Le' beṅ' saaxya, li yiyaj yileni che dii malka' chonle. Na' ka le' cheenile' gonlilall'le Chioza' na' gontele txen dii mala' de yell-lioni, li we' latj yixis yiyib Chioza' yichjlall'do'lena'. ⁹ Li gakyeshii na' li kwellyesh'. Lwaa wxill-le li kwellyesh'. Li yisha' yel' chiba chizaki chelena' yiyakan yel' chakyeshii. ¹⁰ Li gak beṅ' gaxjlall' lao Xanchona', na' gone' le' beṅ' choo beṅ' xen.

¹¹ Le' beṅ' bish', bi kwell ine che ljjwell-le. Beena' chbell chne che to beṅ' nakcho txen nonlilall'cho Chioza' wa chiya chiyilje'ne', che ley che Chioza'n chbell chnie' na' chiya chiyilje'n. Na' shi ka' chono', lwaa wzenago' daa na leya', ba chzoaz kwino' chḅhoglo' cheyin. ¹² Toz beena' zoa, beena' wdixj leya', na' naktie' beṅ' chḅhoglo che beṅ'. Na' len' wak yisle' beṅ' wa wlliaeyene'. Na' li', naa, ¿nora nako' yiya yiyiljzo' bish' ljjwello'na'?

¹³ Li wzenag, ka le' nale: "Naa wa wxē shajcho yell yoblə na' lljsoacho twiz lljencho delgens na' goncho gan mech." ¹⁴ Ni bi nezile bi gak chele ka wxē. Yel' mban chelena' nakan ka gopaa daa chbe' xtitz na' lii chinitten. ¹⁵ Kin chiyal' inale: "Shi Chioza' wi'e latj ibanchcho, na' goncho dga cheenicho goncho." ¹⁶ Per latjin dii inale ka', chshalj chshonləle, na' daa chshalj chshonle nakan mal. ¹⁷ Beena' nezi chiyal' gone' wen na' bi chone'n, nakan xya lao Chioza'.

5

¹ Li wzenag dga, le' beṅ' wni'a. ¿Li gosyaadia kwell-le, daa ba za' yel' zi'ka' yen ile'ile! ² Yel' wni'a chelena' ba gooll' bteban; na' beḷ zidaa ba bliiyiib xalaanleka'. ³ Or plat cheleka' ba chasgakan bej. Na' daa nakgakan ka', chaogakan xya chele na' wlliayi'gakan le' ka chon yi'na' chzey chten. La' ba bkwa' bti'azle yel' wni'ana' naa ba zoa kwiayi' yell-lioni. ⁴ Daa bi be'le laxj beṅ'ka' bizi' bilap cheleka' chawan xya chele. Na' Xancho Chioza', beena' zeelo nap yel' wak choo yel' wak xen, ba bzenague' xyana' daa chao wen llinka'. ⁵ Yell-lioni ba weej wdaoshao'le

na' ba be' cho'a xba beli chen cheleka'. Ba be'la'o kwinle ka ben' choe'la'o to bayix' kwenche wite'b gawe'b, na' kan' gak chele, ba zoa kwiayi'le. ⁶ Ba bchoglole che ben'do' bibi ben, na' ba betle legake', la'kzi bibi bengake' chele.

⁷ Na' le' ben' bish' na' le' ben' zan', li gap yel' chxenlall' axt kat' yiyedch Xancho Jesucristona'. Ben' goz goona' none' lez yizi' yilape', na' nape' yel' chxenlall' chbeze' gak yeja'. ⁸ Ka'kzə le', chiya' gaple yel' chxenlall' na' soachechle gonlilall'le Xancho Jesucristona', la' ba zoa yiyede'. ⁹ Le' ben' bish' na' le' ben' zan', bi gaos xya che ljwell-le kwenche bi wchoglo Chioza' chele. La' ba zoa gaoshosh yiyed beena' wchoglo che ben'. ¹⁰ Le' ben' bish' na' le' ben' zan', li wwia ka ben dii ben'ka' wdxjee daa goll Xancho Chioza' legake' kani'yi, wdapgake' yel' chxenlall' la'kzi chiya dii wxak'zi'gake'. ¹¹ Dii li, chakomba ben'ka' chizo chizaki yel' zak'zi'ka'. Ba benzkile ka ben dii Joba', bizo bizakile' wdie' lo yel' zak'zi'ka'. Na' nezckile ka ben Xancho Chioza' che' biyoll wxak'zi'e, la' Xanchona' nake' liizelozi ben' chiyesh'lalii.

¹² Le' ben' bish' na' le' ben' zan', dii lliarote dga: bi wzoazle de taschiw yabana' ni yell-lioni, ni sto dii yoblə kwenche shajle' ben' chele. Kat' inale: “wakan”, ka'kzan gonle. Na' kat' inale: “bi gakan”, la' bi gakkzannan', kwenche bi gat' xtol'le lao Chioza'.

¹³ Shi nole chak dii chak chele, li we'lwil Chioza'. Na' shi nole zoa mbalaz, li gol inie'. ¹⁴ Shi to ben' bi shawee, chiya' gaxe' ben'ka' ngoo lall' na'gake' ben'ka' nonlilall' Crístona' kwenche we'lwilgake' Chioza' ni che', na' chebgake' yichje'na' seta' na' inabgake' yiyakile' kon yel' wak che Xancho Jesucristona'. ¹⁵ Na' kat' we'lwilgake' Chioza' na' shajle'gake' gone' daa chnabgake', na' yiyaki beena' bi shao', la' Xanchona' yiyone'ne'. Na' shi ba bxinj blene' na' yiyakxen che'. ¹⁶ Daan, li yixoadol' lao ljwell-le na' li we'lwil Chioza' inab che ljwell-le kwenche yiyakile. Chioza' chzenague' che beena' nak ben' li ben' shao', na' chone' daa chnabile'ne'. ¹⁷ Elíaza', beena' wdxjee daa goll Chioza'ne' kani'yi, goke' ben' de beli chen ka cho', na' ka be'lwille' Chioza' do yichj do lallee wnabile'ne' bi gak yeja', na' bi gok yeja' lo yell-lioni shon yiz yo gashjə. ¹⁸ Na' be'lwille'ne' sto shii, na' bizolo yeja' na' biyashj bileb lo yell-lioni dii weej wdaogake'.

¹⁹ Le' ben' bish' na' le' ben' zan', shi tole yilaale lo nez li che Chioza', na' sto ben' yoblə yigwee le' sto shii, to dii wenan chone'. ²⁰ La' chiya' inezile beena' yigoyoe' to ben' saaxya lo nez mala' na' yigweene' lo nez lina', ba chaklene'ne' yile' lo yel' wita' na' yiyakxen saaxya che'na' la'kzi nakan dii zan.

Kart nech daa bzej Pédróna'

¹ Nad' Pedro nak' postl che Jesucristóna', chzej' le', ka le' ba wlej Chioza' gagle lall' nee na' neslesle zoale do Póntóna', Galáciana', Capadóçiana', Ásiana' na' Bitíniana', gana' bi naki lall-le. ² Kon ka wlo'e xnezin gone' chele kani'teyi, Xacho Chioza' ba wleje' le' na' Espíritu che'na' ba bikobe' yichjlall'do'lena' kwenche soale wzenagle che Jesucristóna' na' gagle ben' nxi nyech ni che xchene'na' daa bixis biyib le'. Chioza' gaklenshgue' le' dii xen wal na' gonshgue' ka soale mbalaz inleeb.

³ We'la'ocho Chioza', Xa Xancho Jesucristóna'. Daa ba biyesh'lallile' cho', ba bene' sto yel' mban kob checho daa bisbane' Jesucristóna' ladj ben' wetka', na' soacho gonchon lez toshiizi. ⁴ Na' ikaacho daa ba ngooshawee yabana' daa biga kwiayi', na' daa bibi nda' nchen, na' daa biga te che yel' mba cheyinna'. ⁵ Daa nonlilall'cho Chioza' lekze' kwkash' wkweejlene' cho' yel' wak che'na' kwenche idol' illonicho yel' mbanna' daa ba nakten gone' cho' kat' illin lla te che yell-lioni.

⁶ Na' ni cheyi dgan chiba chizakile, la'kzi llaki naa wde wdeli dii chdil chllagle tolde. ⁷ Ka nak ora', chiyał' ten lo yi'na' kwenche wli'lawin shi nakan dowalj. Ka'kzan le', kat' chtil-le yel' zak'zi'ka' chli'lawin shi dowaljkan ba nonlilall'le Jesucristóna'. Na' daa nonlilall'lene' zak'chan ka ora', la' ora' wllin lla kwiayi'n. Per le' zoachechle nonlilall'le Jesucristóna', kat' ba biyoll wdele lo yel' zak'zi'ka', na' shajla'ole na' sho'le to balaan xen kat' yiyede'.

⁸ La'kzi bin' ile'ilene', le chakilene'. Na' la'kzi bi chle'ilene' naa, chajle'le che' na' dii xen wal chiba chizakile axt bichkz bi dill' chillelile we'le cheyin, ⁹ daa ba nezile gat' yel' mban chele zejli kani daa nonlilall'lene'.

¹⁰ Dii ben'ka' wdixjee daa goll Chioza' legake' kani'yi, be'gake' dill' ka nak yel' chiyesh'lalli che'na'. Na' biyiljyollgake' daa golle' legake' kwenche shajni'gakile' nakan gone' yisle' cho' na' gone' yel' mban checho zejli kani. ¹¹ Na' Espíritu che Crístóna'kzan be'lene' legake' dill' che yel' zak'zi'ka' ile'ile' na' che balaan xenna' daa sho'e ka yiyoll tie' yel' zak'zi'ka'. Na' goklall'gake' inezgakile' nakan gak yide' na' bi lla bi goran' gak dga. ¹² Na' Chioza' bzajniile' legake' nan aga legaken' yen ile'gakile' diika' be'gake' xtilliin, san len' yen ile'ilen. Na' lannen' dill' wen dill' kob che Crístóna' daa benile ka be'len ben'ka' le' dill' kon yel' wak che Espíritu Sántóna', beena' bsel' Chioza'. Na' axt anjlka' cheengakile' inezchgakile' cheyi diiki.

¹³ Na' ni che daa ba ben Chioza' chele, chiyał' se kwasle na' gagle ben' nyeen nyeeniyi. Li gonyen' lez dii wenna' gon Chioza' le' kat' yiyed Jesucristóna'. ¹⁴ Daa nakle xiin Chioza' na' chzoale xtilleena', bich chiyał' gonle dii mala' wzelall'le kana' bin' gombia'lene'. ¹⁵ San chiyał' soale gagle dowalj ben' li ben' shao'. La' Chioza', beena' gox wñabe' le', nake' dowalj ben' li ben' shao'. ¹⁶ La' Cho'a Xtilleena' nan: "Li gak dowalj ben' li ben' shao', ka nad' nak' dowalj ben' li ben' shao'."

¹⁷ Daa che'le "Xa", beena' chchoglo che ben' kon ka chidoł' to toe', chiyał' gall illeblene' shlak zoale yell-lioni gani nakle ka ben' zit'. ¹⁸ Chioza' ba bisle' le' lo yel' mban daa bi nxe bi nzak' daa bkwaanlen dii xoxcto'leka' le'. Na' nezile daa bisle' le' aga wdixjile'n or wa plat, diika'

chbiayi', ¹⁹ san xchen Crístona' daa zak'chgayi, lënnan' biya'o biziile' le' kana' betgake'ne' ka to xil'do' ba bibi nda' nchen. ²⁰ Kana' zi' xe silte yell-lioni, Chioza' wleje' Crístona' sak'zi'e. Na' naa ba zoa te che yell-lioni ba bide' ni checho. ²¹ Na' ni che Crístonan' ba nonlilall'le Chioza', beena' bisbane'ne' ladj ben' wetka' na' wlo'ene' balaan xen. Daan, ba chonlilall'le Chioza' na' ba nonlene' lez.

²² Na' le' naa, daa ba chonle ka na dill' li che Chioza' ba bixi biyechle, na' do lall'le chaki ljwell-le. Na' chiyal' gakchi ljwell-le do yichj do lall'le axt ga zeelo. ²³ La' nakle ka ben' ba golj dii yoblə, per aga de beli chen daa chde cheyi, san Chioza' ba bikobe' yel' mban chelena' daa wyajle'le cho'a xtilleena' daa nsa' yel' mban na' biga te cheyin. ²⁴ Cho'a Xtil' Chioza' nan: Yog'lol ben' yell-lioki nakgake' ka yixaa, na' balaan che'ka' nakan ka yejka' ze lyixaa.

Yixaa chbillan na' chllib yejdo' cheyinna',

²⁵ san cho'a xtil' Chioza' zejli kani den, na' biga te cheyin.

Na' lënnan' dill' wen dill' koba' daa ba wdixje'gakile' le'.

2

¹ Daan, chiyal' choonlall'le yog'lol dii mal, yog'lol de wxiye', na' yel' xe', na' yel' chbell chne che ben'. ² Ka chon to bdo' cheendo' chdom' nillaa, kan' chiyal' ibil' idonle cho'a xtil' Chioza' daa nak dowalj, kwenche gaklenan le' gonlilall'chlene' na' idol'le yel' mbanna' daa gone'. ³ La' ba bnix bliiatele ka ben' wen nak Xanchona'.

⁴ Li ibig' lao Xancho Crístona', beena' nap yel' mban, beena' zaklebi yaja' daa bi wyoolallii wen yooka', la'kzi lao Chioza' nake' to ben' zakii nleeb na' wleje'ne' kwenche gone' ka chazlallee. ⁵ Na' lekzka' le', Chioza' ba bene' to yel' mban kob chele daa nonlilall'le Crístona', na' zaklebi ka yajka' daa chkwaagake' ljwellin kwenche gakan to yoo ga sho' Chioza' balaan. Na' gake bxoz che', na' Jesucrístona' gaklene' le' kwenche soale we'la'ole Chioza' ka chazlallee. ⁶ Cho'a xtil' Chioza' nan:

Wselaa to ben' yell' Siónna',

na' zaklebi'le' yaja' daa mbejlawin dii wlejkakile' kwenche gakan yaja' daa wchejcha yoona'.

Na' beena' wxenilalleene', biga si'e yel' zto'.

⁷ Ka le' ba nonlilall'le beena' zaklebi yaja', chakbe'ile nake' ben' zakii. San ben'ka' bi nonlilall'gake'ne' chongake' ka chillini Cho'a Xtil' Chioza' daa na:

Yaja' daa bi wyoolall' wen yooka',

leyen'lannan' yaja' daa ba nchejcha yoona'.

⁸ Na' lekzka' nan:

Zaklebi'le' to yaj dii chgoo chchew' ben' na' chchixan legake'.

Chbixgake' daa bi chzenaggake' cho'a xtil' Chioza', na' ka'kzan chiyal' gak chegake'.

⁹ San le', nakle ben' wlej Chioza' kwenche gonlilall'lene', na' nakle bxoz che beena' chnabia', na' yell che', to yell dii biya'o bizi'e. Na' wleje' le' kwenche we'le dill' ka nak yel' wak choo yel' wak xen che beena' bibej le' gana' nak shgasj shcho' kwenche biyoole lo beeni' choo beeni' xen che'na'. ¹⁰ Kana', bi gokle lall' na' Chioza', san naa ba nakle lall' nee. Kana', bi biyesh'lallii Chioza' le', san naa ba chiyesh'lallile' le'.

¹¹ Le' ben' bish'dawaa na' le' ben' zandawaa, daa nakle ka ben' zit' yell-lioni, chat'yoid' le' bi we'le latj we' cho'a xbayi beli chen chelena'

daa cheeni inabia' yichjall'do'lena'. ¹² Li wsa' chele wen ladj ben'ka' bi nonlilall' Chioza', kwenche llana' wchoglo Chioza' che to to ben', gakbe'gakile' benle wen na' we'la'ogake'ne', la'kzi naa chnegake' chele nan nakle ben' mal.

¹³ Daa ba nonlilall'le Xancho Jesucristona', chiyal' wlexj yichjle lao yog'lol ben'ka' chnabia': ka lao beena' liizelozi chnabia', ¹⁴ na' ka'kz lao ben'ka' chselee kwenche wdezi'gake' ben'ka' chon dii mala' na' kwee balaan ben'ka' chon wen. ¹⁵ Chioza' cheenile' gonle wen kwenche idap cho'a ben'ka' biz chon chna chele, ben'ka' bi nteyi ni bi chajni'gakile'.

¹⁶ Li soato lega ben' ba biyell bila', na' aga ni che ba biyell bila'le na' gonle kon daa nan chele. Li soato lega ben' chon ka cheeni Chioza'. ¹⁷ Li gap balaan yog'lol ben'. Li gaki bish' ljwell-leka'. Li gall illeb Chioza'. Na' li gap balaan ben' wñabia'na'.

¹⁸ Ka le' chonle xshin ben', li wlexj yichjle lao xanleka' do yichj do lall'le. Aga to ben'ka' chonzi le' wen gonile ka', san ka'kzæ li goni ben'ka' chsak'zi' le'. ¹⁹ La' wenan no gon banez kat' no chsak'zi' le' la'kzi bibi dol' nape' daa ba ngoo yichje' daa cheeni Chioza'. ²⁰ Per shi le' chzak'zi'le ni che to dii mal dii benle, bibi zakiin lao Chioza' gonlen banez. San shi chzak'zi'le ni che dii wenna' chonle na' chonlen banez, lënan' zakii lao Chioza'. ²¹ Kwenche gonle dgan gox wñab Chioza' le'. La' Crïstona' wxak'zi'e ni chele na' bliile' le' nakan chiyal' gonle. ²² Aga bi saaxya ben Crïstona', ni bibi dill' wxiye' bi'e. ²³ Kana' biz ben wñagake' che', bi biyechj bibi'e, na' ka bsak'zi'gake'ne' bi bwall bshebe' legake', san ben kwine' lall' na' Chioza', beena' chchoglo che ben' ka chiyal'. ²⁴ Crïstona' biyoni che' saaxya chechoka' ka wite' lee yag cruza' kwenche bich goncho txen saaxyana', san soacho goncho ka cheeni Chioza'. Na' daa wxak'zi'en, zoale shi'a shao'. ²⁵ Kani'yi wdale ka xil'do' ba wnit. Per naa ba nakle lall' na' Crïstona', beena' chap chwia le' ka ben' chap chwia xil' cheyin, na' zie' wñeyi chele.

3

¹ Le' noolæ zoa ben' chele, li wlexj yichjle lawe'ka' kwenche shi bi chajle'gake' cho'a xtill' Chioza', gakbe'gakile' nakan dii wen ka ile'gakile' nsa' chele wen. Na' aga çhini gat'yoile legake' shajle'gake' cheyin, ² san daa wwiazgake' chonle wen lega ben' chall chlleb Chios shajle'gake'. ³ Bitek sele wñeyi naklæ gon kwintle xochi: ka no naklæ yipaa yichjle, na' wchinzle no bga no niy de or, wa gakwle lech' dii zakii nleeb. La' aga diikin dii lliälote. ⁴ San dii lliälote gakshao' loo yichjall'do'lena' kwenche gakle ben' gaxjlall' na' ben' lall'do' xen, la' lënan' nakan yel' xochi dii bi te cheyin na' zak'chgayin lao Chioza'. ⁵ La' kan' ben noolka' kani'yi, ben'ka' gok ben' li ben' shao'. Bxenilall'gake' Chioza' na' blexj yichje'ka' bzenaggake' che ben' che'ka'. ⁶ Ka ben dii Sárana', bzoe' xtill' dii ben' che', Abrahamä', na' golle'ne' "xan". Na' le' nakle dia che' shi gonle wen ka bene' na' bi illeble bi gak chele.

⁷ Na' ka le' ben' byo, li goni xool-leka' wen. Li gapshiigake' daa bi nakgake' chech ka cho' ben' byo, na' daa nezile lengaken' chidol' ikaa yel' mbanna' daa gon Chioza' chele. Li gon dga kwenche bibi wsej wllonan wzenag Chioza' chele kat' choe'lwill-lene'.

⁸ Na' sto dii nia' le', yog'lotle chiyal' soalen ljwell-le wen, na' gakle ben' lall'do' yesh', na' gaki ljwell-le ka chakile' to ben' bish' goljle. Li

yyesh'lallii ben', na' li' gak ben' gaxjlall'. ⁹ Bi yizi'zle wzon che beena' chon mal chele wa beena' chbell chne chele. San li' inabi Chioza' gak wen che', daa nezile gox wñabe' le' kwenche gak wen chele. ¹⁰ La': Beena' cheeni idie' lo yell-lioni na' gakte wen che',

chiyal' wsakee kwell inie',
na' bi wi'e latj ichej dill' wxiye' cho'a lolleena'.

¹¹ Chiyal' yilaalawee dii mala', na' gone' daa nak wen.

Chiyal' sie' wñeyi soalene' ben' mbalaz.

¹² La' Xancho Chioza' chap chwie' ben'ka' nak ben' li' ben' shao', na' chzenague' kat' chñabgake' yel' goklen che'na', per bi chle'shiile' ben'ka' chon mal.

¹³ Aga no bi goni le' shi toshiizi ze le chonle dii wenna'. ¹⁴ Per shi yel' chon wen chelena' wtil'le yel' zak'zi'ka', chakomba le'. Na' bi gall illebze bi goni ben' le', na' bi gakshejlall'le. ¹⁵ San do yichj do lall'le li' koo Crístona' balaan, beena' nak Xancho. Na' toshiizi li' se wñeyi che dill'ka' yilliile lao nottezə ben' inabile' le' cheyi daa ba nonle lez. Na' xochi li' we'lengake' dill'. ¹⁶ Na' li' gon daa nezile nak wen daa nakle Crístona' txen, kwenche ben'ka' naz chele bi chonle wen si'gake' yel' zto'. ¹⁷ Wenchlan sak'zi'cho daa choncho wen, shi ka' cheeni Chioza', aga ka daa sak'zi'cho daa choncho mal.

¹⁸ La' shlin shlaxjzan wxak'zi' Crístona' ni che saaxya chechoka'. Aga bi xtolee got, per wxak'zi'e ni checho cho' ben' mal, kwenche bizoalencho Chioza' wen. La'kzi' beli chen che'na' ble'in yel' wita', Espíritu che Chioza' bisbane'ne' ladj ben' wetka'. ¹⁹ Na' wyaje' latja' gana' nej ben' malka'* jtixje'ile' legake' daa bene' gan dii mala' na' yel' wita'. ²⁰ Legaken' gogkake' widenag kana' wzoa dii Noéna', na' wdap Chioza' yel' chxenlall' chegake' shlak ben dii Noéna' barkwa'. Na' xon'chga ben'ka' wyoo loo barkwa' bi wlliai'y'gake' loo nisa'. ²¹ Na' daa bila ben'ka' loo nisa' kani'yi, zaklebin daa chchoacho nisa' naa. Na' daa chchoacho nisa' aga chixis chiyiban kwerp chechoni, san chli'n ba wñabicho Chioza' yixis yiyibe' yichjlall'do'choni kwenche sho' yichjcho bich bi xtol'cho de. Na' de yel' mban checho zejli kani' daa biban Jesucrístona' ladj ben' wetka'. ²² Na' biyep'e yabana', jachi'e shlaa de shli' che Chioza' na' chñabi'e lao anjlka' na' lao bichlə yel' wñabia' dii de.

4

¹ Na' kon ka gok che Crístona' wxak'zi'lene' beli chen che'na', ka'kzan chiyal' izani kwinle. La' beena' ba wxak'zi' beli chen che'na' bich chñabia' saaxyana' le'. ² Na' bich gonze' daa nazan che beli chen che'na' shlak ni mbane', san gone' ka cheeni Chioza'. ³ Ba gok to ka't' chonle txen ben'ka' bin' gombia' Chioza', choe'gake' cho'a xbayi beli chen che'ka', chongake' kon daa nazan chegake', chzoll chnitgakile', chaoxatgake', biz chegake' chon, na' choe'la'ogake' no yaj yag, diika' chakzbani Chioza'. ⁴ Na' dii xen chaklejjgakile' naa daa bich chonle legake' txen lawi diika' bi yejni'alallii, na' chiya dii chon chnagake' chele. ⁵ Per wllin lla yidegake' kwent lao beena' ba ze kwas wchogloe' che yog'lol' ben', ka ben' ni mban ka ben' ba wit. ⁶ Daan, ben'ka' bengakile' dill' wen dill' kob che Chioza' na' wyajle'gake'n, la'kzi' witgake' ka ba nchogbia' gak che yog' ben' yell-lío, ni mbankzgabe' lao Chioza'.

⁷ Daa ba zoa gao kwiaiyi' yog'lo_lte dii de, chiyal' gakte ben' nyeen nyeeniyi na' sele wneyi we'lwill-le Chioza'. ⁸ Na' dii lli_lalote, gaki ljwell-le, la' beena' nap yel' chakina' chonxenlallee ka'k'tezə dii choni ben' le'. ⁹ Li wleb ljwell-le loo yoo lill-le do lall'le. ¹⁰ To tole chiyal' wgonle llin wde wdeli diika' non Chioza' gakte gonle kwenche kon ga chyal_ljan wchinlen gakenle ben' yoblə. ¹¹ Beena' naki che' wi'e cho'a xtil_l Chioza', chiyal' ine' kon ka nan. Na' beena' naki che' gaklene' gone' to llin, chiyal' wchine' doxente fuerza' be' Chioza' le'. Na' yog'lo_l daa gonle, li gonan kwenche shajla'o Chioza' daa nakle Jesucristona' txen. La' le' chido_lee sho'e balaan na' inabi'e zej_li kan_i. Kan' nakan.

¹² Le' ben' bish'dawaa na' le' ben' zandawaa, bi gaktejile na' yibanzile daa chle'ile yel' zak'zi'ka', la' bi nakan ka dii yibanicho. ¹³ San li yibayi daa lenle chzak'zi'le ka diika' wxak'zi' Crístona', kwenche lekzka' yiba yizakile kat' ile'ile ziza'lene' balaan xen che'na'. ¹⁴ Chakomba le' shi no ine zban chele daa nakle Crístona' txen, la' Espirituna', beena' nak ben' choo ben' xen che Chioza', zoalene' le'. ¹⁵ Shi nole chzak'zi'le, wenlan sak'zi'le daa chonle dii wenna' aga ka daa sak'zi'le daa nakle wen xya, wa jlanle, wa benle bichlə dii mal, wa jalalli chele ga bi chak che ben'. ¹⁶ Na' shi chzak'zi'le daa nakle Crístona' txen, bi chiyal' yiyii yido'ile, san li we'la'o Chioza' daa naklene' txen.

¹⁷ Ba bllin lla solo gon Chioza' yel' joschis che ben'ka' non_lilall'gake'ne'. Na' shi solon ladjchoni, çnakla gakte che ben'ka' bi chzenag dill' wen dill' kob che Chioza', lla? ¹⁸ Na' shi ben'ka' zej sh_li dii zan dii chen chle'gakile' na' ax_t kayaadia yilagake' lawinka', çalechli ki gakte che ben'ka' bi chall chllēb Chioza' na' ben' saaxyaka'? ¹⁹ Na' ben'ka' chzak'zi' kon ka nllia Chioza' bia' gakte chgake', toshiizi chiyal' gongake' dii wenna' na' gon kwingake' lall' na' Chioza', beena' bxe bsile' legake', na' gaklene' legake' ka bchebe' gone'.

5

¹ Le' ngoo lo na'le bish' ljwellchoka' non_lilall' Crístona', lekzka' nad' nlan' ka daa nlanle, na' ble'teid' ka wxak'zi' Crístona', na' len' chido_laa ikaa balaan xenna' kat' yilee. Daan, chat'yoid' le': ² Gap wwiale ben'ka' ba non_lilall' Chioza', ben'ka' ba none' lall' na'le. Li gonan lega ben' chibayi gon ka chazlall' Chioza'. Na' aga gonyaadiazlen, ni bi gonle lez gaxjle dii xen, san li gonan do yichj do lall'le. ³ Na' bi gonle ka chnabia'tegal lao ben'ka' nak lall' na'le, san chiyal' wli'le chonle wen lawe'ka'. ⁴ Na' kat' yila' Jesucristona', beena' chnabia' yog'lo_l ben'ka' chap chwia ben'ka' non_lilall'gake'ne', na' gone' le' to balaan xen daa biga te cheyin.

⁵ Na' lekzka' le' bi' xkwid', wlexj yichjle lao ben' golka'. Na' yog'lo_l-le chiyal' wlexj yichjle lao ljwell-le ganga, na' gakte ben' gaxjlall', la': Chioza' bi chle'shiile' ben'ka' chep cha'lall', san chaklene' ben'ka' nak gaxjlall'.

⁶ Li gakte ben' gaxjlall' lao Chioza', beena' nap yel' wak choo yel' wak xen, kwenche kwee le' balaan kat' illin llana'. ⁷ Li gon lall' na' Chioza' yog'lo_l dii chak chele, la' le' zie' wneyi chele.

⁸ Li gakte ben' nyeen nyeeniyi na' li se kwas. La' dii xiwaa daa chakzi' chakzbani cho' chdan ka to bell znia, ba chbi_l chdon, na' chyljan no wlliaiyi'n. ⁹ Li soatip li soashosh gon_lilall'le Crístona' na' bi we'zle latj che dii xiwaa, la' nezkzile' doxenze yell-lioni yog'lo_l ben'ka' nakcho txen ba chle'gakile' yel' zak'zi'ka' ka diika' chen chle'ile. ¹⁰ Na' ka ba biyoll wdele

yel' zak'zi'ka' shloll, Chioza', beena' nap yel' chiyesh'lall' xen, yiyone' le' ka chazlallee na' gone' ka gakchachle na' yizoatip yizoashoshe' le'. L̄a' lekzen' gox w̄nabe' cho' kwenche yido'cho balaan xen che'na' daa bi te cheyin daa nakcho Crístona' txen. ¹¹ L̄en' chidolee sho'e balaanna' na' in̄abi'e zejli kani. Kan' nakan.

¹² Ben' bish'cho Silvónoni, beeni nezid' zoatip zoashoshe' nonlilallee Crístona', goklene' nad' bzej' le' to chop cho'a dill' kwenche wtip' lall'le. Na' dga nia' le' chli'n dii licha chaki Chioza' cho'. L̄i soatip l̄i soashosh lo yel' chaki che'na'.

¹³ Ben'ki nonlilall' Crístona' yell Babilóniani, ben'ki ba gox w̄nab Chioza' ka gox w̄nabe' le', na' lekzka' Márconi, bi'ni nak ka dowalj bi' cha', chwap-gake' le' chiox. ¹⁴ L̄i wwap chiox ljwell-le lega ben' chaki ljwellin.

Soashgale mbalaz yog'lol-le le' nakle Crístona' txen.

Kart wchopi daa bzej Pédróna'

¹ Nad' Pedro, nak' wen llin che Jesucristóna' na' nak' postl che'. Chzej' le', ka le' ba nonlilall'cho Jesucristóna', beena' nak Chios checho na' ba bene' cho' yel' mban zejli kani daa nake' ben' li ben' shao'. Na' daa nonlilall'chone' nakan to dii zakii. ² Gaklenshga Chioza' le' na' gone' ka soale mbalaz inleeb daa ba nombia'lene' na' nombia'tele Xancho Jesús'a'.

³ Kon yel' wak che'na' ba none' cho' yog'lol' daa chyalljicho kwenche soacho goncho ka cheenile' daa nombia'chone', na' lo yel' ben' wen che'na', daa nak dii xen inleeb, gox wñabe' cho'. ⁴ Na' daa nake' ben' wen inleeban, bchebe' gone' ka gakle ben' wen ka nake' le', na' yilale lao daa chxinj chlenan ben' yell-lioni daa chongake' daa nazan chegake'. Na' daa bchebe' gone' checho nakan dii wen inleeb na' dii xen zaka'n. ⁵ Daan, le' ba chonlilall'lene' chiyal' gonle ka dii le kwenche gonle wen, na' gapchle yel' sin', ⁶ na' inabia' kwintle, na' gaple yel' chxenlall' kat' bi chak chele, na' gonle ka cheenile', ⁷ na' ile'shii ljwell-le na' gakile yog' ben'.

⁸ Shi zizikchli gonle yog' diiki, gonan ka gakbia' lo yel' mban chelena' bi bembia'dadzle Xancho Jesucristóna'. ⁹ Per beena' bi chon diiki, nake' ben' bi nteyi daa ba gol-lallee ba bixi biyech saaxya che'na' bene'. ¹⁰ Daan, le' ben' bish'dawaa na' le' ben' zandawaa, daa ba gox wñab Chioza' le', li gon ka dii le soachechle gonle diiki. La' kat' ba chonle diiki bibi de wchixan le', ¹¹ na' le shajla'ole kat' yilline gana' chñabia' Xancho Jesucristóna', beena' bisle' cho'.

¹² Daan, toshiizi yisaa lall'le diiki, la'kzi ba nezilen na' ba zoachechle chajle'le dill' li che Chioza' daa ba nombia'le. ¹³ Shlak ni mban', chakid' chiyal' yisaa lall'le diiki, ¹⁴ la' nezid' ba zoa gaoshosh guet' kon ka ba wna Xancho Jesucristóna' gak cha'. ¹⁵ Na' gontekz' to dii byen we'len' le' dill' naa ni mban' kwenche lekzka' kat' ba wit' ljadinile' diiki ba wnia' le'.

¹⁶ Diika' ba bli' bsedinto' le' che yel' wak che Xancho Jesucristóna' na' cheyi daa yiyede', aga nakan dii biyiljall'zə ben', san chopshosh jalaonto'kin ble'into' yel' ben' choo ben' xen che'na'. ¹⁷ Ble'into' ka wloo Xacho Chioza'ne' balaan len yel' chey cheeni' che'na' ka wnie' yabana' gana' nak liizelozí mbalaz, na' wne': "Beenin xiinaa, le chakidee na' chazlall'chgaid' ka chone'." ¹⁸ Neton' zelennto'ne' lo yaa che Chioza' na' kwinnon' beninto' shii Chioza' ka wnie' yabana'te.

¹⁹ Na' daa ble'into' dga, bichop cho'a dill' daa bzej dii ben'ka' wdixjee daa goll Chioza' legake' kani'yi. Na' le', chiyal' sele wneyi xtilleeka', daa nakan ka to yi' daa chzeeni' ga nak shgasj shchol, ax't ki illin lla yiyed Jesucristóna', beena' chzaklebi belj xsila', na' kooche' beeni' che'na' loo yichjlall'do'leka'. ²⁰ Na' dii lliallote shajniile dga: ni to cho'a dill'ka' bzej dii ben'ka' wdixjee daa goll Chioza' legake' kani'yi bi nakan dii wdiljlall'zgake'. ²¹ La' dii ben'ka' wdixjee daa goll Chioza' legake' kani'yi, biga wnegake' tobia'lall'zgake', san Espíritu Sántonan' bzajniile' legake' kwenche be'gake' xtille' Chioza'.

2

¹ Per lekzka' ladj ben' Israelka' wzoa ben' wxiye', wnazgake' chyixje'gake' daa goll Chioza' legake'. Na' ka'kzə ladjlena' soa ben' wli' wsedi de wxiye'ka'. Na' wli' wsedgakile' le' ka ki gakbe'zile' de wxiye'

che'ka' daa chlliayi' ben'. Na' wzoagake' ka'lə Xanchona', beena' wdixj saaxya che'ka'. Na' daa gongake' ka', tolbe' kwiayi'gake'. ² Ben' zan gongake' txen dii mal che'ka' na' gongake' dii zban daa nazan chegake'. Na' ni chegake' ine ben' zban che dill' li che Chioza' daa nocho. ³ Daa saall'gake' gat' kwe'gakile', wli' wsedgakile' le' daa chyiljall'zgake'. Kani'teyi ba nchogbia' chegake' kwiayi'gake', na' bich gaxen chegake'.

⁴ Chioza' bi wxi'xene' che anjlka' bxinj, san btakw bcheje' legake' lo yel chol'a' latja' gana' nseje' legake', na' nan' nkweze' legake' axt kat' illin lla wchogloe' chegake'. ⁵ Ni bi wxi'xene' che ben' yell-lioka' kani'yi, san bene' yejsiw' wala' bliiayee ben' malka'. Per dii Noéna', beena' wdixje'i ben' nan' chiyal' gongake' wen, Chioza' bisle'ne' len zi gall ben'. ⁶ Lekzka' Chioza' bchogloe' che ben'ka' lle' yell Sodómana' na'ch yell Gomórrana', na' bzey btie' yellka' axt ka biyakgakan de, kwenche ile'i ben' ka' gag che ben' malka'. ⁷ Per bisle' dii Lota', beena' gok ben' wen, beena' bwiyi dii zbanka' ben ben' malka'. ⁸ Na' ben' wenni wzoa ladjeka', gokyeshii loo yichjall'do'ena' ni cheyi dii malka' ble'ile' bengake' yog' lla. ⁹ Yog'lol diiki chli'gakan nan Xanchona' nezile' nak gone' yisle' ben'ka' chon ka chazlallee lawi bitteez dii lallj. Na' lekzka' nezile' nak wkweze' ben' malka' axt kat' illin lla wchogloe' che yog'lol ben'.

¹⁰ Na' dii lliarote wsak'zi'ch Xanchona' ben'ka' choe' cho'a' xbayi beli chen che'ka' daa nxiñ yichjall'do'eka', na' bi cheentegakile' no inabia' legake'. Ben'ka' bibi nalli na' nakgake' ben' cha'sib, na' ni bi chllibgake' inegake' che anjlka'. ¹¹ San anjlka', la'kzi nakchgake' ben' walch na' napchgake' yel' wak xench, bi chiyaxgakile' inegake' che anjlka' bi bzenag kwenche gaogake' xya chegake' lao Chioza'.

¹² Per ben'ki chnetezgake' zban che diika' bi chajni'gakile'. Nakgake' ka bayix'ka' baka' bi nteyi, baka' chaljgakb na' chzen ben' legakb na' chitgake'b. Ka'kzan gag che ben'ka', lekzka' kwiayi'gake'. ¹³ Na' ikaagake' laxji dii mala' ba bengake'. Ben'ki chakgakile' zix' sia choe'gake' cho'a' xbayi beli chen che'ka' axt tellatekzə. Na' kat' chhengake' le' cheej chaole, bi nxe bi nzak' nakgake' daa chibagakile' chongake' daa nazan chegake'.

¹⁴ Nottezə noolə ile'gakile' chzelall'gake'ne', na' bi chelj chlla'gakile' gongake' saaxyana'. Na' chgooyel'gake' ben'ka' bin' gachka lo xnez Chioza' kwenche gongake' dii mala', na' le' chzelall'gake' gat' kwe'gakile'. Ben'ki chon ka' ba nakten kwiayi'gake'. ¹⁵ Ba wlej yichjgake' nez li che Chioza' na' ba zejgake' lo nez daa wyoo Balaama' xiñ Beora', beena' wyoolall' sho' laxje' che dii mala' bene'. ¹⁶ Na' ni che dii mala' nan gone', to burr, ba bi chak ine, wneb ka ben' na' bsheshlem le' kwenche bi gone' dii mala' ba ngoo yichje' gone' daa nchol' nitile'.

¹⁷ Ben' malki zaklebgakile' beja' daa bich bi nis chal, na' ka bejka' choa' be'na'. Ba nchoglo chegake' soagake' zejli kani' gana' liizelozii nak shgasj shchol. ¹⁸ Chnegake' cha'sibə choe'gake' dill' dii bibi zakii, na' chgooyel'gake' ben'ka' kayaadia ba bichejgake' ladj ben'ka' chon dii mala' kwenche sto shii yizologake' yiyoe'gake' cho'a' xbayi beli chen che'ka'. ¹⁹ Na' che'gake' wak gongake' daa nazan chegake', la' aga bi xya che dii mala' de, na' le'yen'gaken' ntakw nchej dii mala'. La' nottezə ben' chone' kon ka na' daa chnabia' le', ba ndo'e lawinna'. ²⁰ Na' ben'ka' ba biyell bila'gake' lao dii mala' daa de yell-lioni daa ba ben'ilall'gake' Xancho Jesucristona', beena' bisla cho', shi sto shii yitakw yichej dii mala' legake', gaktechlə mal chegake' aga ka gok chegake' dii nech kana'

bin' gonlilall'gake'ne'. ²¹ Wenchlan shel' bi bembia'kzgake' nez li che Chioza' aga ka daa bembia'gake'n na' bilaala'ogake' cho'a xtilleena' daa bli' bsemi ben' legake'. ²² Na' daa bengake' ka', billinin che dillaa de daa na: "Bekwaa chiyaob daa biyebb, na' kusha', bana' zi' gozj, chibix chitolb loo benja' sto shii."

3

¹ Le' ben' bish'dawaa na' le' ben' zandawaa, dgan de wchop shii chzej' le'. Na' chopten choe'len' le' dill' kwenche chisaa lall'le sele wneyi che dii wenna' daa ba nezile. ² Li lljadini dill'ka' be' dii ben'ka' wdxjee daa goll Chioza' legake' kani'yi, na' daa blia Xanchona' bia', beena' bisla cho', daa ba bli' bsemi postlka' le'.

³ Dii llialute chiya' inezile, kat' ba zoa te che yell-lioni, na' ichej ben' gongake' daa nazan chegake' na' gonlegake', ⁴ inagake': "¿Berache bin' yiyed Crístona' ka bchebe' gone'? Ba wit dii xaxna'choka' na' toz ka ni chak naa ka kana' wxe wzilte yell-lioni." ⁵ Ben'ka' na' ka', bi cheengakile' yisa'lall'gake' daa gok kani'yi, kana' to ka wnezə Chioza' na' wya' wbin yabana', na' biyak nido'ka' toz na' bli'lao yell-liona'. ⁶ Na' lekzka' len' blie' bia' gok yejsiwaa kwenche bliayi' nisa' yell-lioni kani'yi. ⁷ Na' yabana' len yell-lioni, diiki chle'icho naa, ba nllia Chioza' bia' chegakin wzey wte yi'na' legakan llana' wchogloe' kwiayi' yog' ben' malka'.

⁸ Na' le' ben' bish'dawaa na' le' ben' zandawaa, bi gal-lall'le Xanchona' chle'ile' tlla ka to mil yiz na' to mil yiz ka tllazə. ⁹ Zoa ben' ne' chshe'lall' Xanchona' gone' ka bchebe'. Aga chshe'lalleen', san nape' ye' chxenlall' daa bi cheenile' no kwiayi', na' cheenile' yog' ben' yiyaj yileni.

¹⁰ Llana' yiyed Xanchona' tokonganzan yilee, ka chon to ben' wban tokonganz cho'e loo yoo lill ben'. Na'ch gak to sshag wal na' yinitlo yabana' na' diika' llia xaninna', wzey yi'na' legakan na' kwiayi'gakan, na' yell-lioni na' yog' dii de lawinna' sheygakan.

¹¹ Daa nezicho yog'lolte dii de kwiayi'gakan, chiya' goncho ka dii le gakcho ben' li ben' shao' na' soacho goncho ka cheeni Chioza' ¹² shlak chbezcho llana' wchogloe' che ben', na' goncho to dii byen kwenche yob gakan. Llana' gak ka', yi'na' wlliai'y'n yabana' na' diika' llia xaninna' yilengakan na' kwiayi'gakan. ¹³ Na' cho', chbezcho to yaba kob na' sto yell-lío kob daa bcheb Chioza' gone' cho' gana' she' shgal' ben' li ben' shao'.

¹⁴ Daan, le' ben' bish'dawaa na' le' ben' zandawaa, shlak zoale chbezle diiki, li gon to dii byen kwenche soalenle Chioza' wen, na' bibi xtol'le gat' ni bibi nda' nchen yichjall'do'lena' kat' lljazele lawe'na'. ¹⁵ Na' chiya' shajniile' dga: Xanchona' nape' ye' chxenlall' checho daa bi cheenile' kwiayi'cho, san cheenile' yog'cho yilacho. Na' lekzka' ben' bish'cho Páblona', beena' le' chakicho, bzeje' xtillii diiki kon ye' sin' daa be' Chioza'ne'. ¹⁶ To to ka bzej Páblona', bi'e dill' che diiki. Na' bal' diika' bzeje' le' lallj shajniichon, na' ben'ka' bi nteyi len ben'ka' bin' gakcha lo xnez Chioza' chajni'gakile'n klelə, ka chongake' che bichlə daa na Cho'a Xtill' Chioza', chajni'gakile'n klelə, na' chlliai'y' kwingake'.

¹⁷ Na' le' ben' bish'dawaa na' le' ben' zandawaa, daa ba nezile dga, li wsak' kwenche ki gonlleji ben' malka' le' na' yilaale lo xnez Chioza'. ¹⁸ San li gon ka dii le shajni'chile ka chaklen Xancho Jesucristona' cho', na' li gombia'ch beena' bisle' cho'. Len' chidolee sho'e balaan naa na' zejli kani. Kan' gakan.

Kart nech daa bzej Juanna'

¹ Chzejnto' le' kwenche inezile che beena' ba zoa kana' zi' xe sil yell-lioni, beena' bzenagnto' bi'e dill' na' chopshosh jalaonto' kin ble'into'ne'. Bwianto' ka nake' na' bex'nto'ne' kon na'nto'ki kana' wde' yell-lioni. Len' nake' Xtill' Chioza' na' len' cho'e ben' yel' mban zejli kani. ² Na' beeni nsa' yel' mban zejli kani bide' yell-lioni, na' ble'into'ne' na' choe'nto' dill' che'. Na' chyixje'into'n le' kwenche inezile ba zoalenkze' Xacho Chioza' kana' zi' xe silte yell-lioni na' ba bidsoe' ladjchoni. ³ Chyixje'into' le' che beeni ble'into' na' bzenagnto' bi'e dill', kwenche yiyoll yido gagle neto' txen. Na' dii li ba nakkzcho txen Xacho Chioza' na' Xiine' Jesucristona'. ⁴ Chzejnto' le' diiki kwenche yiyoll yido soale mbalaz.

⁵ Diikin bli' bsemi Jesucristona' neto', na' chyixje'into'n le': Chioza' nake' ka beeni' daa nake' liizelozi ben' li ben' shao', na' bibi dii mal ni de wxiye' nsee, diika' nak ka yel chol. ⁶ Shi inacho nakchone' txen na' chdatecho lo yel chol'a, chziye'zchon na' bi zejlencho daa nak dii li. ⁷ San shi zoacho lo beeni'na' ka zoa Chioza' lo beeni'na', na' ba nakcho toz, na' xchen Xiine' Jesucristona' chixis chiyiban yichjlall'do'chona' kwenche bibi saaxya nda' nchenan.

⁸ Shi inacho bibi saaxya napcho, chziye'z kwinchon, shi naa, na' nakbia' bi nombia'cho dii lina'. ⁹ San shi yixoadol'cho saaxya chechoka' lao Chioza', beena' toshiizi chon ka chchebe' na' nake' ben' li ben' shao', wizi'xene' saaxya chechoka' na' yixis yiyibe' cho' che yog'lol dii malka' ba bencho. ¹⁰ Shi inacho bin' goncho saaxya, ba chtobicho Chioza' de wxiye'na', na' nakbia' bin' gombia'cho cho'a xtilleenan', shi naa.

2

¹ Le' xiindawaa, chzej' le' dga kwenche bi wxinj wlenle. Na' shi nocho ba bxinj blencho, zoa to ben' inabe' cho' lao Xacho Chioza', len' Jesucristona', beena' nak dowalj ben' li ben' shao'. ² Na' len' wdixje' saaxya chechoka' kon yel' mban che'na', na' aga che to cho'zan wdixje', san len' che yog' ben' lle' zbii zkaan yell-lionin.

³ Shi choncho ka nllia Chioza' bia' goncho, nezicho ba nombia'chone'. ⁴ Na' shi zoa ben' ne': "Nombi'ane'", na' bi chone' daa nllie' bia', nake' to ben' wxiye' na' nakbia' bi nombi'e dii lina'. ⁵ San shi ba choncho ka na' cho'a xtill' Chioza', dii li ba chakichone' ka chiya'li. Na' kan' chakbe'icho ba nakchone' toz. ⁶ Beena' ne' ba nake' Chioza' toza chiya'li wsa' che' ka bsa' che Jesucristona'.

⁷ Le' ben' bish'dawaa na' le' ben' zandawaa, ka nak dga chzej' le' bi nakan dii kob, lekzannan' bzenagle dii nechte. Nakan dii nllia Chioza' bia' kani'teyi na' bakza yoon nagle. ⁸ La'kzi ka', wak inacho dga chzej' le' nakan dii kob, la' dii li nakan ka ben Crístona' na' ka chonle. Na' dii mala' daa nak ka yel chol' zej chiyol chinitan, na' beeni' che Chioza' ba chzeeni'n.

⁹ Shi to ben' ne' zoe' lo beeni' che Chioza', na' chakzbanile' bish' ljwelle'na', lo yel chol'an' ni zoe'. ¹⁰ Beena' chaki bish' ljwelle'na' ba zoe' lo beeni' che Chioza', na' bibi de wchixan le'. ¹¹ San beena' chakzbani bish' ljwelle'na' chde' lo yel chol'a' na' bi nezile' galan zeje', la' dii mala' chone' ba nonan le' ka to ben' lchol'.

¹² Le' xiindawaa, chzej' le' dga, daa ba bizi'xen Chioza' saaxya cheleka' daa wit Jesucristona'. ¹³ Le' zoa xiin chele, chzej' le' dga daa nombia'le beena' ba zoa kana' zi' xe silte yell-lioni. Le' bi' wew', chzej' le' dga daa chzoile bi' chzenagle che dii xiwaa.

Le' xiindawaa, chzej' le' dga daa nombia'le Xacho Chioza'. ¹⁴ Le' zoa xiin chele, chzej' le' dga daa nombia'le beena' zoa kana' wxe wzil yell-lioni. Lekzka' chzej' le' bi' wew', daa nakle bi' wal na' ba bleble Cho'a Xtil' Chioza' loo yichjall'do'lena', na' bi' chzenagle che dii xiwaa.

¹⁵ Bi gaktekile yell-lioni, ni daa de lawinna'. Nottezcho shi chakicho daa de yell-lioni, bi chakicho Xacho Chioza'. ¹⁶ La' yog'lo' diiki de yell-lioni: dii mala' daa chzelall' beli chenna', na' daa chzelall'cho bi dii chle'icho, na' yel' cha'siba'. Aga legakannan' chshab Xacho Chioza', san nakan dii chshab yell-lioni. ¹⁷ Na' yell-lioni chde cheyin len dii malka' chzelall'cho lawinna', san beena' chon ka chazlall' Chioza' de yel' mban che' zejli kani.

¹⁸ Le', xiindawaa, ba zoacho llaka' zeelo. Na' ba benile za' Beena' gatzbanile' Cristona'. * Na' naa ba chle'icho ben' zan ben'ka' chakzbangakile'ne'. Daan, ba nezicho ba zoacho llaka' zeelo. ¹⁹ Legake' ba bengake' cho' txen la'kzi aga dii li gokgake' cho' toza. La' shel' dii li gokgake' cho' toza, ni nakgake' cho' txen, shel'ka'. Na' daa bikwasgake', bli'gake'n kwas'lo' aga do lall'gake'n gokgake' cho' txen.

²⁰ Per beena' nak liizelozu ben' wen ben' shao' ba bene' kwenche zoa Espiritu Santona' loo yichjall'do'lena'. Na' daan, yog'le chajniile dill' li che Chioza'. ²¹ Aga chzej' dga daa inacho bi nombia'le dii linnan', san chzeja'n daa ba nombia'lennan', na' nezicho bibi dill' wxiye' nchix dill' li che Chioza'.

²² ¿Noran ben' wxiye'na'? Len' beena' na che Jesuza' aga len' Cristona', beena' chbezcho wsel' Chioza'. Beena' na ka', len' chakzbanile' Cristona', na' chzoe' Xacho Chioza' ka'la' len' Xiine' Jesucristona'. ²³ Beena' chzoe' Xiin Chioza' ka'la' lenkz Xe' Chiozan' chzoe' ka'la'. San beena' ina chon'ilallee Xiin Chioza', lenkz Xe'nan' nake' txen.

²⁴ Daan, li kooshao' loo yichjall'do'lena' yog'lo' daa wzolo chsedle ka wyoole lo xnez Chioza'. Na' shi ba wlooshao'len loo yichjall'do'lena', toshiizi gakte toza Xacho Chioza' len Xiine'na'. ²⁵ Na' dgan ba bcheb Jesucristona' checho: gone' yel' mban zejli kani.

²⁶ Chzej' le' dga, daa chda ben'ka' cheengakile' siye'gake' le'. ²⁷ Na' ka nakle le', ba nzoa Jesucristona' Espiritu Santona' loo yichjall'do'lena', na' aga chyalljchile no wsedi le' daa nak dii li. La' kwin Espiritu Santona' ba chsedile' le' yog' diika', na' daa chli' chsedile' le' nakan dii li, bi nakan de wxiye'. Na' toshiizi li gak Cristona' toza, ka ba bli' bsemi Espiritu Santona' le'.

²⁸ Na' naa, xiindawaa, chiyal' gakcho Cristona' toz toshiizi kwenche kat' yiyede' yibaicho na' bi yiyii yido'icho lawe'na'. ²⁹ Na' daa ba nezile nake' ben' li ben' shao, lekzka' chiyal' inezile yog' ben'ka' chongake' daa nak shlich'a nakgake' xiin Chios.

3

¹ Li gakbe'i ka chaki Xacho Chioza' cho' daa ne' nakcho xiine'. Na' dii li ba nakkzcho xiinen'. Daan, ben'ka' bi non'ilall'gake' Chioza' bi

* **2:18** Beena' gatzbanile' Cristona': xtila' nagake' El Anticristo. Lekzka' bwia 1Jn. 2:22; 4:3; 2Jn. 1:7, na' 2Tes. 2:3.

chle'shi'gakile' cho', la' bi nombia'gake'ne'. ² Le' ben' bish'dawaa na' le' ben' zandawaa, ba nakcho xiin Chios. Na' la'kzi bin' inezyen'icho nakan yiyakcho, nezicho kat' yila' Jesucristona' yiyakcho ka nake', la' ile'ichone' do ka nake'. ³ Na' nottez beena' ba none' lez dga, bich chone' txen dii mala' kwenche gake' ka nak Jesucristona', beena' bibi dii mal nda' nchene'.

⁴ Na' beena' chxinj chlen chyishje' daa nllia Chioza' bia', la' kat' chxinj chlencho, xtilleenan' chyishjcho. ⁵ Le' ba nezile bid Jesucristona' yell-lioni kwenche bikwase' saaxya chechoka', na' nezteile bibi saaxya che' de. ⁶ Na' yog' ben'ka' nakgake'ne' toz bi chdagake' lao saaxyana'. San yog' ben'ka' chda lao saaxyana' bin' gakbe'gakile' non nak Cristona', ni bi nombia'gake'ne'. ⁷ Le' xiindawaa, bi we'le latj no siye' le'. Beena' chon daa nak shli nake' ben' li ben' shao' ka Jesucristona' nake' ben' li ben' shao'. ⁸ Na' beena' chxinj chlen nake' xiin dii xiwaa, la' dii xiwaa bxinj b'lenan kana' zi' xe silte yell-lioni. Na' ni cheyi dgan bid Xiin Chioza', kwenche wlliaeye yog'lol daa chon dii xiwaa.

⁹ Beena' ba nak xiin Chios bich chde' lao saaxyana', la' Chioza' ba bikobe' yel' mban che'na'. Na' daa ba nake' xiin Chioza', bich gak te' lao saaxyana'. ¹⁰ Na' nakbia' ben'ka' dii licha nakgake' xiin Chios na' ben'ka' nak xiin dii xiwaa. La' nottez beena' bi chon daa nak shli na' bi chakile' bish'ljwelle'na' bi nake' xiin Chios.

¹¹ Kana' wzolotele bzenagle xtil' Cristona' benile dga: chiyal' gaki bish'ljwellcho. ¹² Bi chiyal' goncho ka ben dii Caína', bene' dii xiwaa txen na' bete' ben' bisheena'. Na' ¿biche betze'ne'? Bete'ne' daa bentezi ben Caína' dii mala', na' ben' bisheena' bene' daa chiyoolallii Chioza'.

¹³ Le' ben' bish'dawaa na' le' ben' zandawaa, bi gakklejile shi ben'ka' bi chajle' che Chioza' chakzbangakile' le'. ¹⁴ Daa chakicho bish'ljwellchona' nezicho bich chdacho lo neza' gana' kwiayi'cho, san ba de yel' mban checho zejli kani. La' beena' bi chaki bish'ljwelle'na' ni zeje' lo neza' gana' kwiayee. ¹⁵ Nottez ben' chakzbanile' bish'ljwelle'na', lebzín chonlene' ben' wen xyana'. Na' nezile ni to wen xya bi de yel' mban che' zejli kani. ¹⁶ Cristona' bliile' cho' ka nak yel' chakina' daa bzani yel' mban che'na' ni checho. Na' lekzka' cho' chiyal' izani yel' mban chechoni ni che bish'ljwellchona'. ¹⁷ Shi ga zoacho chaj chdecho mbalaz na' chwiacho bish'ljwellchona' chyallj chchinile' na' bi chiyesh'lallichone', ¿nakran goncho inacho chakicho Chioza'? ¹⁸ Le' xiindawaa, bi chiyal' gaki ljwellcho de cho'a dill'z, san chiyal' wli'cho dii li chaki ljwellcho.

¹⁹ Na' nezicho shi ba chaki ljwellcho, na' wli'n ba zejcho lo nez lina', na' nezicho Chioza' chibaile' ka choncho, ²⁰ la'kzi yichjlall'do'choni inan nakcho ben' saaxya. La' Chioza' nakche' ben' choo ben' xench ka cho' na' nezile' yog'lolte. ²¹ Le' ben' bish'dawaa na' le' ben' zandawaa, shi yichjlall'do'choni chakbe'in bibi xtol'cho de, na' bi gall illebcho we'llwillchone', ²² na' gone' bittez daa inabichone', la' chzenagcho daa nllie' bia' goncho na' choncho ka chazlallee. ²³ Na' dgan nllie' bia' goncho: gonlilall'cho Xiine' Jesucristona', na' gaki ljwellcho ka ba bllie' bia' goncho. ²⁴ Ben'ka' chongake' ka nllia Chioza' bia' ba nakgake'ne' toz na' zoalene' legake'. Na' nezicho zoalene' cho' daa ba bene' Espíritu che'na' zoe' loo yichjlall'do'choki.

4

¹ Le' beṇ' bish'dawaa na' le' beṇ' zandawaa, bi shajle'le che nottez beṇ' ine': "Ba chne Chioza' nad'", san li wwiagaxjə shi leile' Chioza' chnie'ne' wa shi naze'n. La' yell-lioni ba chas chda beṇ' zan beṇ' chziye' nazgake' chyixje'gake' daa na Chioza'. ² Dgan gonan ka gakbe'ile beena' chyixjee daa na Espíritu che Chioza': yog'loḷ beṇ'ka' cho'e dill' nan Jesucristona' nake' Chios na' bide' golje' goke' beṇ' de beli chen ka cho', beena' zoalen Espíritu che Chioza'ne'. ³ Na' nottez beena' ina Jesucristona' bi goke' beṇ' de beli chen, bi zoalen Espíritu che Chioza'ne' na' chakzbanile' Crístona'. Na' ba nezile ba zoa wli'lao beena' gakzbanile' Crístona', na' naa ba chdakz beṇ' chon ka' yell-lioni.

⁴ Le' xiṇdawaa, ba nakle Chioza' tozə, na' bich chajle'le che beṇ' wxiye'ka', la' beena' zoalene' le' napche' yel' wak xench aga ka dii xiwaa daa chda yell-lioni. ⁵ Beṇ' wxiye'ka' nogake' diika' na beṇ' yell-lioki, daan, zle che yell-lionizə choe'gake' dill', na' beṇ'ka' bi nombia'gake' Chioza' chzenaggake' xtilleeka'. ⁶ San cho' ba nakcho Chioza' tozə, na' beṇ'ka' nombia'gake' Chioza' chzenaggake' checho. Na' beṇ'ka' bi nakgake' Chioza' tozə, bi chzenaggake' checho. Na' kan' chnezicho non cho'e dill' li daa chzajni Espíritu che Chioza'ne' na' non cho'e dill' wxiye' daa chzajni dii xiwaane'.

⁷ Le' beṇ' bish'dawaa na' le' beṇ' zandawaa, chiyal' gaki ljwellcho, la' kan' chon Chioza' chakile' beṇ'. Nottezə beṇ' zoe' chaki ljwelle', nakbia' dii li nake' xiṇ Chios na' nombi'e Chioza'. ⁸ Na' beena' bi chaki bish' ljwelle'na' bin' gombi'e Chiozan', la' Chioza' zoe' chakile' cho'. ⁹ Chioza' bli'e ka chakile' cho' daa bselee Xiine'na' tlish' tyaj yell-lioni kwenche gonlilall'chone' na' gat' yel' mban checho dii bi te cheyin. ¹⁰ Kin nak yel' chaki daa nak dowalj: aga inacho cho'lan gokicho Chioza', san daa chaki Chioza' chon' bselee Xiine'na' wite' kwenche wdixje' saaxya chechoka'.

¹¹ Na' le' beṇ' bish'dawaa na' le' beṇ' zandawaa, shi kan' chaki Chioza' cho', ka'kzan chiyal' gaki ljwellcho. ¹² Ni to beṇ' bin' ile'ile' Chioza', per shi chaki ljwellcho, Chioza' zoalene' cho' na' yel' chaki che'na' ba chonan llin lo yel' mban chechoki ka chiyali. ¹³ Nezicho zoalencho Chioza' na' le' zoalene' cho' daa ba nzoe' Espíritu che'na' loo yichjlall'do'choki. ¹⁴ Na' neto' ble'into' Xiṇ Chioza' na' choe'nto' dill' nan Xacho Chioza' bselee Xiine'na' kwenche yisle' beṇ' yell-lioni na' bi kwiayi'gake'. ¹⁵ Nottezə beṇ' chajli'e na' cho'e dill' ne' Jesús'a nake' Xiṇ Chioza', Chioza' zoalene'ne' na' le' zoalene' Chioza'.

¹⁶ Cho' ba nezicho na' ba chajle'cho chaki Chioza' cho'. Chioza' zoe' chakile' cho', na' shi zoacho chakichone' na' chaki ljwellcho, zoalencho Chioza' na' le' zoalene' cho'. ¹⁷ Na' shi ba chaki ljwellcho, chli'cho yel' chaki che Chioza' ba chonan llin lo yel' mban chechoki ka chiyali, na' bi illebcho llana' yizi'e cho' kwent, la' ka wda Jesucristona' ka'kzan chdacho chakicho beṇ' yell-lioni. ¹⁸ Gana' zoa yel' chaki che Chioza' bibi yel' chlleb de. Na' shi dii li napcho yel' chakina' aga wllebcho yel' zi'na' wsel' Chioza'. La' beena' chlleb, bin' gon xshin yel' chaki che Chioza' lo yel' mban che'na' ka chiyal'.

¹⁹ Cho' chakicho Chioza', la' zigaate len' gokile' cho'. ²⁰ Shi zoa beṇ' ne': "Chakid' Chioza'", per chakzbanile' bish' ljwelle'na', chziye'ze'n. ¿Nakran gone' gakile' Chioza', beena' bi chle'ile', len chle'itele' bish' ljwelle'na' na'

bi chakile'ne'? ²¹ Dgan nllia Jesucristona' bia' goncho: Beena' chakile' Chioza', lekzka' chiyał' gakile' bish' ljwelle'na'.

5

¹ Yog'loł ben'ka' chajle'gake' Jesúsza' nake' Crístona', beena' bsel' Chioza', legaken' ba nakgake' xiin Chios. Na' yog' ben'ka' chakgakile' Xacho Chioza' lekzka' chakgakile' ben'ka' nak xiine'. ² Nezicho shi chakicho Chioza', choncho daa nllie' bia' goncho, lekzka' chakicho yog'loł ben'ka' ba nak xiin Chios. ³ Shi choncho daa nllia Chioza' bia' goncho, ba chakichonen', shi naa. Na' diika' nllie' bia' goncho bi nakan zii sshab. ⁴ Na' yog' ben'ka' ba nakgake' xiin Chios chizogakile' bich chongake' dii mala' de yell-lioni. Na' daa chonlilall'cho Jesucristona', chizoicho bi choncho dii mala' de yell-lioni. ⁵ Ben'ka' chajle' Jesúsza' nake' Xiin Chios, legaken' chzogakile' bi chongake' dii mala' de yell-lioni.

⁶ Ka bid Jesucristona' yell-lioni wchoe' nisa' na' blalj xchene'na' kana' betgake'ne'. Aga to wchoaze' nisan', san bene' diiki chopte, wchoe' nisa' na' blalj xchene'na'. Na' Espíritu che Chioza' choe' dill' ka daa gokə, la' len' zeelo cho'e dill' daa nak dii li. ⁷ Na' shon diika' choe'n dill' che Jesucristona': ⁸ Daa bidsoalen Espíritu che Chioza' le', na' daa wchoe' nisa', na' daa blalj xchene'na'. Na' toz ka choe'gakan dill'. ⁹ Chajle'cho dillaa choe' ben', per zak'chi dillaa daa choe' Chioza', na' len' cho'e dill' che Xiine'na'. ¹⁰ Beena' chajle' che Xiin Chioza', nezile xtill' Xacho Chioza' daa bi'e che Xiine'na' nakan dill' li. Na' beena' bi chajle' che Chioza' ba chone' Chioza' ka to ben' wxiye' daa bi chajli'e che dillaa bi'e che Xiine'na'. ¹¹ Na' dillaa bi'e nan: ba bene' cho' yel' mban zejli kani, na' bene'n daa nonlilall'cho Xiine'na'. ¹² Beena' nake' Xiin Chioza' tozə, de yel' mban che' zejli kani, na' beena' bi nake' Xiin Chioza' tozə, bi gat' yel' mban che' zejli kani.

¹³ Chzej' le' dill'ki, ka le' nonlilall'le Xiin Chioza', kwenche inezile ba de yel' mban chele zejli kani.

¹⁴ Nxenlall'cho wzenag Chioza' checho kat' bin inabichone' shi nakan daa cheenile' gaka. ¹⁵ Na' daa nezicho chzenague' checho bin chnabichone', lekzka' nezicho gone' daa chnabichone'.

¹⁶ Na' shi chle'icho to bish' ljwellcho chone' dii mala' daa bi nak dii kwiayi'lene', chiyał' inabicho Chioza' gaklene'ne', na' Chioza' gone' ka yiyakshao' yichjlall'do'ena'. Kan' goncho shi chone' dii mala' daa bi kwiayi'lene'. De dii mala' daa chon ben' daa wlliai'y'n le', na' bi nia' inabile Chioza' gaklene' beena' chon daa nak ka'. ¹⁷ Yog' dii mala' nakan saaxya, per de saaxyana' daa bi wlliai'y'n cho'.

¹⁸ Nezicho beena' ba biyak xiin Chioza' bich zoe' chone' dii mala', la' Jesucristona', Xiin Chioza', chap chwie'ne' kwenche dii xiwaa bich gak gox' wnizan le'.

¹⁹ Nezicho nakcho lall' na' Chioza', na' yog' ben'ka' bi chzenag che Chioza' nakgake' lall' na' dii xiwaa.

²⁰ Na' lekzka' nezicho ba bid Xiin Chioza' na' bidzajniile' cho' kwenche nombia'cho beena' nak dowalj Chios. Na' ba nakcho lall' nee daa nonlilall'cho Jesucristona'. La' Jesucristona' nake' dowalj Chios, na' chone' yel' mban checho zejli kani. ²¹ Le' xiindawaa, mara gonlilall'le chioska' chon benecha'.

Kart wchopi daa bzej Juanna'

¹ Nad' ngoo lall' na' bish' ljwellchoki nonlilall' Crístona' chzej' li', noolə ba wlej Chioza' gako' lall' nee len xiino'ka'.* Na' le chakid' le', na' aga toz nad' chakid' le' san len yog' ben'ka' ba nombia' daa nak dii lin. ² Le chakid' le' daa ba nombia'cho daa nak dii li daa yoo loo yichjlall'do'choka' naa, na' soalenan cho' toshiizi. ³ Chioza', beena' nak Xacho, len Xiine' Jesucristona', gongake' ka gak wen checho, na' yiyesh'lall'gakile' cho', na' gongake' ka soacho mbalaz kwenche zejch gombia'cho daa nak dii li na' gaki ljwellcho.

⁴ Dii xen biba bizakid' ka wnezid' bal xiino'ka'† chdagake' lo nez li che Chioza', kon ka na Xachona' goncho. ⁵ Na' naa, nia' le' chiya' gaki ljwellcho ganga. Dga nia' le' aga nakan dii zi' benicho, san dezd nechte wnezicho dga. ⁶ Dgan ye' chakina': goncho daa non Chioza' mandad. Na' dgan cheenile' goncho: soacho gakichone' na' lekzka' gaki ljwellcho kon ka ba benicho dezd nech.

⁷ Ben' zan ben' wxiye'ka' ba chda yell-lioni, na' bi chajle' gake' nan ba bid Jesucristona' yell-lioni goke' ben' de beli chen. Ben'ka' bi chajle', legaken' ben' wxiye'ka', ben'ka' chakzbangakile' Crístona'. ⁸ Wsak'gale kwenche bi gaktadz llinna' ba benle, san yizi'le banez do ka nak daa chidol'le.

⁹ Nottezə beena' yilaa nez li che Chioza' na' bich zejlene' daa bli' bsemi Crístona', bi zoalen Chioza'ne'. Na' beena' zejlen daa bli' bsemi Crístona', zoalen Xacho Chioza'ne' na' lekzka' Xiine'na'. ¹⁰ Shi no za' gana' zoale zidye'lene' le' dill' daa bi chidilin daa bli' bsemi Crístona', bi wleblene' loo yoo lill-lena', ni bi wwaplene' chiox. ¹¹ La' beena' chlebe'ne', chone' txen dii mala' chone'.

¹² Dii zan dii cheenid' inia' le', per bi chaklallaa gona'n yishzə. San chbez' gat' latj yidkz' gana' zoale kwenche ile'i ljwellcho na' we'cho dill', na' yiyoll yido soacho mbalaz.

¹³ Ben'ka' nak xiin ben' bilo'na',‡ beena' wlej Chioza' gake' lall' nee, chwagake' le' chiox.

* **1:1** Noolə ba wlej Chioza' gako' lall' nee len xiino'ka': ben'ka' nsed nagake' daa na Juanna' ka' zejjen ben'ka' chdop chllag choe'la'ogake' Crístona' gana' bselee karta'. † **1:4** Bal xiino'ka': ben'ka' nsed nagake' zejjen ben'ka' chdop chllag choe'la'ogake' Crístona' gana' bselee karta'. ‡ **1:13** Xiin ben' bilo'na': Llekzka' ben'ka' nsed nagake' zejjen ben'ka' chdop chllag choe'la'ogake' Crístona' gana' zoa Juanna'.

Kart wyoni daa bzej Juanna'

¹ Nad' ngoo lall' na' bish' ljwellchoki nonlilall' Crístona', chzej' li', Gayo, nako' ben' chakid' do yichj do lallaa.

² Ben' bish'dawaa, chñabid' Chioza' kon ka mbalaz nak yichjlall'do'na' lawe'na', ka'kz gak wen cho' lao yog'lolte na' so' shi'a shao'. ³ Le biba bizakid' ka bid bal ben' bish'choka' na' wnagake' zoachecho' lo nez li che Chioza'. ⁴ Bich bi de dii chonan ka yiba yizakchid' ka daa inezid' nan ben'ka' nak ka xiin' zejgake' lo nez li che Chioza'.

⁵ Ben' bish'dawaa, le wen chono' daa chakleno' bish' ljwellchoka' chon xshin Crístona', la'kzi nakgake' ben' zit' ben' bi nombi'o. ⁶ Lao ben'ki lle' ni nonlilall'lenchogake' Crístona' ba be'gake' xtilloo daa le chakilo' legake'. Ben goklen, be'gake' daa chyallj chchingakile' kon ka chaklall' Chioza' goncho, kwenche koochgake' nez. ⁷ La' legake' ba wloogake' nez kwenche gongake' xshin Jesucrístona', na' bibi be'gake' che ben'ka' bi nonlilall'gake'ne'. ⁸ Daan, chiyal' we'cho daa chyallj chchingakile' kwenche gaklenchogake' we'gake' dill' li che Chioza'.

⁹ Ba bzej' le', le' chdop chllagle choe'la'ole Crístona', per Diótrefeza' bi chzenague' daa nia' le' daa cheenile' toze' inabi'e. ¹⁰ Na' daan shi ba gokan yid' gana' zoale na' wsheshlenee, la' chde' biz chon chne' cha'. Na' leyi bi chlebe' bish' ljwellchoka' chla' gana' lle'le. Na' ben'ka' cheeni wleb legake', chsej chlhone', na' chibeje' legake' bich cho'e latj idop illaglengake' le' txen.

¹¹ Li' bish'dawaa, bi leno' gono' dii mala', san ben daa nak wen. Beena' chon daa nak wen nake' Chioza' txen, san beena' chon dii mala' bin' gombi'e Chiozan'.

¹² Yog'za ben' choe' xtil' Demétriona' daa chone' wen, na' nakbia'cha chzenague' dill' li che Chioza'. Na' lekzka' neto' choe'nto' dill' ka wen chone', na' nezkzilo' dill' lin choe'nto'.

¹³ Na' dii zan dii cheenid' inia' li', per bi cheenid' gona'n yishza, ¹⁴ la' chbez' yob gat' latj yidkz' gana' zo' kwenche ile'i ljwellcho na' we'cho dill'.

¹⁵ Chioza' gone' ka soashgo' mbalaz. Ben'ki nllaguicho chwagake' li' chiox. Bwagach chiox to to ben'ka' nllaguicho gana' zo'.

Kart daa bzej Júdaza'

¹ Nad' Judas, nak' wen llin che Jesucristona' na' lekzka' nak' ben' bish' Jacóbona'. Chzej' le', ka le' chaki Xacho Chioza', le' ba gox wñabe', na' chap chwia Jesucristona' le'. ² Chioza' yiyesh'lall'shgaile' le', na' gonshgue' ka soachle mbalaz na' gone' ka gakbe'chile' ka chakile' le'.

³ Le' ben' bish'dawaa na' le' ben' zandawaa, le' ba goklall'chga' wzej' le' na' we'len' le' dill' ka nak daa ba ben Chioza' bisle' cho'. Per chonchan byen wzej' le' kwenche gonle ka dii le shajle'le kwasloj dill' li che Chioza' daa bkwaanlene' cho' che toshiizi, ka cho' nakcho lall' nee. ⁴ La' ladjlena' do ngash'za ba chda bal ben', na' legaken', kani'teyi ba nchogbia' chegake' kwiayi'gake' daa nakgake' ben' mal. Na' nagake' daa chiyesh'lalli Chioza' cho' wak goncho kon daa nan checho. Na' chzoagake' ka'la Xancho Jesucristona', beena' zeelo chñabia' cho'.

⁵ La'kzi le' ba nezilen, cheenid' yisaa lall'le ka biyoll bibej Xancho Chioza' ben' Israelka' Egíptona', blliyee ben'ka' bi wyajle' che'. ⁶ Na' lekzka' bene' che anjlka', ben'ka' wlej yichjgake' yel' wñabia' che'ka' daa bene' lall' nagake', na' bchejgake' latj gana' lle'gake'. Chioza' ntakw ncheje' legake' zejli kani' gana' shgasj shchol, na' nan' nkweze' legake' axt kat' illin lla choo lla xenna' wchogloe' che yog'lol ben'. ⁷ Lekzka' ben'ka' wle' yell Sodómana' na' yell Gomórrana', na' yellka' nllaggakan, bengake' daa wnaz beli chen che'ka', na' wñelen ljwellgake', na' axt ben' byoka' biyat'len ljwellgake' na' bengake' dii zban ka daa bi chiyal' gonlencho beli chen chechona'. Na' Chioza' bselee yi'na' bzey bten legake'. Na' daa bene' chegake' ka', chsi'nile' yog'lol ben' nan de yel' zak'zi' zejli kani' che ben'ka' bi chon wen.

⁸ Na' kan' chon ben' wxiye'ka' chda ladjlena', nazgake' chle'do'gakile', na' choe'gake' cho'a xbayi beli chen che'ka', na' bi cheengakile' no inabia' legake' na' bi nallgakile' chnegake' che anjlka'. ⁹ Kana' anjla' le Miguel, beena' nak ben' choo ben' xen ladj anjlka', gokdil'-lenile' dii xiwaa kwerp che dii Moiséza', bi biyaxjile' chishje' bia' blag' che dii xiwaa, san golle'n: "Chioza', beena' nak Xan', wsheshlene' li'." ¹⁰ San ben' wxiye'ka', chnegake' che dii bi chajni'gakile'. Na' chontezgake' diika' na' beli chen che'ka', ka chon bayix' ba bi nteyi. Na' diika' chongake', leye'n'gakannan' chlliyai'n legake'.

¹¹ Nyesh'laz gak che ben'ki!, daa chongake' ka ben dii Caína', na' daa chongake' dii mala' ni che yel' wzelall' che'ka', ka ben dii Balaama'. Na' daa nakgake' widenag ka dii Coréna', kwiayi'gake'. ¹² Ben'ki nakgake' ka dii bi nxe bi nzak' lengake' ladjlena' kat' chonle lnina' choe'la'o ljwell-le, na' lengake' le' cheej chaogake' ni bi chiyi chido'gakile'. Na' nakgake' ka to ben' chap bayix' na' bi zie' wñeyi chgakb, san legake' chap chwia kwingake'. Na' nakgake' ka bejka' ze xan yabana' diika' bibi nis yolla' na' choa' be'na' legakan. Na' nakgake' ka yag zix' dii bi chbia kat' chllin lla kwian. Latjin dii nan kwian, chilleelan chlall'te do loyin na' chbillan. Na' ben'ka' chon ka' axt chop shiilə ba mbiayi'gake'. ¹³ Na' nakgake' ka bli che niso'da' daa chas chat', na' yel' zto'ka' chongake' nagakan ka bllin' besja' daa chchoon bli che niso'da'. Na' lekzka' nakgake' ka beljka' diika' chlaa xnezinka'. Na' daa chongake' ka' ba nchoglo'chegake' soaga

ke' gana' zeelo nak shgasj shchol zejli kani.

¹⁴ Beena' wle Enoc, goke' beṇ' de galli lo dia che Adánna'. Wdixji'e daa goll Chioza' che beṇ'ki chon dii mala', wne': "Li wwiakachi, za' Xanchona' nchi'e beṇ' zan wal inleeb anjl che'ka' ¹⁵ kwenche wchogloe' che yog'lol beṇ', na' wsak'zi'e beṇ' malka' ni che yog' dii malka' bengake' yel' beṇ' mal che'ka', na' ni che yog'lol daa wchell wnegake' che'." ¹⁶ Beṇ'ki bibikzə chazlall'gake', na' lillinzi chwia chyigake' che beṇ', na' toshiizi choe'gake' cho'a xbayi beli chen che'ka'. Na' chshalj chshon che kwingake', na' choe'la'o choe' dill'gake' beṇ' kwenchezə gongake' beṇ' gan.

¹⁷ Na' le' beṇ' bish'dawaa na' le' beṇ' zandawaa, li lljadini dill'ka' be' postlka', beṇ'ka' ben Xancho Jesucristona' lall' na'gake' we'gake' cho'a xtilleena'. ¹⁸ Wnagake' le', "Kat' ba zoa te che yell-lioni, yid beṇ' wtitj-gakile' che cho'a xtil' Chioza' daa chajle'cho, na' gongake' kon daa nazan chegake'." ¹⁹ Legaken' chongake' choplə beṇ'ka' nonlilall' Chioza', na' chongake' daa na' beli chen che'ka' na' bi yoo Espíritu che Chioza' loo yichjlall'do'eka'.

²⁰ Na' le' beṇ' bish'dawaa na' le' beṇ' zandawaa, li soachech gonlilall'chle Chioza', na' li inabi Espíritu Sántona' gaklene' le' we'lwill-le Chioza'. ²¹ Li gon ka cheeni Chioza', beena' le chaki le', na' li gon lez llana' gon Xancho Jesucristona' cho' yel' mban zejli kanina' daa chiyesh'lallile' cho'.

²² Li yiyesh'lallii beṇ'ka' chakchopi. ²³ Na' zi bale', li yislagake' lawi dii mala' kwenche bi lljayaake' lo yi' gabi'la'. Na' li yiyeshlallii zi bal' beṇ' chon dii malka', per li gakzbani saaxya che'ka' na' li wsak' ki gonle ka chongake'.

²⁴ Shajla'oshga Chioza', beena' nap yel' wak gap wwie' le' kwenche bi ibixle lao dii mala', na' gone' ka lljazele lawe'na' gana' yoo balaan xen che'na' na' yiba yizakile daa bibi xto'l'le de. ²⁵ La' zeelo len' nake' Chios, na' bisle' cho' daa bselee Xancho Jesucristona', na' chidolee koochone' balaan na' we'cho xtillee nake' beṇ' choo beṇ' xen, beṇ' liizelozi chnabia', na' beṇ' yel' wak choo yel' wak xen, naa na' zejli kan'i. Kan' nakan.

Jesucristona' bliile' Juanna' che diika' zi' gak

¹ Dgan blii Chioza' Jesucristona' kwenche bliile' ben'ka' nonlilall' le' daa ba zoa gaoshosh gak. Na' Jesucristona' bselee anjl che'na' kwenche bidzajniile' nad' Juan, nak' wen llin che'. ² Na' cho'a dill' che yog'lol' daa ble'id', na' nezid' nakan dowalj daa wna Chioza' na' daa bli'yi Jesucristona' nad'.

³ Chakomba beena' chlab dill'ki, diiki na Chioza' zi' gak, na' chakomba ben'ka' chzenaggake' na' zegake' wneyi cheyin, la' ba zoa gaoshosh gaggakan.

Juanna' chwape' chiox ben'ka' nonlilall' Cristona' gana' mbani Ásiana'

⁴ Nad' Juan chwap' le' chiox, ka le' chdop chllagle choe'la'ole Jesucristona', le' lle'le yellka' gall gana' mbani Ásiana'. Chioza', beena' zoa ka wxe wzil yell-lioni, na' zoakze' naa, na' ni zoakze' kat' te cheyin, na' espírituka' gall lle' gana' zoe' chñabi'e, gaklenshgagake' le' na' wzoagake' le' mbalaz. ⁵ Na' lekzka' Jesucristona' gaklenshgue' le' na' wzoe' le' mbalaz. Len' beena' choe' dill' li che Chioza', na' len' ben' necha' biban ladj ben' wetka' na' bich bi yel' wit ile'ile', na' nape' yel' wñabia' lao yog'lol' ben' wñabia'ka' lle' yell-lioni. Len' chakile' cho' na' ba bisle' cho' lao saaxya chechoka' daa blalj xchene'na', ⁶ na' ba bene' cho' yel' wñabia'na', na' ba none' cho' bxoz che Xe' Chioza'. Len' chidolee sho'e balaan na' inabi'e zejli kani. Kan' nakan.

⁷ Cristona' yiyede' ladj bejka' ze xan yabana', na' yog'lol' ben' ile'gakile'ne', lente ben'ka' betgake'ne'. Na' yog'lol' ben' lle' yell-lioni kwellyesh'gake' ka ile'gakile'ne'. Kan' nakan.

⁸ “Nadaan zaklebid' letr necha' le A* daa ba zoakz' ka wxe wzil yell-lioni, na' daa zoakz' kat' te cheyin zaklebid' letra' chiyollin daa le Z”,† kan' na Xancho Chioza', beena' zoa ka wxe wzil yell-lioni, na' zoakze' naa, na' ni zoakze' kat' te cheyin, beena' nak ben' yel' wak choo yel' wak xen.

Juanna' ble'do'ile' Jesucristona'

⁹ Nad' Juan, nak' le' txen, na' chñabia' Chioza' cho' daa nakcho Cristona' txen na' la'kzi dii zan dii chen chle'icho daa chonlilall'chone', lekzen' chaklene' cho' chizo chizakicho diika' chen chle'icho. Na' daa chyixji'a xtill' Chioza' na' xtill' Jesucristona' bengake' nad' pres na' bse'l'gake' nad' yell-liodo'ni le Patmos, dga lliá lo nisdó'ni. ¹⁰ Na' gok to lla, llana' nak lla che Xanchona', Espíritu che Chioza' bene' ka benid' wne to ben' zillj inleeb koll'le', ka ga chbell to trompet. ¹¹ Na' wne' nad':

—Bzej dga chle'ilo' to lee yish, na' bse'laan lao ben'ka' chdop chllag choe'la'ogake' Jesucristona' yellka' gall gana' mbani Ásiana': Éfesona', Esmírnana', Pérgamona', Tiatírana', Sárdiza', Filadélfiana', na' Laodiceana'.

¹² Na' biyechj' kwenche ile'id' non chne nad', na' ka biyechj' ble'id' gall candelero de or chal'gakan. ¹³ Na' ladj candelera' gall ble'id' to ben' nake' ka cho' benech, na' nakwe' to xe' dii ton dii ze koll' ni'ena'te, na' ngoo li'ena' to bad' de or bllinten ka de cho'alcho'ena'. ¹⁴ Yish' yichje'na' nakan xtil ka xa xil' wa ka beyaa, na' jalawe'na' chzeeni'n ka bel' yi'. ¹⁵ Na' ni'ena' chep yesan ka daa ne' bronce dii ba beshawee lo yi'na'. Na' shi'ena'

* 1:8 Letr necha' le A: de dill' griegona' letri len alfa. † 1:8

nenan sshag wal ka nen to yao xen daa chxop cho'a bnanja'. ¹⁶ Nee de shlina' noxee gall belj, na' cho'ena' chchejan to spad dii nlatit chop laa. Na' cho'alawe'na' chna'titan ka chna'tit wbilla'.

¹⁷ Ka ble'idee, na' bgoonaa ka ben' wet xni'ena'. Na' bikwise' nad' konnee de shlina', na' wne' nad':

—Bi illebo'. Nadaan zoa' kana' wxe wzil yell-lioni na' nad'kzan ni zoa' kat' te cheyin. ¹⁸ Na' nad'kzan ben' yaa ben' banna'. Betgake' nad', per biban' na' mban' zejli kani. Na' nap' yel' wak yisla' ben' lo yel' wita'. ¹⁹ Bzej dga ba ble'ilo', dga chak naa, na' daa zi' gak. ²⁰ Kin zejli che beljka' gall daa noxaa lo na' de shlini na' che candelerka' gall diika' nak de or: beljka' gall zaklebin gall ben'ka'† chap chwiagake' ben'ka' chdop chllag choe'la'ogake' nad' yellka' gall. Na' candelerka' gall zaklebin ben'ka' gall kwen.

2

Daa golle' ben'ka' lle' yell Éfesona'

¹ 'Bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Éfesona': “Ki na beena' nox' beljka' gall lo nee de shlina', na' zie' ladj candelerka' gall, diika' nak de or: ² Nad' nez nle'id' yog' dii wenna' chonle, ka chonchgale xshin'na' na' ka zoachechle. Na' nezid' bi chleble ben'ka' bi nsa' cheyin wen, na' ba biyiljni'ale ka chon ben'ka' nazə nakgake' postl cha' na' ba gokbe'ile ben' wxiye'zgakan. ³ Dii xen ba benxenlall'le lao diika' ba ben ble'ile ni cha', na' bichga bshe'lall'le. ⁴ Per de to dii bi chazlallid' chele: bich naple yel' chakina' ka daa wdaple dii nechte. ⁵ Li yiyakbe'i bich chonle dii wenna' benle kana'. Na' li yiyaj yileni na' li yiyon sto shii ka benle dii nechte kana' wzolole benlilall'le nad'. Shi bi yiyaj yilenile, na' yid' yikaa candeler chelena' gana' zoale. ⁶ De to dii ni chazlallid' chele: daa chakzbanile daa chon nicolaitaka', diika' lekzka' chakzbanid'. ⁷ Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', wi'a latj gawe' daa lia lo yaga' daa nsa' yel' mbanna', daa zoa latj che Chioza' gana' nak mbalaz inlleb.”

Daa golle' ben'ka' lle' yell Esmirnana'

⁸ Na' lekzka' bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Esmirnana': “Ki na beena' zoa ka wxe wzil yell-lioni, na' ni zoakze' kat' te cheyin, beena' wit na' bibane': ⁹ Nad' nezid' yel' zak'zi'ka' chen chle'ile na' yel' yeshaa daa chak chele. Per de to dii zak'chi chele aga ka yel' wni'ana'. Na' nezid' dii mala' daa chbell chne ben' chele, ben'ka' nazgake' nakgake' ben' Israel, la'kzi dii licha lao Chioza' aga nakgake' ben' Israel, san nakgake' xonj ben' chzenag che dii xiwaa. ¹⁰ Bi gall illeble yel' zak'zi'ka' yen ile'ile. Dii xiwaa gonan ka koogake' ba-le lillyana' kwenche gonan ka bich gonlilall'le nad', na' tele lo yel' zak'zi'na' shi lla. Li soachech gonlilall'le nad' ax't ni ka guetle, na' nad' gon' yel' mban chele zejli kani. ¹¹ Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad' bi ile'ile' yel' wit wchopina'.”

† 1:20 Ben'ka': Dill' griegona' nan angelo. Zoa kat' dillii zejlin anjl, na' zoa kat' zejlin to ben' nsel' ben' lljwee rson wa lljixji'e to dii lljixji'e.

Daa golle' ben'ka' lle' yell Pérgamona'

12 'Na' lekzka' bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Pérgamona': "Ki na beena' nox' spada' daa nlatit chop laate: 13 Nad' nezid' zoale gana' chnabia' Satanáza', per ni zoachehle nonlilall'le nad'. Na' bi wlej yichjle daa nonlilall'le nad', ni kana' betgake' Antípaza', beena' bi bsan wi'e cho'a xtilaana', beena' betgake' lall-lena' gana' zoa Satanáza'. 14 Per de to chop dii bi chazlallid' chele: ni lenzə ladjlena' bal ben' bi cheengakile' yilaala'ogake' daa bli' bsemi dii Balaama' dii Balaca' kwenche wlooyelee ben' Israelka' bxinj blengake', na' wdaogake' yel' waoka' daa bliagake' lao lwaa lsak' diika' be'la'o ben'ka', na' wnelen ljwellgake'. 15 Lekzka' ladjlena' ni len bal ben' bi cheengakile' yilaala'ogake' daa chli' chsemi nicolaítaka'. 16 Na' daan, chiyal' yiyaj yilenile cheyi diika' chak ladjlena'. Na' shi bi yiyaj yilenile, lii za'tia' yidtil-len' le' kon spada' daa chchej cho'ani. 17 Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', na' wwawee daa le maná daa ngash'. Na' lekzka' wi'a to yaj llyish che' gana' da' to le kobe' daa kochno nombia', san toz beena' ikaan gombi'en."

Daa golle' ben'ka' lle' yell Tiatira

18 'Na' lekzka' bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Tiatírana': "Ki na Xiin Chioza', beena' chzeeni' jalawe'na' ka bel'yi', na' ni'ena' nakan ka de bronze dii chnachga: 19 Nad' nez nle'id' yog' dii wenna' chonle. Nezid' naple yel' chaki na' nonlilall'le nad', na' chaklenle ben', na' chzo chzakile bittezə dii chen chle'ile. Na' nezid' ba chonchle dii wenna' naa aga ka benle kana' zi' benlilall'le nad'. 20 Per de to dii bi chazlallid' chele: choe'zle latj zoa noola' le Jezabel ladjlena', beena' chonz ka ben' chyxjee daa che' Chioza' le'. Na' daa chli' chsedile' chziye'lene'n ben'ka' chonlilall' nad', na' chone' ka chnelengake' ben' na' chaogake' yel' wawa' daa chllia ben' lao lwaa lsak' diika' choe'la'ogake'. 21 Nad' ba bi'a latj che' kwenche yiyaj yilenile' daa chnelene' ben', per bi cheenile' kwej yichje'n. 22 Na' ni cheyin wsak'zi'ane', na' lekzka' wsak'zi'chga' ben'ka' chongake'ne' txen chxinj chlangake' shi bi yiyaj yilengakile' cheyi daa chonlengake'ne'. 23 Na' wit' ben'ka' nak ka xiine' daa chongake'ne' txen. Na' yog' ben'ka' chdop chllag choe'la'ogake' nad' to to yell inezgakile' nan nadaan nombi'a do ka nak yichjlall'do' ben', na' gonid' to tole kon ka nak daa chonle. 24 Na' ka le' lle'le Tiatírana' na' bi chonle txen diika' chli' chsemi noola' ni diika' nagake' chzajni Satanáza' legake' daa kochno nezi, bich bi dii yoblə inia' le' chiyal' gonle. 25 Kon li se wneyi gontezi gonle daa nak wen axt kat'ch yiyed'. 26 Na' beena' so saki soacheche' gonlilallee nad' na' soe' gone' ka chazlallaa axt ni ka yiyed', na' wi'ane' yel' wnabia' kwenche inabi'e lao yog' yellka' lle' yell-lioni, 27 ka ben Xa'na', bene' nad' yel' wnabia'na'. Na' inabi'e legake', na' bi si'xene' che nottez ben' bi chzenag che', na' wlliaeye legake' ka ben' chxoxj chtin to yes' yo. 28 Na' lekzka' wi'ane' belj xsila. 29 Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'o nad'."

3

Daa golle' ben'ka' lle' yell Sárdiza'

¹ 'Bzej dga inia' li' na' bse^laan lao beena' chap chwia beⁿ'ka' chdop chllag choe'la'ogake' nad' yell Sárdiza': "Ki na beena' ngoo lall' nee gall espíritu' nak che Chioza' na' noxee beljka' gall: Nad' nez nle'id' yog' daa chonle. Na' la'kzi zeyi chele le wen chonle, lawa'ni bibi zakii daa chonle. ² Li yiyakbe'i, na' li yiyon ka dii le kwenche bi yiyoll yido kwej yichjle dii wenna' ni chonle. La' nez nle'id' daa chonle bi nakan kwas^lol ka cheeni Chios cha'na'. ³ Li lljadini diika' ba bli' bsdgkile' le' na' li wzenag cheyin, na' li yiyaj yileni. Shi bi chonle ka dii le, tokonganzə yidsak'zi'a le', ka chon to wban aga no chsi'nile' kat' chjlane'. ⁴ Na' la'kzi chonle ka', ni len bal beⁿ' ladjlena' yell Sárdiza' beⁿ' bi nda' nchen yichjlall'do'ena' dii mala'. Na' chidol'gake' soalengake' nad' na' gakwgake' to lech' xtil. ⁵ Beena' so saki soacheche' gonlilallee nad', na' wi'ane' to lech' xtil gakwe'. Na' biga yisol' lie'na' lee libr cha'na' gana' nda' le yog' beⁿ'ka' napgake' yel' mban zejli kani. Na' we'len' Xa'na' dill' len anjl che'ka', yepgakee nake' nad' txen. ⁶ Beena' cheni, chiyal' wzenagyenee daa che' Espiritu che Chioza' beⁿ'ka' gall kwente chdop chllag choe'la'ogake' nad'."

Daa golle' beⁿ'ka' lle' yell Filadélfiana'

⁷ 'Bzej dga inia' li' na' bse^laan lao beena' chap chwia beⁿ'ka' chdop chllag choe'la'ogake' nad' yell Filadélfiana': "Ki na beena' nak dowalj beⁿ' li beⁿ' shao', beena' nap yel' wⁿabia' ka daa wdap dii Davina'. Daa chsalje', kono gak yisejan, na' daa chseje', kono gak yisaljan. ⁸ Nad' nez nle'id' yog' dii wenna' chonle. Na' ba bsalj' ka to puert chele na' kono gak wsej wllon sho'le. Na' la'kzi xonjchgale nak, chonle ka na cho'a xtillaana' na' toshiizi chcheble nakle nad' txen. ⁹ Ka nak beⁿ'ka' chzenag che Satanáza' na' chziye'gake' nazgake' nakgake' beⁿ' Israel, nad' gon' ka yidchek' xibe'ka' laolena' na' gakbe'gakile' nad' chakid' le'. ¹⁰ Daa ba benle banez wzoachechle benlilall'le nad', na' gapshii gapshawaa le' kat' illin lla yen ile'i yog'lol beⁿ' yell-lioni yel' zak'zi'ka' kwenche wli'lawin non chzenag cha'. ¹¹ Ba zoa gaoshosh yiyed'. Li se wneyi gontezi gonle daa nak wen kwenche bi wnitle daa ba non' lkwez chele. ¹² Beena' so saki soacheche' gonlilallee nad', ka zoa pilarka' nox'gakan lill Chios cha'na', ka' soe' gana' zoa Chioza' na' yigaanlene'ne' zejli kani. Na' wda' le Chios cha'na' le', na' le yell che Chios cha'na', yell Jerusalénna' daa nak dii kob daa za' yaba che Chios cha'na', na' lekzka' wda' lia'na' le' daa nak dii kob. ¹³ Beena' cheni, chiyal' wzenagyenee daa che' Espiritu che Chioza' beⁿ'ka' gall kwente chdop chllag choe'la'ogake' nad'."

Daa golle' beⁿ'ka' lle' yell Laodicéana'

¹⁴ 'Bzej dga inia' li' na' bse^laan lao beena' chap chwia beⁿ'ka' chdop chllag choe'la'ogake' nad' yell Laodicéana': "Ki na beena' na gakshga yog' daa na Chioza', beena' toshiizi choe' dill' kon ka nak dill' li che Chioza', beena' chⁿabia' lao yog'loite daa bxe bsil Chioza': ¹⁵ Nad' nez nle'id' yog' daa chonle, nezid' bi chonle ka chazlallaa na' ni bi chbej yichjle nad'. Wenchlan shel'ka' gonle tozan. ¹⁶ Na' daa ni ton bi chchoglall'le gonle, kweyjichjchokl' le'. ¹⁷ Le' nazle nakle beⁿ' wni'a, na' nale le wen chak chele na' bich bi de dii chyalljile. Na' bi chakbe'ile lao Chioza' nakle ka beⁿ' bi chak wen cheyin, ka beⁿ' yesh', ka beⁿ' lchol, ka beⁿ' chda gal'yid gal'bel'. ¹⁸ Na' daan, nia' le' chiyal' si'le lawa'na' or daa ba gokshao' lo yi'na', kwenche gakle dowalj beⁿ' wni'a; na' si'le lawa'na' lech' xtila' gakwle kwenche bich si'le zto' tale gal'yid gal'bel'le; na' si'le' rmecha'

kaale jalaoleka' kwenche ile'ile. ¹⁹ Nad' chsheshlen' yog' ben'ka' chakid', na' chsak'zi'a legake' kat' bi chongake' wen. Na' daan, li gon ka dii le, na' li yiyaj yileni. ²⁰ Nad' chña' le' ka to ben' ze to cho'a yoo. Shi zoa ben' guenile' chña' na' wsalje', na' sho'a na' gaolenee txen. ²¹ Beena' so saki soacheche' gonlilallee nad', na' wi'a latj inabia'lene' nad', ka ben' nad', wzoachech' wzo wzakid' daa btil' na' ba chñabia'len' Xa'na'. ²² Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'."

4

Choe'la'ogake' Chioza'yabana'

¹ Ka biyoll bzej' diika' wne' nad', na' ble'do'id' nyalj to puert xan yabana'. Na' bizenid' bishbena' daa benid' dii nech daa nen ka ga chbell to trompet, na' wne' nad':

—Nilə wyep, na' wliid' li' diika' zi' za' gak.

² Na' ka wnie' nad', Espíritu che Chioza' bene' ka ble'id' yabana' gana' llia to ben' chñabi'e. ³ Na' beena' llia na', chey cheeni'chgue' ka yaj wan daa le jaspe na' daa le cornalina. Na' tcho'a tlawi gana' llie' ze to betyaa na' chña'titan ka yaj wan daa le esmeralda. ⁴ Na' gana' llie', ble'id' nechj zi tapichoa ben' lliagake' chñabia'gake', na' zoagake' do xtil na' nzoa twej corona de or yichje'ka'. ⁵ Na' gana' llia ben' necha' chep yes, na' chashj chtin, na' chak sshag inleeb. Na' lawe'na' ze gall yi' chal'ninan na' legakannan' espírituka' gall che Chioza'. ⁶ Lekzka' lao beena' llia chñabia' de to dii nak katekzə nisdona' na' nakan ka de vidr.

Na' gchol' gana' chi'e chñabi'e lle' tap ben' de yel' mban cheyin, na' dii zan jalaogake' llia, ka laoləgake' na' ka koll'əgake'. ⁷ Ben' necha' nake' ka bell, na' ben' wchopina' nake' ka goon, na' ben' wyonina' nak cho'alawe'na' ka che benech, na' ben' wdapina' nake' ka bsia, ba chzo. ⁸ To to ben'ki zoa xop wej xilgake', na' zoa dii zan jalaogake' ka loolə na' ka koll'ə xile'ka'. Na' bi chsangake' ka wal' ka tella nagake':

Dowalj ben' li ben' shao', dowalj ben' li ben' shao', dowalj ben' li ben' shao',
 nak Xancho Chioza',
 beena' nap yel' wak choo yel' wak xen,
 beena' zoa ka wxe wzil yell-liona',
 na' lekzen' zoe' naa, na' zoakze' zejli kani.

⁹ Na' ben'ka' tap chgoogake' balaan beena' llia chñabia', beena' mban zejli kani. Na' choe'gake' xtillee nake' ben' zakii nleeb na' choe'gake'ne' yel' choxken. Na' to to ka chongake' ka', ¹⁰ ben'ka' tapichoa chchek' xibe'ka' lao beena' mban zejli kani na' choe'la'ogake'ne'. Na' chzal'gake' corona che'ka' lawe'na', nagake':

¹¹ Chios, li' nako' Xannto', na' chidoloo koonto' li' balaan na' we'nto' xtilloo nako' ben' zakii nleeb,
 na' ben' yel' wak choo yel' wak xen.
 Lin' bxe bsilo' yog'lolte dii de,
 na' daa goklalloo soagakan, bxe bsilgako'n.

5

Yisha' daa ndos' gall sey

¹ Na' beena' llia chñabia' noḵee lo nee de shłina' to yish dii ndobə, na' chop laaten' nyoj. Na' gana' biyoll bidoban ndosa'n gall sey. ² Na' ble'id' to anjl, ben' nap yel' wak xen, na' wñie' zillj inleeb, chñabe':

—¿Notg zakii wxoxje' seyka' na' wselle' yisha'?

³ Na' kono bllel yabana' ni lo yell-liona', ni xan yell-liona', ben' gak wzeshe'n na' wwie' bin da'n. ⁴ Na' le wchellchga' daa kono bllel ben' zakii wzeshe' yisha' na' wwie' bin da'n. ⁵ Na'ch to beena' len ben'ka' tapichoa wne' nad':

—Bich kwello', la' beena' nsi'gake' Bell che Judá daa mbejlawe' lo dia che dii Judána', beena' nak xiin dia che dii Davína', ba bene' gan dii mala' na' wak wxoxje' seyka' gall na' wzeshe' yisha'.

⁶ Na'ch ble'idee zie' gchoł gana' llia beena' chñabia' na' gana' nechj ben'ka' tap na' ben'ka' tapichoa. Na' ble'idee ka to xil'do', ba betgake'. Na' llia gall lozb na' zi gall jalaob, diikan' nak espírituka' gall daa nak che Chioza' daa nselee doxen yell-lioni. ⁷ Na'ch beena' ble'id' ka xil'do' whigüee lao beena' llia chñabia' na' wdoyoe' yisha' daa ndobə daa noḵee lo nee de shłina'. ⁸ Na' kon ka wdoyoe' yisha' daa ndobə, ben'ka' tap na' ben'ka' tapichoa bçhek' xibe'ka' lao beena' ble'id' nak ka xil'do'. To togake' nox'gake' twejə arpa, na' lezkka' nox'gake' barser de or yoogakan yala' daa chzeygake', na' llen yala' zaklebin xtill' ben'ka' nak lall' na' Chioza', dill'ka' choe'lengake'ne' kat' choe'lwillgake'ne'. ⁹ Na' belgake' to dii kob dii chgoon le' balaan, na' ki nan:

Lin' chidołoo goḵoo yishi ndobə na' wxoxjo' seyka', daa betgake' li',

na' daa blalj xçheno'na' biya'o bizi'o

ben' za' yog' dia, yog' yell na' yog' naciön,

na' ben' chñe wde wdeli dill',

kwençhe nakgake' lo na' Chioza'.

¹⁰ Na' ba nono' lall' na'gake' inabia'gake' lo yell-liona'

na' gaggake' bçoz che Chios çhechona'.

¹¹ Na'ch ble'id' anjl zan, na' benid' shi'eka'. Nechjgake' gana' llia beena' chñabia' len ben'ka' tap na' ben'ka' tapichoa. Na' daa nakgake' ben' zan inleeb ni bi wbadid'gake'. ¹² Na' wnagake' zillj nleeb:

Beena' nak ka xil'do', beena' betgake',

chidołee we'nto' xtillee nape' yel' wñabia' xen,

na' naki che' yog'lol yel' wni'a dii de,

nape' yel' sin' xen na' yel' wak choo yel' wak xen,

nake' ben' zakii nleeb,

na' chidołee we'la'onto'ne' na' koonto'ne' balaan.

¹³ Na' benid' wñe yog'lol dii de yel' mban çheyin na' yog'lol diika' bçxe bsil Chioza' yabana' na' yell-lioni, na' xan yell-lioni, na' loo nisdona', nagakan:

Beena' llia chñabia' len beena' nak ka xil'do',

chidoł'gake' we'la'ocho legake' na' koocho legake' balaan zejli kani,

na' we'cho xtill'gake' nakgake' ben' zakii nleeb, na' napgake' yel' wak choo yel' wak xen.

¹⁴ Na' ben'ka' tap nechj le', nagake':

—jKan' nakan!

Na' ben'ka' tapichoa bçhek' xibe'ka' be'la'ogake' legake'.

6

Bxoxje' seyka'

¹ Na' ble'id' Beena' Zaklebi to Xil'do' bxoxje' sey necha' lawi diika' gall, na' benid' wne to ben'ka' tap lle' na', na' shi'ena' nenan ka ga chashj chtin. Na' wne' nad':

—Nilə da, na' bwia dga.

² Na' ble'id' to kabay llyish, na' beena' llia koll'ba' noxee to xis wixit'. Na' bzoagake' to corona yichje'na', na' bcheje' lega ben' ben gan lo wdil na' zeje' sto shii lljene' gan.

³ Na' ka bxoxj Beena' Zaklebi to Xil'do' sey de wchopina', benid' wna ben' wchopina', beena' len ladj ben'ka' tap:

—Nilə da, na' bwia dga.

⁴ Na' ble'id' bchej sto kabay, ba xna. Na' beena' llia koll'ba' gok loo nee gone' ka bich soalen ljwell ben' yell-lioni mbalaz na' wit ljwellgake'. Na' bi'ene' to spad xen.

⁵ Na' ka bxoxj Beena' Zaklebi to Xil'do' sey de wyonina', benid' wna ben' wyonina' len ladj ben'ka' tap:

—Nilə da, na' bwia dga.

Na' bwia' na' ble'id' to kabay gasj. Na' beena' llia koll'ba' noxee to xig'libr. ⁶ Na' benid' wne to ben' ladj ben'ka' tap, chi'e:

—Gono' ka sak' chop ya trígona' che shlla llin, na' xop ya cebádana' che shlla llin, na' bi wwal' wsilo' seta' ni vinona'.

⁷ Na' ka bxoxj Beena' Zaklebi to Xil'do' sey de wdapina', benid' wna ben' wdapina':

—Nilə da, na' bwia dga.

⁸ Na' bwia', na' ble'id' to kabay, ba te, na' beena' llia koll'ba' lie' Yel' Wit. Na' daa le Hades* zjanon le'. Na' gok lo nagake' witgake' to kwart ben'ka' lle' yell-lioni lo wdil, lo wbin, lo yillwe' na' lao ba zniaka'.

⁹ Na' ka bxoxj Beena' Zaklebi to Xil'do' sey de gayi'na', ble'id' to dii nak ka gana' chzeygake' diika' chjwa'gake' lao Chioza', na' xni'ayinna' lle' ben'ka' betgake' ni che cho'a xtill' Chioza', na' daa bi bsangake' we'gake' xtilleena'. ¹⁰ Na' wnegake' zillj inleeb, che'gake':

—Chios, li' nako' Xannto'. Nako' dowalj ben' li ben' shao' na' nako' ben' chon yog' dii chchebo', ¿bat gono' yel' joschis che ben'ka' lle' yell-liona' na' yizi'o wzon daa betgake' neto'?

¹¹ Na'ch bi'e twej xa xtilgake', na' golle' legake' kwezgake' zi' xtit axt ki yizaa yibab ben'ka' nakgake' txen, ben'ka' zi' witgake' daa choe'gake' xtill' Chioza'.

¹² Na' ka bxoxj Beena' Zaklebi to Xil'do' sey de wxopina', ble'id' gok to bedxo' xen wal. Na' wbillla' biyakan dii gasj ka lech' gasj daa chakw ben' kat' chet to bish' ljwelle'. Na' doxen beo'do'na' biyakan dii xna ka chen, ¹³ na' bllib beljdo'ka' llia xan yabana', bxopgakan lo yell-liona' ka chxop yixwew yaa kat' chta be' wala' xyaguinna'. ¹⁴ Na' yabana' bidoblolan ka chidob to yish, na' yog'lol' yaaka' na' yog'lol' yell-liodo'ka' llia lo nisdona' blla' xishna'inka'. ¹⁵ Na' ben'ka' chnabia' lo yell-lioni, na' no ben' zakii, na' no ben' wni'a, na' no xan soldadka', na' no ben' mbejlawin, no ben' ndoo lla yel chone' xshin ben' na' no ben' chon xshinkze', jakwash'gake' no loo blej, no ladj yajka' lle' lo yaaka'. ¹⁶ Na' che'gake' yaa yaoka' na' yajka':

—Li idakwtega neto', na' li wkwash' neto' lao beena' llia chnabi'e na' lao yel' zak'zi' daa chon Beena' Zaklebi to Xil'do', ¹⁷ la' ba bllin lla wsak'zi'gake' ben', na' aga no so saki yel' zak'zi'na'.

* 6:8

7

Ben'ka' nak to guiyoa tapiyona mil

¹ Ka biyoll ble'id' diiki, bizle'id' tap anjl zechagake' tap laate yell-lioni, chzag'gake' be'na' za' tap laate kwenche bibi be' se lo yell-lioni ni lo niso'da' na' ni lo yagka'. ² Lekzka' ble'id' sto anjl zee gana' chla'lə wbillə, na' noxee sey che Chios yaa Chios banna'. Na' besyaa anjli zillj inleeb wnie' anjlka' tap, ben'ka' gok lo na'gake' ye! waka' kwenche gak wlliyi'gake' diika' de lo yell-liona' na' loo niso'da', na' chi'e legake':

³—Bibi gonile yell-lioni, niso'da', ni yagdo'ka' shlak bin' wda'cho seya' loxga ben'ka' nonlilall' Chios chechona'.

⁴ Na' benid' ka'k' ben'ka' wda' seya' loxgue'ka', na' nakgake' to guiyoa tapiyona mil ben', ben'ka' nak shllin kwen dia che dii Israela'. ⁵ Shllina mil ben'ka' nak dia che dii Judána', shllina mil ben'ka' nak dia che dii Rubénna', shllina mil ben'ka' nak dia che dii Gada', ⁶ shllina mil ben'ka' nak dia che dii Asera', shllina mil ben'ka' nak dia che dii Neftalína', shllina mil ben'ka' nak dia che dii Manaséza', ⁷ shllina mil ben'ka' nak dia che dii Simeónna', shllina mil ben'ka' nak dia che dii Levína', shllina mil ben'ka' nak dia che dii Isacara', ⁸ shllina mil ben'ka' nak dia che dii Zabulónna', shllina mil ben'ka' nak dia che dii Joséna', na' zi shllina mil ben'ka' nak dia che dii Benjamínna'.

Ben' be ben' zil ben'ka' zoa do xtil

⁹ Ka biyoll dga, na'ch bwia' na' ble'id' ben' zan inleeb, ben' za' doxen yell-lioni, na' lo wde wdeli dia, na' ben' chne wde wdeli dill', na' ben' za' yog' yell. Zegake' lao beena' llia chnabia' na' lao Beena' Zaklebi to Xil'do', na' kono ibabi legake' daa nakgake' ben' be ben' zil inleeb. Na' nakwgake' twej xagake' dii xtil na' nox'gake' twej zin. ¹⁰ Na' yog'lolzgage' chosyaagake' zillj inleeb, nagake':

Chios chechona', beena' llia gana' chnabi'e,
na' Beena' Zaklebi to Xil'do'
ba bislagake' cho'.

¹¹ Na' yog'lol anjlka' nechjgake' beena' llia chnabia', na' ben'ka' tapichoa len ben'ka' tap, bchek' xibe'ka' lawe'na' ax̄t lo yona' bllin loxgue'ka', na' be'la'ogake' Chioza', ¹² nagake':

¡Kan' nakan! Toshiizi we'la'ocho Chios chechoni, na' koochone' balaan,
na' we'cho dill' ka nak ye! sin' che'na', na' we'chone' ye! choxken,
na' we'cho dill' nake' ben' zakii nleeb, ben' chnabia' doxen, na' ben' ye!
wak choo ye! wak xen. ¡Kan' nakan!

¹³ Na' to beena' len ben'ka' tapichoa wnable' nad':

—¿Nora ben'ki nakw lech' xtila'? ¿Gara za'gake', lla?

¹⁴ Na' goshee:

—Li'kz nezilo' daa, ben'do'.

Na' le' wne' nad':

Ben'kin ba bichej lo ye! zak'zi' xenna', na' ba biyib bixisi xe'ka' xchen Beena' Zaklebi to Xil'do', na' daan nakwgake' lech' xtila'. ¹⁵ Daan, zegake' lao Chioza' gana' zoe' chnabi'e na' ka wal ka tella choe'la'ogake'ne'. Na' Chioza', beena' llia chnabi'a soalene' legake' na' gap wwie' legake'. ¹⁶ Bich ibil idongake', ni bich wzey wbilldo'na' legake', ni bich gaggakile' zey', ¹⁷ la' Beena' Zaklebi to Xil'do', beena' zoa gana' chi' Chioza' chnabi'e, gap wwie' legake'. Na' wchi'e legake' gana' chal nisa' daa nsa' ye! mbanna'. Na' Chioza' wkwase' yog'lol daa chkwellyeshaan legake'.

8

Bxoxje' sey de gállina'

¹ Na' ka bxoxj Beena' Zaklebi to Xil'do' sey de gállina', goklli yabana' ka do gashj gor.

² Na'ch ble'id' gall anjlka' zegake' lao Chioza', na' bi'e legake' gall trompet. ³ Na'tech bla' sto anjl nox̄ee to barser de or, na' jsie' kwit daa nak ka mes de or gana' chzeygake' yala' daa zoa lao beena' chñabia'. Na' bi'ene' yal zan kwenche wzeve'n lawinna', na' gakan toz xtill' beñ'ka' nak lall' na' Chioza' kat' choe'lwillgake'ne'. ⁴ Na' llen che yala' daa yoo loo barsera' nox̄' anjla' wyasan zejan lao Chioza' nakan txen xtill' beñ'ka' choe'lwillgake'ne'. ⁵ Na' anjla' bexee barsera', wlo'en yi' galja' daa chi' gana' chey yala', na' bzaleen lo yell-lioni. Na' goshj wtin, na' gok sshag, na' wyep yes, na' wxo' wñib yell-lioni.

Trompetka' gall

⁶ Na' anjlka' gall, beñ'ka' nox̄' trompetka', wze kwasgake' wkwellgake'n.

⁷ Na' anjl necha' bkwelle' trompet che'na', na' bxop lo yell-lioni yaj yaba na'ch yi' na' nchixgakan chen. Na' schoo yell-lioni wyey, zi lat'zə ki gokan gashjə, * na' wyeylenan dii zan inleeb yag, na' doxen gana' de shga'.

⁸ Na' anjl wchopina' bkwelle' trompet che'na', na' bxop loo niso'd'na' to dii nak ka to yaa xen dii chal'ñin. Na' zi lat'zə ki gok gashjə niso'd'na' biyakan chen. ⁹ Na' zi lat'zə ki gok gashjə bado'ka' lle' loo niso'd'na' witgakb, na' lezkka' zi lat'zə ki gok gashjə barkwka' chda lo niso'd'na' wlliyai'.

¹⁰ Na' anjl wyonina' bkwelle' trompet che'na' na' bxop to belj xen chal'ñinan, na' bxopan gana' de yaoka' na' gana' chal niska'. ¹¹ Na' belj xenna' len Dii Zla'. Na' zi lat'zə ki gok gashjə nisa' gokan zla', na' beñ' zan wit ni che nis zla'na'.

¹² Na' anjl wdapina' bkwelle' trompet che'na', na' zi lat'zə ki gok gashjə wbilla' na' beo'do'na' na'ch beljdo'ka' wnit beeni' cheyinka'. Na' bich bzeeni'gakan zi lat'zə ki gok shgobill na' gashj yel.

¹³ Na'ch ni zej chwia' na' benid' to bsia chzob gchoł xan yabana' na' wñeb zillj inleeb, nab:

—iNyesh'laz gak che beñ' yell-lioka' kat' kwwell anjlka' tompetka' zi shon!

9

¹ Na' anjl, beñ' gayi'na', bkwelle' trompet che'na', na' ble'id' to belj dii bxop xan yabana' jet'an lo yell-liona'. Na' be'gake'ne' xiinya che yecha' daa bi chiyoll chido nak zitj. ² Na' bsalje' cho'a yecha' daa bi chiyoll chido nak zitj na' bchej lo'inna' llen ka che to gorn xen. Na' llenna' daa bchej lo'inna' bkwashaan wbilla' na' xan yabana'. ³ Na' loo llenna' bllesh ba zan inleeb bish'zo na' blilijgakb doxen lo yell-lioni. Na' bene' kwenche gak gad'gakb ka chad' bexjoni'ka'. ⁴ Na' bi bi'e latj bi gongakib yix ga'na' daa de yell-lioni, ni tlish' dii nak shi'a shga', ni tlish' yag, san toz beñ'ka' bi da' sey che Chioza' loxgue'ka' bzoazi'yaagakb. ⁵ Na' bi bi'e latj witgakb legake', san to wzoazi'yaazgakb legake' gay' beo'. Na' gana' god'gakb wlan ka chla gana' chad' bexjoni'na'. ⁶ Na' kat'ka' gak dga, beñ' yell-lioka'

* 8:7 Zi lat'zə ki gokan gashjə: literalmente la tercera parte.

gaklall'gake' guetgake' per bi guetgake'; na' selall'gake' bich soagake' per yel' wita' wxonj' wkwashiin legake'.

⁷ Na' bish'zoka' nakgakb ka kabay ba shaj lo wdil. Na' yichjbka' zoa twej dii nak ka corona de or, na' cho'alaobka' nakan ka cho'alao ben'.

⁸ Na' yish' yichjbka' nakan ka yish' yichj noolə, na' leybka' nakan ka ley bell. ⁹ Na' daa nakwgakb nakan de ya na' chkweejan kwerp chebka'. Na' xilbka' chongakan sshag inleeb ka ga za' zan kabay ba ngoyo karret dii zej lo wdila'. ¹⁰ Na' lo xbambka' zoagakan ka lew bexjoni', na' wchingakban kwenche wzoazi'yaagakb ben' yell-liona' gay' beo'. ¹¹ Na' anjla', beena' nak lall' nee yech zitja', chnabi'e bish'zoka', na' dill' hebrewa' lie' Abadón, na' dill' griegona' lie' Apolión, na' zejin Williayi' Williade.

¹² Na' biyoll yel' zak'zi' necha', per ni chyallj zi chopan.

¹³ Na'ch anjl, ben' wxopina', bkwell trompet che'na', na' benid' wne to ben' gana' zoa daa nak ka mes de or gana' chzeygake' yala' daa llia ka lozdo'in to to schin daa zoa lao Chioza'. ¹⁴ Na' golle' anjl, ben' wxopina', beena' nox' trompeta':

—Bsell anjlka' tap, ben'ka' nchej cho'a yao xenna' le Éufrates.

¹⁵ Na' bselle' tapte anjlka', ben'ka' nzoe' kwenche witgake' ben', na' zi lat'zə ki gok gashjə* ben' yell-liona' betgake'. La' ba nllie' bia' gongake' ka' ka lo gora', lo llana', lo bewaa, na' lo yiza'. ¹⁶ Na' benid' nak chop guiyoo millón soldadka' lliagake' kabay.

¹⁷ Na' ki nak kabayka' ble'do'id' na' ben'ka' llia koll'bka': daa nkweej cho'alcho'eka' nakan dii xna ka yi'na', na'ch de azul ka yaj wan daa le zafiro, na' dii gush ka bishte daa ne' azufre. Na' yichj kabayka' nakgakan ka yichj bell, na' loo cho'abka' chchej yi' dii nchix azufre na'ch llen. ¹⁸ Zlat'zə ki gok gashjə† ben' yell-lioka' witgake' ni che shon yel' zi'ki: yi'na', llenna', na'ch azúfrena' diika' bchej cho'a kabayka'. ¹⁹ Na' kabayka', bchingakb cho'abka' na' xbambka' kwenche betgakb ben', la' xbambka' nakgakan ka bel, na' yichji daa zoa xbamka' daa nak ka bel bzoazi'yaagakan ben'.

²⁰ Na' ben'ka' bi biya gueti diiki, bi biyaj bilengakile' dii malka' chongake', ni bi wlej yichjgake' we'la'ogake' dii xiw'ka' na' diika' nongake' de or, de plat, de bronce, na' de yaj na' de yag, diika' bi chle'i ni bi chengakin, ni bi chak sa'gakan. ²¹ Ni bi biyaj bilengakile' daa chitgake' ben', daa nlangake' yel' willa'na', ni daa chnelen ljwellgake', ni daa chzi' chbangake'.

10

Anjla' noxee to yish dii ba biyesh

¹ Na'ch ble'id' sto anjl, ben' nap yel' wak xen, chetje' yabana' zindobe' to bej. Yichje'na' xoa to betyaa, na' cho'alawe'na' chep cheeni'n ka wbillla', na' ni'eka' nakgakan ka bel yi' dii chzolla'. ² Na' noxee to yish dii ba biyesh, na' bzoe' ni'e de shlina' lo nisdona' na' de robesa' bzoe'n lo yell-liona'. ³ Na' besyaadie' zillj inleeb ka chosyaa to bell. Na' ka besyee, wne wziwaa gall shii. ⁴ Na' ka biyoll wne wziwaa gall shii, na'ch nan wzej' daa wnagakan. Per benid' wne to ben' yabana', na' wne' nad':

—Bi wzejo' daa wna wziwaa, san wlooshawaan loo yichjlall'do'na'.

* **9:15** Zi lat'zə ki gokan gashjə: literalmente la tercera parte. † **9:18** Zi lat'zə ki gokan gashjə: literalmente la tercera parte.

⁵ Na' anjla', beena' ble'id' nzoa ni'ena' t̄laa lo niso'da' na' daa zi t̄laa lo yell-liona', bl̄is nee de sh̄lina' yabalā ⁶ na' bzoe' de taschiw beena' zoa zejli kani, beena' b̄xe bsil yabana' na' yog'lol̄ daa lia xaninna', na' yell-lioni na' yog'lol̄ daa de lawinna', na' niso'da' na' na' yog'lol̄ daa lle' lo'inna', na' wne':

—Aga chllach gak daa lia bia' gak. ⁷ San kat' wkwell anjl, beñ' gállina', trompet che'na', na' yiyoll yido gak yog'lol̄ daa bliia Chioza' bia' gak, kon ka golle' dii beñ'ka' wdx̄jee daa wne' kani'yi.

⁸ Na' sto shii benid' shii beena' w̄ne yabana', na' wne' nad':

—Wyaj kwit anjla', beena' nzoa ni'ena' lo niso'da' na' na' lo yell-liona', na' jaxi' yisha' daa nox̄ee.

⁹ Na' wya' kwit anjla' na' biñabidee yisha'. Na' wne' nad':

—Ni den, wdawan. Na' idawilon' zix̄ sia ka shin basera', per loo li'ona' yiyakan zichj zla'.

¹⁰ Na' bikaa yisha' lo na' anjla' na' wdawa'n. Na' bdawidaan zix̄ sia ka shin basera', per ka bidon wdaw' na' biyakan zichj zla' loo li'ana'. ¹¹ Na' wne' nad':

—Chonan byen wi'o dill' daa na Chioza' gak che beñ'ka' lle' yellka', na' naciónka', na' beñ' ch̄ne wde wdeli dill', na' beñ' wñabia'ka'.

11

Chop beñ' wi'e dill' daa che' Chioza' legake'

¹ Na' beñe' nad' to ya dii gak wchix̄id', na' wne':

—Wyaj na' jachix̄ ka'k' nak yoodo' che Chioza' na' ka'k' nak gana' chzeygake' yala', na' blab ka'k' beñ'ka' choe'la'o Chioza' na'. ² Na' bi wchix̄o' lesh' chyoodo'na', la' ba nakan lall' na' beñ'ka' bi nombia' Chioza', beñ'ka' wlej wshoshjgake' yell che Chioza' chopiyon beo'. ³ Na' wselaa chop beñ' wi'e cho'a xtillaana', na' gakwgake' lech' zeshaa, na' to mil chop guiyoa guiyon lla chix̄je'gake' daa yepgakee.

⁴ Beñ'ki chop zaklebake' chop yag olivoka' na' chop candelerka' zoa lao Chioza', beena' nak X̄an yell-lioni. ⁵ Na' shi no bi goni legake', loo cho'eka' ichej yi' na' wliayi'n beñ'ka' chakzbani legake'. Na' ka' kwiai' nottez̄a beñ' gaklallee bi gonile' legake'. ⁶ Beñ'ka' chop napgake' yel' wak kwenche bi gak yeja' shlak chix̄je'gake' daa ye' Chioza' legake'. Na' lezkza' napgake' yel' wak yiyongake' nisa' chen, na' gongake' yiya dii wsak'zi'n beñ' yell-lioki kon ka'k'to cheengakile'. ⁷ Na' kat' yiyoll chix̄je'gake' cho'a xtill' Chioza', daa nak ka bayix̄' zn̄ia daa ichej loo yecha' daa bi chiyoll chido nak zitj, gox̄aan legake' na' gonan gan witan legake'. ⁸ Na' kwerp che'ka' gat'gakan yawi nez che yell xenna' gana' bda'gake' X̄ancho Jesucristona' lee yag cruza', daa zaklebi Sodómana' na'ch Egíptona'. ⁹ Na' beñ' wde wdeli yell, na' wde wdeli dia, na' beñ' ch̄ne wde wdeli dill', na' beñ' wde wdeli nación wwiagake' kwerp che'ka' shon̄ lla shgobill, na' bi we'gake' latj no wkwash' legake'. ¹⁰ Na' beñ'ka' zoa lo yell-lioni yiba yizakgakile' daa ba witgake'. Na' daa le yiba yizakgakile' we' ljwellgake' dii chiza'lall'gake', la' beñ'ka' wdx̄jee daa goll Chioza' legake' chiya dii bengake' kwenche bsak'zi'gake' legake'. ¹¹ Na' ka gok shon̄ lla shgobill, Chioza' bisbane' legake', na' biyasgake' sto shii. Na' yog' beñ'ka' ble'gakile' legake' le bblegake'. ¹² Na' beñ'ki chop bengakile' w̄ne to beñ' yabana', chi'e legake':

—Li yiyep nilā.

Na' biyepgake' yabana' to lo bej, chwiate beṅ'ka' gokzi' gokzbani legake'.
 13 Na' ka chiyepgake' gok to bedxo' xen, na' bchinjan lat'* yella', na' wit
 galla mil beṅ'. Na' beṅ'ka' bi wit le bllebgake' na' be'la'ogake' Chioza',
 beena' lia yabana'.

14 Na' biyoll yeḷ' zak'zi' de wchopina', per lii za'te de wyonina'.

Bkwelle' trompet de gállina'

15 Na' anjl, beṅ' gállina', bkwelle' trompet che'na', na' benid' wne beṅ'
 zan zillj inleeb yabana', wngake':

Yeḷ' wṅabia'na' de yell-liona'

ba nakan che Xancho Chioza' len Crístona',

beena' wleje' kwenche inabi'e;

na' inabi'e zejli kaṅi.

16 Na' beṅ'ka' tapichoa, beṅ'ka' lia lao Chioza', bḩek' yichje'ka' axt lo
 yona', be'la'ogake'ne', 17 nagake':

Chonnto' li' yeḷ' choxken, Chios,

beṅ' liizelozi nap yeḷ' wak choo yeḷ' wak xen, beṅ' nak Xannto'.

Li'kzan zo' naa, na' li'kzan zo' ka wxe wzil yell-liona', na' zejli kaṅi zo'.

Na' ba wzolo chṅabia'lenu' yeḷ' wak choo yeḷ' wak xen cho'na'.

18 Beṅ'ka' lle' yell-liona' ba bllaa blokgake',

na' ba bllin lla wsak'zi'gako'ne'.

Na' naa gono' yeḷ' joschis che beṅ' wetka',

na' wi'o daa chidol' beṅ'ka' wdixjee daa gollo' legake',

na' beṅ'ka' nak lall' no', len beṅ'ka' chgoo li' balaan,

ka beṅ' zakii ka beṅ' bi zakii;

na' wlliyoo beṅ'ka' chlliyai' beṅ' yell-liona'.

19 Na'ch byalj yoodo'na' zoa yabana', na' loo yoodo'na' nla' yiina' gana'
 lle' yaj taaka' gana' bzej Chioza' diika' bllie' bia' gon beṅ' Israelka'. Na'
 wyep yes, na' gok sshag, na' goshj wtin, na' gok to bedxo' wal, na'
 wche'chga yaj yabana'.

12

Noola' na' bayixaa nak ba xṅa

1 Na' xan yabana' ble'id' to dii chonan ka yibanicho. Ble'id' to nool
 ndobə beeni' che wbilla' le', na' zoa beo'do'na' xṅi'ena', na' nzoa to corona
 yichje'na' na' llian shllin belj. 2 Na' noa' noola' to bdo', na' chosyee daa

chllagloe' chaz besa' sane'b'. 3 Na'ch bizle'id' xan yabana' sto dii chon
 ka yibanicho. Ble'id' to bayix' xen inleeb, ba xṅa, na' lia gall yichjb' na'

zi shi lozb, na' twej corona zoa to to yichjba'. 4 Na' bta xbama' bshibb
 zan beljdo'ka' lia xan yabana', zi lat'zə ki gokan gashj,* na' bzal'b legakan

lo yell-lioni. Na' wze bayixaa lao noola' beena' san, kwenche guebb
 xiine'na' kate galjb'. 5 Na' noola' wxane' to bi' byodo', bi'na' inabia' doxen

zbii zkaan yell-lioni na' gom' byen wzenaggake' cheb'. Na' Chioza' lii
 bigoyotie'b' ziyajb' gana' chi'e chṅabi'e. 6 Na' bxonj noola' zeje' gana' bibi

chashj chleb, gana' ba nonshao' Chioza' to latj che', na' we'gake' dii gawe'
 to mil chop guiyoa guiyon lla.

7 Na'tech gok to wdil yabana'. Anjl, beena' le Miguel, na' anjlka' ngoo
 lall' nee wdil-lengake' bayix' xṅana'. Na' bayix' xṅana', daa nak dii xiwaa,
 len anjl cheyinka' wdil-lengakan legake', 8 per bi wzogakin gongakan gan.

* 11:13 Lat': literalmente la décima parte.

* 12:4 Zi lat'zə ki gokan gashja: literalmente la

tercera parte.

Na' bich bi latj çhegakin got' yabana'. ⁹ Na' wlejgake' bayix' x̄nana', daa nak beḷ kani'teyi, daa le dii x̄iw' na' Satanás, daa chziye' doxen yell-lioni. Bzal'gake'n yell-lioni len anjḷ çheyinka'.

¹⁰ Na' benid' w̄ne to beḅ' zillj inlebb yabana', wne':

—Ba bllin lla bisla Chios çechona' beḅ' yell-liona', ba bli'e yel' wak choo yel' wak xen çhe'na' na' yel' w̄nabia' çhe'na', na' yel' w̄nabia' çhe Crístona', beena' wleje' inabia'lene' txen. La' ba bibejgake' dii x̄iwaa daa chao xya çhe beḅ'ka' nakcho txen, daa chao xya çhegake' lao Chios çechona' ka tella ka wal. ¹¹ Ba bengake'n gan daa chonlilall'gake' Jesucristona', Beena' Zaklebi to Xil'do', beena' blalj x̄chene'na' ni çhegake'. Na' bi bllebgake' be'gake' xtilleena', san bzani kwingake' guetgake'. ¹² ¡Ka le' zoale yabana', li yiba yizaki! Per ¡nyesh'laz gak çhele, le' lle'le yell-liona' na' lo niso'da'na! La' dii x̄iwaa ba betjan gana' zoale na' chllaa chlokan nall inlebb daa nezin bich bi latj xen çheyin de.

¹³ Na' ka gokbe'i bayix' x̄nana' ba bzal'gake'b lo yell-liona', na' blagdob noola' wxan bi' byodo'na'. ¹⁴ Na' bzoa Chioza' çhop x̄il noola', ka x̄il bsia xen, kwençhe bxonjile' dii x̄iwaa na' lljsoe' gana' bibi chashj çhebb, gana' ba nonshao' Chioza' to latj çhe', na' we'gake' dii gawe' shon yiz yoo gashjə. ¹⁵ Na' dii x̄iwaa, daa nak bayix' x̄nana', bem ka bchej nis zil loo cho'aba' gokan to yao kwençhe nan wa'n noola'. ¹⁶ Per yell-liona' byaljan kwençhe goklenan noola', na' wdeban yawa' daa bchej loo cho'aba'. ¹⁷ Na' daa gok ka', bllaa blokchga bayix' x̄nana' noola' na' wyajb jt̄il-lem xiin dia çhe'na' bgaan, beḅ'ka' chzoa dill' daa nllia Chioza' bia' gongake', beḅ'ka' zoaçhech çhajle'gake' cho'a xtilḷ Jesucristona'. ¹⁸ Na' wze bayix' x̄nana' cho'a niso'da'na'.

13

Bayixaa bchej loo niso'da'na'

¹ Na' ble'id' bchej loo niso'da'na' to bayix' llia gall yichjb na' zi shi lozb. Na' to to lozba' zoon twej corona, na' to to yichjba' llian leba' daa zeji chon kwim ka Chioza'. ² Na' bayixaa ble'id', nakb katekzə bell tigr*, na' ni'a naba' nakan ka ni'a na' oso, na' cho'aba' nakan ka çhe bell líón. Na' bayix' x̄nana' be'b leḅ yel' wak na' yel' w̄nabia' çheba' kwençhe inabia'b. ³ To yichj bayixaa zoalejan byaljan to we' daa nan guetib, na' we'na' biyakin. Na' yog' beḅ' yell-lioka' bibangakile' na' bengake' bayixaa txen. ⁴ Na' be'la'ogake' bayix' x̄nana', daa be' yel' w̄nabia' çheba' bayixaa nak ka bell tigr, na' lekzka' be'la'ogake' bell tigrā, nagake':

—Kono zoa sto ka bayixii, na' kono so saki t̄il-lem.

⁵ Na' kono bsej bllon be'b dill' cha'sibə na' w̄neb zban çhe Chioza', na' w̄nabia'b çhopiyon beo'. ⁶ W̄neb zban çhe Chioza', na' biz ben w̄nab çhe', na' çhe yabana' gana' zoe', na' çhe beḅ'ka' zoa yabana'. ⁷ Na' gok lo na'b t̄il-lem beḅ'ka' nak lall' na' Chioza', na' bem leḅake' gan. Na' lekzka' gok lo na'b inabia'b lao yog' loḷ beḅ' za' yog' dia, beḅ' lle' yog' yell, beḅ' lle' yog' nación, na' beḅ' çh̄ne wde wdeli dill'. ⁸ Na' yog' loḷ beḅ'ka' lle' yell-lioni, beḅ'ka' bi da' leinna' lee libr çhe Jesucristona', we'la'ogake' bayixaa. La' kana' wxe wzilte yell-lioni, Jesucristona', Beena' Zaklebi to Xil'do' daa betgake'ne', bzeje' lee libr çhe'na' le yog' beḅ'ka' gat' yel' mban çheyin zejli kani.

⁹ Beena' cheni dga nia', chiyal' wzenagyeneen. ¹⁰ Beena' wçhe'gake' wsejgake', shajshaze' gatee lillyana'. Na' beena' ba nakan guetile'

* 13:2 Bell tigr: literalmente leopardo.

yesyana', guetshazile'n. Na' daan, ben'ka' nak lo na' Chioza' chiya! soachehgake' gonlilall'gake'ne'.

¹¹ Na'tech ble'id' sto bayix' bchejb loo yell-liona' na' lia chop lozb dii nak ka che to xil'do', per chneb ka bayix' xnana'. ¹² Na' wdapb do ka nak yel' wñabia' che bayix' necha', na' ba necha' be'b latj wñabia'b kwenche bem byen yog' ben' lle' yell-lioni be'la'ogake' ba necha', bana' biyaki we' cheba' daa nan guetib. ¹³ Na' lekzka' bana' bchej loo yell-liona' bem yel' wak xen daa benan ka bibani ben', axt bem ka betj yi' xan yabana' bxopan lo yell-lioni chwiate ben' yell-lioka'. ¹⁴ Na' ni che yel' wakki gok lo na'b gom gana' lia ba necha', wxiye'b ben'ka' lle' yell-lioni kwenche bzenaggake' che ba necha', na' bem byen bengake' to lwaa lsak' ba necha' bana' biyaki we' cheba' daa bsalj yesyana'. ¹⁵ Na' bayix' wchopina' wdapb yel' wak kwenche wloob bishbe daa nak lwaa lsak' bayix' necha', kwenche gak inen na' gonan ka witgake' yog' ben'ka' bi we'la'o len. ¹⁶ Na' lekzka' bem byen yog' lo! ben' sho' nee de shlina' wa loxgue'na' to sen, ka ben' zakii ka ben' bi zakii, ka ben' wni'a ka ben' yesh', ka ben' ndoo lla yel chone' xshin ben' na' ka ben' chon xshinkze'. ¹⁷ Na' kono gok wit' wde bi dii de che' wa si'e bi dii chyalljile' shi bi yo'e sen che bayixaa daa nak leb wa número daa zeji leba'. ¹⁸ Chyalljicho yel' sin' kwenche shajniicho dga. Beena' shajniile'n na' yiyiljni'e número che bayixaa daa nak to número che ben'. Na' número na' nakan xop guiyoa guiyon xop.

14

Daa bel ben'ka' to guiyoa tapiyona mil

¹ Na' ble'id' Jesucristona', Beena' Zaklebi to Xil'do', zie' lo yaana' le yaa Sión. Na' lene' to guiyoa tapiyona mil ben', na' da' loxgue'ka' le Jesucristona', Beena' Zaklebi to Xil'do', na' le Xe'na'. ² Na'ch benid' to sshag wal za'n yabana', na' sshaga' nenan ka nen yao xenna' daa chxop cho'a bnanja' na' ka nen kat' chashj chtin. Daa benid', nenan ka shii dii zan arpa dii chsillgake'. ³ Na' cholgake' to dii kob lao beena' lia chñabi'a na' lao ben'ka' tap zoa xilin, na' lao ben'ka' tapichoa. Na' koch no ben' yoblə gok gol daa cholgake', san toz ben'ka' nak to guiyoa tapiyona mil, ben'ka' bisla Chioza' ladj ben'ka' lle' yell-lioni. ⁴ Ben'kin wdapshii kwingake' na' bi bdi'gake' nool, na' nogake' Jesucristona', Beena' Zaklebi to Xil'do', gattezə zeje'. Na' bisla Chioza' legake' ladj ben' yell-lioka' kwenche gakgake' lo nee na' lo na' Jesucristona'. Na' zaklebgakile' ka to dii nech dii chizi' chilap ben' cho'en Chioza'. ⁵ Na' biga bchej dill' wxiye' cho'eka', na' ni to bibi nda' nchengake' lao Chioza'.

Dill' daa be' anjlka' shon

⁶ Na' ble'id' sto anjl chzoe' xan yabana', na' chyixji'e dill' wen dii kob che Chioza' daa bi te cheyin lao ben'ka' lle' yell-lioni, ben'ka' lle' yog' naciónka', yog' yell, ben'ka' za' yog' dia, na' ben'ka' chne' wde wdeli dill'. ⁷ Na' wñie' zillj inleeb, chi'e:

—Li illeb Chioza' na' li kwee balaan, la' ba bllin lla gone' yel' joschis che to to ben'. Li we'la'o beena' ben yabana' len yell-liona', na' nisdona', na' gana' chal niska'.

⁸ Na' no sto anjl le', na' ne':

—Ba wlliaiyi' Babilóniana', yella' le wzeyi cheyi, yella' gana' wlle' ben'ka' zaklebi noola' chsolli ben' kwenche gonlen ljwellgake' bittez dii zbanka'

cheeni beli chen *che'ka'*, daa wlooyel'gake' *ben'ka'* lle' yog' *naciónka'* kwenche gongake' dii malka' bengake'.

⁹ Na' jano sto anjl *legake'*, *ben'* wyoni, na' wñie' zillj inleeb, wne':

—Nottezə *ben'* we'la'o bayixaa na' lwaa lsak'ba', na' wi'e latj sho' sen *cheba'* loxgue'na' wa neena', ¹⁰ yen ile'ile' do ka nak yel' chllaa *che Chioza'*. Na' sak'zi'e lo yi' gabila' daa nak ka yina' *nchix* azúfrena' chwiate *ben'ka'* nak anjl *che Chioza'* na' Jesucristona', Beena' Zaklebi to Xil'do'. ¹¹ Na' llen *che* yi'na' gana' sak'zi'gake' *chasan* zejli *kani*. Na' *ben'ka'* choe'la'o bayixaa na' lwaa lsak'ba' na' *ben'ka'* we'gake' latj sho'gake' sen *cheba'*, bibi yel' wixi'lall' gat' *chegake'* ka tella ka wal. ¹² Na' daa gak ka', *ben'ka'* nak lall' na' Chioza' na' chzoagake' xtilleena', na' zoatezi zoagake' *chonlilall'gake'* Jesúza', *chiyal'* so sakgakile' daa yen ile'gakile'.

¹³ Na' *benid'* wñe to *ben'* yabana', na' wne' nad':

—Bzej dga: “Chakomba *ben'ka'* nak *Xancho* Jesucristona' txen, *ben'ka'* guet naa na' *ben'ka'* zi' guet ni *che'.*” Kan' nakan, —na Espíritu *che Chioza'*—, *legaken'* yizi'lall'gake' *che* yog' dii *ben ble'gakile'*, na' yog' dii *wenka'* bengake' bi gal'-lallii Chiozan'.

Chioza' yitope' ben' yell-liona' ka ben' chizi' chilap

¹⁴ Na' bwia' na' ble'id' to bej llyish, na' lo beja' chi' to *ben'* nake' ka *benech*. Na' nzoa to corona de or *yichje'na'* na' noxee to garbat dii *nlatit*. ¹⁵ Na' bchej sto anjl *loo* yoodo' *che* Chioza', na' chosyee zillj inleeb chi'e beena' chi' lo beja':

—Bchin garbata' daa noxoo na' bizi' bilap, *la'* ba gol' yizi' yilapo' daa de yell-liona'.

¹⁶ Na' beena' chi' lo beja' bizi' bilape' daa de lo yell-lioni.

¹⁷ Na'ch bchej sto anjl *loo* yoodo' *che* Chioza' zoa yabana', *lekzka'* noxee sto garbat dii *nlatit*. ¹⁸ Na' bchej sto anjl gana' zoa daa nak ka mes de or gana' *chzeygake'* yala', na' nak lo nee yi'na'. Na' wñie' zillj beena' nox' garbata' daa *nlatit*, *chi'ene'*:

—Bichogui garbata' noxoo uvana' de yell-liona', *la'* ba wegakan.

¹⁹ Na' anjla' *bichoguile'* garbata' uvaka' de lo yell-liona' na' bizi' bilape'n, na' bleeen gana' *chsigake'n*. Na' zejin Chioza' bitope' *ben'* yell-lioka' bi nakgake'ne' txen, na' wlo'e *legake'* gana' sak'zi'gake', gana' yen ile'gakile' yel' chllaa *che'na'*. ²⁰ Na' *ben'ka'* zaklebi uvaka', *wzak'zi'gake'* cho'a yella'. Na' gana' blee *legake'* wlalj dii zil inleeb *xchene'ka'* na' wyasan ka to ze cho'a kabaya' na' bliljan shon guiyoa kilómetro.

15

Anjka' gall

¹ Na' ble'id' yabana' sto dii wal, dii chonan ka yibanicho. Ble'id' gall anjl, *ben'ka'* nak lall' na'gake' wisgake' zi gall yel' zak'zi'ka' gat' lo yell-lioni kwenche yiyoll yido yel' chllaa *che Chioza'*.

² Na' *lekzka'* ble'id' daa nak ka niso' de vidr *nchixan* yi'. Na' ble'id' *ben'ka'* bizo bizaki bi be'la'ogake' bayixaa na' lwaa lsak'ba' na' bi be'gake' latj sho'gake' sen *cheba'*, zegake' cho'a niso' de vidra' na' nox'gake' twej arpa daa be' Chioza' *legake'*. ³ Na' *cholgake'* to dii bel dii Moiséza', beena' ben ka cheeni Chioza', na' daa bel Jesucristona', Beena' Zaklebi to Xil'do', nagake':

Le nak diika' chono' na' chongakan ka chibaninto',

Chios, ben' nak Xannto', ben' yel' wak choo yel' wak xen.

Yog' diika' chono', chono'n ka chiya'l',
li' nako' ben' wñabia' che yog' ben' yell-lío.

⁴ Biga zoa ben' bi gall illebe' li', Xan'.

Biga zoa ben' bi kwe' li' balaan.

La' tozo' lin' nako' dowalj ben' li' ben' shao'.

Na' ben'ka' lle' doxen yell-lioni yidgake' we'la'ogake' li',

daa ble'gakile' diika' chono' nakan shlichá.

⁵ Na' ka biyoll dga, bizle'id' byalj yoodo' che Chioza' yabana', latj gana' yooshao' ley che Chioza' daa bzeje' lee yaj taaka'. ⁶ Na' loo yoodo'na' bchej gall anjl, ben'ka' nak lall' na'gake' wisgake' gall yel' zak'zi'ka' gat' lo yell-liona'. Nakwgake' twej lech' xtil dii chey cheeni' na' ngoo li'eka' twej bad' de or bllinten ka de cho'alcho'eka'te. ⁷ Na' to ben'ka' tap, ben'ka' zoa xilinna', bi'e to to anjlka' twej kop de or nakgakan tolla' yel' zak'zi' che Chioza', beena' zoa zejli kani. ⁸ Na' loo yoodo'na' gokan tolla' llenna' ni cheyi balaan xen che Chioza' na' yel' wak choo yel' wak xen che'na'. Na' kono gok yiyoo loo yoodo'na' ax't ki biyoll bido gallte yel' zak'zi'ka' daa nak lo na' anjlka' gall.

16

Yel' zak'zi'ka' gall daa yoll loo kopka'

¹ Na' benid' wne to ben' zillj inlleb loo yoodo'na', chi'e anjlka' gall:

—Li shaj na' li lljalatj lo yell-liona' yel' zak'zi' che Chioza' diika' yoll loo kopka' gall.

² Na' wyaj anjl necha', jalatje' yel' zak'zi' daa yoll loo kop che'na' lo yell-liona' na' yog'lol ben'ka' yoo sen che bayixaa na' be'la'ogake' lwaa lsak'ba' byaljkake' we' dii wyoll guull' na' wyey wlagake'.

³ Na' anjl, ben' wchopina', jalatje' yel' zak'zi' daa yoll loo kop che'na' lo nisdo'na', na' nisdo'na' biyakan ka xchen ben' witi yesya, na' wit yog'lol dii de yel' mban cheyin loo nisdo'na'.

⁴ Na' anjl, ben' wyonina', jalatje' yel' zak'zi' daa yoll loo kop che'na' loo yaoka' na' yog' ga chal nis, na' biyakgakan chen. ⁵ Na' benid' wne anjla' blalj yel' zak'zi'na' lo nisa', wne':

—Chios, lin' nako' dowalj ben' li' ben' shao'. Lin' zo' naa, na' li'kzan zo' ka wxe wzil yell-lioni. Lin' chono' daa nak shlichá daa ba bchoglo' che ben'ki kon ka chiya'l' gak. ⁶ La' legake' blaljkake' xchen ben'ka' nak lall' no' na' ben'ka' wdixjee daa gollo' legake', na' ba be'gako'ne' chenna' yeejkake', ka chido'l'kzə gak chegake'n.

⁷ Na' lekzka' benid' wna beena' ze kwit daa nak ka gana' chzeygake' diika' chjwa'gake' lao Chioza', ne':

—Kan' nakan Chios, ben' nak Xannto', ben' yel' wak choo yel' wak xen, li' ba beno' yel' joschis kon ka chiya'l' gakan.

⁸ Na' anjl, ben' wdapina', jalatje' yel' zak'zi' daa yoll loo kop che'na' lo wbilldo'na', na' bzeyan ben' yell-liona'. ⁹ Na' yog'lolgake' wyeygake' nall inlleb. Per bi biyaj bilengakile' lao Chioza', ni bi be'la'ogake'ne', san wnelgake' zban che' daa bi'e latj chak yel' zak'zi'ka'.

¹⁰ Na' anjl, ben' gayi'na', jalatje' yel' zak'zi' daa yoll loo kop che'na' gana' lliá bayixaa chñabia'b, bana' bchej loo nisdo'na', na' gok shgasj shcho'l doxen gana' chñabia'b. Na' ben' yell-lioka' non leb txen wdaoyaa lolleeka' daa le wyey wlagake'. ¹¹ Na' wnelgake' zban che Chioza', beena'

zoa yabana', daa chey chlagake' ni che we'ka' lliagake', na' bi biyaj bilengakile' dii mala' chongake'.

¹² Na' anjl, ben' wxopina', jalatje' yel' zak'zi' daa yoll loo kop che'na' loo yao xenna' le Éufrates, na' biyeej yao xenna' kwenche gok wde ben' wñabia'ka' za' gana' chla'lə wbillā'.

¹³ Na' ble'id' shoñ dii xiw' dii nak ka bloll. Ton bchej loo cho'a bayix' xñana', na' ston bchej lo cho'a bayixaa bana' be'la'o ben' yell-liona', na' ston bchej loo cho'a bana' chziye' ben', cho'eb dill' daa che' bayixaa sto leb. ¹⁴ Na' dii xiw'ki chongakan yel' wak. Na' bchejgakan jatopgakan ben' wñabia'ka' lle' doxen yell-lioni kwenche yiyakgake' toz til'-lengake' Chioza', beena' zeelo nap yel' wak choo yel' wak xen, kat' illin lla choo lla xen che'na'. ¹⁵ “Li se wñeyi, nad' zizaa tokonganzi, ka chon to ben' wban aga no chsi'nile' kat' chjlane'. Chakomba beena' ze wñeyi na' nakw xe'na' kwenche bi te gal'yid gal'bel'ze' na' si'e yel' zto.” ¹⁶ Na' dii xiw'ka' btopgakan ben' wñabia'ka' latja' le Armagedón de dill' hebreo.

¹⁷ Na' anjl, ben' gállina', blatje' yel' zak'zi' daa yoll loo kop che'na' lo llazə. Na' loo yoodo'na' zoa yabana', gana' llia Chioza' chñabi'e, wñie' zillj, wne': —Ba gok daa chiya'l' gak.

¹⁸ Na'ch wyep yes, na' gok sshag, na' goshj wtin, na' bñib yell-liona' ni che to bedxo' xen inleeb dii nakch zibia' ka yog' bedxo'ka' ba gok shlak wzoa ben' lo yell-lioni. ¹⁹ Na' yell daa le zeyi cheyin gokan shoñ laalə, na' yellka' lle' yell-lioni wlliai'y'gakan. Na' ngoo yichj Chioza' wsak'zi'e Babilóniana', yella' le zeyi cheyin, kwenche ben'ka' lle' na' yen ile'gakile' yel' zak'zi' xen che'na' daa le bshaagake' le'. ²⁰ Na' yog' yell-liodo'ka' llia lo nido'na' na' no yaaka' binitlogakan. ²¹ Na' xan yabana' bxop yaj yaba dii yel' inleeb na' ziigakan wdeli choa kil. Na' ben' yell-lioka' wnelgake' zban che Chioza' ni che yaj yabana' daa gokan to yel' zak'zi' xen inleeb.

17

Nool wdana' beena' llia koll' bayix' xñana'

¹ To anjla', beena' len ben'ka' gall, ben'ka' nox'gake' kopka', bide' gana' zia' na' wne' nad':

—Da, wliid' li' yel' zak'zi'na' ile'i noolə wdana', beena' zaklebi yella' le zeyi cheyin daa llia gana' chde yao zan. ² Ben' wñabia'ka' lle' yell-liona' ba benlengake'ne' txen lo yel' wdana', na' ben'ka' lle' yell-liona' ba lenzgake' nak ka ben' chzoll chniti daa chongake' dii malka' chone'.

³ Na' anjla' bchi'e nad' latja' gana' bibi chashj chleb na' Espiritu che Chioza' bene' ka ble'do'id' to noolə llie' koll' to bayix' xña, na' doxem da' dill' daa chne zban che Chioza', na' llia gall yichjb na' zi shi lozb. ⁴ Na' noola' nakwe' to lech' de morad na' dii xñali', na' le nonilen' nchine' or, yaj wan na' perla. Na' noxee to kop de or daa nak tolla' dii zbanka' na' yel' wdana' chone'. ⁵ Na' loxgue'na' da' to lie' daa kono wyajni bin zejín, na' nan: “Babilóniana', yella' le zeyi cheyin, xaxña' yel' wdana' na' yog'lol dii zban daa chak doxen lo yell-lioni.” ⁶ Na' gokbe'id' wzolli noola' daa weeje' xchen ben'ka' bete', ben'ka' ben'ilal' Chioza' na' ben'ka' be' cho'a xtill' Jesús'a'. ⁷ Na' anjla' wne' nad':

—¿Biche chibanzilo'? Na' inia' li' bi zeji daa ble'ilo' noola' na' bayixaa, bana' llie', bana' llia gall yichjin na' zi shi lozb. ⁸ Bayix' xñana' ble'ilo', leban wzoa kani'yi, na' bich zoab ñaa. Na' wiyedb sto shii ichejb loo yecha' daa bi chiyoll chido nak zitj kwenche kwiayi'b toshiizi. Na' ben'ka'

lle' lo yell-lioni, ben'ka' bi da' lie'ka' lee libra' gana' da' le ben'ka' de yel' mban chegake' zejli kani kana' zi xe silte yell-lioni, yibangakile' ile'gakile' bayixaa, bana' wzoa kana', na' bich zoab naa, per wibam sto shii.

⁹ Nin chyalljicho yel' sin'na' na' yel' chajniina'. Yichjbka' gall, zaklebin gall yaaka' gana' lia noola', ¹⁰ na' lekzka' naggakan gall ben'ka' chnabia'. Gay'gake' bich chnabia'gake', toe' chnabi'e naa, na' beena' sto zi' solo inabi'e. Na' kat' solo inabi'e, xtitzan inabi'e. ¹¹ Na' bayixaa, bana' wzoa kani'yi na' bich zoab naa, leban' ben' wñabia' de wxoni'na'. Na' lene' ben'ka' gall, na' ba nakten kwiayi'tekze'.

¹² 'Na' lozbka' shi, diika' ba ble'ilo', zaklebigakan shi ben'ka' zi' solo inabia', per shlollzan inabia'lengake' bayixaa. ¹³ Na' ben' wñabia'ki shi gaggake' toz, na' we'gake' bayixaa yel' wñabia' che'ka'. ¹⁴ Na' til'-lengake' Jesucristona', Beena' Zaklebi to Xil'do', na' Jesucristona' gone' legake' gan, la' len' Beena' zeelo nak Xan yog'lol ben', na' Beena' liizelozi chnabia' lao yog'lol ben'. Na' ben'ka' zejlen le' txen naggake' ben' wlej Chioza' na' zoachehgake' nonlilall'gake'ne' do yichj do lallgake'.

¹⁵ Na' lekzka' wna anjla' nad':

—Yaoka' ble'ilo' gana' lia noola wdana', zejin ben' zan inleeb, ben' za' yog' yell na' yog' naci6n, na' ben' chne wde wdeli dill'. ¹⁶ Na' bayixaa na' ben' wñabia'ka' zaklebi lozba' shi gakzbangakile' nool wdana'. Na' gaggake' txen choonlall'gake'ne' gal'yid gal'belee na' gaogake' xpeleena', na' leyi wzeygake'ne' lo yi'na'. ¹⁷ Chioza' ba bzoe' loo yichjlall'do'eka' daa cheenile' gongake', na' gaggake' toz we'gake' yel' wñabia' che'ka' bayixaa na' yiyoll yido gak daa wna Chioza' gak. ¹⁸ Na' noola' ba ble'ilo', len' zaklebi yell daa le zeyi cheyin, yella' chnabia' lao yog'lol ben' chnabia' yell-lioni.

18

Kwiayi' yell Babil6niana'

¹ Ka biyoll ble'id' dga, na'ch ble'id' sto anjl chetje' yabana', na' nsa'chgue' yel' wñabia' xen inleeb, na' beeni' che'na' bzeeni'n doxen yell-lioni. ² Na' besyaadie' ne':

—iBa wlliyai' Babil6niana', yella' le wzeyi cheyi! iBa wlliyai'n! Ba biyakan lill xlatj6 dii xiw'ka'. Ba biyakan ga lle' lla' chiya dii xiw' na' ga lle' lla' yog'lol ba chda xan yabana' ba nak zban, ba chpani ben'. ³ La' yella' wlle' ben'ka' zaklebi noola' chsolli ben' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' ben'ka' lle' yog' naci6nka' len ben'ka' chnabia' legake' kwenche gongake' dii malka' bengake'. Na' ben'ka' chit' chde lo yell-lioni biyaggake' ben' wni'a ni che yella' daa chit' chdegake' diika' zeelo chibayi ben'ka' lle' na'.

⁴ Na' benid' wne sto ben' yabana', ne':

—Li yichej yell Babil6niana', ka le' nakle lall' na', kwenche bi gonle txen saaxyaka' chongake', na' bi ile'ile' yel' zak'zi'ka' ile'i ben'ka' lle' na'. ⁵ La' saaxyaka' chak yella' nakan dii zan inleeb, na' ngoo yichj Chioza' dii malka' chongake'. ⁶ Ka ba bsak'zi'gake' ben', ka'kzan sak'zi'gake'. Yel' zak'zi' xench yen ile'gakile' aga ka daa ba bengakile' ben', axt chopl6 ka daa bchi' bsak'gake' ben' yen ile'gakile'. ⁷ Ka to ba be'la'o kwingake' na' ka to ba biba bizakgake' bengake' daa nazan chegake', ka'kzan illaglogaken' na' kwellyesh'gake' lao yel' zak'zi' che'ka'. La' loo yichjlall'do'eka' nan: "Ni zoanto' ka ben' wñabia'. Bi naknto' ka ben' ba

bzeb na' biga kwellyesh'nto.'" 8 Na' daa nagake'ka', shllazə yen ile'gakile' yel' zak'zi'ki: balgake' guet, na' ben'ka' yigaan kwellyesh'gake' na' ibil idongake', na' sheygake' lo yi'na', la' ben' yel' wak choo yel' wak xen nak Xancho Chioza', beena' ba bchogloe' chegake'.

9 Na' ben' wñabia'ka' lle' yell-lioni ben'ka' ben legake' txen ben-gake' yel' wdana' na' biba bizakgakile' lawi daa na' beli chen che'ka', kwellyesh'gake' ni che yell Babilóniana' kat' ile'gakile' chasan llenna' daa cheyan. 10 Na' segake' zit'lə daa chllebgake' yel' zak'zi'na' chllaglo ben'ka' lle' na', na' inagake':

—iNyesh'laz inlleb chak cho', yell Babilonia, li' le zeyi cho' chñabi'ol' La' tolbe' ba bla' yel' zak'zi' cho'ni.

11 Na' ben'ka' chit' chde lo yell-lioni lekzka' kwellgake' na' gakyesh'gakile' ni cheyin, la' kochno zoa no si' diika' chit' chdegake', 12 diika' nak de or, de plat, yaj wan, perla, lech' shao' de lino na' de sed, lech' morad na' dii xñalil, na' biya yagla' dii chla' zix, no diika' chongakile' loşh lefantka' na' de yagla' diika' nak mbalaz inlleb, na'ch de ya, na' de yajes. 13 Na' lekzka' chit' chdegake' canel, clab pimient, yal, set zix, nill' che yag dii chla' zix, vino, set, yezj widi, trigo, bayix' ba choa' yoa', xil', kabay na' karret daa chgoyogakb, ga biyollin axt chit' chdetegake' ben' gon xshin ben'.

14 Na' ye'gake' ben'ka' lle' yella':
—Bichbi yel' shao' cheleka' de, diika' bibaile. Ba binit yel' wni'a cheleka' na' bichga ile'ile' dii wen dii shao'ka'.

15 Na' ben'ka' bet' bde chiya diika' bsa'gake' na' bni'agake' daa bet' bdegake'n yella', zit'lə segake' daa chllebgake' yel' zak'zi'na' chllaglo ben'ka' lle' na', na' kwellyesh'gake'. 16 Na' inagake':

—iNyesh'laz inlleb chak che yella' le wzeyi cheyi, gana' gokwgake' lech' shao'ka' nak de lino, na' lech' morad na' dii xñalil, daa da' or, perla na'ch yaj wan! 17 iLa' tolbe' binit yel' wni'a cheyinna'!

Na' yog' ben'ka' chsa' barkwka', na' yog' ben'ka' choogake'n, na' ben'ka' chon llin loo barkwka', na' yog' ben'ka' chon llin loo nisdona' kwenche cheej chaogake', segake' zit'lə wwiagake'n. 18 Na' ka ile'gakile' chey yella' na' gosyaagake', inagake':

—iBichga zoa sto yell dii zaklebin yelli dga le zeyi cheyin!

19 Na' yillee bishte yona' yichje'ka', leyi kwellyesh'gake', na' gosyaagake' inagake':

—iNyesh'laz inlleb chak che yelli dga le zeyi cheyin! Yog' ben'ka' wdalen barkwka' lo nisdona' bni'alengake' yel' shao' cheyinna'. iNa' tolbe' ba williayi'n!

20 Ka le' lle'le yabana', le' nakle lall' na' Chioza', na' ka le' bselee we'le xtilleena', na' ka le' nakle ben' wdixjee daa wna Chioza' le', li yiba yizaki, la' Chioza' ba bizi'e wzonna' daa bchi' bsak'gake' le'.

21 Na'ch to anjl, ben' wal, blise' to yaj xen inlleb na' bzaleen loo nisdona', na' chi'e:

—Kan' gak che yell Babilóniana' daa le zeyi cheyin, na' bichga llia ile'i ben' len. 22 Bichga yeni ben' chsillgake' árpana', ni ben' chkwel no bllej no trompet lawinna'. Ni bichga soa ben' wlan wde wdeli llin, ni bich gak sshag che yaj molinna'. 23 Bich bi beeni' che yi' kandil gat' lawinna', ni bich bi lni' che wishagna' gat' lawinna'. La' ben'ka' bet' bde bi de cheyin lawinna' gokgake' ben' choo ben' xen yell-lioni, na' ben' Babilóniaka' wxiye'lengake' yel' willa' che'ka' yog' ben' lle' yell-lioni. 24 Na' lawinna'

betgake' beṅ'ka' wdixjee daa goll Chioza' legake' len beṅ'ka' nak lall' nee, na' ndobgakile' yeḷ' wit che yog' beṅ' ba betgake' doxen lo yell-lioni.

19

¹ Ka biyoll ble'id' diiki, benid' chosyaa beṅ' zan yabana', nagake':

ḷWe'la'ocho Chioza'!

Xancho Chioza', beena' chisla beṅ'ka' nonḷilall'gake'ne',

chidoḷee sho'e balaṅ na' inabi'e toshiizi,

² la' len' chone' yeḷ' joschis kon ka chiyal' gakan.

Ba blliajee yella' daa le wzeyi cheyi.

Yelli zaklebin nool wdana' daa wlooyel'gake' beṅ' yell-liona' bengake' legake' txen bxinj blengake'.

Ba bizi'e wzon che beṅ'ka' nak lall' nee, beṅ'ka' betgake'.

³ Na'ch wiznagake' sto shii:

—ḷWe'la'ocho Chioza'! Ba wlliayi' wlliaje yella' toshiizi.

⁴ Na' beṅ'ka' tapichoa len beṅ'ka' zi tap, beṅ'ka' zoa xilin, bçhek' xibe'ka' na' yichje'ka' bllinan axt lo yona' be'la'ogake' Chioza', beena' llia gana' chnabi'e. Na' nagake':

—Kan' nakan. We'la'ocho Chioza'.

⁵ Na' gana' llie' chnabi'e benid' wne to beṅ', na' ne':

Li we'la'o Chios chechona',

yog'loḷ-le le' nakle lall' nee na' chall chlleblene',

ka beṅ' zakii ka beṅ' bi zakii.

Yeḷ' wishagna' che Beena' Zaklebi to Xil'do'

⁶ Na' benid' shii beṅ' zan inleeb, na' nenan ka nen to yao xen daa chxop cho'a bnanja' na' ka ga chne to wziw' xen inleeb, nagake':

ḷWe'la'ocho Chioza'!

Xancho Chios, beṅ' yeḷ' wak choo yeḷ' wak xenna', ba wzoloe' chnabi'e.

⁷ Yiba yizakicho dii xen wal na' koochone' balaṅ.

La' ba bllin lla wshagna' Beena' Zaklebi to Xil'do'.

Na' beṅ'ka' nonḷilall' le' ba ze kwasgake' chbezgake'ne' ka chon noola' llana' wshagnee.

⁸ Na' ba bi'e twej xagake' de lech' shao' dii nxi nyech na' chep cheeni'n.

Na' lech' shawaa zaklebin dii wenka' bengake'.

⁹ Na' wna anjla' nad':

—Bzej dga: “Chakomba beṅ'ka' gox wṅab Jesucristona' soagake' kat' gak yeḷ' wishagna'na'.”

Na' wne':

—Diikin dill' li che Chioza'.

¹⁰ Na' bçhek' xibaa lao anjla' kwenche nan we'lawaane', na' wne' nad':

—ḷBi gonon' ka! La' lekzka' wen llin che Chioza' nad', ka nako' li' na' ka bish' ljwello'ka', beṅ'ka' zoachehgake' chajle'gake' che Jesúza'. ḷBe'la'o Chioza'!

La' beṅ'ka' choe' dill' li che Jesúza', zoa Espíritu che Chioza' chzajniile' legake' kwenche we'gake' xtilleena'.

Beena' llia koll' kabay llyisha'

¹¹ Na' ble'id' nyalje yabana' na' bli'lao to kabay llyish. Na' beena' llie'b lie' Beṅ' Chon Kon Ka Ne' na' Cho'e Dill' Li. Na' chçhogloe' che beṅ' kon ka chidoḷ' gone' chegake', na' chdil-lene' beṅ'ka' chidoḷ' til-lene'. ¹² Jalawe'na' chzeeni'gakan ka beḷ' yi', na' nllin yichje'na' dii zan corona. Na' da'n to lie' daa toze' le' nombi'e. ¹³ Na' nakwe' to xe' dii nak ka dii wleej chen, na'

lie' Cho'a Xtill' Chios. ¹⁴ Na' nchi'e wen wdil che'ka', ben'ka' lle' yabana', na' nakwgake' lech' shao' daa nxi nyech, na' kabayka' lliagake' nakgakb ba llyish. ¹⁵ Na' chchej cho'ena' to spad dii nlatit kwenche williayi'lene'n ben'ka' lle' yell-lioni. Na' inabi'e legake', na' bi si'xene' che nottez ben' bi chzenag che'. Na' lo yel' chllaa che Chios, ben' yel' wak choo yel' wak xenna', wsak'zi'e legake' gonile' legake' ka chon to ben' chlej chshoshj uvana' kwenche chzin. ¹⁶ Lee lechaa nakwe' ka do lee xichje'na' da'n lie'na', nan: "Ben' zeelo nak Xan yog'lol ben', na' Ben' liizelozi chnabia' lao yog'lol ben'."

¹⁷ Na' ble'id' to anjl zie' lo wbilldo'na', na' chosyee, chi'e yog' baka' ze xan yabana':

—Li yidop yillag kwenche yeej gaole to xshe' xen daa ba ben Chioza' chele. ¹⁸ Na' gaole xpel' ben' wnabia'ka', na' che ben'ka' ngoo lall' na' wen wdilka', na' che ben' walka', na' gaole xpel' kabayka' na' che ben'ka' chbiab. Na' gaole xpel' yog'lol ben', ka ben' ndoo lla yel chone' xshin ben' ka ben' chon llin chekze', ka ben' zakii ka ben' bi zakii.

¹⁹ Na' ble'id' bayixaa, bana' bchej loo nisdona' len ben' wnabia'ka' chnabia' lo yell-lioni na' wen wdil che'ka' bidop billaggake' kwenche til-lengake' beena' lliia kabaya' na' wen wdil che'ka'. ²⁰ Na' be'x'gake' bayixaa bchej loo nisdona' len bana' chyixjee xtill'ba', bana' ben chiya yel' wak gana' lliia bayixaa. Na' daa bem ka' wxiye'b ben'ka' be' latj sho'gake' sen che bayixaa na' be'la'ogake' Iwaa lsak'ba'. Na' shi'a shbangakb bzalee chopteb lo yi'na' chal'nin daa nchix azufrena'. ²¹ Na' ben'ka' len legakb, beti beena' lliia kabaya' legake' spad daa chchej cho'ena', na' yog'lol baka' ze xan yabana' belj blla'gakib xpeleeka'.

20

Wseje' dii xiwaa' to mil yiz

¹ Na' ble'id' to anjl chetje' yabana', na' noxee xiinya che yecha' daa bi chiyoll chido nak zitj na' noxee sto gden xen. ² Na' anjla' bcheje' bayix' xnana', bana' nak bel kani'teyi, leban dii xiwaa na' Satanáza', na' bcheje'n to mil yiz. ³ Na' bzaleen loo yecha' daa bi chiyoll chido nak zitj, na' bsejtipe'n kwenche shejan to mil yiz na' bich siye'n ben' yell-lioka'. Ka yiyoll gak to mil yiz na' yiselle'n xtit.

⁴ Na'ch ble'id' gana' lliia ben'ka' gok lo na'gake' gongake' yel' joschisa'. Na' lezkka' ble'id' ben'ka' bhoggake' yene'ka' ni cheyi daa be'gake' xtill' Jesúsza' na' cho'a xtill' Chioza'. Legaken' bi be'la'ogake' bayixaa bchej loo nisdona' ni bi be'gake' latj ta' sen cheba' loxgue'ka' wa neeka'. Na' bibangake' sto shii na' wnabia'lengake' Crístona' to mil yiz. ⁵ Legaken' ben' nechka' yiban ladj ben' wetka'. Na' ben' wetka' sto, ka biyollch bza' de to mil yiza' bibangake'. ⁶ Chakomba ben'ka' yiban nech ladj ben' wetka', la' ben'kan' nak lall' na' Chioza'. Na' bi ile'gakile' yel' wit wchopina', san gaggake' bxoz che Chioza' na' che Crístona' na' inabia'lengake'ne' to mil yiz.

⁷ Kat' yiyoll iza' de to mil yiza', yiselle' Satanáza' gana' ncheje'n. ⁸ Na' tan siye'n ben'ka' lle' tap laate yell-lioni, ben'ka' zaklebgake' ben'ka' lle' yellka' le Gog na' Magog, na' wtopan legake' kwenche shajlengake'n lo wdila', na' gaggake' ben' be ben' zil ka yoxa' chi' cho'a nisdona'. ⁹ Na' bllesh bcheengake' doxen lo yell-lioni na' wyechjgake' yella' daa le chaki Chioza', gana' lle' ben'ka' nak lall' nee, nan williayi'gake' legake'. Per Chioza' bletje' yi'na' xan yabana' bisya bislenen legake'. ¹⁰ Na' bzalee dii

x̄iwaa, daa wxiye'n l̄egake', lo yi' gabīla' daa n̄chix' azúfrena', gana' bz̄alee bayix̄aa b̄chej l̄oo nisa' na' bana' wdix̄jeeb xtill'ba'. Nan' illaglogakan yel' zak'zi'na' ka tella ka wal̄ zejli kañi.

Chioza' gone' yel' jos̄chis che ben' wetka'

¹¹ Na' ble'id' gana' l̄lia Chioza' ch̄nabi'e, nakan to dii llyish na' to dii xen. Na' lawe'na' binitlo yell-lioni len yabana', na' koch no ble'i l̄egakan. ¹² Na' ble'id' ben' wetka', ka ben' zakii na' ka ben' bi zakii, zegake' lao Chioza' gana' l̄lie' ch̄nabi'e. Na' bsalje' librka', na'tech bsalje' sto libr yobl̄e gana' da' le ben'ka' de yel' mban cheyin zejli kañi. Na' bene' yel' jos̄chis che ben' wetka' kon ka choe' librka' dill' ben to toe'. ¹³ Na' biban yog' ben'ka' wit l̄oo nisdona', na' ben' wetka' lle' latj che yel' wita' gana' le Hades, * na' yog'lol̄gake' gok yel' jos̄chis che'ka' kon ka ben to toe'. ¹⁴ Na'ch l̄ekzka' bz̄al' Chioza' yel' wita' na' latja' le Hades lo yi' gabīla'. Na' lo yi' gabīlan' nakan yel' wit wchopina'. ¹⁵ Na' bz̄alee lo yi' gabīla' ben'ka' bi da' lie'ka' l̄ee libra' gana' da' le ben'ka' de yel' mban cheyin zejli kañi.

21

To yaba kob na' sto yell-lio kob

¹ Na'ch ble'id' to yaba kob na' sto yell-lio kob, l̄a' yaba necha' na' yell-lio necha' binitlogakan na' l̄ekzka' nisdona'. ² Na' ble'id' yell che Chioza', yell koba' le Jerusalén chetjan yabana' gana' l̄lia Chioza'. Ba none'n xochi ka to nool̄e ben' ba nakwe' xe'na' kwenche wshagna'lene' ben' che'na'. ³ Na' gana' l̄lia beena' ch̄nabia', benid' wne to ben' zillj inl̄leb, ne':

—Chioza' ba zoe' ladj ben' yell-lioka' n̄aa. Na' soalene' l̄egake', na' gake' yel' che', na' kwin Chioza' soalene' l̄egake' na' we'la'ogake'ne'. ⁴ Na' gone' ka bich gat' daa gonyeshiin l̄egake'. Bich bi yel' wit gat', ni kochno kwell, ni koch no gakyeshii, ni koch no shey l̄a, l̄a' ba wde che yog' diika' got' lo yell-lio necha'.

⁵ Na' beena' l̄lia gana' ch̄nabi'e wne' nad':

—Nadaan chikob' yog'lol̄te.

Na' l̄ekzka' wne' nad':

—Bzej dill'ki, l̄a' nakgakan dii l̄i na' nakgakan dii gak wx̄enilall' ben'.

⁶ Na' l̄ekzka' wne' nad':

—Ba gok daa chiya' l̄'gak. Nadaan zaklebid' letr necha' le A* daa ba zoakz' ka wx̄e wzil yell-lioni, na' daa zoakz' kat' te cheyin zaklebid' letra' chiyollin daa le Z.† Nad'kzan b̄xe bsil' yog'lol̄ dii de, na' nad'kzan gon' ka te chegakin. Na' beena' ch̄bili, wi'ane' nis daa nsa' yel' mbanna' na' bibi sakile'n. ⁷ Beena' so saki soacheche' gonl̄ilallee nad', gaki che' dii wen dii shao' daa ba wnia' gaki che', na' nad' gak Chios che' na' le' gake' bi' cha'. ⁸ San ka nak ben'ka' bl̄leb gon nad' t̄xen, na' ben'ka' bi wyajl̄e' cha', na' ben'ka' chongake' daa chakzbanid', na' ben' wen xyaka', ben'ka' ch̄nelen l̄jwellin, ben'ka' n̄lan yel' willa'na', ben'ka' choe'la'o yaj yagka', na' yog'lol̄ ben' wxiye'ka', l̄egaken' chidol̄gake' shajgake' lo yi' gabīla' daa n̄chix' azúfrena', na' l̄ennan' yel' wit wchopina'.

Yell Jerusalénna' daa nak dii kob

⁹ Na' gana' zia' bid to anjl̄ beena' len anjl̄ka' gall, ben'ka' nox' gall kopka' nakgakan tolla' yel' zak'zi'ka' zeelo, na' wne' nad':

* 20:13 * 21:6 Letr necha' le A: de dill' griegona' letri len alfa. † 21:6 Letra' chiyollin daa le Z: de dill' griegona' letri len omega.

—Da, wliid' li' xool Beena' Zaklebi to Xil'do'.

¹⁰ Na' Espíritu che Chioza' bene' kwenche wyaalen' anjla' to lo yaa xen na' dii sibə, na' bliile' nad' yell Jerusalénna' daa nak yell che Chioza', chetjan yabalə gana' zoe'. ¹¹ Na' yella' chey cheeni'n daa yoon yel' chey cheeni' che Chioza', na' chna'titan ka to yaj wan daa zakii daa le jaspe, daa chep yes ka vidr. ¹² To zee xen dii sibə nechjan yella' na' zoan shllin puert xen, na' to to cho'a puertka' ze twej anjl. Na' lekzka' to to lee puertka' llia le tkwen dia che dii Israela'. ¹³ Na' tap laate zeena' nechj yella' zoan shon wej puertka'. ¹⁴ Loo len zee xenna' nechj yella' yoon shllin yaj, na' da'gakan le shllinte postl che Jesucristona', Beena' Zaklebi to Xil'do'.

¹⁵ Na' anjl, beena' bshaljlene' nad', noxee to dii nak ka xis de or kwenche wchixile'n yella' len puertka' na'ch zee daa nechjan. ¹⁶ Na' yella' toz ka nakan de tonlə na'ch de zlag'lə. Na' bchix anjla' yella' na' nakan chopə mil chop guiyoa kilómetro, na' toz ka nakan ka de tonlə, ka de siblə, na'ch ka de zlag'lə. ¹⁷ Na'ch bchixe' zeena' na' chillan to guiyoa tapiyon llit.† Kon ka chchixə nottezə ben', ka'kzə bchix anjlan'.

¹⁸ Na' zeena' daa nechj yella' nakan de yaj wan daa le jaspe, na' yella' nakan de or dowalj daa chep yes ka vidr. ¹⁹ Na' yajka' yoo loo len zeena' nakan xochi, nakan de biya yaj wan. Dii necha' nakan yaj wan daa le jaspe, de wchopina' nakan yaj wan daa le zafiro, de wyonina' nakan yaj wan daa le ágata, de wdapina' nakan yaj wan daa le esmeralda, ²⁰ de gayi'na' nakan yaj wan daa le ónice, de wxopina' nakan yaj wan daa le cornalina, de gállina' nakan yaj wan daa le crisólito, de wxoni'na' nakan yaj wan daa le berilo, de gayina' nakan yaj wan daa le topacio, de shiyina' nakan yaj wan daa le crisoprasa, de shnejina' nakan yaj wan daa le jacinto, na'ch de shllinina' nakan yaj wan daa le amatista. ²¹ Na' puertka' shllin nakgakan shllin perla, to to puertka' nakan de toz perla. Na' nez daa chde yella' nakan de or dowalj daa chep yes ka vidr.

²² Na' ni to yoodo' bi ble'id' yella', la' kwín Xancho Chioza', beena' nak liizelozi ben' yel' wak choo yel' wak xen, len Jesucristona', Beena' Zaklebi to Xil'do', zoagake' ladj ben'ka' lle' na'. ²³ Na' yella' bi byalljin wbillə' ni beo'do'na' kwenche wzeeni'gakan lawinna', la' yel' chey cheeni' che Chioza' na' che Jesucristona', Beena' Zaklebi to Xil'do', chzeeni'n lawinna'. ²⁴ Na' ben'ka' za' doxen lo yell-liona' soagake' lao beeni' che Chioza' de yella'. Na' ben'ka' chnabia' yell-lioni wsa'gake' yel' zakii che'ka' na' balaan che'ka' yella'. ²⁵ Na' puertka' zoa yella' toshiizi iyaljgakan, la' bichbi wal gat' na'. ²⁶ Na' yisa'gake' yella' do ka nak balaan na' yel' zakii che naciónka'. ²⁷ Na' biga sho' ni to dii nda' nchen dii mal, ni nottez ben' chon dii chakzbani Chioza', ni ben' chziye', san toz ben'ka' da' lie'ka' lee libr che Beena' Zaklebi to Xil'do', gana' da' le ben'ka' de yel' mban cheyin zejli kani.

22

Yao daa nsa'yel' mbanna'

¹ Na' bli'yi anjla' nad' to yao dii nxi nyech yollan nis daa nsa' yel' mbanna', na' nakan nis xtil inleeb ka'kzə vidr. Na' chchejan gana' llia Chioza' chnabi'e len Jesucristona', Beena' Zaklebi to Xil'do', ² na' chden gchol neza' daa chde yella'. Na' chop laate cho'a yawa' zoa yagka' nsa'

† 21:17 To guiyoa tapiyon llit: nakan ka do guiyon gay' metr.

ye! mbanna', na' ze tbeo' wej chbiagakan dii zixka', na' shllin shii chbiagakan twiz. Na' xlaguiinka' nakgakan bell rmech che ben' yell-lioka'.³ Na' bibi daa nashj bia' blag' cheyin gat'ch yella', la' nan' kwia Chioza' inabia'lene' Jesucristona', Beena' Zaklebi to Xil'do'. Na' yog' ben'ka' lle' na' we'la'ogake'ne'.⁴ Na' ile'gakile'ne' kon ka nakyenee, na' ta' lie'na' loxgue'ka'.⁵ Aga bich bi wal gat', ni bich bi yi' kandil iyalljgakile' ni beeni' che wbilldo'na', la' beeni' che Xancho Chioza' wzeeni'n gana' soagake', na' inabia'gake' zejli kani.

Ba zoa yila' Jesucristona'

⁶Na' wna anjla' nad':

—Dill'ki nakgakan dii li na' nakgakan dii gak wxenilall' ben'. Xancho Chioza', beena' chxoaxtilleena' cho'a loll' ben'ka' chyixjee daa chi'e legake', ba bselee nad' nak' anjl che' kwenche wliid' ben'ka' nak lall' nee daa ba zoa gaoshosh gak.

⁷—jBa zoa gaoshosh ziyed'!

Chakomba beena' ze wneyi dill'ki llia lee libri cheyi diika' ba wna Chioza' gak.

⁸Nad', Juan, ben ble'id' diiki. Na' ka biyoll ben ble'ida'n, bchek' xib' nan we'lawaa anjla', beena' bli'yi nad' diika'.⁹ Na' le' wne' nad':

—jBi gono' ka! Nad' nak' wen llin che Chioza' ka li' na' ka bish' ljwello'ka', ben'ka' cho'e cho'a xtill' Chioza', na' ka yog' ben'ka' zegake' kwent wneyi daa llia lee libri. Toz Chiozan' chiya! we'lawoo.

¹⁰Na' lezkka' wne' nad':

—Bi wkwashoo dga ba bzejo' lee libri, dga chyixje'n che diika' wna Chioza' gak, la' ba zoa gaoshosh gakan.¹¹ Ben' mala' shajlenshaze' dii mala' chone', na' beena' nda' nchen saaxyana' shajlenshaze' saaxya che'na'; na' ben' wenna' soatezi soe' gone' wen, na' beena' nak lall' na' Chioza' soatezi soe' gonche' daa cheeni Chioza'.

¹²—jBa zoa gaoshosh ziyed'! Na' wi'a daa chidol' to to ben' kon ka nak daa ben to toe'.¹³ Nadaan zaklebid' letr necha' le A* daa ba zoakz' ka wxwzill' yell-lioni, na' daa zoakz' kat' te cheyin zaklebid' letra' chiyollin daa le Z,† Nad'kzan bxe bsil' yog'lol' dii de na' nad'kzan gon' ka te cheyin.

¹⁴Chakomba ben'ka' chnabgakile' nad' yixis yiyib' yichjlall'do'eka', kwenche idol'gake' gaogake' dii zixa' llia lo yaga' daa nsa' ye! mbanna', na' sho'gake' cho'a puert che yella'.¹⁵ San bi gak sho' ben' malka', ben'ka' nlan ye! willa'na', ben'ka' chnelen ljwellin, ben' wen xyaka', ben'ka' choe'la'o lwaa lsak' diika' non chios chegake', na'ch yog' ben'ka' chibayi siye'.

¹⁶Nad', Jesús, ba bse!aa anjl cha'na' kwenche bzajniile' li' diiki ba bzejo' na' wi'on dill' lao ben'ka' chdop chllag choe'la'ogake' nad'. Nad' nak' xiin dia che dii Davina', na' zaklebid' belj xsila' daa chna'tit.

¹⁷Na' Espíritu che Chioza', na' cho' zaklebicho noola' wshagna'lene' Jesucristona' daa nonlilall'chone', che'chone':

—jBida!

Na' beena' yeni dill'ki yeene':

—jBida!

Nottez' ben' chbili, wak yide' na' yeeje' nisa' daa nsa' ye! mbanna', na' aga bi sakile'n.

* 22:13 Letr necha' le A: de dill' griegona' letri len alfa. † 22:13 Letra' chiyollin daa le Z: de dill' griegona' letri len omega.

¹⁸ Nad' chsi'nid' yog' ben' yeni dill'ki llia lee libri cheyi diika' wna Chioza' gak: Shi no chixoatelə cheyin lo dill'ki, Chioza' wdie'ne' lao yel' zak'zi'ka' ba bzetje' lee libri. ¹⁹ Na' shi no yikwas bal' dill'ki llia lee libri cheyi diika' wna Chioza' gak, Chioza' bi wi'e latj gawe' dii zixa' llia yaga' daa nsa' yel' mbanna', ni bi wi'e latj sho'e yell che'na', diiki choe' libri dill' cheyin.

²⁰ Jesúsza', beena' bzajni nad' diiki, ne':

—Dii li, ba zoa gaoshosh yiyed'.

Kan' nakan. ¡Bidagach, Xan' Jesús!

²¹ Na' yel' goklen che Xancho Jesucristona' soalenshgan yog'lo!tele. Kan' gakan.